


Uwien ya Jotiefɛnku  
ya gbɔnku



The New Testament in the Ngangam language of Togo

**Uwien ya Jɔtiefɛnku ya gbɔnku**  
**The New Testament in the Ngangam language of Togo**

copyright © 2011 Wycliffe Bible Translators, Inc.

Language: Ngangam

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ngangam

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 23 Aug 2023 from source files dated 29 Jan 2022

f30fbe0b-cda1-5a60-a4ee-8be80c6caef6

## Contents

Matie . . . . .	1
Mark . . . . .	43
Luk . . . . .	69
San . . . . .	112
Itùon . . . . .	142
Erom yaab . . . . .	181
1 Korɛnt yaab . . . . .	199
2 Korɛnt yaab . . . . .	216
Galasi yaab . . . . .	227
Efes yaab . . . . .	234
Filip yaab . . . . .	240
Kolɔs yaab . . . . .	245
1 Tesalonik yaab . . . . .	250
2 Tesalonik yaab . . . . .	254
1 Timote . . . . .	257
2 Timote . . . . .	262
Tit . . . . .	266
Filemɔn . . . . .	269
Ebrembɛ . . . . .	271
Saak . . . . .	286
1 Pɛr . . . . .	291
2 Pɛr . . . . .	297
1 San . . . . .	300
2 San . . . . .	305
3 San . . . . .	306
Sud . . . . .	307
Mikpiirm . . . . .	309

## Tigbɛmɔnmɔnt tà Matie kɛle' tù nnɔ Nà wɔngɛh kugbɔnku kuu te ma bo

Matie yé Yesu Kristo ya panpaankaab piik nin bile nnɔ ya uba nɛ. U kɛle' u'gbɔnku kuu ki de' binib bà nnɔ lii yé Sufmbɛ nɛ ki pekre' ki paan' Kristo ya sɛn bo.

U wuɔn' kugbɔnku kuu ni ki ye Yesu nɛ yé uyo bo Uwien là pùon' Sufmbɛ ki ye u li sɔn wà wɔ ní baa kí lá ηmɛn bɛ kí li yé bi'ber nnɔ. U kɛle' Kujɔtiekpaaaku ya gbɔnku ya gber ku'ni tù yɛbe, ki wuɔn' Yesu sɔnsɔn' tù len' nà nnɔ ma bo, ki tɔke' ki ye Uwien ya bɛl nɛkn' ní ηɔ.

Kugbɔnku kuu ya cincinm, liyul 1 kí tí baa iyul 2, Matie lienh Yesu ya màam nin u'buwaam bo nɛ. Yesu yé ubɛr nɛ ki baa' wɔ ní ñɛn binib bi'biere ni.

Kí cin iyul 3:1 kí tí baa iyul 4:11, Matie lienh San sii' Yesu Uwien ya ñunm ma bo nin Satan biike' wɔ ma bo nɛ.

Kí cin iyul 4:12 kí tí baa 18: 35, Matie lienh Yesu tien' nà Galile ya tinfenm ni nnɔ nɛ. U pɔn' mikpɛnjɛnm mà yɛbe nɛ ki wɔkn' binib Uwien ya bɛl ya gber, ki cère' biwiɛnb faake' ki yɛbe.

Kí cin iyul 19 kí tí baa iyul 25, Yesu jon' Yerusalem bó, ki tí wɔkn' binib Uwien ya gber ni'bó. U wɔkn' binib ugbengbenyo ya gber, ki tɔke' bɛ ki ye bi la cère uba ní lɛre kí tuln bɛ.

Kí cin iyul 26 kí tí baa iyul 28, Matie lienh Sufmbɛ ya ciɛnb cuo' Yesu, ki cère' bi bun' wɔ tibuur, ki kpɛ' wɔ udɔpɔnpɔn bo nin u mɛkre' ma bo ya gber nɛ.

### *Yesu ya yaajɛb ya yel (Luk 3:23-38)*

<sup>1</sup> \*Yesu Kristo ya yaajɛb ya yel ya gbɔnku sɔ nɔ. U là yé \*Dafid ya yaabil nɛ, nɛ Dafid mɔ yé \*Abraham ya yaabil. <sup>2</sup> \*Abraham là maa' \*Isaak, nɛ \*Isaak mɔ maa' \*Sakɔb, \*Sakɔb mɔ maa' Suda nin u'ninjɛb. <sup>3</sup> Suda mɔ maa' Farɛs nin Sera. Bi'naa ya yel si Tamar. Farɛs mɔ maa' Esilɔm, Esilɔm mɔ maa' Alam, <sup>4</sup> Alam mɔ maa' Aminadab, Aminadab mɔ maa' Nasɔn, Nasɔn mɔ maa' Salima, <sup>5</sup> Salima mɔ maa' Bos. U'naa ya yel si Lahab. Bos mɔ maa' Yobɛd. U'naa ya yel si Lut. Yobɛd mɔ maa' Yɛse, <sup>6</sup> Yɛse mɔ maa' ubɛr \*Dafid. \*Dafid mɔ maa' Salomɔn. U'naa là yé Yuri ya po nɛ, nɛ \*Dafid taa' wɔ ki kuɔn'. <sup>7</sup> Salomɔn mɔ maa' Erobowam, Erobowam mɔ maa' Abiya, Abiya mɔ maa' Asafu, <sup>8</sup> Asafu mɔ maa' Yosafat, Yosafat mɔ maa' Yolam, Yolam mɔ maa' Osiyas, <sup>9</sup> Osiyas mɔ maa' Yowatam, Yowatam mɔ maa' Ahas, Ahas mɔ maa' Esekiyas, <sup>10</sup> Esekiyas mɔ maa' Manase, Manase mɔ maa' Amos, Amos mɔ maa' Yosiyas, <sup>11</sup> Yosiyas mɔ maa' Yekoniya nin u'ninjɛb uyo wà Israyɛl yaab ya nɛnnɛndb là tɔn' nin bɛ lituɔl ki cuo' bɛ ki jon' \*Babilonn nnɔ. <sup>12</sup> Bi cuo' bɛ ki jon' Babilonn ma nnɔ, ni ya puoli bó nɛ Yekoniya maa' Salatiɛl, Salatiɛl mɔ maa' Sorobabel, <sup>13</sup> Sorobabel mɔ maa' Abiyud, Abiyud mɔ maa' Eliyakim, Eliyakim mɔ maa' Asɔ, <sup>14</sup> Asɔ mɔ maa' Sadɔk, Sadɔk mɔ maa' Akim, Akim mɔ maa' Eliyud, <sup>15</sup> Eliyud mɔ maa' Eleyasaa, Eleyasaa mɔ maa' Matan, Matan mɔ maa' \*Sakɔb, <sup>16</sup> \*Sakɔb mɔ maa' \*Yosɛf, wà yé Mari ya cɛ nnɔ. Mari mɔ maa' \*Yesu wà bi yih wɔ \*Uwien ya Nigɛndkɛ Kristo nnɔ.

<sup>17</sup> Kí ñɛ \*Abraham kí li ηmɔηmɔbe kí tí baa \*Dafid, bi là te yaajɛb piik nin binan nɛ. Kí ñɛ \*Dafid kí li ηmɔηmɔbe kí tí baa uyo wà Israyɛl yaab ya nɛnnɛndb là cuo' bɛ ki jon' Babilonn nnɔ, bi'mɔ là te yaajɛb piik nin binan nɛ. Uyo wà bi'nɛnnɛndb là cuo' bɛ ki jon' Babilonn nnɔ kí li ηmɔηmɔbe kí tí baa \*Uwien ya Nigɛndkɛ Kristo ya yo, bi'mɔ là te yaajɛb piik nin binan nɛ.

*Yesu ya m̀dam ya gber*  
(Luk 2:1-7)

<sup>18</sup> Bi maa' Yesu Kristo ma bo sɔ. Bi là pun' u'naa Mari uje uba ne bi yih wɔ \*Yosef. Wa laan là kuɔn' wɔ, ne \*Mifuoñaanm c̀ere' u punbe'. <sup>19</sup> U'cɛ \*Yosef yé ugbem̀ndaan ma nnɔ, ne kí yíe wɔ ń bɔle kí n̄ɔre wɔ n̄ɔ tigber nnɔ la n̄e saali. <sup>20</sup> U maaleh nnɔ ma nnɔ, ne ki laa' Yonbdaan ya tond uba tideknt ni. Utond nnɔ t̀ake' wɔ ki ye: «\*Yosef, \*Dafid ya yaabile, la fenge kí ye n̄a ń taa a'po Mari kí baa a'den, kime \*Mifuoñaanm ne c̀ere' u punbe'. <sup>21</sup> U li maa kibujebuk, ne á yin k̀e \*Yesu\*, kime wɔn ne li n̄en u'bol yaab bi'biere ni.»

<sup>22</sup> N̄en ke là tien' n̄ɔ Yonbdaan là c̀ere' u'ñɔbonsɔknl len' nà nnɔ, n̄e ń tien ne. U là len' ki ye: <sup>23</sup> «Ujefaan wà n̄a ben je li punbe kí maa kibujebuk. Bi li yin k̀e Emaniel.» Ni'tingi si: «Uwien te nin t̄e.»

<sup>24</sup> Ne \*Yosef finde', ki tien' Yonbdaan ya tond t̀ake' wɔ ki ye wɔ ń tien nà nnɔ, ne ki taa' u'po Mari, <sup>25</sup> ka duɔn' nin wɔ haali u t̄i maa' kibujebuk, ne u yin' k̀e Yesu.

## 2

*Bibenbenb biba baa' ki puke' Yesu*

<sup>1</sup> Tɔ, bi maa' \*Yesu Betelem ya du ni ne, Sude ya tinfenm ni, uyo wà Herod yé uber nnɔ. Bi maa' \*Yesu ma nnɔ, ne binib bà n̄mɔbe mibenm in̄maabii bo ya biba n̄en' lenpuoli bó ní ki baa' Yerusalem, <sup>2</sup> ne ki niire' ki ye: «Bi maa' kibuk kà kí yé Sufmbɛ ya ber nnɔ te le saan-i? Kime ti laa' ki'n̄maabil lenpuoli bó ne ki baa' t̄i puke k̀e.» <sup>3</sup> Uber Herod nin Yerusalem ya nib ke cii' tigber nnɔ ma nnɔ, ne t̀u beke' be c̄ɛen. <sup>4</sup> Ne u yin' \*Sufmbɛ nin \*bitɔtuɔrcienb nin \*Yiko ya wɔnwɔknb ke, ki niire' be ki ye bi li maa Uwien ya Nigendke Kristo le saan-i?

<sup>5</sup> Ne bi ye: «Betelem ya du wà te Sude ya tinfenm ni nnɔ ni, kime \*Uwien ya n̄ɔbonsɔknl là k̀e' ki ye Uwien ye:

<sup>6</sup> «Sin Betelem ya du wà te Sude ya tinfenm ni nnɔ, n̄a mɔnbe ki yé dufenm Sude ya tinfenm ya du ke ni, kime uber li n̄e sin ni ne, kí li yé wà li likeh n'nib Israyel yaab.»

<sup>7</sup> N̄en bo ne Herod bɔle' ki yin' bibenbenb nnɔ, ki niire' be lin̄maabil nnɔ cinbe ki puɔ' uyo wà, <sup>8</sup> ne ki sɔn' be Betelem bó ki ye: «Li joh m̄en kí t̄i nuun kí bende kibuk nnɔ ya gber mɔnmɔnm. Ni laa' k̀e la, ní liebe ní kí lá t̀ake nni, n'mɔ ń jo kí t̄i puke k̀e.»

<sup>9</sup> U len' ki gben', ne bi siere' ki bure'. Bi joh ma nnɔ ne ki laa' lin̄maabil là bi là laa' l̀e lenpuoli bó nnɔ, le be usen ki t̄i baa' kibuk nnɔ te nà saan nnɔ, ne ki sere' ni'saan paaki. <sup>10</sup> Bi laa' l̀e nnɔ ma nnɔ, ne bi'yenm s̄onge' ki t̄i k̄ende'. <sup>11</sup> Bi kɔn' iden nnɔ, ne ki laa' kibuk nnɔ nin ki'naa Mari. Bi gbaan', ki puke' kibuk nnɔ, ki n̄en' bi'kɔl ni tibonmɔnm̄ont ki de' k̀e. Bi de' k̀e miñɔkm nin lin̄ubl liba bi yih l̀e ansan nin mikpɔm miba bi yih m̀e miir\*.

<sup>12</sup> Ni ya puoli bó ne Uwien t̀ake' be tideknt ni ki ye bi la liebe uber Herod bó. N̄en bo ne bi n̄en' usenpaanke ki kun'.

*Bi taa' Yesu ki s̄en' ki jon' Esipt bó*

<sup>13</sup> Bi kun' ma nnɔ ne \*Yosef laa' Yonbdaan ya tond uba tideknt ni. Ne utond nnɔ t̀ake' wɔ ki ye: «Fii kí taa kibuk kie nɔ nin ki'naa kí s̄en kí jo \*Esipt bó, kí t̄i ń li te ni'bó, kí li gu lidaali là n li t̀ake n̄e kí ye á liebe ní, kime uber Herod li nuun kibuk nnɔ wɔ ń ku k̀e.»

<sup>14</sup> N̄en saan ne Yosef fii' ki taa' kibuk nnɔ nin ki'naa kuñɔnku ki jon' \*Esipt, <sup>15</sup> ki t̄i te ni'bó haali Herod t̄i kpo'. Ni tien' n̄ɔ Yonbdaan là c̀ere' u'ñɔbonsɔknl len' nà nnɔ n̄e ń tien ne. U là ye: «Uwien ye: «N yin' n'buk k̀e ń n̄e ní \*Esipt ni.»

*Uber Herod ku' mubujebumu*

\* **1:21** Yesu ya tingi si: Uwien n̄miendeh binib ne. \* **2:11** Miir yé mikpɔm miba ya bol ne. Bi taah kusiiku kuba ya bol ya siim ne ki teh m̀e. Mi'daaku faa c̄ɛen ne.

<sup>16</sup> Tɔ, Herod bende' ki ye bibenbenb nnɔ lere' wɔ ma nnɔ, nɛ u'benku ni ben' ki gbien', nɛ u cɛre' u'sojambɛ ku' Betelem ya du nin u'dugbaan kɛ ya bujɛbumu mɔa kɛ nɔmɔbe ibin ile nin mɔa nɔ laan baa' ibin ile nnɔ. U lɔ niire' bibenbenb nnɔ bi cinbe ki laa' linmaabil nnɔ uyo wɔ. Nɛn nɛ cɛre' u'jiɛ' ki kpaan' ibin ile. <sup>17</sup> U ku' mubumu nnɔ ma nnɔ nɛ nɔ tien' \*Uwien ya nɔbonsɔknl Seremi lɔ len' ma ki ye:

<sup>18</sup> «Bi cii' imuɔ bɔ Lama ya du ni, udaan uba muɔh ikumuɔ, ki kpiɛndeh ki gbiekeh. Lasɛl nɛ muɔh u'bumu bo, uba nɔ nɔ fre kɔ suon wɔ, kimɛ u'bumu nɔ ji te.»

### *Bi taa' Yesu ki siere' Esipt ni*

<sup>19</sup> Nɔ tete, nɛ Herod ti kpo'. U kpo' ma nnɔ, nɛ \*Yosɛf laa' Yonbdaan ya tond uba tidɛknt ni, \*Esipt ni. <sup>20</sup> Nɛ u tɔke' wɔ ki ye: «Fii kɔ taa kibuk nnɔ nin ki'naa kɔ liebe Israyel ya du bɔ, kimɛ binib bɔ lɔ nuunh bɛ nɔ ku kɛ nnɔ kpo'-a.»

<sup>21</sup> Nɛ u fii' ki taa' kibuk nnɔ nin ki'naa, ki liebeh Israyel ya du bɔ. <sup>22</sup> \*Yosɛf cii' ubɛr Herod ya bijɛ Akelayus teke' u'baa ya bɛl Sude ya tinfɛnm ni. Nɛn bo nɛ u fɛnge', ka yie wɔ nɔ baa ni' bɔ, nɛ Uwien wuɔn' wɔ tidɛknt ni nɛ u bure' Galile ya tinfɛnm bɔ. <sup>23</sup> U ti baa', nɛ ki kɔ udu uba ni, bi yih wɔ Nasaret. Nɔ tien' nnɔ nɔ \*Uwien ya nɔbonsɔknb lɔ len' nɔ nnɔ nɛ nɔ tien nɛ. Bi lɔ len' ki ye: «Bi li yin wɔ Nasaret ya du ya nil nɛ.»

## 3

### *San wɔ siih binib Uwien ya nɔnm nnɔ ya gbɛr (Mark 1:1-8; Luk 3:1-18; San 1:19-28)*

<sup>1</sup> San wɔ siih binib Uwien ya nɔnm nnɔ baa' uyo uba ki te kupenpelku ni, Sude ya tinfɛnm ni, ki kpaandeh ki teh: <sup>2</sup> «Lɛbre mɛn ni'tetem, kimɛ Uwien ya bɛl nɛkn' nɔ nɔ.»

<sup>3</sup> \*Uwien ya nɔbonsɔknl Esayi lɔ len' San ya gbɛr ki ye: «Udaan uba te kupenpelku ni ki wuureh ki teh:

«Tɔre mɛn Yonbdaan ya sɛn, kɔ cubn u'sɛngbɛmu kɔ de wɔ.» »

<sup>4</sup> San lɔ guo liliɛrl lɔ nnɔ, bi taa' nɔkma ya kobr nɛ ki lon' lɛ. U lɔ gbin kugbɔnku ya ningbenl nɛ u'ciɛk ni. U'jier lɔ si inacu nin tisiir nɛ. <sup>5</sup> Binib nɛh nɔ Yerusalem nin Sude ya tinfɛnm kɛ nin Sudɛn ya kpenl ya tinfɛnm kɛ ni, ki bɔareh u'saan, <sup>6</sup> ki kpiireh bi'biere, nɛ u siih bɛ Uwien ya nɔnm, Sudɛn ya kpenl ni.

<sup>7</sup> San laa' \*Farisiɛnmbɛ nin Saduseyɛnmbɛ bɔareh u'saan ki yebe ki yie wɔ nɔ sɔi bɛ Uwien ya nɔnm. Nɛ u tɔke' bɛ ki ye: «Iwaalɛb ninbi, nɛ nɛ wuɔn' nɛ ni li tien ma kɔ nɛ Uwien ya benpiebe wɔ we nɔ nnɔ ni? <sup>8</sup> Li sɔnh mɛn itɔn yɔ wɔngɛh ki teh ni mɔnbe ki lɛbre' ni'tetem, <sup>9</sup> ki la li maaleh ni'yɛnm ni ki teh: «Ti'yaajɛ si \*Abraham ma nnɔ, nɔ dɛkre' nɛ», kimɛ n tɔkeh nɛ nɛ, Uwien li fre kɔ cɛre itɛn yie nɔ nɔ kɛnde \*Abraham ya yaabii. <sup>10</sup> Uwien bonde' liyɛl nɔ wɔ nɔ kɔkɛre isiin. Isiin yɔ kɛ nɔ lɔnɔh biimɔnmɔn la, u li gɛ yɔ kɔ wɛ umu ni nɛ. <sup>11</sup> Min taah mi'nunm nɛ ki siih nɛ Uwien ya nɔnm, ki wɔngɛh ki teh ni lɛbre' ni'tetem. Ama wɔ li paan n'puoli bɔ nɔ nnɔ nɔmɔbe mituɔm ki cɛn' nni. Ma kɛ nɔ cɛkre u'tacaan. Wɔn nɛ lɔ li cɛre \*Mifuoŋaanm nin umu nɔ jiire nɔ ni'bo. <sup>12</sup> U taa' kiyonyiek wɔ nɔ ti lende u'ji. U li taa mijibim kɔ cɔn ubɔnbuɔn ni, kɔ taa tifent kɔ wɛ umu wɔ nɔ nɔ kpiin ni.»

### *San sii' Yesu Uwien ya nɔnm (Mark 1:9-11; Luk 3:21-22)*

<sup>13</sup> Tɔ, u ya yo nɛ \*Yesu nɛn' Galile ya tinfɛnm bɔ nɔ ki baa' San saan, Sudɛn ya kpenl saan nɔ San nɔ sɔi wɔ Uwien ya nɔnm. <sup>14</sup> San nɔ tuo', nɛ ki tɔke' wɔ ki ye: «Sin wɔ bi li sɔi min

Uwien ya ñunm nnɔ, a'mɔ ji liebe' ki baa' min saan-ii?» <sup>15</sup> Nɛ \*Yesu ye: «Tuo kí tien nnɔ fɛnfennɔ. Nnɔ nɛ ti li fre kí tien Uwien yíe ná kɛ.» Nɛ San tuo' ki sɪi' wɔ Uwien ya ñunm. <sup>16</sup> U sɪi' \*Yesu ma nnɔ nɛ u ñɛn' miñunm ni i ya tãan bo. Kutaaku yàare', nɛ u laa' \*Uwien ya Fuoñaanm jinh ní ki naan unɛnjel, ki lá kɛle' u'bo. <sup>17</sup> Nɛ uniekɛ uba ñɛn' paaki bó ní ki ye: «N'bijɛ sɔ, n yíe wɔ, nɛ n'yɛnm sɔnge u'bo.»

## 4

### *Satan biike' Yesu*

*(Mark 1:12-13; Luk 4:1-13)*

<sup>1</sup> U ya yo nɛ \*Mifuoñaanm tuke' \*Yesu ki jon' kupenpelku ni ηɔ usɛnpol ní tɪ biike wɔ. <sup>2</sup> \*Yesu lɔle' buñɔbu iwien pinan nin tiñant pinan. Ni ya puoli bó nɛ mikònm cuo' wɔ, <sup>3</sup> nɛ \*usɛnpol unibiikl baa' u'saan, ki lá tɔke' wɔ ki ye: «A yé \*Uwien ya Bijɛ la, cère iten yíe ní kpende kpɔnɔ.»

<sup>4</sup> Nɛ \*Yesu jijn' wɔ ki ye: «Nì kɛle' \*Uwien ya gbɔnku ni ki ye: «Nil ηa li fuobe jier baba bo; u li fuobe iñɔbon yà kɛ ñɛh Uwien ya ñɔbu ni nnɔ mɔ bo nɛ.» »

<sup>5</sup> Nɛ \*usɛnpol taa' wɔ ki jon' Uwien ya du Yerusalem ni, ki tɪ duon' wɔ \*Uwien ya duku ya paaki lekɛki, <sup>6</sup> nɛ ki tɔke' wɔ ki ye: «A yé \*Uwien ya Bijɛ la, maabe kí ci tingi, kimɛ ní kɛle' \*Uwien ya gbɔnku ni ki ye:

«Sin bo, Uwien li cère u'tondb ní guɔre ηɛ,  
ηɔ a'taal la mɛ tɛnl.» »

<sup>7</sup> Nɛ \*Yesu ye: «Nì tɪ kɛle' \*Uwien ya gbɔnku ni mɔ ki ye: «Ña ní biike a'Yonbdaan Uwien.» »

<sup>8</sup> \*Usɛnpol tɪ taa' wɔ ki tɪ don' lijɔfɔfɔkrl liba bo, ki wuɔn' wɔ unɛndun ya bɛl kɛ nin i'faal, <sup>9</sup> nɛ ki tɔke' wɔ ki ye: «A gbaan' n'nintuɔli ki puke' nni la, n li taa nɛn kɛ kí de sin nɛ.»

<sup>10</sup> Nɛ \*Yesu ye: «Sin, Satan, siere n'saan, kimɛ ní kɛle' \*Uwien ya gbɔnku ni ki ye: «A li gbaan kí kpiekɛ a'Yonbdaan Uwien nɛ, kí li pukeh wɔn baba.» »

<sup>11</sup> Nɛn saan nɛ \*usɛnpol siere' ki dàan' wɔ. Nɛ \*Uwien ya tondb baa' ki lá toreh wɔ.

### *Yesu cin' u'tuonl Galile ni*

*(Mark 1:14-15; Luk 4:14-15)*

<sup>12</sup> \*Yesu cii' bi cuo' San ki tɪ pek'n', nɛ u siere' ni'saan ki liebe' Galile ya tinɛnm bó. <sup>13</sup> U bure' ki tɪ baa' Nasaret, ki gɛbre' ki tɪ te Kapɛrnawum ya du ni. Udu nnɔ te miñunciɛnm saan nɛ, Sabulɔn nin Nɛftali ya tinɛnm ni. <sup>14</sup> U kɛle' ni'saan ma nnɔ, nɛ ní tien' \*Uwien ya ñɔbonsɔknl Esayi là len' ma ki ye:

<sup>15</sup> «Sabulɔn nin Nɛftali yaabɛ,  
ninbi bà kɔ ki kpiekɛ Galile ya ñunciɛnm,  
Sudɛn ya kpenpuol bó nnɔ,  
mitinɛnm mà bi yih mɛ bà ηa yé Sufmbɛ ya tinɛnm nnɔ.

<sup>16</sup> Binib bà là te licinñunl ni nnɔ,  
bi laa' kuwenwenciɛnku.  
Binib bà mikuum là kpàakeh bɛ, mi'jinjinku yiin bi'bo nnɔ,  
kuwenwenku wende' bi'bo.»

<sup>17</sup> Kí ñɛ u ya yo kí taa kí li joh, nɛ \*Yesu cin' ki kpaandeh ki teh: «Lèbre mɛn ni'tetem, kimɛ Uwien ya bɛl nek'n' ní ηɔ.»

### *Yesu yin' bijɛnbɛb binan bɛ ní paan u'bo*

*(Mark 1:16-20; Luk 5:1-11)*

<sup>18</sup> \*Yesu cuonh ki kpàakeh Galile ya ñunciɛnm, nɛ ki laa' ninjiɛb bile, bi te ki wiɛnh bubɛbu. Bi là yé bijɛnbɛb nɛ. Bi yih uba Simɔn, ki baanh wɔ Pier\*, ki yih u'ninje Andre.

\* **4:18** Pier ya tingi si: litenpenl nɛ.

19 Nε u tǎke' bε ki ye: «Paan mεn n'bo ní, ηǒ ní cère ní li taakeh binib ki dienh nni.» 20 Bi dǎan' bi'bǎan i ya tǎan bo, nε ki paan' u'bo.

21 U jende' waamu, nε ki tí laa' ninjiεb bile mǎ, Sebede ya bijieb Saak nin u'ninjε San. Ben nin bi'baa Sebede te bi'ñerbu ni, ki tǔrreh bi'bǎan. Nε \*Yesu yin' bε. 22 Nε bi dǎan' bi'baa nin buñerbu nnǎ i ya tǎan bo, ki paan' u'bo.

*Yesu kpaandeh Uwien ya gber, ki buuh biwienb  
(Luk 6:17-19)*

23 Nε \*Yesu cuonh Galile ya tinfenm kε ni, ki kǎh Sufmbε ya tǎan ya dur ni, ki wǎknh binib Uwien ya gber, ki kpaandeh Uwien ya bεl ya gbεmǎnmǎnt, nε ki buuh iwien kε ya bol. 24 Nε u'yel kpienth Siri ya tinfenm kε ni. Bi tukeh binib bǎ bun iwien kε ya bol ki bǎareh u'saan nε u buuh bi'kε. Ben si: isenpol ηaake bǎ nin bǎ luh libinbil nin bǎ ya gbεnent faan'. 25 Nε inigocien ñen' ní Galile ya tinfenm ni nin mitinfenm mǎ bi yih mε Idu Piik nnǎ ni nin Yerusalem ni nin Sude ya tinfenm ni nin Sude ya kpenpuol bǎ, nε ki paan' u'bo.

## 5

*Yesu wǎknh u'panpaankaab lijuǎl bo*

*Uwien ya mǎnm te binib bǎ bo  
(Luk 6:20-23)*

1 \*Yesu laa' inigol nnǎ ma nnǎ, nε ki don' ki tí kǎle' lijuǎl liba bo. U'panpaankaab taan' u'saan, 2 nε u cin' ki wǎknh bε ki teh:

3 «Binib bǎ ηmǎbe ijiinyenmaale nnǎ,  
Uwien ya mǎnm te bi'bo,  
kime \*Uwien ya bεl yé bi'yaal nε.

4 Binib bǎ muǎh nnǎ, Uwien ya mǎnm te bi'bo,  
kime Uwien li sǎnge bi'yenm.

5 Binib bǎ jindeh bi'ba tingi nnǎ, Uwien ya mǎnm te bi'bo,  
kime uηendun wuu li yé bi ya faal nε.

6 Binib bǎ ya nun mǎn bε ní li yé binimǎnb nnǎ,  
Uwien ya mǎnm te bi'bo,  
kime bi lá li lε bi yé nǎ.

7 Binib bǎ muǎh bi'tǎb micεcεkm nnǎ,  
Uwien ya mǎnm te bi'bo,  
kime Uwien li muǎ bε micεcεkm.

8 Binib bǎ taa' bi'ba ki de' Uwien, bi'fǎl bo ηa ηmǎbe jǎknt nnǎ,  
Uwien ya mǎnm te bi'bo,  
kime ben nε li lε Uwien.

9 Binib bǎ nuunh uyenduǎn ya sen nnǎ,  
Uwien ya mǎnm te bi'bo,  
kime Uwien li yin bε u'bumu.

10 Binib bǎ jinh ijend bi'nimǎnt bo nnǎ,  
Uwien ya mǎnm te bi'bo,  
kime ben nε si Uwien ya bεl.

11 «Binib sukreh nε, ki jende nε, ki lienh ni'bo iñǎbonbil kε ya bol min bo la, Uwien ya mǎnm te ni'bo. 12 Li te mεn uyensǎnge ni, kí li poknh, kime ni li lε lisuul lá yebe paaki bǎ. Bi lá jende' \*Uwien ya ñǎbonsǎknb bǎ lá te uyo bo nnǎ mǎ nnǎ nε.»

*Ninbi nε yé miyaam nin kuwenwenku uηendun wuu ni  
(Mark 9:50; Luk 14:34-35)*



<sup>13</sup> «Ninbi ne yé unɛndun wuu ya yaam. Ama miyaam saa' ka ji ημε la, niba ηa te kí ji ní fre kí ηmaake mè. Ma ji yé bonn, bi li wule mè ne, ne binib ní li taanh mi'bo ki gèbreh.

<sup>14</sup> «Ninbi ne yé unɛndun wuu ya wenwenku. Udu wà te ligbengbenl bo ηa ηmabe balm. <sup>15</sup> Unil se' lifrl la, wa ní taa senku kí cubn li'bo. U li taa lè kí tuon likpenkpenl bo ne, lè ní li wendeh bà ke te iden ni. <sup>16</sup> Ni'ma ya wenwenku ní li wendeh binib ya nun bó, be ní li lenh ni teh ná ní mən nnə, ηə kí pèke ní'Baa wà te paaki bó.»

### *Yiko ya wəknm*

<sup>17</sup> «La maaleh mən ki teh n baa' ní lá gben \*yiko nin Uwien ya nɔbonsəknb ya gber ne. Ma baa' ní lá gben tù. N baa' ní lá tien tù cinbe ki ye ma bo ne. <sup>18</sup> N təkheh ne imən ne, yiko nnə uba kpen mənən ηa ní juore fənm, u'ke li li tien ne. Kutaaku nin kitink li wuəke kí kpaan ma ke la, yiko nnə ya gbeyəyɔl liba mənən ηa ní juore fənm. <sup>19</sup> Nən bo, wà ke kende' yiko nnə ni uba bo waamu mənən, ki wəkn' binib be ní li teh u'yaam la, u li yé uwaal ne Uwien ya bel ni. Wà ke tuo' \*yiko nnə, ki wəkn' binib nnə la, u li yé ucien ne Uwien ya bel ni. <sup>20</sup> N təkheh ne ne, ni'nimənt ηa cen' \*Yiko ya wənwəknb nin \*Farisienmbə yaar la, na li li kə \*Uwien ya bel ni.»

### *La cère mən ni'benku ni ní li beh təb bo*

<sup>21</sup> «Ni cii' bi là təkhe' uyo bo yaab ki ye: «La ku nil. Unil ku' u'tə la, bi li bu wə tibuur ne.» <sup>22</sup> Ama min təkheh ne ki teh wà ke ya benku ni ben' u'tə bo la, bi li bu wə tibuur ne. Wà ke təkhe' u'tə ki ye u yé fənm la, tibuur ya cienb li bu wə tibuur ne. Wà ke təkhe' u'tə ki ye u yé uwaar la, u kpe wə ní kə umu wà ηa ní kpiin ni ne. <sup>23</sup> Nən bo, a joh á pu Uwien mipum u'ponpuol bo, ki tí tiere' ki ye sin nin a'tə ηmabe mimaam la, <sup>24</sup> taa a'pum nnə kí ble li'saan, kí jo ní tí gben mè kí yaan, kí liebe ní kí lá pu Uwien a'pum nnə.

<sup>25</sup> «Sin nin unil ηmabe mimaam ne u tuke mè ki joh tibuur la, taan nin wə buñəbu tonm, uyo wà ni laan te usen ni. Nnə ηa ní la, u li taa ηe kí tí ηukn tibuur ya cien, u'mə ní taa ηe kí ηukn lipəkl ya cien wə ní pəkn ηe. <sup>26</sup> N təkheh ηe imən ne, ηa tí pèn' ki gben' tibuur ya like la, ηa ní nē len.»

### *Linaɲmaal ya gber*

<sup>27</sup> «Ni cii' bi là təkhe' uyo bo yaab ki ye: «La teh nanɲmaal.» <sup>28</sup> Ama min təkheh ne ki teh wà ke liike' upii ηə u'menku kən' u'ni la, u duən' nin upii nnə ηə u'fəl ni. <sup>29</sup> Nən bo, a'nəjienunbu ne cèreh a biih la, likre bù kí wiε kí jende a'ba saan. A'gbenent ya niba bó juore' fənm la, ní tu nin a'gbenent ke ní kə umu wà ηa ní kpiin ni. <sup>30</sup> A'nəjie ne cèreh a biih la, cere wù kí wiε kí jende a'ba saan. A'gbenent ya niba bó juore' fənm la, ní tu nin a'gbenent ke ní kə umu wà ηa ní kpiin ni.»

### *Uje la wiε u'po*

*(Matie 19:9; Mark 10:11-12; Luk 16:18)*

<sup>31</sup> «Bi tí là liebe' ki ye: «Unil wiε' u'po la, wə ní kele kugbənku kí de wə, kí wuən kí ye u wiε' wə ne.» <sup>32</sup> Ama min təkheh ne ki teh uje wà ke ya po ηa tien' nanɲmaal ηə u wiε' wə la, u sureh upii nnə wə ní kpende unanɲmaa ne. Uje wà kuən' bi wiε' upii wà la, u tien' linaɲmaal ne.»

### *Yesu len' ipòl ya gber*

<sup>33</sup> «Ni tí cii' bi là təkhe' uyo bo yaab ki ye: «La pole tonnənku bo. A pole' Uwien la, á tien a pole' ki ye bà.» <sup>34</sup> Ama min təkheh ne ki teh ni la lí ní pole. Ni la pole taaku, kime kutaaku yé Uwien ya berbiεk ne. <sup>35</sup> Ni la pole tink mə, kime kitink yé Uwien ya taan paandeh ná bo ne. Ni la pole Yerusalem mə, kime Yerusalem yé Uwien Ubercien ya du ne. <sup>36</sup> La pole a'yul, kime ηa ní fre kí cère a'yurku kuba mənən ní kpende kuyupenpienku, ka ní fre kí cère kù ní kpende kuyubənbənkú mə. <sup>37</sup> Ni'lenm ni, ní yé imən la, ní ye «imən». Ní tí yé kutonnənku la, ní ye ní yé «kutonnənku». Ni ji pukn' ná ke la, ní yé usenpol, ubierə yaann ne.»

*La teh men biere ki tuukeh fen  
(Luk 6:29-30)*

<sup>38</sup> «Ni tí cii' bi là tǎke' uyo bo yaab ki ye: «Unil fiε' u'tǎ ya nunbu la, be rí fiε u'mǎ yaabu. Unil fekre' u'tǎ ya ninl la, be rí fekre u'mǎ yaal.» <sup>39</sup> Ama min tǎkeh ne ki teh unil tien' ηε mibiεrm la, la jiin wǎ biεrm. Unil kpǎbe' a'nǎjiekpienku la, pekre a'nǎgenkpienku mǎ kí de wǎ. <sup>40</sup> Unil taa' ηε ki jon' tibuur wǎ rí tí fie a'lierwawaal la, cǎbe wǎ a'liergbenku mǎ. <sup>41</sup> Unil wǎbn' ηε ki ye á tuke u'tukl kí piεre wǎ kǎnsini uba la, piεre wǎ kǎnsini ule. <sup>42</sup> Wǎ mie' ηε nibonn la, pu wǎ. Wǎ mǎ yíε á kpende wǎ nibonn la, la sikre wǎ buǎn.»

*Li yíε men ni'nennendb  
(Luk 6:27-28, 32-36)*

<sup>43</sup> «Ni tí cii' bi là tǎke' uyo bo yaab ki ye: «Li yíε wǎ yíε ηε, kí li nen wǎ nen ηε.» <sup>44</sup> Ama min tǎkeh ne ki teh: «Li yíε men ni'nennendb, kí li kǎareh ki dienh binib bà jǎndeh ne, <sup>45</sup> ηǎ kí li yé ni'Baa wǎ te paaki bó ya bumu, kime wǎn ne cǎreh u'wien puǎreh ki wendeh bibiεrdεnb nin binimǎnb, ki cǎreh utaa mǎ niih ki dienh binimǎnb nin bibiεrdεnb.» <sup>46</sup> Ni yíε bà yíε ne baba la, ni li le li le suul ba? Bilεnpotεkb mǎnǎn ηa teh nnǎ-ǎǎ? <sup>47</sup> Ni fuondeh ni'yaab baba la, be lǎbre'? Bà ηa yé Sufmbe mǎnǎn ηa teh nnǎ-ǎǎ? <sup>48</sup> Nen bo, ninbi li te men mǎnmǎnm kí tí gben ten ni'Baa wǎ te paaki bó te ma bo.»

## 6

*Ni li punh mipum ma bo*

<sup>1</sup> «Li ben men, ki la teh nimǎnt binib ya nun bó ki nuunh be rí le kí pǎke ne. Ni teh nnǎ la, na rí le suul ni'Baa wǎ te paaki bó saan.

<sup>2</sup> «A pun' ucεεckdaan nibonn la, la cuonh ki kpaandeh ni'ke saan ten iñuǎn ilele ya nib teh ma itáan ya dur ni nin isenje ni ηǎ binib rí le kí pǎke be. N tǎkeh ne imǎn ne, bi laa' bi'suul ηǎ. <sup>3</sup> A pun' ucεεckdaan nibonn la, la cǎre a'nǎgen rí li ben a'nǎjie de' ná. <sup>4</sup> Pu wǎ lididikl bo. A'Baa wǎ lenh a teh ná lididikl bo nnǎ ne li su ηε.»

*Ni li kǎareh ma bo  
(Luk 11:2-4)*

<sup>5</sup> «Ni kǎareh la, ni la li te ten iñuǎn ilele ya nib. Bi yíε be rí li sieh itáan ya dur ni nin isennaan ni ne ki kǎareh ηǎ binib rí li lenh be. N tǎkeh ne imǎn ne, bi laa' bi'suul ηǎ. <sup>6</sup> Sin wǎn, a tí rí yíε á kǎare la, kǎ a'duku ni, kí piin, kí kǎare a'Baa wǎ ηa lenh wǎ nnǎ. A'Baa wǎ lenh a teh ná lididikl bo nnǎ ne li su ηε.

<sup>7</sup> «Ni kǎareh la, ni la li kǎareh ki ñǎbleh ki tekreh ten bà ηa pe Uwien ya sen bo. Bi maaleh ki teh bi lienh ki gbiekeh ne la, Uwien li cenge bi'bó. <sup>8</sup> La teh men ten ben, kime ni'Baa ben ná wiεbe ne kí le na laan mie' wǎ nè. <sup>9</sup> Ní li kǎareh ki teh nǎ:

«Tí'Baa wǎ te paaki bó,  
cǎre binib ke rí li boh a'yel,

<sup>10</sup> Cǎre a'bel rí baa ní,  
cǎre a'yíem rí tien tingi ni ten paaki bó.

<sup>11</sup> De te dinnǎ ya wentunl ya jier,

<sup>12</sup> fère te ti'biil,  
ten ti'mǎ fèreh ma bà biih te nnǎ.

<sup>13</sup> La cǎre tí lu mibiikm ni.  
Ama fie te usεnpol ubiεrǎ ya nuǎ ni\*.

[Kime sin ne si libel nin ufaa nin ukpieke uyo wǎ ηa ηmǎbe gbenm.]†»

\* **6:13** Bi li fre kí lǎbre fie te usεnpol ubiεrǎ ya nuǎ ni kí ye ñen' te mibiεrm ni mǎ. † **6:13** Bi kpie' ki kele' tigbǎnt tá nnǎ ya tuba ni: kime sin ne si libel nin ufaa nin ukpieke uyo wǎ ηa ηmǎbe gbenm ηa te tu'ni.

14 «Kime ni fèreh binib bi'biil la, ni'Baa wà te paaki bó mɔ li fère ne ni'yaal. 15 Ama na fèreh binib bi'biil la, ni'Baa mɔ ɲa rí fère ne ni'yaal.»

*Ni lôle' buñɔbu la, ni li teh ma bo*

16 «Ni lôle' buñɔbu la, ni la li saah ni'nun bó ten iñuɔn ilele ya nib. Bi saah bi'nun bó ɲɔ binib rí bende kí ye bi lùo buñɔbu ne. N tɔkeh ne imàn ne, bi laa' bi'suul ɲɔ. 17 Sin wɔn, a lôle' buñɔbu la, fende a'nun bó, kí luobe a'yur mikpɔm, 18 ɲɔ binib la bende kí ye a lùo ñɔbu. Ama a'Baa wà te a'saan lididikl bo ne ben. Wɔn wà lenh a teh nà lididikl bo nnɔ ne li su ɲe.»

*Paaki bó ya faal*

*(Luk 12:33-34)*

19 «La li nuunh men ní le lifaal kí gbien unɛndun wuu ni. Kime likuotuul nin uyonyon li saa lè. Ne Binasub mɔ li lɔnbe kí kɔ kí suu lè. 20 Ama li nuunh men lifaal là yebe paaki bó. Nen bó kuotuul ɲa rí mɔ lè, nasu mɔ ɲa rí lɔnbe kí kɔ kí suu lè. 21 Kime a'faal te nà saan la, a'fèl mɔ dɔ nen saan ne.»

*Bununbu yé tigbenent ya frl ne*

*(Luk 11:34-36)*

22 «Bununbu yé tigbenent ya frl ne. A'nun mɔn la, a'gbenent ke te kuwenwenku ni ne. 23 Ama a'nun ɲa mɔn la, a'gbenent ke te licinñunl ni ne. A'nun yà cèreh a te kuwenwenku ni nnɔ ɲa ji lenh la, a te licinñunl là ni nnɔ ji li te mile bo?»

*Nil ɲa rí fre kí li pe cenbaambe bile bo*

*(Luk 16:13; 12:22-31)*

24 «Nil ɲa rí fre kí li pe cenbaambe bile bo. U li nen uba ne, kí li yíe utɔ. U li se uba ya cièk bó ne, kí li likeh utɔ fɛnm. Na rí fre kí li pe Uwien bo ki liebe' ki pe ilike mɔ bo.»

*La cère men ni'nun rí li mɔn tijier nin tiwengolkaar bo*

25 «Nen bo ne n tɔkeh ne ki teh ni la cère nè rí li wièbe ne ni li tien ma kí li fuobe bo, ki la li maaleh ki teh: <Ti li ji ba?> Ki la cère ne rí li wièbe ne ni'gbenent bo, ki la li maaleh ki teh: <Ti li gole ba?> Limiel ɲa cen' tijier-ii? Tigbenent mɔ ɲa cen' tiwengolkaar-ii? 26 Liike men inuɔn yà laanh paaki bó te ma bo. Ya koh, ka ceh ki cɔngeh bɔnbuɔn ni. Ama ni'Baa wà te paaki bó ne jindeh yí. Na nín cen' yí pelpel-ii? 27 Ni'ni ɲme ne u'ninm ni, u li fre kí fɔkn u'miel waamu mɔnɔn kí pukn-i?

28 «Be bo ne ni cèreh nì wièbe ne tiwengolkaar bo? Maale men kí liike kumuɔku ni ya sir puh ma bo, ta sɔnh tuonl, ka loh kpɛlɛr. 29 Ama n tɔkeh ne ne, uber Salomɔn nin u'fàacienl ke, wa là gole' kpɛlɛr tù mɔn ki baa' mipuum nnɔ ya miba mɔnɔn. 30 Uwien cèreh timɔsir tà te dinnɔ kubaaku ni, ki li wun teke umu puh mipúmɔnmɔnm la, be li cère wa rí tien ninbi binib mimɔnm kí cen timuɔr-i? Ni'tekjim ne pɔre' ne. 31 Nen bo, ni la cère nè rí li wièbe ne, ki la li maaleh ki teh: <Ti li ji ba? Ti li ñu ba? Ti li gole ba?> 32 Kime bà ɲa pe Uwien ya sen bo ya nun ne mɔn tu ya bont ke bo. Ni'Baa wà te paaki bó ben ki ye ni cièke tibont nnɔ ke. 33 Laan li nuunh men \*Uwien ya bɛl, kí li teh Uwien yíe nà, u li taa tibont nnɔ ke kí pukn ne. 34 Nen bo, la cère men nè rí li wièbe ne wenli wà we ní nɔ bo. Wenli ne ni li wun maale wenli ya gber bo. Lidaali là ke nin li'jend ne.»

## 7

*La biindeh men tɔb*

*(Luk 6:37-38, 41-42)*

1 «La biindeh men nib ɲɔ Uwien mɔ la biin ne. 2 Ni biindeh binib ma bo la, Uwien mɔ li biin ne nnɔ ne. Ni taah nà ki bikreh tibont ki dienh binitɔb nnɔ Uwien mɔ li taa nen ne kí biike kí de ne. 3 Be tien' a lenh kumuɔku kùà te a'tɔ ya nunbu ni, ka ji lenh jaantelke wà puɔn a'yaabu ni? 4 A li tien mila kí tɔke a'tɔ kí ye: <Cère rí ñen kumuɔku kùà te a'nunbu ni

nɔ», nɔ jaantɛlke puɔn a'yaabu ni? <sup>5</sup> Sin iɲuɔn ilele ya nilɔ, kpɛ kɪ ɲɛn jaantɛlke wà puɔn a'nunbu ni nnɔ, kɪ li lɛnh mɔnmɔnm, kɪ yaan kɪ fre kɪ ɲɛn kumuɔku a'tɔ yaabu ni.

<sup>6</sup> «La taah mɛn tibont tà yé Uwien jaar ki dienh isengbele, nɔ i la lá liɛbe kɪ kɛkɛre nɛ. La taah mɛn ni'laan ki dienh fangambɛ, nɔ bi la tɛtɛ i'bo.»

*Li mieh mɛn, kɪ li nuunh, kɪ li ɲih kunagɛnku*  
(Luk 11:9-13)

<sup>7</sup> «Li mieh mɛn, bi li pu nɛ; li nuunh mɛn, ni li lɛ; li ɲih mɛn kunagɛnku, bi li piire. <sup>8</sup> Kime wà kɛ mieh la, bi punh wɔ nɛ. Wà kɛ nuunh la, u lɛnh nɛ. Wà kɛ mɔ ɲih kunagɛnku la, bi piireh nɛ. <sup>9</sup> Ni'ni ɲmɛ ya buk miɛ' wɔ kpɔnɔ la, u li de kɛ litɛn-i? <sup>10</sup> Bii kɪ miɛ' wɔ ujen la, u li de kɛ uwɛ? <sup>11</sup> Ninbi bibiɛrdɛnb, ni bɛn ki dienh ni'bumu nà mɔn la, bɛ li tien ni'Baa wà te paaki bó ɲa ɲ cɛre binib bà mieh wɔ nà mɔn nnɔ bɛ ɲ lɛ nɛ!»

<sup>12</sup> «Nɛn bo, ni yɛ binib ɲ li teh nɛ nà kɛ nnɔ, ni'mɔ ɲ li teh bɛ nɛn. \*Yiko ya gbɔnku nin Uwien ya ɲɔbonsɔknɔ wɔknɔ nà kɛ nnɔ ya tingi nɲnɔ.»

*Ni li ɲɛ bunañɔbu bùa kɪ kɔ*  
(Luk 13:24)

<sup>13</sup> «Nɛ mɛn bunañɔbu bùa wiɛbe kɪ kɔ, kime bunañɔbu bùa piɛ nin usɛn wà piɛ jondɛh tɛ fɛnm bó nɛ. Binib kpɛndɛh usɛn wà piɛ nɛ ki yɛbe. <sup>14</sup> Bunañɔbu bùa nin usɛn wà joh limiɛl bó nnɔ ɲa piɛ. Binib bà nuunh ki lɛnh u ya sɛn ɲa yɛbe.»

*Binib ya tetem nɛ li cɛre bɛ ɲ bɛnde bi yé bidɛnb bà*  
(Luk 6:43-44)

<sup>15</sup> «Liike mɛn ni'yul bo nin bitonnɛnɲɔbonsɔknɔ. Bi bàareh ni'saan ki te suoo tɛn ipɛ nɛ, ama ki nɲn ji yé ikɛr ki bre. <sup>16</sup> Bi'tuon nɛ li cɛre ɲi bɛnde bi yé binib bà ya bol. Ba pòh cɛcɛ bɛnɛnk bo. Ka pòh kɛnkɛn mɔ konkonbu bo. <sup>17</sup> Nɛn bo, busumɔnmɔnbu kɛ lùonh ibii yà mɔn nɛ. Busubu bùa ɲa mɔn mɔ lùonh ibii yà ɲa mɔn nɛ. <sup>18</sup> Busumɔnmɔnbu ɲa ɲ fre kɪ lùonh ibii yà ɲa mɔn. Busubu bùa ɲa mɔn mɔ ɲa ɲ fre kɪ lùonh ibii yà mɔn. <sup>19</sup> Busubu bùa kɛ ɲa lùonh ibii yà mɔn la, bi li gɛ bù kɪ wiɛ umu ni nɛ. <sup>20</sup> Nɛn bo, binib ya tuon nɛ li cɛre ɲi bɛnde bi yé binib bà ya bol.»

*Uwien ya bɛl ni ya kɔm ya gbɛr*  
(Luk 13:25-27)

<sup>21</sup> «Na yé wà kɛ yih nni ki teh: <Yonbdaan, Yonbdaan>, nɛ li kɔ Uwien ya bɛl ni. Ama wà teh n'Baa wà te paaki bó yɛ ma bo, nɛ li kɔ u'bɛl ni. <sup>22</sup> Lidaali là Uwien li bu binib tibuur nnɔ, binib bà yɛbe li tɔke nni kɪ ye: <Yonbdaan, Yonbdaan, a ya yel bo ɲa ɲi nɛ ti sɔkn' Uwien ya gbɛr, ki ɲɔrɛ' isɛnpol binib saan, ki tien' miyɔkm ya bont-ii?> <sup>23</sup> Nɛ n li tɔke bɛ kɪ ye: <Jɛnde mɛn n'saan, ma bɛn nɛ fiebu. Ni yé bà teh nà bre nɛ.> »

*Binib bile mɛn' bi'dur ma bo*  
(Luk 6:47-49)

<sup>24</sup> «Tɔ, wà kɛ ciɪh n'gbɛr tuu nɔ, ki teh tù ye ma la, u naan uje wà ɲmɔbe miyɛnfuom, ki mɛn' u'duku kutɛntiɛku bo nɛ. <sup>25</sup> Utaa nii', miwuɔm kɔn', ki puube' ki yile' kuduku nnɔ bo, kutafaaku mɔ fii' ki lɛkn' ku'bo. Kù se kutɛntiɛku bo ma nnɔ, nɛ ka lu'.

<sup>26</sup> «Ama wà kɛ ciɪh n'gbɛr tuu nɔ, ka teh tù ye ma la, u naan ujeɲɔr wà mɛn' u'duku litɛngbil bo nɛ. <sup>27</sup> Utaa nii', miwuɔm kɔn', ki puube' ki yile' kuduku nnɔ bo, kutafaaku mɔ fii' ki lɛkn' ku'bo, nɛ kù lu' kpɛlkpɛl.»

*Yesu ya wɔknm ɲmɔbe mituɔm*

<sup>28</sup> \*Yesu wɔkn' ki tɪ gben', nɛ u wɔkn' linigol nnɔ iñɔbon yà nnɔ cuo' bɛ miyɔkm cɛɛn. <sup>29</sup> Kime wa wɔknɔ bɛ tɛn \*Yiko ya wɔnwɔknɔ wɔknɔ ma bo, u wɔknɔ bɛ tɛn unil wà du u wɔknɔ nà nnɔ bo nɛ.

## 8

*Yesu cère' ujend uba lùore'*  
(Mark 1:40-45; Luk 5:12-16)

<sup>1</sup> \*Yesu jiih lijuəl bo, nε linigocienl pε u'bo. <sup>2</sup> Tɔ, ujend uba baa' ki lá gbaan' u'nintuəli, nε ki tǎke' wǎ ki ye: «Yonbdaan, a yíe la, a li fre kí cère n' lùore.» <sup>3</sup> Nε \*Yesu tɛnde' u'nuǎ ki mε' wǎ, nε ki ye: «N yíe, lùore.» Nε u pǎk ki lùore' i ya tàan bo. <sup>4</sup> Nε \*Yesu ye: «Liike a'yul bo ki la tǎke nil, ama jo kí tí lε utǎtuǎrkε, kí tien lituǎrl tɛn Moyis là ye bε n' li teh ma bo. Nɛn nε li wuǎn kí ye a lùore'.»

*Yesu buu' sojaciεn uba ya tonsǎnl*  
(Luk 7:1-10)

<sup>5</sup> \*Yesu cuonh ki tí kǎh Kapɛrnawum ya du ni uyo wǎ nnǎ, nε sojambe kobk ya ciεn uba baa' u'saan ki gbáan' wǎ ki ye: <sup>6</sup> «Yonbdaan, n'tonsǎnl nε wǎbe' ki dǎ iden, ki wǎlndeh cεεn.» <sup>7</sup> Nε \*Yesu ye: «Min li jo kí tí buu wǎ.» <sup>8</sup> Nε u tǎke' \*Yesu ki ye: «O, Yonbdaan, ma kpe á baa kí kǎ n'den. A li len' mǎnǎn ki ye «Faake» la, n'tonsǎnl nnǎ li faake nε. <sup>9</sup> Kimε min mǎnǎn ηmǎbe binib bà yé nin nni biciεnb, nε ki mǎ yé sojambe biba ya ciεn. N tǎke' uba ki ye: «Li joh» la, u joh nε, n tǎke' utǎ ki ye «Den» la, u bàareh nε. N tí tǎke' n'tonsǎnl ki ye wǎ n' tien ná la, u teh nɛn nε.»

<sup>10</sup> \*Yesu cii' u'ñǎbon ma nnǎ, nε n' cuo' wǎ miyǎkm, nε u tǎke' binib bà pε u'bo nnǎ ki ye: «N tǎkeh nε imǎn nε, ma laan laa' nil wǎ ηmǎbe miε ya tekjim Israyel yaab ni mǎnǎn. <sup>11</sup> N tǎkeh nε nε, binib yebe ki li ñε lenpuoli bó ní nin nintuəli bó ní, kí lá kèle kí ji \*Abraham nin \*Isaak nin Sakǎb saan tijier \*Uwien ya bel ni. <sup>12</sup> Ama bi li ñɛn bà bi li si \*Uwien ya bel nnǎ kí wiε saali licinñunl ni. Nɛn saan nε bi li te ki muǎh, ki ηmǎnh inǎgbɛn.» <sup>13</sup> \*Yesu tǎke' sojambe ya ciεn nnǎ ki ye: «Li kunh. Nè n' tien' ηε tɛn a teke' nni ki jin' ma bo.» Nε uciεn nnǎ ya tonsǎnl faake' i ya tàan bo.

*Yesu buu' binib bà bun iwíen kε ya bol*  
(Mark 1:29-34; Luk 4:38-41)

<sup>14</sup> \*Yesu jon' Pier den, nε ki laa' Pier ya cǎbnaa dǎ ki bun, u'gbɛnɛnt ton. <sup>15</sup> \*Yesu mε' u'nuǎ, nε u'gbɛnɛnt sǎnge'. Nɛn saan nε u fii' ki cɛnde' wǎ.

<sup>16</sup> Ni'daali ya tajuǎku, nε bi tuke' binib ligol ki baa' Yesu saan isɛnpol ηaake bε. \*Yesu ηǎre' isɛnpol nnǎ nin u'ñǎmaam, nε ki cère' bà kε bun nnǎ faake'. <sup>17</sup> U tien' nnǎ ηǎ uñǎbonsǎknl Esayi là len' ná nnǎ nè n' tien nε. U là len' ki ye: «Wǎn nε ñɛn' ti'jiint, ki teke' ti'wíen kε ki tuke'.»

*Binib bà yíe bε n' paan Yesu bo ya gber*  
(Luk 9:57-62)

<sup>18</sup> Tɔ, \*Yesu laa' linigol guǎn' wǎ, nε u tǎke' u'panpaankaab ki ye: «Cère mɛn tí puore kí jo miñunciεnm ya gbaatǎl bó.» <sup>19</sup> Yiko ya wǎnwǎknl uba baa' u'saan, nε ki tǎke' wǎ ki ye: «Cɛnbaa, a joh ná bó kε la, n li pε a'bo nε.» <sup>20</sup> Nε \*Yesu tǎke' wǎ ki ye: «Inɛk ηmǎbe ifɛle, inuǎn mǎ ηmǎbe titer, ama \*Unil ya Bijε wǎn ηa ηmǎbe u li kpǎkn ná saan yul.»

<sup>21</sup> Nε u'panpaankaab ya uba mǎ tǎke' wǎ ki ye: «Yonbdaan, cɛbe nni n' jo kí tí sube n'baa ηǎ kí liεbe ní kí paan a'bo.» <sup>22</sup> Nε \*Yesu tǎke' wǎ ki ye: «Li pε n'bo, kí cère bitɛnkpiib n' li subeh bi'tǎb.»

*Yesu cère' kutafaaku ηmile'*  
(Mark 4:35-41; Luk 8:22-25)

<sup>23</sup> \*Yesu kǎn' buñɛrbu nε u'panpaankaab mǎ paan' u'bo. <sup>24</sup> Bi joh ma nnǎ nε kutafaabi-iku kuba fii' miñunm bo ki cèreh inungbegbel fih ki yildeh buñɛrbu nnǎ bo. Nin nɛn kε ηǎ \*Yesu wǎn dǎ nε ki gǎh. <sup>25</sup> Nε bi baa' ki lá finde' wǎ, ki tǎke' wǎ ki ye: «Yonbdaan, ηmíen tε, ti benh tí luo nε.» <sup>26</sup> Nε u ye: «Bε tien' ni sɛn' bujɛwaanbu? Ni'tekjim nε pǎre' nε.» Nɛn saan nε u fii' ki tien' kutafaaku nin miñunm bo. Nε kutafaaku nin miñunm kε

ɲmile' cim. <sup>27</sup> Ni cuo' binib miyɔkm, nɛ bi niireh ki teh: «U yé bɛ ya nitunbu sɔ, kutafaaku nin miñunm kɛ tɪ boh wɔ?»

*Yesu ɲɔre' isɛnpol binib bile saan  
(Mark 5:1-20; Luk 8:26-39)*

<sup>28</sup> Bi tɪ baa' miñunciɛnm ya gbaatɔl, Gadara yaab ya tinfɛnm ni, nɛ binib bile ñɛn' ikul bó ní ki cende' wɔ. Isɛnpol nɛ là ɲaake bɛ. Bi là bre cɛɛn nɛ, nɛ nib ɲa kaabe ki ñɛh ni' bó ya sɛn. <sup>29</sup> Bi laa' \*Yesu ma nnɔ, nɛ ki wuureh i ya tɔan bo ki teh: «Uwien ya Bijɛ, tinbi nin sin tu lɛ nɛ? A baa' á lá jènde tɛ nɛ uyo ɲa laan baa'-aa!»

<sup>30</sup> Tɔ, fangambɛ biba mɔ là te ka fɔke nin ni'saan ki yebe ka dindin, bi kpaah bɛ. <sup>31</sup> Nɛ isɛnpol nnɔ gbáan' \*Yesu ki ye: «A ɲɔre' tɛ binib biɛ saan la, á cèbe tɛ tí jo kí tɪ kɔ fangambɛ biɛ nɔ.» <sup>32</sup> Nɛ \*Yesu ye: «Li joh mɛn.» Nɛ ì siere' binib nnɔ saan, ki tɪ kɔn' fangambɛ nnɔ. I ya tɔan bo, nɛ fangambɛ nnɔ kɛ sɛn' ki tinde' ligbɛngbɛnl, ki tɪ lu' miñunm ni ki luo'.

<sup>33</sup> Bà kpaah fangambɛ nnɔ sɛn' ki jon' udu bó, ki tɪ tɔke' binib \*Yesu cère' bijɛb nnɔ faake' ma bo nin nà kɛ tien'. <sup>34</sup> Udu nnɔ ya nib kɛ ñɛn' ki lá tuobe' \*Yesu usɛn ni, nɛ ki gbáan' wɔ ki ye wɔ ñ ñɛ bi'tinfɛnm ni.

## 9

*Ujɛ uba ya tɔan nin u'nuɔ faan' Yesu cère u faake'  
(Mark 2:1-12; Luk 5:17-26)*

<sup>1</sup> \*Yesu liɛbe' ki kɔn' buñɛrbu ki tí puore' miñunciɛnm ki kun' u'du ni. <sup>2</sup> Nɛ bi tuke' ujɛ uba linagɛnl bo u'tɔan nin u'nuɔ kɛ faan' ki baa' u'saan. U laa' bi teke' wɔ ki jin' ma nnɔ, nɛ u tɔke' ujɛ wà ya tɔan nin u'nuɔ faan' nnɔ ki ye: «N'bukɛ, cuo a'ba, n fère' ɲɛ a'biere ɲɔ.»

<sup>3</sup> Nɛn saan nɛ \*Yiko ya wɔnwɔknɔ biba maaleh ki teh: «Ujɛ wuɔ sukreh Uwien nɛ.»

<sup>4</sup> \*Yesu bɛnde' bi'yɛnmaale, nɛ ki tɔke' bɛ ki ye: «Bɛ tien' ni ɲmɔbe yii ya yɛnmaalbiere?

<sup>5</sup> Ni lɛ ba nɛ faa? N tɔke wɔ kí ye n fère' wɔ u'biere nɛ faa bii wɔ ñ fii kí cuon nɛ faa?

<sup>6</sup> Nɛn bo, n li wuɔn nɛ kí ye \*Unil ya Bijɛ ɲmɔbe mituɔm unɛndun wuu ni wɔ ñ fère binib bi'biere.» Nɛ ki tɔke' wà ya nuɔ nin u'tɔan faan' nnɔ ki ye: «Fii, kí yuure a'nagɛnl, kí li kunh.»

<sup>7</sup> Nɛ u fii', ki kun'. <sup>8</sup> Linigol nnɔ laa' nnɔ ma nnɔ, nɛ ñ cuo' bɛ bujɛwaanbu, nɛ bi pèke' Uwien u de' binib mituɔm mà nnɔ bo.

*Yesu yin' Matie wɔ ñ paan u'bo  
(Mark 2:13-17; Luk 5:27-32)*

<sup>9</sup> \*Yesu siere' ni'saan ki joh ma nnɔ, nɛ ki laa' ulɛnpotekl uba kɛ lɛnpotekbùol, bi yih wɔ Matie. Nɛ \*Yesu tɔke' wɔ ki ye: «Paan n'bo ní.» Nɛ u fii' ki paan' u'bo.

<sup>10</sup> Ni ya puoli bó nɛ \*Yesu te Matie den ki jinh tijier. Bilɛnpotekb ligol nin bibiɛrdɛnb mɔ baa' ki kɛ wɔn nin u'panpaankaab saan, ki jinh. <sup>11</sup> \*Farisiɛnmbɛ laa' nnɔ ma nnɔ, nɛ ki niire' u'panpaankaab ki ye: «Bɛ tien' ni'cɛnbaa tɛ ki jinh nin bilɛnpotekb nin bibiɛrdɛnb-i?»

<sup>12</sup> \*Yesu cii' bi len' ma bo, nɛ ki tɔke' bɛ ki ye: «Binib bà ɲmɔbe laanfɛ ɲa nuunh dɔktɛ, bà bun nɛ nuunh dɔktɛ.» <sup>13</sup> Ni kɛle' \*Uwien ya gbɔnku ni ki ye: «Uwien ɲa yíe bɛ ñ li teh tuɔrɛ ki dienh wɔ, ama u yíe bɛ ñ li muɔh tɔb micɛcɛkm nɛ. Nɛn bo, li joh mɛn kí tɪ bɛnge iñɔbon yíe nɔ ya tingi. Kimɛ ma baa' ñ yin nimɔnb, n baa' ñ yin bibiɛrdɛnb nɛ.»

*Uñɔlɔle ya gbɛr  
(Mark 2:18-22; Luk 5:33-39)*

<sup>14</sup> Tɔ, San ya panpaankaab baa' ki lá niire' Yesu ki ye: «Bɛ tien' tinbi nin \*Farisiɛnmbɛ lùoh buñɔbu, nɛ a ya panpaankaab bɛn ɲa lùoh?» <sup>15</sup> Nɛ u jiin' bɛ ye: «Binib bà bi yin' bɛ upiikuɔn li fre kí li te uyɛnsaa ni uyo wà piicɛ laan te bi'saan-ii? Ama uyo uba we ní bɛ ñ ñɛn piicɛ nnɔ bi'saan. U ya yo nɛ bi li lòle buñɔbu.»

16 Nε ki tí ye: «Uba ηa rí taa kpɛlɛfɛ̀nku ya jenl, kí lekn liliɛrkpaal. U tien' nnɔ la, kukpɛlɛfɛ̀nku ya jenl nnɔ li kɛre liliɛrkpaal nnɔ nɛ libɔ̀nl nnɔ rí yɛbre kí pukn. 17 Uba mɔ ηa rí taa midaam mà ηa laan muɔ' ki ben' kí piɛke iyɔ̀kpaan ni. U tien' nnɔ la, iyɔ̀l nnɔ li kpiɛre kí saa, nɛ midaam nnɔ mɔ rí wule kí ñɛnde. Bi piɛkeh midaam mà ηa laan muɔ' ki ben' iyɔ̀fɛ̀n ni nɛ. Bi tien' nnɔ la, liyɔ̀l nnɔ ηa rí saa, midaam nnɔ mɔ ηa rí wule.»

*Yesu cɛ̀re' upii uba faake', ki mɛkre' kibupiik kiba mɔ*  
(Mark 5:21-43; Luk 8:40-56)

18 \*Yesu te ki lienh, nɛ uciɛn uba baa', ki lá gbaan' u'nintuɔ̀li ki tɔ̀ke' wɔ ki ye: «N'bisɛ kpo' itáan yiɛ bo nɛ. Ama dɛn kí taa a'nuɔ́ kí paan u'bo, ηɔ wɔ rí liɛbe kí li fuobe.» 19 Nɛ \*Yesu fii' ki paan' u'bo nin u'panpaankaab.

20-21 Tɔ̀, upii uba mɔ là te ni'saan, ki laa' tifer ibin piik nin ile ta gben'. U maale' u'yɛnm ni ki ye: «N mɛ' u'wɛngolkaar mɔ̀nɔ̀n la, n li faake nɛ.» Nɛ ki baa' \*Yesu ya puoli bó ní, ki nɛkn' wɔ, nɛ ki mɛ' u'wɛngolkaar ya ñɔ̀gben.

22 \*Yesu jiɛbe' ki laa' wɔ, nɛ ki tɔ̀ke' wɔ ki ye: «N'bisɛ, cuo a'ba. A'tekjim nɛ ηmɛn' ηɛ.» Nɛ u pɔ̀k ki faake' i ya tɔ̀an bo.

23 \*Yesu tí baa' uciɛn nnɔ den, nɛ ki laa' biwopieɓ nin linigol te ni'saan ki ηmɔ̀be kuwaaku ki gbien'. 24 Nɛ u tɔ̀ke' bɛ ki ye: «Ñɛ mɛn saali, kimɛ kibupiik nnɔ ηa kpo', kí gɔ̀h nɛ.» U len' nnɔ ma nnɔ, nɛ bi leh wɔ. 25 Bi ηɔ̀re' linigol nnɔ ki ñɛn' saali, nɛ u kɔ̀n' kibupiik nnɔ dɔ kuduku kùà ni nnɔ, ki cuo' ki'nuɔ́, nɛ kí fii'. 26 Nɛ tigbɛr nnɔ yɛre' ki gbe mitinfɛ̀nm nnɔ ni ni'kɛ saan.

*Yesu cɛ̀re' ijùɔ̀n ile likre'*

27 \*Yesu siere' ni'saan ki bure'. U joh ma nnɔ, nɛ ijùɔ̀n ile pɛ u'bo, ki wuureh ki teh: «\*Dafid ya yaabile\*, muɔ tɛ micɛɛɛkm.»

28 \*Yesu tí baa' iden, ijùɔ̀n nnɔ nɛkn' wɔ, nɛ u niire' yè ki ye: «Ni teke' ki jin' ki ye n li fre kí likre nɛ-ɛɛ?» Nɛ ì jii'n' wɔ ki ye: «A li fre, Yonbdaan.» 29 Nɛ u mɛ' i'nun, ki tɔ̀ke' yè ki ye: «Nè rí tien nɛ tɛn ni teke' nni ki jin' ma bo.» 30 Nɛ ì likre'. Nɛn saan nɛ u tùɔ̀re' ki kpɛkpe' i'bo ki ye ì la tɔ̀ke nil. 31 Ama bi ñɛn' ma nnɔ, nɛ ki lienh u'bó mitinfɛ̀nm nnɔ ni ni'kɛ saan.

*Yesu buu' ulɛntɛb uba*

32 Tɔ̀, uyo wà bi ñɛh nnɔ, nɛ bi tuke' ní uje uba usɛnpol cɛ̀re' u'lenl tɛbe' ki baa' \*Yesu saan. 33 \*Yesu ηɔ̀re' usɛnpol nnɔ, nɛ u ji freh ki lienh. Ní cuo' linigol miyɔ̀km cɛ̀ɛn, nɛ bi ye: «Ta laan laa' niɛ ya bonn tinbi Israyɛl yaab ni.»

34 Ama \*Farisiɛnmbɛ ben lienh ki teh isɛnpol ya ciɛn nɛ de' wɔ mituɔ̀m u ηuɔ̀h isɛnpol binib saan.

*Yesu muɔ̀h inigol micɛɛɛkm*

35 \*Yesu cuonh iducɛnciɛn kɛ ni nin iduwawaale ni, ki wɔ̀knh binib itáan ya dur ni, ki kpaandeh Uwien ya bɛl ya gbɛmɔ̀nmɔ̀nt, ki buuh iwíɛn kɛ ya bol. 36 U laa' inigol, nɛ ki muɔ́ bɛ micɛɛɛkm cɛ̀ɛn, kimɛ bi dɔ̀re', bi'yɛnm saa', nɛ bi te tɛn ipe yà ηa ηmɔ̀be wa kpaah yè. 37 Nɛ u tɔ̀ke' u'panpaankaab ki ye: «Tijier ben' ki yɛbe, ama bà li taan tù ηa ji yɛbe. 38 Nɛn bo, gbáan mɛn ukpɛdaan wɔ rí sɔ̀n bitonsɔ̀nb bɛ rí tí taan u'jier.»

## 10

*Yesu ya tondb piik nin bile*  
(Mark 3:13-19; Luk 6:12-16)

1 Nɛ \*Yesu yin' u'panpaankaab piik nin bile nnɔ ní, ki de' bɛ mituɔ̀m bɛ rí li ηuɔ̀h isɛnpol binib saan, kí li buuh iwíɛn kɛ ya bol.

\* 9:27 Dafid ya yaabile yé miyinm mà uyo uba la, bi taah mɛ ki yih Uwien là pùon' ki ye u li sɔ̀n wà ní wɔ rí li yé uber nnɔ nɛ. Bi kele' tigbɔ̀nt tà Grɛkmbɛ ya lenm ni nnɔ, bi kele' ki ye Dafid ya Bijɛ nɛ.

<sup>2</sup> U'tondb piik nin bile nnə ya yel sə: ukpiək, Simən wà bi yih wə Pier nnə nin u'ninjε Andre, Sebede ya bijjεb Saak nin u'ninjε San, <sup>3</sup> Filip nin Batelemi, Toma nin Matie ulεnpotekl, Alfe ya bijε Saak nin Tade, <sup>4</sup> Simən wà ya nun món u'du ya gber\* bo nin Sudas Iskariyət wà lá li kuəre Yesu nnə.

*Yesu sən' u'tondb piik nin bile  
(Mark 6:7-13; Luk 9:1-6)*

<sup>5</sup> \*Yesu sən' u'tondb piik nin bile nnə, nε ki təkε' bε ki ye: «La jo mən bà ηa yé Sufmbε ya du ni. Ni'taal la tε Samari ya tinfεnm ya du uba mənən ni. <sup>6</sup> Ama li joh mən Israyel yaab saan, kimε bεn nε te tən ipe yà tūre' usen. <sup>7</sup> Ni joh la, ní li kpaandeh ki teh Uwien ya bεl nεkn' ní ηə! <sup>8</sup> Kí li buuh biwiεnb, kí li mεkreh bitenkpiib, kí li cεreh ijend lùoreh, kí li ηuəh isenpol binib saan. Ni laa' mituəm nnə ma, na pèn' niba. Ni'mə ní li buuh binib, ki la li nuunh paaku. <sup>9</sup> Ni joh la, ni la tuke nđkm, ki la tuke like ya kur, ki la cùn likbu buba nin bu'təbu; <sup>10</sup> ki la tuke sɛnjokəl, ki la tuke lier ile, ki la tuke tacaan, ki la ηuuke gbien, kimε utonsənl kε jinh u'tuonl bo nε.

<sup>11</sup> «Ni tí baa' udu wà ni la, ní nuun unimə̀n wà li teke nε u'den, kí li te nən saan kí tí baa' uyo wà ni li siere udu nnə ni. <sup>12</sup> Ni kən' iden yà ni la, ní fuonde iden nnə ya nib kí ye: «Li te mən uyenduən ni.» <sup>13</sup> Iden nnə ya nib teke' nε la, uyenduən nnə li yé bi'yu nε. Ama ba teke' nε la, u li juore ni'yu nε. <sup>14</sup> Iden yà ya nib bii udu wà ya nib ηa teke' nε, ka teke' ni'gber mə la, nε mən nè kí kpakpaare ni'taan ya tengunku† kí wiε nε. <sup>15</sup> N təkεh nε imən nε, lidaali là Uwien li bu binib tibuur nnə, binib nnə ya tudere li cən Sodəm nin Gomər ya du ya nib yu.»

*Bi li jənde Yesu ya nib ma bo  
(Mark 13:9-13; Luk 21:12-17)*

<sup>16</sup> «N sən̄h nε ma nə, ni li te tən ipe nε te ikər ya siik ni. Nən bo, ní li ceke tən iwε, kí li te suoo tən inenjel. <sup>17</sup> Li bεn mən binib bó, bi lá li cuo nε kí jon tibuur, kí n̄n nε inalebe bi'taan ya dur ni. <sup>18</sup> Min bo, bi lá li tuke nε kí jo tibuur idu ya ciεnb nin biberb saan. Nnə nε ni li yé n'mə̀nkunb bεn nin bà ηa yé Sufmbε kε saan. <sup>19</sup> Bi cuo' nε ki jon' tibuur la, la n̄in mən ni li len ma bo bii ni li len kí ye bà. Uyo lá baa' la, ni li bende ni li len kí ye bà. <sup>20</sup> Kimε na yé ninbi nε li len, ni'Baa \*Uwien ya Fuoñaanm nε li cère ní len.

<sup>21</sup> «U ya yo nε unil li kuəre u'ninjε, bε ní ku wə. Baa mə li kuəre u'buk, bε ní ku kè. Mubumu mə li fii kí sere mu'naambε nin mu'baambε bo, kí cère bε ní ku bε. <sup>22</sup> Min bo nε binib kε li nən nε. Ama wà kε li m̄inde kí li ηmə̀ηmə̀be kí tí fəre nnə, wən nε li ηmə̀re. <sup>23</sup> Bi jəndeh nε udu uba ni la, ní sən kí jo udutə ni. N təkεh nε imən nε, \*Unil ya Bijε li baa ní kí lε na laan bòn' Israyel ya du kε.

<sup>24</sup> «Wà bengeh ηa ní cən wà wəknh wə. Utonsənl mə ηa ní cən u'cənbaa. <sup>25</sup> Ní kpe wà bengeh ní li te tən wà wəknh wə nε, utonsənl mə ní li te tən u'cənbaa. Bi yin' ududaan isenpol ya ciεn Belsebul la, ba ní yin u'den yaab mə nà cən' nnə-əə?»

*Li fenge mən Uwien baba  
(Luk 12:2-7)*

<sup>26</sup> «Nən bo, la fenge mən nib. Niba ηa te ki buə ηə ba lá li n̄en nè upaan bo. Tigber tuba mə ηa te kí juore kí li buə ηə ba lá li bende tū. <sup>27</sup> N təkεh nε nà licin̄unl ni nnə, kpaande nè mən kuwenwenku ni. N bunbeh nε nà litubl ni nnə, kpaande nè mən kudulekaaku ya paaki. <sup>28</sup> La fenge mən nib, kimε bi kuuleh tigbənent baba nε. Ba ní fre kí ku naank. Li fenge mən wà li fre kí ku tigbənent nin kinaank kε umu wà ηa ní kpiin ni. <sup>29</sup> Bi li fre kí kuəre inuən ile iηε nε? Nin nən kε ηə uba mənən ηa ní lu kí kpo ηə ni'Baa ηa bεn. <sup>30</sup> Ninbi wən, Uwien bεn haali ni'yur mənən ya n̄əbu. <sup>31</sup> Nən bo, la fenge mən. Ni cən' inuən ligol.»

\* **10:4** Yesu ya yo, Sufmbε ni, biba ya nun là món bi'du ya gber bo nε, nε bi m̄əh bε ní fie bi'du Erom yaab saan. † **10:14** Sufmbε bo kí kpakpaare itaan ya tengunku ya tingi si: nà kε ji tu unil la, ní yé u'yaar nε, na ji yé uba yaar.



*Li lienh binib ya nun bó ki teh a yé Yesu yó  
(Luk 12:8-9)*

<sup>32</sup> «Wà kɛ lienh binib ya nun bó ki teh u yé n'yo la, n'mó li len n'Baa wà te paaki bó ya nun bó kí ye udaan mó yé n'yo nɛ. <sup>33</sup> Ama wà kɛ lienh binib ya nun bó ki teh wa yé n'yo la, n'mó li len n'Baa wà te paaki bó ya nun bó kí ye udaan mó ɲa yé n'yo.»

*Na yé ñɔkpaan, ní yé lituɔl nɛ  
(Luk 12:51-53; 14:26-27)*

<sup>34</sup> «Ni la li maaleh ki teh n tuke' uñɔkpaan nɛ ki baa' uɲɛndun wuu ni. N tuke' lituɔl nɛ ki baa'. <sup>35</sup> N baa' ní pàare kibujɛbuk nin ki'baa nɛ, kí pàare kibupiik nin ki'naa, kí pàare yaabisɛ mó nin u'cɛ ya naa. <sup>36</sup> Unil den yaab nɛ li yé u'nennɛndb.

<sup>37</sup> «Wà kɛ yíe u'naa bii u'baa ki cɛn' min la, wa kɛ wɔ ní li yé n'yo. Unil wà kɛ mó yíe u'bise bii u'bije ki cɛn' min la, u'mó ɲa kɛ wɔ ní li yé n'yo. <sup>38</sup> Wà kɛ ɲa yuunh u'dɔpɔnpɔn ki bukeh ki paakeh n'bo la, wa kɛ wɔ ní li yé n'yo.†

<sup>39</sup> «Wà nuunh wɔ ní fie u'miel la, wɔn nɛ li kpo kí juore fɛnm. Wà li tuo kí kpo min bo nnɔ, wɔn nɛ li lɛ limiel.»

*Uwien li su binib ma bo  
(Mark 9:41)*

<sup>40</sup> «Unil teke' nɛ la, u teke' min nɛ. Unil teke' nni la, u teke' wà sɔn' nni ní nnɔ nɛ. <sup>41</sup> Unil teke' \*Uwien ya ñɔbonsɔknl ki ye u yé \*Uwien ya ñɔbonsɔknl ma nnɔ nɛ cère' u teke' wɔ la, u li lɛ \*Uwien ya ñɔbonsɔknl ya suul. Unil teke' unimɔn ki ye u yé unimɔn ma nnɔ nɛ cère' u teke' wɔ la, u li lɛ unimɔn ya suul. <sup>42</sup> N tɔkeh nɛ imɔn nɛ, wà kɛ de' ibaan yiɛ nɔ ya uba kiñunyibuok baba mɔnɔn, ki ye u yé n'panpaanke ma nnɔ nɛ cère' u de' wɔ la, wà ní lúo u'suul fiebu.»

## 11

*San wà siih binib Uwien ya ñunm sɔn' u'panpaankaab Yesu saan  
(Luk 7:18-35)*

<sup>1</sup> \*Yesu tɔke' u'panpaankaab piik nin bile bi li tien ma ki tí gben' ma nnɔ, nɛ ki siere' ní'saan, ki jon' ki tí wɔknh binib Uwien ya gbɛr, ki kpaandeh tú mitinfɛnm nnɔ ya du ní.

<sup>2</sup> Tɔ, San wà siih binib Uwien ya ñunm te lipɛkl ní uyo wà nnɔ nɛ ki cii' \*Uwien ya Nigɛndkɛ Kristo ya tòn bó. Nɛ ki sɔn' u'panpaankaab u'saan, ki ye bɛ ní tí niire wɔ kí ye

<sup>3</sup> wɔn nɛ yé wà li baa ní\* nnɔ bii bi li guure utɔ nɛ?

<sup>4</sup> Bi tí niire' Yesu, nɛ u tɔke' bɛ ki ye: «Liebe mɛn kí tí tɔke San ni cii' nà nin ni laa' nà: <sup>5</sup> ijùɔn likreh, iwɔb cuonh, ijend lùoreh, igbaan ciih, bitenkpiib mɛkreh, nɛ bijiinb ciih Uwien ya gbɛmɔnmɔnt. <sup>6</sup> Wà ɲa tùre' Uwien ya sɛn min bo la, Uwien ya mɔnm te u'bo.»

<sup>7</sup> San ya panpaankaab liebeh uyo wà nnɔ, nɛ \*Yesu cin' ki tɔkeh linigol San ya gbɛr ki teh: «Ni là jon' kupenpelku ni ní tí liike ba? Ni là jon' ní tí liike limuɔnl là mitafaam jɛngɛh lɛ nɛ-ɛɛ? <sup>8</sup> Ni nín là jon' ní tí liike ba? Ni là jon' ní tí liike unil wà guo tikpɛlcɛmɔnmɔnt nɛ-ɛɛ? Binib bà guoh tikpɛlcɛmɔnmɔnt kɔh biberb den nɛ. <sup>9</sup> Tɔ, ni nín là jon' ní tí liike ni lɛ bonn nɛ? Ni là jon' ní tí liike \*Uwien ya ñɔbonsɔknl nɛ-ɛɛ? N tɔkeh nɛ imɔn nɛ, u cɛn' \*Uwien ya ñɔbonsɔknl mɔnɔn. <sup>10</sup> Kimɛ wɔn San bo nɛ ní kele' \*Uwien ya gbɔnku ni ki ye: «Liike, n li sɔn n'tond wɔ ní liere ɲɛ, kí lá tùɔre a'sɛn.» <sup>11</sup> N tɔkeh nɛ imɔn nɛ, ba laan maa' nil uba u cɛn' San wà siih binib Uwien ya ñunm nnɔ. Ama unil wà yé uwaal Uwien ya bɛl ni cɛn' wɔ. <sup>12</sup> Kí ñɛ San là siih binib Uwien ya ñunm uyo wà kí lá baa fɛnfɛnnɔ, bi piikeh Uwien ya bɛl nin ufaa nɛ, nɛ bà faa nuunh bɛ ní fie lè†. <sup>13</sup> \*Uwien ya ñɔbonsɔknb kɛ nin

† **10:38** \*Yesu ya yo, bi là ye bɛ ní kɛ unil la, wɔn bugbɛn nɛ tukeh u'dɔpɔnpɔn ki joh bi li tí kɛ wɔ nà saan. \* **11:3** Bi ye Wà li baa ní la, bi niireh Uwien là pùon' ki ye u li sɔn wà ní wɔ ní lá ɲmien Sufmɛ nnɔ nɛ. † **11:12** Migbiirm miɛ ya ciim te bolm mile bo nɛ: Kí ñɛ San là siih binib Uwien ya ñunm uyo wà kí lá baa fɛnfɛnnɔ, bi piikeh Uwien ya bɛl nin ufaa nɛ, nɛ bà faa nuunh bɛ ní fie lè bii kí ñɛ San là siih binib Uwien ya ñunm uyo wà kí lá baa fɛnfɛnnɔ, binib ya nun mɔn bɛ ní kɔ Uwien ya bɛl ni nin ufaa nɛ.

yiko là len' ni li te ma bo, kí lá baa San ya yo. <sup>14</sup> Ni yíe ní cii mǎnmǎnm la, ní li ben kí ye San yé \*Uwien ya ñǎbonsǎknl \*Eli wà bi li liébe ní nnǎ ne. <sup>15</sup> Wà ñmǎbe litubl la, wǎ ní cii.

<sup>16</sup> «N li taa ba kí ñenge fɛnfɛnnǎ ya nib-i? Bi naan tɛn mubumu ne ke kidaak ni ki jeleh, ki tǎkeh mu'tǎmu

<sup>17</sup> ki teh: <Ti piebe' ne liwol,

ne na ñǎn' ciék.

Ti gɛn' ikuyuon,

ne na kpiende'.>

<sup>18</sup> «Kime San baa' ki kùǎ tijier tubambɛ, ki lùoh buñǎbu, ka ñuh daam, ne bi ye usɛnpol ne ñaake wǎ. <sup>19</sup> \*Unil ya Bijɛ baa' ki jinh ki ñuh, ne bi ye: <Liike mɛn uje wuǎ yé ufǎnfuǎb

ne, ki yé udeyibl, ki jǎreh nin bilɛnpotekb nin bibiɛrdɛnb.> Tǎ, Uwien ya tǎon ne wǎngɛh u'yɛnfuom mǎn ki kpe ma bo.»

*Ni bre idu yà ña tuo' ki teke' Yesu ki jin' nnǎ bo*

*(Luk 10:13-15)*

<sup>20</sup> Tǎ, \*Yesu cin' ki kǎnh nin idu iba ya nib. U là tien' miyǎkm ya bont tǎ yɛbe idu nnǎ ni, ne i' nib ña lèbre' bi'tetem. Nɛn ne cère' u kǎnh nin bɛ. <sup>21</sup> U len' ki ye: «Korasinn yaabɛ, ñi bre ni'bo. Bɛtsayida yaabɛ, ñi bre ni'mǎ bo. Kime ni laa' miyǎkm ya bont tǎ ni'bùol

nǎ, Tir nin Sidǎn yaab mǎ bi là laa' tǎ la, bi bi tien' tɛn bi ke mikuum ne, ki pǎnpǎkn' mifɛntɛm, ñǎ kí wuǎn kí ye bi lèbre' bi'tetem ñi wuǎke'. <sup>22</sup> N tǎkeh ne ne, lidaali là Uwien li bu binib tibuur nnǎ, ni ya tudɛre li cɛn Tir nin Sidǎn yaab yu. <sup>23</sup> Ninbi Kapɛrnawum

yaabɛ, ni maaleh ki teh Uwien li duon ne paaki ne-ɛɛ? U li jiin ne kutɛnkpiiku ni ne. Kime ni laa' miyǎkm ya bont tǎ ni'bùol nǎ, Sodǎm yaab mǎ bi là laa' tǎ la, bi'du nnǎ bi biɛ ki te

ne haali nin dinnǎ. <sup>24</sup> N tǎkeh ne ne, lidaali là Uwien li bu binib tibuur nnǎ, ni ya tudɛre li cɛn Sodǎm yaab yu.»

*Dɛn mɛn Yesu saan ki ɛ lifuorl*

*(Luk 10:21-22)*

<sup>25</sup> U ya yo ne \*Yesu len' ki ye: «Baa, sin kutaaku nin kitink ya Yonbdaan, a bǎle' tibont tǎ biyɛnfodɛnb nin bibɛnbɛnb nnǎ, a taa' tǎ ki wuǎn' biwaab ne. Nɛn bo ne n pèkeh ñɛ.

<sup>26</sup> Imǎn, Baa, a yíe ne ki tien' nnǎ.

<sup>27</sup> «Tǎ, n'Baa ne taa' tibont ke ki ñukn' nni. N'Baa ña ñi la, uba ña ben min u'Bijɛ yé udaan wà. Min u'Bijɛ ña ñi la, uba mǎ ña ben n'Baa yé udaan wà. Binib bà n yíe ki taa' n'Baa ki wuǎn' bɛ nnǎ mǎ ben u yé udaan wà.

<sup>28</sup> «Ninbi bà ke tuke ituk i kpiɛke ki jii' nnǎ, dɛn mɛn n'saan, n li de ne lifuorl. <sup>29</sup> Buke mɛn n'najɛdɛbiku, kí cère ñi wǎkn ne, kime n te suoo ne, ki ñmǎbe liyɛnguol. Ni li ɛ lifuorl n'saan, <sup>30</sup> kime n'najɛdɛbiku ya bukm ña faa. N'tukl mǎ ña kpiɛke.»

## 12

*Saba ya daali ya gber*

*(Mark 2:23-28; Luk 6:1-5)*

<sup>1</sup> \*Saba uba ya daali, \*Yesu nin u'panpaankaab gèbreh ikpǎan iba ni. Mikǎnm cuo' u'panpaankaab, ne bi cin' ki coh ijifen\* ki cienh ki nukɛh ki ñmǎnh. <sup>2</sup> \*Farisiɛnmbɛ laa' bi teh nnǎ ma nnǎ, ne bi tǎke' \*Yesu ki ye: «Liike a'panpaankaab teh yiko ye bi la teh nǎ

\*Saba ya daali ma.» <sup>3</sup> Ne u tǎke' bɛ ki ye: «Na kaan' \*Uwien ya gbǎnku ni \*Dafid là tien' ma bo ne-ɛɛ? Mikǎnm là cuo' wǎn nin u'nib, <sup>4</sup> ne u kǎn' Uwien ya ninbonl ni, ki taa' kpǎnǎ wà bi taa' ki de' Uwien nnǎ wǎn nin ben ñmǎn'. Ama bitǎtuɔrkaab baba ña ñi la, wǎn nin

u'nib ña ñmǎbe sɛn bɛ ñi ñmǎn kpǎnǎ nnǎ. <sup>5</sup> Bii na kaan' nǎ kele' yiko ya gbǎnku ni ne? Nǐ kele' ki ye \*Saba ya daali la, bitǎtuɔrkaab kɛndɛh \*Saba ya daali ya yiko bo ne Uwien

\* **12:1** Bi yin' nǎ ijifen migbiirm miɛ ni nnǎ yé \*Sufmbɛ donbó ya jier tuba ne bi yih tǎ ble.

ya duku† ni, ama uba ɲa biindeh be. <sup>6</sup> N tɔkeh ne ne, unil te niε saan nɔ ki cɛn' Uwien ya duku‡. <sup>7</sup> Ni kele' \*Uwien ya gbɔnku ni ki ye: «Uwien ɲa yie be ɲ li teh tuɔre ki dienh wɔ ama u yie be ɲ li muɔh tɔb micεεkm ne.» Ni bi ben iɲɔbon nnɔ ya tingi la, na bi li biindeh binib bɔ ɲa ɲmɔbe biil nɔ. <sup>8</sup> Tɔ, \*Unil ya Bijε ne ɲmɔbe usen wɔ ɲ wuɔn bi li tien nɔ \*Saba ya daali.»

*Ujε uba ya nuɔ faan', Yesu cɛre u faake' Saba ya daali*  
(Mark 3:1-6; Luk 6:6-11)

<sup>9</sup> Tɔ, \*Yesu siere' ni'saan, ne ki kɔn' bi'taanl ya duku ni. <sup>10</sup> Ujε uba mɔ te len u'nuɔ uba faan'. Ne bi niire' Yesu ki ye: «Unil ɲmɔbe usen wɔ ɲ buu uwien Saba ya daali-ii?» Kimε bi lɔ nuunh bi li dule nɔ bo kɔ biin wɔ ne. <sup>11</sup> Ne u ye: «Ni'ni ɲmε ne ɲmɔbe upebaab, ne upe nnɔ lu' kubuɔoku ni \*Saba ya daali la, wa ɲ ɲen wɔ? <sup>12</sup> Unil ɲa cɛn' upe-ee? Nen ne wuɔn' ki ye ti'yiko ye unil ɲmɔbe usen wɔ ɲ tien nɔ mɔn \*Saba ya daali.» <sup>13</sup> Ne ki tɔke' ujε wɔ ya nuɔ faan' nnɔ ki ye: «Tɛnde a'nuɔ.» U tɛnde' u'nuɔ ne u jire' u'ciem ten u'tɔ. <sup>14</sup> Nen saan ne \*Farisienmbε nnɔ ɲen' ki taan' ki kele' be ɲ gbire kɔ liike bi li tien ma kɔ ku Yesu.

*Yesu yε Uwien ya tonsɔnl ne*

<sup>15</sup> \*Yesu cii' ma nnɔ ne ki siere' ni'saan. Linigocienl paan' u'bo, ne u buu' bi'ni biwiεnb kε, <sup>16</sup> ki kpεkpε' bi'bo ki ye bi la cɛre be ɲ bende wɔ. <sup>17</sup> U tien' nnɔ ɲɔ \*Uwien ya ɲɔbonsɔknl Esayi lɔ len' nɔ nnɔ nɛ ɲ tien ne. U lɔ len' ki ye Uwien ye:

<sup>18</sup> «N'tonsɔnl sɔ nɔ,

N yie wɔ,

N'yεnm sɔnge u'bo,

ne n gɛnde' wɔ.

N li jiin n'Fuɔɲaanm u'bo,

ɲɔ wɔ ɲ li tɔkeh inibol kε n li bu binib tibuur ma bo.

<sup>19</sup> Wa ɲ li nuunh gbεr, ka ɲ li wuureh,

ba ɲ cii u'waaku bɔ isenje ni.

<sup>20</sup> Wa ɲ tonde limuɔnl lɔ kuɔ' ki gbɔabe,

ka ɲ kpiin lifrl lɔ beh lɛ ɲ kpiin,

u li te nnɔ ne kɔ tɔ baa uyo wɔ

u li cɛre nibonmɔnn ɲ liere usen.

<sup>21</sup> «Wɔn bo ne inibol kε li ɲmɔbe lidɛndɛnl.»

*Biba ye Yesu ɲmɔbe Bɛlsebul ya tuɔm ne*  
(Mark 3:20-30; Luk 11:14-23)

<sup>22</sup> U ya yo ne bi tuke' ni ujε uba ki baa' \*Yesu saan. Usenpol ne cɛre' u yε ujuɔn, u'lenl mɔ tɛbe'. \*Yesu buu' wɔ, ne u ji freh ki lienh, ki lenh mɔ. <sup>23</sup> Ni cuo' linigol nnɔ kε miyɔkm, ne bi lienh ki teh: «Ujε wuɔ ɲa lii yε \*Dafid ya yaabil-ii?»

<sup>24</sup> Ama \*Farisienmbε cii' nnɔ ma nnɔ, ne ki lienh ki teh isenpol ya cɛn Bɛlsebul ne dienh wɔ mituɔm u ɲuɔh isenpol binib saan. <sup>25</sup> \*Yesu ben bi'yεnmaale ma nnɔ, ne ki tɔke' be ki ye: «Libel lɔ kε ya nib bore' tɔb ki kɔnh bi'ɲmiel ni la, libel nnɔ li juore fεnm ne. Udu uba ya nib bii iden iba ya nib mɔ bore' tɔb, ki kɔnh bi'ɲmiel ni la, udu nnɔ bii iden nnɔ mɔ li juore fεnm ne. <sup>26</sup> Nen bo, Satan liebe' ki ɲuɔh wɔn Satan binib saan la, u kɔnh nin u'ba ne, ne u'bel li tien mila ka ɲ juore fεnm-i? <sup>27</sup> Ni len' ki ye isenpol ya cɛn \*Bɛlsebul ne de' nni mituɔm n ɲuɔh isenpol binib saan. Tɔ, ɲmε nɲn de' ni'panpaankaab mɔ mituɔm bi ɲuɔh isenpol binib saan-i? Ni'panpaankaab teh ma bo ne li wuɔn kɔ ye ni ɲmɔbe imɔn bii na ɲmɔbe. <sup>28</sup> Ama \*Uwien ya Fuɔɲaanm ne dienh nni mituɔm n ɲuɔh isenpol. Nen ne wuɔn' ki ye Uwien ya bel baa' ni ni'saan. <sup>29</sup> Mitɔm la, uba ɲa ɲ fre kɔ ufεfaa den, kɔ fie u'bont,

† 12:5 Migbiirm miε ni bi ye Uwien ya duku la, ba niireh kuduku nnɔ ya benku ni baba, bi niireh iluo mɔ ne. Nɔ saan kε bi ye Uwien ya duku la, bi sɔbe ki niireh iluo nnɔ ne. ‡ 12:6 Bi li fre kɔ lɛbre Unil te niε saan nɔ ki cɛn' Uwien ya duku kɔ ye nɔ cɛn' Uwien ya duku te niε saan nɔ mɔ.

ka ηmabe tuam mà u li kpiε kí lòle wə kí yaan. U lòle' wə la, u ya yo nε u li fre kí kə u'den kí fie u'bont.

<sup>30</sup> «Wà kε ηa se n'ciεk bó la, u nεn nni nε. Wà kε ηa taakeh ki toreh nni la, u kpiendeh nε. <sup>31</sup> Nεn bo, n təkεh nε nε, Uwien li fère binib bi'biere kε, kí fère bε bi sukreh wə isuk yà kε. Ama unil suke' \*Mifuoñaanm mεn la, Uwien ηa n' fère wə. <sup>32</sup> Unil len' \*Unil ya Bijε bo fεnfεnm la, Uwien li fère wə. Ama unil len' \*Mifuoñanm mεn bo fεnfεnm la, Uwien ηa n' fère wə kitink kiε bo, ka n' fère wə paaki bó mə.»

*Busubu nin bu'bii ya gber*

*(Luk 6:43-45)*

<sup>33</sup> «Ní li bεn kí ye busubu mən la, bu'bii mə li mən nε. Bù bre la, bu'bii mə li bre nε. Busubu ya bii nε li cère bε n' bende bù yé busubu bùa ya bol. <sup>34</sup> Iwaalεb ninbi, ni bre ma nnə, ni li tien mila kí len inəbon yà mən-i? Kimε unil kε len' ki kun' nà bó la, n' n'εn' iyεnmaale yà te u'fəl bo nε. <sup>35</sup> Unimən ya yεnmaalmanmən nε cèreh u teh nà mən, nε ubierdaan ya yεnmaalbiere cèreh u teh nà bre.

<sup>36</sup> «N təkεh nε nε, lidaali là Uwien li bu binib tibuur nnə, nεn daali nε u li niire bε bi là len' nəbonfεnfεnm wà kε nnə ya gber. <sup>37</sup> A'lenm bo, nε Uwien li bù ηε ugbeməndaan bii u li biin ηε.»

*Bi yie Yesu n' tien miyəkɔm ya bonn*

*(Mark 8:11-12; Luk 11:29-32)*

<sup>38</sup> U ya yo nε \*Yiko ya wənwəknb biba nin \*Farisienmbε biba təkε' \*Yesu ki ye: «Cεnbaa, ti yie á tien miyəkɔm ya bonn niba nε tí lε.» <sup>39</sup> Nε u təkε' bε ki ye: «Ninbi fεnfεnnə ya nibε, ni yé binibierb nε, ka cuube Uwien saan, nε ki nuunh ní lε miyəkɔm ya bonn. \*Uwien ya nəbonsəknl \*Sonas ya yəkɔm ya bonn baba ηa n' la, na ji li lε yəkɔm ya bontənn niba. <sup>40</sup> Sonas là tien' uεncien ya benku ni iwien ita nin tiñənt tuta ma nnə, nnə nε \*Unil ya Bijε mə li tien kitink ni iwien ita nin tiñənt tuta. <sup>41</sup> Uwien li bu binib tibuur lidaali là nnə, Ninif yaab li fii kí sere fεnfεnnə ya nib ya nun bó kí biin bε. Kimε \*Sonas là kpaande' Ninif ya du ni Uwien ya gber ma nnə, bi là cii' nε ki lèbre' bi'tetem. Ama unil te niε saan nə ki cεn' \*Sonas. § <sup>42</sup> Uwien li bu binib tibuur lidaali là nnə, \*Seba ya piiber li fii kí biin fεnfεnnə ya nib, kimε u là n'εn' ní fənfəkɔm nε wə n' lá cenge Salomən ya yεnfogber. Ama unil te niε saan nə ki cεn' Salomən.»\*

*Isenpol liebe' unil bo la, n' bre u'bo ma bo*

*(Luk 11:24-26)*

<sup>43</sup> «Usenpol siere' unil saan la, u cuonh ki lindeh kupenpelku ni nε, ki nuunh u li kèle nà saan kí fuore. U tí luo' la, <sup>44</sup> nε wə n' ye u li liebe kí tí kə u là n'εn' nà saan nnə nε. U li liebe ní kí lε niba ηa te u'kənkunə nnə ni, bi tūre' ki ηère' wù, ki tien' tibonmənmannt len. <sup>45</sup> Nεn saan nε u li jo kí tí taa ní isenpol ilole yà bre ki cεn' wən, i'kε n' lá li ηaake unil nnə bo, kí cère wə n' juore fεnm kí cεn u là te mikpiεkm ma bo. Ní li te nnə nε fεnfεnnə ya nibierb mə bo.»

*Yesu ya naa nin u'ninjieɓ*

*(Mark 3:31-35; Luk 8:19-21)*

<sup>46</sup> \*Yesu laan biε ki lienh nin linigol nnə, nε u'naa nin u'ninjieɓ baa' ki lá se saali ki nuunh bε n' təkε wə tigber. <sup>47</sup> [Nε linigol nnə ni uba təkε' wə ki ye: «A'naa nin a'ninjieɓ se saali ki nuunh bε n' təkε ηε tigber.»] <sup>48</sup> Nε \*Yesu jiin' wə ki ye: «Ŋmε yé n'naa? Bi lε yé n'ninjieɓ-i?» <sup>49</sup> Nε ki tēnde' u'nuə ki wuən' u'panpaankaab ki ye: «Liike mεn, n'naa nin n'ninjieɓ sə. <sup>50</sup> Unil wà kε teh n'Baa wà te paaki bó yie ma la, wən nε yé n'ninjε, ki yé n'ninse, ki yé n'naa.»

## 13

### *Wà plè' tibonbuor ya bim ya kpɛnjɛnm* (Mark 4:1-9; Luk 8:4-8)

<sup>1</sup> Nɛn daali nɛ \*Yesu n̄ɛn' ki jon' ki t̄i kèle' miñunciɛnm ya gbaal. <sup>2</sup> Linigociɛnl taan' u'saan, nɛ u kɔn' ki kèle' buñɛrɓu buba ni. Linigol nnɔ kɛ se miñunm ya gbaal. <sup>3</sup> Nɛ u tɔkeh bɛ tibont t̄u yɛbe mikpɛnjɛnm ni. U tɔkeh bɛ ki teh: «Ukpaal uba nɛ là jon' wɔ r̄i t̄i plè tibonbuor ya bim. <sup>4</sup> U plèh ma nnɔ, miba lu' usɛngbɛ, nɛ inuɔn baa' ki lá ki jin' mè. <sup>5</sup> Mitɔm lu' kutɛntiɛku bo, tɛnbim ɲa yɛbe nà saan. Tɛnbim ɲa yɛbe ma nnɔ, nɛ m̄i pɛn' tonm. <sup>6</sup> Uwien n̄ɛn' ki tonge', nɛ ki sɛ' mè. Ma ɲmɔbe n̄aan mɔnmɔnm ma nnɔ, nɛ m̄i waan', ki kpo'. <sup>7</sup> Mitɔm mɔ lu' kujɛgorku ni. Nɛ kujɛgorku kpére', ki wɔbn', ki ku' mè. <sup>8</sup> Mitɔm mɔ lu' kitinmɔnmɔnk bo, nɛ ki l̄uon'. Miba l̄uon' kokobk, mitɔm piluoluob, mitɔm mɔ pitata.

<sup>9</sup> «Wà ɲmɔbe litubl la, wɔ r̄i cii.»

### *Bɛ tien' Yesu pɔh binib mikpɛnjɛnm-i?* (Mark 4:10-12; Luk 8:9-10)

<sup>10</sup> Nɛ u'panpaankaab baa' ki lá niire' wɔ ki ye: «Bɛ tien' a pɔh bɛ mikpɛnjɛnm-i?» <sup>11</sup> Nɛ u j̄iin' bɛ ki ye: «Uwien cère' ninbi nɛ bende' u'bel ya gbɛbɔlkaar, ama wa cère' bɛn bende'. <sup>12</sup> Kimɛ wà ɲmɔbe la, bi li de wɔ kí pukn, nɛ wɔ r̄i li ɲmɔbe kí gbien. Wà ɲa ɲmɔbe la, bi li fie u ɲmɔbe nà waamu nnɔ mɔnɔn nɛ. <sup>13</sup> Nɛn nɛ cère' n pɔh bɛ mikpɛnjɛnm. Kimɛ bi likeh nɛ ka lɛnh, ki cengeh ka ciih, ka bɛndeh ni'tingi mɔ. <sup>14</sup> Bi te nnɔ ɲɔ \*Uwien ya n̄ɔbonsɔknl Esayi là len' nà nnɔ nè r̄i tien nɛ. U là ye:

«Ni li ciih ka bɛndeh ni'tingi,

kí li likeh ka lɛnh.

<sup>15</sup> Kimɛ udu wuu ya nib ya yul faa nɛ.

Bi kpɛ bi'tub nɛ,

ki ɲuun',

ka yíe bi'nun r̄i lɛ,

ka yíe bi'tub r̄i cii,

ka yíe bɛ r̄i bende ni'tingi bi'yɛnm ni,

ka yíe bɛ r̄i lèbre bi'tetem,

ɲɔ r̄i buu bɛ.» »

<sup>16</sup> «Ninbi wɔn, Uwien ya mɔnm te ni'bo, kimɛ ni'nun lɛnh, ni'tub mɔ ciih. <sup>17</sup> N tɔkeh nɛ imɔn nɛ, \*Uwien ya n̄ɔbonsɔknb nin bigbɛmɔndɛnb ligol là yíe bɛ r̄i lɛ ni lɛnh nà nɔ, nɛ ka laa' nè, ki yíe bɛ r̄i cii ni ciih nà nɔ, nɛ ka cii' nè.»

### *Wà plè' tibonbuor ya bim ya kpɛnjɛnm ya tingi* (Mark 4:13-20; Luk 8:11-15)

<sup>18</sup> «Ninbi, cenge mɛn wà plè' tibonbuor ya bim ya kpɛnjɛnm ya tingi. <sup>19</sup> Wà kɛ ciih Uwien ya bel ya gbɛr, ka bɛndeh tu'tingi la, usɛnpol ubiɛrɔ bàareh nɛ, ki n̄ɛndeh bi bule' nà u'fèl ni nnɔ. Mibim mà lu' usɛngbɛ nnɔ ya tingi n̄inɔ. <sup>20</sup> Mibim mà lu' kutɛntiɛku bo nnɔ mɔ yé unil wà ciih Uwien ya gbɛr, ki teknh t̄u tontonm nin uyɛnsɔnge, <sup>21</sup> ama ka cèreh t̄u kpaakeh n̄aan u'fèl ni, ka wuɔkreh u'ni mɔ nɛ. Liwɔbl bii ijɛnd tu' wɔ tu'bo la, u pɔk kí taa t̄u kí wiɛ nɛ. <sup>22</sup> Mibim mà lu' kujɛgorku ni nnɔ mɔ yé unil wà ciih tigbɛr nnɔ, uɲɛndun ya gbɛr nin lifaal ya yɛnmaale yà lɛreh binib nnɔ, wɔbndeh t̄u, ki cèreh ta r̄i fre kí sɔn tuonl nɛ. <sup>23</sup> Mibim mà lu' kitinmɔnmɔnk bo nnɔ mɔ yé unil wà ciih tigbɛr nnɔ, ki bɛndeh tu'tingi ki te tɛn mibim mà l̄uonh nɛ. Miba l̄uonh kokobk, mitɔm piluoluob, mitɔm mɔ pitata.»

### *Utelmentɛ ya kpɛnjɛnm*

<sup>24</sup> \*Yesu t̄i pɔn' linigol nnɔ mikpɛnjɛntɔm ki ye: «Uwien ya bel naan ukpaal wà plè' ifi u'kpàabu ni nɛ. <sup>25</sup> Binib t̄i duɔn' ki gùɔn' uyo wà nnɔ, nɛ u'nɛnnɛnd baa' ki taa' utelmentɛ ki

plè' ki ηmèrè' ifi nnò ni, nε ki bure'. <sup>26</sup> Ifi nnò tĩ kpére' ki maa' ma nnò, nε bi laa' utelmentε mò te i'ni. <sup>27</sup> Nε ukpaal nnò ya tonsɔnb niire' wò ki ye: «Cenbaa, ηa là plè' ifi baba nε a'kpàabu ni-ii? Utelmentε wuò mò ñen' la?» <sup>28</sup> Nε u ye: «N'ennend nε tien' nnò.» Nε bi niire' wò ki ye: «A yíe tí jo kí tí ηηεbe wò-òò?» <sup>29</sup> Nε u ye: «Hnhn. Dàan mεn. Ni ye ní ηεbe utelmentε nnò la, nba la ni li ηεbe kí kpòbe ifi iba. <sup>30</sup> Cère mεn ifi nnò nin utelmentε nnò kε rí li te kí tí be. Nĩ tí kpaan' uceceyo la, n li tɔke bificeb kí ye bε rí kpiε kí ηηεbe utelmentε nnò kí lòlòle, kí tí sε, ηò kí yaan kí ce ifi nnò kí tí cùɔn n'bonbuɔn ni.» »

### *Mibim mà ñilke ya kpenjenm*

*(Mark 4:30-32; Luk 13:18-19)*

<sup>31</sup> \*Yesu tí pɔn' bε mikpenjentɔm ki ye: «Uwien ya bel naan mibim mà bi yih mè mutaar uje uba taa' mè ki bule' u'kpàabu ni nε. <sup>32</sup> Mεn nε yé mibim mà ñilke tikpinsir kε ya bim ni. Ama mĩ pen' la, mĩ li kpére kí gèbre kpinsiiku kε kpinsiiku, kí tien busubu nε inuɔn rí li bàareh ki lá tereh bu'sigben bo ki kòh.»

### *Kpɔnɔ ya ñòke ya kpenjenm*

*(Luk 13:20-21)*

<sup>33</sup> \*Yesu tí pɔn' bε mikpenjentɔm ki ye: «Uwien ya bel naan kpɔnɔ ya ñòke wà upii uba bun' kpɔnɔyom mà dindin, ki taa' wù ki tien' len, nε kpɔnɔ nnò kε nuule' nε.»

### *Bε tien' Yesu pòh binib mikpenjenm-i?*

*(Mark 4:33-34)*

<sup>34</sup> \*Yesu tɔkeh inigol ni'kε mikpenjenm ni nε. Wa tɔkeh bε tuba ka pɔn' bε kpenjenm. <sup>35</sup> U teh nnò ηò \*Uwien ya ñabonsɔknl là len' nà nnò nè rí tien nε. U là yé: «N li yàare n'ñabu kí pò mikpenjenm, kí kpiire tibonbɔlkaar tà là te haali uηendun ya cincinyo nnò.»

### *Utelmentε ya kpenjenm ya tingi*

<sup>36</sup> \*Yesu dàan' linigol nnò, ki liebe' ki kun'. Nε u'panpaankaab baa' u'saan ki niire' wò ki ye: «Tòke tε utelmentε wà te ifi ni nnò ya kpenjenm ya tingi.» <sup>37</sup> Nε u ye: «Ukpaal wà plè' ifi nnò yé \*Unil ya Bijε nε. <sup>38</sup> Bukpàabu nnò yé uηendun wuu nε. Ifi nnò yé Uwien ya bel ni ya nib nε. Utelmentε nnò yé usenpol ubierɔ ya nib nε. <sup>39</sup> Ukpaal ya ennend wà plè' utelmentε nnò yé usenpol nε. Lifiicel yé uηendun ya gbenm nε. Nε bificeb nnò yé \*Uwien ya tondb. <sup>40</sup> Utelmentε ya ηεbm kí tí sε nnò yé uηendun ya gbenm lá li te ma bo nε. <sup>41</sup> \*Unil ya Bijε li sɔn ní u'tonsɔnb Uwien ya tondb uηendun wuu ni, bε rí lá cuo bà tulndeh binib nin bibierdenb kε kí ñen bε u'bel ni, <sup>42</sup> kí tí wiε umucien ni. Nεn saan nε bi li muòh ki ηmònh iñgben. <sup>43</sup> U ya yo nε binimònb li te bi'Baa ya bel ni ki windeh tɔn uwien. Wà ηmòbe litubl la, wò rí cii.»

### *Lifaal là buɔ ya kpenjenm*

<sup>44</sup> «Uwien ya bel naan lifaal là buɔ bukpaabu buba ni nε. Unil uba laa' lifaal nnò, nε ki taa' lè ki nεbre' ki bole'. Nĩ ηmaake' wò ki tí kende', nε u jon' ki tí kuore' u'bont kε, ki liebe' ki tí dε' bukpaabu nnò.»

### *Lilenbimɔnmɔnl ya kpenjenm*

<sup>45</sup> «Uwien ya bel liebe' ki naan ukpenkpend wà cuonh ki nuunh ilenbii\* yà mɔn wò rí dε nε. <sup>46</sup> U tí laa' lilenbimɔnmɔnl là ηmòbe kudaaku ki gbien', nε ki jon' ki tí kuore' u'bont kε, ki liebe' ki tí dε' lè.»

### *Bubebu ya kpenjenm*

<sup>47</sup> «Uwien ya bel tí liebe' ki naan bubebu nε bi wiε' bù miñunm ni, ki cuo' ijen kε ya bol. <sup>48</sup> Bù gbe ijen ma nnò, nε bi dεre' bù ki ñen' liwél bo, ki kèle' ki gèngènde' bi jinh ya kí kpien'

\* **13:45** Bi yin' nà lilenbil nnò yé nibonn nà windeh nε. Bi wokreh miñuncienm ya wenfuobk kiba nε ki ñendeh nè.

ikpɛncub ni, ki taa' ba jinh yà ki wiɛ'. <sup>49</sup> Uɲɛndun ya gbenm mɔ lá li te nnɔ nɛ. Uwien ya tondb lá li baa uɲɛndun ni, kí bore bibiɛrdɛnb nin binimɔnb <sup>50</sup> kí taa bibiɛrdɛnb kí wiɛ umucien ni. Nɛn saan nɛ bi li muɔh ki ɲmɔnh iɲɔgbɛn.»

### *Tibonkpaar nin tibonfɛnt ya gbɛr*

<sup>51</sup> \*Yesu niire' u'panpaankaab ki ye: «Ni cii' ni'kɛ ya tingi-ii?» Nɛ bi tuo' hnn. <sup>52</sup> Nɛ u ye: «Nnɔ nɛ \*Yiko ya wɔnwɔknl wà kɛ paan' Uwien ya bɛl ya gbɛr bo la, u naan udendaan wà ɲɛndeh u'faal ni tibonkpaar nin tibonfɛnt nɛ.»

### *Nasarɛt ya nib ɲa teke' Yesu ki jin'*

*(Mark 6:1-6; Luk 4:16-30)*

<sup>53</sup> Tɔ, \*Yesu pɔn' mikpɛɲɛnm nnɔ ki tɪ gben' ma nnɔ, nɛ ki siere' ni'saan, <sup>54</sup> ki liɛbe' u'du ni, ki wɔknh binib Uwien ya gbɛr bi'taanl ya duku ni. U'wɔknm cuo' bɛ miyɔkm, nɛ bi niireh tɔb ki teh: «U laa' la miɛ ya yɛnfuom-i? U laa' la miɛ ya tuɔm ki teh miyɔkm ya bont-i? <sup>55</sup> Kanpinta ya bijɛ ɲa ɲí-ii? Ba yih u'naa Mari-ii? Saak nin \*Yosɛf nin Simɔn nin Sudas ya ninjɛ ɲa ɲí-ii? <sup>56</sup> U'ninsieb kɛ ɲa te niɛ saan-ii? U nín laa' nɛn kɛ lɛ saan-i?» <sup>57</sup> Nnɔ nɛ bi'yɛnm ɲa ɲmaake' u'bo, nɛ ba teke' u'gbɛr.

Nɛ \*Yesu tɔke' bɛ ki ye: «\*Uwien ya ɲɔbonsɔknl kɛ ɲɔbonsɔknl ya tiɛma du ni yaab nin u'den yaab baba nɛ ɲa boh wɔ.» <sup>58</sup> Ba teke' wɔ ki jin' ma nnɔ, nɛ wa tien' yɔkm ya bont tù yɛbe ni'saan.

## 14

### *San wà là siih binib Uwien ya ɲunm ya kuum*

*(Mark 6:14-29; Luk 9:7-9)*

<sup>1</sup> U ya yo nɛ Galile ya bɛr Herod, cii' bi lienh \*Yesu bó, <sup>2</sup> nɛ ki tɔke' u'tonsɔnb ki ye: «San wà là siih binib Uwien ya ɲunm nnɔ nɛ. U mɛkre' bitɛnkpiib ni nɛ. Nɛn nɛ cɛrɛ' u ɲmɔbe mituɔm ki teh miyɔkm ya bont.»

<sup>3</sup> Tɔ, nà cɛrɛ' Herod len' nnɔ si: u là sɔn' u'sojambɛ bi tɪ cuo' San, ki lòlɛ' wɔ tikudɔkr, ki pɛkn', ɲɔ nɛ ɲí ɲmaake u'ninjɛ Filip ya po Herodiyad nɛ. <sup>4</sup> Kimɛ San là tɔke' Herod ki ye wa ɲmɔbe sɛn wɔ ɲí taa u'ninjɛ Filip ya po Herodiyad kí kuɔn. <sup>5</sup> San là len' nnɔ nɛ Herod yíe wɔ ɲí ku wɔ, ama ki ji fɛnge Sufmbɛ, kimɛ bi lienh ki teh San yé \*Uwien ya ɲɔbonsɔknl nɛ.

<sup>6</sup> Herod maa' uwien wà nnɔ gɔbre' ki baa', nɛ u tien' kunacenkɔ. Herodiyad ya bisɛ baa' ki lá ɲɔn' kiciɛk Herod nin u yin' bà kunacenkɔ nnɔ ya nun bó. Herod ya yɛnm sɔngɛ' u'bo, <sup>7</sup> nɛ u pole' ki ye u miɛ' wɔ nà kɛ la, u li de wɔ.

<sup>8</sup> Nɛ u'naa sure' wɔ u tɔke' Herod ki ye: «N yíe á tükre San wà siih binib Uwien ya ɲunm nnɔ ya yul nɛ, kí kpɛn kikɛnsenk ni kí de nni.» <sup>9</sup> U len' nnɔ ma nnɔ, nɛ nɪ saa' ubɛr Herod ya yɛnm. Ama u pole' bicɛnb ya nun bó ma nnɔ, nɛn nɛ cɛrɛ' wa yíe'. <sup>10</sup> Nɛn saan nɛ u sɔn' soja uba ki ye wɔ ɲí jo lipɛkl bó kí tɪ tükre San ya yul ní. <sup>11</sup> Soja nnɔ tuke' li'yul nnɔ ní kikɛnsenk ni, ki lá de' ujefaan nnɔ. Nɛ u'mɔ taa' ki tɪ de' u'naa. <sup>12</sup> San ya panpaankaab baa' ki lá yuure' u'gbɛnɛnt ki tɪ sube', nɛ ki jon' ki tɪ tɔke' \*Yesu tigbɛr nnɔ.

### *Yesu jin' linigociɛnl liba*

*(Mark 6:30-44; Luk 9:10-17; San 6:1-14)*

<sup>13</sup> \*Yesu cii' nnɔ ma nnɔ, nɛ wɔn nin u'panpaankaab kɔn' buɲɛrbu ki bure' bi'baba nib ɲa te nà bó. Inigol cii' u bure', nɛ ki ɲɛn' idu ni, ki cuon' ki paan' u'bo. <sup>14</sup> \*Yesu ɲɛn' buɲɛrbu ni uyo wà nnɔ, nɛ ki laa' linigociɛnl liba. Nɛ ki muɔ' bɛ micɛɛkm cɛɛn, ki buu' bi'ni bà bun.

<sup>15</sup> Ní juɔrɛ', nɛ u'panpaankaab baa' ki lá tɔke' wɔ ki ye: «Ti te ɲɛn ɲa te nà saan nɛ, nɛ nɪ gɛbre' tijier ya ji yo ma nɔ, cɛrɛ linigol liɛ lɛ ɲí jo idu ni kí tɪ de tijier kí ji.» <sup>16</sup> Nɛ u ye: «Na ciɛke bɛ ɲí jo, ninbi bugbɛn, de bɛ mɛn bɛ ɲí ji.» <sup>17</sup> Nɛ bi ye: «Ti ɲmɔbe kpɔnɔ uɲun nin ijɛn ile baba nɛ.» <sup>18</sup> Nɛ u ye: «Taa ní mɛn.» <sup>19</sup> Nɛ ki tɔke' linigol nnɔ ki ye lɛ ɲí kɛlɛ timuɔr bo tingi ni. Nɛ ki yuure' kpɔnɔ uɲun nin ijɛn ile nnɔ, ki yaare' ki liike' paaki, ki faare' Uwien,

ki kakuo', ki taa' ki de' u'panpaankaab, ne bi gbiire' linigol nno. <sup>20</sup> Bi'ke ηmən' ki gbo', ne bi tantaan' kpənəjen nin ijenjen ya sien' nno, ki gbien' ikpencub piik nin ile. <sup>21</sup> Binib bà jin' tijier nno, bijeb là li baa ten itur injun. Ba kaan' piib nin bumu.

*Yesu cuonh miñunm bo*  
(Mark 6:45-52; San 6:15-21)

<sup>22</sup> I ya taan bo, ne \*Yesu wəbn' u'panpaankaab ki ye be n' liebe k' buñerbu nno k' liere wə usen, k' puore miñuncienm k' jo ligbaatol, ηə wə n' cèbe linigol nno k' yaan. <sup>23</sup> U cèbe' lè, ne ki don' lijuəl bo u'baba wə n' kàare. N' t' biire' ki laa' u' biε ki te lijuəl nno bo ne. <sup>24</sup> U ya yo ki laa' u'panpaankaab mə te buñerbu ni ki jende' liwεl ηə. Kutafaaku fii' ki tobreh be, iñungbegbel jengeh buñerbu nno. <sup>25</sup> Ikuoje muəh uyo wə nno, ne u' cuonh miñunm bo, ki tuo bi'saan. <sup>26</sup> U'panpaankaab laa' u' cuonh miñunm bo ma nno, ne bi'fèl sen' cεen. Bi maaleh ki teh n' yé ufenfend ne, ne ki wuure' ijenwaanwuure.

<sup>27</sup> Ne u' tōke' be i ya taan bo ki ye: «Cuo men ni'ba. Min \*Yesu ne. La sen men jεwaanbu.»  
<sup>28</sup> Ne Pier ye: «Yonbdaan, n' mənbe ki yé sin ne la, cère n'mə n' cuon miñunm bo k' baa a'saan.» <sup>29</sup> Ne \*Yesu ye: «Den.» Ne u' n' buñerbu ni, ki cuonh miñunm bo ki joh \*Yesu saan. <sup>30</sup> Ama u' laa' kutafaaku joh ki faa ma nno, bujεwaanbu cuo' wə, ne u' cin' ki feleh ki kəh miñunm ni, ne ki wuure' ki ye: «Yonbdaan, ηmien nni.» <sup>31</sup> \*Yesu tende' u'nuə ki cuo' wə i ya taan bo ne ki tōke' wə ki ye: «A'tekjim ne pəre' ηε. Be tien' a' jieh?» <sup>32</sup> Bi'ke bile kən' buñerbu ni uyo wə nno, ne kutafaaku nno go. <sup>33</sup> Nen saan ne bà te buñerbu ni nno gbaan' \*Yesu ya nintuoli ki ye: «Imən, a mənbe ki yé Uwien ya Bijε ne.»

*Yesu cère' biwiεnb faake' Genesaret ya tinfenm ni*  
(Mark 6:53-56)

<sup>34</sup> Bi t' baa' miñuncienm ya gbaatol, Genesaret ya tinfenm ni, ne ki n' buñerbu ni.  
<sup>35</sup> Ni'saan ya nib bende' Yesu, ne ki sənkn' mitinfenm nno ya nib ke, bi taa' biwiεnb ke ki baa' u'saan, <sup>36</sup> ki gbáanh wə ki teh wə n' cère biwiεnb n' mε u'lierku ya n'əgben baba. Bà ke mε' u'lierku ya n'əgben nno ke faake' ne.

## 15

*Yesu nin Sufmbε ya yaajεbok ya gbεr*  
(Mark 7:1-13)

<sup>1</sup> Tə, \*Farisienmbe nin \*Yiko ya wənwəknb biba n' n' Yerusalem bó ki baa' \*Yesu saan, ne ki niire' wə ki ye: <sup>2</sup> «Be tien' a'panpaankaab saah ti'yaajεbok-i? Kimε bi jinh tijier ne ka nire' ki paan' iyaajεbok ye ma bo.» <sup>3</sup> Ne \*Yesu jiin' be ki ye: «Be tien' ninbi kende' Uwien ya wəbl bo ni'yaajεbok bo? <sup>4</sup> Kimε Uwien là len' ki ye: «Li boh a'naa nin a'baa», ki t' len' ki ye: «Unil tōke' u'naa bii u'baa liñəbonbil la, be n' ku wə.» <sup>5</sup> Ama ninbi wəknh binib ki cèreh wə ke lienh ki teh u' bi li de u'naa bii u'baa nà nno, wa ji li fre k' de wə nè, n' yé Uwien yaann ne. <sup>6</sup> Ne udaan ηa ji boh u'naa nin u'baa. Nno ne ni taah ni'yaajεbok ki lèbeh Uwien ya gbεr. <sup>7</sup> Ninbi iñuən ilele ya nibε, \*Uwien ya n'əbonsəknl Esayi là len' ni'gbεr ma nno, u' là ηməbe imən ne. U' là len' ki ye Uwien ye:

<sup>8</sup> «Binib biε pəkeh nni buñəbu ni ne,  
bi'yεnm ηa neke n'saan.

<sup>9</sup> Bi pukeh nni fenm ne,  
ki wəknh binib iyaajεbok baba.» »

*Tibont tà kuəndeh unil tijəknt*  
(Mark 7:14-23)

<sup>10</sup> \*Yesu yin' linigol nno, ne ki tōke' lè ki ye: «Li cengeh men, ηə k' cii n' li tōke ne tigber tà nə ya tingi. <sup>11</sup> Tibont tà kəh unil ya n'əbu ni ηa n' fre k' kuən wə jəknt. Tà n'eh u'ñəbu ni nno, tun ne kuəndeh wə tijəknt.»



12 Nɛn saan nɛ \*Yesu ya panpaankaab nɛkn' wɔ ki tɔke' wɔ ki ye: «A bɛn a'lenm miɛ wire' \*Farisienmbɛ-ɛɛ?»

13 Nɛ u tɔke' bɛ ki ye: «Kusiiku kùà kɛ n'Baa wà te paaki bó ña caan' kù la, u li ñɛbe kù nɛ. 14 La tɔnge bɛ mɛn. Bi yé ijùɔn nɛ ki dɛh ijùɔn. Ujuɔn dɛh ujuɔn la, bi'kɛ bile li lu kubùoku ni nɛ.» 15 Nɛ Pɛr tɔke' wɔ ki ye: «Tɔke tɛ mikpɛnjɛnm nnɔ ya tingi.» 16 Nɛ u ye: «Ni'mɔ ña laan biɛ ki bɛn tibont ya tingi nɛ-ɛɛ? 17 Na bɛn ki ye tibont tà kɔh unil ya ñɔbu ni nnɔ kɔh u'puoku ni nɛ, nɛ u joh kunincɛnku ki ñɛndeh tù-uu? 18 Ama tibont tà te unil ya fɛl ni nnɔ, nɛ ñɛh u'ñɔbu ni, ki kuɔndeh wɔ tijɔknt. 19 Kimɛ iyɛnmaalbiere nin linikul nin linañmaal nin lisɔnsɔndl nin bunasubu nin kutonɛnku nin isuk kɛ ñɛh unil ya fɛl ni nɛ. 20 Tuu ya bont nɛ kuɔndeh unil tijɔknt. Kí jì tijier ka ñ nire kí paan iyaajɛbok ye ma bo wɔn ña ñ fre kí kuɔn nil jɔknt.»

*Upii uba teke' Yesu ki jin', ka yé Suf*  
(Mark 7:24-30)

21 \*Yesu siere' ni'saan, nɛ ki bure' Tir nin Sidɔn ya tinfɛnm bó. 22 Tɔ, upii uba là te mitinfɛnm nnɔ ni ki yé Kanaan ya pii, ki baa' ki lá wuureh ki teh: «Yonbdaan, \*Dafid ya yaabile\*, muɔ nni micɛɛkm. Usɛnpol nɛ ñaake n'bise ki jɛndeh wɔ cɛɛn.»

23 \*Yesu ña gere' wɔ. Nɛ u'panpaankaab nɛkn' wɔ ki tɔke' wɔ ki ye wɔ ñ ñɔre upii bugbɛn, u pɛ bi'bo ki ñmɔbe kuwaaku nɛ. 24 Nɛ \*Yesu ye: «Uwien sɔn' nni ní ñ lá tore Israyɛl yaab baba nɛ, kimɛ bɛn nɛ te tɛn ipe yà tùre' usɛn.»

25 Ama upii nnɔ baa' ki lá gbaan' u'nintuɔli nɛ ki gbáanh wɔ ki teh: «Yonbdaan, tore nni.» 26 Nɛ \*Yesu ye: «Na mɔn bɛ ñ taa mubumu ya jier ki wiɛ' isengbele.» 27 Nɛ upii nnɔ ye: «Yonbdaan, ñi yé imɔn nɛ, ama isengbele mɔnɔn jinh ijieyɔyɔl yà ñɛh i'dɛnb ya tebl bo ki luh nnɔ nɛ.» 28 Nɛ \*Yesu ye: «Upii, a teke' nni ki jin' ñi yɛbe. Nè ñ tien a yíe ma bo.» Nɛ u'bise pɔk ki faake' i ya tɔan bo.

*Yesu cèreh' biwienb faake' ki yɛbe*

29 \*Yesu siere' ni'saan ki tɛ baa' Galile ya ñunciɛnm ya gbaal, nɛ ki don' lijuɔl bo ki kɛle'. 30 Nɛ binib bàareh u'saan ki yɛbe, ki tukeh ní idien nin ijùɔn nin itɛjenb nin igbaanlɛntɛb nin biwientɔb bi yɛbe, ki lá blinh \*Yesu ya nintuɔli. Nɛ u cèreh' bi'kɛ faakreh. 31 Binib nnɔ laa' igbaanlɛntɛb lienh, itɛjenb jire' i'ciɛm, idien cuonh cucul, ijùɔn mɔ lenh ma nnɔ nɛ ñi cuo' bɛ miyɔkm, nɛ bi pèkeh Israyɛl yaab ya Wien.

*Yesu tɛ jin' linigociɛnl liba*  
(Mark 8:1-10)

32 Nɛ \*Yesu yin' u'panpaankaab ki tɔke' bɛ ki ye: «Linigol liɛ nɔ ñmɔbe nni micɛɛkm cɛɛn nɛ. Bi te n'saan ma wienta sɔ, ba jì ñmɔbe niba bɛ ñ jì. Ma yíe ñ cèbe bɛ bɛ ñ li kunh, ka jin' niba ñó kí tɛ dɔre usɛn ni.» 33 Nɛ bi ye: «Ti te ñien ña te nà saan nɛ. Ti li lɛ la kpɔnɔ wɔ ñ li yɛbe kí de liɛ ya nigol lè ñ ñmɔn kí gbo?» 34 Nɛ u niire' bɛ ki ye: «Ni ñmɔbe kpɔnɔ unɛ?» Nɛ bi ye: «Ulole nin mujɛnwawaamu mɔ waamu.» 35 Nɛ u tɔke' linigol nnɔ ki ye lè ñ kɛle tingi ni, 36 nɛ ki yuure' kpɔnɔ ulole nin mujɛnwawaamu nnɔ, ki faare' Uwien, ki kɔkuɔ', ki taa' ki de' u'panpaankaab, bi gbiire' linigol nnɔ. 37 Bi'kɛ ñmɔn' ki gbo', nɛ bi tantaan' tijɛnjɛnt tà sɛn' nnɔ, ki gbien' ikɛndɛn ilole. 38 Binib bà ñmɔn' nnɔ, bijɛb là te itur inan nɛ. Ba kaan' piib nin bumu.

39 U cèbe' linigol nnɔ, nɛ ki kɔn' buñerbu ki bure' Magadan ya tinfɛnm bó.

## 16

*Bi yíe Yesu ñ tien miyɔkm ya bonn*  
(Mark 8:11-13; Luk 12:54-56)

1 \*Farisienmbɛ nin Saduseyɛnmbɛ biba baa' \*Yesu saan, ki yíe bɛ ñ biike wɔ, nɛ ki tɔke' wɔ ki ye wɔ ñ tien miyɔkm ya bonn, kí wuɔn bɛ kí ye u'tuɔm ñɛn' Uwien saan nɛ. 2 Nɛ

\* 15:22 Liike 9:27.

u tɔke' bɛ ki ye: «[Kutaajuɔku ni laa' kutaaku wien la, ni tɔkeh ki teh taa ŋa rí nii nɛ. <sup>3</sup> Nɛ kutɛnɲaaku ni laa' kutaaku biike la, ni tɔkeh ki teh utaa li nii dinnɔ. Ni likeh kutaaku bo, nɛ ki bɛndeh utaa li nii bii wa rí nii. Nɛ ka ji li fre kí sekn kí bɛnde tibont tà teh fɛnfɛnnɔ nɔ ya tingi-ii?]\* <sup>4</sup> Ninbi fɛnfɛnnɔ ya nibɛ, ni yé binibiɛrb nɛ, ka cuube Uwien saan, nɛ ki nuunh ní lɛ miyɔkm ya bonn. \*Uwien ya ŋɔbonsɔknl Sonas ya yɔkm ya bonn baba ŋa rí la, na ji li lɛ yɔkm ya bontɔnn niba.» U len' nnɔ ma nnɔ, nɛ ki siere' ki dàan' bɛ.

*Yesu lienh Farisienmbɛ nin Saduseyenmbɛ ya kpɔnɔ ya ŋɔke bó  
(Mark 8:14-21)*

<sup>5</sup> \*Yesu ya panpaankaab joh bɛ rí puore miñunciɛnm ma nnɔ, bi sunde' ka tuke' kpɔnɔ. <sup>6</sup> Nɛ \*Yesu tɔke' bɛ ki ye: «Li bɛn mɛn \*Farisienmbɛ nin Saduseyenmbɛ ya kpɔnɔ ya ŋɔke bó.» <sup>7</sup> Nɛ bi maaleh ki teh: «Ta tuke' kpɔnɔ ma nnɔ nɛ cère' u len' nnɔ.»

<sup>8</sup> \*Yesu bɛnde' bi maaleh ki teh bà, nɛ ki niire' bɛ ki ye: «Bɛ tien' ni lienh ki teh na tuke' kpɔnɔ? Ni'tekjim nɛ pɔre' nɛ. <sup>9</sup> Na laan biɛ ki cii' tibont ya tingi nɛ-ɛɛ? Na tien n là taa' kpɔnɔ uɲun ki jin' bijɛb itur inun ma nnɔ, ni là tantaan' nà sɛn' nnɔ ikpɛncub ubiɛn wà nɛ-ɛɛ? <sup>10</sup> Na tien n là taa' kpɔnɔ ulole ki jin' bijɛb itur inan ma nnɔ, ni là tantaan' nà sɛn' nnɔ ikɛndɛn ubiɛn wà nɛ-ɛɛ? <sup>11</sup> N ye ní li bɛn \*Farisienmbɛ nin Saduseyenmbɛ ya kpɔnɔ ya ŋɔke bó ma nnɔ, na bɛn ki ye ma lienh kpɔnɔ ya gbɛr-ii?»

<sup>12</sup> Nɛn saan nɛ bi bɛnde' ki ye wa lienh kpɔnɔ ya ŋɔke ya gbɛr, ama u ye bɛ rí li bɛn Farisienmbɛ nin Saduseyenmbɛ ya wɔknm bó nɛ.

*Piɛr len' ki ye Yesu yé Uwien ya Nigɛndkɛ Kristo nɛ  
(Mark 8:27-30; Luk 9:18-21)*

<sup>13</sup> \*Yesu tɛ baa' Sesare Filip ya tinfenm ni nin u'panpaankaab, nɛ ki niire' bɛ ki ye: «Binib lienh ki teh \*Unil ya Bijɛ yé ŋmɛ?» <sup>14</sup> Nɛ bi jiin' wɔ ki ye: «Biba lienh ki teh a yé San wà siih binib Uwien ya ŋunm nnɔ nɛ. Bitɔb lienh ki teh a yé \*Eli nɛ. Bitɔb mɔ lienh ki teh a yé Seremi bii Uwien ya ŋɔbonsɔknb ya uba nɛ.» <sup>15</sup> Nɛ u niire' bɛ ki ye: «Ninbi nín teh n yé ŋmɛ?» <sup>16</sup> Nɛ Simɔn Piɛr jiin' wɔ ki ye: «A yé Uwien ya Nigɛndkɛ Kristo nɛ. A yé wɔn Uwien wà fuobe ya Bijɛ nɛ.» <sup>17</sup> Nɛ \*Yesu ye: «Simɔn, Sonas ya bijɛ, Uwien ya mɔnm te a'bo. Na yé nisaal nɛ kpiire' ki wuɔn' ŋɛ. N'Baa wà te paaki bó nɛ kpiire' ki wuɔn' ŋɛ. <sup>18</sup> Piɛr, n ye a yé litɛnpenl nɛ. Nɛ li ya tɛnpenl bo nɛ n li siɛn n'taanl yaab tɛn kuduku se litɛnpuul bo ma bo. Mikuum ya tuɔm ŋa rí faake nin n'taanl nnɔ. <sup>19</sup> N li de ŋɛ Uwien ya bɛl ya dupiɛn. A yíe' nibonn nà uɲɛndun wuu ni la, bi li yíe' nɛ paaki bó mɔ nɛ. A tuo' nibonn nà uɲɛndun wuu ni la, bi li tuo' nɛ paaki bó mɔ nɛ.»

<sup>20</sup> Nɛn saan nɛ \*Yesu kpɛkpɛ' bi'bo ki ye bi la tɔke nil kí ye u yé \*Uwien ya Nigɛndkɛ Kristo.

*Yesu len' u'kuum nin u'mɛkrm bó  
(Mark 8:31-9:1; Luk 9:22-27)*

<sup>21</sup> Kí ŋɛ u ya yo nɛ \*Yesu cin' ki tɔkeh u'panpaankaab ki teh ní kpɛ wɔ rí jo Yerusalem, \*Sufmbɛ ya cienb nin \*bitɔtuɔrciɛnb nin \*Yiko ya wɔnwɔknb rí tɛ jɛnde wɔ kí gbien, kí ku wɔ, nɛ wienta daali wɔ rí mɛkre bitɛnkpiib ni.

<sup>22</sup> Nɛn saan nɛ Piɛr taa' wɔ ki jɛnde', ki tɛ kɔnh nin wɔ ki teh: «Yonbdaan, Uwien rí cère nɛ rí tien mitafaam kí gɛbre. U la cère nɛ rí tu ŋɛ.»

<sup>23</sup> Nɛ \*Yesu jɛbe' ki tɔke' Piɛr ki ye: «Paare n'puoli; Satan, a lieke nni usɛn nɛ. Kime a'yɛnmaale ŋa ŋɛn' Uwien saan, i yé binib yi nɛ.»

<sup>24</sup> Nɛ ki tɔke u'panpaankaab ki ye: «Unil yíe wɔ rí paan n'bo la, u la tɔnge uba, wɔ rí li yuunh u'dɔpɔnɔn ki bukeh, kí li paakeh n'bo†. <sup>25</sup> Kime wà kɛ yíe wɔ rí fie u'miel la, wɔn nɛ li kpo kí juore fɛnm. Ama wà kɛ li tuo kí kpo min bo la, wɔn nɛ li lɛ limiɛl. <sup>26</sup> Unil laa' uɲɛndun wuu ni ya bont kɛ ŋɔ ki tɛ luɔ' limiɛl la, u laa' bɛ ya kpɛle nɛ? Bii unil li taa bà kí

\* 16:3 Bi kpiɛ' ki kɛle' tɛgbont tà nnɔ ya tuba ni 16:2a-3 ŋa te tu'ni. † 16:24 Liike 10:38.

pε kí teke u'miel-i? <sup>27</sup> Lidaali liba, Unil ya Bijε lá li baa ní, kí li tóke nin u'tonsɔnb Uwien ya tondb, kí li ηmɔbe u'Baa Uwien ya kpieke. U ya yo nε u li jiin unil kε u sɔn' ma bo. <sup>28</sup> N tókeh nε imɔn nε, binib bà se niε saan nɔ ya biba li lε \*Unil ya Bijε we ní u'bɛl ni nε kí yaan kí kpo.»

## 17

### *Yesu ya gbenent lèbre'*

*(Mark 9:2-13; Luk 9:28-36)*

<sup>1</sup> Iwien iluob gèbre', nε \*Yesu taa' Pier nin Saak nin u'ninjε San ki jende' ki tĩ don' lijɔfɔkrl liba bo. <sup>2</sup> U'gbenent lèbre' bi'nun bó nε u'nun bó windeh ten uwien. U'wengolkaar pende' ten kuwenwenku. <sup>3</sup> Nε bi laa' Moyis nin Eli puɔ' u'saan bi tókeh tigber. <sup>4</sup> Nε Pier tóke' wɔ ki ye: «Yonbdaan, ti te niε saan ma nɔ, nĩ mɔn nε. A yíe la, á cère ní pɔ niε saan ininbon\* ita, sin liba, Moyis liba, \*Eli mɔ liba.»

<sup>5</sup> U lienh u'ñɔbu ηa laan lu' nε kutεwɔlgbɔnpenpienku kuba baa' ki lá pibn' bi'bo. Nε bi cii' unieke uba bó kutεwɔlgbɔnku nnɔ ni u ye: «N'Bijε sɔ nɔ, n yíe wɔ; nε n'yenm sɔnge u'bo. Li cengeh mɛn u'bó.»

<sup>6</sup> U'panpaankaab cii' unieke nnɔ bó ma nnɔ, nε bujɛwaanbu cuo' bε ki tĩ kende', nε bi pùon' tingi ni. <sup>7</sup> \*Yesu baa' ki lá mε' bε, nε ki tóke' bε ki ye: «Fii mɛn. La cère mɛn jɛwaanbu ní li ηmɔbe nε.» <sup>8</sup> Bi yaare' ma nnɔ, ba ji laa' nitɔ, bi laa' Yesu baba nε.

<sup>9</sup> Bi jiinh lijuɔl nnɔ ya tingi ma nnɔ, nε \*Yesu kpεkpε' bi'bo ki ye: «Ni la tóke uba ni laa' nà nɔ, kí tĩ baa uyo wà Unil ya Bijε li mεkre bitenkpiib ni nnɔ.»

<sup>10</sup> Nε u'panpaankaab nnɔ niire' wɔ ki ye: «Bε tien' \*Yiko ya wɔnwɔknb lienh ki teh \*Eli li baa nε kí yaan Kristo ní baa ní?» <sup>11</sup> Nε u jiin' bε ki ye: «\*Eli li mɔnbe kí baa kí lá tùɔre tibont kε nε kí yaan. <sup>12</sup> N tókeh nε nε, \*Eli baa' ηɔ. Ama ba bende' wɔ, nε ki tien' wɔ bi yíe ma bo. Bi jende' wɔ ma bo nnɔ, bi li jende' \*Unil ya Bijε mɔ nnɔ nε.»

<sup>13</sup> \*Yesu len' nnɔ ma nnɔ, nε u'panpaankaab bende' ki ye u lienh San wà là siih binib Uwien ya ñunm nnɔ ya gber nε.

### *Yesu ηɔre' usenpol kibuk kiba saan*

*(Mark 9:14-29; Luk 9:37-43)*

<sup>14</sup> Tɔ, \*Yesu nin u'panpaankaab nnɔ tĩ baa' linigol saan uyo wà nnɔ, nε uje uba baa' ki lá gbaan' u'nintuɔli, <sup>15</sup> kí tóke' wɔ ki ye: «Yonbdaan, muɔ n'buk micεckm. Kĩ luh libinbil nε ki jende' ki gbiekeh. Kĩ sɔbe ki luh umu nin miñunm ni nε. <sup>16</sup> N tuke' kè ki baa' ní a'panpaankaab saan, nε ba fre' ki cère' kí faake'.» <sup>17</sup> Nε \*Yesu ye: «Ninbi fenfennɔ ya nibε, na teke' Uwien ki jin', ki yé binib bà bre. N li wuɔke ni'saan kí tĩ kpaan mila nε? N li ηmɔbe sukle ni'bo kí tĩ kpaan mila nε?» Nε ki ye: «Taa mɛn kibuk nnɔ ní.» <sup>18</sup> Bi taa' kè ní, nε u tien' usenpol wà ηaake kè nnɔ bo, nε u siere' kí'saan. Nε kí faake' i ya tãan bo.

<sup>19</sup> Ni ya puoli bó nε \*Yesu ya panpaankaab baa' ki lá niire' wɔ bi'baba bo ki ye: «Bε tien' tinbi ηa fre' ki ηɔre' usenpol nnɔ?» <sup>20</sup> Nε u tóke' bε ki ye: «Nĩ'tekjim nε ηa yebe. Nεn nε cère' na fre' ki ηɔre' wɔ. N tókeh nε imɔn nε, ni bi ηmɔbe mitekjim mĩ waa ten kusiiku kùa bi yih kù mutaar nnɔ ya bim mɔnɔn la, ni bi li fre' kí tóke' lijuɔl liε kí ye: «Siere niε saan, kí tĩ sere niε bó,» nε lè ní siere. Na bi li gbele niba. <sup>21</sup> [Ama usenpol wuɔ ya bol wɔn, na lòle' ñɔbu ki kàare' la, na ní fre' kí ηɔre' wɔ.]»†

### *Yesu tĩ len' u'kuum nin u'mεkrm bó*

*(Mark 9:30-32; Luk 9:43b-45)*

<sup>22</sup> Lidaali liba, \*Yesu nin u'panpaankaab taan' Galile ni, nε u tóke' bε ki ye: «Bi li taa \*Unil ya Bijε kí ηukn binib, <sup>23</sup> bε ní ku wɔ. Ama wienta daali, u li mεkre bitenkpiib ni.» Nε bi'yenm saa' ki gbien'.

\* **17:4** Sufmbe là taah tiwengbɔnt bii tikpelcejuɔkt nε ki pɔh ininbon. † **17:21** Bi kpie' ki kele' tigbɔnt tà nnɔ ya tuba ni migbiirm 21 ηa te tu'ni.

### *Uwien ya duku ya lenpo*

<sup>24</sup> \*Yesu nin u'panpaankaab baa' Kapernawum ya du ni. Ne binib bà teknh Uwien ya duku ya lenpo nnə baa' ki lá niire' Pier ki ye: «A'cɛnbaa wən ɲa pɛh Uwien ya duku ya lenpo nɛ-a?» <sup>25</sup> Ne u ye: «U pɛh nɛ.»

Pier tɪ baa' iden, nɛ \*Yesu kpiɛ' ki niire' ki ye: «Simən, unɛndun wuu ya bɛrb teknh bi'du ya nib saan nɛ lenpo bii bicɛnb saan-i? A maaleh ki teh ba?» † <sup>26</sup> Ne u jiin' wə ki ye: «Bi teknh bicɛnb saan nɛ.» Ne \*Yesu ye: «Nnə la, bi'du ya nib bɛn fuoreh nɛ-a! <sup>27</sup> Ama ta yie tɪ bii bɛ. Li joh miɲunciɛnm bó kí tɪ wiɛ ufebe. A li cuo uɛnkpiɛk wə nnə, á yàare' u'ñəbu, a li ɛ bulikbu u'ñəbu ni. A taa kí tɪ pè min nin sin bo.»

## 18

### *Ŋmɛ yé unikpekpiɛk-i?*

*(Mark 9:33-37; Luk 9:46-48)*

<sup>1</sup> U ya yo nɛ \*Yesu ya panpaankaab baa' ki lá niire' wə ki ye: «Ŋmɛ yé unikpekpiɛk Uwien ya bɛl ni?» <sup>2</sup> Ne u yin' kibuk kiba, ki taa' kɛ ki sien' bi'siik ni, <sup>3</sup> nɛ ki ye: «N təkɛh nɛ imən nɛ, na cɛrɛ' ni'tetem te tɛn mubumu yaam la, na r kə \*Uwien ya bɛl ni. <sup>4</sup> Unil wə kɛ jiin' u'ba tingi ki te tɛn kibuk kiɛ nə te ma bo la, u ya daan nɛ yé unikpekpiɛk Uwien ya bɛl ni. <sup>5</sup> Wə kɛ teke' kibuk tɛn kiɛ n'yel bo la, u teke' min nɛ.»

### *La cɛrɛ ubaan uba r ture Uwien ya sɛn*

*(Mark 9:42-48; Luk 17:1-2)*

<sup>6</sup> «Ama ibaan yà teke' nni ki jin' nə, unil cɛrɛ' i'ni uba ture' Uwien ya sɛn la, bi bi taa' linɛciɛnl, ki jən' u'tule ni, ki ture' wə ki wiɛ' miɲunciɛnm ya lùəl ni la, nɪ bi li tu udaan bo. <sup>7</sup> Mibiikm yé nibonn nà bre unɛndun bo nɛ. Mibiikm li li tuu ki te nɛ. Ama nɪ bre unil wə cɛrɛh mibiikm bàareh nnə bo.

<sup>8</sup> «A'nuə bii a'taal nɛ cɛrɛh a biih la, cere tù kí wiɛ kí jɛnde a'ba saan. A ɲməbe unuə uba bii litaal liba, ɲə ki laa' limiɛl là ɲa ɲməbe gbenm la, nɪ tu nin á li ɲməbe inuə ile nin itaan ile, ɲə kí kə umu wə ɲa r kpiin ni. <sup>9</sup> A'nunbu nɛ cɛrɛh a biih la, likre bù kí wiɛ kí jɛnde a'ba saan. A ɲməbe bununbu buba, ki laa' limiɛl là ɲa ɲməbe gbenm la, nɪ tu nin á li ɲməbe inun ile, ɲə kí kə umu wə ɲa r kpiin ni.»

### *Upe wə bole' ya kpɛnɛnm*

*(Luk 15:3-7)*

<sup>10</sup> «Li bɛn mɛn ki la yin ibaan yiɛ ya uba fɛnm. N təkɛh nɛ nɛ, \*Uwien ya tondb bà gu bɛ nnə tuu ki tien bi'bó n'Baa wə te paaki bó ya nun bó nɛ. <sup>11</sup> [Unil ya Bijɛ baa' unɛndun wuu ni wə r lá ɲmiɛn binib bà ture' Uwien ya sɛn nɛ.]\*

<sup>12</sup> «Unil ɲməbe ipe kobk, i'ni uba bole' la, ni maaleh ki teh u li tien mila? Wa r cɛrɛ ipe piwɛ nin iwɛ nnə kupekpaabaaku ni, kí jo kí tɪ nuun wə bole' nnə-əə? <sup>13</sup> N təkɛh nɛ imən nɛ, u tɪ laa' wə la, u'yɛnm li sɔnge upebaab nnə bo, kí cɛn ipe piwɛ nin iwɛ yà ɲa bole' nnə bo. <sup>14</sup> Nnə nɛ, ni'Baa wə te paaki bó ɲa yie ibaan yiɛ ya uba r ture.»

### *A'tə bii' ɲɛ la, a li tien ma bo*

<sup>15</sup> «A'tə bii' ɲɛ la, ɲikn kí jo kí tɪ ɛ wə ni'lele bo, kí təkɛ wə u'biil. U cii' ki de' ɲɛ la, tigbɛr nnə gben' nínə. <sup>16</sup> U yie', ka cii' ki de' ɲɛ la, ɲikn kí taa unil uba bii bile, kí kpəbn a'ba bó, kí tɪ r jo u'saan kí tɪ ɛ wə, ɲə ní gben tigbɛr nnə, kimɛ nɪ kɛle' Uwien ya gbənkɛ ni ki ye: «Bi ye bɛ r gben tigbɛr tà kɛ la, bi li cenge bimənkunb bile bii bita bó nɛ kí yaan kí gben tɪ.» <sup>17</sup> Ama u yie', ka cii' ki de' bi'mə la, taa tù kí təkɛ \*Kristo ya taanl yaab. U yie', ka cii' ki de' bi'mə la, á liike wə tɛn unil wə ɲa bɛn Wien bii ulɛnpotekl.

† 17:25 Yesu ya yo ya bɛrb ɲa là teknh bi'du ya nib lenpo. Bi là teknh bi jəkɛh idu yà nnə ya nib nin bicɛnb nɛ lenpo.

\* 18:11 Bi kpiɛ' ki kɛle' tigbənt tà nnə ya tuba ni migbiirm 11 ɲa te tu'ni.

18 «N tɔkeh ne imɔn ne, ni yie' nibonn na ke unɛndun wuu ni la, bi li yie nɛ paaki bɔ mɔ ne. Ni tuo' nibonn na ke unɛndun wuu ni la, bi li tuo nɛ paaki bɔ mɔ ne.

19 «N ti tɔkeh ne imɔn ne, ni'ni bile kpaan' buɔbu unɛndun wuu ni, ki kaare' ki mie' n'Baa wa te paaki bɔ na ke la, u li de be nɛ ne. 20 Kimɛ binib bile bii bita taan' na saan n'yel bo la, n te bi'siik ni.»

### *Utonsɔnl wɔ ɲa tuo' ki fɛre' u'tɔ ya gbɛr*

21 Nɛn saan ne Pier baa' ki lɔ niire' wɔ ki ye: «Yonbdaan, n'tɔ bih nni la, n li fɛre wɔ bolm miɲɛ ne? N li fɛre wɔ haali bolm milole ne-ɛɛ?» 22 Ne \*Yesu jii' wɔ ki ye: «Na yɛ á fɛre wɔ bolm milole; fɛre wɔ haali pilolole bolm milole.

23 «Nɛn bo, Uwien ya bel naan ubɛrcien wɔ yie wɔ n bende u'faal kpɛ ma u'tonsɔnb saan nnɔ ne. 24 U cin' ma nnɔ, bi taa' nɔ u'tonsɔnl uba ne, u kɔn' lifɛnl ni u'cɛnbaa saan ilike tibɔtɔr tibɔtɔr ta dindin. 25 Wa ɲmɔbe like kɔ pɛ lifɛnl nnɔ ma nnɔ, ne u'cɛnbaa ye lifɛnl nnɔ bo, be nɔ taa wɔn nin u'po nin u'bumu nin u ɲmɔbe tibont tɔ ke kɔ kuɔre, kɔ taa ilike nɔ. 26 Ne utonsɔnl nnɔ gbaan' u'cɛnbaa ya nintuɔli, ki gbáanh wɔ ki teh: «N'cɛnbaa, ɲikn kɔ tien sukɛ. N li pɛ ɲɛ n kɔn' lifɛnl lɔ ni a'saan nnɔ ke.» 27 Ne u'cɛnbaa muɔ' wɔ micɛɛkm cɛɛn, ki cɛbe' wɔ lifɛnl nnɔ, ne ki taa' wɔ ki wiɛ'.

28 «Ama utonsɔnl nnɔ ɲɛn' saali, ki laa' u'tonsɔntɔ uba u ɲmɔbe u'fɛnl ilike kubɔtuɔku, ne u cuo' wɔ, ki sɛre' u'tule ni, ki tɔke' wɔ ki ye: «Pɛ nni a ɲmɔbe n'fɛnl lɔ nnɔ ke.» 29 Ne u'tonsɔntɔ nnɔ gbaan' u'nintuɔli, ki gbáanh wɔ ki teh: «Nikn kɔ tien sukɛ. N li pɛ ɲɛ.» 30 Ne wa tuo', ki cuo' wɔ ki ti pek'n', wɔ nɔ li te len haali nin uyo wɔ u li ti pɛ lifɛnl nnɔ. 31 U'tonsɔntɔb laa' nɔ tien' ma, bi'yɛnm saa' ki gbien', ne bi jon' ki ti tɔke' bi'cɛnbaa na ke tien'. 32 Nɛn saan ne bi'cɛnbaa yin' wɔ, ki tɔke' wɔ ki ye: «Utonsɔnbierɔ sin! A gbáanh nni ma nnɔ, ne n cɛbe' ɲɛ a'fɛnl ke. 33 A'mɔ ɲa bi li muɔ a'tonsɔntɔ micɛɛkm tɛn n muɔ' ɲɛ ma bo-oo?» 34 U'cɛnbaa ya benku ni ben' u'bo, ne u cɛre' bi dɛre' u'tub ki taa' wɔ ki ti pek'n', wɔ nɔ li te len haali nin uyo wɔ u li ti pɛ lifɛnl nnɔ ke kɔ gben.

35 «Ni'ni wɔ ke ɲa fɛreh u'tɔ u'biil nin u'fɛl ke la, n'Baa wa te paaki bɔ mɔ li dɛre u'tub nnɔ ne.»

## 19

### *Uwien taan' na la, nil la bore nɛ (Mark 10:1-12)*

1 \*Yesu len' ki ti gben' uyo wɔ nnɔ, ne ki ɲɛn' Galile ya tinfɛnm ni, ki jon' Sude ya tinfɛnm mɔ te Sudɛn ya kpenpuol bɔ nnɔ ni. 2 Linigociɛnl paan' u'bo, ne u ti cɛre' bi'ni bɔ yɛ biwiɛnb faake'.

3 \*Farisiɛnmbɛ biba nek'n' wɔ, ki yie be nɔ biike wɔ, ne ki niire' wɔ ki ye: «Ujɛ ɲmɔbe usɛn wɔ nɔ wiɛ u'po maam ke maam bo-oo?» 4 Ne \*Yesu jii' be ki ye: «Na kaan' na kele' \*Uwien ya gbɔnku ni nnɔ ne-ɛɛ? Nɔ kele' ki ye micincinm Uwien lɔ ɲɛn' be ma nnɔ, «u lɔ ɲɛn' ujɛ nin upii ne», 5 ne ki ye: «Nɛn ne cɛre' ujɛ kuɔn' upii la, u li daan u'naa nin u'baa, wɔn nin u'po nɔ taan, ne ben bile nnɔ nɔ taan kɔ tien unibaab.» 6 Nnɔ ne ba ji te nib bile, bi ji yɛ unibaab ne. Tɔ, Uwien taan' na la, nil la bore nɛ.»

7 Ne bi liebe' ki niire' wɔ ki ye: «Be tien' Moyis lɔ ye unil ye wɔ nɔ wiɛ u'po la, wɔ nɔ kele kugbɔnku kɔ de wɔ kɔ wuɔn kɔ ye u wiɛ' wɔ ne?» 8 Ne \*Yesu ye: «Ni'yufaa bo ne cɛre' Moyis lɔ de' ne usɛn nɔ li wiɛnh ni'puob. Ama micincinm na lɔ te nnɔ. 9 N tɔkeh ne ne, ujɛ wɔ ya po ɲa tien' nanmaal ɲɔ u wiɛ' wɔ ki ti kuɔn' upiitɔ la, ujɛ nnɔ tien' linaɲmaal ne.»

10 Ne \*Yesu ya panpaankaab tɔke' wɔ ki ye: «Ujɛ nin u'po ya gbɛr te nnɔ la, ujɛ ɲa bi kuɔn' pii la, nɔ bi tu.» 11 Ne \*Yesu ye: «Nib ke ɲa nɔ fre kɔ tien ni len' na nɔ. Uwien de' bɔ mituɔm bi la kuɔn piib nnɔ, ben ne li tuo. 12 Isɛn yɔ cɛreh binib ɲa kuɔndeh piib ɲa tɛtɛ. Biba te, bi maa' be, ba yɛ jɛb. Bitɔb te, bi fɔare' be ne. Bitɔb mɔ te, ka kuɔndeh piib Uwien ya bel ya tuonl bo ne. Wɔ ke li fre kɔ cii la, wɔ nɔ cii.»

*Yesu nin mubumu*  
(Mark 10:13-16; Luk 18:15-17)

<sup>13</sup> Nɛn saan nɛ bi tukeh mubumu ki bàareh \*Yesu saan ɲɔ wɔ́ rí taa u'nuɔ́ kí paan mu'bo, kí kàare kí de mù. Nɛ u'panpaankaab kɔnh nin bɛ. <sup>14</sup> Nɛ \*Yesu tɔ́ke' bɛ ki ye: «Cèrɛ mɛn mubumu mù rí li bàareh n'saan. La piendeh mù mɛn, kimɛ binib bà te tɛn mubumu nɛ si Uwien ya bɛl.» <sup>15</sup> U taa' u'nuɔ́ ki paan' mu'bo ki gben', nɛ ki siere' nì'saan.

*Ufàadaan uba ya gɛr*  
(Mark 10:17-31; Luk 18:18-30)

<sup>16</sup> Tɔ́, unacenfaan uba baa' \*Yesu saan, ki niire' wɔ́ ki ye: «Cɛnbaa, n li tien milɛ mɔnm ɲɔ́ kí lɛ limiɛl là ɲa ɲmɔ́be gbenm-i?» <sup>17</sup> Nɛ \*Yesu jiin' wɔ́ ki ye: «Bɛ tien' a niireh nni ná mɔn bo? Wà mɔn te uba nɛ. A yíe á lɛ limiɛl là ɲa ɲmɔ́be gbenm la, li boh \*iwɔ́b.» <sup>18</sup> Nɛ u ye: «I lɛ wɔ́b-i?» Nɛ \*Yesu ye: «La ku nil, ki la teh naɲmaal, ki la suh, ki la nɛndeh nib bo, <sup>19</sup> kí li boh a'naa nin a'baa, kí li yíe a'tɔ́ tɛn a yíe a'ba ma bo.» <sup>20</sup> Nɛ unacenfaan nnɔ́ ye: «N boh nì'kɛ nɛ. Bɛ biɛ ki pɔ́rɛ' nni?» <sup>21</sup> Nɛ \*Yesu ye: «A yíe á li yé unimɔ́n kí tì gben la, jo kí tì kuɔ́rɛ a ɲmɔ́be tibont tà, kí taa ilike kí de bicɛɛkɛnɛb, kí li ɲmɔ́be lifaal paaki bó, ɲɔ́ kí baa kí lá paan n'bo.» <sup>22</sup> Unacenfaan nnɔ́ cii' nnɔ́ ma nnɔ́, u'yɛnm saa', nɛ u siere' ki bure', kimɛ u ɲmɔ́be lifaal ki gbien'.

<sup>23</sup> Nɛ \*Yesu tɔ́ke' u'panpaankaab ki ye: «N tɔ́keh nɛ imɔ́n nɛ, nì faa ki gbien' nin ufàadaan rí kɔ́ Uwien ya bɛl ni.» <sup>24</sup> Nɛ ki ye: «N tí tɔ́keh nɛ imɔ́n nɛ, nì faa nin ufàadaan rí kɔ́ \*Uwien ya bɛl ni ki cɛn' ñákma rí càare' mikpɛlpienbonm ni.» <sup>25</sup> U'panpaankaab cii' nnɔ́ ma nnɔ́, nì beke' bɛ cɛɛn, nɛ bi ye: «Nì te nnɔ́ la, ɲmɛ li fre kí ɲmɛrɛ?» <sup>26</sup> \*Yesu caan' bi'bo inun, nɛ ki tɔ́ke' bɛ ki ye: «Binib nɛ ɲa rí fre, Uwien wɔ́n ɲa gɛle' niba.»

<sup>27</sup> Nɛ Píɛr ye: «Tinbi wɔ́n la, tí dàan' tí'bont kɛ nɛ ki paan' a'bo-a! Tí li lɛ bɛ ya kpɛle?» <sup>28</sup> Nɛ \*Yesu tɔ́ke' bɛ ki ye: «N tɔ́keh nɛ imɔ́n nɛ, Unil ya Bijɛ lá li kèlɛ kibɛrbiɛk bo, kí li ɲmɔ́be ukpiɛke kí gbien uɲɛndunfaan ni. U ya yo nɛ ninbi bà pɛ n'bo nnɔ́ mɔ́ li kèlɛ mubɛrbiɛmu piik nin mule bo, kí bu Israyɛl yaab ya baamul piik nin ile nnɔ́ tibuur. <sup>29</sup> Wà kɛ dàan' u'den bii u'ninjɛb bii u'ninsɛb bii u'naa bii u'baa bii u'bumu bii u'kpàan n'yel bo la, u li lɛ nì'kɛ bolm kobk, kí li lɛ limiɛl là ɲa ɲmɔ́be gbenm mɔ́. <sup>30</sup> Bisɛnliɛrɛ lá li paan puoli kí yebe. Puoli yaab mɔ́ lá li liere usɛn kí yebe.»

## 20

*Ufàadaan uba pɛn' u'paatieb ma bo*

<sup>1</sup> «Uwien ya bɛl naan ufàadaan wà fii' kutɛnɲɛsɔ́nsɔ́nku wɔ́ rí tí nuun paatieb bɛ rí lá sɔ́n u'kpàabu ni ya tuonl nɛ. <sup>2</sup> U laa' biba, nɛ ki tɔ́ke' bɛ ki ye: «N li pè nɛ liwentunl ya paaku nɛ. Bi tuo' nɛ u wuɔ́n' bɛ u'kpàabu. <sup>3</sup> Uwien pende', nɛ u jon' kidaak bó kí tì laa' bitɔ́b se kí'ni, ka ɲmɔ́be tuonl. <sup>4</sup> Nɛ u tɔ́ke' bɛ ki ye: «Nì'mɔ́ rí jo kí tì sɔ́n n'kpàabu ni. Nì sɔ́n kí kpaan' ma bo la, n li pè nɛ nnɔ́ nɛ, <sup>5</sup> nɛ bi bure'. Liwenyul, nɛ u tí liɛbe' kidaak bó, kí tì laa' bitɔ́b mɔ́ se kí'ni, nɛ u tɔ́ke' bi'mɔ́ nnɔ́. Uwien dere', nɛ u tí liɛbe' kidaak bó, kí tì tì tien' nnɔ́. <sup>6</sup> Uwien mánɛdeh uyo wà nnɔ́, nɛ u tí liɛbe' kidaak bó, kí tì tì laa' bitɔ́b mɔ́ tí se kí'ni, nɛ u tɔ́ke' bɛ ki ye: «Bɛ tien' nɛ ni tun' kí se nɔ́ nnɔ́ ka sɔ́nh niba?» <sup>7</sup> Nɛ bi ye: «Ta laa' wà li de tɛ tuonl nɛ» Nɛ u ye: «Nì'mɔ́ rí lí joh kí tì sɔ́n n'kpàabu ni.»

<sup>8</sup> «Uwien lu' ma nnɔ́, nɛ ufàadaan nnɔ́ tɔ́ke' u'tonsɔ́nb ya ciɛn ki ye: «Yin paatieb nnɔ́ ní kí lá pè bɛ bi'paaku. Cin kí li paanh bà paan' puoli bó ní nnɔ́ kí tì fɔ́rɛ bà liere' usɛn.» <sup>9</sup> Bà baa' liwenmɔ́nl nnɔ́ baa' bɛ rí lá teke bi'paaku, nɛ u pɛn' wà kɛ liwentunl ya paaku. <sup>10</sup> Bà liere' usɛn nnɔ́ mɔ́ baa' bɛ rí lá teke bi'paaku kí maaleh kí teh bi lí lɛ kí gèbre puoli bó yaab nnɔ́ nɛ. Nɛ u pɛn' bi'mɔ́ wà kɛ liwentunl ya paaku. <sup>11</sup> Bi teke' bi'paaku ma nnɔ́, nɛ kí kɔnh nin ufàadaan nnɔ́ <sup>12</sup> kí teh: «Bà paan' puoli bó nnɔ́ sɔ́n' kukurku kuba kpɛin nɛ. Tinbi ya gben nɛ ben' liwentunɲmɛnl. Kutɔ́ntɔ́nku nii' tɛ. Nɛ a cèrɛ' tinbi nin bɛn ya paaku kpɛ-a!» <sup>13</sup> Nɛ ufàadaan nnɔ́ tɔ́ke' bi'ni uba kí ye: «N'jɔ́, ma jin' ɲɛ. A bi tuo' kí ye a lí teke liwentunl

ya paaku ne. Na te nnɔ-ɔɔ? <sup>14</sup> Teke a'like kí li kunh. N yíe rí de puoli bó yaab tɛn n de' nɛ ma bo nɛ. <sup>15</sup> Ma n̄mɔbe sɛn rí taa n'like kí tien n yíe ma bo-oo? N n̄mɔbe tinim̄nt ma nnɔ nɛ cɛrɛ' a n̄mɔbe iponponbe-ee?» »

<sup>16</sup> Tɔ, \*Yesu tɔke' ki ye: «Nnɔ nɛ puoli bó yaab lá li liere usɛn, nɛ bisɛnlierb mɔ lá li paan puoli bó.»

*Yesu len' u'kuum nin u'mɛkrm bó nta bo*  
(Mark 10:32-34; Luk 18:31-34)

<sup>17</sup> \*Yesu yíe wɔ rí dùo Yerusalem bó, nɛ ki taa' u'panpaankaab piik nin bile nnɔ, ki n̄ɛn' ugbɛ. Bi joh ma nnɔ nɛ u tɔkeh bɛ ki teh: <sup>18</sup> «Li cengeh mɛn, ti doh Yerusalem bó nɛ. Ti tí baa' la, bi li taa Unil ya Bijɛ kí n̄ukn bitɔtuɔrciɛnb nin \*Yiko ya wɔnwɔknb, bɛ rí bu wɔ tibuur, kí ye u kpɛ bɛ rí ku wɔ, <sup>19</sup> nɛ kí taa wɔ kí n̄ukn bà n̄a yé Sufmbɛ, bɛ rí lè wɔ, kí n̄i wɔ inalebe, kí yaan kí kpɛ wɔ udɔpɔnɔn bo, nɛ wienta daali wɔ rí mɛkre bitɛnkpiib ni.»

*Yesu ya panpaankaab bile ya naa ya miɛbu*  
(Mark 10:35-45)

<sup>20</sup> Nɛn saan nɛ Sebede ya bijieɓ bile ya naa taa' bɛ ní \*Yesu saan, ki lá gbaan' u'nintuɔli, ki ye wɔ rí pu wɔ nibonn niba. <sup>21</sup> Nɛ u niire' wɔ ki ye: «A yíe ba?» Nɛ u ye: «A lá jin' a'bel la, á cɛrɛ n'bijieɓ bile biɛ rí li kɛ a'saan. Uba rí li kɛ a'nɔjie bó, utɔ mɔ a'nɔgen bó.» <sup>22</sup> Nɛ \*Yesu jii' bɛ ki ye: «Na bɛn ni miɛh nni nibonn nà. Ni li fre kí ji n li ji ijɛnd yà nnɔ-ɔɔ?» \*Nɛ bi ye: «Ti li fre.» <sup>23</sup> Nɛ u ye: «Im̄n, ni li ji n li ji ijɛnd yà nnɔ. Ama binib bà li kɛle n'nɔjie bó nin n'nɔgen bó nnɔ wɔn na yé min nɛ li gɛnde bɛ. N'Baa nɛ li de mifɛnm nnɔ u bonde' mɛ ki ble' binib bà nnɔ.»

<sup>24</sup> Nɛ u'panpaankaab piik bà sien' nnɔ cii' Sebede ya bijieɓ nnɔ tɔke' \*Yesu ki ye bà, nɛ bi'benku ni ben' bi'bo. <sup>25</sup> Nɛ \*Yesu yin' bɛ ki tɔke' bɛ ki ye: «Ni bɛn n̄i te ma uɛndun wuu ni. Bà yé idu ya bɛrb nnɔ wɔbndeh i'nib nɛ, nɛ bà n̄mɔbe ticiɛnt nnɔ wɔngeh bɛ bi'tuɔm kpɛ ma bo. <sup>26</sup> Na rí li te nnɔ ninbi ni. Ni'ni wà yíe wɔ rí li yé uciɛn la, wɔ rí tien u'ba ni'tonsɔnl. <sup>27</sup> Wà yíe wɔ rí li yé usɛnlier la, wɔ rí tien u'ba u'yonb. <sup>28</sup> Kimɛ \*Unil ya Bijɛ n̄a baa' uɛndun wuu ni bɛ rí sɔn kí de wɔ. U baa' wɔn nɛ rí sɔn kí de binib, kí kpo n̄o kí de binib bà yebe kí wiɛ.»

*Yesu likre' ijùɔn ile*  
(Mark 10:46-52; Luk 18:35-43)

<sup>29</sup> \*Yesu nin u'panpaankaab n̄eh Seriko ya du ni uyo wà nnɔ nɛ linigociɛnl paan' bi'bo. <sup>30</sup> Ijùɔn ile kɛ sɛngbaal ki cii' bi ye \*Yesu nɛ gɛbreh, nɛ ì wuureh ki teh: «Yonbdaan, \*Dafid ya yaabile, muɔ tɛ micɛɛɛkm.» <sup>31</sup> Nɛ linigol nnɔ tɛngeh i'bo ki teh yè rí n̄mile, ama ì tùɔreh ki wuureh nɛ ki teh: «Yonbdaan, \*Dafid ya yaabile, muɔ tɛ micɛɛɛkm.» <sup>32</sup> Nɛ \*Yesu sere' ki yin' ijùɔn nnɔ, nɛ ki niire' yè ki ye: «Ni yíe rí tien bà kí de nɛ?» <sup>33</sup> Nɛ ì ye: «Yonbdaan, ti yíe tí likre nɛ.» <sup>34</sup> \*Yesu muɔ' yè micɛɛɛkm cɛn, ki mɛ' i'nun, nɛ ì likre' i ya tãan bo, ki paan' u'bo.

## 21

*Binib kpiɛkreh Yesu u tí kɔn' Yerusalem ni*  
(Mark 11:1-11; Luk 19:28-40; San 12:12-19)

<sup>1</sup> \*Yesu nin u'panpaankaab tí n̄eke Yerusalem, ki tuo' Bɛtifaaje ya du, u te Olifi ya siin ya juɔl bó. Bi tí tuo' ni'saan ma nnɔ, nɛ \*Yesu sɔn' u'panpaankaab ni bile <sup>2</sup> ki tɔke' bɛ ki ye: «Li joh mɛn udu wà te inun bó nɔ ni. Ni tí kɔn' u'ni la, ni li pɔk kí lɛ uɛun̄n̄o uba lùo, u'buk se u'saan. Ní lore wɔ, kí taa wɔn nin u'buk kɛ ní. <sup>3</sup> Unil ye nɛ niba la, ní ye: «Yonbdaan nɛ cieke yì.» Bi li pɔk kí cɛrɛ ní taa yì kí bure nɛ.»

<sup>4</sup> Ní tien' n̄o \*Uwien ya n̄ɔbonsɔknl là len' nà nnɔ nè rí tien. Nɛ u là ye:

<sup>5</sup> «Tɔke mɛn Siyɔn yaab kí ye bi'bɛrciɛn we ní.

\* **20:22** Yesu taa' kunɛnɛnku kuba nɛ ki wuɔn' ijɛnd nnɔ yebe ki kpɛ ma bo. Kun si: kí n̄u kijendyiek ni.

U te suoo nε, ki jεke uηuunñɔ nin u'buk.»

<sup>6</sup> Nε \*Yesu ya panpaankaab bile nnɔ bure', ki tɪ tien' u len' ma nnɔ, <sup>7</sup> ki tuke' uηuunñɔ nin u'buk nnɔ ki baa' Yesu saan, nε ki taa' bi'lier ki paan' i'bo, \*Yesu jεke'. <sup>8</sup> Binib ligol taah bi'lier ki pèreh usen ni. Bitɔb mɔ bereh tifer kí lá pèreh. <sup>9</sup> Nε linigol là le usen nin là pε puoli nnɔ wuureh ki teh: «Osana\*, \*Dafid ya yaabil. Uwien ya mɔnm ní li te wà we ní Yonbdaan ya yel bo nnɔ bo. Osana, Uwien wà te paaki bó.»

<sup>10</sup> Tɔ, \*Yesu tɪ baa' Yerusalem ni ma nnɔ, nε udu nnɔ kε jenge', binib niireh ki teh: «U le daan bε nε?» <sup>11</sup> Nε linigol nnɔ ye: «U yé \*Yesu \*Uwien ya ñɔbonsɔknl wà ñen' Nasaret Galile ya tinfenm ni nnɔ nε.»

*Yesu ηɔre' ikpenkpend Uwien ya duku ya luo bo*  
(Mark 11:15-19; Luk 19:45-48; San 2:13-22)

<sup>12</sup> \*Yesu kɔn' Uwien ya duku ya luo bo, nε ki ηɔre' binib bà kuɔreh tiwent nin bà daanh nnɔ kε ki ñen'. Ki tuture' bilikkpendb ya teb nin bà kuɔreh inenjel nnɔ mɔ ya biemu ki gbàbe'.

<sup>13</sup> Nε ki tɔke' bε ki ye: «Nì kele' \*Uwien ya gbɔnku ni ki ye: «Bi li yin u'duku ikaare ya duku nε, ama ninbi taah kù ki teh binasub ya tantaanbùol nε.» »

<sup>14</sup> Nεn saan nε ijùɔn nin iwɔb bàareh \*Yesu saan Uwien ya duku ya luo bo, nε u cèreh ì faakreh. <sup>15</sup> \*Bitɔtuɔrcienb nin \*Yiko ya wɔnwɔknb laa' \*Yesu tien' miyɔkm ya bont tà nnɔ, ki cii' mubumu wuureh Uwien ya duku ya luo bo ki teh: «Osana, \*Dafid ya yaabil» ma nnɔ, nε bi'benku ni ben' u'bo. <sup>16</sup> Nε bi tɔke' wɔ ki ye: «ηa ciih mubumu muu lienh ki teh ba nε-εε?» Nε u ye: «N ciih. Na laan kaan' \*Uwien ya gbɔnku ni nì kele' nà saan ki ye: «Uwien cère' mubumu nin mucenfendmu pèkeh wɔ nnɔ nε-εε?» » <sup>17</sup> \*Yesu len' nnɔ ma nnɔ, nε ki siere' ki dàan' bε, ki ñen' Yerusalem ni, ki jon' ki tɪ gɔn' Betani ya du ni.

*Yesu wiε' bukenkenbu buba miηùum*  
(Mark 11:12-14, 20-24)

<sup>18</sup> Nì faa', \*Yesu liebeh Yerusalem bó ma nnɔ, nε mikònm cuo' wɔ. <sup>19</sup> U laa' bukenkenbu buba se sengbaal, nε u jon' bu'saan, ka laa' kenken bu'bo. U laa' tifer baba nε bu'bo, nε ki tɔke' bù ki ye: «ηa ji li lùon bil fiebu.» Nε busubu nnɔ kuore' bu'keke i ya tàan bo.

<sup>20</sup> U'panpaankaab laa' nnɔ ma nnɔ, nε nì cuo' bε miyɔkm cεen. Nε bi ye: «O! Bε tien' busubu nnɔ pɔk ki kuore' nɔ nnɔ?» <sup>21</sup> Nε \*Yesu ye: «N tɔkeh nε imɔn nε, ni teke' Uwien ki jin', ka maaleh milele la, ni'mɔ li fre kí tien nnɔ. Na yé ni li tien nεn baba nε. Ni tɔke' lijuɔl liε ki ye lè ní fii kí tɪ lu miñunciem ni la, nì li tien nnɔ nε. <sup>22</sup> Ni mie' Uwien nibonn nà kε ni'kaare ni, ki teke' ki jin' la, u li de nε nè.»

*Bi niire' Yesu wà de' wɔ usen wɔ ní tien u teh nà nɔ*  
(Mark 11:27-33; Luk 20:1-8)

<sup>23</sup> \*Yesu kɔn' Uwien ya duku ya luo bo, ki wɔknh binib Uwien ya gber, nε bitɔtuɔrcienb nin Sufmbε ya cienb neknl wɔ ki niire' wɔ ki ye: «A ηmɔbe usen á tien a teh nà nɔ-ɔɔ? Njme nε de' ηε u ya sen-i?» <sup>24</sup> Nε u tɔke' bε ki ye: «N'mɔ li niire nε iniire iba kpein nε. Ni fre' ki jiin' nni la, n'mɔ li tɔke nε n ηmɔbe usen wà ki teh n teh nà nɔ. <sup>25</sup> San là siih binib Uwien ya ñunm ma nnɔ, ηmε là de' wɔ usen-i? Uwien bii binib-i?» Nεn saan nε bi tɔkeh tɔb ki teh: «Ti ye Uwien nε de' wɔ usen la, u li niire tε kí ye bε tien' ta là teke' wɔ ki jin'-i? <sup>26</sup> Ti tí ye binib nε de' wɔ usen la, ti fenge linigol nnɔ mɔ, kimε bi'ke maaleh ki teh San là yé \*Uwien ya ñɔbonsɔknl nε.» <sup>27</sup> Nε bi jiin' wɔ ki ye: «Ta bεn.» Nε \*Yesu mɔ jiin' bε ki ye: «N'mɔ ηa ben, ka ní tɔke nε n ηmɔbe usen wà ki teh n teh nà nɔ mɔ.»

*Ninjieb bile ya kpenjenm*

\* 21:9 Osana ya tingi si: Uwien si ukpieke nε.



28 \*Yesu tí len' ki ye: «Maale men kí liike n li tóke ne ná nò ya tingi. Uje uba ne là te ki ñmòbe bijie b ile, ne ki tóke' ucien ki ye: «N'buké, jo kí tí sòn bukpàabu ni dinnò.» Ne u ye: 29 «Ma we.» Ní pukn' waamu, ne u lèbre' u'yennaale ki jon' ukpàabó. 30 Ne uje nnò jon' uwaal saan ki tóke' mò ki ye: «N'buké, jo kí tí sòn bukpàabu ni dinnò.» Ne u ye: «N'baa, n li jo,» ne ka jon'.» 31 Ne \*Yesu niire' be ki ye: «Mubumu mule nnò ni, ki le tien' ki'baa yíe ná?» Ne bi jiiin' ki ye: «Ukpiéke nnò.» Ne u ye: «N tókeh ne imòn ne, \*bilènpotekb nin ijènkpend li kpié kí kò Uwien ya \*bel ni nin ne. 32 Kimé San baa' ní ki lá wuòn' ne usen wà mòn, ne na teke' wò ki jin'. Ama bilènpotekb nin ijènkpend ne teke' wò ki jin'. Nin ni laa' bi teke' wò ki jin' ma ké nnò na lèbre' ni'tetem, ní teke wò kí ji.»

*Bikpàab bà bre ya kpenjenm*  
(Mark 12:1-12; Luk 20:9-19)

33 «Li cengeh men mikpenjentòm. Udendaan uba ne là te ki ñmòbe bukpàabu, ki caan' bukpàabu nnò ni tisir tà bi taah tu'bii ki ñeh fèn nnò, ne ki beke' ki linde' bù, ki gbin' kubùoku kùà bi li ñmèngèh isibii nnò bu'ni, ki caan' kininbèntaak bu'ni, ki taa' bù ki guun' bikpàab biba, ne ki bure' usen. 34 Uyo wà isibii nnò tí ben' nnò, ne u sòn' u'tonsònb bikpàab nnò saan, be ní tí teke wòn ukpèdaan ya bó ní. 35 Bitonsònb nnò tí baa' ma nnò, ne bikpàab nnò cuo' be, ki ñi' uba, ki ku' utò, ki yèke' utò iten. 36 Ne ukpèdaan nnò tí sòn' bitonsòntòb bi yebe ki gèbre' bikpiékb nnò. Ne bikpàab nnò tí tí tien' bi'mò nnò. 37 Ne u fòre' ki sòn' u'bije bi'saan, ki maaleh ki teh u yé u'bije ma nnò, bi li tí bo wò ne. 38 Ama bikpàab nnò laa' u'bije we ní ma nnò, ne bi tóke' tòb ki ye: «Wòn ne yé u'faajil, cère men tí ku wò, ñò lifaal nnò ní juore tí'yaal.» 39 Ne bi cuo' wò, ki ñen' ukpègbe, ki tí ku' wò.» 40 \*Yesu niire' ki ye: «Tò, ukpèdaan nnò lá baa' ní uyo wà la, u li tien bikpàab nnò mila?» 41 Ne bitòtuòrcienb nin Sufmbé ya ciènb nnò jiiin' wò ki ye: «U li ku bibierdenb bugben mikubièrm ne, kí taa u'kpàabu nnò kí de bikpètòb be ní li diènh wò isibii uyo wà u yíe.»

42 Ne \*Yesu ye: «Na kaan' \*Uwien ya gbònkù ni ní kéle' ná saan ki ye:

«Litènl là bidumèb wie' lè nnò,  
lèn ne lá tien' litènkpiékl là co kuduku nnò ne-èè?

Yonbdaan ne tien' nnò,  
ne ní ñmòbe kuñuòrku tí'nun bó.»

43 «Nèn ne cère' n tókeh ne ki teh Uwien li fie u'bel ni'saan, kí taa lè kí de linibol là li teh u yíe ná. 44 [Wà ké lu' litènl nnò bo la, u li kòkuò ne. Litènl nnò lu' wà bo la, li li memère wò ne.]»†

45 Bitòtuòrcienb nin \*Farisienmbé cii' nnò ma nnò, ne ki bènde' ki ye \*Yesu tókeh bi ya gber ne. 46 Ne bi'nun mòn be ní cuo wò, ama bi fenge' linigol nnò, kimé linigol nnò tuo' ki ye \*Yesu yé \*Uwien ya ñòbonsòknl ne.

## 22

*Tipiikuònjier ya kpenjenm*  
(Luk 14:15-24)

1 \*Yesu tí pòn' be mikpenjenm ki ye: 2 «Uwien ya \*bel naan uber wà tien' u'bije ya piikuòn, 3 ki sòn' u'tonsònb be ní tí yin binib bà u yíe be ní baa kí lá ji nnò ne. Bi yin' be, ne bi yíe' ka baa'. 4 Ne u tí sòn' bitonsòntòb be ní tí tóke be kí ye u bonde' u'jier ké ki gben'-a. U kòre' u'naje nin u'wènkobr tà gbenge, ki bonde' tibont ké ki gben'-a, ki ye be ní baa ní, 5 ne ba tóngè'. Biba bure' bi'kpàan bó, bitòb mò bure' bi'kpenkpende. 6 Bà s'ien' nnò cuo' bitonsònb nnò, ki jènde' be, ki ku' be. 7 Uber nnò ya benku ni ben' ki gbien', ne u sòn' u'sojambé, bi tí ku' binikub nnò, ki sè' bi'du. 8 Ne u tóke' u'tonsònb ki ye: «Upiikuòn ya jier bonde'-a. Ama binib bà n yin' be nnò ña kpe be ní ji tijier nnò. 9 Li joh men udu ni nin isennaan, kí tí yin ní ni li le binib bà ké, be ní baa kí lá ji upiikuòn ya jier nnò.» 10 Ne

† 21:44 Bi kpié' ki kéle' tigbònt tà nnò ya tuba ni migbiirm 44 ña te tu'ni.

u'tonsɔnb nnɔ jon' udu ni nin isennaan, ki tĩ yin' ní bi laa' bà nnɔ kɛ, bà mɔn nin bà bre kɛ. Nɛ bi baa' ki gbe kuduku kùà bi jinh tijier ku'ni nnɔ.

<sup>11</sup> «Uber kɔn' wɔ ní liike binib bà baa' bɛ ní ji tijier nnɔ, nɛ ki laa' uje uba ɲa guo upiikuɔn nnɔ ya kpɛlɔɛr. <sup>12</sup> Nɛ u niire' wɔ ki ye: «N'jɔ, a tien' mila ki kɔn' ní niɛ saan, ka guo piikuɔn ya kpɛlɔɛr-i?» Nɛ wa jiin' wɔ. <sup>13</sup> Nɛ uber nnɔ tɔke' u'tonsɔnb ki ye bɛ ní cuo wɔ, kí lòle u'nuɔ nin u'taan, kí ñɛn wɔ kí tĩ wiɛ saali licinñunl ni. Nɛn saan nɛ u li te ki muɔh, ki ɲmɔnh inɔgbɛn. <sup>14</sup> Kimɛ binib bà Uwien yih bɛ nnɔ yebe nɛ, ama u gɛndeh bà nnɔ nɛ ɲa yebe.»

### *Sesa ya lenpolike*

*(Mark 12:13-17; Luk 20:20-26)*

<sup>15</sup> Tɔ, \*Farisienmbɛ jon' ki tĩ taan' ki gbiere' ki liike' bi li tien ma kí dɛle kí cuo \*Yesu miyɛnfuom ni. <sup>16</sup> Nɛ ki sɔn' bi'panpaankaab nin uber Herod yaab ya biba \*Yesu saan. Nɛ bi tĩ tɔke' wɔ ki ye: «Cɛnbaa, ti bɛn ki ye a tɔkeh tigbɛmɔnt nɛ, ki wɔngɛh tɛ Uwien ya sɛn mɔnmɔnm, ka fɛngɛ uba, ka boh uba ki cɛn' utɔ. <sup>17</sup> Nɛn bo, tɔke tɛ a maaleh ma bo. Ti ɲmɔbe usɛn tí li pɛh lenpo ki dienɲ uberɔien Sesa\* bii ta ɲmɔbe?»

<sup>18</sup> \*Yesu bɛn bi'cekn kpɛ ma bo, nɛ ki tɔke' bɛ ki ye: «Ninbi inɲuɔn ilele ya nibɛ, bɛ tien' ni bĩkreh nni? <sup>19</sup> Wuɔn nni mɛn lenpo ya likbu.» Bi taa' milikbim miba ki wuɔn' wɔ nɛ, <sup>20</sup> u niire' bɛ ki ye: «ɲmɛ ya nɛnnɛnku nin u'yel te mi'bo?» <sup>21</sup> Bi ye: «Uberɔien Sesa,» nɛ u ye: «Taa mɛn nà yé Sesa yaann kí de Sesa, kí taa nà mɔ yé Uwien yaann kí de Uwien.» <sup>22</sup> Bi cii' nnɔ ma nnɔ, ní cuo' bɛ miyɔkm cɛɛn, nɛ bi dàan' wɔ ki bure'.

### *Bitɛnkpiib ya mɛkrm ya gɛr*

*(Mark 12:18-27; Luk 20:27-40)*

<sup>23</sup> Nɛn daali nɛ Saduseyɛnmbɛ biba baa' \*Yesu saan. Bɛn nɛ lienɲ ki teh bitɛnkpiib ɲa ní mɛkre nnɔ. Bi niire' wɔ iniire <sup>24</sup> ki ye: «Cɛnbaa, Moyis là len' ki ye: «Unil ya ninje kpo' ki cɛrɛ' u'po, ka ɲmɔbe buk la, wɔ ní kere ukpopii nnɔ, kí maa mubumu kí de u'ninje wà kpo' nnɔ.» <sup>25</sup> Tɔ, ninjiɛb bilole biba nɛ là te tĩ'ni, nɛ ukpiɛk lá kuɔn' upii, ki kpo' ka maa' buk. Nɛ ulie kere' ukpopii nnɔ, <sup>26</sup> ki mɔ kpo' ka maa' buk. Wà tɔ u'bo nnɔ mɔ tien' nnɔ. Bi'kɛ bilole tien' nnɔ, ki kpo' ka maa' buk. <sup>27</sup> Nɛ upii nnɔ mɔ tĩ tonde' ki kpo'. <sup>28</sup> Tɔ, bitɛnkpiib lá mɛkre' uyo wà la, ɲmɛ li si upii nnɔ? Kimɛ bi'kɛ kuɔn' wɔ ki tĩ bòn' nɛ.» <sup>29</sup> Nɛ \*Yesu jiin' bɛ ki ye: «Na bɛn nà kele' \*Uwien ya gbɔnku ni, ka bɛn Uwien ya tuɔm kpɛ ma bo. Nɛn nɛ cɛrɛh ni tũrɛh. <sup>30</sup> Bitɛnkpiib lá mɛkre' la, jɛb ɲa ní kuɔn piib, piib mɔ ɲa ní kun cɛr. Bi li te tɛn \*Uwien ya tondb nɛ paaki bó. <sup>31</sup> Bitɛnkpiib ya mɛkrm mɛn la, na kaan' Uwien là tɔke' nɛ tigbɛr tà nnɔ nɛ-ɛɛ? <sup>32</sup> U là ye: «Min nɛ yé \*Abraham nin \*Isaak nin \*Sakɔb ya Wien.» Uwien ɲa yé tɛnkpiib ya Wien, u yé bà fuobe ya Wien nɛ.»

<sup>33</sup> Linigol nnɔ cii' \*Yesu tɔke' bɛ nnɔ ma nnɔ, nɛ ní cuo' bɛ miyɔkm cɛɛn.

### *Li lɛ wɔbl yé likpiɛkl-i?*

*(Mark 12:28-34; Luk 10:25-28)*

<sup>34</sup> \*Farisienmbɛ cii' \*Yesu len' ki jin' \*Saduseyɛnmbɛ, nɛ ki taan' u'saan. <sup>35</sup> Bi'ni bà bɛn yiko mɔnmɔnm nnɔ ya uba, nuunɲ wɔ ní dɛle kí cuo \*Yesu nɛ ki niire' wɔ ki ye: <sup>36</sup> «Cɛnbaa, yiko ya gbɔnku ni, li lɛ wɔbl cɛn' wɔbl kɛ wɔbl-i?» <sup>37</sup> Nɛ \*Yesu tɔke' wɔ ki ye: ««Li yíe a'Yonbdaan Uwien nin a'fɛl kɛ nin a'tetem kɛ nin a'yɛnmaale kɛ.» <sup>38</sup> Len nɛ yé liwɔbkpiɛkl ki cɛn' wɔbl kɛ wɔbl. <sup>39</sup> Liwɔbliel naan likpiɛkl là sɔ: «Li yíe a'tɔ tɛn a yíe a'ba ma bo.» <sup>40</sup> Moyis ya gbɔnt kɛ nin \*Uwien ya ñɔbonsɔknb là len' nà kɛ nnɔ te iwɔb ile yà ni sɔ.»

### *Uwien ya Nigɛndkɛ Kristo nin Dafid ya gɛr*

*(Mark 12:35-37; Luk 20:41-44)*

<sup>41</sup> \*Farisienmbɛ taan' ma nnɔ, nɛ \*Yesu niire' bɛ <sup>42</sup> ki ye: «Ni maaleh \*Uwien ya Nigɛndkɛ Kristo bo ki teh ba? ɲmɛ ya yaabil si wɔ?» Nɛ bi ye: «\*Dafid ya yaabil nɛ.»

\* 22:17 Bi là yih Erom yaab ya bɛrcien kɛ bɛrcien Sesa nɛ.

43 Nε u ye: «U yé \*Dafid ya yaabil la, nǎ tien' mila, \*Mifuoñaanm là cèrè' \*Dafid yin' wə Yonbdaan-i? Kimε \*Dafid là len' ki ye:

44 «Yonbdaan Uwien tǎke' n'Yonbdaan ki ye:

Kèle n'nǎjie bó,

kí tǐ baa' uyo wà n li cèrè á te a'nennendb kε bo litaal.»

45 «\*Dafid là yin' Uwien ya Nigεndkε Kristo u'Yonbdaan la, u ji tien' mila ki liebe' ki yé u'yaabil-i?» 46 \*Yesu len' nnǎ ma nnǎ, uba mǎnǎn nǎ fre' ki laa' nǎbonl ki jiin' wə. Kí nε nεn daali ma, uba nǎ ji kaabe' ki niire' wə niire.

## 23

### *Li ben men Yiko ya wǎnwǎknb nin Farisienmbε bó*

(Mark 12:38-40; Luk 11:43-45; 20:45-47)

1 Nεn saan nε \*Yesu tǎke' inigol nin u'panpaankaab ki ye: 2 «Yiko ya wǎnwǎknb nin \*Farisienmbε nε nǎmabe usen bε rǐ li tǎkeh Moyis ya yiko ya tingi. 3 Nεn bo, bi tǎkeh nε nǎ kε nnǎ, nǐ li tuonh, kí li teh bi ye ma. Ni nǐn la sǎnh bi sǎnh ma bo, kimε bi lienh nǎ nnǎ ba teh nεn. 4 Bi lùoh ituk yǎ kpíeke nε ki cèreh binib tukeh, ama ben bugben nǎ toh bε rǐ taa bi'nǎbil mǎnǎn kí mε yè. 5 Bi teh bi'bont kε binib nε rǐ li nǎwreh bε. Nεn bo nε bi taah Uwien ya gber ya nǎbon ki teh itil\* iba ni, i piε ki cεn' bi'tǎb ye, ki nǐeh ki pǐendeh bi'lier ya nǎgben. 6 Bi yíe bε rǐ li kaah binikpεkpiεkb ya kǎnkǎan nε tinacent ni, ki yíe bε rǐ li kaah inun bó ya biemu bo itáan ya dur ni, 7 ki yíe binib rǐ li gbaandeh ki fuondèh bε mudaamu ni, ki yih bε «Cεnbaa». 8 Ninbi la li nuunh binib rǐ li yih nε cεnbaa, kimε ni nǎmabe Cεnbaa uba kpein nε. Ni'kε yé ninjieb nε. 9 Ni la yih uba ni'baa uǎendun wuu ni, kimε ni nǎmabe Baa uba kpein nε, u te paaki bó. 10 Ni la li nuunh uba rǐ li yih nε u'ciεn, kimε ni nǎmabe uciεn uba kpein nε. Wǎn nε yé Uwien ya Nigεndkε \*Kristo. 11 Ni'ni wà yé usenlier la, wə rǐ li yé ni'tonsǎnl. 12 Wà kpíeke' u'ba la, Uwien li yuǎn wə. Wà jiin' u'ba tingi la, Uwien li kpíeke wə.»

### *Nǐ bre iñuǎn ilele ya nib bo*

(Mark 12:40; Luk 11:39-42, 44, 47-52; 20:47)

13 \*Yesu tǐ len' ki ye: «Ninbi, \*Yiko ya wǎnwǎknb nin \*Farisienmbε, iñuǎn ilele ya nibε, nǐ bre ni'bo, kimε ni piindeh bunañǎbu binib la kǎ Uwien ya bεl ni nε. Ninbi nǎ rǐ kǎ len, ka rǐ tuo binib bà yíe bε rǐ kǎ nnǎ mǎ rǐ kǎ. [ 14 Ninbi \*Yiko ya wǎnwǎknb nin \*Farisienmbε, iñuǎn ilele ya nibε, nǐ bre ni'bo, kimε ni jinh ki pendeh bikpopiib, nε ki kǎareh nǐ wuǎkreh, ki lεreh ki teh ni yé binimǎnb nε. Nεn bo nε Uwien li dεre ni'tub kí cεn u li dεre binitǎb ya tub ma bo.]†

15 «Ninbi \*Yiko ya wǎnwǎknb nin \*Farisienmbε, iñuǎn ilele ya nibε, nǐ bre ni'bo, kimε ni cuonh ni'kε saan, ki puonh ikpen, ni'nun mǎn nǐ lε unil uba kpein mǎnǎn kí tien wə unil wà pε yiko bo nε. Ni tǐ laa' wə la, nε ni teh wə unil wà kpε utudεre umu wà nǎ rǐ kpiin ni bolm mile ki cεn' ninbi.

16 «Ninbi bisεnwuǎnjuǎnbε, nǐ bre ni'bo; ni tǎkeh ki teh: «Unil pole' Uwien ya duku la, na yé niba,» ki liebe' ki teh: «Unil pole' miñǎkm mà te ku'ni nnǎ la, wə rǐ tien u pole' ki ye ma nnǎ.» 17 Ninbi ijǎrjǎn, ni lε bonn cεn' nitǎnn-i? Miñǎkm nnǎ bii Uwien ya duku kúa cèrè' miñǎkm nnǎ yé Uwien yaam-i? 18 Ni tǐ tǎkeh ki teh: «Unil pole' Uwien ya ponpuol la, na yé niba,» ki liebe' ki teh: «Unil pole' tibonpukaar tà te li'bo nnǎ la, wə rǐ tien u pole' ki ye ma nnǎ.» 19 Ninbi ijǎn, ni lε bonn cεn' nitǎnn-i? Tibonpukaar nnǎ bii Uwien ya ponpuol là cèrè' tibonpukaar nnǎ yé Uwien yaar-i? 20 Nεn bo, unil pole' Uwien ya ponpuol la, u pole' Uwien ya ponpuol ki kpǎbn' nǎ kε te li'bo nnǎ mǎ nε. 21 Unil pole' Uwien ya duku la,

\* 23:5 Sufmbε là kiεh Uwien ya gber ya nǎbon nε ki teh itil ni ki kpíeh bi'yutun. † 23:14 Bi kpíe' ki kele' tigbǎnt tà nnǎ ya tuba ni migbiirm 14 nǎ te tu'ni.

u pole' Uwien ya duku ki kpɔbn' Uwien wà te ku'ni nnɔ mɔ nɛ. <sup>22</sup> Unil pole' kutaaku la, u pole' Uwien ya biɛk ki kpɔbn' Uwien wà kɛ ki'bo nnɔ mɔ nɛ.

<sup>23</sup> «Ninbi \*Yiko ya wɔnwɔknɔ nin \*Farisienmbɛ, iɲuɔn ilele ya nibɛ, nɪ bre ni'bo, kimɛ ni gbiinh ni'ninjo nin ni'ken nin ni'mɔsiyuole bolm piik nɛ, ki taah miba ki dienh Uwien, nɛ ki dɔandeh nà yé nibonmɔnn yiko nnɔ ni. Nɛn si: tinimɔnt nin micɛɛkm ya muɔm nin mitekjim mà mɔn. Ni bi li teh nɛn nɛ, ki la sunde tibontɔr tà sɛn' nnɔ bó. <sup>24</sup> Ninbi bisɛnwuɔnjuɔnbɛ, ni cɛh ki nɛndeh uɲmaɲmaasi nɛ. Ama ki ji nɲuh ki kpɔbeh nɔkmaɲmɛn.

<sup>25</sup> «Ninbi \*Yiko ya wɔnwɔknɔ nin \*Farisienmbɛ, iɲuɔn ilele ya nibɛ, nɪ bre ni'bo, kimɛ ni nɪkndeh ki cɛndeh isɛn nin tiyer ya puoli nɛ. Ama tù gbe ni sun' tibont tà nin ni'nunfɔke cɛreh ni lenh tà nɛ. <sup>26</sup> Ninbi Farisienjuɔnmbɛ, kpɪɛ mɛn kí cɛnde tu'benku ni, kí yaan tu'puoli bó mɔ nɪ wende.

<sup>27</sup> «Ninbi \*Yiko ya wɔnwɔknɔ nin \*Farisienmbɛ, iɲuɔn ilele ya nibɛ, nɪ bre ni'bo, kimɛ ni naan ikul yà bi pende' yè nɛ. Saali mɔn, nɛ benku ni gbe inikpɔb nin tijɔknt kɛ ya bol. <sup>28</sup> Ni'mɔ te nnɔ nɛ. Binib likeh nɛ la, bi teh ni yé binimɔnb nɛ, ama iɲuɔn ilele ya gber nin itùonbiɛɛ nɛ gbe ni'fɛl bo.»

<sup>29</sup> «Ninbi \*Yiko ya wɔnwɔknɔ nin \*Farisienmbɛ, iɲuɔn ilele ya nibɛ, nɪ bre ni'bo, kimɛ ni meh \*Uwien ya nɔbonsɔknɔ bà là te uyo bo nnɔ ya kul nɛ, ki mɔngreh binimɔnb ya kul, <sup>30</sup> nɛ ki lienh ki teh: «Ti bi là te ti'yaajɛb ya yo la, ta bi li tuo tinbi nin bɛn nɪ kpaan buɲɔbu kí ku \*Uwien ya nɔbonsɔknɔ.» <sup>31</sup> Ni lienh nà nnɔ nɛ wɔngɛh ki teh ni yé binib bà là ku' \*Uwien ya nɔbonsɔknɔ nnɔ ya yaabii. <sup>32</sup> Ni'yaajɛb là sɔn' itùonbiɛɛ yà nnɔ, sɔn mɛn kí tonde yè. <sup>33</sup> Iwɛ ninbi, ni yé iwaalɛb nɛ, ni li tien mila kí nɛ utudɛɛ wà li tu nɛ umu wà nɛ nɪ kpiin ni? <sup>34</sup> Nɛn bo nɛ n li sɔn \*biɲnɔbonsɔknɔ nin biyɛnfɔdɛnb nin \*Yiko ya wɔnwɔknɔ ni'saan. Ni li ku biba, kí kpɛ bitɔb idɔpɔnpɔn bo, kí nɪ bitɔb mɔ inalɛbe ni'táan ya dur ni, kí li tuɔnh idu ki jɛndeh bɛ. <sup>35</sup> Nɛn nɛ cɛɛrɛ' Uwien li dɛɛrɛ ni'tub binib bà bi là ku' bɛ ba bii' niba nnɔ kɛ bo, kí cin unimɔn Abɛl, ki tɪ baa' Baraki ya bijɛ Sakari, wà ni là ku' wɔ Uwien ya duku ya dubenku nin Uwien ya ponpuol ya sɛsɛkɛ nnɔ. <sup>36</sup> N tɔkɛh nɛ imɔn nɛ, Uwien li dɛɛrɛ fɛnfɛnnɔ ya nib ya tub tibont nnɔ kɛ bo.»

### *Yesu kpɪɛndɛh Yerusalem bo*

*(Luk 13:34-35)*

<sup>37</sup> Nɛ ki ye: «Yerusalem, Yerusalem, a kuuleh \*Uwien ya nɔbonsɔknɔ, ki yèkreh u sɔnh binib bà a'saan itɛn ki kuuleh bɛ. Uyo kɛ n là yíe nɪ taan a'nib n'ba saan tɛn ukuoɲɔ taakeh u'bumu u'fɛbe ni ma bo, nɛ ba tuo'. <sup>38</sup> Liike mɛn Uwien sɛln' nɛ ni'kɔnkuɔn ma. <sup>39</sup> N tɔkɛh nɛ nɛ, na ji li lɛ nni kí tɪ baa uyo wà ni li len ki ye: «Uwien ya mɔnm nɪ li te wà we nɪ Yonbdaan ya yel bo nnɔ bo.» »

## 24

### *Bi lá li bere Uwien ya duku*

*(Mark 13:1-2; Luk 21:5-6)*

<sup>1</sup> \*Yesu siere' Uwien ya duku ya luo bo ki nɛn' ki joh, nɛ u'panpaankaab nɛkn' wɔ ki wuɔn' wɔ bi mɛn' Uwien ya duku ma bo. <sup>2</sup> Nɛ u ye: «Ni laa' tibont tuu kɛ-a? N tɔkɛh nɛ imɔn nɛ, kuduku kuu nɔ ya tɛnl liba mɔnɔn nɛ lá li juore kí li pɛ tɔl bo, bi lá li bere ku'kɛ nɛ.»

### *Ijɛnd ya yo lá li te ma bo*

*(Mark 13:3-13; Luk 21:7-19)*

<sup>3</sup> Yesu jon' ki tɪ kɛlɛ' Olifi ya siin ya juɔl bo, nɛ u'panpaankaab baa' u'saan bi'baba, ki lá niire' wɔ ki ye: «Tɔkɛ tɛ, tibont nnɔ kɛ lá li tien uyo wà. Ku lɛ dɛkɛ ba li wuɔn tɛ kí ye nɪ kpaan' a'babaayo nin uɲɛndun ya gbenm-i?» <sup>4</sup> Nɛ u jiin' bɛ ki ye: «Li bɛn mɛn, ki la cɛɛrɛ uba nɪ tuln nɛ. <sup>5</sup> Kimɛ binib lá li baa ki yɛbe, kí li nɲmɔbe n'yel ki teh bi yé Uwien ya Nigɛndkɛ Kristo nɛ, kí tuln binib bi yɛbe. <sup>6</sup> Ni li cii binib tɔh lituɔl kɔnkɔnm bii fɔnfɔkm. Cuo mɛn ni'ba, ki la cɛɛrɛ ni'fɛl nɪ li tiinh, kimɛ ti ya bont kɛ li tien nɛ kí yaan, na laan

yé gbengbenyo. <sup>7</sup> Linibol liba li jèke linibotól. Libel liba ya nib mǎ li jèke libetól yaab. Mikònm li lu idu ya yebe ni, kitink li jènge bùól, bùól. <sup>8</sup> Nèn ke li te ten imerwien ya cincinm nè.

<sup>9</sup> «U ya yo nè bi lá li cuo nè, kí jènde nè, kí ku nè. Min bo nè inibol ke li nèn nè. <sup>10</sup> U ya yo nè binib bà yebe li wiè n'sen, kí li kuòreh tǎb, kí li nèn tǎb. <sup>11</sup> Bitonnennǎbonsǎknb li baa kí yebe kí lere binib bi yebe. <sup>12</sup> Itùonbiere li yebreh kí joh nè. Nèn nè li cère binib bà yebe ya yíem ní waake. <sup>13</sup> Ama wà ke li mìnde kí li ñmǎñmǎbe kí tí fǎre nnǎ, wǎn nè li ñmère. <sup>14</sup> Bi li kpaande \*Uwien ya bel ya gbemǎnmǎnt tuu unjendun ke ni inibol ke ní cii, nè kí yaan unjendun ní gben.»

*Nibonn ná ñmǎbe ijuǎke ya gber*

*(Mark 13:14-23; Luk 21:20-24)*

<sup>15</sup> «Tǎ, ni li lè ijuǎke ya bonn ná saah tibont tǎ ke mǎn nnǎ se Uwien ya duku ya dubenku ni ten \*Uwien ya ñǎbonsǎknl Daniél là len' nibonn nnǎ bo ma bo.» (Wà ke kǎanh la, wǎ ní li ciìh ní'tingi.) <sup>16</sup> Uyo nnǎ lá baa' la, binib bà te Sude ya tinfenm ni nnǎ, be ní sen kí jo ijuǎn bó. <sup>17</sup> Wà te kudulekaaku ya paaki la, u la jiiire kí kǎ iden ni, kí taa niba. <sup>18</sup> Wà mǎ te ikpǎan bó la, u la ji ní liebe kí kun, wǎ ní tí taa u'liergbenku. <sup>19</sup> U ya yo bipiib bà punbe nin bà ñmǎbe mubumu mùa ñaanh, li ñmǎbe micècèkm nè. <sup>20</sup> Li kǎareh mèn, Uwien la cère ní sen kusenañuǎku bii \*Saba ya daali. <sup>21</sup> Kimè binib li ji ijend kí gbien. Haali unjendun ya cincinm, kí lá baa fenfenm, nib ña laan jin' i ya jend ya bol, ka ji lí li ji yè fiebu. <sup>22</sup> Uwien ña bi kùore' ijend nnǎ ya wien bo la, uba mǎnǎn ña bi li ñmère. U gènde' binib bà nnǎ bo nè cère' u kùore' iwien nnǎ bo.

<sup>23</sup> «U ya yo unil tǎke' nè kí ye: «Liike mèn, \*Uwien ya Nigèndke Kristo te niè saan» bii, «u te niè bó» la, ni la tuo. <sup>24</sup> Kimè bitonnennmǎnkunb li baa. Biba li ye bi yé Uwien ya Nigèndke Kristo nè. Bitǎb li ye bi yé \*Uwien ya ñǎbonsǎknb nè. Bi li tien micincilm ya bont nin miyǎkm ya bont, kí tuln binib. Bi li nuunh ní tuo' la, be ní tuln Uwien gènde' binib bà nnǎ mǎnǎn nè. <sup>25</sup> Li ben mèn, n kpiè' kí tǎke' nè tigber nnǎ ñǎ.

<sup>26</sup> «Nèn bo, bi tǎke' nè kí ye: «Liike mèn \*Kristo te kupenpelku ni» la, la jo mèn. Bi tí tǎke' nè kí ye: «U buǎ niè saan» la, la teke mèn kí ji. <sup>27</sup> Utèmeknde ñeh lenpuoli bó kí tí bàareh nintuǎli bó ma bo nnǎ, Unil ya Bijè ya baam mǎ lá li te nnǎ nè. <sup>28</sup> «Liwènkpil te ná saan la, inenyobl taakeh nèn saan nè.»

*Unil ya Bijè ya baam ya gber*

*(Mark 13:24-27; Luk 21:25-28)*

<sup>29</sup> «I ya den ya jend gèbre' la, i ya tǎan bo, «uwien li biike, unjmaal ña ji li wien, injmaabii li cecere kí lu, tibont tǎ ñmǎbe mituǎm paaki bó li jènge.»

<sup>30</sup> U ya yo bi li lè Unil ya Bijè ya ñièku te paaki bó ní. Nè inibol yà ke te utingben bo nnǎ ní muǎ kí kpiende. Bi li lè \*Unil ya Bijè te titewǎlgbǎnt ni kí we ní, kí ñmǎbe ukpíeke nin ufaa kí gbien'. <sup>31</sup> Linatunciènl li muǎ uyo wà nnǎ, u li sǎn u'tonsǎnb Uwien ya tondb be ní jo lenpuoli nin nintuǎli nin ugen nin ujie bó, kí cin utingbaan uba kí tí baa utǎ, kí taan Uwien gènde' binib bà nnǎ ke.»

*Bukenkenbu ya kpenjenm*

*(Mark 13:28-31; Luk 21:29-33)*

<sup>32</sup> «Bukenkenbu ya tetem yé mikpenjenm nè ní'bo. Ni lá laa' bù tǎh isigben kí teh tifer la, ni ben kí ye ní neke uñalend nè.\* <sup>33</sup> Nnǎ nè, ni lá laa' nèn ke la, ní li ben kí ye \*Unil ya Bijè nek'n' ní'nañuǎn saan ñǎ†. <sup>34</sup> N tǎkeh nè imǎn nè, tibont nnǎ ke li tien kí lè fenfenm ya

\* 24:32 Sufmbè donbó ya kenkende teh nnǎ nè. † 24:33 Bi li fre kí lèbre Unil ya Bijè nek'n' ní'nañuǎn saan ñǎ kí yé ná li tien nnǎ ya yo baa' ñǎ, ní li tien nè.

nib bie ɲa laan kpo' ki gben'. <sup>35</sup> Kutaaku nin kitink li gben. Ama n'gber tun ɲa ɲmɔbe tũ rĩ gben.»

*Uba ɲa ben lidaali là Unil ya Bijɛ li baa ni*  
(Mark 13:32-37; Luk 17:26-30, 34-36)

<sup>36</sup> «Ama uba ɲa ben tibont nnɔ li tien lidaali là bii uyo wà. Paaki bó, Uwien ya tondɔ ɲa ben. U'Bijɛ mɔ ɲa ben, Uwien Baa baba nɛ ben. <sup>37</sup> \*Nowe ya yo là te ma bo nnɔ, Unil ya Bijɛ ya baam mɔ lá li te nnɔ nɛ. <sup>38</sup> Nowe ya yo, uyo wà miwuɔm ɲa laan là jin' kitink nnɔ, binib là jinh nɛ ki ñuh, bijɛb kuɔndeh bipiib, bipiib mɔ kunh ticɛr, ki tĩ baa' lidaali là Nowe kɔn' buñɛrcienbu. <sup>39</sup> Ba là ben ki ye niba li tien bɛ, ki tĩ baa' uyo wà miwuɔm kun' nin bi'kɛ. Uyo wà Unil ya Bijɛ lá li baa ní nnɔ, nĩ li te nnɔ nɛ. <sup>40</sup> U ya yo, bijɛb bile li bɔ bukpaabu ni, bi li taa uba kí dɔan utɔ. <sup>41</sup> Bipiib bile li nàanh unɛgɔn uba bo, bi li taa uba kí dɔan utɔ. <sup>42</sup> Nɛn bo, la gɔh mɛn, kimɛ na ben lidaali là Yonbdaan li baa ní. <sup>43</sup> Ni ben ki ye ududaan bi ben uyo wà unasu li baa la, wa bi li dɔ ki gɔh, u bi li kɛ ki gu nɛ nasu la kɔ u'den. <sup>44</sup> Nɛn bo, ni'mɔ rĩ bonde kí li gu, kimɛ uyo wà na maaleh ki teh Unil ya Bijɛ li baa ní nnɔ, u ya yo nɛ u li baa ní.»

*Utonsɔnl wà mɔn nin wà bre ya gber*  
(Luk 12:41-48)

<sup>45</sup> «U ɛ tonsɔnl ba nɛ ɲmɔbe mibɛnm u'cɛnbaa du u'bo? Wɔn si: wà ya cɛnbaa de' wɔ ticiɛnt wɔ rĩ li likeh u'den yaab, kí li loh bɛ tijier uyo wà nĩ kpɛ nɛ. <sup>46</sup> Utonsɔnl nnɔ ya cɛnbaa baa' ki laa' u sɔnh lituonl nnɔ li'donbó la, Uwien ya mɔnm li te utonsɔnl bugben bo. <sup>47</sup> N tɔkeh nɛ imɔn nɛ, u'cɛnbaa li de wɔ ticiɛnt wɔ rĩ li likeh u'bont kɛ. <sup>48</sup> Ama utonsɔnl nnɔ bre la, u li maale u'fɛl ni kí ye u'cɛnbaa li wuɔke, <sup>49</sup> nɛ kí cin kí li ñih u'tonsɔntɔb, ki pɛ bidɛyib bo, ki jinh, ki ñuh. <sup>50</sup> Utonsɔnl nnɔ ya cɛnbaa li baa ní lidaali là nin uyo wà wa maaleh ki teh u li baa ní. <sup>51</sup> U li bien u'gbenɛnt cɛɛn kí cɛrɛ wɔ rĩ ɛ ñuɔn ilele ya nib li ɛ utudɛrɛ wà nnɔ. Nɛn saan nɛ u li te ki muɔh, ki ɲmɔnh iñɔgben.»

## 25

*Bijɛfɛnb piik ya kpɛnɛnm*

<sup>1</sup> «Tɔ, Uwien ya bɛl li naan bijɛfɛnb piik bà taa' bi'fr, bɛ rĩ tĩ tuobe wà ɲmɔbe upiikuɔn nnɔ usɛn bó nɛ.\* <sup>2</sup> Bi'ni biɲun yɛ ijɔr, nɛ biɲun mɔ yɛ biceknɔ. <sup>3</sup> Ijɔr nnɔ taa' bi'fr, ka tuke kpɔm. <sup>4</sup> Biceknɔ nnɔ taa' bi'fr, ki tuke mikpɔm mɔ ki kpaabe. <sup>5</sup> Piicɛ nnɔ wuɔke' ma nnɔ, migùɔnm cuo' bɛ nɛ bi gùɔn'.

<sup>6</sup> «Kuɔyɔku ya siik, nɛ bi cii' bi wuureh ufaa bo ki teh: <Liike mɛn, piicɛ nɛkn' ní ɲɔ. Nɛ mɛn kí tuobe wɔ usɛn bó.> <sup>7</sup> Nɛ bijɛfɛnb piik nnɔ kɛ finde', ki bondeh bi'fr. <sup>8</sup> Nɛn saan nɛ ijɔr iɲun nnɔ tɔke' biceknɔ biɲun nnɔ ki ye: <Pu tɛ mɛn mikpɔm, ti'fr benh yɛ rĩ kpiin nɛ.> <sup>9</sup> Nɛ biceknɔ nnɔ ye: <Nĩ yɛ fɛnm! Ti'kpɔm ɲa rĩ baa tinbi nin ninbi kɛ. Li joh mɛn bà kuɔreh mikpɔm saan kí tĩ dɛ.> <sup>10</sup> Bi bure' bɛ rĩ tĩ dɛ, nɛ piicɛ baa' ní. Nɛ biceknɔ biɲun bà bonde' nnɔ paan' piicɛ nnɔ bo, ki kɔn' bi teh nà saan upiikuɔn nnɔ, nɛ bi piin'.

<sup>11</sup> «Tɔ, ijɔr nnɔ mɔ lá baa' ní, nɛ ki ye: <Cɛnbaa, Cɛnbaa, piire tí kɔ.> <sup>12</sup> Nɛ u tɔke' bɛ ki ye: <N tɔkeh nɛ imɔn nɛ, ma ben nɛ.>

<sup>13</sup> «Nɛn bo, la gɔh mɛn! Kimɛ na ben lidaali là bii uyo wà nɛ.»

*Bitonsɔnb bita ya kpɛnɛnm*  
(Luk 19:11-27)

<sup>14</sup> «\*Uwien ya bɛl tĩ naan ujɛ wà joh usɛn, ki yin' u'tonsɔnb ki taa' u'faal ki de' bɛ nnɔ nɛ. <sup>15</sup> U taa' milikbim itur iɲun ki de' uba, ki taa' itur ile ki de' utɔ, ki taa' liturl liba ki de' utɔ mɔ. U de' bi'kɛ bi li fre kí sɔn ma bo nɛ, nɛ ki pɔk ki siere' ki bure'. <sup>16</sup> Wà teke' itur iɲun nnɔ, i ya tɔan bo nɛ u tien' ukpenkpende, ki laa' kpɛle itur iɲun ki pukn'. <sup>17</sup> Wà teke' itur

\* 25:1 Uyo bo, \*Sufmɛ ya piikuɔndaali, piicɛ nin u'yul nɛ là tĩ rĩ jo kí taa u'jekpen kí tĩ kuɔn.

ile nnɔ mɔ tien' ukpenkpende ki laa' kpɛle itur ile ki pukn'. <sup>18</sup> Ama wà teke' liturl liba nnɔ jon' ki tì gbin' kubùoku, nɛ ki taa' u'cɛnbaa ya likbim nnɔ ki subn'.

<sup>19</sup> «Nì tete, nɛ bitonsɔnb nnɔ ya cɛnbaa lá liɛbe' ní, ki yíe wɔ rí bɛnde u'faal kpɛ ma bi'saan. <sup>20</sup> Nɛ utonsɔnl wà là teke' itur injun nnɔ tuke' ní, itur injun ki pukn', ki lá tɔke' wɔ ki ye: «Cɛnbaa, a là de' nni itur injun nɛ. Liike, n'mɔ tien' ukpenkpende ki laa' kpɛle itur injun ki pukn', yin sɔ.» <sup>21</sup> Nɛ u'cɛnbaa ye: «Nì mɔn, a yé utonsɔnmɔnmɔn nɛ, ki sɔn' lituonl mɔnmɔnm. A tien' mɔnmɔnm tibont tà waa ni. N li tien nɛ tibont tà yebe ya cɛn. Dɛn kí li poknh nin nni.» <sup>22</sup> Nɛ utonsɔnl wà là teke' itur ile nnɔ mɔ tuke' ní, ki lá tɔke' wɔ ki ye: «Cɛnbaa, a là de' nni itur ile nɛ. Liike, n'mɔ tien' ukpenkpende ki laa' kpɛle itur ile ki pukn', yin sɔ.» <sup>23</sup> Nɛ u'cɛnbaa ye: «Nì mɔn, a yé utonsɔnmɔnmɔn nɛ, ki sɔn' lituonl mɔnmɔnm. A tien' mɔnmɔnm tibont tà waa ni. N li tien nɛ tibont tà yebe ya cɛn. Dɛn kí li poknh nin nni.» <sup>24</sup> Nɛ utonsɔnl wà là teke' liturl liba nnɔ mɔ tuke' ní, ki lá tɔke' wɔ ki ye: «Cɛnbaa, n bɛn a'bó a'gbɛr faa nɛ. Nja bule' nà saan la, a ceh nɛn saan nɛ. Nja cokn' nà saan la, a woreh nɛn saan nɛ. <sup>25</sup> Nɛn nɛ cèrɛ' n sɛn' bujɛwaanbu, ki taa' a'likbim, ki gbin' kubùoku ki subn'. Liike, a'likbim sɔ.» <sup>26</sup> Nɛ u'cɛnbaa ye: «Utonsɔnbierɔ sin, ukpaayun sin, a len' ki ye a bɛn n'bó, ki ye ma bule' nà saan la, n ceh nɛn saan nɛ, ma cokn' nà saan la, n woreh nɛn saan nɛ. <sup>27</sup> A bɛn nnɔ ma nnɔ, bɛ tien' nja nín taa' n'likbim ki tì ble' banki nɔ n lá baa ní la, rí lɛ n'likbim nin kpɛle kí pukn-i?» <sup>28</sup> Nɛ ki ye: «Fie mɛn u'turl liba nnɔ, kí taa kí pukn wà nɔmɔbe itur piik nnɔ. <sup>29</sup> Kime wà kɛ nɔmɔbe la, bi li pukn wɔn nɛ, wɔ rí li nɔmɔbe ki gbien'. Wà nja nɔmɔbe la, bi li tonde kí fie u nɔmɔbe nà waamu nnɔ mɔnɔn nɛ. <sup>30</sup> Utonsɔnbierɔ wuɔ wɔn, wa nɔmɔbe kpɛle; nɛn wɔ mɛn kí tì wie saali licinɔunl ni. Nɛn saan nɛ u li te ki muɔh, ki nɔmɔnh iɔgbɛn.» »

### *Unil ya Bijɛ li bu binib tibuur*

<sup>31</sup> «\*Unil ya Bijɛ li baa ní, ki li tɔke nin Uwien ya tondb kɛ. U ya yo nɛ u li nɔmɔbe ukpieke ki gbien', kí kɛle u'berbiɛk bo tɛn ubɛrciɛn. <sup>32</sup> Bi li taan unɛndun ya nib kɛ u'nun bó, nɛ wɔ rí bore bɛ tɛn upekpaal boreh ipe nin iwɔb ma bo, <sup>33</sup> kí taa ipe kí jon n'nojie bó, kí taa iwɔb kí jon u'nɔgɛn bó. <sup>34</sup> Nɛn saan nɛ ubɛrciɛn li tɔke bà te u'nojie bó nnɔ kí ye: «Ninbi bà n'Baa tien' nɛ u'mɔnm nnɔ, dɛn mɛn kí lá ji libɛl là u là bonde' lɛ ki ble' nɛ haali unɛndun ya cincinm nnɔ. <sup>35</sup> Kime mikɔnm là cuo' nni, nɛ ni de' nni tijier n jin'. Uɔuɔun là cuo' nni, nɛ ni de' nni miɔunm n nɔun'. N là yé ucaan, nɛ ni teke' nni. <sup>36</sup> N là te liɔil, nɛ ni de' nni tiwɛngolkaar n gole'. N là bun, nɛ ni baa' ki lá fuonde' nni. N là te lipɛkl ni, nɛ ni baa' n'saan.» <sup>37</sup> Nɛ binimɔnb nnɔ li niire nni kí ye: «Yonbdaan, u lɛ yo ba nɛ ti là laa' nɛ mikɔnm nɔmɔbe nɛ, ti de' nɛ a jin'-i? Ki laa' nɛ uɔuɔun nɔmɔbe nɛ, ti de' nɛ a nɔun'-i? <sup>38</sup> Ki laa' nɛ a yé ucaan, ti teke' nɛ? Ki laa' nɛ a te liɔil, ti de' nɛ tiwɛngolkaar a gole'? <sup>39</sup> Ki laa' nɛ a bun bii a te lipɛkl ni, ti baa' ki lá fuonde' nɛ?» <sup>40</sup> Nɛ ubɛrciɛn li jiin bɛ kí ye: «N tɔkeh nɛ imɔn nɛ, ni là tien' nnɔ ki de' n'yaab ibaan nnɔ ma nnɔ, ni tien' ki de' min nɛ.»

<sup>41</sup> «Nɛ kí tɔke bà te n'ɔgɛn bó nnɔ kí ye: «Ninbi bà Uwien wie' nɛ miɔunm nnɔ, jɛnde mɛn n'saan, kí tì kɔ Uwien sèrɛ' umu wà wa rí kpiin, ki ble' usɛnpol nin u'tondb nnɔ ni. <sup>42</sup> Kime mikɔnm là cuo' nni, nɛ na de' nni jier n jin'. Uɔuɔun là cuo' nni, nɛ na de' nni nɔunm n nɔun'. <sup>43</sup> N là yé ucaan, nɛ na teke' nni. N là te liɔil, nɛ na de' nni wɛngolkaar n gole'. N là bun bii n là te lipɛkl ni, nɛ na baa' ki lá fuonde' nni.» <sup>44</sup> Nɛ bi'mɔ li niire nni kí ye: «Yonbdaan, u lɛ yo ba nɛ ti là laa' nɛ, mikɔnm nɔmɔbe nɛ bii uɔuɔun nɔmɔbe nɛ bii a yé ucaan bii a te liɔil bii a bun bii a te lipɛkl ni, nɛ ta tore' nɛ?» <sup>45</sup> Nɛ n li jiin bi'mɔ kí ye: «N tɔkeh nɛ imɔn nɛ, na là tore' n'yaab ibaan nnɔ ma nnɔ, na tore' min nɛ.» <sup>46</sup> Bi li lɛ utudɛrɛ wà nja nɔmɔbe gbenm. Ama binimɔnb nnɔ bɛn li lɛ limiel là nja nɔmɔbe gbenm nɛ.»

## 26

*Bi kpaan' iyɛ bɛ rí ku Yesu*

*(Mark 14:1-2; Luk 22:1-2; San 11:45-53)*

<sup>1</sup> Uyo wà \*Yesu len' ni'ke ki ti gben' nnò nɛ ki tɔke' u'panpaankaab ki ye: <sup>2</sup> «Ni ben ki ye iwien ile gèbre' la, tinbi Sufmbɛ li jele ti'Pak ya nacenku. U ya yo nɛ bi li taa Unil ya Bijɛ kɪ ɲukn binib, bɛ rɪ tɪ kpɛ wɔ udɔpɔnpɔn bo.»

<sup>3</sup> Tɔ, bitɔtuɔrcienb nin Sufmbɛ ya cienb taan' bitɔtuɔrcienb ya cien Kayif den u luo bo <sup>4</sup>ki kpaan' iyɛ ki ye bi li bɔle nɛ kɪ cuo Yesu, kɪ ku wɔ. <sup>5</sup> Nɛ ki tɔkeh tɔb ki teh: «Ti la cuo wɔ mɛn kunacenku nnò ya yo. Ti cuo' wɔ u ya yo la, udu ya nib li kpɛ.»

### *Upii uba wule' Yesu ya yul bo lɛfina*

*(Mark 14:3-9; San 12:1-8)*

<sup>6</sup> \*Yesu là te Betani ya du ni, Simɔn, ujend den. <sup>7</sup> U jinh uyo wà nnò nɛ upii uba kɔn' nɪ ki tuke lɛfina uba u'daaku faa cɛɛn alabaat\* ya dingl ni, bi yih lɛfina nnò naar. Upii nnò taa' lɛfina nnò kɛ ki wuwule' \*Yesu ya yul bo. <sup>8</sup> U'panpaankaab laa' nnò ma nnò nɛ bi'benku ni ben', nɛ bi ye: «Bɛ tien' u n'ènde' lɛfina wuɔ nɔ? <sup>9</sup> Ti bi li fre kɪ kuɔre wɔ kɪ lɛ ilike yɪ rɪ li yɛbe kɪ taa kɪ de bijiinb-a!»

<sup>10</sup> \*Yesu bɛnde' bi lienh nà bo, nɛ ki tɔke' bɛ ki ye: «Bɛ tien' ni ɲaabeh upii wuɔ ya yɛnm nɔ nnò? U tien' nni nà mɔn nɛ. <sup>11</sup> Bijiinb li li te ni'saan uyo kɛ nɛ; ama min ɲa rɪ li te ni'saan uyo kɛ. <sup>12</sup> U taa' lɛfina wuɔ ki wule' n'gbɛnɛnt bo ma nnò, u bonde' n'subm nɛ. <sup>13</sup> N tɔkeh nɛ imɔn nɛ, bi li kpaande tigbɛmɔnmɔnt tuu uɲɛndun ni nà saan kɛ nnò, bi li len u tien' nà nɔ bó, ɲɔ binib rɪ li tien' u'bó.»

### *Sudas yɛ wɔ rɪ kuɔre Yesu*

*(Mark 14:10-11; Luk 22:3-6)*

<sup>14</sup> \*Yesu ya panpaankaab piik nin bile ya uba, bi yih wà Sudas Iskariyɔt nnò jon' \*bitɔtuɔrcienb saan, <sup>15</sup> ki ti niire' bɛ ki ye: «N taa' \*Yesu ki ɲukn' nɛ la, ni li de nni ba?» Nɛ bi kaan' ilike ya kur pita ki de' wɔ. <sup>16</sup> Nɛn daali nɛ u cin' ki nuunh u li n'ɛ isɛn yà kɪ taa \*Yesu kɪ ɲukn bɛ.

### *Yesu nin u'panpaankaab jele' Pak ya nacenku*

*(Mark 14:12-21; Luk 22:7-14, 21-23; San 13:21-30)*

<sup>17</sup> Kpɔnɔ wà ɲa ɲmɔbe n'ɔke ya nacenku ya cincindaali, nɛ \*Yesu ya panpaankaab nɛkn' wɔ ki niire' wɔ ki ye: «A yɛ tɪ tien ɲɛ Pak ya nacenku ya jier lɛ saan-i?» <sup>18</sup> Nɛ u jiin' bɛ ki ye: «Nɪ jo udu bó udaan uba saan, kɪ tɪ tɔke wɔ ki ye: «Ti'cɛnbaa ye u'yo baa'-a, wɔn nin u'panpaankaab li baa kɪ lá ji Pak ya nacenku ya jier a ya den nɛ.» » <sup>19</sup> Nɛ u'panpaankaab tien' u tɔke' bɛ ma bo, nɛ ki tien' kunacenku nnò ya jier.

<sup>20</sup> Nɪ juɔre' nɛ \*Yesu nin u'panpaankaab piik nin bile nnò kɛle' ki jinh. <sup>21</sup> Bi jinh uyo wà nnò, nɛ u tɔke' bɛ ki ye: «N tɔkeh nɛ imɔn nɛ, ni'ni uba li kuɔre nni.» <sup>22</sup> Bi'yɛnm saa' ki gbien', nɛ bi'ke niireh wɔ jɛjɛ ki teh: «Yonbdaan, n teh min ɲa n'í-a?» <sup>23</sup> Nɛ u ye: «Min nin wà taan' ki paan' lisɛnl ni nɔ nɛ li kuɔre nni. <sup>24</sup> Unil ya Bijɛ li kpo tɛn nɪ kɛle' u'bo \*Uwien ya gbɔnku ni ki ye ma bo nnò nɛ. Ama unil wà li kuɔre wɔ nnò, nɪ bre udaan bo. Ba bi maa' wɔ mɔnɔn la, nɪ bi li tu.» <sup>25</sup> Nɛ Sudas wà li kuɔre wɔ nnò mɔ niire' wɔ ki ye: «Cɛnbaa, n teh min ɲa n'í-a?» Nɛ \*Yesu ye: «A ye nnò.»

### *Yonbdaan ya jier*

*(Mark 14:22-26; Luk 22:14-20; 1 Korɛnt 11:23-25)*

<sup>26</sup> Bi te ki jinh tijier ma nnò, nɛ \*Yesu yuure' kpɔnɔ, ki faare' Uwien, ki kɔkuɔ', ki taa' ki de' bɛ, ki ye: «Teke mɛn kɪ ɲmɔn, nà sɔ yɛ n'gbɛnɛnt.» <sup>27</sup> Nɛ ki taa' midaam mɔ, ki faare' Uwien, ki taa' ki de' bɛ, ki ye: «Ni'ke rɪ n'ɪu mɛn, <sup>28</sup> nà sɔ yɛ n'sɛm. Mɛn nɛ wɔngɛh ki teh Uwien cuo' nin binib kujɔtieku. Mi li puube binib bà yɛbe ya kpɛle bo ɲɔ Uwien rɪ fɛre bɛ bi'biere. <sup>29</sup> N tɔkeh nɛ nɛ, ma ji li faa kɪ n'ɪu daam†, haali kɪ tɪ baa lidaali là min nin ninbi li liɛbe kɪ taan kɪ n'ɪu mɛ midɛfɛnm n'Baa ya bɛl ni.»

<sup>30</sup> Bi gɛn' Uwien ya yuon ki gben', nɛ ki n'ɛn' ki don' Olifi ya siin ya juɔl bo.

\* 26:7 Alabaat yɛ litɛnl liba ya bol nɛ li'daaku faa cɛɛn. † 26:29 Midaam nnò yɛ isibii ya daam mà bi yih mɛ fɛn nnò nɛ.



*Yesu tōke' Pier ki ye u li niε kī ye wa ben wō*  
(Mark 14:27-31; Luk 22:31-34; San 13:36-38)

<sup>31</sup> Tō, \*Yesu tōke' u'panpaankaab ki ye: «Kuñonku kuu nō, nà li tu nni nnō li cère ni'ke' ní sen kí dāan nni, kimε ní kele' \*Uwien ya gbōnku ni ki ye: «N li ku upekpaal, nε upepeke ke' ní yere.» <sup>32</sup> Ama uyo wà n li mekre bitenkpiib ni nnō, n li liere nε kí jo Galile.» <sup>33</sup> Nε Pier tōke' wō ki ye: «Nà li tu ηε nnō li cère bi'ke' ní sen kí dāan ηε mōnōn la, min ηa ní sen kí dāan ηε fiebu.» <sup>34</sup> Nε \*Yesu ye: «N tōkeh ηε imōn nε, kuñonku kuu, a li niε bolm mita kí ye ηa ben nni nε kí yaan ukuoje' ní muō.» <sup>35</sup> Nε Pier ye: «Haali bi li ku min nin sin ke mōnōn la, ma ní niε kí ye ma ben ηε.» Nε u'panpaankaab ke mō len' nnō.

*Yesu kàare' niba saan bi yih nè Getsemani*  
(Mark 14:32-42; Luk 22:39-46)

<sup>36</sup> Tō, \*Yesu nin u'panpaankaab tī baa' niba saan, bi yih nè Getsemani. Nε u tōke' be ki ye: «Juore mēn niε saan, ní jende kí tī kàare.» <sup>37</sup> Nε ki taa' Pier nin Sebede ya bijieβ bile ki bure'. Bujewaambu cin' ki kōh wō nε u'yēnm saah, <sup>38</sup> nε u tōke' be ki ye: «N'yēnm saa' ki tī kende' ten mikuum nε benh nin nni. Ní'mō ní juore niε saan, ki la gōh.»

<sup>39</sup> U jende' waamu, nε ki pūon', ki kàareh ki teh: «O, n'Baa, nī tuo' la, á cère ijend yie ní jende nni. Ama la cère nē ní li yé min yie ma bo, cère nē ní li yé sin yie ma bo.»

<sup>40</sup> U liebe' ní u'panpaankaab bita nnō saan, ki laa' bi dō ki gōh nε, nε u tōke' Pier ki ye: «O! Na ní fre kí la gūōn kukurku kuba mōnōn-ii? <sup>41</sup> La gōh mēn, kí li kàareh ηō ki la lu biikm ni. Ní'yēnm yie, ama mituōm nε pōre' nε.»

<sup>42</sup> Nε ki tí jende' waamu, ki kàare' nle bo ki ye: «O, n'Baa, na ní tuo á jende n'saan ijend yie nō la, cère a'yiem ní tien.» <sup>43</sup> U tí liebe' ní u'panpaankaab bita nnō saan, ki laa' bi tí gōh nε, kimε migūōnm nε nōnde' be.

<sup>44</sup> Nε u dāan' be, ki tí jende' waamu, nε ki kàare' nta bo nin i ya nōbonbaab. <sup>45</sup> U tí liebe' ní u'panpaankaab nnō saan, nε ki tōke' be ki ye: «Ni bie ki fuoreh nε ki gōh-a! Uyo nēkn' ní ηō! Bi li taa Unil ya Bijε kí ηukn bibiērdēnb. <sup>46</sup> Fii mēn tí jo. Liike mēn, wà kuōre' nni nnō nēkn' ní ηō.»

*Yesu ya cuom*  
(Mark 14:43-50; Luk 22:47-53; San 18:3-12)

<sup>47</sup> U laan bie ki lienh nε Sudas u'panpaankaab piik nin bile nnō ya uba baa' ní nin linigociēnl bi tuke mujusiemu nin ilēnbēn. Bitōtuōrciēnb nin Sufmbε ya ciēnb nε sōn' be ní. <sup>48</sup> Sudas wà kuōre' \*Yesu nnō tōke' linigol nnō ki ye: «Ni lá laa' n jon' ki tī lōkn' wà la, wōn nīnō, ní cuo wō.»

<sup>49</sup> U pōk ki cuon' ki nēkn' Yesu, nε ki ye: «Cēnbaa, n fuondeh ηε,» nε ki lōkn' wō. <sup>50</sup> Nε \*Yesu tōke' wō ki ye: «N'jō, tien a baa' á tien nà.»

Nēn saan nε binib nnō nēkn' ki lá cuo' Yesu. <sup>51</sup> Bà te Yesu saan nnō ya uba nēre' u'jusiek ki ge' ki paare' bitōtuōrciēnb ya ciēn ya tonsōnl uba ya tubl. <sup>52</sup> Nε \*Yesu tōke' wō ki ye: «jiin a'jusiek nnō kí cūōn ki'tuōku ni, kimε wà ke kuuleh nin kijusiek la, kijusiek nε li ku u'mō. <sup>53</sup> Na ben ki ye n miε' n'Baa Uwien la, u li sōn ní u'tondb icēk icēk piik nin ile n'saan fēnfēnnō-ō?‡ <sup>54</sup> N tien' nnō la, nà kele' \*Uwien ya gbōnku ni nnō li tien mila kí tien-i?»

<sup>55</sup> Nēn saan nε u tōke' linigol nnō ki ye: «Ni tuke mujusiemu nin ilēnbēn ní lá cuo nni ten n yé udukond nε-a! N là kaah idaan ke \*Uwien ya duku ya luo bo ki wōknh binib, nε na cuo' nni u ya yo. <sup>56</sup> Nēn ke tien' ηō \*Uwien ya nōbonsōknb là kele' nà \*Uwien ya gbōnku ni nnō nē ní tien nε.»

Nēn saan nε u'panpaankaab ke sēn' ki dāan' wō.

*Sufmbε ya buur ya cēklyaab bun' Yesu tibuur*  
(Mark 14:53-65; Luk 22:54-55, 63-71; San 18:13-14, 19-24)

‡ 26:53 Erom ya sojacēkl liba ya sojambe là li baa ten itur iluob.

<sup>57</sup> Binib bà cuo' \*Yesu nnɔ taa' wɔ ki jon' bitɔtuɔrciɛnb ya ciɛn Kayif den, \*Yiko ya wɔnwɔknɔ nin Sufmbɛ ya ciɛnb taan' nà saan nnɔ. <sup>58</sup> Pier pɛ \*Yesu bo, ki te fɔnfɔkm, ki tɪ baa' bitɔtuɔrciɛnb ya ciɛn den nɛ ki kɔn' ki tɪ kɛlɛ' biguguurb saan, wɔ ɳ liike nɪ li gben ma bo. <sup>59</sup> Bitɔtuɔrciɛnb nin tibuur ya cɛkl yaab kɛ nuunh bi li dule kutonnɛnku kùà bo kí biin Yesu ɳó kí ku wɔ nɛ. <sup>60</sup> Nin binib baa' ki lá nɛn' u'bo kutonnɛnku ki yɛbe ma kɛ nnɔ, ba laa' u'biil. Mifɔfɔrm nɛ biɳɔŋmaadenb bile baa' <sup>61</sup> ki lá len' ki ye: «Ujɛ wuɔ len' ki ye: «N li fre kí bere Uwien ya duku, kí liɛbe kí mɛ kù iwien ita.» »

<sup>62</sup> Nɛ bitɔtuɔrciɛnb ya ciɛn fii' ki sere', ki tɔkɛ' \*Yesu ki ye: «Ŋa ɳ len kí jiin-ii? Ŋa ɳmɔbe tuba á len kí jiin binib bà biindeh ɳɛ nɔ-ɔɔ?» <sup>63</sup> \*Yesu ɳmin, nɛ bitɔtuɔrciɛnb ya ciɛn tɔkɛ' wɔ ki ye: «Uwien wà fuobe ya yel bo, a yé Uwien ya Nigɛndkɛ Kristo, ki yé Uwien ya Bijɛ nɛ la, tɔkɛ tɛ.» <sup>64</sup> Nɛ \*Yesu ye: «Sin nɛ ye nnɔ. Ama n tɔkeh nɛ nɛ, kí ɳɛ fɛnfɛnnɔ kí taa kí li joh, ni li lɛ Unil ya Bijɛ kɛ Uwien, mituɔm kɛ ya daan ya jie bó, ki li lɛ wɔ titɛwɔlgbɔnt ni paaki bó, u we ní.»

<sup>65</sup> U len' nnɔ ma nnɔ, nɛ bitɔtuɔrciɛnb ya ciɛn kɛrɛ' wɔn bugbɛn ya liɛrl,§ nɛ ki ye: «U suke' Uwien nɛ. Ta ji nuunh mɔnkunl. Ni cii' u suke' Uwien ma bo. <sup>66</sup> Ni maaleh mila?» Nɛ bi ye: «U kɛpɛ mikuum nɛ.»

<sup>67</sup> Nɛn saan nɛ bi cɛrɛh u'nun bó tiɳinsɛnt, ki kureh wɔ, nɛ bitɔb mɔ kpɔbreh wɔ itɛnpɛ, <sup>68</sup> ki tɔkeh wɔ ki teh: «A yé Uwien ya Nigɛndkɛ Kristo la, bukɛrɛ wà ɳi' ɳɛ.»

### *Pier niɛ' ki ye wa bɛn Yesu*

*(Mark 14:66-72; Luk 22:56-62; San 18:15-18, 25-27)*

<sup>69</sup> Tɔ, Pier kɛ uluo bo, nɛ upiitonsɔnl uba baa' ki lá tɔkɛ' wɔ ki ye: «A'mɔ là te nin Galile ya \*Yesu wuɔ nɛ.» <sup>70</sup> Nɛ Pier niɛ' bi'kɛ ya nun bó ki ye: «Ma bɛn a ye á ye bà.» <sup>71</sup> U joh bunaɳɔjɛbu bó, nɛ upiitonsɔntɔ laa' wɔ, ki tɔkɛ' binib bà te ni'saan nnɔ ki ye: «Ujɛ wuɔ mɔ là te nin Nasarɛt ya \*Yesu nɛ.» <sup>72</sup> Nɛ u tí niɛ' ki pole' ki ye: «Ma bɛn ujɛ bugbɛn.»

<sup>73</sup> Nɪ pukn' waamu, nɛ binib bà te ni'saan nnɔ baa' ki lá tɔkɛ' wɔ ki ye: «Nɪ yé imɔn nɛ, a'mɔ yé \*Yesu yaab ya uba nɛ; a'lenm nɛ wɔngɛh a yé nà bó yɔ.» <sup>74</sup> Nɛ Pier cin' ki niɛh ki poleh ki teh «Ma bɛn ujɛ wuɔ nɔ. N nɛn' la, Uwien la dàan nni.» Nɛ ukuoje pɔk ki muɔ' i ya tãan bo. <sup>75</sup> Nɛn saan nɛ Pier tiɛrɛ' \*Yesu bi tɔkɛ' wɔ ma ki ye: «A li niɛ bolm mita kí ye ɳa bɛn nni nɛ kí yaan ukuoje ɳ muɔ nnɔ.» Nɛ ki ɳɛn' saali, ki tɪ muɔ' ki gbienɛde' cɛɛn.

## 27

### *Bi tuke Yesu ki jon' Pilat saan tibuur*

*(Mark 15:1; Luk 23:1-2; San 18:28-32)*

<sup>1</sup> Nɪ faa' kutɛnɳɛsɔnsɔnku, nɛ bitɔtuɔrciɛnb nin Sufmbɛ ya ciɛnb kɛ kɛlɛ' ki bonde' ki liike' bi li tien ma kí ku Yesu. <sup>2</sup> Bi lɔlɛ' wɔ, nɛ ki taa' wɔ ki tɪ ɳukn' gobina Pilat.

### *Sudas kpo' ma bo*

*(Ituɔn 1:18-19)*

<sup>3</sup> Tɔ, Sudas wà kuɔrɛ' \*Yesu nnɔ laa' bi bun' \*Yesu tibuur ki ye u kɛpɛ mikuum ma nnɔ, u'yɛnm ɳaabe' ki gbien', nɛ u jiin' ilike ya kur pita nnɔ, wɔ ɳ tɪ de bitɔtuɔrciɛnb nin Sufmbɛ ya ciɛnb, <sup>4</sup> nɛ ki tɔkɛ' bɛ ki ye: «N bii' nɛ. N kuɔrɛ' unil wà ɳa ɳmɔbe biil nɛ.» Nɛ bi ye: «Na yé ti ya gbɛr, a'yaar nɳnɔ.» <sup>5</sup> Nɛ u taa' ilike ya kur nnɔ ki wiɛ' Uwien ya duku ni, ki siɛrɛ', nɛ ki jon' ki tɪ jɔn' u'ba.

<sup>6</sup> Tɔ, bitɔtuɔrciɛnb gɛngɛnde' ilike ya kur nnɔ, nɛ ki ye: «Nɪ yé misɛm ya like nɛ. Ti'yiko ɳa ɳ tuo tí taa yɪ kí kpɪɛn Uwien ya duku ya liklɛkl ni.» <sup>7</sup> Bi gbierɛ' ki liike' bi li tien yɪ ma, nɛ ki taa' yɪ kí dɛ' umaar ya kpàabu, bɛ ɳ li subɛh bicɛnb. <sup>8</sup> Nɛn bo nɛ bi yih ni'saan «Misɛm ya kpàabu» haali nin fɛnfɛnnɔ.

§ 26:65 Sufmbɛ bo kí kɛrɛ liliɛrl ya tingi si: unil ya benku ni ben' bii u te uyɛnsaa ni nɛ.

<sup>9</sup> Ni tien' \*Uwien ya ñabonsɔknl Seremi là len' ma ki ye: «Bi taa' ilike ya kur pita nɛ; Israyel yaab là kpaan' udaan ya daaku ubien wà nnɔ, <sup>10</sup> nɛ ki de' umaar ya kpàabu. Yonbdaan là tɔke' nni ki ye nnɔ nɛ.»

*Pilat bun' Yesu tibuur*

*(Mark 15:2-5; Luk 23:3-5; San 18:33-38)*

<sup>11</sup> \*Yesu se gobina Pilat ya nun bó, nɛ u niire' wɔ ki ye: «Sin, a yé Sufmbɛ ya ber nɛ-ɛɛ?» Nɛ Yesu jiin' wɔ ki ye: «Sin nɛ ye nnɔ.» <sup>12</sup> Bitɔtuɔrcienb nin Sufmbɛ ya cienb biindeh Yesu, ama wa len' tuba. <sup>13</sup> Nɛ Pilat tɔke' wɔ ki ye: «ŋa ciuh bi biindeh ŋɛ mibiinm mà kɛ ya bol-ii?» <sup>14</sup> Ama \*Yesu ŋa jiin' wɔ ñabonl liba mɔnɔn. Nɛn nɛ cuo' wɔ miyɔkm cɛɛn.

*Bi bun' Yesu tibuur ki ye u kpɛ mikuum*

*(Mark 15:6-15; Luk 23:13-25; San 18:39-19:16)*

<sup>15</sup> Sufmbɛ ya Pak ya nacenku kɛ nacenku ya yo la, Pilat tí n' ñɛn lipɛkl ya nil wà linigol yíe wɔ nɛ kí wiɛ. <sup>16</sup> U ya yo ki laa' unil uba te lipɛkl ni u'yel kpére', bi yih wɔ \*Yesu Barabas. <sup>17</sup> Linigol taan' ma nnɔ, nɛ Pilat niire' lè ki ye: «Ni yíe n' ñɛn ŋmɛ lipɛkl ni? \*Yesu Barabas bii \*Yesu wà bi yih wɔ \*Kristo nnɔ?» <sup>18</sup> Pilat niire' nnɔ, kime u ben ki ye bitɔtuɔrcienb nin Sufmbɛ ya cienb ŋmɔbe kinɛnk nɛ \*Yesu bo. Nɛn nɛ cère' bi taa' wɔ ki lá ŋukn' wɔ.

<sup>19</sup> Uyo wà Pilat kɛ ki buh \*Yesu tibuur nnɔ, nɛ u'po sɔn' ki tɔke' wɔ ki ye: «La taa a'gber kí kuɔn uje wà ŋa ŋmɔbe biil nɔ ya gber ni. Kime uje bugben bo, n dekn' tidɛknt kuñanku kuu tù wiɛbe nni cɛɛn.»

<sup>20</sup> Ama bitɔtuɔrcienb nin Sufmbɛ ya cienb sure' linigol nnɔ ki ye lɛ n' tɔke Pilat wɔ n' wiɛ bɛ Barabas, kí ku Yesu. <sup>21</sup> Nɛ Pilat tí niire' bɛ ki ye: «Bijɛb bile biɛ ni, ni yíe n' wiɛ u la?» Nɛ bi ye: «Wiɛ Barabas.» <sup>22</sup> Nɛ Pilat niire' bɛ ki ye: «Nnɔ la, \*Yesu wà bi yih wɔ \*Kristo nnɔ, n li tien wɔ mila?» Nɛ bi'kɛ ye: «Bɛ n' kpɛ wɔ udɔpɔnpɔn bo.» <sup>23</sup> Nɛ u tí niire' bɛ ki ye: «U tén ki bii' li lɛ biil nɛ?» Nɛ bi tùɔreh ki wuureh ki gbiekeh ki teh: «Bɛ n' kpɛ wɔ udɔpɔnpɔn bo.»

<sup>24</sup> Pilat laa' wa n' fre kí tien niba, bi kpireh ki joh nɛ, nɛ u taa' miñunm, ki nire' bi'nun bó, nɛ ki ye: «Ma te uje wuɔ ya kuum ni. Ni yé ni ya gber nɛ.» <sup>25</sup> Nɛ bi'kɛ ye: «Cère u'kuum n' li yé tinbi nin ti'bumu ya gber.» <sup>26</sup> Pilat wiɛ' bɛ Barabas, ki cère' u'sojambɛ ñi' \*Yesu inalebe, nɛ u taa' wɔ ki de' bɛ bɛ n' tí kpɛ wɔ udɔpɔnpɔn bo.

*Sojambɛ lɛh Yesu*

*(Mark 15:16-20; San 19:2-3)*

<sup>27</sup> Tɔ, Pilat ya sojambɛ nnɔ taa' \*Yesu ki kɔn' Pilat den uluo bo, nɛ ki taan' bi'cɛkl ya sojambɛ kɛ, ki guɔn' ki linde' wɔ, <sup>28</sup> ki gore' wɔ, nɛ ki taa' kuliermónmónku kuba ki goln' wɔ, <sup>29</sup> ki taa' ikonkon ki lɔnlɔn' uyukpɛkpiɛ ki kpɛle' u'yul, ki taa' lilɛnbenl ki ŋukn' u'nɔjie ni, nɛ ki gbaandeh u'nun bó, ki lɛh wɔ ki teh: «Sufmbɛ ya berɔ, ti fuondeh ŋɛ-a!» <sup>30</sup> Nɛ ki cɛreh u'bo tiñinsɛnt, ki taah lilɛnbenl nnɔ ki kpaakeh u'yul bo. <sup>31</sup> Bi lè' wɔ ki tí gben', nɛ ki gore' kuliermónmónku nnɔ, ki taa' u'wɛngolkaar ki jiin' ki goln' wɔ, nɛ ki taa' wɔ ki bure' bɛ n' tí kpɛ udɔpɔnpɔn bo.

*Bi kpɛ' Yesu udɔpɔnpɔn bo*

*(Mark 15:21-32; Luk 23:26-43; San 19:17-27)*

<sup>32</sup> Bi tí ñɛh udu ni ma nnɔ, nɛ ki cende' uje uba bi yih wɔ Simɔn, u yé Sirenn ya du ya nil nɛ. Bi cuo' uje bugben ki wɔbn' wɔ, wɔ n' tuke \*Yesu ya dɔpɔnpɔn. <sup>33</sup> Bi tí baa' niba saan, bi yih nɛ Golgota, ni'tingi si: «Kuyukpɔbku ya Bùol.» <sup>34</sup> Nɛ ki taa' midaam mà cuuke' nà to kɛrkɛri ki de' Yesu, ki ye wɔ n' ñu. U lèn', nɛ ki yíe' ka ñun'.

<sup>35</sup> Sojambɛ nnɔ kpɛ' wɔ udɔpɔnpɔn bo. Nɛ ki taa' u'wɛngolkaar ki fùɔre' imúɔn ki gbiire' tù, <sup>36</sup> nɛ ki kɛ ni'saan ki gu wɔ. <sup>37</sup> Bi là kele' nà cère' bi kpɛ' wɔ nnɔ ki tɛbn' u'dɔpɔnpɔn bo u'yul bó. Bi là kele' ki ye: «Sufmbɛ ya ber \*Yesu sɔ nɔ.» <sup>38</sup> Bi kpɛ' idukond ile mɔ u'saan idɔpɔnpɔn bo, bi kpɛ' uba u'nɔjie bó, ki kpɛ' u'tɔ u'nɔgɛn bó.

<sup>39</sup> Binib bà gèbreh ni'saan nnò sukreh wò ki gònbeh iyul ki tàkeh wò <sup>40</sup> ki teh: «Sin wà ye a li bere Uwien ya duku kí lièbe kí mε kù iwien ita nnò, ηmien a'ba-a! A yé Uwien ya Bijε la, jiiire ní udòpònpò wuu bo-a!»

<sup>41</sup> Nε bitòtuòrcièn b nin Yiko ya wòn wò knb nin Sufmbε ya cièn b mò lεh wò ki teh: <sup>42</sup> «U ηmien' binitòb nε, ka ní fre kí ηmien u'ba-a! U yé Israyel yaab ya ber la, wò ní jiiire ní udòpònpò wuu bo fεnfennò, ηò tí teke wò kí ji. <sup>43</sup> U du Uwien bo nε, ki tòke' ki ye u yé Uwien ya Bijε. Uwien yíe wò la, wò ní ηmien wò fεnfennò.»

<sup>44</sup> Nε idukond yà bi kpε' yè u'saan idòpònpò bo nnò mò sukreh wò nnò.

### *Yesu ya kuum udòpònpò bo*

*(Mark 15:33-41; Luk 23:44-49; San 19:28-30)*

<sup>45</sup> Tò, kuwensiiku ya yo nε ní ci' ki bliike' utingben kε bo ki tí baa' kutaajuòku tikur tuta ya yo. <sup>46</sup> Ní tuoh tikur tuta ya yo nε \*Yesu wuure' ufaa bo ki ye: «Eli, Eli, lama sabaktani?» Ní'tingi si: «N'Wien, n'Wien, bε tien' a wiε' nni?»

<sup>47</sup> Binib bà se ni'saan nnò ya biba ηa cii' u wuure' ki ye bà mòn mòn nε ki ye: «U lii yih Eli nε.» <sup>48</sup> Nε bi'ni uba sèn' i ya tàan bo ki jon' ki tí yuure' ticitònt, ki lá sèkn' midεηmiηmiikm miba ni, ki taa' ki tuun' lilεnbεnl bo, ki tεnde' ki kòle' u'ñòbu ki ye wò ní muòre. <sup>49</sup> Nε bà sèn nnò ye: «Dàan, tí liike \*Eli li baa kí lá ηmien wò bii wa ní baa.»

<sup>50</sup> Nεn saan nε \*Yesu tí wuure' ufaa bo, nε ki kpo'. <sup>51</sup> U ya yo nε kukpεlçεkpεkpiεku kùà bore' Uwien ya duku ni bolm mile nnò kεre' ku'siik ni paaki ki tí ci' tingi. Kitink jènge', iten yeyεkre', <sup>52</sup> ikul bibiire', nε Uwien cère' binib bà là pε u'sen bo ki kpo' nnò mεkre' ki yεbe. <sup>53</sup> Bi ñen' ikul ni, nε \*Yesu mεkre' uyo wà bitenkpiib ni nnò, bi kòn' Uwien ya du Yerusalem ni, ki cère' binib laa' bε ki yεbe.

<sup>54</sup> Sojambε kobk ya cièn nin sojambε bà te \*Yesu saan ki gu wò nnò laa' kitink jènge' ma, ki laa' tibont tà kε tien' nnò, nε ní cuo' bε bujεwaanbu ki gbien', nε bi ye: «Imòn, uje wuò mònbe ki yé Uwien ya Bijε nε.» <sup>55</sup> Bipiib biba mò là te ni'saan ki yεbe, ki se fònfòkm ki likeh. Bi là ñen' haali Galile nε ki pε u'bo ki toreh wò. <sup>56</sup> Bi'ni biba si: Mari Madelenn nin Saak nin \*Yosεf ya naa Mari nin Sebede ya bijieb ya naa.

### *Yesu ya subm*

*(Mark 15:42-47; Luk 23:50-56; San 19:38-42)*

<sup>57</sup> Ní juòre', nε ufàadaan uba baa' ní ki yé Arimate ya nil, bi yih wò \*Yosεf. U mò là yé \*Yesu ya panpaankε nε. <sup>58</sup> U jon' Pilat saan ki tí tòke' wò ki ye u tuo' la, wò ní cèbe wò \*Yesu ya gbenent. Nε Pilat de' usen ki ye bε ní cèbe wò tù. <sup>59</sup> Nε \*Yosεf taa' \*Yesu ya gbenent, ki taa' kukpεlçεfènku ki tenten' tù, <sup>60</sup> ki taa' tù ki tí ble' ufele uba ni, ki binde' kutεngbengbenku kuba, ki bii'n' bufεnañòbu nε ki bure'. U là cère' bi cube' ufele nnò kujòtenku kuba ya kele ni nε ki de' wòn bugben. Ba laan là sube' nil len.\* <sup>61</sup> Mari Madelenn nin Maritò nnò mò là te ni'saan, ki kε likul nnò ya nun bó.

### *Sojambε gu Yesu ya kul*

<sup>62</sup> Lidaali là bi bondeh \*Saba ya daali nnò gèbre', ní faa' nε bitòtuòrcièn b nin \*Farisienmbε taan' ki jon' Pilat saan, <sup>63</sup> ki tòke' wò ki ye: «Cεnbaa, ti tiere' ki ye utonnendaan nnò là fuobe ma nnò, u là ye u kpo' la, wienta daali u li mεkre bitenkpiib ni. <sup>64</sup> Nεn bo, cère sojambε ní li gu u'kul, ki tí baa' wienta daali, ηò u'panpaankaab la baa kí lá suu kí ñen u'gbenent, kí tòke binib kí ye u mεkre' bitenkpiib ni nε. Bi tien' nnò la, ku ya tonnenfòrkaaku li cèn kukpiεku.» <sup>65</sup> Nε Pilat ye: «Sojambε sò. Li joh mèn ki tí cère bε ní li gu u'kul ni yíe ma bo.» <sup>66</sup> Nε bi bure' ki tí pòle' ki diεke' litenl là bi likul nnò, ki cère' sojambε nnò gu.

\* 27:60 Sufmbε là subeh bitenkpiib nnò nε.

## 28

### *Yesu mɛkre' bitɛnkpiib ni*

*(Mark 16:1-10; Luk 24:1-12; San 20:1-10)*

<sup>1</sup> \*Saba ya daali gɛbre', kutaaku kua li faa nnɔ, nɛ Mari Madelɛnn nin Maritɔ wɔre' ki fi' ki jon' bɛ rí tĩ gɔnde likul nnɔ. <sup>2</sup> I ya tãan bo nɛ kitink jɛnge' ki gbien', nɛ Yonbdaan ya tond uba ñɛn' paaki bó ní, ki lá biire' litenl nnɔ ki binde' lɛ, ki kɛle' li'bo. <sup>3</sup> U windeh tɛn utɛmɛknɛ, nɛ u'wɛngolkaar piɛn tein. <sup>4</sup> Sojambɛ bà gu likul nnɔ laa' wɔ ma nnɔ, bujɛwaanbu cuo' bɛ cɛɛn. Bi'gbɛnɛnt ɲɔh, nɛ bi fifike'.

<sup>5</sup> Nɛ utond nnɔ tɔke' bipiib nnɔ ki ye: «Ninbi, la fɛnge mɛn. N bɛn ni nuunh \*Yesu wà bi là kpɛ' wɔ udɔpɔnpɔn bo nnɔ nɛ. <sup>6</sup> Wa ji te niɛ saan. U mɛkre' tɛn u là len' ma bo nɛ. Dɛn mɛn, kí liike u là dɔ nà saan. <sup>7</sup> Jo mɛn tonm kí tĩ tɔke u'panpaankaab kí ye u mɛkre', ki liere' bɛ ki bure' Galile bó ɲɔ. Bi li tĩ lɛ wɔ nɛn bó nɛ. N ɲmɔbe tun nɛ rí tɔke nɛ.»

<sup>8</sup> Nɛ bipiib nnɔ pɔk ki siere' likul nnɔ saan; bujɛwaanbu ɲmɔbe bɛ, ama bi'yɛnm mɛn sɔnge cɛɛn nɛ bi tiinh ki joh bɛ rí tĩ tɔke \*Yesu ya panpaankaab Uwien ya tond nnɔ tɔke' bɛ nà nnɔ.

<sup>9</sup> Bi joh ma nnɔ nɛ \*Yesu cende' bɛ usɛn ni, ki fuonde' bɛ. Nɛ bi gbaan' u'nintuɔli, ki cuo' u'taan ki puke' wɔ. <sup>10</sup> Nɛ u tɔke' bɛ ki ye: «La fɛnge mɛn. Li joh mɛn kí tĩ tɔke n'panpaankaab kí ye bɛ rí li joh Galile. Bi li tĩ lɛ nni nɛn bó nɛ.»

### *Bi pɛn' Sojambɛ ilike bɛ rí tɔke kí ye Yesu ɲa mɛkre'*

<sup>11</sup> Uyo wà bipiib nnɔ joh nnɔ, nɛ sojambɛ bà gu \*Yesu ya kul nnɔ ya biba jon' Yerusalem, ki tĩ tɔke' bitɔtuɔrciɛnb bi laa' nà kɛ. <sup>12</sup> Nɛ bitɔtuɔrciɛnb nin Sufmbɛ ya ciɛnb taan' ki kɛle' ki gbiere', nɛ ki ñɛn' ilike ì yɛbe ki de' sojambɛ nnɔ, <sup>13</sup> ki tɔke' bɛ ki ye: «Li joh mɛn kí li tɔkeh binib ki teh ni dɔ kuñɔnku ki gɔh, nɛ u'panpaankaab baa' ki lá sun' ki ñɛn' wɔ likul nnɔ ni. <sup>14</sup> Pilat cii' la, tinbi nɛ li duɔn u'yɛnm kí ñɛn nɛ len.»

<sup>15</sup> Sojambɛ nnɔ teke' ilike nnɔ, nɛ ki jon' ki tĩ tien' bi tɔke' bɛ ki ye ma bo. Nɛn bo nɛ bi kpaandeh tigber nnɔ Sufmbɛ ni haali nin dinnɔ.

### *Yesu sɔn' u'panpaankaab uɲɛndun ni ni'kɛ saan*

*(Mark 16:14-18; Luk 24:36-49; San 20:19-23; Itùon 1:6-8)*

<sup>16</sup> Tɔ, \*Yesu ya panpaankaab piik nin uba nnɔ jon' Galile ni, lijuɔl là \*Yesu là yiɛn' bɛ li'bo nnɔ bo. <sup>17</sup> Bi laa' wɔ ma nnɔ, nɛ ki gbaan' u'nintuɔli ki puke' wɔ. Ama bi'ni biba jieh. <sup>18</sup> Nɛ \*Yesu nɛkn' bɛ ki tɔke' bɛ ki ye: «Uwien de' nni mituɔm kɛ paaki nin tingi. <sup>19</sup> Nɛn bo, li joh mɛn inibol kɛ saan, kí tĩ tien bɛ n'panpaankaab, kí sii bɛ Uwien ya ñunm, Baa nin Bijɛ nin \*Mifuoñaanm ya yel bo, <sup>20</sup> kí wɔkn bɛ bɛ rí li boh n tɔke' nɛ nà kɛ nnɔ. Ní li bɛn kí ye n te ni'saan uyo kɛ kí tĩ baa uɲɛndun ya gbenm.»

## Tigbɛmɔnmɔnt tà Mark kɛle' tù nnɔ Nà wɔngh kugbɔnku kuu te ma bo

Mark ɲa yé Yesu ya tondb piik nin bile nnɔ ya uba. Ama u cii' Yesu ya gber Pier nin Pɔl saan nɛ, kime u tien' bi'saan ki wuɔke'. U kɛle' kugbɔnku kuu ki de' binib bà nnɔ ya biba ɲa yé Sufmbɛ. Wa kɛle' ku'ni bi maa' Yesu ma bo, ka kɛle' Yesu len' tigber tà nnɔ mɔ nĩ fɔke, ama u tùre' ki kɛle' Yesu sɔnsɔn' itùon yà nin u tien' miyɔkm ya bont tà kɛ, ki wuɔn' Yesu buu' biwiɛnb nin wɔn nin Sufmbɛ ya ciɛnb finfinde' ma bo nɛ.

Mark cin' u'gbɔnku ma nnɔ, u wuɔn' ki ye Yesu yé Uwien ya Bijɛ nɛ (1:1), ki tĩ tonde' nin wɔn Yesu, Uwien ya Bijɛ ya kuum udɔpɔnpɔn bo ya gber (15:39).

Bi li fre kí gbiire Mark ya gbɔnku ibɔk ile. Libɔkpiɛkl cinh liyul 1:1 kí tĩ baa iyul 8:26 nɛ libɔkliel cinh iyul 8:27 kí tĩ baa 16:20. Kugbɔnku kuu ya bɔkpiɛkl ni (1:1–8:26), Yesu buu' biwiɛnb, ki ɲɔre' isɛnpol binib saan, ki wɔkn' binib Uwien ya gber. Ama wa yé binib ní bende u yé udaan wà nɛ ka toh binib mɔ ní tɔke u yé udaan wà. Kugbɔnku kuu ya bɔkliel ni (8:27–16:20), Mark yé wɔ ní wuɔn binib kí ye Yesu yé Uwien ya Bijɛ nɛ. U yé Uwien ya Bijɛ ma nnɔ, nɛ cèrɛ' u teh miyɔkm ya bont.

Imɔn, Yesu yé Uwien ya Bijɛ nɛ, ama u tuo' ki tien' u'ba unisaal ki tuo' Uwien ya ɲɔbu bó, ki jin' ijɛnd ki tĩ kpo' udɔpɔnpɔn bo.

*San wà siih binib Uwien ya ɲunm ya gber  
(Matie 3:1-12; Luk 3:1-18; San 1:19-28)*

<sup>1</sup> \*Uwien ya Bijɛ \*Yesu Kristo ya gbɛmɔnmɔnt ya cinm. <sup>2</sup> Tù cin' ten \*Uwien ya ɲɔbonsɔknl Esayi là kɛle' ma u'gbɔnku ni ki ye:

«Liike, n li sɔn n'tond wɔ ní liere ɲɛ,  
kí lá tùre a'sɛn.

<sup>3</sup> Udaan uba te kupenpelku ni ki wuureh ki teh:

«Tùre mɛn Yonbdaan ya sɛn,  
kí cubn u'sɛngbɛnmu kí de wɔ.»

<sup>4</sup> Nnɔ nɛ San wà siih binib Uwien ya ɲunm baa' ki te kupenpelku ni, ki kpaandeh ki teh: «Lèbre mɛn ni'tetem, ní sɛi nɛ Uwien ya ɲunm ɲɔ Uwien ní fère nɛ ni'biere.» <sup>5</sup> Nɛ Sude ya tinfenm yaab kɛ nin Yerusalem yaab kɛ bàareh u'saan ki kpiireh bi'biere, nɛ u siih bɛ Uwien ya ɲunm Sudɛn ya kpenl ni.

<sup>6</sup> San là guo liliɛrl là nnɔ bi taa' ɲɔkma ya kobr nɛ ki lòn' lè. U là gbin kugbɔnku ya ningbɛnl nɛ u'ciɛk ni. U là jinh inacu nin tisiir nɛ. <sup>7</sup> U là tɔkeh linigol nnɔ kí teh: «Uba li paan n'puoli bó ní ki ɲmɔbe mituɔm ki cɛn' nni. Ma kpe ní bùɔn kí lore u'tacɛningbɛn. <sup>8</sup> Min taa' miɲunm nɛ kí sɛi' nɛ Uwien ya ɲunm. Wɔn nɛ lá li cèrɛ \*Mifuoɲaanm ní jiiɛ ní ni'bo.»

*San sii' Yesu Uwien ya ɲunm  
(Matie 3:13-4:11; Luk 3:21-22; 4:1-13)*

<sup>9</sup> Tɔ, i ya dɛn nɛ \*Yesu ɲɛn' Nasarɛt, udu wà te Galile ya tinfenm ni nnɔ kí baa' San saan. Nɛ San sɛi' wɔ Uwien ya ɲunm Sudɛn ya kpenl ni. <sup>10</sup> \*Yesu ɲɛh miɲunm ni uyo wà nnɔ nɛ kí laa' kutaaku kɛrɛ', kí laa' \*Mifuoɲaanm jiih ní kí naan unɛnjel, kí lá kèlɛ' u'bo. <sup>11</sup> Nɛ unieke uba ɲɛn' paaki bó ní kí ye: «Sin, a yé n'bijɛ nɛ, n yé ɲɛ nɛ n'yɛnm sɔnge a'bo.»

*Satan biike' Yesu*

<sup>12</sup> I ya tàan bo, nε \*Mifuoñaanm taa' \*Yesu ki jon' kupenpelku ni. <sup>13</sup> U là tien' len iwien pinan nε, nε \*Satan b̄ikreh w̄o. U te nin kumūoku ni ya went nε, nε Uwien ya tondb toreh w̄o.

*Yesu cin' u'tuonl Galile ni*

<sup>14</sup> T̄o, n̄i tete nε bi lá cuo' San ki pek̄n'. Ni ya puoli bó nε \*Yesu jon' Galile ki t̄i kpaandeh Uwien ya gb̄em̄onm̄ont, <sup>15</sup> ki teh: «Uyo baa'-a! Uwien ya b̄el nek̄n' ní η̄o. Lèbre m̄en ni'tetem, kí teke tigb̄em̄onm̄ont kí ji.»

*Yesu yin' bij̄enb̄eb binan b̄e r̄i paan u'bo*

*(Matie 4:18-22; Luk 4:14-15; 5:1-11)*

<sup>16</sup> \*Yesu cuonh ki kp̄aakeh Galile ya ñunciem, nε ki laa' Sim̄on nin u'nin̄ε Andre te ki wiēnh bub̄ebu. Bi là yé bij̄enb̄eb nε. <sup>17</sup> Nε u t̄ake' b̄e ki ye: «Paan m̄en n'bo ní, η̄o r̄i c̄ere ní li taakeh binib ki dien̄h nni.» <sup>18</sup> Bi dàan' bi'b̄aan i ya tàan bo, nε ki paan' u'bo.

<sup>19</sup> U j̄ende' waamu ki puk̄n', nε ki tí laa' Sebede ya bij̄ieb Saak nin u'nin̄ε San te bi'ñ̄erbu ni, ki t̄ūreh bi'b̄aan. <sup>20</sup> \*Yesu yin' b̄e i ya tàan bo nε bi dàan' bi'b̄aa Sebede nin u'tons̄onb̄ buñ̄erbu nn̄o ni, ki paan' u'bo.

*Yesu η̄ore' us̄enpol uje uba saan*

*(Luk 4:31-37)*

<sup>21</sup> Yesu nin u'panpaankaab t̄i baa' Kap̄ernawum ya du ni. \*Saba ya daali nε \*Yesu k̄on' bi'taanl ya duku ni, ki w̄ak̄nh binib Uwien ya gb̄er. <sup>22</sup> N̄i cuo' binib bà cengeh u'bó nn̄o miȳok̄m c̄een, kime wa w̄ak̄nh b̄e t̄en \*Yiko ya w̄onw̄ak̄nb̄ w̄ak̄nh ma bo, u w̄ak̄nh b̄e t̄en unil w̄a du u w̄ak̄nh n̄a bo nε.

<sup>23</sup> Uj̄e uba m̄o là te \*Suf̄mb̄e ya taanl ya duku nn̄o ni us̄enpol η̄aake w̄o, nε u wuure' <sup>24</sup> ki ye: «Nasaret ya Yesu, tinbi nin sin tu l̄e nε? A baa' á lá boln t̄e nε-εε? N b̄en a yé udaan w̄a. A yé Uwien ya Niñaan nε.» <sup>25</sup> Nε \*Yesu tien' u'bo ki ye: «Ŋmile, kí siere uje wūo saan.» <sup>26</sup> Nε us̄enpol nn̄o ñ̄onñ̄onge' uje nn̄o nin ufaa, ki wuure' ki gb̄ien', nε ki siere' u'saan. <sup>27</sup> Nε n̄i cuo' bi'k̄e miȳok̄m c̄een. N̄en saan nε bi niireh t̄ob̄ ki teh: «N̄i yé b̄e s̄o? U w̄ak̄nh miw̄ak̄nf̄enm nε ki du mi'bo-a, ki w̄ab̄ndeh is̄enpol m̄on̄on ì tuonh u'ñ̄obu bó-a!» <sup>28</sup> N̄en bo nε \*Yesu ya yel kp̄ere' Galile ya tinf̄enm ni ni'k̄e saan.

*Yesu buu' binib bà bun iw̄ien k̄e ya bol*

*(Matie 8:14-17; Luk 4:38-41)*

<sup>29</sup> \*Yesu nin bà p̄e u'bo nn̄o ñ̄en' litaanl ya duku nn̄o ni, nε ki jon' Sim̄on nin Andre den. Saak nin San m̄o p̄iere' b̄e. <sup>30</sup> T̄o, Sim̄on ya c̄ob̄naa d̄o ki bun, u'gb̄en̄ent ton. Nε bi p̄ok̄ ki t̄ake' \*Yesu ki ye u bun, <sup>31</sup> nε u baa' u'saan ki cuo' u'nūo ki fin' w̄o. U'gb̄en̄ent s̄onge' nε u c̄ende' b̄e.

<sup>32</sup> N̄i'daali ya tajūoku uwien lu' ma nn̄o, nε bi tukeh bà bun iw̄ien k̄e ya bol nin is̄enpol η̄aake bà nn̄o k̄e ya bol ki bàareh \*Yesu saan. <sup>33</sup> Udu nn̄o ya nib k̄e là taan' Sim̄on nin Andre den nε bunañ̄obu saan. <sup>34</sup> Nε \*Yesu buu' binib bà bun iw̄ien k̄e ya bol bi yebe, ki η̄ore' is̄enpol binib saan ì yebe ka c̄ereh ì lien̄h, kime ì b̄en w̄o.

*Yesu t̄ake' binib Uwien ya gb̄er Galile ya tinf̄enm ni*

*(Luk 4:42-44)*

<sup>35</sup> Ut̄en̄j̄afaa nε \*Yesu f̄ii' n̄i b̄iike ki ñ̄en' ki jon' nib η̄a te n̄a saan ki t̄i k̄aareh. <sup>36</sup> Nε Sim̄on nin u't̄ont̄ok̄nlieb m̄o f̄ii' ki ñ̄en', ki nuunh w̄o, <sup>37</sup> bi t̄i laa' w̄o ma nn̄o, nε ki t̄ake' w̄o ki ye: «Binib k̄e nuunh η̄e nε.» <sup>38</sup> Nε u t̄ake' b̄e ki ye: «Tí jo m̄en nit̄onn bó, itengbaan yà te k̄onk̄onm nn̄o ni η̄o r̄i t̄i t̄ake Uwien ya gb̄er ni'm̄o bó. Kime n̄en bo nε n baa'.» <sup>39</sup> Nε ki taa' b̄e ki jon' Galile ya tinf̄enm k̄e ni, ki t̄i k̄oh Suf̄mb̄e ya táan ya dur ni, ki kpaandeh Uwien ya gb̄er, ki η̄ūoh is̄enpol binib saan.

*Yesu c̄ere' uj̄end uba l̄ore'*

*(Matie 8:1-4; Luk 5:12-16)*

<sup>40</sup> Ujend uba baa' \*Yesu saan, nε ki gbaan' u'nintuoli, ki gbáan' wə ki ye: «A yíe la, a li fre kí cère ní lùore.» <sup>41</sup> Yesu muo' wə micεcεkm cεen, nε ki tēnde' u'nuo, ki mε' wə, ki tōke' wə ki ye: «N yíe, lùore.» <sup>42</sup> I ya tǎan bo nε lijendl nnə pək ki gben' nε u lùore'. <sup>43</sup> Nεn saan nε \*Yesu tōke' wə ki ye wə ní li joh, nε ki kpεkpε' u'bo, <sup>44</sup> ki ye: «Liike a'yul bo ki la tōke nil, ama jo tí tí lε utətuərke, kí tien milùorm ya tuər l ten Moyis là ye bε ní li teh ma bo. Nεn nε li wuon kí ye a lùore'.» <sup>45</sup> Ama uje nnə bure' ma nnə, u tí kpaandeh tigber nnə ni'ke saan nε. U tien' nnə ma nnə, nε \*Yesu ŋa ji li fre kí kə du uba ni, ka bəle'. U là juonh idugbaan nε nib ŋa te nà saan. Nε binib ŋeh ni'ke bó ki bàareh u'saan.

## 2

### *Uje uba ya tǎan nin u'nuo faan' Yesu cère' u faake'* (Matie 9:1-8; Luk 5:17-26)

<sup>1</sup> Iwenkàankε gèbre', nε \*Yesu liebe' ki jon' Kapernawum ya du bó. Binib cii' u te u càan' iden yà nnə ni, <sup>2</sup> nε linigol taan' ni'saan ki yebe haali fεnm ŋa ji tí te nañəbu ni mənən. Nε u tōkeh bε Uwien ya gber. <sup>3</sup> Tə, binib biba tuke' uje uba u'tǎan nin u'nuo kε faan' ki baa' Yesu saan. Binib binan nε là tuke' wə. <sup>4</sup> Linigol nnə bo ba ní fre kí taa wə kí nēnde \*Yesu ma nnə, nε ki don' u te kudulekaaku kùa ni nnə ya paaki, ki cube' libònl u se nà saan nnə, nε ki taa' uje nnə ki kuon' ki yekn' nin linagenl nnə ki ble' \*Yesu ya nun bó. <sup>5</sup> \*Yesu laa' bi teke' wə ki jin' ma nnə, nε u tōke' uje nnə ki ye: «N'bukε, n fère' ŋe a'biere ŋə.»

<sup>6</sup> \*Yiko ya wənwəknb biba kε ni'saan ki maaleh bi'fèl ni ki teh: <sup>7</sup> «Bε tien' uje wuə lienh nə nnə? U sukreh Uwien nε. Uwien baba ŋa ní la, ŋmε li fre kí fère binib bi'biere?» <sup>8</sup> \*Yesu pək ki bende' u'yεnm ni bi maaleh ma bo nε ki niire' bε ki ye: «Bε tien' ni maaleh nə nnə ni'yεnm ni? <sup>9</sup> Ni lε ba faa? N tōke uje wuə kí ye n fère' wə u'biere nε faa bii wə ní fii kí yuure u'nagenl kí li cuonh nε faa? <sup>10</sup> Nεn bo, n li wuon nε kí ye Unil ya Bijε ŋməbe mituəm unendun wuu ni wə ní fère binib bi'biere.» Nε ki tōke' uje wə ya nuə nin u'tǎan faan' nnə ki ye: <sup>11</sup> «N lienh sin nε, fii kí yuure a'nagenl, kí li kunh.»

<sup>12</sup> I ya tǎan bo nε u fii' ki yuure' u'nagenl ki ŋen' saali bi'ke ya nun bó. Ní cuo' bi'ke miyəkkm cεen nε bi pèkeh Uwien ki teh: «Ti fii' ma, ta laan laa' niε ya bonn ya tunbu.»

### *Yesu yin' Lefi wə ní paan u'bo* (Matie 9:9-13; Luk 5:27-32)

<sup>13</sup> \*Yesu liebe' ki jon' Galile ya ŋunciεnm ya gbaal, nε binib ligol bàareh u'saan, u tōkeh bε Uwien ya gber. <sup>14</sup> U joh ma nnə nε ki laa' ulenpotekl uba kε lenpotekbùol, bi yih wə Lefi u yé Alfe ya bijε. Nε \*Yesu tōke' wə ki ye: «Paan n'bo ní.» Nε u fii' ki paan' u'bo.

<sup>15</sup> Ni ya puoli bó nε \*Yesu te Lefi den ki jinh tijier. Bilenpotekb ligol nin bibierdenb mə là kε wən nin u'panpaankaab saan ki jinh tijier, kime bi là paakeh u'bo ki yebe. <sup>16</sup> \*Yiko ya wənwəknb biba, bà yé \*Farisiεnmbε nnə laa' \*Yesu nin bilenpotekb nin bibierdenb tε ki jinh tijier ma nnə nε bi niire' u'panpaankaab ki ye: «Bε tien' u tε ki jinh nin bilenpotekb nin bibierdenb-i?»

<sup>17</sup> \*Yesu cii' bi len' ma bo, nε ki tōke' bε ki ye: «Binib bà ŋməbe laanfíe ŋa nuunh dəktie, bà bun nε nuunh dəktie. Ma baa' ní yin nimənb, n baa' ní yin bibierdenb nε.»

### *Uñələle ya gber* (Matie 9:14-17; Luk 5:33-39)

<sup>18</sup> Uyo uba nε San ya panpaankaab nin \*Farisiεnmbε là lùo buñəbu, nε binib biba baa' ki lá niire' \*Yesu ki ye: «Bε tien' San ya panpaankaab nin \*Farisiεnmbε yaab lùoh buñəbu a'yaab bεn ŋa lùoh?» <sup>19</sup> Nε u jiin' bε ki ye: «Binib bà bi yin' bε upiikuon li fre kí lòle buñəbu uyo wə piice laan te bi'saan-ii? Piice laan te bi'saan la, ba ní fre kí lòle ñəbu. <sup>20</sup> Ama uyo uba we ní bε ní ŋen piice nnə bi'saan ufaa. U ya yo nε bi li lòle buñəbu.» <sup>21</sup> Nε ki tí ye: «Uba ŋa ní taa kpεcεfēnku ya jenl kí leknl liliεrkpaal. U tien' nnə la, kukpεcεfēnku ya jenl nnə li kere liliεrkpaal nnə nε libònl nnə ní yebre kí pukn. <sup>22</sup> Uba mə ŋa ní taa midaam mà ŋa laan



muo' ki ben' kí pieke iyokpaan ni. U tien' nnó la, midaam nnó li kprien iyól nnó, kí wule kí ñende ne iyól nnó má ní saa. Bi piekeh midaam mà ña laan muo' ki ben' iyófen ni ne.»

*Saba ya daali ya gber*

*(Matie 12:1-8; Luk 6:1-5)*

<sup>23</sup> \*Saba uba ya daali ne \*Yesu nin u'panpaankaab gèbreh ikpàan iba ni. Bi cuonh ki joh ma nnó ne u'panpaankaab coh ijifen\* ki cienh. <sup>24</sup> Ne \*Farisienmbé niire' \*Yesu ki ye: «Be tien' a'panpaankaab teh yiko kùon' nà \*Saba ya daali?» <sup>25</sup> Ne u tóke' be ki ye: «Na laan kaan' \*Dafid là tien' ma bo ne-εε? Wón nin u'nib ña là ñmóbe jier ma mikónm cuo' be nnó <sup>26</sup> u kón' Uwien ya ninbonl ni, uyo wà Abiyatar là yé bitótuarciénb ya cien nnó, ki taa' kpónó wà bi taa' ki de' Uwien nnó ki ñmón', ne ki de' wón nin bà tóke nnó bi'mó ñmón'. Ama bitótuarkaab baba ne là ñmóbe usen be ní ñmón kpónó nnó.» <sup>27</sup> Ne ki tóke' be ki ye: «Unisaal bo ne Uwien sien' \*Saba ya daali, na yé \*Saba ya daali bo ne Uwien ñen' unisaal. <sup>28</sup> Nen bo, Unil ya Bijé ne ñmóbe usen wó ní wuón bi li tien nà haali \*Saba ya daali mónon.»

### 3

*Ujé uba ya nuó uba faan', Yesu cèrè' u faake' Saba ya daali*

*(Matie 12:9-14; Luk 6:6-11)*

<sup>1</sup> \*Saba uba ya daali ne \*Yesu tí liebe' ki kón' \*Sufmbé ya taanl ya duku ni. Ujé uba má te len u'nuó uba faan'. <sup>2</sup> Ne bi sekndeh ki likeh u li cèrè ujé nnó ní faake \*Saba ya daali bii wa ní cèrè wó ní faake, kime bi là nuunh bi li dule nà bo kí biin wó ne. <sup>3</sup> Ne \*Yesu tóke' ujé wà ya nuó faan' nnó ki ye: «fii kí sere siik ni.» <sup>4</sup> Ne ki niire' be ki ye: «\*Saba ya daali la, unil ñmóbe usen wó ní tien nà món bii nà bre ne? U ñmóbe usen wó ní ñmien unil bii wó ní ku wó ne?» Ba jiin' wó. <sup>5</sup> Ne u liike' be ki góbre' ki bòn' nin ubenpiebe, u'yenm saa' bi'yufaa bo, ne u tóke' ujé wà ya nuó faan' nnó ki ye: «Tende a'nuó.» U tende' u'nuó ne u jire' u'ciem. <sup>6</sup> Nen saan ne \*Farisienmbé ñen', ki taan' ki kèle' i ya tàan bo nin Herod yaab be ní gbiere kí liike bi li tien ma kí ku Yesu.

*Linigol taan' Yesu saan*

<sup>7</sup> Ne \*Yesu nin u'panpaankaab siere' ni'saan ki bure' miñunciénm bó, ne linigociénl paan' u'bo. Linigol nnó ñen' ní Galile ya tinfenm ni nin Sude ya tinfenm ni <sup>8</sup> nin Yerusalem ni nin Idume ya tinfenm ni nin mitinfenm mà te Sude ya kpenpuol nnó ni nin Tir nin Sidon ya tinfenm ni ne. Bi là yebe céen ne. Bi cii' \*Yesu teh miyokm ya bont ma nnó ne cèrè' bi baa' u'saan. <sup>9</sup> Ne u tóke' u'panpaankaab ki ye be ní taa buñerbu kí pùkn miñunm bo wó ní kó ñó linigol nnó la pèbe wó. <sup>10</sup> Kime u là cèrè' binib faake ki yebe ma nnó ne biwienb ke kpieleh be ní nènde kí mé wó. <sup>11</sup> Isenpol yà ñaake binib nnó laa' wó la, ñ cèreh bi gbaandeh u'nintuóli ne ki wuureh ki teh: «A yé Uwien ya Bijé ne.» <sup>12</sup> Ama \*Yesu tengh isenpol nnó bo ne ki teh ñ la cèrè binib ní bende u yé udaan wà.

*Yesu gènde' u'tondb piik nin bile*

*(Matie 10:1-4; Luk 6:12-16)*

<sup>13</sup> Ni ya puoli bó ne \*Yesu don' lijuól bo, ki yin' u yé binib bà nnó. Bi baa' u'saan, <sup>14</sup> ne u gènde' binib piik nin bile be ní li tuu ki te u'saan, ne ki yin' be u'tondb. U gènde' be wó ní li sònh be bi tí tókeh binib tigbémónmònt ne, <sup>15</sup> kí li ñmóbe mituóm ki ñuòh isenpol binib saan. <sup>16</sup> U gènde' binib piik nin bile bà nnó ya yel sá: Simón, u baan' wó Pier <sup>17</sup> nin Sebede ya bijieð Saak nin u'ninje San, u baan' be Bowanerges, ni'tingi si: «itetien ya nib» <sup>18</sup> nin Andre nin Filip nin Batelemi nin Matie nin Toma nin Alfe ya bije Saak nin Tade nin Simón wà ya nun món u'du ya gber bo <sup>19</sup> nin Sudas Iskariyot wà lá li kuore wó nnó.

*Biba ye Yesu ñmóbe Belsebul ya tuóm ne*

*(Matie 12:22-32; Luk 11:14-23; 12:10)*

\* 2:23 Liike Matie 12:1.

<sup>20</sup> \*Yesu kun' nε linigol tí taan' u'saan haali wɔn nin u'panpaankaab ɲa tí ɲmɔbe fεnm bε ɲ ji jier mɔnɔn. <sup>21</sup> U'den yaab cii' nɪ te nnɔ nε bi baa' bε ɲ taa wɔ. Kimε bi maaleh ki teh u waare' nε.

<sup>22</sup> Tɔ, Yiko ya wɔnwɔknb bà ñεn' Yerusalem bó ní nnɔ lienh ki teh Belsebul nε ɲaake wɔ. Wɔn isenpol ya cien nε dienh wɔ mituɔm u ɲuɔh isenpol binib saan. <sup>23</sup> Nε u yin' bε ki pɔn' bε mikpenjεnm ki ye: «\*Satan li tien mila kí ɲɔre wɔn \*Satan? <sup>24</sup> Libεl liba ya nib bore' tɔb ki kɔnh bi'ɲmiel ni la, libel nnɔ li juore fεnm nε. <sup>25</sup> Iden iba mɔ ya nib bore' tɔb ki kɔnh bi'ɲmiel ni la, iden nnɔ li juore fεnm nε. <sup>26</sup> Nεn bo nε \*Satan liebe' ki kɔnh nin u'ba la, u li gben kí juore fεnm nε.

<sup>27</sup> «Uba ɲa ɲ fre kí kɔ ufeɬaa den kí fie u'bont ka ɲmɔbe tuɔm mà u li kpiε kí lɔle wɔ kí yaan. U lɔle' wɔ la, u ya yo nε u li fre kí kɔ u'den kí fie u'bont kε. <sup>28</sup> N tɔkeh nε imɔn nε, Uwien li fère binib bi'biere kε, kí fère bε bi suke' wɔ isuk i yebe ki kpe ma kε. <sup>29</sup> Ama, unil suke' \*Mifuoñaanm mεn la, Uwien ɲa ɲ fère wɔ, u'biere li juore u'bo nε haali uyo wà ɲa ɲmɔbe gbenm.» <sup>30</sup> Bi tɔke' wɔ ki ye usenpol nε ɲaake wɔ ma nnɔ, nε cère' u len' nnɔ.

*Yesu ya naa nin u'ninjieɓ*

*(Matie 12:46-50; Luk 8:19-21)*

<sup>31</sup> Tɔ, \*Yesu ya naa nin u'ninjieɓ baa' ní ki lá te saali, nε ki sɔn' bε ɲ tí yin wɔ. <sup>32</sup> Linigol kε ki guɔn' wɔ, nε bi tɔke' wɔ ki ye: «A'naa nin a'ninjieɓ [nin a'ninsieɓ]\* te saali ki nuunh ɲε.» <sup>33</sup> Nε u tɔke' bε ki ye: «ɲmε nε yé n'naa? Bi le yé n'ninjieɓ-i?» <sup>34</sup> Ki liike' ki bɔn' binib bà kε ki guɔn' wɔ nnɔ nε ki ye: «Liike mεn, n'naa nin n'ninjieɓ sɔ. <sup>35</sup> Unil wà kε teh Uwien yie nà la, wɔn nε yé n'ninjε, ki yé n'ninse, ki yé n'naa.»

## 4

*Wà plè' tibonbuor ya bim ya kpenjεnm*

*(Matie 13:1-9; Luk 8:4-8)*

<sup>1</sup> \*Yesu tí liebe' ki jon' Galile ya ñunciεnm ya gbaal ki tí wɔknh binib Uwien ya gber. Linigocienl tí taan' u'saan nε u kɔn' ki kèle' buñerbu ni miñunm bo. Linigol nnɔ kε te miñunm ya gbaal. <sup>2</sup> Nε u wɔknh bε tibont tù yebe mikpenjεnm ni, ki tɔkeh bε ki teh: <sup>3</sup> «Li cengeh mεn, ukpaal uba nε jon' wɔ ɲ tí plè tibonbuor ya bim. <sup>4</sup> U plèh ma nnɔ, miba lu' usengbε, nε inuɔn baa' ki lá jin' mè. <sup>5</sup> Mitɔm lu' kutentiεku bo, tenbim ɲa yebe nà saan. Tenbim ɲa yebe ma nnɔ, nε mɪ pen' tonm. <sup>6</sup> Uwien ñεn' ki tonge', nε ki se' mè. Ma ɲmɔbe ñaan mɔnmɔnm ma nnɔ, nε mɪ waan', ki kpo'. <sup>7</sup> Mitɔm mɔ lu' kujεgorku ni. Nε kujεgorku kpère' ki wɔbn' mè nε ma lùon'. <sup>8</sup> Mitɔm mɔ lu' kitinmɔnmɔnk bo, ki pen', ki kpère', ki lùon'. Miba lùon' pitata, mitɔm piluoluob, mitɔm mɔ kokobk.» <sup>9</sup> Nε ki tí ye: «Wà ɲmɔbe litubl la, wɔ ɲ cii.»

*Bε tien' Yesu pɔh binib mikpenjεnm-i?*

*(Matie 13:10-17; Luk 8:9-10)*

<sup>10</sup> \*Yesu nin u'tondb piik nin bile nin binib bà tuu ki paakeh u'bo nnɔ tí te bi'baba ma nnɔ, nε bi niire' wɔ mikpenjεnm nnɔ ya tingi. <sup>11</sup> Nε u jiin' bε ki ye: «Uwien nε cère' ninbi bende' u'bel ni ya gbεbɔlkaar. Binib bà ɲa te u'bel ni nnɔ wɔn, nɪ yé ben bo mikpenjεnm baba nε, <sup>12</sup> ɲɔ  
 <bε ɲ li likeh ka lenh,  
 kí li cengeh ka ciih ni'tingi,  
 nnɔ ɲa ɲí la, bi cii' ni'tingi,  
 ki lèbre' bi'tetem la,  
 Uwien li fère bε bi'biere nε.» »

*Wà plè' tibonbuor ya bim ya kpenjεnm ya tingi*

*(Matie 13:18-23; Luk 8:11-15)*

\* **3:32** Bi kpiε' ki kèle' tigbɔnt tà nnɔ ya tuba ni nin a'ninsieɓ ɲa te tu'ni.

<sup>13</sup> \*Yesu niire' be ki ye: «Na cii' mikpenjenm mie ya tingi la, ni li tien mila kí cii mà ke sien' nnò ya tingi? <sup>14</sup> Mikpenjenm nnò ya tingi sò: ukpaal nnò te ten unil wà tókeh binib Uwien ya gber ne. <sup>15</sup> Mibim mà lu' usengbe nnò yé binib bà ciih Uwien ya gber, \*Satan bàareh i ya tãan bo ki lá ñendeh tù bi'fèl ni ne. <sup>16</sup> Mibim mà lu' kutentieku bo nnò mò yé binib bà ciih Uwien ya gber, ki teknh tù tontonm nin uyensonge, <sup>17</sup> ama ka cèreh tù kpaakeh ñaan bi'fèl ni ne, ne ta wuókreh bi'ni mò. Liwòbl bii ijend tu' be tu'bo la, bi pòk kí wié Uwien ya sen ne. <sup>18</sup> Mibim mà lu' kujegorku ni nnò mò yé binib bà ciih Uwien ya gber, <sup>19</sup> ne unendun wuu ya gber nin lifaal ya yenmaale yà lèreh binib nnò nin tibont ke ya yenmaale kòh bi'fèl ni, ki wòbndeh tù, ki cèreh ta ñ fre kí sòn tuonl. <sup>20</sup> Mibim mà lu' kitinmànmànk bo nnò mò yé binib bà ciih tigber nnò, ki teknh tù, ki te ten mibim mà lònòh ne. Miba lònòh pitata, mitòm piluoluob, mitòm mò kokobk.»

### *Lifrl ya kpenjenm*

*(Luk 8:16-18)*

<sup>21</sup> Ne \*Yesu tí tóke' be ki ye: «Unil se' lifrl la, u li taa kusenku kí cubn li bo-oo? Bii u li taa lè kí sien igado ya tingi-ii? Wa ñ taa lè kí tuòn likpenkpenl bo ka-aa? <sup>22</sup> Kimé niba ña te ki buò ñò ba lá li lé nè, niba mò ña ñ juore kí li buò ñò ka lá li ñe upaan bo. <sup>23</sup> Wà ñmòbe litubl la, wò ñ cii.»

<sup>24</sup> U tí tóke' be ki ye: «Liike men ni'yul bo nin ni ciih tigber tà nò. Ni taah nà ki bikreh tibont ki dienh binitòb nnò Uwien mò li taa nen ne kí biike kí de ne. U li biike kí gèbre nnò mònòn kí de ne. <sup>25</sup> Kimé wà ñmòbe la, bi li de wò kí pukn ne. Wà ña ñmòbe la, bi li tonde kí fie u ñmòbe nà waamu nnò mònòn ne.»

### *Kitink cèreh tibonbuor pèh ma bo ya kpenjenm*

<sup>26</sup> Yesu tí len' ki ye: «Uwien ya bel naan tibonbuor ya bim mà uje uba bule' mè u'kpàabu ni ne. <sup>27</sup> U gòh-òò, u likeh ñonku nin wien ni-ii, mibim nnò pèh ne ki kpient, wa ben mĩ teh ma bo. <sup>28</sup> Kitink ne cèreh mĩ pèh, ki cinh ki kpient, kí tĩ pobe kí maa, kí tien ijifen, kí fòre nin mibim. <sup>29</sup> Nĩ lá ben' ki kpaan' micem la, ne wò ñ taa puoko kí jo kí tĩ ce.»

### *Mibim mà ñilke ya kpenjenm*

*(Matie 13:31-32, 34; Luk 13:18-19)*

<sup>30</sup> \*Yesu tí len' ki ye: «Ti li taa ba kí nenge Uwien ya bel-i? Ti li taa mìle kpenjenm ba kí nenge lè? <sup>31</sup> Lĩ naan mibim mà bi yih mè mutaar nnò ne. Men ne yé mibim mà ñilke tikpinsir ke ya bim ni kitink bo. <sup>32</sup> Ama bi bule' mè la, mĩ li pè kí kpère kí gèbre kpinsiiku ke kpinsiiku, kí tien isigben yà gbenge. Inuòn li fre kí tere isigben nnò ya songe ni kí li kò mònòn.»

<sup>33</sup> \*Yesu taah mikpenjenm ma sò ya bol mĩ yebe ki tókeh binib Uwien ya gber, bi li fre kí cii ma bo. <sup>34</sup> Wa tókeh be tuba ka pòn' be kpenjenm. Ama wòn nin u'panpaankaab lá te bi'baba la, ne u tókeh be mikpenjenm nnò ke ya tingi.

### *Yesu cère' kutafaaku ñmile'*

*(Matie 8:23-27; Luk 8:22-25)*

<sup>35</sup> Nĩ daali ya taajuòku, uwien benh wù ñ kò ma nnò, ne Yesu tóke' u'panpaankaab ki ye: «Cère men tí puore kí jo miñunciem ya gbaatòl bó.» <sup>36</sup> U cèbe' linigol nnò, ne u'panpaankaab kòn' u'saan buñerbu ni ki tuke' wò ki bure'. Inèrtò mò là pè bi'bo. <sup>37</sup> Bi joh ma nnò ne kutafaabiiku kuba fii', ki cèreh inungbegbel fih ki yildeh buñerbu nnò bo, ne miñunm kuonh bu'ni haali bù tĩ benh bù ñ gbe. <sup>38</sup> Nin nen ke ñò \*Yesu wòn dò buñerbu ni ne puoli bó ki gòh ki kuu liyukukul. Ne bi baa' ki lá finde' wò ki tóke' wò ki ye: «Cenbaa, ti benh tí luò, ne ña tóngee-ee?» <sup>39</sup> Nen saan ne u finde', ki tien' kutafaaku nnò bo, ne ki tóke' miñunm nnò ki ye: «Duòn suoo.» Ne kutafaaku go, ni'ke ñmile' cim. <sup>40</sup> Ne u niire' be ki ye: «Be tien' ni sen' bujéwaanbu nò nnò? Na laan bie ki ñmòbe tekjim ne-ee?» <sup>41</sup> Bujéwaanbu cuo' be ki gbien' ne bi niireh tób ki teh: «U cinbe ki yé be ya nitunbu sò, kutafaaku nin miñunm ke tĩ boh wò?»

## 5

*Usenpol ŋaake uje uba Yesu ŋore' wə  
(Matie 8:28-34; Luk 8:26-39)*

<sup>1</sup> \*Yesu nin u'panpaankaab tɪ baa' miŋuncienm ya gbaatɔl, Gerasa yaab ya tinfenm ni. <sup>2</sup> U ŋeh buɳerbu ni uyo wə nnə ne uje uba pək ki ŋen' ikul bó ní ki cendeh wə. Usenpol ne là ŋaake wə. <sup>3</sup> U là kə bi subeh binib tijɔlulnt tà ni nnə ne. Bi lòle' wə tikudəkr mənən la, u cienh tù ne. Nen bo ne uba ŋa ji là li fre kí cuo wə. <sup>4</sup> Bi là taah mugbiemu nin tikudəkr ne ki lùoh wə, ne u cienh tikudəkr nnə ki kəh mugbiemu nnə. Uba ŋa là li fre wə. <sup>5</sup> U là tuu ki te ikul nnə ni nin igbengben bo ne ŋonku nin wien ni ki wuureh, ki taah iten ki bungreh u'ba.

<sup>6</sup> U te fənfəkm, ki laa' Yesu, ne ki sen' ki lá gbaan' u'nintuəli, <sup>7</sup> ki wuure' ufaa bo ki ye: «Yesu, Uwien wə ŋa ŋməbe Nacentə ya Bijε, min nin sin tu le ne? N gbáanh ηε ne, Uwien bo, la jənde nni.» <sup>8</sup> Yesu təkε' usenpol nnə ki ye wə ní siere uje nnə saan ma nnə ne cère' u len' nnə. <sup>9</sup> Nen saan ne \*Yesu niire' wə ki ye: «Bi yih ηε ba?» Ne u ye: «Ti yebe ma nnə, bi yih nni Ligol ne,» <sup>10</sup> ki tūəreh ki gbáanh wə ki teh u la ŋore be kí ŋen mitinfenm nnə ni.

<sup>11</sup> Tə, fangambe biba mə là te ni'saan ligbengbenl bo ki yebe ka dindin, bi kpaah be. <sup>12</sup> Ne isenpol nnə gbáan' \*Yesu ki ye wə ní cèbe yè, yè ní jo kí tɪ kə fangambe biε nə. <sup>13</sup> U tuo', ne ɪ siere' uje nnə saan, ki tɪ kən' fangambe nnə. Ne fangambe nnə ke sen' ki tinde' ligbengbenl, ki tɪ lu' miŋunm ni ki luo'. Fangambe nnə là li baa ten itur ile.

<sup>14</sup> Bà kpaah fangambe nnə sen' ki jon' udu ni nin idugbaan ki tɪ təkε' binib tigber nnə. Bi cii' tù ma nnə, ne ki baa' be ní lá liike nà tien'. <sup>15</sup> Bi baa' \*Yesu saan ki laa' uje wə isenpol yà yebe là ŋaake wə nnə ya yenm jire' u ke ki guo, ne bujəwaanbu cuo' be. <sup>16</sup> Ne binib bà là te ni'saan ki laa' \*Yesu cère' uje nnə faake' ma bo nin nà tien' fangambe nnə təkε' be ní'ke. <sup>17</sup> Ne bi gbáan' \*Yesu ki ye wə ní ŋε bi'tinfenm ni.

<sup>18</sup> Ne u liebe' ki kən' buɳerbu. U liebeh wə ní tɪ kə buɳerbu ma nnə ne uje wə isenpol là ŋaake wə nnə gbáanh wə ki teh wə ní cère wə ní paan u'bo. <sup>19</sup> Ne u yie', ki təkε' wə ki ye: «Liebe kí kun kí tɪ təkε a'den yaab Yonbdaan muə' ηε micεcεkm ki tien' nà ke ki de' ηε nnə.» <sup>20</sup> Ne u bure' ki gəbreh mitinfenm mà bi yih mè Idu Piik nnə ni, ki təkεh binib \*Yesu tien' nà ke ki de' wə. Ne nɪ cuo' bi'ke miyəkm cεen.

*Yesu cère' upii uba faake', ki məkε' kibupiik kiba mə  
(Matie 9:18-26; Luk 8:40-56)*

<sup>21</sup> \*Yesu liebe' ki puore' miŋuncienm ya gbaatɔl nin buɳerbu ne linigocienl taan' u'saan miŋunm nnə ya gbaal. <sup>22</sup> Nen saan ne \*Sufmbε ya taanl ya duku ya cien uba baa', bi yih wə Yayirus. U laa' \*Yesu ma nnə, ne ki gbaan' u'nintuəli, <sup>23</sup> ki gbáan' wə cεen ki ye: «N'biεε benh wə ní kpo ne. N gbáanh ηε ne, den kí taa a'nuə kí paan u'bo wə ní faake kí li fuobe.» <sup>24</sup> Ne \*Yesu paan' u'bo ki bure', linigocienl pε u'bo ki pεbeh wə ikεle ke.

<sup>25</sup> Tə, upii uba mə là te ni'saan, ki laa' tifer ibin piik nin ile ta gben'. <sup>26</sup> U là jon' dəkɪemβε ligol saan, ki laa' ijend ke ya bol bi'nuə ni, ki ŋende' u'like ke ki tɪ gben' na tungreh, ama u'wien nnə kpireh ki joh ne. <sup>27-28</sup> U cii' bi lienh \*Yesu bó, ne u maale' u'yenm ni ki ye: «N mə' u'wengolkaar mənən la, n li faake ne.» Ne ki pε \*Yesu bo linigol nnə ni, ki tɪ mə' u'wengolkaar. <sup>29</sup> U'fer nnə pək ki gben' i ya taaan bo, ne u bende' u'gben ni ki ye u'wien nnə gben'-a! <sup>30</sup> U ya yo ne \*Yesu mə pək ki bende' ki ye mituəm miba ŋen' u'ni, ne ki jiebe' linigol nnə ni ki niire' ki ye: «ŋme mə' n'wengolkaar-i?» <sup>31</sup> Ne u'panpaankaab təkε' wə ki ye: «A laa' linigol liε pεbeh ηε ikεle ke ma bo ne a niireh ki teh ŋme mə' ηε-εε?» <sup>32</sup> Ne u jiebeh ki likeh ní'ke saan wə ní le udaan wə mə' wə. <sup>33</sup> Upii nnə ben nibonn nà tien' wə ma nnə, ne bujəwaanbu cuo' wə u'gbenent ŋəh. Ne u baa' ki lá gbaan' \*Yesu ya nintuəli, ki təkε' wə tigbemənt ke. <sup>34</sup> Ne \*Yesu təkε' wə ki ye: «N'biεε, a'tekjim ne ŋmien' ηε. Li joh nin uyenduən. A'wien nnə gben' nínə.»

<sup>35</sup> \*Yesu laan te ki lienh, nε binib biba ñen' Yayirus donbó ki lá tuobe' bε usen ni nε ki tóke' Yayirus ki ye: «A'bisε kpo'-a! La ji ní li ηmóbe Cenbaa yenñaabe.» <sup>36</sup> \*Yesu cii' bi len' ma bo. Nin nen kε u tóke' wó ki ye: «La fenge, teke nni kí ji baba.» <sup>37</sup> Nε ka cère' binib kε paan' u'bo, u cère' Pier nin Saak nin Saak ya ninje San baba nε paan' u'bo. <sup>38</sup> Bi tí baa' Yayirus den nε ki cii' kuwaaku bó. Binib te ni'saan ki yebe, ki muoh ki kpiendeh cεen. <sup>39</sup> \*Yesu kón' iden nnó ni nε ki niire' bε ki ye: «Bε tien' ni muoh ki ηmóbe kuwaaku nó nnó? Kibuk nnó ña kpo', kí góh nε.»

<sup>40</sup> U len' nnó ma nnó, nε bi leh wó. Nen saan nε u ñore' bi'ke ki ñen' saali, nε ki taa' kibuk nnó ya naa nin ki'baa nin u'panpaankaab bita nnó ki kón' kí te kuduku kúa ni nnó, <sup>41</sup> nε ki cuo' ki'nuó, ki tóke' kè bi'lenm ni ki ye: «Talita kumi,» ni'tingi si: «Kibupiike, n tókeh nε nε fii!»

<sup>42</sup> Nε kí fii' ki sere' i ya tàan bo, ki cuonh. Bi laa' nnó ma nnó, nε ní cuo' bi'ke miyókm ki tí kende'. Kí lá yé ibin piik nin ile ya bupiik nε. <sup>43</sup> Nε \*Yesu kpekpe' bi'bo, ki ye bi la tóke nil, nε ki ye bε ní de kè tijier kè ní ji.

## 6

### *Nasarét ya nib ña teke' Yesu ki jin'* (Matie 13:53-58; Luk 4:16-30)

<sup>1</sup> \*Yesu siere' ni'saan ki liebe' u'du ni nε u'panpaankaab paan' u'bo. <sup>2</sup> \*Saba ya daali nε u kón' bi'taanl ya duku ni, ki wóknh binib Uwien ya gber. Ní cuo' linigol là cenge u'bó nnó miyókm cεen, nε bi niireh tób ki teh: «U laa' nen kε le saan-i? U laa' la miε ya yenfuom-i? U teh miyókm ya bont tà nó, u teh mila ki teh tú? <sup>3</sup> Kanpinta ña ní-ii? Mari ya bije ña ní-ii? Saak nin Yose nin Sud nin Simón ya ninje ña ní-ii? U'ninsieb ña te niε saan-ii?» Nnó nε bi'yenm ña ηmaake' u'bo nε ba teke' u'gber. <sup>4</sup> Nε u tóke' bε ki ye: «\*Uwien ya ñobonsóknl kε ñobonsóknl ya du ni yaab nin u'densen yaab nin u'dencenl yaab baba nε ña boh wó.» <sup>5</sup> U taa' u'nuó ki paan' biwienb biba bo nε bi faake' baba ña ní la, wa ji fre ki tien' yókm ya bontónn ni'saan. <sup>6</sup> Ba teke' wó ki jin' ma nnó nε ní cuo' wó miyókm cεen.

### *Yesu sán' u'panpaankaab piik nin bile* (Matie 10:5-15; Luk 9:1-6)

U siere' ni'saan nε ki cuonh itengbaan ni ki wóknh binib tigbemónmónt. <sup>7</sup> U yin' u'panpaankaab piik nin bile nε ki sán' bε bilele, ki de' bε mituóm bε ní li ηuoh isenpol binib saan. <sup>8</sup> Nε ki tóke' bε ki ye: «Ni joh la, ni la tuke jier, ki la tuke kól, ki la cùon like, ki la tuke niba nin nitónn, ní li tuke ugbien baba, <sup>9</sup> kí cεke itacaan, ki la tuke lier ile mó. <sup>10</sup> Ni tí baa' ná kε saan bi teke' nε iden yá ni la, ni la lèbre den kí tí baa' lidaali là ni li siere ni'saan. <sup>11</sup> Ná saan ya nib ña teke' nε ki yie' ni'gber la, ní siere nè kí kpakpaare ni'taan ya tengunku\* kí wiε nè. Nen nε li yé ni'saan ya nib bo kudíeku.»

<sup>12</sup> Nε u'panpaankaab bure' ki tí kpaandeh tigbemónmónt ki teh: «Lèbre mεn ni'tetem.» <sup>13</sup> Nε ki ηuoh isenpol i yebe binib saan ki taah mikpóm ki faanh biwienb bi yebe, nε bi faakreh.

### *San wá siih binib Uwien ya ñunm ya kuum* (Matie 14:1-12; Luk 9:7-9)

<sup>14</sup> Tó, \*Yesu ya yel kpienh ni'ke saan haali uber Herod mónón tí cii', kime bi lienh \*Yesu bo ki teh San wá là siih binib Uwien ya ñunm nnó nε mεkre' bitenkpiib ni. Nen nε cère' u ηmóbe mituóm ki teh miyókm ya bont. <sup>15</sup> Bitób lienh ki teh u yé Eli nε. Bitób mó teh u yé \*Uwien ya ñobonsóknl ten biñobonsóknl bā là te uyo bo nnó nε. <sup>16</sup> Herod cii' \*Yesu ya gber ma nnó nε ki ye: «N là cère' bi tükre' San wá ya yul nnó wón nε mεkre' bitenkpiib ni.»

\* **6:11** Sufmbε bo kí kpakpaare itaan ya tengunku ya tingi si: ná kε ji tu unil la, ní yé u'yaar nε, na ji yé uba yaar.

17 Nà cère' Herod len' nnò si: wòn nin u'yul nε là cère' u'sojambε cuo' San ki lòle' wò tikudòkr ki pεkn', u'po Herodiyad bo. Kimε Herodiyad là yé Herod ya ninjε Filip ya po nε, nε u taa' wò ki kuòn'. 18 Tò, San tòke' Herod ki ye wa ηmòbe sεn wò rí taa u'ninjε ya po. 19 Nεn bo nε Herodiyad là nεn San ki yíe wò rí ku wò, ka rí fre, 20 kimε Herod là boh San nε, ki bεn ki ye u yé unimòn nε, ki yé Uwien ya nil, nε ka sè u'bo. Herod là cengeh San ya gber la, wa jí tí bεn u maaleh ki teh bà, ama u nín yíe wò rí li tuu ki cengeh u'bó nε.

21 Ama lidaali liba Herodiyad laa' u li dule nà bo. Herod maa' uwien wà nnò gòbre' ki baa', nε u tien' tijier tù yεbe, ki yin' binikpεkpiεkb nin u'sojaciεnb nin Galile ya tinfεnm ya ciεnb bε rí baa kí lá jí. 22 Bi te ki jinh ma nnò nε Herodiyad ya bisε baa' kí lá ηòn' kiciεk bi'kε ya nun bó. Uber Herod nin bà kε jinh u'saan tijier nnò ya yεnm sònge' u'bo. Nε u tòke' ujεfaan nnò ki ye: «Mie nni a yíe nà, rí de ηε.» 23 Nε ki pole' ki ye: «A mie' nni nà kε la, n li de ηε nè nε; haali ní yé n'bel ya gbiirm bolm mile mònòn la, n li tuo.»

24 Nε ujεfaan nnò ñen' ki tí niire' u'naa ki ye: «N'naa, n li tòke wò kí ye wò rí de nni ba?» Nε u tòke' u'bise ki ye: «Tòke kí ye a yíe San wà siih binib Uwien ya ñunm nnò ya yul nε.»

25 Nε u pòk ki liebe' ki kòn' i ya tàan bo uber Herod saan, ki tòke' wò ki ye: «N yíe itàan yíe bo á tükre San wà siih binib Uwien ya ñunm nnò ya yul nε kí kpíen kikensenk ni kí de nni.» 26 U len' nnò ma nnò, nε ní saa' uber Herod ya yεnm ki gbien'. Ama u pole' bicεnb ya nun bó ma nnò nεn nε cère' wa yíe'. 27 Nεn saan nε u sòn' soja uba i ya tàan bo wò rí jo kí tí gε kí tükre San ya yul ní. Nε soja nnò jon' lipεkl ni ki tí cuo' San ki tükre' liyul, 28 ki kpíen' kikensenk ni, kí lá de' ujεfaan nnò. Nε u'mò taa' ki tí de' u'naa. 29 San ya panpaankaab ci' ní te nnò, nε ki baa' kí lá yuure' u'gbenent, ki tí sube'.

### *Yesu jin' linigocienl liba*

*(Matie 14:13-21; Luk 9:10-17; San 6:1-14)*

30 Tò, \*Yesu ya tondb liebe' ki taan' u'saan, nε ki tòke' wò bi tien' nà kε nin bi wòkn' binib nà kε. 31 Binib mò te ni'saan ki yεbe, biba joh, bitòb liebeh. Nεn bo nε wòn nin u'panpaankaab ηa laa' fεnm mònòn bε rí jí jier. Nε u tòke' bε ki ye: «Cère mèn tí bure nib ηa te nà saan kí tí rí li te tí'ba kí fuore waamu.» 32 Nεn saan nε bi kòn' buñerbu ki bure' bi'baba nib ηa te nà bó.

33 Ama binib laa' bi cubn' nà bó, bà yεbe bende' bε nε ki ñen' idu kε ni, ki sεn' ki kpíe' ki baa' ni'saan nin bε. 34 \*Yesu baa' ki ñen' buñerbu ni uyo wà nnò nε ki laa' linigocienl liba. Nε ki muò' bε micεcεkm cεen, kimε bi te ten ipe yà ηa ηmòbe wà kpaah yè nε. Nεn bo nε u cin' ki tókeh bε tigber tù yεbe. 35 Uwien benh wù rí kò ma nnò nε u'panpaankaab baa' kí lá tòke' wò ki ye: «Ti te ñien ηa te nà saan nε, nε uwien mò benh wù rí kò ma nò, 36 cère binib biε nò rí jo mudufifirmu nin itengbaan yà kòkuò niε saan nò ni kí tí de niba kí jí.»

37 Nε u tòke' bε ki ye: «Ninbi bugben de bε mèn bε rí jí.» Nε bi niire' wò ki ye: «A yíe tí ñen iwentun kobiile ya tuonl ya paaku nε kí de kpònò kí lá de bε, bε rí ηmòn-ii?» 38 Nε u niire' bε ki ye: «Ni ηmòbe kpònò uηε? Jo mèn kí liike.» Nε bi bure' ki tí liike', ki liebe' ní kí lá tòke' wò ki ye: «Ti ηmòbe kpònò uηun nin ijén ile nε.»

39 Nε u tòke' u'panpaankaab ki ye bε rí cère binib nnò kε rí kèle timòsòngt bo icék icék. 40 Nε bi kèkèle' icék icék binib piηunηun nin binib kokobk. 41 Nεn saan nε u yuure' kpònò uηun nin ijén ile nnò, ki yaare' ki liike' paaki, nε ki faare' Uwien, ki kòkuò', ki taa' kí de' u'panpaankaab bε rí gbiire binib nnò kε. Bi gbiire' ijén ile nnò mò kí tí taa' kí de' bi'kε. 42 Bi'kε ηmòn' kí gbo', 43 nε bi tantaan' kpònòjenjent nin tijenjenjent tà s'ien' nnò, ki gbien' ikpencub piik nin ile. 44 Binib bà jin' tijier nnò bijeb là te itur iηun nε.

### *Yesu cuonh miñunm bo*

*(Matie 14:22-33; San 6:15-21)*

45 I ya tàan bo nε \*Yesu wòbn' u'panpaankaab ki ye bε rí liebe kí kò buñerbu nnò kí liere wò usen kí puore miñunciεnm ya gbaatòl kí jo Betsayida ya du ni ηò wòn bugben rí cèbe linigol nnò lè rí kun. 46 U cèbe' linigol nnò ma nnò nε ki don' lijuòl bo wò rí tí kàare.

47 U'panpaankaab joh ma nnɔ nɪ tɪ biire' ki laa' buɲerbu nnɔ te miɲunm ya siik ni nɛ; nɛ \*Yesu te liwɛl bo u'baba. 48 U laa' kutafaaku tobreh bɛ, nɪ faa bi'bo ki gbien' ba ji li fre kí kùre. Ukuojɛmuɔyo nɛ u cuonh miɲunm bo ki joh bi'saan ki tɪ nɛkn' bɛ ki benh wɔ rí gèbre. 49-50 Bi laa' unil cuonh miɲunm bo ma nnɔ bi maaleh ki teh nɪ yé ufenfend nɛ. Bujɛwaanbu cuo' bɛ ki gbien' nɛ bi wuure'.

Nɛ u tɔke' bɛ i ya tɔan bo ki ye: «Cuo mɛn ni'ba, Min \*Yesu nɛ, la sɛn mɛn jɛwaanbu.» 51 Nɛ ki kɔn' bi'saan buɲerbu ni. U kɔn' buɲerbu ni nɛ kutafaaku nnɔ go. Nɛ nɪ beke' bɛ cɛɛn. 52 Bi'yɛnm là libe' ma nnɔ nɛ cère' ba bɛnde' u taa' kpɔnɔ ki tien' miyɔkm ya bonn nà nnɔ ya tingi.

*Yesu cère' biwiɛnb faake' Genesarɛt ya tinfenm ni*  
(Matie 14:34-36)

53 Yesu nin u'panpaankaab tɪ baa' miɲunciɛnm ya gbaatɔl, Genesarɛt ya tinfenm ni, ki ñɛn' buɲerbu ni, nɛ ki lòle' bù. 54 Bi ñɛn' buɲerbu ni uyo nnɔ nɛ binib bɛnde' \*Yesu i ya tɔan bo. 55 Nɛ ki tiinh ki joh mitinfenm nnɔ ni ni'kɛ saan, ki tukeh biwiɛnb inagen bo. Bi cii' u te nà saan la, nɛ bi taah bɛ ki joh u'saan. 56 U jon' iducɛnciɛn ni bii itengbaan ni la, bi taah biwiɛnb nɛ ki lá siendeh binib taakeh nà saan, ki gbáanh wɔ ki teh wɔ rí cère biwiɛnb rí mɛ u'lierku ya ñɔgbɛn baba. Bà kɛ mɛ' u'lierku ya ñɔgbɛn nnɔ kɛ faake' nɛ.

## 7

*Yesu nin Sufmbɛ ya yaajɛbok ya gbɛr*  
(Matie 15:1-9)

1 \*Farisiɛnmbɛ nin \*Yiko ya wɔnwɔknɔ biba ñɛn' Yerusalem bó, ki baa' ki lá taan' \*Yesu saan. 2 Bi laa' \*Yesu ya panpaankaab biba jinh inɔbɔnjɔkn, ni'tingi si: ba nire' ki paan' iyaajɛbok ye ma bo. 3 Tɔ, \*Farisiɛnmbɛ nin Suftɔb kɛ pɛ bi'yaajɛbok bo nɛ. Ba nire' ki paan' bi'yaajɛbok ye ma bo la, ba rí ji jier. 4 Nɛ bi ñɛn' kidaak ki baa' ka sɔkre' bi'ba ki paan' bi'yaajɛbok ye ma bo la, ba rí ji jier. Bi liebe' ki ñmɔbe iyaajɛboktɔ mɔ ÿ yɛbe: tɛn tiɲunɲuwɛnt nin icùɔn nin tikur ya sɛn ya cɛndm.

5 Nɛ \*Farisiɛnmbɛ nin \*Yiko ya wɔnwɔknɔ nnɔ niire' \*Yesu ki ye: «Bɛ tien' a'panpaankaab ña pɛ ti'yaajɛbok ye ma bo?» 6 Nɛ u jiin' bɛ ki ye: «Ninbi iɲuɔn ilele ya nibɛ, Uwien ya ñɔbonsɔknl Esayi là len' ni'gbɛr ma nnɔ, u là ñmɔbe imɔn nɛ. U là len' ki ye Uwien ye:

«Binib biɛ pèkeh nni buɲɔbu ni nɛ,  
bi'yɛnm ña nɛke n'saan.

7 Bi pukeh nni fɛnm nɛ,  
ki wɔknɔ binib iyaajɛbok baba.»

8 Nɛ \*Yesu tí tɔke' bɛ ki ye: «Ni wiɛnh \*Uwien ya wɔbl, nɛ ki boh iyaajɛbok.» » 9 Nɛ ki tí tɔke' bɛ ki ye: « «Ninbi ya bùol, kí wiɛ \*Uwien ya wɔbl, kí paan ni'yaajɛbok bo ña faa-a!»

10 Kimɛ Moyis là len' ki ye: «Li boh a'naa nin a'baa», ki tí len' ki ye: «Unil tɔke' u'naa bii u'baa liɲɔbonbil la, bɛ rí ku wɔ.» 11 Ama ninbi wɔknɔ binib ki cèreh bi lienh ki teh bi bi li de bi'naambɛ nin bi'baambɛ nà nnɔ, ji yé «kɔrban nɛ» ba ji li fre kí de bɛ nè. Kɔrban ya tingi si: nɪ yé Uwien yaann nɛ. 12 Nɛn bo, ninbi nɛ cèreh ba toreh bi'naambɛ nin bi'baambɛ. 13 Nnɔ nɛ ni taah ni'yaajɛbok ki lèbeh Uwien ya gbɛr, ki tɔkeh yè ni'tɔb ki nɛbreh, ki teh tibontɔr tɛn tuu nɔ tù yɛbe.»

*Tibont tà kuɔndeh unil tijɔknt*  
(Matie 15:10-20)

14 Yesu tí yin' linigol nnɔ, nɛ ki tɔke' bɛ ki ye: «Ni'kɛ rí li cengeh n'bó ñɔ kí cii n li tɔke nɛ tigbɛr tà nɔ ya tingi. 15 Tibont tà kɔh unil ya ñɔbu ni ña rí fre kí kuɔn wɔ jɔknt. Tà ñɛh u'fɛl ni nnɔ, tun nɛ kuɔndeh wɔ tijɔknt. 16 [Wà ñmɔbe litubl la, wɔ rí cii.]»\*

\* 7:16 Bi kpiɛ' ki kele' tigbont tà nnɔ ya tuba ni migbiirm 16 ña te tu'ni.

<sup>17</sup> U siere' ki daan' linigol nnɔ ki tɪ kɔn' iden iba ni. U ya yo nɛ u'panpaankaab niire' wɔ mikpɛnjɛnm nnɔ ya tingi. <sup>18</sup> Nɛ u tɔke' bɛ ki ye: «Ni'mɔ ɲa laan biɛ ki bɛn tibont ya tingi nɛ-ɛɛ? Na bɛn ki ye tibont tɔ kɔh unil ya ɲɔbu ni ɲa ɲi fre kɪ kuɔn wɔ jɔknt-ii? <sup>19</sup> Kimɛ ta kɔh u'fɛl ni, tɔ kɔh u'puoku ni nɛ, nɛ u joh kunincɛnku ki ɲɛndeh tɔ.» \*Yesu len' nnɔ ma nnɔ, u wuɔn' ki ye jier tuba ɲa kɔɔ nɛ.

<sup>20</sup> U tɪ ye: «Tibont tɔ ɲɛh unil ya fɛl ni nnɔ, tun nɛ kuɔndeh wɔ tijɔknt. <sup>21</sup> Kimɛ tibonbiert ɲɛh unil ya fɛl ni nɛ. Tun si: iyɛnmaalbiere nin lisɔnsɔndl nin bunasubu nin linikul <sup>22</sup> nin linaɲmaal nin ununfɔke nin mibiɛrm nin milɛrkjim nin fɛnfɛnm nin mituom nin isuk nin tigbengt nin mijɔrtetem. <sup>23</sup> Tibonbiert tuu kɛ ɲɛh unil ya fɛl ni nɛ, ki kuɔndeh wɔ tijɔknt.»

*Upii uba teke' Yesu ki jin', ka yɛ Suf  
(Matie 15:21-28)*

<sup>24</sup> \*Yesu siere' ni'saan, nɛ ki jon' Tir ya tinfɛnm ni. U kɔn' iden iba ni, ka yɛ uba ɲi bɛnde kɪ ye u te ni'saan ama wa fre' ki bɔle' u'ba. <sup>25</sup> Tɔ, upii uba lɔ te mitinfɛnm nnɔ ni usɛnpol ɲaake u'bisɛ. U cii' \*Yesu bɔ, nɛ ki baa' i ya tɔan bɔ ki lɔ gbaan' u'nintuɔli. <sup>26</sup> Upii nnɔ ɲa yɛ Suf, bi maa' wɔ Siri ya tinfɛnm ya kɛle wɔ bi wɔ Fenisi nnɔ ni nɛ. U gbɔan' \*Yesu ki ye wɔ ɲi ɲɔre usɛnpol wɔ ɲaake u'bisɛ nnɔ. <sup>27</sup> Nɛ \*Yesu tɔke' wɔ ki ye: «Cɛre mubumu ɲi ji kɪ gbo kɪ yaan, kimɛ na mɔn bɛ ɲi taa mubumu ya jier kɪ wiɛ isɛngbɛle.» <sup>28</sup> Nɛ upii nnɔ ye: «Yonbdaan, ɲi yɛ imɔn nɛ, ama isɛngbɛle jinh mubumu ya jiejɔyɔl yɔ luh tingi ni nnɔ nɛ.» <sup>29</sup> Nɛ \*Yesu tɔke' wɔ ki ye: «A'ɲɔbonmɔnmɔnl liɛ bo, li jo, usɛnpol nnɔ daan' a'buk ɲɔ.»

<sup>30</sup> U liɛbe' ki kun', ki tɪ baa' ki laa' usɛnpol nnɔ mɔnbe ki daan' u'buk ɲɔ, kɪ dɔ kuduku ni.

*Yesu cɛre' ugbaanlɛntɛb uba faake'*

<sup>31</sup> \*Yesu tɪ siere' Tir ya tinfɛnm ni, ki ɲɛn' Sidɔn ya du ni, ki jon' Galile ya ɲuncienm ya kɛle wɔ te mitinfɛnm mɔ bi yih mɛ Idu Piik nnɔ bɔ. <sup>32</sup> Tɔ, binib biba tuke' ugbaanlɛntɛb uba ki baa' u'saan, ki gbɔan' wɔ ki ye wɔ ɲi taa u'nuɔ kɪ paan u'bo. <sup>33</sup> Nɛ \*Yesu taa' wɔ ki ɲɛn' linigol nnɔ ni, ki jon' ugbe, ki taa' u'nɔbii ki tuun' ugbaan nnɔ ya tub ni, ki sii' tiɲinsɛnt ki mɛ u'lɛnl, <sup>34</sup> ki yaare' ki liike' paaki, ki fuore' ki jiin', nɛ ki ye «Efata,» ni'tingi si: «Nɛre.»

<sup>35</sup> Nɛ u'tub ɲɛre' i ya tɔan bo, u'lɛnl mɔ tɛbre', nɛ u cin' ki lienh mɔnmɔnm. <sup>36</sup> Nɛ \*Yesu kpɛkpɛ' bi'bo ki ye bi la tɔke uba. Nin u kpɛkpɛ' bi'bo ma kɛ nnɔ, bi tɔɔreh ki kpaandeh tɔ nɛ. <sup>37</sup> Nɪ cuo' binib miyɔkm ki tɪ kɛnde' nɛ bi lienh ki teh: «U teh nɔ kɛ nnɔ mɔn nɛ, haali ki tɪ cɛreh igbaan mɔnmɔn ciɪh, ki cɛreh bilɛntɛb mɔ lienh.»

## 8

*Yesu tɪ jin' linigocienl liba  
(Matie 15:32-39)*

<sup>1</sup> I ya dɛn nɛ, linigocienl liba tɪ taan' \*Yesu saan. Ba ɲmɔbe niba bɛ ɲi ji, nɛ u yin' u'panpaankaab ki tɔke' bɛ ki ye: <sup>2</sup> «Linigol liɛ nɔ ɲmɔbe nni micɛɛɛkm cɛɛn nɛ. Bi te n'saan ma wienta sɔ. Ba ji ɲmɔbe niba bɛ ɲi ji. <sup>3</sup> Biba ɲɛn' nɪ fɔnfɔkm nɛ. N cɛbe' bɛ bi kunh ka jin' niba la, bi li tɪ dɔre usɛn ni.» <sup>4</sup> Nɛ u'panpaankaab jiin' wɔ ki ye: «Ti te ɲien ɲa te nɔ saan nɛ. Nɲmɛ li fre kɪ lɛ tijier niɛ saan kɪ de binib biɛ kɛ bɛ ɲi ji kɪ gbo?» <sup>5</sup> Nɛ u niire' bɛ ki ye: «Ni ɲmɔbe kpɔnɔ unɛ?» Nɛ bi ye: «Ulole.» <sup>6</sup> Nɛ u tɔke' linigol nnɔ ki ye lɛ ɲi kɛle tingi ni, nɛ ki yuure' kpɔnɔ ulole nnɔ, ki faare' Uwien, ki kɔkuɔ' ki taa' ki de' u'panpaankaab, bɛ ɲi gbiire linigol nnɔ. Nɛ bi taa' ki gbiire' bɛ. <sup>7</sup> Bi ɲmɔbe mujɛnwawaamu muba mɔ. Nɛ u yuure' mu'mɔ, ki faare' Uwien, nɛ ki ye bɛ ɲi taa mu'mɔ kɪ gbiire linigol nnɔ. <sup>8</sup> Bi'kɛ ɲmɔn' ki gbo', nɛ bi tantaan' tijenjent tɔ sɛn' nnɔ, ki gbien' ikɛnden ilole. <sup>9</sup> Binib nnɔ lɔ li baa tɛn itur inan. Nɛn saan nɛ u cɛbe' bɛ, <sup>10</sup> nɛ wɔn nin u'panpaankaab kɔn' buɲɛrbu i ya tɔan bo ki bure' Dalmanuta ya tinfɛnm bɔ.

*Bi yɛ Yesu ɲi tien miyɔkm ya bonn  
(Matie 16:1-4)*



11 \*Farisienmbɛ baa' ki lá cin' ki niɛh nin \*Yesu miniɛm. Bi yíe bɛ ń biike wɔ nɛ ki tɔkɛ' wɔ ki ye wɔ ń tien miyɔkm ya bonn ná li wuɔn kí ye u'tuɔm ńɛn' Uwien saan nɛ. 12 \*Yesu fuore' ki jiiin', nɛ ki tɔkɛ' bɛ ki ye: «Bɛ tien' fɛnfɛnnɔ ya nib biɛ nuunh bɛ ń lɛ miyɔkm ya bonn-i? N tɔkɛh nɛ imɔn nɛ, ba ń lɛ yɔkm ya bonn niba.» 13 Nɛ ki siere' bi'saan ki liɛbe' ki kɔn' buɛnbu ki joh wɔ ń tɪ puore miɲunciɛnm.

*Yesu lienh Farisienmbɛ nin Herod ya kpɔnɔ ya ńɔke bó*  
(Matie 16:5-12)

14 Tɔ, Yesu ya panpaankaab là sunde' ka tuke' kpɔnɔ. Kpɔnɔ uba kpein nɛ là te bi'saan buɛnbu ni. 15 \*Yesu kpɛkpɛ' bi'bo ki ye: «Li bɛn mɛn \*Farisienmbɛ nin Herod ya kpɔnɔ ya ńɔke bó.» 16 Nɛ bi tɔkɛh tɔb ki teh: «Ta tuke' kpɔnɔ ma nnɔ nɛ cère u len' nnɔ.»

17 \*Yesu bɛnde' bi tɔkɛh tɔb ki teh bà, nɛ ki niire' bɛ ki ye: «Bɛ tien' ni tɔkɛh tɔb ki teh na tuke' kpɔnɔ? Na laan biɛ ki freh ki sekndeh tibont nɛ-ɛɛ? Bii na ciuh tu'tingi nɛ? Ni'yɛnm biɛ ki liibe nɛ-ɛɛ? 18 Ni ɲmɔbe inun, bɛ tien' na lenh-i? Ni ɲmɔbe itub, bɛ tien' na ciuh-i? Na tien, 19 n là taa' kpɔnɔ uɲun ki kɔkuɔ', ki gbiire' binib itur inun ma nnɔ, ni là tantaan' ná sɛn' nnɔ ki gbien' ikpɛncub ubiɛn wà nɛ-ɛɛ?» Nɛ bi ye: «Piik nin ile.» 20 Nɛ u liɛbe' ki niire' bɛ ki ye: «Na tien n là taa' kpɔnɔ ulole ki kɔkuɔ', ki gbiire' binib itur inan ma nnɔ, ni là tantaan' tijenjent tà sɛn' nnɔ ki gbien' ikɛnden ubiɛn wà nɛ-ɛɛ?» Nɛ bi ye: «Ilole.» 21 Nɛ u ye: «Na laan biɛ ki ciuh tibont ya tingi nɛ-ɛɛ?»

*Yesu likre' ujuɔn uba Betsayida ya du ni*

22 Yesu nin u'panpaankaab tɪ baa' Betsayida ya du ni, nɛ bi tuke' ujuɔn uba ki baa' \*Yesu saan, ki gbáan' wɔ ki ye wɔ ń taa u'nuɔ kí mɛ wɔ. 23 \*Yesu cuo' u'nuɔ, nɛ ki dère' wɔ ki ńɛn' udu ni, ki sii' tiɲinsɛnt, ki sèkn ujuɔn nnɔ ya nun, ki taa' u'nuɔ ki paan' u'bo, ki niire' wɔ ki ye: «A lenh nibonn-ii?» 24 U likre', nɛ ki ye: «N lenh binib ama bi naan isiin nɛ ki cuonh.» 25 Nɛ \*Yesu liɛbe' ki taa' u'nuɔ ki pi' u'nun bó, u faake' nɛ ki tũare' ki ɲɛbe' inunbii ki caan' ki ji lenh tibont kɛ mɔnmɔnm. 26 Nɛ \*Yesu tɔkɛ' wɔ ki ye wɔ ń li kun ki la liɛbe udu nnɔ ni\*.

*Piɛr len' ki ye Yesu yé Uwien ya Nigɛndkɛ Kristo*  
(Matie 16:13-20; Luk 9:18-21)

27 \*Yesu nin u'panpaankaab siere' ni'saan ki bure' iduwawaale yà te ka fɔke nin Sesare Filip ya tinfɛnm nnɔ bó. Bi joh ma nnɔ nɛ u niire' bɛ ki ye: «Binib lienh ki teh n yé ɲmɛ nɛ?» 28 Nɛ bi jiiin' wɔ ki ye: «Biba lienh ki teh a yé San wà siih binib Uwien ya ńunm nɛ. Bitɔb lienh ki teh a yé Eli nɛ. Bitɔb mɔ lienh ki teh a yé \*Uwien ya ńɔbonsɔknɔ ya uba nɛ.» 29 Nɛ u niire' bɛ ki ye: «Ninbi nín teh n yé ɲmɛ nɛ?» Nɛ Piɛr jiiin' wɔ ki ye: «A yé Uwien ya Nigɛndkɛ Kristo nɛ.» 30 Nɛn saan nɛ \*Yesu kpɛkpɛ' bi'bo ki ye bi la tɔke nil u yé udaan wà.

*Yesu len' u'kuum nin u'mɛkrm bó*  
(Matie 16:21-28; Luk 9:22-27)

31 Ni ya puoli bó nɛ Yesu cin' ki tɔkɛh u'panpaankaab ki teh: «Nì kpɛ Unil ya Bijɛ ń ji ijɛnd kí gbien nɛ. \*Sufmbɛ ya ciɛnb nin bitɔtuɔrciɛnb nin \*Yiko ya wɔnwɔknɔ li wiɛ u'gbɛr, kí ku wɔ, nɛ wienta daali wɔ ń mɛkre bitɛnkpiib ni.» 32 U tɔkɛ' bɛ tigbɛr nnɔ tù wien nɛ. Nɛn saan nɛ Piɛr taa' wɔ ki jɛnde', ki tɪ kɔn' nin wɔ ki ye u la lienh ki teh nnɔ. 33 Ama \*Yesu jiebe' ki liike' u'panpaankɛtɔb nɛ ki tien' Piɛr bo ki ye: «Paare n'puoli, Satan. Kimɛ a'yɛnmaale ɲa ńɛn' Uwien saan, i yé binib yi nɛ.» 34 Nɛ ki yin' linigol nin u'panpaankaab ki tɔkɛ' bɛ ki ye: «Unil yíe wɔ ń paan n'bo la, u la tɔnge u'ba, wɔ ń li yuunh u'dɔpɔnpɔn ki bukeh ki paakeh n'bo. 35 Kimɛ wà kɛ yíe wɔ ń fie u'miɛl la, wɔn nɛ li kpo kí juore fɛnm. Ama wà kɛ li tuo kí kpo min nin tigbɛmɔnmɔnt tuu bo nnɔ, wɔn nɛ li lɛ limiɛl. 36 Unil laa' uɲɛndun wuu ni ya bont kɛ ɲɔ ki tɪ luɔ' limiɛl la, u laa' bɛ ya kpɛle nɛ? 37 Unil li taa bà kí pè kí teke

\* 8:26 Bi kpie' ki kele' tigbont tà nnɔ ya tuba ni ní kele' ki ye: «La tɪ tɔke nil tigbɛr nnɔ udu ni nɛ.»

u'miɛl-i? <sup>38</sup> Unil ye min nin n'gber ηmabe wə ife fɛnfennə ya nib bà ηa cuube Uwien saan, ki yé bibierdenb nnə saan la, udaan mə lá li ηmabe nni ife nɛ uyo wà Unil ya Bijɛ lá li baa ní nin Uwien ya tondb, wə ní li ηmabe u'Baa Uwien ya kpiɛke nnə.»

## 9

<sup>1</sup> U tí tɔke' bɛ ki ye: «N tɔkeh nɛ imə̀n nɛ, ninbi bà se niɛ saan nɔ ya biba li lɛ Uwien ya bɛl we ní nin mituəm nɛ kí yaan kí kpo.»

### *Yesu ya gbɛnɛnt lɛbre'* (Matie 17:1-13; Luk 9:28-36)

<sup>2</sup> Iwien iluob gɛbre', nɛ \*Yesu taa' Pɛr nin Saak nin San ki jɛnde' ki tí don' lijɔfɔkrl liba bo bi'baba. U'gbɛnɛnt lɛbre' bi'nun bó, <sup>3</sup> nɛ u'wɛngolkaar pende' kponkpon, ki windeh tein. Uba ηa te uɛndun wuu ni kí fre kí tien kukpɛlciɛku kù ní li piɛn nnə. <sup>4</sup> Nɛ bi laa' Eli nin Moyis puə' u'saan bi tɔkeh tigber. <sup>5</sup> Nɛn saan nɛ Pɛr tɔke' \*Yesu ki ye: «Cɛnbaa, ti te niɛ saan ma nɔ, ní mən nɛ. Cère tí pɔ ininbon ita, sin liba, Moyis liba, Eli mɔ liba.» <sup>6</sup> Pɛr ηa bɛn u li len kí ye bà, kimɛ bujɛwaanbu cuo' wən nin bipanpaankɛtəb nnə ki gbien'-a.

<sup>7</sup> Kutɛwəlgbɔnku kuba baa' ki pibn' bi'bo, nɛ bi cii' uniɛke uba bó kutɛwəlgbɔnku nnə ni u ye: «N'Bijɛ sɔ nɔ, n yíe wə, li cengeh mɛn u'bó.» <sup>8</sup> I ya tɔan bo nɛ bi jiɛbe' ki liike', ka ji laa' nitə, bi laa' \*Yesu baba nɛ se bi'saan.

<sup>9</sup> Bi jiinh lijuəl nnə ya tingi ma nnə, nɛ \*Yesu kpɛkpɛ' bi'bo ki ye bi la tɔke uba bi laa' nà nɔ kí tí baa uyo wà Unil ya Bijɛ li mɛkre bitɛnkpiib ni nnə. <sup>10</sup> Nɛ bi tuo' u ye ma nnə, ama ki ji niireh tɔb ki teh u ye wə ní ye ba nɛ ki ye «kí mɛkre bitɛnkpiib ni?» <sup>11</sup> Nɛ ki niire' wə ki ye: «Bɛ bo nɛ Yiko ya wənwəknb lienh ki teh Eli li baa nɛ kí yaan Kristo ní baa ní?» <sup>12</sup> Nɛ u jiin' bɛ ki ye: «Eli li mənbe kí kpiɛ kí baa kí lá tùre tibont kɛ nɛ kí yaan. Ama ní nín tien' mila ki liɛbe' ki kɛle' \*Uwien ya gbɔnku ni ki ye binib li jɛnde Unil ya Bijɛ kí gbien, kí yuən wə? <sup>13</sup> N tɔkeh nɛ nɛ, Eli baa' ní ηə. Nɛ bi tien' wə bi yíe ma bo. Bi tien' wə tɛn ní kɛle' ma u'bo \*Uwien ya gbɔnku ni nnə nɛ.»

### *Yesu ηəre' usɛnpol kibuk kiba saan* (Matie 17:14-21; Luk 9:37-43)

<sup>14</sup> Tɔ, \*Yesu nin u'panpaankaab bita nnə tí baa' u'panpaankɛtəb saan, nɛ ki laa' linigociɛnl se ki guən' bɛ. \*Yiko ya wənwəknb biba mə te, ki niɛh nin bɛ miniɛm. <sup>15</sup> Linigol nnə laa' \*Yesu i ya tɔan bo ma nnə, nɛ ní cuo' bi'kɛ miyɔkm cɛɛn. Nɛ bi sɛn' ki jon' ki tí fuonde' wə. <sup>16</sup> Nɛ u niire' u'panpaankaab ki ye: «Ninbi nin bɛn niɛh bɛ bo?»

<sup>17</sup> Nɛ linigol nnə ni, uje uba tɔke' wə ki ye: «Cɛnbaa, n tuke' n'buk nɛ ki baa' a'saan. Usɛnpol uba nɛ ηaake kɛ, ki tien' kɛ ulɛntɛb. <sup>18</sup> U cuo' kɛ nà saan la, u gbə̀breh kɛ nɛ, nɛ kuɛnsɛnɛjujuku puubeh ki'ñəbu bó, kí ηmənɛh iɛn, ki'gbɛnɛnt mɔ tɛreh. N gbáan' a'panpaankaab bɛ ní ηəre usɛnpol nnə, nɛ ba fre'.» <sup>19</sup> Nɛ \*Yesu tɔke' bɛ ki ye: «Ninbi fɛnfennə ya nibɛ, na teke' Uwien ki jin'. N li wuəke ni'saan kí tí kpaan mila nɛ? N li ηmabe sukɛ ni'bo kí tí kpaan mila nɛ?» Nɛ ki ye: «Taa mɛn kibuk nnə ní.»

<sup>20</sup> Nɛ bi taa' kɛ ki baa' u'saan. Usɛnpol nnə laa' \*Yesu ma nnə nɛ ki cère' ki'gbɛnɛnt ηəh pepebu, kí lu' ki bindeh, kuɛnsɛnɛjujuku puubeh ki'ñəbu bó. <sup>21</sup> Nɛ \*Yesu niire' ki'baa ki ye: «Ní cin' kɛ ma ní wuəke'-aa?» Nɛ ki'baa ye: «Ní cin' kɛ haali ki'buwaam ni nɛ. <sup>22</sup> U sɔbe ki gbə̀breh kɛ umu nin miñunm ni nɛ, ki nuunh wə ní ku kɛ. A li fre la, á muə te micɛɛkm kí tore tɛ.» <sup>23</sup> Nɛ \*Yesu ye: «Bɛ tien' a ye n li fre la? Wà teke' ki jin' ηa ní gbɛle niba.» <sup>24</sup> Nɛ kibuk nnə ya baa wuure' i ya tɔan bo ki ye: «N teke' ηɛ ki jin', tore nni, kimɛ n'tekjim nɛ pəre' nni.»

<sup>25</sup> \*Yesu laa' linigol nnə tiinh ki taakeh ní, nɛ u tien' usɛnpol nnə bo ki ye: «Usɛnpol wà teh binib igbaanlɛntɛb nnə n tɔkeh ηɛ nɛ, dàan kibuk kɛ, kí la ji ní ηɛkn kɛ lidaali liba.»

<sup>26</sup> Usɛnpol nnə wuure', nɛ ki cère' kibuk nnə ya gbɛnɛnt ηəh pepebu, nɛ ki dàan' kɛ. Kí dɔ

ki naan utenkpii, ne binib bà yebe ye kí kpo'-a! <sup>27</sup> Ama \*Yesu cuo' ki'nuo ki fin' kè. Ne kí fii' ki sere'.

<sup>28</sup> \*Yesu kun' ma nno ne u'panpaankaab niire' wə bi'baba bo ki ye: «Be tien' tinbi ŋa fre' ki ŋore' usenpol nno?» <sup>29</sup> Ne u jii'n' be ki ye: «Yie ya senpol ya bol wən, ikaare baba ŋa ní la, bonn ŋa te kí fre kí ŋore yè.»

*Yesu tí len' u'kuum nin u'mekrm bó  
(Matie 17:22-23; Luk 9:43-45)*

<sup>30</sup> Yesu nin u'panpaankaab siere' ni'saan, ne ki cuon' ki càare' Galile ya tinfenm. \*Yesu ŋa yie uba ní li ben u te nà saan, <sup>31</sup> kime u yie wə ní wəkn u'panpaankaab ne. U tóke' be ki ye: «Bi li taa Unil ya Bijé kí ŋukn binib, be ní ku wə. Ama wienta daali u li mekre bitenkpiib ni.» <sup>32</sup> U'panpaankaab ŋa cii' u'lenm nno ya tingi ne ka kaabe' be ní niire wə mə.

*Ŋme yé unikpekpiék-i?  
(Matie 18:1-5; Luk 9:46-48)*

<sup>33</sup> Yesu nin u'panpaankaab tí baa' Kapernawum ya du ni, ne ki kən' kuduku kuba ni. Bi te kuduku nno ni ma nno, ne u niire' be ki ye: «Ni bi nieh be bo usen ni?» <sup>34</sup> Ne bi se ki ŋmin, kime bi bi nieh ticien bo ne usen ni. <sup>35</sup> Nen saan ne u kèle' ki yin' u'panpaankaab piik nin bile nno ke, ne ki tóke' be ki ye: «Unil yie wə ní li yé usenlier la, wə ní tien u'ba bi'ke ya gbaarke, kí li yé bi'ke ya tonsənl.» <sup>36</sup> Ne ki taa' kibuk kiba ki sien' bi'siik ni, ki yuure' kè ki bibe', ki tóke' be ki ye: <sup>37</sup> «Wà ke teke' kibuk ten kie n'yel bo la, u teke' min ne. Wà ke teke' nni la, na yé u teke' min ne, u teke' wə sən' nni ní nno ne.»

*Wà ŋa nen te la, u se ti'ciék bó ne  
(Luk 9:49-50)*

<sup>38</sup> Nen saan ne San tóke' wə ki ye: «Cenbaa, ti laa' unil uba u ŋuəh isenpol binib saan a'yel bo. Wa pe ti'bo ma nno ne ti pien' wə.» <sup>39</sup> Ne \*Yesu ye: «La ji ní pien wə men, kime nil ŋa ní fre kí tien miyokm ya bonn n'yel bo ŋo kí pək kí len n'bo nà bre i ya taa bo. <sup>40</sup> Wà ŋa nen te la, u se ti'ciék bó ne. <sup>41</sup> N tókeh ne imən ne, wà ke de' ne kiŋunyibuok ki ye ni yé Kristo yaab ma nno ne la, wa ní lúo u'suul fiebu.»

*La cère ubaan uba ní ture Uwien ya sen  
(Matie 18:6-9; Luk 17:1-2)*

<sup>42</sup> «Ama ibaan yà teke' nni ki jin' nə, unil cère' i'ni uba ture' Uwien ya sen la, bi bi taa' linəcienl, ki jən' u'tule ni, ki ture' wə ki wíe' miñuncienm ni la, ní bi li tu udaan bo. <sup>43</sup> A'nuo ne cèreh a biih la, cere wù. A ŋməbe unuo uba ŋo ki laa' limiel là ŋa ŋməbe gbenm la, ní tu nin á li ŋməbe inuo ile, ŋo kí kə umucencien wà ŋa ní kpiin ni. <sup>44</sup> [Ni'saan, «Mu ŋa ní kpiin. Ininbieb yà ŋmənh tigbenent mə ŋa ní kpo.»]\* <sup>45</sup> A'taal ne cèreh a biih la, cere lè. A ŋməbe litaal liba ŋo ki laa' limiel là ŋa ŋməbe gbenm la, ní tu nin á li ŋməbe itaan ile, ŋo kí kə umu wà ŋa ní kpiin ni. [ <sup>46</sup> Ni'saan, «Mu ŋa ní kpiin. Ininbieb yà ŋmənh tigbenent mə ŋa ní kpo.»]† <sup>47</sup> A'nunbu ne cèreh a biih la, likre bù. A ŋməbe bununbu buba ki kən' Uwien ya bel ni la, ní tu nin á li ŋməbe inun ile, ŋo kí kə umu wà ŋa ní kpiin ni. <sup>48</sup> Ni'saan, «Mu ŋa ní kpiin. Ininbieb yà ŋmənh tigbenent mə ŋa ní kpo.»

<sup>49</sup> «Umu ne li cère unil ke ní ŋmaake ten miyaam. <sup>50</sup> Miyaam yé nibonn nà mən ne. Ama mí saa' ka ji ŋme la, niba ŋa te kí ji ní fre kí ŋmaake mè. Ní li ŋme ten miyaam, kí li ŋme nin tob.»

## 10

*Uwien taan' nà la, nil la bore nè  
(Matie 19:1-12; Luk 16:18)*

\* **9:44** Bi kpie' ki kele' tigbont tà nno ya tuba ni migbiirm 44 ŋa te tu'ni. † **9:46** Liike 9:44.

1 \*Yesu siere' ni'saan, nε ki jon' Sude ya tinfɛnm mà te Sudɛn ya kpenpuol bó nnɔ ni. Inigol tí taan' u'saan, nε u tí wɔkn' bε tɛn u tí n̄ teh ma bo.

2 \*Farisienmbε biba nεkn' wɔ ki yíe bε n̄ biike wɔ, nε ki niire' wɔ ki ye: «Ujε ηmɔbe usɛn wɔ n̄ wiε u'po-oo?» 3 Nε u niire' bε ki ye: «Moyis là ye ní li teh mila?» 4 Nε bi ye: «Moyis là ye ujε yíe wɔ n̄ wiε u'po la, wɔ n̄ kele kugbɔnku kí de wɔ kí wuɔn kí ye u wiε' wɔ.» 5 Nε \*Yesu ye: «Ni'yufaa bo nε cère' Moyis là kele' ki ye ní li teh nnɔ. 6 Ama micincinm, uyo wà Uwien là n̄en' unɛndun wuu nnɔ, «u là n̄en' ujε nin upii nε. 7 Nεn nε cère' ujε kuɔn' upii la, u li dàan u'naa nin u'baa, 8 nε bεn bile nnɔ n̄ taan kí tien unibaab.» Nnɔ nε ba ji te nib bile, bi ji yé unibaab nε. 9 Tɔ, Uwien taan' nà la, nil la bore n̄.»

10 Bi tí baa' iden nε u'panpaankaab mɔ liebe' ki niire' wɔ tigbɛr nnɔ bo. 11 Nε u jiin' bε ki ye: «Ujε wà wiε' u'po, ki tí kuɔn' upiitɔ la, ujε nnɔ yé ujɛnaɲmaa nε u'po ukpiɛk nnɔ bo. 12 Upii wà fii' u'cε saan, ki tí kun' ujetɔ la, upii nnɔ yé upiinaɲmaa nε.»

### *Yesu nin mubumu*

*(Matie 19:13-15; Luk 18:15-17)*

13 Tɔ, binib tukeh mubumu, ki bàareh \*Yesu saan ηɔ wɔ n̄ mε mù, nε u'panpaankaab kɔnh nin bε. 14 U laa' bi kɔnh nin bε ma nnɔ, na ηmaake' wɔ, nε u tɔke' bε ki ye: «Cère mɛn mubumu mù n̄ li bàareh n'saan. La piendeh mù mɛn, kimε binib bà te tɛn mubumu nε si Uwien ya bɛl. 15 N tɔkeh nε imɔn nε, wà kε ηa teke' Uwien ya bɛl ya gbɛr kibuk yaam la, wa n̄ kɔ lí'ni.» 16 Nεn saan nε u yuunh mubumu nnɔ, ki taah u'nuɔ ki paakeh mu'bo, ki teh mù Uwien ya mɔnm.

### *Ufàadaan uba ya gbɛr*

*(Matie 19:16-30; Luk 18:18-30)*

17 \*Yesu siereh uyo wà nnɔ, nε ujε uba sɛn' ki baa' ki lá gbaan' u'nintuɔli, ki niire' wɔ ki ye: «Cɛnbaa wà mɔn, n li tien mila kí lε limiɛl là ηa ηmɔbe gbenm-i?» 18 Nε \*Yesu niire' wɔ ki ye: «Bε tien' a yih nni wà mɔn-i? Uwien baba ηa n̄í la, uba ηa mɔn. 19 A bɛn iwɔb yà ye: «La ku nil, ki la teh naɲmaal, ki la suh, ki la nɛndeh nib bo, ki la jinh nib, kí li boh a'naa nin a'baa nnɔ.» 20 Nε ujε nnɔ ye: «Cɛnbaa, n boh ni'kε haali n'buwaam ni nε.» 21 \*Yesu liike' wɔ, u'yɛnm songe' u'bo, nε u tɔke' wɔ ki ye: «Nibonn niba nε pɔre' ηε. Jo kí tí kuɔre a ηmɔbe tibont tà kε nnɔ, kí taa ilike nnɔ kí de bicεcɛkɛnb, kí li ηmɔbe lifaal paaki bó, ηɔ kí baa kí lá paan n'bo.» 22 \*Yesu len' nnɔ ma nnɔ, nε ujε nnɔ saa' u'nun bó, ki siere' ki bure' nin uyɛnsaa, kimε u ηmɔbe lifaal ki gbien'.

23 \*Yesu jiεbe' ki liike' u'panpaankaab, nε ki tɔke' bε ki ye: «Nì faa ki gbien' nin binib bà ηmɔbe lifaal nnɔ n̄ kɔ Uwien ya bɛl ni.» 24 U len' nnɔ ma nnɔ, nε miyɔkm cuo' u'panpaankaab cɛɛn, nε u tí tɔke' bε ki ye: «N'bumu, Uwien ya bɛl ni ya kɔm faa cɛɛn nε. 25 Nì faa nin ufàandaan n̄ kɔ Uwien ya bɛl ni ki cɛn' n̄ɔkma n̄ càare mikpɛlpienbonm ni.» 26 Nì tùɔre' ki beke' bε cɛɛn, nε bi tɔkeh tɔb ki teh: «O, n̄ te nnɔ la, ηmε li fre kí ηmɛre?» 27 \*Yesu caan' bi'bo inun, nε ki tɔke' bε ki ye: «Binib nε ηa n̄ fre, Uwien wɔn ηa n̄ gbɛle niba, u li fre kí tien ni'kε.»

28 Nε Píɛr tɔke' wɔ ki ye: «Tinbi wɔn la, ti dàan' tibont kε nε ki paan' a'bo-a!» 29 Nε \*Yesu ye: «N tɔkeh nε imɔn nε, unil wà kε dàan' u'den bii u'ninjieb bii u'ninsiɛb bii u'naa bii u'baa bii u'bumu bii u'kpàan min nin tigbɛmɔnmɔnt bo la, 30 u li lε iden nin ninjieb nin ninsiɛb nin naambε nin mubumu nin ikpàan, ni'kε bolm kobk fɛnfɛnnɔ, ama u li lε ijend mɔ. Nε uyo wà we ní nnɔ, u lá li lε limiɛl là ηa ηmɔbe gbenm. 31 Bisɛnlierb lá li paan puoli ki yebe. Puoli bó yaab mɔ lá li liere usɛn ki yebe.»

### *Yesu tí len' u'kuum nin u'mεkrm bó nta bo*

*(Matie 20:17-19; Luk 18:31-34)*

32 \*Yesu nin u'panpaankaab doh Yerusalem bó, nε u le usɛn. Bi joh ma nnɔ u'panpaankaab ya yɛnm saa' nε bujɛwaanbu cuo' bà mɔ pɛ u'bo nnɔ. Nεn saan nε u tí yin' u'panpaankaab piik nin bile nnɔ u'ba saan nε ki cin' ki tɔkeh bε nà li tí tu wɔ ni'bo.

<sup>33</sup> U tãke' bε ki ye: «Li cengeh mεn, ti doh Yerusalem bó nε. Ti tĩ baa' la, bi li taa Unil ya Bijε kí ηukn bitotuarcienb nin \*Yiko ya wɔnwɔknb, bε rí bu wɔ tibuur, kí ye u kpε mikuum, kí taa wɔ kí ηukn bà ηa yé Sufmbε. <sup>34</sup> Bi li lè wɔ, kí cεre u'bo tiñinsεnt, kí ñĩ wɔ inalεbe, kí yaan kí ku wɔ, nε wienta daali wɔ rí mεkre bitenkpiib ni.»

*Saak nin San ya miεbu*  
(Matie 20:20-28)

<sup>35</sup> Tɔ, Sebede ya bijieɓ Saak nin San nekn' Yesu, nε ki tãke' wɔ ki ye: «Cεnbaa, ti yíe á tuo kí tien ti li miε ηε nà nε.» <sup>36</sup> Nε u niire' bε ki ye: «Ni yíe rí tien ba nε kí de nε?» <sup>37</sup> Nε bi ye: «A lá jin' a'bel la, á cère ti'ni uba rí li kε a'nɔjie bó, utɔ mɔ rí li kε a'nɔgen bó.» <sup>38</sup> Nε u ye: «Na bεn ni miεh nibonn nà. Ni li fre kí ji n li ji ijend yà nnɔ-ɔɔ?» Bii ni li fre kí kɔ n li kɔ micεcεkm mà ni nnɔ ni-ii? \* <sup>39</sup> Nε bi ye: «Ti li fre.» Nε u ye: «Imɔn, ni li ji n li ji ijend yà nnɔ, ki li kɔ n li kɔ micεcεkm mà ni nnɔ ni. <sup>40</sup> Ama binib bà li kèle n'nɔjie nin n'nɔgen bó nnɔ wɔn, na yé min nε li gènde bε. Uwien nε li de mifεnm nnɔ u bonde' mè ki ble' binib bà nnɔ.»

<sup>41</sup> U'panpaankaab piik bà s'ien' nnɔ cii' Saak nin San tãke' wɔ ki ye bà, nε bi'benku ni cin' ki beh bi'bo. <sup>42</sup> Nεn saan nε u yin' bε u'ba saan ki tãke' bε ki ye: «Ni bεn ñĩ te ma uηendun wuu ni. Bà yé idu ya berb wɔbndeh i'nib nε, nε bà ηmɔbe ticiεnt nnɔ wɔngeh bε bi'tuɔm kpε ma bo. <sup>43</sup> Na rí li te nnɔ ninbi ni. Ni'ni wà yíe wɔ rí li yé uciεn la, wɔ rí tien u'ba ni'tonsɔn. <sup>44</sup> Ni'ni wà yíe wɔ rí li yé usenlier la, wɔ rí tien u'ba ni'kε ya yonb. <sup>45</sup> Kime Unil ya Bijε ηa baa' uηendun wuu ni bε rí sɔn kí de wɔ. U baa' wɔn nε rí sɔn kí de binib, kí kpo ηɔ kí de binib bà yebe kí wiε.»

*Yesu likre' Bartime*  
(Matie 20:29-34; Luk 18:35-43)

<sup>46</sup> \*Yesu nin u'panpaankaab tĩ baa' Seriko ya du ni. Bi ñεh u'ni uyo wà nnɔ nε linigociεnl paan' bi'bo. Ujuɔn uba kε sengbaal kí miεh, bi yih wɔ Bartime, u yé Time ya bijε. <sup>47</sup> U cii' bi ye Nasaret ya \*Yesu nε gèbreh, nε u cin' ki wuureh ki teh: «Yesu, \*Dafid ya yaabile, muɔ nni micεcεkm.»

<sup>48</sup> Linigol nnɔ tengeh u'bo ki teh wɔ rí ηmile, ama u tũɔreh ki wuureh nε ki teh: «\*Dafid ya yaabile, muɔ nni micεcεkm.» <sup>49</sup> Nε \*Yesu sere' ki ye: «Yin wɔ mεn ní.» Nε bi yin' wɔ ki tãke' wɔ ki ye: «Cuɔ a'ba! Fii kí sere, u yih ηε.»

<sup>50</sup> Nε u wiε' u'lierɓbenku, ki fii' wukbu, ki baa' \*Yesu saan. <sup>51</sup> \*Yesu niire' wɔ ki ye: «A yíe rí tien ba kí de ηε?» Nε u ye: «Cεnbaa, n yíe rí likre nε.» <sup>52</sup> Nε \*Yesu ye: «Li joh, a'tekjim nε ηmien' ηε.» U likre' i ya tàan bo, nε ki paan' \*Yesu bo.

## 11

*Binib kpiεkreh Yesu u tĩ kɔn' Yerusalem ni*  
(Matie 21:1-11; Luk 19:28-40; San 12:12-19)

<sup>1</sup> \*Yesu nin u'panpaankaab tĩ neke Yerusalem ki tuo' Betifaaje nin Betani ya du. I te Olifi ya siin ya juɔl bó nε. Bi tĩ tuo' ni'saan ma nnɔ, nε u sɔn' u'panpaankaab ni bile <sup>2</sup> ki tãke' bε ki ye: «Li joh mεn udu wà te inun bó nɔ ni. Ni tĩ kɔn' u'ni la, ni li pɔk kí lε uηuunfanfaan uba lùo. Uba ηa laan jèke' wɔ. Ní lore wɔ kí taa ní. <sup>3</sup> Unil niire' nε ki ye bε tien' ni loreh wɔ la, ní ye: «Yonbdaan nε ciεke wɔ. U li jiin wɔ ní fεnfεnnɔ wuɔ.» »

<sup>4</sup> Bi bure', nε ki tĩ laa' uηuunfanfaan nnɔ lùo iden iba saali bunañɔbu saan ki neke usen. Nε bi cin' ki loreh wɔ. <sup>5</sup> Binib bà se ni'saan nnɔ ya biba niire' bε ki ye: «Ni teh ba sɔ? Bε tien' ni loreh uηuunfanfaan wuɔ nɔ?» <sup>6</sup> Nε bi jiin' bε \*Yesu bi ye bε rí ye ma nnɔ. Nε binib nnɔ cèbe' bε bi bure', <sup>7</sup> ki tuke' uηuunfanfaan nnɔ ki baa' \*Yesu saan, nε ki taa' bi'lier ki paan' u'bo, \*Yesu jèke'. <sup>8</sup> Nεn saan nε biba taah bi'lier ki pèreh usen ni ki yebe. Bitɔb kɔh kumuɔku ni, ki bereh tifer ki mɔ lá pèreh. <sup>9</sup> Bà le usen nnɔ nin bà pε puoli nnɔ kε wuureh

\* **10:38** Yesu taa' tinennεnt tule nε ki wuɔn' ijend nnɔ yebe ki kpε ma bo. Tun si: kí ñu kijendyiek ni bii kí lùo ijend ni.

ki teh: «Osana\* , Uwien ya mɔnm ń li te wà we ní Yonbdaan ya yel bo nnɔ bo. <sup>10</sup>Uwien ya mɔnm ń li te ti'yaaje \*Dafid ya bɛl là we ní nnɔ bo. Osana, Uwien wà te paaki bó.»

<sup>11</sup>Tɔ, \*Yesu ti'baa' Yerusalem, ki kɔn' Uwien ya duku† ya luo bo, ki liike' tibont kɛ. Uwien benh wù ń kɔ ma nnɔ, nɛ wɔn nin u'panpaankaab piik nin bile nnɔ ñɛn' ki bure' Betani ya du bó.

*Yesu wiɛ' bukenkenbu buba miɲùum*  
(Matie 21:18-19)

<sup>12</sup>Kutaaku faa', nɛ \*Yesu nin u'panpaankaab ñɛn' Betani ya du ni ki bure'. Bi joh ma nnɔ nɛ mikɔnm ti cuo' wɔ. <sup>13</sup>U laa' bukenkenbu buba ti se fɔnfɔkm ki ɲmɔbe tifer. Nɛ u jon' wɔ ń ti liike u li ɛ niba bu'bo bii wa ń ɛ. U ti'baa' bu'nintuɔli, ki laa' tifer baba nɛ bu'bo. Kimɛ na là yé kenken ya lɔnlɔnyo. <sup>14</sup>Nɛ u tɔke' busubu nnɔ ki ye: «Uba ɲa ji li ɛ bil liba a'bo fiebu.» Nɛ u'panpaankaab cii' u len' ki ye bà.

*Yesu ɲɔre' binib Uwien ya duku ya luo bo*  
(Matie 21:12-17; Luk 19:45-48; San 2:13-22)

<sup>15</sup>Yesu nin u'panpaankaab ti'baa' Yerusalem. Nɛ \*Yesu kɔn' Uwien ya duku ya luo bo, ki cin' ki ɲuɔh binib bà kuɔreh tiwent nin bà daanh tiwent nnɔ ki ñɛndeh; ki tureh bilikkpendb ya teb nin bà kuɔreh inɛnjel nnɔ ya biɛmu ki gbɔbreh. <sup>16</sup>Wa cɛreh nib tukeh went ki gɛbreh Uwien ya duku ya luo bo.

<sup>17</sup>Nɛn saan nɛ u tɔke' bɛ ki ye:

«Nì keɛle' \*Uwien ya gbɔnku ni ki ye:

«Bi li yin n'duku inibol kɛ ya kaare ya duku nɛ»,  
ama ninbi taa' kù ki tien' binasub ya tantaanbùol nɛ.»

<sup>18</sup>Bitɔtuɔrciɛnb nin \*Yiko ya wɔnwɔknɔb cii' \*Yesu tien' ma bo. Nɛ bi nuunh bi li tien ma kí ku wɔ, ama ki ji fenge wɔ. Kimɛ u'wɔknm sɔnge linigol nnɔ ya yɛnm cɛɛn nɛ. <sup>19</sup>Ni juɔre' ma nnɔ, nɛ \*Yesu nin u'panpaankaab tí siere' udu nnɔ ni.

*Yesu wiɛ' bukenkenbu búa miɲùum nnɔ kuore'*  
(Matie 21:20-22)

<sup>20</sup>Kuteɲɛsɔnsɔnku, nɛ bi cuonh ki gɛbreh bukenkenbu nnɔ saan, ki laa' bù kuore' paaki ki ti'ci' tingi. <sup>21</sup>Nɛ Piɛr tiere' nà wun tien', nɛ ki tɔke' \*Yesu ki ye: «Cɛnbaa, liike, a wun wiɛ' bukenkenbu búa miɲùum nnɔ, kuore'-a!» <sup>22</sup>Nɛ \*Yesu tɔke' bɛ ki ye: «Teke mɛn Uwien kí ji. <sup>23</sup>N tɔkeh nɛ imɔn nɛ, unil wà kɛ li tɔke lijuɔl liɛ kí ye lè ń fii kí ti lu miɲunciɛnm ni, ki teke' ki jin' ki ye nì li tien ten u len' ma bo, ka maaleh milele la, nì li tien nnɔ nɛ. <sup>24</sup>Nɛn bo nɛ n tɔkeh nɛ ki teh ni miɛ' Uwien nibonn nà kɛ ni'kaare ni la, ní li du kí ye ni laa' nɛ ɲɔ, nɛ ni li mɔnbe kí ɛ nè nɛ. <sup>25</sup>Uyo wà ni te ki kàareh, kí lá tiere ki ye uba ɲmɔbe nɛ tigber tà kɛ la, ní fère udaan ɲɔ ni'Baa wà te paaki bó nnɔ mɔ ń fère nɛ ni'biil. [ <sup>26</sup>Ama na fère' ni'tɔb la, ni'Baa wà te paaki bó mɔ ɲa ń fère nɛ.]»‡

*Bi niire' Yesu wà de' wɔ usɛn wɔ ń tien u teh nà nɔ?*  
(Matie 21:23-27; Luk 20:1-8)

<sup>27</sup>Yesu nin u'panpaankaab tí liebe' ki baa' Yerusalem ni. \*Yesu kɔn' ki cuonh Uwien ya duku ya luo bo, nɛ bitɔtuɔrciɛnb nin \*Yiko ya wɔnwɔknɔb nin \*Sufmbɛ ya ciɛnb baa' u'saan, <sup>28</sup>ki niire' wɔ ki ye: «A ɲmɔbe usɛn á tien a teh nà nɔ-ɔɔ? Nɲmɛ nɛ de' ɲɛ usɛn á tien nɛ?» <sup>29</sup>Nɛ u ye: «N'mɔ li niire nɛ iniire iba kpein nɛ. Ni fre' ki jiin' nni la, n'mɔ li tɔke nɛ n ɲmɔbe usɛn wà ki teh n teh nà nɔ. <sup>30</sup>San là siih binib Uwien ya ñunm ma nnɔ, ɲmɛ nɛ là de' wɔ usɛn-i? Uwien bii binib nɛ? Tɔke nni mɛn.»

<sup>31</sup>Nɛn saan nɛ bi tɔkeh tɔb ki teh: «Ti ye Uwien nɛ de' wɔ usɛn la, u li niire tɛ kí ye: «Bɛ tien' ta là teke' wɔ ki jin'-i?» <sup>32</sup>Ta ń fre kí ye binib mɔ sɔ.» Bi fenge linigol nnɔ mɔ, kime

\* 11:9 Liike Matie 21:9. † 11:11 Liike Matie 12:5. ‡ 11:26 Bi kpie' ki keɛle' tigbont tà nnɔ ya tuba migbiirm 26 ɲa te tu'ni.

bi'ke tuo' ki ye San là cinbe ki yé \*Uwien ya ñabonsaknl ne. <sup>33</sup> Ne bi tóke' \*Yesu ki ye: «Ta ben.» Ne u'mo ye: «N'mo ña ben, ka ní tóke ne wà de' nni usen ní tien n teh nà nò mò.»

## 12

### *Bikpàab bà bre ya kpɛnɛnm* (Matie 21:33-46; Luk 20:9-19)

<sup>1</sup> Ni ya puoli bó ne \*Yesu pɔn' be mikpɛnɛnm ki ye: «Uje uba ne là ñmòbe bukpàabu, ki caan' bukpàabu nnò ni tisir tà bi taah tu'bii ki ñeh fɛn nnò, ne ki beke' ki linde' bù, ki gbhin' kubùoku kùà bi li ñmɛngɛh isibii nnò bu'ni, ki caan' kininbɛntaak bu'ni, ki taa' bù ki guun' bikpàab biba, ne ki bure' usen. <sup>2</sup> Uyo wà isibii nnò tì ben' nnò, ne u sɔn' utonsɔnl uba bikpàab nnò saan, wò ní tì teke wɔn ukpɛdaan ya bó ní. <sup>3</sup> Utonsɔnl nnò tì baa' ne bi cuo' wò ki ñi', ki ñɔre' wò, u liebe' inuòkuon. <sup>4</sup> Ukpɛdaan nnò tì sɔn' utonsɔntò bi'saan. Ne bi tì ñi'ni' ki cube' u'yul, ki susuke' wò. <sup>5</sup> U tì liebe' ki sɔn' utonsɔntò bi'saan. Wɔn tì baa' ma, bi ku' wò ne. U liebe' ki sɔnsɔn' bitonsɔnb bi'saan bi yebe, bi tì ñi'ni' biba, ki kuku' bitòb. <sup>6</sup> U'bijɛ baba ne ji sɛn' u'saan, u yíe u'bijɛ nnò cɛɛn. Ne u fɔre' ki sɔn' wò bi'saan, ki maaleh ki teh u yé u'bijɛ ma nnò, bi li tì bo wò ne. <sup>7</sup> Ama bikpàab nnò laa' u'bijɛ nnò we ní ma nnò, ne bi tóke' tòb ki ye: «Wɔn ne yé u'faajil, cère mɛn tì ku wò ñò lifaal nnò ní juore tì yaal.» <sup>8</sup> Ne bi cuo' wò ki ku', ki ñɛn' ki tì wiɛ' kpɛgbaal.

<sup>9</sup> «Tò, ukpɛdaan nnò li tien mila? U li baa kí lá ku bikpàab nnò ne, kí taa bukpàabu nnò kí guun bikpɛtòb. <sup>10</sup> Na kaan' \*Uwien ya gbɔnku ni ní kele' nà saan ki ye: «Litɛnl là bidumɛb wiɛ' lè nnò, len ne lá tien' litɛnkpɛkl là co kuduku nnò ne-ɛɛ?»

<sup>11</sup> Yonbdaan ne tien' nnò, ne ní ñmòbe kuñuòrku tì'nun bó.» »

<sup>12</sup> \*Sufmbɛ ya ciɛnb bɛnde' ki ye \*Yesu pɔn' ben ne mikpɛnɛnm. Nɛn bo ne bi'nun món be ní cuo wò, ama bi fɛnge' linigol nnò ne ki siere' ki dàan' wò.

### *Sesa ya lɛnpolike* (Matie 22:15-22; Luk 20:20-26)

<sup>13</sup> Bi sɔn' \*Farisienmbɛ biba nin ubɛr Herod yaab ya biba \*Yesu saan be ní tì dele wò, wò ní len kí lòle u'ba. <sup>14</sup> Bi tì baa' ne ki tóke' wò ki ye: «Cɛnbaa, ti bɛn ki ye a tókeh tigbɛmònt ne, ka fɛnge uba, ka boh uba ki cɛn' u'tò. A wɔngɛh tɛ Uwien ya sɛn mɔnmɔnm ne. Tò, ti ñmòbe usen tì li pɛh lɛnpò ki dienɛ ubɛrciɛn Sesa bii ta ñmòbe?» \*Tí li pɛh bii ti la pɛh?»

<sup>15</sup> \*Yesu bɛn ki ye bi yé iñuɔn ilele ya nib ne, ne ki tóke' be ki ye: «Bɛ tien' ni bíkreh nni? Taa mɛn milikbim miba ní ní liike.» <sup>16</sup> Bi taa' ní; ne u niire' be ki ye: «Ñmɛ ya nɛnnɛnku nin u'yel te mi'bo?» Ne bi ye: «Uɛrciɛn Sesa.» <sup>17</sup> Ne u tóke' be ki ye: «Taa mɛn nà yé Sesa yaann kí de Sesa, kí taa nà mò yé Uwien yaann, kí de Uwien.» U len' nnò ma nnò ne ní cuo' be miyòkm cɛɛn.

### *Bitɛnkpɛib ya mɛkrm ya gbɛr* (Matie 22:23-33; Luk 20:27-40)

<sup>18</sup> Ní ya puoli ne Saduseyɛnmbɛ biba baa' \*Yesu saan. Bɛn ne lienɛ ki teh bitɛnkpɛib ña ní mɛkre nnò. <sup>19</sup> Bi tóke' wò ki ye: «Cɛnbaa, Moyis là kele' yiko ki de' tɛ ki ye: «Unil ya ninjɛ kpo' ki cère' u'pò, ka ñmòbe buk la, wò ní kere ukpɔpii nnò, kí maa mubumu kí de u'ninjɛ wà kpo' nnò.» <sup>20</sup> Tò, ninjɛb bilole biba ne là te, ne ukpɛk lá kuɔn' upii, ki kpo', ka maa' buk. <sup>21</sup> Wà tò u'bo nnò kere' ukpɔpii nnò ki mò kpo' ka maa' buk. Wà mò tò wɔn bo nnò mò kere' wò ki mò kpo' ka maa' buk. <sup>22</sup> Bijɛb bilole nnò kɛ tien' nnò ki kpo' ka maa' buk. Upii nnò mò tì fɔre' ki kpo'. <sup>23</sup> Tò, bitɛnkpɛib lá mɛkre' uyo wà la, ñmɛ li si upii nnò? Kime bi'ke bilole kuɔn' wò ki tì bòn' ne.»

\* 12:14 Liike Matie 22:17.

<sup>24</sup> Nε \*Yesu jiin' bε ki ye: «Na ben nà kele' \*Uwien ya gbɔnku ni ya tingi, ka ben Uwien ya tuɔm kpε ma bo. Nεn nε cεreh ni tũreh. <sup>25</sup> Bitɛnkpiib lá mɛkre' la, jeb ŋa ní kuɔn piib, piib mɔ ŋa ní kun cεr. Bi li te tɛn Uwien ya tondb nε paaki bó. <sup>26</sup> Bitɛnkpiib ya mɛkrm mɛn la, na kaan' Moyis ya gbɔnku ni nà saan Uwien là len' nin Moyis kufɛtuku kuba saan kù teknh umu ka wih nnɔ nε-εε? U là tɔke' Moyis ki ye: «Min nε yé \*Abraham nin \*Isaak nin Sakɔb ya Wien.» <sup>27</sup> Uwien ŋa yé tɛnkpiib ya Wien, u yé bà fuobe ya Wien nε. Ninbi lienh ki teh bitɛnkpiib ŋa ní mɛkre ma nnɔ ni tũre' kpɛlkpɛl nε.»

*Li lε wɔbl yé wɔbkpiɛkl-i?*

*(Matie 22:34-40; Luk 10:25-28)*

<sup>28</sup> \*Yiko ya wɔnwɔknl uba là te ni'saan ki cii' bi nieh nin tɔb ma, nε ki laa' \*Yesu jiin' bε mɔnmɔnm ma bo. U nɛkn' \*Yesu ki niire' wɔ ki ye: «Iwɔb kε nni li lε yé likpiɛkl-i?» <sup>29</sup> Nε \*Yesu jiin' wɔ ki ye: «Liwɔbkpiɛkl si: «Ninbi Israyel yaabe, li cengeh mɛn: Yonbdaan Uwien baba nε yé Yonbdaan. <sup>30</sup> Li yíe a'Yonbdaan Uwien nin a'fɛl kε nin a'tetem kε nin a'yɛnmaale kε nin a'tuɔm kε.» <sup>31</sup> Liwɔbl là tɔ si: «Li yíe a'tɔ tɛn a'yíe a'ba ma bo.» Wɔbl liba ŋa te ki gɛbre' liε ya wɔbl.»

<sup>32</sup> Nε u tɔke' \*Yesu ki ye: «Cɛnbaa, a tɔke' tigbɛmɔnt nε. A tɔke' ki ye Yonbdaan Uwien yé Uwenbaabe nε, uba ŋa te ki pukn' u'bó ma nnɔ, tũ te nε. <sup>33</sup> Unil yíe Uwien nin u'fɛl kε nin u'yɛnmaale kε nin u'tuɔm kε, ki yíe u'tɔ tɛn u'yíe u'ba ma bo la, nɛn nε mɔn ki cɛn' wɔ ní li taah tiwɛnt ki teh ituɔrɛ ki wíndeh ki dienh Uwien nin mipum kε ya bol.» <sup>34</sup> \*Yesu laa' u len' nin mibɛnm, nε u tɔke' wɔ ki ye: «Ŋa fɔke nin Uwien ya bɛl.» Nɛn gɛbre' ma nnɔ, uba ŋa ji kaabe' ki niire' \*Yesu niire ki pukn'.

*Uwien ya Nigɛndkε Kristo nin Dafid ya gbɛr*

*(Matie 22:41-46; Luk 20:41-44)*

<sup>35</sup> \*Yesu là te Uwien ya duku ya luo bo, ki wɔknh binib Uwien ya gbɛr ma nnɔ, nε ki niire' bε ki ye: «Nì tien' mila \*Yiko ya wɔnwɔknb lienh ki teh Uwien ya Nigɛndkε Kristo yé \*Dafid ya yaabil-i? <sup>36</sup> Mifuoñanm là cère' \*Dafid bugbɛn len' ki ye: «Yonbdaan Uwien tɔke' n'Yonbdaan ki ye:

Kɛle n'nojie bó,  
kí tĩ baa uyo wà

n li cère á tε a'nennɛndb bo litaal.»

<sup>37</sup> \*Dafid mɔnɔn là yin' Uwien ya Nigɛndkε Kristo u'Yonbdaan la, u ji tien' mila ki liebe' ki yé u'yaabil-i?» Linigociɛnl cengeh \*Yesu ya gbɛr, nε ní ŋmɛ lè cɛɛn.

*Li ben mɛn Yiko ya wɔnwɔknb bó*

*(Matie 23:1-36; Luk 20:45-47)*

<sup>38</sup> Yesu wɔknh bε Uwien ya gbɛr, nε ki tɔkeh bε ki teh: «Li ben mɛn \*Yiko ya wɔnwɔknb bó. Bi yíe bε ní li guoh tiliɛrgbengt nε ki gaakeh, ki yíe binib ní li gbaandeh ki fuondɛh bε mudaamu ni, <sup>39</sup> ki yíe bε ní li kaah binikpɛkpiɛkb ya kánkàan itáan ya dur ni nin tinacent ni. <sup>40</sup> Bɛn nε jinh ki pendɛh bikpopiib, ki kàareh ní wuɔkreh, ki bɔndɛh binib ya nun bó. Nɛn bo nε Uwien li tũrɛ kí dɛrɛ bi'tub cɛɛn.»

*Ukpopiicɛɛkdaan uba ya pum*

*(Luk 21:1-4)*

<sup>41</sup> Tɔ, \*Yesu kε ki nɛke Uwien ya pum ya likkpiɛnbùol, nε ki likeh linigol nnɔ kpɛndɛh len ilike ma bo. Bifáadɛnb bà yɛbe bàareh ki kpɛndɛh ilike len í yɛbe. <sup>42</sup> Ukpopiicɛɛkdaan uba mɔ baa' ki lá kpɛn' milikbim mile ma baa' gbɔnku kuba mɔnɔn. <sup>43</sup> Nε \*Yesu yin' u'panpaankaab ki tɔke' bε ki ye: «N tɔkeh nε imɔn nε, ukpopiicɛɛkdaan wuɔ kpɛn' ilike ki cɛn' bà kε kpɛn' nnɔ. <sup>44</sup> Kimɛ bi'kɛ de' ka pɔkre' bi'like ya pɔkl. Ama wɔn yé ucɛɛkdaan nε, ki tonde' u ŋmɔbe nà kε nnɔ ki lá kpɛn'.»



## 13

### *Bi lá li bere Uwien ya duku*

*(Matie 24:1-2; Luk 21:5-6)*

<sup>1</sup> \*Yesu siere' Uwien ya duku ya luo bo ki ñen', ne u'panpaankaab ni uba tóke' wó ki ye: «Cenbaa, liike iten ye gbenge ki kpe ma bo-a! Liike bi taa' yè ki men' tidur tù ñmóbe kuñuorku ma bo-a!» <sup>2</sup> Ne u tóke' wó ki ye: «A laa' tiducient tuu nò-ò? Bi lá li bere tu'ke ne, tenl liba mənən ña lá li juore kí li pe tól bo.»

### *Ijend ya yo lá li te ma bo*

*(Matie 24:3-14; Luk 21:7-19)*

<sup>3</sup> Yesu jon' ki tí kèle' Olifi ya siin ya juól bo, Uwien ya duku ya nuun bó, ne Pier nin Saak nin San nin Andre baa' u'saan bi'baba, ki lá niire' wó ki ye: <sup>4</sup> «Tóke te, tibont nnó ke lá li tien uyo wà? Ku le ñeku ba li wuón kí ye uyo nnó baa'.» <sup>5</sup> Ne u cin' ki tókeh be ki teh: «Li ben men, ki la cère uba ní tuln ne. <sup>6</sup> Kimé binib lá li baa ki yebe kí li ñmóbe n'yel ki teh bi yé min ne, kí tuln binib bà yebe. <sup>7</sup> Ni lá cii binib tóh lituól kónkónm ní bii fónfókm la, ni la cère ní'fèl ní li tiinh. Kimé tu ya bont ke li tien ne kí yaan, na laan yé gbengbenyo. <sup>8</sup> Kimé linibol liba li jèke linibotól. Libel liba ya nib mọ li jèke libetól yaab. Kitink li jènge bùol, bùol. Mikònm mọ li lu. Ní li te ten imerwien ya cincinm ne.

<sup>9</sup> «Ninbi ben wən, li ben men. Bi lá li cuo ne kí jon tibuur, kí ñi ne itáan ya dur ni. Min bo, bi lá li tuke ne kí jo tibuur idu ya cienb nin biberb saan. Nnó ne ni li yé n'mònkunb bi'saan. <sup>10</sup> Bi li kpaande tigbemənmənt tuu inibol ke saan ne kí yaan. <sup>11</sup> Bi cuo' ne ki jon' tibuur la, ni la pók kí li yóke ni li len kí ye bà. Uyo nnó lá baa' la, \*Mifuoñaanm ne li tóke ne ni li len kí ye bà. Na yé ninbi ne li len, \*Mifuoñaanm ne li len. <sup>12</sup> U ya yo ne unil li kuore u'ninjé, be ní ku wó. Baa mọ li kuore u'buk, be ní ku kè. Mubumu mọ li fii kí sere mu'naambe nin mu'baambe bo, kí cère be ní ku be. <sup>13</sup> Min bo ne binib ke li nen ne. Ama wà ke li mінде kí li ñmóñmóbe kí tí fòre nnó, wən ne li ñmere.»

### *Nibonn nà ñmóbe ijuóke ya gber*

*(Matie 24:15-28; Luk 21:20-24)*

<sup>14</sup> «Ni li le ijuóke ya bonn nà saah tibont tà ke mən nnó se na bi li sere nà saan. (Wà ke kàanh la, wó ní li ciih ní'tingi.) Uyo nnó lá baa' la, bà li te Sude ya tinfenm ni nnó, be ní sen kí jo ijuón bó. <sup>15</sup> Wà te kudulekaaku ya paaki la, u la jiiire kí kó iden ni, kí taa niba. <sup>16</sup> Wà mọ te ikpàan bó la, u la liebe kí kun, wó ní tí taa u'liergbenku. <sup>17</sup> U ya yo bipiib bà punbe nin bà ñmóbe mubumu mùa ñaanh, li ñmóbe micεεkm ne. <sup>18</sup> Li kàareh men, Uwien la cère nè ní tien kusenañuóku. <sup>19</sup> I ya den binib li ji ijend kí gbien. Haali uñendun ya cincinm kí lá baa fenfennó, nib ña laan jin' i ya jend ya bol, ka ji lí li ji yé fiebu. <sup>20</sup> Yonbdaan ña bi kùore' ijend nnó ya wien bo la, uba mənən ña bi li ñmere. U gènde' binib bà nnó bo ne cère' u kùore' iwien nnó bo.

<sup>21</sup> «U ya yo unil tóke' ne ki ye: «Liike men, Uwien ya Nigendke Kristo te nie saan» bii «u te nie bó» la, ni la tuo. <sup>22</sup> Kimé bitonnenmònkunb li baa. Biba li ye bi yé Uwien ya Nigendke Kristo ne. Bitób li ye bi yé \*Uwien ya ñbonsóknb ne. Bi li tien micincilm ya bont nin miyókm ya bont, kí tuln binib. Bi li nuunh ní tuo' la, be ní tuln Uwien gènde' binib bà nnó mənən ne. <sup>23</sup> Ninbi li ben men. N kpié' ki tóke' ne tigber nnó ke ñó.»

### *Unil ya Bijé ya baam ya gber*

*(Matie 24:29-31; Luk 21:25-28)*

<sup>24</sup> «Ama, ijend nnó ya yo gèbre' la,

uwien li bíike,

uñmaal ña ji li wien,

<sup>25</sup> Inmaabii li cecere kí lu,

tibont tà ñmóbe mituəm paaki bó li jènge.

<sup>26</sup> U ya yo ne bi li le Unil ya Bijε te titewɔlgbɔnt ni, ki we ní, ki ηmɔbe ufaa nin ukpieke ki gbien'. <sup>27</sup> U ya yo ne u li sɔn Uwien ya tondb be ń jo lenpuoli nin nintuɔli nin ugen nin ujie bó, kí cin utingbaan uba kí tí baa utɔ, kí taan Uwien gɛnde' binib bà nnɔ ke.»

*Bukenkenbu ya kpenjenm*

(Matie 24:32-35; Luk 21:29-33)

<sup>28</sup> «Bukεnkenbu ya tetem yé mikpenjenm ne ni'bo. Ni lá laa' bù tɔh isigben, ki bundeh la, ni ben ki ye ní neke uñalend ne\*. <sup>29</sup> Nnɔ ne, ni lá laa' tibont tuu teh la, ní li ben kí ye Unil ya Bijε nekn' ni'nañuɔn saan ηɔ†. <sup>30</sup> N tɔkeh ne imɔn ne, tibont nnɔ ke li tien kí le fenfenno ya nib biε ηa laan kpo' ki gben'. <sup>31</sup> Kutaaku nin kitink li gben. Ama n'gber tun ηa ηmɔbe tù ń gben.»

*Uba ηa ben lidaali là Unil ya Bijε li baa ni*

(Matie 24:36-44)

<sup>32</sup> «Ama uba ηa ben tibont nnɔ li tien lidaali là bii uyo wà. Paaki bó, Uwien ya tondb ηa ben. U'Bijε mɔnɔn ηa ben, Uwien Baa baba ne ben. <sup>33</sup> Li ben men ki la gɔh, kime na ben uyo nnɔ. <sup>34</sup> Ní naan uje wà joh usen ki tɔke' u'tonsɔnb ki ye be ń li likeh u'den mɔnmɔnm, ki wuɔn' wà ke u li sɔn lituonl là, ki tɔke' u'nañɔguurl ki ye u la gɔh, ki yaan ki bure' ne. <sup>35</sup> Nen bo, la gɔh men, kime na ben uyo wà ududaan li baa ní. U li baa ní kutajuɔku-uu, kuyɔku-uu, ukuojemuɔyo-oo, kutenjaaku-uu, na ben. <sup>36</sup> Li ben men, ηɔ u la lá lure kí baa kí le ni dɔ ki gɔh. <sup>37</sup> N tɔkeh ne nà nɔ n tɔkeh binib ke ne, la gɔh men.»

## 14

*Bi kpaan' iyε be ń ku Yesu*

(Matie 26:1-5; Luk 22:1-2; San 11:45-53)

<sup>1</sup> Ní sien' iwien ile be ń jele \*Sufmbε ya Pak ya nacenku. U ya yo ne bi ηmɔnh kpɔnɔ wà ηa ηmɔbe ñake. \*Bitɔtuɔrcienb nin \*Yiko ya wɔnwɔknb nuunh bi li tien ma kí bóle kí cuo \*Yesu kí ku wɔ, <sup>2</sup> ne ki tɔkeh tɔb ki teh: «Ti la cuo wɔ men kunacenku nnɔ ya yo. Ti cuo' wɔ u ya yo la, udu ya nib li kpre.»

*Upii uba wule' Yesu ya yul bo lɛfina*

(Matie 26:6-13; San 12:1-8)

<sup>3</sup> Tɔ, \*Yesu là te Betani ya du ni, Simɔn ujend den ki jinh tijier. U jinh uyo wà nnɔ ne upii uba kɔn' ní ki tuke lɛfina uba u'daaku faa cεen alabaat\* ya dingl ni, bi yih lɛfina nnɔ naar. Upii nnɔ kpɔbre' lidingl nnɔ ya tule, ki taa' lɛfina nnɔ ke ki wuwule' \*Yesu ya yul bo. <sup>4</sup> Binib bà te ni'saan nnɔ ya biba ya benku ni ben', ne bi niireh tɔb ki teh: «Be tien' u ñende' lɛfina wuɔ nɔ? <sup>5</sup> Bi bi li fre kí kuɔre wɔ kí le nè ń gɛbre iwentun kobiita ya paaku kí taa kí gbiire bijiinb-a!» Ne ki kɔnh nin upii nnɔ. <sup>6</sup> Ne \*Yesu ye: «Cère wɔ men wɔ ń fuore. Be tien' ni ηaabeh u'yεnm nɔ nnɔ? U tien' nà mɔn ne ki de' nni-a! <sup>7</sup> Bijiinb lí li te ni'saan uyo ke ne. Ni yíe ní tore be uyo wà la, ni li fre kí tore be; ama min ηa ń li te ni'saan uyo ke. <sup>8</sup> U tien' u li fre kí tien nà ne. U taa' lɛfina nnɔ ki wule' n'bo ki kpiε' ki bonde' n'gbenent ηɔ be ń sube nni ne. <sup>9</sup> N tɔkeh ne imɔn ne, bi li kpaande tigbεmɔnmɔnt tuu uηendun ni nà saan ke nnɔ, bi li len u tien' nà nɔ bó, ηɔ binib ń li tien u'bó.»

*Sudas yíe wɔ ń kuɔre Yesu*

(Matie 26:14-16; Luk 22:3-6)

<sup>10</sup> \*Yesu ya panpaankaab piik nin bile ya uba, bi yih wà Sudas Iskariyɔt nnɔ jon' ki tí laa' bitɔtuɔrcienb ki ye u li taa \*Yesu kí ηukn be. <sup>11</sup> Bi cii' nnɔ ma nnɔ bi'yεnm sɔnge' cεen, ne bi puon' ki ye bi li de wɔ ilike. Ne u bure' ki tí nuunh u li ñe isen yà kí taa \*Yesu kí ηukn be.

\* 13:28 Liike Matie 24:32. † 13:29 Liike Matie 24:33. \* 14:3 Liike Matie 26:7.

*Yesu nin u'panpaankaab jele' Sufmbɛ ya Pak ya nacenku  
(Matie 26:17-25; Luk 22:7-14, 21-23; San 13:21-30)*

<sup>12</sup> Kpɔnɔ wà ɲa ɲmɔbe ɲɔke ya nacenku ya cincindaali, lidaali là bi kòreh \*Sufmbɛ ya Pak ya pefanfaan nnɔ nɛ \*Yesu ya panpaankaab niire' wɔ ki ye: «A yíe tí tien ɲɛ kunacenku nnɔ ya jier lɛ saan-i?» <sup>13</sup> Nɛ u tɔke' u'panpaankaab ni bile ki ye: «Ní jo udu bó. Ní tí kɔn' u'ni la, ni li lɛ uje uba u tuke liñuncuɔl ki cendeh nɛ. Ní paan u'bo, <sup>14</sup> kí tí kɔ u li kɔ iden yà ni nnɔ ni kí tɔke udendaan kí ye: <Ti' Cɛnbaa ye wɔn nin u'panpaankaab li ji kunacenku nnɔ ya jier ku lɛ duku ni?» <sup>15</sup> U li wuɔn nɛ lidutɔtuɔl ya paaki ya ducienku kuba bi bonde' kù ɲɔ, tibont kɛ te ku'ni. Ní tien tɛ kunacenku nnɔ ya jier kun ni.» <sup>16</sup> Bi bure' ki tí baa' udu nnɔ ni, nɛ ki laa' \*Yesu tɔke' bɛ ki ye bi li lɛ nà kɛ nnɔ, nɛ ki tien' kunacenku nnɔ ya jier.

<sup>17</sup> Ní juore' nɛ \*Yesu nin u'panpaankaab piik nin bile nnɔ baa' ki kɔn' kuduku nnɔ ni. <sup>18</sup> Bi kɛ ki jinh uyo wà nnɔ nɛ u tɔke' bɛ ki ye: «N tɔkeh nɛ imɔn nɛ, ninbi bà te ki jinh n'saan nɔ ni ya uba nɛ li kuɔre nni.»

<sup>19</sup> Bi'yɛnm saa' ki gbien', nɛ bi niireh wɔ jɛjɛ ki teh: «N teh min ɲa ɲí-a?» <sup>20</sup> Nɛ u ye: «Ninbi piik nin bile biɛ ni ya uba nɛ li kuɔre nni. Min nin udaan nɛ taan' ki paan' lisɛnl ni nɔ. <sup>21</sup> Unil ya Bijɛ li kpo tɛn ní kɛle' u'bo \*Uwien ya gbɔnku ni ki ye ma bo nnɔ nɛ. Ama unil wà li kuɔre wɔ nnɔ ní bre udaan bo. Ba bi maa' wɔ mɔnɔn la, ní bi li tu u'bo.»

*Yonbdaan ya jier*

*(Matie 26:26-30; Luk 22:14-20; 1 Korɛnt yaab 11:23-25)*

<sup>22</sup> Bi te ki jinh tijier ma nnɔ, nɛ \*Yesu yuure' kpɔnɔ, ki faare' Uwien, ki kɔkuɔ', ki taa' ki de' bɛ, ki ye: «Teke mɛn. Nà sɔ yé n'gbɛnɛnt.» <sup>23</sup> Nɛ ki taa' midaam mɔ, ki faare' Uwien, ki taa' ki de' bɛ, bi'kɛ ɲun'. <sup>24</sup> Nɛ u tɔke' bɛ ki ye: «Nà sɔ yé n'sɛm. Mɛn nɛ wɔngɛh ki teh Uwien cuo' nin binib kujɔtieku. Mí li puube binib bà yɛbe ya kpɛle bo.» <sup>25</sup> Nɛ ki ye: «N tɔkeh nɛ imɔn nɛ, ma ji li ɲu sibii ya daam haali kí tí baa lidaali là n li liɛbe kí ɲu mè midɛfɛnm Uwien ya bɛl ni.»

*Yesu tɔke' Pier ki ye u li niɛ kí ye wa bɛn wɔ*

*(Matie 26:31-35; Luk 22:31-34; San 13:36-38)*

<sup>26</sup> Bi gɛn' Uwien ya yuon ki gben' nɛ ki ɲɛn' ki don' Olifi ya siin ya juɔl bo. <sup>27</sup> Nɛn saan nɛ \*Yesu tɔke' bɛ ki ye: «Ní'kɛ li sɛn kí dɔan nni, kime ní kɛle' \*Uwien ya gbɔnku ni ki ye: <N li ku upekpaal nɛ ipe kɛ ní yɛre.> <sup>28</sup> Ama uyo wà n li mɛkre bitɛnkpiib ni nnɔ, n li liere nɛ kí jo Galile.» <sup>29</sup> Nɛ Pier tɔke' wɔ ki ye: «Bi'kɛ li sɛn kí dɔan ɲɛ mɔnɔn la, min ɲa ní sɛn.» <sup>30</sup> Nɛ \*Yesu ye: «N tɔkeh ɲɛ imɔn nɛ, kuɲɔnku kuu a li niɛ bolm mita kí ye ɲa bɛn nni nɛ kí yaan ukuoje ní muɔ kí lere.» <sup>31</sup> Nɛ Pier ɲiikeh ki lienh ki teh: «Haali bi li ku min nin sin kɛ mɔnɔn la, ma ní niɛ kí ye ma bɛn ɲɛ.» Nɛ bitɔb bà sɛn nnɔ kɛ len' nnɔ.

*Yesu kàare' ní'ba saan bi yih nè Getsemani*

*(Matie 26:36-46; Luk 22:39-46)*

<sup>32</sup> Tɔ, \*Yesu nin u'panpaankaab tí baa' niba saan, bi yih nè Getsemani. Nɛ u tɔke' bɛ ki ye: «Juore mɛn niɛ saan, ní jo kí tí kàare.» <sup>33</sup> Nɛ ki taa' Pier nin Saak nin San ki bure'. Bujɛwaanbu cin' ki kɔh wɔ nɛ u'yɛnm saah. <sup>34</sup> Nɛ u tɔke' bɛ ki ye: «N'yɛnm saa' ki tí kɛnde' tɛn mikuum nɛ bɛnh nin nni. Ní'mɔ ní juore niɛ saan, ki la gɔh.»

<sup>35</sup> U jɛnde' ki jon' inun bó waamu, nɛ ki pùon' ki kàareh ki teh ní li tuo la, Uwien la cère' ijɛnd yíe ya yo ní baa ní, <sup>36</sup> ki lienh ki teh: «O, n'Baa, a li fre kí tien nibonn kɛ. Cère ijɛnd yíe ní jɛnde nni. Ama la cère nè ní li yé min yíe nà, cère' nè ní li yé sin yíe nà.»

<sup>37</sup> U liɛbe' ní u'panpaankaab bita nnɔ saan, ki laa' bi dɔ ki gɔh nɛ, nɛ u tɔke' Pier ki ye: «Simɔn, a gɔh nɛ-ɛɛ? ɲa ní fre kí la gùon kukurku kuba mɔnɔn-ii? <sup>38</sup> La gɔh mɛn, kí li kàareh ɲɔ ki la lu biikm ni. Ní'yɛnm yíe, ama mituɔm nɛ pɔre' nɛ.»

<sup>39</sup> Nɛ ki tí jɛnde' waamu, ki kàare' nin i ya ɲɔbonbaab. <sup>40</sup> U tí liɛbe' ní u'panpaankaab bita nnɔ saan, ki laa' bi tí gɔh nɛ, kime migùonm nɛ ɲɔnde' bɛ, ba bɛn bi li jiin kí ye bà.

<sup>41</sup> U tí jon' ki kàare' ki liēbe' ní nta bo, ki tǎke' bε ki ye: «Ni biε ki fuoreh nε ki dǎ ki gǎh-a! Ní dǎkre'-a! Uyo baa'-a! Bi li taa Unil ya Bijε kí ηukn bibierdenb. <sup>42</sup> Fii mēn tí jo. Liike mēn, wǎ kuǎre' nni nnǎ nēkn' ní ηǎ.»

*Yesu ya cuom*

*(Matie 26:47-56; Luk 22:47-53; San 18:3-12)*

<sup>43</sup> U laan biε ki lienh nε Sudas u'panpaankaab piik nin bile nnǎ ya uba nin linigol pǎk ki puǎ' u'bo ki tuke mujusiemu nin ilēnben. Bitǎtuǎrcienb nin \*Yiko ya wǎnwǎknb nin \*Sufmbε ya cienb nε sǎn' bε ní. <sup>44</sup> Sudas wǎ kuǎre' \*Yesu nnǎ tǎke' linigol nnǎ ki ye: «Ni lá laa' n jon' ki tí lǎkn' wǎ la, wǎn nínǎ. Ní cuo wǎ, kí túǎre kí li ηuuke wǎ ki joh.»

<sup>45</sup> Tǎ, Sudas tí baa' nε ki pǎk ki nēkn' \*Yesu nε ki ye: «Cēnbaa,» nε ki lǎkn' wǎ. <sup>46</sup> Nε bi cuo' Yesu. <sup>47</sup> Bǎ te ní'saan nnǎ ya uba nǎre' kijusiek ki gε' ki paare' bitǎtuǎrcienb ya cien ya tonsǎnl uba ya tubl. <sup>48</sup> Nε \*Yesu tǎke' bǎ baa' bε ní lá cuo wǎ nnǎ ki ye: «Ni tuke mujusiemu nin ilēnben ní lá cuo nni tēn n yé udukond nε-a! <sup>49</sup> Idaan kε n là te ní'saan Uwien ya duku ya luo bo nε ki wǎknh binib, nε na cuo' nni u ya yo. Tǎ, ni cuo' nni fēnfēnnǎ, ηǎ nǎ kele' \*Uwien ya gbǎnku ni nnǎ nē ní tien nε.»

<sup>50</sup> Nēn saan nε u'panpaankaab kε sēn' ki dǎan' wǎ. <sup>51</sup> Unacēnfaan uba mǎ là pε u'bo ki fifike' bukpelbu. Bi ye bε ní cuo unacēnfaan nnǎ ki tí dǎkre' nin u'kpelbu, <sup>52</sup> nε u dǎan' bǔ ki sēn' liñil ki bure'.

*Sufmbε ya buur ya cεkl yaab bun' Yesu tibuur*

*(Matie 26:57-68; Luk 22:54-55, 63-71; San 18:13-14, 19-24)*

<sup>53</sup> Bi taa' \*Yesu ki jon' bitǎtuǎrcienb ya cien den. Bitǎtuǎrcienb kε nin \*Sufmbε ya cienb nin \*Yiko ya wǎnwǎknb mǎ taan' ní'saan. <sup>54</sup> Pier pε \*Yesu bo, ki te fǎnfǎkm ki tí baa' bitǎtuǎrcienb ya cien den, ki kǎn' ki kǎle' biguguurb saan ki lokreh umu. <sup>55</sup> Bitǎtuǎrcienb nin tibuur ya cεkl yaab kε nuunh bi li dule nǎ bo kí biin \*Yesu ηǎ kí ku wǎ. Bi tien' ma kε ba laa' u'biil. <sup>56</sup> Binib ligol nēn' u'bo kutonnēnku kε ya bol ama bi'gber nnǎ ηa cende'. <sup>57</sup> Bi'ni biba fii' ki sere' ki nēn' u'bo ki ye: <sup>58</sup> «Tí cii' u len' ki ye u li bere Uwien ya duku kǎa binib mēn' kǔ nnǎ, kí mε kutǎku iwien ita, nib ηa ní mε kun.» <sup>59</sup> U ya sēn ni mǎnǎn bi'gber ηa cende'.

<sup>60</sup> Bitǎtuǎrcienb ya cien fii' ki sere' binib nnǎ kε ya siik ni, nε ki niire' \*Yesu ki ye: «ηa ní len kí jiin-ii? ηa ηmǎbe tuba á len kí jiin binib bǎ biindeh ηε nǎ-ǎǎ?» <sup>61</sup> Nε \*Yesu ηmin ka gere'. Bitǎtuǎrcienb ya cien tí niire' wǎ ki ye: «A yé Uwien ya Nigēndkε Kristo nε-εε? A yé tí pǎkeh wǎ nnǎ ya Bijε nε-εε?» <sup>62</sup> Nε \*Yesu ye: «N yé wǎn nε. Ni li lε Unil ya Bijε kε Uwien, mǐtuǎm kε ya daan ya jie bǎ, kí li lε u te titēwǎlgbǎnt ni paaki bǎ, kí we ní.»

<sup>63</sup> U len' nnǎ ma nnǎ, nε bitǎtuǎrcienb ya cien kǎre' wǎn bugben ya lierl', nε ki ye: «Ta ji nuunh mǎnkunl. <sup>64</sup> Ni cii' u suke' Uwien ma bo. Ni maaleh mila?» Nε bi'ke ye u bii' ki kpe mikuum.

<sup>65</sup> Bi'ni biba cin' ki cεreh u'bo tiñinsēnt ki taa' kukpelciεku ki pibn' u'nun bǎ, kí kureh wǎ, kí tǎkeh wǎ ki teh: «Bukre' wǎ kure' ηε.» Nε biguguurb nnǎ taa' wǎ nin itēnpε.

*Pier niε' ki ye wa bēn Yesu*

*(Matie 26:69-75; Luk 22:56-62; San 18:15-18, 25-27)*

<sup>66</sup> Pier te uluo bo uyo wǎ nnǎ, nε bitǎtuǎrcienb ya cien ya piitonsǎnl uba baa' <sup>67</sup> kí laa' Pier lokreh umu, nε u túǎre' kí liike' wǎ ki ye: «A mǎ là te nin Nasarēt ya \*Yesu wuǎ nε.»

<sup>68</sup> Nε Pier niε' kí ye: «Ma bēn, ka cii' a'lenm nnǎ ya tingi.» Nε kí siere' kí kǎn' kunakuuku ni. [U ya yo nε ukuoje muǎ'.]‡

<sup>69</sup> Upiitonsǎnl nnǎ tí laa' wǎ nε kí tí tǎke' binib bǎ te ní'saan nnǎ kí ye: «Uje wuǎ mǎ yé \*Yesu yaab ya uba nε.» <sup>70</sup> Nε Pier tí niε' nle bo.

† 14:63 Liike Matie 26: 65. ‡ 14:68 Bi kpie' kí kele' tigbǎnt tǎ nnǎ ya tuba ni u ya yo nε ukuoje muǎ' ηa te tu'ni.

Ni tí pukn' waamu ne binib bà te u'saan nnò mò tòke' wò ki ye: «Ni yé imòn ne, a yé \*Yesu yaab ya uba ne, kime a'mò yé Galile ya nil ne.» <sup>71</sup> Ne Pier cin' ki nieh ki poleh ki teh: «Ma ben ni lienh unil wà ya gber nò, n nen' la, Uwien la dàan nni» <sup>72</sup> Ne ukuoje pòk ki muò' i ya tãan bo ki lere'. Nen saan ne Pier tiere' \*Yesu bi tòke' wò ma ki ye: «A li niε bolm mita kí ye ña ben nni ne kí yaan ukuoje ní muò kí lere» nnò, ne ki muò' cεen.

## 15

### *Bi tuke Yesu ki jon' Pilat saan tibuur*

*(Matie 27:1-2, 11-14; Luk 23:1-5; San 18:28-38)*

<sup>1</sup> Ni faa' kutenñesansanku, ne bitòtuarcienb nin \*Sufmbε ya cienb nin \*Yiko ya wònwòknb nin tibuur ya cεkl yaab kε kèle' ki bonde' bi li tien ma bo. Bi lòle' \*Yesu, ne ki taa' wò ki tí ñukn' Pilat. <sup>2</sup> Pilat niire' wò ki ye: «Sin, a yé \*Sufmbε ya ber ne-εε?» Ne u jiin' wò ki ye: «Sin ne ye nnò.»

<sup>3</sup> Tò, Bitòtuarcienb nnò biin' wò isen yà yebe ni. <sup>4</sup> Ne Pilat tí niire' wò ki ye: «Ña ní len kí jiin-ii? Cenge bi biindeh ñe mibiinm mà kε ya bol-a!» <sup>5</sup> Ama \*Yesu ña ji jiin' ñàbonl, ne ní cuo' Pilat miyòkm.

### *Bi bun' Yesu tibuur ki ye u kpε mikuum*

*(Matie 27:15-26; Luk 23:13-25; San 18:39-19:16)*

<sup>6</sup> \*Sufmbε ya Pak ya nacenku kε nacenku ya yo la, Pilat li ñen lipεkl ya nil wà linigol yíe wò ne kí wiε. <sup>7</sup> U ya yo ki laa' uje uba te lipεkl ni bi yih wò Barabas. Wòn nin binib bà là pε u'bo nnò là kpíin' kukpiinku ne ki ku' unil uba. Nen bo ne bi là pεkn' be. <sup>8</sup> Linigol nnò baa' Pilat saan ki tòke' wò ki ye wò ní tien u tí ní teh ma kunacenu nnò ya yo. <sup>9</sup> Ne u niire' be ki ye: «Ni yíe ní wiε ne \*Sufmbε ya ber ne-εε?» <sup>10</sup> U niire' nnò, kime u ben ki ye bitòtuarcienb ñmàbe kinenk ne \*Yesu bo, nen ne cère' bi taa' wò ki ñukn' wò.

<sup>11</sup> Ama bitòtuarcienb ben sureh linigol nnò ne ki teh be ní tòke Pilat wò ní wiε be Barabas. <sup>12</sup> Ne Pilat tí niire' be ki ye: «Nnò la, uje wà ni yih wò \*Sufmbε ya ber nnò n li tien wò mila?» <sup>13</sup> Ne bi wuure' ki ye: «Kpε wò udòpònpòn bo!» <sup>14</sup> Ne Pilat tí niire' be ki ye: «U tén ki bi' li lε biil ne?» Ne bi tùreh ki wuureh ki gbiekeh ki teh: «Kpε wò udòpònpòn bo!»

<sup>15</sup> Pilat yíe wò ní songe bi'yenm ne ki wiε' Barabas. U cère' u'sojambε ñi' \*Yesu inalεbe, ne u taa' wò ki de' be be ní tí kpε wò udòpònpòn bo.

### *Sojambε lεh Yesu*

*(Matie 27:27-31; San 19:2-3)*

<sup>16</sup> Sojambε nnò taa' wò ki kàn' Pilat den uluo bo, ne ki yin' bi'cεkl ya sojambε kε ki taan', <sup>17</sup> ki taa' kuliεrmónmónku\* kuba ki goln' wò, ne ki taa' ikonkon ki lònlòn' uyukpεkpiε ki kpεle' u'yul, <sup>18</sup> ne ki teh ten bi pèkeh wò ne ki teh: «\*Sufmbε ya berò, ti fuondeh ñε-a!» <sup>19</sup> Ki taah lilenbenl ki kpaakeh u'yul bo, ki cεreh u'bo tiñinsent ne ki gbaandeh u'nun bó ki gòndeh. <sup>20</sup> Bi lè' wò ki tí gben', ne ki gore' kuliεrmónmónku nnò, ki taa' u'wengolkaar ki jiin' ki goln' wò, ne ki taa' wò ki ñen' ki bure' be ní tí kpε wò udòpònpòn bo.

### *Bi kpε' Yesu udòpònpòn bo*

*(Matie 27:32-44; Luk 23:26-43; San 19:17-27)*

<sup>21</sup> Bi joh ma nnò ne ki tí cende' uje uba bi yih wò Simòn, u yé Sirenn ya du ya nil ne, ki ñen' ikpàan bó ní. U yé Aleksand nin Lufus ya baa ne. Bi cuo' uje bugben ki wòbn' wò, wò ní tuke \*Yesu ya dòpònpòn. <sup>22</sup> Bi taa' \*Yesu ki tí baa' niba saan, bi yih nè Golgota, ni'tingi si: «Kuyukpòbku ya Bùol.» <sup>23</sup> Ne ki taa' midaam mà cuuke' uñòke wà bi yih wù miir nnò ki de' wò ki ye wò ní ñu. Ne u yíe' ka ñun'. <sup>24</sup> Sojambε nnò kpε' wò udòpònpòn bo. Ne ki taa' u'wengolkaar be ní tí gbiire ne ki fùòre' imúòn ki liike' wà kε li ji nà bó. <sup>25</sup> Ni là te kutenñaaku tikur tiwε ne, ne bi kpε' wò udòpònpòn bo. <sup>26</sup> Bi là kele' nà cère' bi kpε' wò nnò

\* **15:17** U ya yo, biberb là guoh tiliermónt tà ya daaku faa ne.

ki tɛbn' u'dɔpɔnpɔn bo u'yul bó. Bi là kele' ki ye: «\*Sufmbɛ ya bɛr.» <sup>27</sup> Bi kpɛ' idukond ile mɔ idɔpɔnpɔn bo Yesu saan. Bi kpɛ' uba u'nɔjie bó, ki kpɛ' utɔ u'nɔgɛn bó. [ <sup>28</sup> Nɛ nà kele' \*Uwien ya gbɔnku ni nnɔ tien'. Nɛ kele' ki ye: «Bi kaan' wɔ ki kpɔbn' idukond bó nɛ.»]†

<sup>29</sup> Binib bà gɛbreh ni'saan nnɔ sukreh wɔ ki gɔnbeh iyul ki tɔkeh wɔ ki teh: «Sin wà là ye a li bere Uwien ya duku kí liɛbe kí mɛ kù iwien ita nnɔ <sup>30</sup> ηmieni a'ba, kí jiiɛ ní udɔpɔnpɔn wuu bo-a!»

<sup>31</sup> Bitɔtuɔrcienb nin \*Yiko ya wɔnwɔknb mɔ lɛh wɔ ki teh: «U ηmieni' binitɔb nɛ, ka ní fre kí ηmieni u'ba-a! <sup>32</sup> Uwien ya Nigɛndkɛ Kristo, Israyɛl yaab ya bɛrɔ, jiiɛ ní udɔpɔnpɔn wuu bo fɛnfɛnnɔ, tí lɛ ηɔ kí teke ηɛ kí ji-a!» Nɛ bi kpɛ' idukond yà u'saan idɔpɔnpɔn bo nnɔ mɔ sukreh wɔ nnɔ.

### *Yesu ya kuum udɔpɔnpɔn bo*

(*Matie 27:45-56; Luk 23:44-49; San 19:28-30*)

<sup>33</sup> Tɔ, kuwensiiku ya yo nɛ ní ci' ki biike' utingbɛn kɛ bo ki tí baa' kutaajuɔku tikur tuta ya yo. <sup>34</sup> Tikur tuta ya yo nɛ \*Yesu wuure' ufaa bo ki ye: «Elowi, Elowi, lama sabaktani?» Nɛ'tingi si: «N'Wien, n'Wien, bɛ tien' a wiɛ' nni?»

<sup>35</sup> Binib bà se ni'saan nnɔ ya biba ηa cii' u wuure' ki ye ba mɔnmɔnm nɛ ki ye: «Li cengeh mɛn u yih Eli nɛ.» <sup>36</sup> Bi'ni uba sɛn' ki jon' ki tí yuure' ticitɔnt ki lá sɛkn' midɛηmihmiikm miba ni, ki taa' ki tuun' lilɛnbɛnl bo, ki tɛnde' ki kòle' u'ñɔbu ki ye wɔ ní muɔre, nɛ ki ye: «Dàan mɛn, tí liike Eli li baa kí lá jiiɛn wɔ bii wa ní baa.»

<sup>37</sup> Nɛn saan nɛ \*Yesu wuure' ufaa bo, nɛ ki kpo'. <sup>38</sup> U ya yo nɛ kukpɛlcɛkpɛkpiɛku kùà bore' Uwien ya duku ni bolm mile nnɔ kɛrɛ' ku'siik ni paaki ki tí ci' tingi. <sup>39</sup> Sojambɛ kobk ya cieni wà se \*Yesu ya nun bó nnɔ laa' u kpo' ma bo nɛ ki ye: «Imɔn, uje wuɔ mɔnbe ki yé Uwien ya Bijɛ nɛ.»

<sup>40</sup> Bipiib biba mɔ là te ni'saan, ki se fɔnfɔkm ki likeh. Bi'ni uba si Mari Madelenn, utɔ si Saakbuk nin Yosɛ ya naa Mari, utɔ mɔ si Salome. <sup>41</sup> \*Yesu là te Galile ma nnɔ, nɛ bipiib nnɔ là pɛ u'bo, ki sɔnh ituon ki toreh wɔ. Bipiib bà là pɛ u'bo ki tí baa' Yerusalem nnɔ mɔ là te ni'saan ki yebe.

### *Yesu ya subm*

(*Matie 27:57-61; Luk 23:50-56; San 19:38-42*)

<sup>42-43</sup> Nɛ juɔrɛ' ma nnɔ nɛ uje uba baa' ní bi yih wɔ Yosɛf u yé Arimate ya nil, ki yé tibuur ya cɛkl yaab ya uba binib boh wɔ cɛɛn. U'mɔ là gu Uwien ya bɛl li baa ní uyo wà nnɔ nɛ. Nɛ là yé kutaaku kùà li faa \*Saba ya daali, uyo wà bi bondeh \*Saba ya daali nnɔ nɛ. Yosɛf jon' Pilat saan nin lifɛl ki tí tɔke' wɔ ki ye u tuo' la, wɔ ní cɛbe wɔ \*Yesu ya gbɛnɛnt. <sup>44</sup> Pilat cii' bi ye \*Yesu kpo' ηɔ ma nnɔ nɛ ní cuo' wɔ miyɔkm. Nɛn saan nɛ u yin' sojambɛ kobk ya cieni ki niire' wɔ ki ye: «\*Yesu kpo' ma ní wuɔke'-aa?» <sup>45</sup> Nɛ u tɔke' wɔ u kpo' uyo wà. Pilat cii' u kpo' uyo wà ma nnɔ, nɛ ki de' Yosɛf usɛn wɔ ní tí taa u'gbɛnɛnt. <sup>46</sup> Nɛ Yosɛf jon' ki tí dɛ' kukpɛlcɛku kuba, nɛ ki jiiɛn' \*Yesu ya gbɛnɛnt udɔpɔnpɔn bo, ki taa' kù ki tentɛn' tù, ki taa' ki tí ble' ufɛle uba ni. Bi là cube' ufɛle nnɔ kujɔtɛnku kuba ya kele ni nɛ, nɛ ki binde' kutɛngbɛngbɛnku kuba, ki biin' bufɛnañɔbu. <sup>47</sup> Nɛ Mari Madelenn nin Yosɛ ya naa Mari laa' bi ble' \*Yesu nà saan.

## 16

### *Yesu mɛkre' bitɛnkpiib ni*

(*Matie 28:1-8; Luk 24:1-12; San 20:1-10*)

<sup>1</sup> \*Saba ya daali gɛbre' ma nnɔ, nɛ Mari Madelenn nin Saak ya naa Mari nin Salome jon' ki tí dɛ' mikpɔm mà ya nu ηmɛ bɛ ní tí faan \*Yesu ya gbɛnɛnt. <sup>2</sup> Saba ya daali gɛbre', kutaaku kùà li faa nnɔ, nɛ bipiib nnɔ wɔrɛ' ki fii' ní biike ki bure' likul nnɔ bó ki tí baa' ki laa' uwien te ki puɔreh. <sup>3</sup> Bi joh ma nnɔ nɛ ki niireh tɔb ki teh: «ηmɛ li tí biire

† 15:28 Bi kpiɛ' ki kele' tigbɔnt tà nnɔ ya tuba ni migbiirm 28 ηa te tu'ni. ‡ 15:46 Liike Matie 27:60.

te kutenku nnɔ?» <sup>4</sup> Bi tĩ tuo ni'saan sɔ, ki liike' ki laa' kutenku nnɔ ɲa ji bi. Kù là yé kutencencienu nɛ. <sup>5</sup> Bi tĩ baa' ki kɔn' likul nnɔ ni nɛ ki laa' unacenfaan uba kɛ unɔjie bó ki guo kuliɛrpenpienku. Nɛ bujɛwaanbu cuo' bɛ cɛɛn.

<sup>6</sup> Nɛn saan nɛ unacenfaan nnɔ tɔke' bɛ ki ye: «La cère mɛn nè rí cuo nɛ jɛwaanbu. Ni nuunh Nasaret ya \*Yesu wà bi là kpɛ' wɔ udɔpɔnpɔn bo nnɔ nɛ. U mɛkre'-a! Wa ji te niɛ saan. Liike mɛn, bi là taa' wɔ ki ble' nà saan sɔ. <sup>7</sup> Li joh mɛn, kí tĩ tɔke Piɛr nin u'panpaankɛtɔb kí ye u liere' bɛ ki bure' Galile bó ɲɔ. Bi li tĩ lɛ wɔ nɛn bó nɛ tɛn u là tɔke' bɛ ma bo.»

<sup>8</sup> Nĩ beke' bipiib nnɔ cɛɛn nɛ bi ñɛn' likul nnɔ ni ki tiinh bi'gbenɛnt kɛ ɲɔh. Bujɛwaanbu cuo' bɛ ma nnɔ nɛ ba tɔke' nil.

*Yesu mɛkre' ki cère' bi laa' wɔ  
(Matie 28:9-10; San 20:11-18; Luk 24:13-35)*

[<sup>9</sup> \*Saba ya daali gèbre', kutaaku kùà li faa nnɔ ya tɛɲaaku, \*Yesu mɛkre' ma nnɔ nɛ ki kpiɛ' ki taa' u'ba ki wuɔn' Mari Madelenn. Wɔn nɛ yé upii wà isɛnpol ilole là ɲaake wɔ, \*Yesu ɲɔre' yè nnɔ. <sup>10</sup> U jon' \*Yesu yaab saan ki laa' bi te uyensaa ni, ki kɛ ki muɔh. Nɛ u tɔke' bɛ ki ye u laa' Yesu. <sup>11</sup> Bi cii' u ye u laa' \*Yesu u fuobe, nɛ ba teke' ki jin'.

<sup>12</sup> Ni ya puoli bó nɛ bi'ni bile là cuonh ki joh udugbaan bó. Bi joh ma nnɔ nɛ \*Yesu cère' bi laa' wɔ. Wa te tɛn u là te ma uyo wà Mari Madelenn laa' wɔ nnɔ. <sup>13</sup> Bi liɛbe' bi'tɔb saan ki tĩ tɔke' bɛ ki ye bi laa' Yesu, nɛ ba tí teke' ki jin'.

*Yesu cère' u'panpaankaab piik nin uba laa' wɔ  
(Matie 28:16-20; Luk 24:36-49; San 20:19-23; Itùon 1:6-8)*

<sup>14</sup> \*Yesu fɔre' ki cère' u'panpaankaab piik nin uba laa' wɔ uyo wà bi te ki jinh tijier. U kɔn' nin bɛ ki ye bɛ tien' ba teke' binib bà laa' wɔ u mɛkre' nnɔ len' nà nnɔ ki jin-i? Nɛ ki ye bi'yul nɛ faa. <sup>15</sup> Nɛ ki tí tɔke' bɛ ki ye: «Li joh mɛn unɛndun ni ni'kɛ saan kí li kpaandeh tigbɛmɔnmɔnt binib kɛ saan. <sup>16</sup> Wà kɛ li teke kí ji kí cère bɛ rí sɛi wɔ Uwien ya ñunm nɛ li ɲmɛre. Wà kɛ ɲa teke' ki jin' la, Uwien li dɛre u'tub. <sup>17</sup> Binib bà kɛ li teke kí ji nnɔ li tien miyɔkm ya bont. N'yel bo, bi li ɲɔre isɛnpol, ki li len milencɛnm, <sup>18</sup> ki li cuo iwɛ ya rí tien bɛ niba. Bi ñun' uñɔkñɛndkɛ la, wa rí tien bɛ niba. Bi li taa bi'nuɔ kí paan biwiɛnb bo nɛ bɛ rí faake.»

*Uwien taa' Yesu ki don' paaki bó  
(Luk 24:50-53; Itùon 1:9-11)*

<sup>19</sup> Yonbdaan \*Yesu tɔke' bɛ tigbɛr ki tĩ gben' nɛ Uwien cère' u don' paaki bó, ki tĩ kèle' u'jie bó. <sup>20</sup> Nɛn saan nɛ u'panpaankaab joh ni'kɛ saan ki tɔkeh binib tigbɛmɔnmɔnt. Nɛ Yonbdaan toreh bɛ ki cèreh bi'teh miyɔkm ya bont. Nɛn nɛ wɔngɛh ki teh bi lienh tigbɛr tà nnɔ te nɛ.]\*

\* **16:20** Bi kpiɛ' ki kɛle' tigbont tà nnɔ ya tuba ni migbiirm 9 kí tĩ baa 20 ɲa te tu'ni.

## Tigbɛmɔnmɔnt tà Luk kɛle' tù nnɔ Nà wɔngɛh kugbɔnku kuu te ma bo

Bi yih wà kɛle' kugbɔnku kuu nnɔ Luk nɛ. Wa yé Yesu ya tondb piik nin bile nnɔ ya uba. Ama u tùrɛ' ki nuun' bà là pɛ Yesu bo saan nɛ ki bɛndɛ' u'gbɛr cin' ma bo nin tù tĩ fɔrɛ' ma bo. U là tɔkɛ nin Pɔl u'sɛn ya jom ni ma nnɔ nɛ cɛrɛ' u bɛndɛ' tù ki pukn'.

U kɛle' kugbɔnku kuu ki de' binib bà nnɔ ɲa yé Sufmbɛ. Bi teke' Yesu ki jin' nɛ. Nɛn nɛ cɛrɛ' u tɔkɛh bɛ iñɔbonfafaa ya tingi nin Sufmbɛ ya yaajɛtɛntiɛnm mà ba bɛn mɛ nnɔ.

Luk kɛle' kugbɔnku kùà nɔ pɛ Matie nin Mark yaar bo nɛ, ama u kɛle' tigbɛr tuba ta te Matie nin Mark nin San ya gbɔnt ni. Tun si: Yesu jon' ki fuondɛ' Mart nin Mari (10:38-42) nin Samari ya jɛnimɔn ya gbɛr (10:29-37) nin ujɛ wà ya buk bole' u liɛbɛ' ki laa' kɛ nnɔ ya gbɛr (15:11-32).

Luk bo, Yesu Kristo nɛ yé Yonbdaan nɛ, ki yé Uwien sɔn' wà wɔ rí lá ɲmɛn binib. Imɔn, Uwien mɛkrɛ' wɔn Yesu nɛ, ki de' wɔ mituɔm tibont kɛ bo. Luk ya gbɔnku ya gbɛr tĩ tonde' Yerusalem ni nɛ (iyul 24) nin Yesu ya kuum udɔpɔnpɔn bo nin u'mɛkrɛm bitɛnkpiib ni.

### *Nà cɛrɛ' Luk kɛle' kugbɔnku kuu nɔ*

<sup>1</sup> Ni bɛn ki ye binib bà yɛbɛ ñikn' ki kɛle' tigbɔnt ni tibont tà là tien' ti'ni nnɔ. <sup>2</sup> Bi kɛle' tù tɛn binib bà là te tu'cincinyo ki laa' tù tien' ma bo, ki yé binib bà kpaandɛh Uwien ya gbɛr nnɔ là wɔkn' tɛ ma bo nɛ. <sup>3</sup> Nɛ n'mɔ tùrɛ' ki nuun' ki bɛndɛ' tù cin' ma bo, nɛ ki maale' ki ye ñi mɔn n'mɔ rí paan tu'bo mɔnmɔnm kí kɛle' tù tentiɛn ma bo, kí de sin uciɛn Teofil, <sup>4</sup> ɲɔ a'mɔ rí bɛndɛ' kí ye bi wɔkn' ɲɛ tigbɛr tà nnɔ mɔnbɛ ki te nɛ.

### *Uwien ya tond uba len' ki ye bi li maa San*

<sup>5</sup> Uyo wà Herod là yé Sude ya bɛr nnɔ, ki laa' utɔtuɔrkɛ uba te, ki yé Abiya ya cɛkl yaab ya uba, bi yih wɔ Sakari; ki yih u'po Elisabɛt, u yé Arɔn ya yaabil. <sup>6</sup> Bi'kɛ bile là yé binib bà cuubɛ nɛ Uwien ya nun bó, ki boh Yonbdaan ya wɔb, ki teh u yíe nà kɛ mɔnmɔnm. <sup>7</sup> Ama ba là ɲmɔbɛ buk, kimɛ Elisabɛt là yé uɲɔl nɛ, nɛ bi'kɛ bile là pore'-a.

<sup>8</sup> Ní kpaan' Sakari rí sɔn lituonl Uwien ya nun bó, kimɛ u'cɛkl li sɔn itùon Uwien ya nun bó uyo wà nnɔ baa'. <sup>9</sup> Nɛ bitɔtuɔrkaab ya tentiɛnm bo, bi fùrɛ' imúɔn, ñi lu' Sakari bo, nɛ bi gɛndɛ' wɔ, wɔ rí kɔ Yonbdaan ya dubɛnku ni, kí tĩ sɛ liɲubl. <sup>10</sup> Uyo wà u te ki siɛnh liɲubl nnɔ, Uwien ya nib ligol te saali nɛ ki kàareh. <sup>11</sup> Nɛn saan nɛ Yonbdaan ya tond uba baa' u'saan, ki se bi siɛnh liɲubl liponpuol là bo nnɔ ya jie bó. <sup>12</sup> Sakari laa' wɔ ma nnɔ, ñi bɛkɛ' wɔ, nɛ bujɛwaanbu cuo' wɔ. <sup>13</sup> Nɛ utond nnɔ tɔkɛ' wɔ ki ye: «Sakari, la cɛrɛ' nɛ rí cuo ɲɛ jɛwaanbu. Uwien cii' a'kaare bó. A'po Elisabɛt li maa kibujɛbuk, nɛ á yin kɛ San. <sup>14</sup> Kí li cɛrɛ' a'yɛnm rí sɔngɛ kí gbien, nɛ binib bà yɛbɛ mɔ li pokn ki'màam bo. <sup>15</sup> Kí li yé unikpɛkpiɛk nɛ Yonbdaan ya nun bó. Ka rí ñu sibii ya daam, ka rí ñu defɛfaam kɛ defɛfaam. \*Mifuoñaanm li te ki'bo ki gbien' haali ki'naa ya benku ni nɛ. <sup>16</sup> Kí li cɛrɛ' Israyɛl yaab bà yɛbɛ rí liɛbɛ kí paan Yonbdaan Uwien bo. <sup>17</sup> Kí li ɲmɔbɛ \*Uwien ya Fuoñaanm nin mituɔm tɛn \*Uwien ya ñɔbonsɔknl Eli nɛ. Kí li liɛrɛ Yonbdaan usɛn, kí cɛrɛ' bibaambɛ rí liɛbɛ kí taan nin bi'bumu buñɔbu, kí cɛrɛ' binib bà ɲa tuo' Uwien ya ñɔbu bó rí li ɲmɔbɛ iyɛnmaale tɛn binimɔnb, kí cɛrɛ' binib rí li yé binib bà bonde' bɛ rí teke Yonbdaan.»

<sup>18</sup> Nɛ Sakari tɔkɛ' utond nnɔ ki ye: «Bɛ li cɛrɛ' rí bɛndɛ' kí ye a len' nà nɔ, ñi te? Kimɛ min pore'-a nɛ n'po mɔ pore'.» <sup>19</sup> Nɛ utond nnɔ jiiin' wɔ ki ye: «N yé Uwien ya tond Gabriel nɛ, kí te Uwien ya nun bó ki sɔnh u'tùon. U sɔn' nni rí rí lá tɔkɛ ɲɛ tigbɛmɔnmɔnt tuu nɛ. <sup>20</sup> Tɔ,



a'lenl li tɛbe, ɲa ji li freh ki lienh kí tĩ baa uyo wà nibonn nnɔ́ rí tien, kime ɲa teke' ki jin' ki ye n tɔke' ɲe tigber tà nɔ́ ya yo lá baa' la, tù li tien.»

<sup>21</sup> U ya yo ki laa' linigol nnɔ́ gu Sakari li ɲe ní Uwien ya duku ni uyo wà nɛ. U wuɔke' ka ɲen' ní ma nnɔ́ nɛ ní beke' bɛ cɛɛn. <sup>22</sup> U lá ɲen' ní ka ji freh ki lienh, nɛ bi bende' ki ye u laa' niba nɛ tidɛknt yaam Uwien ya duku ni. Nɛ u wɔngɛh bɛ migbaam, ka freh ki lienh.

<sup>23</sup> Sakari ya tòn ya wien tĩ gben' nɛ u liɛbe' u'den. <sup>24</sup> Nĩ tete nɛ u'po Elisabet lá punbe', ki bɔle' u'ba ki tĩ baa' inmaale inun, <sup>25</sup> nɛ ki maale' u'yɛnm ni ki ye: «A laa'-aa! Uyo wà Yonbdaan yíe nɛ ki muɔ́ nni, ki ɲen' nni ifɛ ni binib ya nun bó.»

### *Uwien ya tond tɔke' Mari ki ye u li maa Yesu*

<sup>26</sup> Elisabet ya tɛnpunbe ya ɲmaalluob ni, nɛ Uwien sɔn' u'tond Gabriel Galile ya tinfɛnm ya du uba ni, bi yih wù Nasaret. <sup>27</sup> U là sɔn' wɔ uɛfaan uba saan nɛ wa bɛn jɛ, bi yih wɔ Mari. Bi là pun' wɔ uɛ uba nɛ u yé \*Dafid ya yaabil, bi yih wɔ Yosef. <sup>28</sup> Utond nnɔ́ baa' ki kɔn' Mari den, nɛ ki ye: «N fuondeh ɲe Mari. Yonbdaan tien' ɲe tinimònt ki gbien', nɛ ki te nin ɲe.» <sup>29</sup> Mari cii' inɔ́bon nnɔ́ ma nnɔ́ nɛ ní beke' wɔ cɛɛn, u maaleh wɔ rí bende ifuonde nnɔ́ ya tingi si bà. <sup>30</sup> Nɛ utond nnɔ́ tɔke' wɔ ki ye: «Mari, la cère nè rí cuo ɲe jɛwaanbu, kime Uwien tien' ɲe tinimònt nɛ. <sup>31</sup> Liike-a! A li punbe, kí maa kibujɛbuk kí yin kè Yesu. <sup>32</sup> Kí li yé unikpɛkpiɛk nɛ, bi li yih kè Uwien wà ɲa ɲmɔbe Nacentɔ́ ya Bijɛ nɛ. Yonbdaan Uwien li de wɔ u'yaajɛ \*Dafid ya bɛl. <sup>33</sup> U li yé ubɛr nɛ Sakɔb ya yaabii bo uyo kɛ. Nɛ u'bɛl nnɔ́ ɲa rí li ɲmɔbe gbenm.» <sup>34</sup> Nɛn saan nɛ Mari tɔke' utond nnɔ́ ki ye: «Nì li tien mila kí tuo, kime ma bɛn jɛ-a?» <sup>35</sup> Nɛ utond nnɔ́ jiin' wɔ ki ye: «\*Mifuoñaanm li jiire ní a'bo, nɛ Uwien wà ɲa ɲmɔbe Nacentɔ́ ya tuɔm rí lèkn a'bo tɛn usɔngɛ. Nɛn nɛ cère' a li maa kibuk kà nnɔ́, li yé uñaan, bi li yih kè Uwien ya Bijɛ nɛ. <sup>36</sup> Liike, a'puole Elisabet punbe' ma u'ɲmaalluob sɔ. Wɔn wà bi là yih wɔ unɔ́l nnɔ́ punbe' u'por ni nɛ. <sup>37</sup> Kime Uwien ɲa gbɛle' niba.» <sup>38</sup> Nɛn saan nɛ Mari jiin' utond nnɔ́ ki ye: «N yé Yonbdaan ya piitonsɔnl nɛ. Nè rí tien tɛn a len' ma nɔ.» U ya yo nɛ utond nnɔ́ siere' ki dāan' wɔ.

### *Mari jon' ki tĩ fuonde' Elisabet*

<sup>39</sup> I ya dɛn nɛ Mari pɔk ki bure' ijuɔn bó, Sude ya tinfɛnm ya du uba ni. <sup>40</sup> U tĩ baa' ki kɔn' Sakari den, nɛ ki fuonde' Elisabet. <sup>41</sup> Elisabet cii' ifuonde nnɔ́ ma nnɔ́, nɛ u'buk nukbe' u'benku ni. \*Mifuoñaanm jiire' ní u'bo ki gbien', <sup>42</sup> nɛ u len' ufaa bo ki ye: «Uwien tien' ɲe u'mɔnm ki cɛn' bipiib kɛ, ki tien' mimɔnm kibuk kà te a'benku ni nnɔ́ mɔ bo. <sup>43</sup> N'mɔ ya ba nɛ n'Yonbdaan ya naa baa' n'saan-i? <sup>44</sup> Kime uyo wà a'fuonde lu' n'tubl ni nnɔ́, nɛ n'buk nukbe' n'benku ni nin uyɛnsɔngɛ. <sup>45</sup> Sin wà teke' ki jin' ki ye Yonbdaan tɔke' ɲe nà nnɔ́ li tien nnɔ́, Uwien ya mɔnm te a'bo.»

### *Mari ɣɛn' iyuon ki donde' Yonbdaan*

<sup>46</sup> Nɛ Mari ye:

«N ɲɛngɛh Yonbdaan,

<sup>47</sup> ki ɲmɔbe uyɛnsɔngɛ ki gbien',

Uwien, n'Nɲmienl bo.

<sup>48</sup> U tiere' min u'tonsɔnpiijiin bó,

fɛnfɛnnɔ́ kí taa kí li joh,

binib kɛ li len kí ye Uwien ya mɔnm te n'bo.

<sup>49</sup> Kime mituɔm kɛ ya daan tien' nni

tibont tà ɲmɔbe ukpiɛke,

u'yel si: Uñaan nɛ.

<sup>50</sup> U li tuu ki teh binib bà boh wɔ tinimònt nɛ,

haali uyo wà ɲa ɲmɔbe gbenm.

<sup>51</sup> U wuɔn' binib u'tuɔm,

ki ɲɔre' binib bà maaleh ki teh

bi yé binikpɛkpiɛkb nnɔ́.

52 U ñen' bibercienb bi'bel ni,  
ki kpiεke' bijiinb.

53 U de' binib bà mikònm ñmàbe be tibont na ñmàbe fuul,  
ki ñore' bifàadenb bi bure' inòpien.

54 U tiere' u'nimònt bó,  
ki tore' u'tonsònb Israyel yaab,

55 ten u là ye u li tuu ki teh ma  
ki dienh ti'yaaje \*Abraham nin u'yaabii nnò.»

56 Mari tien' Elisabet saan ñi baa' ten inmaale ita,  
ne ki liεbe' ki kun'.

### *San wà siih binib Uwien ya ñunm ya màam*

57 Elisabet ya mamaayo baa', ne u maa' kibujεbuk. 58 U'den yaab nin u'kònkuanlieb cii'  
Yonbdaan muò' wò micεcεkm ki gbien', ne wòn nin ben ke pokn'.

59 Kibuk nnò ya wienniin daali, ne bi baa' be ní jε ki'punl, ki yíe be ní yin kè Sakari ten  
ki'baa. 60 Ne ki'naa yíe', ki ye bi li yin ke San ne. 61 Ne bi tóke' wò ki ye ba yih a'den ya nil  
uba li ya yel-a. 62 Ne bi niire' ki'baa migbaam ki ye u yíe wò ní yin u'buk li ε yel ba?

63 Ne u wuòn' be ki ye be ní de wò kudòbipenpenku kuba wò ní kele ku'bo. Bi de' wò, ne  
u kele' ki ye: «ki'yel si San» ne. Ne ñi cuo' bi'ke miyòkm. 64 I ya tàan bo ne Sakari ya lenl  
tebre', ne u cin' ki lienh, ki pèkeh Uwien. 65 Nen saan ne bujεwaanbu cuo' binib bà ke kò  
ka fòke nin ni'saan nnò. Sude ya tinfenm ya du yà ke te ijuòn bó nnò ya nib lienh tigber  
nnò. 66 Tù de' binib bà ke cii' tù nnò iyenmaale. Ne bi maaleh bi'yenm ni ki teh: «Kibuk kis  
lá li yé be ya nitunbu sò?» Kimε Yonbdaan ya tuòm te ki'bo.

### *Sakari ya yuon*

67 Nen saan ne \*Mifuoñaanm jiire' ní kibuk nnò ya baa Sakari bo ki tí gben', ki cère' u  
sòkndeh Uwien ya ñòbon ki teh:

68 «Tí pèke mèn Yonbdaan, tinbi Israyel yaab ya Wien,  
kimε u baa' u'nib saan, ki teke' be ki wiε',

69 ki cère' wà li ñmien te,  
ñen' u'tonsònl \*Dafid den,  
ki ñmàbe mituòm.

70 U là cère' u'ñòbonsòknb len' nen ne uyo bo.

71 Bi là len' ki ye:

«Uwien ye u li fie te bà se ti'bo saan,  
kí ñen te bà ke nen te ya nuò ni.

72 U là muò' ti'yaajεb micεcεkm,  
ki tiere' u'jòtiekú bó.»

73 U là pùon' nà sò ti'yaaje Abraham:

74 «u là ye u li ñen te ti'nennendb ya nuò ni,  
ñò tí li pukeh wò ki la fenge,

75 kí li pε u'bo mòmòmnm,  
kí li cuube u'nun bó,  
ti'fuobm ke ni.»

76 «Sin, n'bukε, bi li yin ñε  
Uwien wà ña ñmàbe Nacentò ya ñòbonsòknl.  
Kimε a li liere Yonbdaan,

kí tùòre u'sen kí de wò,

77 kí cère u'nib ní bende kí ye u li fère be bi'biere, be ní ñmεre.»

78 Kimε ti'Wien ñmàbe tinimònt ki gbien'.

U'nimònt nnò bo ne u li cère kuwenwenku ní ñε paaki bó kí wende ti'bo ten uwien puòreh  
ma bo.

<sup>79</sup> Kuwenwenku nnɔ li wende binib bà te licinñunl ni, mikuum ya jinjinku yiin bi'bo nnɔ. Kù li wuɔn tɛ usɛn wà li de tɛ uyenduɔn.»

<sup>80</sup> Kibuk nnɔ kpïenh, nɛ ki lɛnh miyɛnm\*. Kì te kupenpelku ni nɛ ki tĩ baa' uyo wà kĩ ñɛn' ki'tuonl upaan bo Israyel yaab ya nun bó.

## 2

### *Yesu ya mɔdam ya gber (Matie 1:18-25)*

<sup>1</sup> Tɔ, i ya dɛn nɛ Erom ya bɛrciɛn Ogust caan' ki ye bɛ ñ kàan binib bà kɛ te u ya tinfɛnm bo nnɔ. <sup>2</sup> Bi là kaan' kukɛnkpiɛku bu'gbɛn ma nnɔ ki laa' Kirinus nɛ yé Siri ya tinfɛnm ya gobina. <sup>3</sup> Wà kɛ là li jo kí tĩ kàan kukɛnku nnɔ u'yaajɛdu ni nɛ. <sup>4</sup> Nɛn bo nɛ Yosef ñɛn' Galile ya tinfɛnm ya du wà bi yih wù Nasaret nnɔ ni, ki jon' bi maa' \*Dafid udu wà ni u te Sude ya tinfɛnm ni, bi yih wù Betelem nnɔ ni, kimɛ Yosef bugbɛn yé \*Dafid ya yaabil nɛ. <sup>5</sup> U là tɔke nin Mari utɛnpunb ki jon' ni'ból kukɛnku nnɔ nɛ. Bi là pun' Yosef u ya jɛfaan nɛ, ama wa laan là kuɔn' wɔ. <sup>6</sup> Bi te Betelem ni u yo wà nnɔ, nɛ Mari ya mamaayo baa', <sup>7</sup> u maa' u'jɛfɛnmɛl kí yé kijɛk ki taa' tikpɛlcɛr ki pɔbn' kè, ki taa' kè ki kpïen' tiwɛnt jinh nà ni, kimɛ fɛnm ña là te cɛnduku ni.

### *Uwien ya tond uba tɔke' biwɛnkpaab Yesu ya mɔdam bó*

<sup>8</sup> Tɔ, biwɛnkpaab biba là te mitinfɛnm nnɔ ni, ki kɔh ikpàan bó, ki gɔh ki gu bi'wɛnt kuñɔnku. <sup>9</sup> Yonbdaan ya tond uba puɔ' bi'saan, nɛ Yonbdaan ya wenwenku wende' ki yile' bi'bo, nɛ bujɛwaanbu cuo' bɛ cɛɛn. <sup>10</sup> Nɛn saan nɛ utond nnɔ tɔke' bɛ ki ye: «La fɛnge mɛn, kimɛ n tuke tigbɛmɔnmɔnt nɛ ñ lá tɔke nɛ. Tigber nnɔ li sɔnge binib kɛ ya yɛnm kí gbien. <sup>11</sup> Dinnɔ wuɔ nɔ, bi maa' ni'Ñmïenl \*Kristo Yonbdaan, \*Dafid ya du ni. <sup>12</sup> Nà sɔ li yé kudïɛku: ni li lɛ kicɛnfɛndk kiba puɔbe tikpɛlcɛr ni ki kpe tiwɛnt jinh nà ni.» <sup>13</sup> Nɛ Yonbdaan ya tondb ligol baa' utondbaab nnɔ saan i ya tãan bo bi pɛkeh Uwien ki teh: <sup>14</sup> «Uwien si ukpiɛke paaki bó. Uyenduɔn ñ li te kitink bo binib bà Uwien yíe bɛ nnɔ bo» <sup>15</sup> Yonbdaan ya tondb nnɔ siere' ki liɛbe' ki don' paaki bó u yo wà nnɔ, nɛ biwɛnkpaab nnɔ ji tɔkeh tɔb ki teh: «Tí jo mɛn Betelem, kí tĩ liike nibonn nà tien' ni'ból ñɔ Yonbdaan cɛrɛ' tí bɛnde nɔ.» <sup>16</sup> Nɛ bi pɔk ki bure' ki tĩ baa' ki laa' Mari nin Yosef nin kicɛnfɛndk nnɔ, ki kpe tiwɛnt jinh nà ni. <sup>17</sup> Bi laa' kè ma nnɔ, nɛ ki len' Yonbdaan ya tond bi tɔke' bɛ nà kɛ kicɛnfɛndk nnɔ bo nnɔ. <sup>18</sup> Nɛ ni bɛke' binib bà kɛ cii' biwɛnkpaab len' tigber tà nnɔ. <sup>19</sup> Mari wɔn cengeh tigber nnɔ kɛ, nɛ ki tũrɛh ki taah tù ki blinh u'fɛl bo. <sup>20</sup> Nɛn saan nɛ biwɛnkpaab nnɔ siere' ki liɛbeh, ki pɛkeh Uwien, ki kpïekrɛh wɔ, bi cii' nà nin bi laa' nà bo. Kimɛ ni'kɛ tien' tɛn Yonbdaan ya tond bi len' ma bo nɛ. <sup>21</sup> Wienniin daali bi jìe' kibuk nnɔ ya punl nɛ ki yin' kè Yesu. Kimɛ Yonbdaan ya tond là ye bɛ ñ yin kè li ya yel nɛ ki yaan bi punbe' kè.

### *Bi taa' Yesu ki kɔn' Uwien ya duku ya luo bo ki wuɔn' Uwien*

<sup>22</sup> Uyo wà ñi kpaan' bɛ ñ tien tijɔknt ya ñɛnm ya tuɔrl tɛn Moyis ya yiko ye ma bo nnɔ, nɛ Mari nin Yosef taa' kibuk nnɔ ki jon' Yerusalem, bɛ ñ tĩ wuɔn Yonbdaan. <sup>23</sup> Kimɛ ni kɛle' Yonbdaan ya yiko ya gbɔnku ni ki ye: «Kibujɛbukpiɛk kɛ li yé Yonbdaan yaak nɛ.» <sup>24</sup> Mari nin Yosef li tien lituɔrl nnɔ Yonbdaan ya yiko ye ma bo nɛ. U ye bɛ ñ li taah kumuɔku ni ya nɛnjel ile bii iden ya nɛnjefanfaan ile nɛ ki teh lituɔrl nnɔ.

<sup>25</sup> Tɔ, ujɛ uba là te Yerusalem ni, bi yih wɔ Simeyɔn, u yé unil wà cuube nɛ, ki pɛ \*Uwien bo mɔnmɔnm, ki gu lidaali là Uwien li ñɛn Israyel yaab bi'jɛnd ni. \*Mifuoñaanm là te u'bo, <sup>26</sup> ki tɔke' wɔ ki ye wa ñ kpo, ka laa' Yonbdaan ya Nigɛndkɛ Kristo. <sup>27</sup> \*Mifuoñaanm cɛrɛ' u kɔn' Uwien ya duku\* ya luo bo. U te len uyo wà nnɔ, nɛ kicɛnfɛndk \*Yesu ya

\* **1:80** Bi li fre ki lɛbre ki lɛnh miyɛnm kí ye ki pɛ Uwien ya sɛn bo nin ki'yɛnmaale kɛ mɔ. \* **2:27** Liike Matie 12:5; Mark 11:11.

naa nin ki'baa tuke kè ki kòn' ní, be ní lá tien kè lituərl Yonbdaan ya yiko ye ma bo, <sup>28</sup> ne Simeyən teke' kè ki ŋuuke, ki pèkeh Uwien ki teh:

<sup>29</sup> «Tɔɔ, Yonbdaan, fɛnfɛnnɔ a tien' a là tɔke' nni ná nnɔ. A li fre kí cère min a'tonsɔnl ní kpo nin uyenduɔn.

<sup>30</sup> Kimɛ a cère' n'nun laa' Uŋmiɛnl.

<sup>31</sup> A là bonde' wɔ uŋɛndun ya nib kɛ ya nun bó nɛ.

<sup>32</sup> U yé kuwenwenku kùà li cère bà ŋa yé Israyel yaab ní bende ŋe nɛ. Wɔn bo nɛ binib li kpiɛke a'nib Israyel yaab.»

<sup>33</sup> Kibuk nnɔ ya naa nin ki'baa cii' Simeyən len' ki'bo tigber tà nnɔ, nɛ ní beke' bɛ. <sup>34</sup> U tien' bɛ Uwien ya mɔnm, ki tɔke' ki'naa Mari ki ye: «A li bɛn ki ye kibuk kɛ bo, tinbi Israyel yaab ni bà yebe li lu, bà yebe mɔ li fii. Kí yé kudɛku kùà li cère binib ŋa ní len ki cii' tɔb bó nɛ. <sup>35</sup> Kí li cère iyɛnmaale yà buɔ binib bà yebe ya fɛl ni ní ŋɛ upaan bo. Sin Mari mɔnɔn, ní li wire ŋe tɛn bi cɔke' ŋe kijuk nɛ.»

<sup>36</sup> Upii uba mɔ là te, ki yé \*Uwien ya ŋɔbonsɔknl, bi yih wɔ Ann. U yé Fanuyel ya bise, ki yé Aser ya bol ya nil, ki pore' cɛɛn. U là tien' u'cɛ saan ibin ilole, nɛ u kpo' ki cère' wɔ, <sup>37</sup> u juore' ki yé ukpopii ki tɛ baa' ibin piniin nin inan, ka jɛndeh Uwien ya duku, ki pukeh wɔ ŋɔnku nin wien ni, ki lùoh buŋɔbu, ki kàareh. <sup>38</sup> Tɔ, u ya yo nɛ u'mɔ baa' ní, ki cin' ki faareh Uwien kibuk nnɔ bo, nɛ ki tɔke' ki'gbɛr Yerusalem ya nib bà kɛ là gu uyo wà Uwien li teke bɛ kí wiɛ nnɔ.

#### *Yosɛf nin Mari liɛbe' ki kun' Nasarɛt*

<sup>39</sup> \*Yesu ya baambɛ tien' Yonbdaan ya yiko ye ma nnɔ kɛ, nɛ ki liɛbe' ki kun' Nasarɛt, bi'du ni Galile ya tinfɛnm ni. <sup>40</sup> Kibuk nnɔ kpɛnh, ki faakreh, ki lɛnh miyɛnfuom, nɛ Uwien ya mɔnm te ki'bo.

#### *Yesu tɔke nin u'baambɛ ki jon' Yerusalem*

<sup>41</sup> Binl kɛ binl \*Yesu ya baambɛ doh Yerusalem bó nɛ ki tɛ jɛleh Pak ya nacenku. <sup>42</sup> \*Yesu tɛ laa' ibin piik nin ile uyo wà nnɔ, nɛ bi tuke' wɔ ki don' Yerusalem bó tɛn bi tɛ ní tuu ki joh ma kunacenku nnɔ. <sup>43</sup> Kunacenku nnɔ ya wien tɛ gben' ma nnɔ nɛ bi liɛbe' ki kunh bi'donbó. Ama kibuk \*Yesu wɔn là juore' Yerusalem ni nɛ, ba bɛn ki ye u juore'. <sup>44</sup> \*Yesu ya baambɛ cuon' liwentunŋmɛnl ki maaleh ki teh u lii te bisɛnjotɔb ni nɛ. Bi lá tiere' ki liike' ka laa' wɔ, nɛ ki cin' ki nuunh wɔ bi'yaab nin bi'benbenkaab kɛ ni. <sup>45</sup> Ba laa' wɔ, nɛ ki pekre' ki nuunh wɔ ki liɛbeh Yerusalem. <sup>46</sup> Wienta daali nɛ bi laa' wɔ Uwien ya duku ya luo bo, u kɛ \*Yiko ya wɔnwɔknɔb ya siik ni, ki cengeh bi'wɔknɔm, ki niireh bɛ iniire. <sup>47</sup> Ní jin' binib bà kɛ cengeh u'bó nnɔ, kimɛ u ŋmɔbe miɛnɛm, nɛ ki jɛndeh bɛ mɔnmɔnm. <sup>48</sup> Uyo wà u'baambɛ tɛ laa' wɔ nnɔ, ní beke' bɛ cɛɛn, nɛ u'naa ye: «Kibuke! Bɛ nɛ a tien' tɛ nɔ nnɔ? Liike min nin a'baa ya yɛnm saa' ma cɛɛn uyo wà ti nuunh ŋe nnɔ-a!» <sup>49</sup> Nɛ \*Yesu jɛn' bɛ ki ye: «Bɛ bo nɛ ni nuunh nni? Na bɛn ki ye ní li te n'Baa den nɛ-ɛɛ?†» <sup>50</sup> Ama ba cii' u tɔke' bɛ liŋɔbonl là nnɔ ya tingi.

<sup>51</sup> Nɛn saan nɛ \*Yesu paan' bi'bo ki liɛbe' Nasarɛt, kimɛ u là boh bɛ nɛ. U'naa taah tigber nnɔ kɛ ki blɛnh u'fɛl bó. <sup>52</sup> \*Yesu kpɛnh ki yeɓreh, u'yɛnfuom pukndeh, nɛ Uwien nin binib kɛ ya yɛnm sɔnge u'bo.

## 3

#### *San wà siih binib Uwien ya ŋunm ya gbɛr (Matie 3:1-12; Mark 1:1-8; San 1:19-28)*

<sup>1</sup> Erom yaab ya bɛrciɛn Tiber Sesa ya bel ya piikn binlŋun bo, ki laa' Pɔns Pilat nɛ yé Sude ya tinfɛnm ya gobina. Herod mɔ yé Galile ya tinfɛnm ya gobina, u'ninje Filip mɔ yé Iture nin Trakonit ya gobina, nɛ Lisaniyas mɔ yé Abilenn yɔ. <sup>2</sup> U yo wà Anni nin Kayif yé bitɔtuərciɛnb ya ciɛnb nnɔ nɛ Uwien len' nin Sakari ya bijɛ San kupenpelku ni. <sup>3</sup> U

† 2:49 Bi li fre kí lɛbre ní li te n'Baa den kí ye ní li sɔnh n'Baa ya tuonl nɛ mɔ.

cin' ki cuonh mitinfenm mà nuon Suden ya kpenl nnò ni, ki kpaandeh ki teh: «Lèbre men ni'tetem, ní sîi nε Uwien ya ñunm ηο Uwien ní fère nε ni'biere.» <sup>4</sup> U tien' nnò ηο nà kele' \*Uwien ya ñabonsoknl Esayi ya gbònkú ni nnò nè ní tien nε. Ní kele' ki ye:

«Udaan uba te kupenpelku ni ki wuureh ki teh:

⟨Tùore men Yonbdaan ya sen,  
kí cubn u'sengbenmu kí de wò.

<sup>5</sup> Bi li taa titent kí gbien tijòbòr kε,  
kí bere kí jenge ijuon nin igbengben kε,  
kí naare isen yà kε pòle',  
kí kpelke isen yà kε ηa kpelke.

<sup>6</sup> Unisaal kε li lε Uwien ηmiendeh ma binib.⟩ »

<sup>7</sup> Nεn saan nε San tòkeh linigol là bàareh u'saan, ki nuunh wò ní sîi bε Uwien ya ñunm nnò ki teh: «Iwaaleb ninbi, ηmε nε wuon' nε ni li tien ma kí ñε Uwien ya benpiebe wà we ní nnò ni? <sup>8</sup> Li sòn h mèn itùon yà wòngèh ki teh ni lèbre' ni'tetem, ki la li maaleh ni'yεnm ni ki teh: «Ti'yaaje si \*Abraham ma nnò, ní dèkre' nε», kimε n tòkeh nε nε, Uwien li fre kí cère iten yie nò ní kpende \*Abraham ya yaabii. <sup>9</sup> Uwien bonde' liyel ηο wò ní kpikre isiin. Isiin yà kε ηa lùonh biimòmòn la, u li gε yí kí wie umu ni nε.»

<sup>10</sup> Nε inigol nnò niireh wò ki teh: «Ti nín li tien mila?» <sup>11</sup> Nε u jindeh bε ki teh: «Wà ηmòbe ilier ile la, wò ní taa liba kí pu wà ηa ηmòbe. Wà mò ηmòbe tijier la, wò ní pu wà ηa ηmòbe.»

<sup>12</sup> Bilenpotekb mò baa' u'saan wò ní sîi bε Uwien ya ñunm, nε ki niire' wò ki ye: «Cenbaa, ti'mò li tien mila?» <sup>13</sup> Nε u jiin' bε ki ye: «La wòbndeh mèn nib bε ní li paanh ní gèbreh bi sien' nε ubien wà.»

<sup>14</sup> Nε sojambe mò niire' wò ki ye: «Nε tinbi le? Ti'mò li tien mila?» Nε u jiin' bi'mò ki ye: «La fienh mèn nib ya bonn, ki la biin wà ηa ηmòbe biil. Cère mèn ni'yεnm ní li sange ni'paaku bo.»

<sup>15</sup> Binib là gu Uwien ya Nigendkε Kristo ya baam, nε ki maaleh bi'yεnm ni ki teh: «San la lii yé wòn nε-a?» <sup>16</sup> Nε San tòke' bi'kε ki ye: «Min taah miñunm nε ki siih nε Uwien ya ñunm. Ama uba we ní, ki cen' nni. Ma kpe ní lore u'taceningben. Wòn nε lá li cère \*Mifuoñaanm nin umu ní jiiire ní ni'bo. <sup>17</sup> U taa' kiyonyiek ηο wò ní tí lende u'ji. U li taa mijibim kí cùon ubonbuon ni, kí taa tifent kí wie umu wà ηa ní kpiin ni.»

<sup>18</sup> Tò, San liebe' ki taa' iñòbontò ÿ yεbe ki saake' binib ya gbεnent, ki tòke' bε tigbεmòmònt.

<sup>19</sup> U ya yo nε gobina Herod là taa' u'ninje ya po Herodiyad, ki kuon', ki liebe' ki sòn' itùonbiertò mò ÿ yεbe. Nεn kε bo nε San tòke' wò ki ye u bii'. <sup>20</sup> Nεn bo nε Herod cuo' San ki tí pek'n', ki liebe' ki bii' ki puk'n'.

### *San sîi' Yesu Uwien ya ñunm*

*(Matie 3:13-17; Mark 1:9-11)*

<sup>21</sup> San là siih binib kε Uwien ya ñunm ma nnò, nε ki sîi' \*Yesu mò. \*Yesu kàareh uyo wà nnò, nε kutaaku yàare', <sup>22</sup> \*Mifuoñaanm jiih ní ki naan unenjel ki lá kèle' u'bo, nε unieke uba ñen' paaki bó ní ki ye: «Sin, a yé n'bijε\* nε, n yie ηε nε n'yεnm sange a'bo.»

### *Yesu ya yaajεb ya yel*

*(Matie 1:1-17)*

<sup>23</sup> Uyo wà \*Yesu baa ten ibin pita nnò, nε ki cin' u'tuonl. Binib là maaleh ki teh u yé Yosεf ya bijε nε. Yosεf là yé Heli ya bijε nε, <sup>24</sup> Heli mò yé Matat ya bijε, Matat mò yé Lefi ya bijε, Lefi mò yé Melki ya bijε, Melki mò yé Yanayi ya bijε, Yanayi mò yé Yosεf ya bijε, <sup>25</sup> Yosεf mò yé Matatias ya bijε, Matatias mò yé Amos ya bijε, Amos mò yé Nahum ya bijε, Nahum mò yé Esili ya bijε, Esili mò yé Nagayi ya bijε, <sup>26</sup> Nagayi mò yé Mart ya bijε,

\* **3:22** Bi kpie' ki kele' tigbont tà nnò ya tuba ni bi ye: A yé n'bijε nε. Dinnò n tien' ηε n'bijε.

Mart mɔ́ yé Matatiyas ya bije, Matatiyas mɔ́ yé Semeyinn ya bije, Semeyinn mɔ́ yé Yosék ya bije, Yosék mɔ́ yé Yoda ya bije,<sup>27</sup> Yoda mɔ́ yé Yowanan ya bije, Yowanan mɔ́ yé Lesa ya bije, Lesa mɔ́ yé Sorobabel ya bije, Sorobabel mɔ́ yé Salatiel ya bije, Salatiel mɔ́ yé Neri ya bije,<sup>28</sup> Neri mɔ́ yé Mɛlki ya bije, Mɛlki mɔ́ yé Adi ya bije, Adi mɔ́ yé Kosam ya bije, Kosam mɔ́ yé Elmadam ya bije, Elmadam mɔ́ yé Eri ya bije,<sup>29</sup> Eri mɔ́ yé \*Yesu† ya bije, \*Yesu mɔ́ yé Elieser ya bije, Elieser mɔ́ yé Yorim ya bije, Yorim mɔ́ yé Matat ya bije, Matat mɔ́ yé Lefi ya bije,<sup>30</sup> Lefi mɔ́ yé Simeyɔ́n ya bije, Simeyɔ́n mɔ́ yé Suda ya bije, Suda mɔ́ yé Yosef ya bije, Yosef mɔ́ yé Yonam ya bije, Yonam mɔ́ yé Eliyakim ya bije,<sup>31</sup> Eliyakim mɔ́ yé Meleya ya bije, Meleya mɔ́ yé Mena ya bije, Mena mɔ́ yé Matata ya bije, Matata mɔ́ yé Natan ya bije, Natan mɔ́ yé \*Dafid ya bije,<sup>32</sup> \*Dafid mɔ́ yé Yese ya bije, Yese mɔ́ yé Yobed ya bije, Yobed mɔ́ yé Bos ya bije, Bos mɔ́ yé Sala ya bije, Sala mɔ́ yé Nasɔ́n ya bije,<sup>33</sup> Nasɔ́n mɔ́ yé Aminadab ya bije, Aminadab mɔ́ yé Adimin ya bije, Adimin mɔ́ yé Arini ya bije, Arini mɔ́ yé Esilɔ́m ya bije, Esilɔ́m mɔ́ yé Fares ya bije, Fares mɔ́ yé Suda ya bije,<sup>34</sup> Suda mɔ́ yé Sakɔ́b ya bije, Sakɔ́b mɔ́ yé \*Isaak ya bije, \*Isaak mɔ́ yé \*Abraham ya bije, \*Abraham mɔ́ yé Tara ya bije, Tara mɔ́ yé Nakor ya bije,<sup>35</sup> Nakor mɔ́ yé Seruk ya bije, Seruk mɔ́ yé Eragawu ya bije, Eragawu mɔ́ yé Falék ya bije, Falék mɔ́ yé Eber ya bije, Eber mɔ́ yé Sala ya bije,<sup>36</sup> Sala mɔ́ yé Kayinam ya bije, Kayinam mɔ́ yé Afaksad ya bije, Afaksad mɔ́ yé Sem ya bije, Sem mɔ́ yé Nowe ya bije, Nowe mɔ́ yé Lamék ya bije,<sup>37</sup> Lamék mɔ́ yé Matusala ya bije, Matusala mɔ́ yé Enák ya bije, Enák mɔ́ yé Yared ya bije, Yared mɔ́ yé Malelel ya bije, Malelel mɔ́ yé Kayinam ya bije,<sup>38</sup> Kayinam mɔ́ yé Enɔ́s ya bije, Enɔ́s mɔ́ yé Set ya bije, Set mɔ́ yé Adam ya bije, Adam mɔ́ yé Uwien ya bije.

## 4

### *Satan biike' Yesu* (Matie 4:1-11; Mark 1:12-13)

<sup>1</sup> \*Mifuoñaanm jiiire' ní \*Yesu bo ki gbe u'ni. U siere' Suden ya kpenl saan, ne mĩ tuke' wɔ́ ki jon' kupenpelku ni, <sup>2</sup> ne usenpol bikreh wɔ́ len ki tí baa' iwien pinan. Iwien pinan nnɔ́ wa jin' niba. I gèbre' ma nnɔ́ ne mikònm cuo' wɔ́.

<sup>3</sup> Nen saan ne usenpol tɔ́ke' wɔ́ ki ye: «A yé Uwien ya Bijé la, cère litenl lie ní kpende kpɔ́nɔ́.» <sup>4</sup> \*Yesu jiiin' wɔ́ ki ye: «Nì kele' \*Uwien ya gbɔ́nku ni ki ye: «Nil ña ní li fuobe jier baba bo.» »

<sup>5</sup> Ne usenpol taa' wɔ́ ki don' nà saan dokre', ki wuɔ́n' wɔ́ unɛndun ya bel ke i ya tàan bo, <sup>6</sup> ne ki tɔ́ke' wɔ́ ki ye: «N li de ñe libel lie ya ciɛnt nin li'faal ke, kimɛ bi là taa' ni'ke ki de min ne. N li fre kí taa nè kí de n yíe wà. <sup>7</sup> Nen bo, a gbaan' n' nintuɔ́li ki puke' nni la, sin ne li si ni'ke.» <sup>8</sup> Ne \*Yesu jiiin' wɔ́ ki ye: «Nì kele' \*Uwien ya gbɔ́nku ni ki ye:

«A li gbaan kí kpieke a'Yonbdaan Uwien ne kí li pukeh wɔ́n baba.» »

<sup>9</sup> Ne \*usenpol taa' wɔ́ ki jon' Yerusalem, ki tí duon' wɔ́ \*Uwien ya duku ya paaki lekleki, ne ki tɔ́ke' wɔ́ ki ye: «A yé \*Uwien ya Bijé la, maabe kí lá ci tingi ni, <sup>10</sup> kimɛ ní kele' \*Uwien ya gbɔ́nku ni ki ye: «Sin bo, Uwien li wɔ́bn u'tondb be ní guure ñe.» <sup>11</sup> Ki tí ye: «Bi li guure ñe ñɔ́ a'taal la me tenl.» » <sup>12</sup> Ne \*Yesu jiiin' wɔ́ ki ye: «Nì tí kele' mɔ́ ki ye: «Ña ní biike a'Yonbdaan Uwien.» »

<sup>13</sup> Usenpol biike' \*Yesu mibiikm ke ya bol ki tí gbele', ne ki laan siere' ki dàan' wɔ́.

### *Yesu cin' u'tuonl Galile ni* (Matie 4:12-17; Mark 1:14-15)

<sup>14-15</sup> \*Yesu liebe' ní Galile ya tinfenm ni nin \*Mifuoñaanm ya tuɔ́m, ki wɔ́knh \*Sufmbe ya táan ya dur ni; ne binib ke kpiekreh wɔ́. U ya yo ne u'yel kpienh mitinfenm nnɔ́ ni ni'ke saan.

† 3:29 Migbiirm miɛ ni bi ye \*Yesu la, ba niire' Yonbdaan Yesu. U'mɔ́ te uba ne.

*Nasarət ya nib ɲa teke' Yesu ki jin'*  
(*Matie 13:53-58; Mark 6:1-6*)

<sup>16</sup> \*Yesu baa' Nasarət ya du ni, bi wube' wə nà saan, nε ki kən' \*Sufmbε ya taanl ya duku ni \*Saba ya daali tən u tɪ ɾi teh ma uyo kε. U fii' ki sere' wə ɾi kàan \*Uwien ya gbənkɔ, <sup>17</sup> nε bi taa' \*Uwien ya ɲəbɔnsəknl Esayi ya gbənkɔ ki de' wə. U pèrè' kugbənkɔ nnə, nε ki kaan' nà saan nɪ kɛlɛ' ki ye:

<sup>18</sup> «Yonbdaan ya Fuoɲaanm te n'bo, kime u gènde' nni ɾi təkɛ bijiinb tigbɛmənəmɔnt nε, ki sən' nni ɾi lā təkɛ iyonbe kɪ ye i li teke i'yul, kɪ təkɛ ijùɔn kɪ ye i li likre, kɪ təkɛ bi jèndeh bà nnə kɪ ye bi li ɲε bi'jend ni,

<sup>19</sup> kɪ təkɛ binib libinl là Yonbdaan li tien bε tinimənt.»

<sup>20</sup> \*Yesu konkonde' kugbənkɔ nnə, ki jiiin' ki de' litaanl ya duku ya tonsənl, nε ki kɛlɛ'. Binib bà kε te kuduku nnə ni caan' u'bo inun, <sup>21</sup> nε u cin' ki təkɛh bε ki teh: «Tigbɛr tà ni cii' tù nə, dinnə nε tù tien'!» <sup>22</sup> Nε bi'kε kun' u'bo imənt. U len' iɲəbɔnmənəmən yà nnə bεkε' bε cɛɛn, nε bi niireh tɔb ki teh: «Wə yé Yosef ya bijε-εε?»

<sup>23</sup> Nε u təkɛ' bε ki ye: «N bɛn ki ye ni li pə nni mikpɛnjenm miε nə ki ye: <Dəktiε, buu a'ba.> Ni tɪ li təkɛ nni kɪ ye <ni cii' n tien' nà kε Kapɛrnawum ya du ni nnə, ɾi tien nɛ n'ɔdu ni mə.> » <sup>24</sup> Nε ki tɪ ye: «N təkɛh nε imənt nε, <\*Uwien ya ɲəbɔnsəknl kε ɲəbɔnsəknl ya tiema du ni yaab nε ɲa teknh u'gbɛr.> » <sup>25</sup> N təkɛh nε imənt nε, Eli ya yo utaa là sere' ibin ita nin iɲmaale iluob nε, nε mikəncienm lu' uɲɛndun kε ni. U ya yo ki laa' bikpɔpiib po nε Israyɛl ya du ni. <sup>26</sup> Nin nɛn kε ɲə Uwien ɲa là sən' Eli bi'ni uba mənən saan. Ama u là sən' wə Sarɛpta ya du wà te Sidən ya tinfɛnm ni nnə ya kpɔpii uba saan nε. <sup>27</sup> \*Uwien ya ɲəbɔnsəknl Elise ya yo ki laa' ijend po nε Israyɛl ya du ni, ama Elise ɲa là cère' bi'ni uba mənən lùore', u là cère' Naaman wà yé Siri ya tinfɛnm ya nil nnə baba nε lùore'.

<sup>28</sup> Binib bà kε te litaanl ya duku ni nnə cii' u len' nà nnə nε bi'benku ni ben' u'bo ki gbien', <sup>29</sup> nε bi fii', ki cuo' wə ki ɲɛn' udu ni, ki taa' wə ki tɪ baa' bi'du nnə te ligbɛngbɛnl là bo nnə ya tintinm saan, bε ɾi ture wə kɪ wiε li'tingi. <sup>30</sup> Ama u ɲɛn' bi'siik ni, ki bure'.

*Yesu ɲəre' usɛnpol ujε uba saan*

<sup>31</sup> U tɪ baa' Galile ya tinfɛnm ya du uba ni bi yih wù Kapɛrnawum, ki cin' ki wəknh binib Uwien ya gbɛr \*Saba ya daali. <sup>32</sup> U'wəknhm nnə cuo' binib nnə kε miyəkkm cɛɛn, kime u du u'wəknhm nnə bo nε. <sup>33</sup> Tə, ujε uba là te Sufmbε ya taanl ya duku nnə ni usɛnpol ɲaake wə. U laa' Yesu, nε ki wuure' ufaa bo ki ye: <sup>34</sup> «Ho! Nasarət ya Yesu, tinbi nin sɪn tu lε nε? A baa' á lā boln tε nε-εε? N bɛn a yé udaan wà, a yé Uwien ya Niɲaan nε.» <sup>35</sup> Nε \*Yesu tien' u'bo ki ye: «ɲmile, kɪ siere ki dàan ujε wuə nə». Nε usɛnpol nnə gbəbe' ujε nnə binib kε ya siik ni, ki dàan' wə ka tien' wə niba. <sup>36</sup> Nε nɪ cuo' bi'kε miyəkkm cɛɛn. Nɛn saan nε bi niireh tɔb ki teh: «Bε ya gbɛr sɔ nə? U ɲməbe ufaa nin mituəm nε ki wəbndeh isɛnpol, i dàandeh binib-a!» <sup>37</sup> Nε \*Yesu ya yel kpɛnh mitinfɛnm nnə kε ni.

*Yesu buu' binib bà bun iwien kε ya bol*  
(*Matie 8:14-17; Mark 1:29-34*)

<sup>38</sup> \*Yesu ɲɛn' litaanl ya duku nnə ni, ki jon' Simən den, ki laa' Simən ya cəbnaa bun, u'gbɛnɛnt ton cɛɛn. Bi gbáan' \*Yesu ki ye wə ɾi cère wə ɾi faake. <sup>39</sup> Nε u gòn' u'bo, ki tien' iwien nnə bo nε u faake' ki pək ki fii' ki cènde' bε.

<sup>40</sup> Uwien bɛnh wù ɾi lu uyo wà nnə, nε bà kε yaab bun iwien kε ya bol tukeh bε ki bàareh \*Yesu saan. U taah u'nuə ki paakeh bi'bo, nε bi faakreh. <sup>41</sup> U cèreh isɛnpol mə dàandeh linigol, ki wuureh ki teh: «A yé Uwien ya Bijε nε.» Ama \*Yesu tɛngɛh i'bo nε ka cèreh i lienh kime i bɛn ki ye u yé Uwien ya Nigɛndkε Kristo nε.

<sup>42</sup> Nɪ faa', nε \*Yesu siere' ki jon' nib ɲa te nà saan. Nε linigol cin' ki nuunh wə. Bi tɪ laa' wə, nε ka ji yíe wə ɾi siere kɪ dàan bε. <sup>43</sup> Nε u təkɛ' bε ki ye: «Nɪ kpɛ ɾi taa Uwien ya bɛl ya

gbem̄nm̄nt tuu n̄o k̄i t̄ake idut̄o m̄o yaab n̄e, kime n̄en bo n̄e Uwien s̄on nni ní.» <sup>44</sup> Nn̄o n̄e u t̄akeh binib Uwien ya gber \*Sufmb̄e ya t̄aan ya dur t̄a te Sude ya tinf̄enm ni nn̄o ni.

## 5

### *Yesu yin' u'panpaank̄epiek̄b*

*(Matie 4:18-22; Mark 1:16-20; San 1:35-51)*

<sup>1</sup> Lidaali liba \*Yesu là se Genesaret ya ñuncīenm ya gbaal, n̄e linigol p̄eb̄eh w̄o ki nuunh b̄e r̄i cenge Uwien ya gber. <sup>2</sup> U laa' iñ̄erde ile miñunm nn̄o ya gbaal. Bij̄enb̄eb ñ̄en' i'ni ki te ki s̄okreh bi'b̄aan. <sup>3</sup> N̄e \*Yesu k̄on' iñ̄erde nn̄o ya buba, bù yé Sim̄on yaabu, n̄e ki gb̄aan' w̄o ki ye w̄o r̄i sule k̄i k̄o miñunm ni waamu. U sule' ki k̄on', n̄e \*Yesu k̄ele' buñ̄erbu nn̄o ni, ki cin' ki w̄oknh inigol Uwien ya gber.

<sup>4</sup> U w̄okn' ki t̄i gben', n̄e ki t̄ake' Sim̄on ki ye: «Jo miñunm ñ̄o n̄a saan, ní t̄i wīe ni'b̄aan k̄i cuo ij̄en.» <sup>5</sup> N̄e Sim̄on jiin' w̄o ki ye: «C̄enbaa, ti j̄ende' kuñ̄on̄menku n̄e ka cuo' bonn. Ama sin len' ma n̄o, n li wīe.»

<sup>6</sup> Bi wīe', ki cuo' ij̄en i ȳebe ka dindin, haali ib̄aan t̄i benh ȳe r̄i k̄ere. <sup>7</sup> N̄e bi k̄enbe' ki yin' bi'j̄enbet̄ob bà te buñ̄ert̄abu ni nn̄o, b̄e r̄i baa k̄i tore b̄e. Bi baa', n̄e bi ñ̄en' ij̄en nn̄o ki gbien' iñ̄erde ile nn̄o k̄e, haali i t̄i benh ȳi r̄i lin. <sup>8</sup> Sim̄on P̄ier laa' nn̄o ma nn̄o, n̄e ki gbaan' \*Yesu ya nun b̄o, ki t̄ake' w̄o ki ye: «Yonbdaan, j̄ende n'saan, kime n yé ubierdaan n̄e.» <sup>9</sup> Bi cuo' ij̄en i ȳebe ma nn̄o, n̄e ñ̄i cuo' Sim̄on nin bà k̄e te u'saan nn̄o miȳokm c̄een. <sup>10</sup> Miȳokm cuo' Sebede ya bij̄ieb Saak nin San bà yé Sim̄on ya tons̄ont̄ob nn̄o m̄o. N̄en saan n̄e \*Yesu t̄ake' Sim̄on ki ye: «La f̄enge, f̄enf̄enn̄o k̄i taa k̄i li joh, a ji li taakeh binib n̄e ki dien̄h nni.» <sup>11</sup> Bi d̄ere' bi'ñ̄erde nn̄o ki ñ̄en' ugb̄e, ki d̄aan' ni'k̄e, n̄e ki paan' u'bo.

### *Yesu c̄ere' uj̄end uba l̄ùore'*

*(Matie 8:1-4; Mark 1:40-45)*

<sup>12</sup> Lidaali liba n̄e \*Yesu te mitinf̄enm nn̄o ya du uba ni, uj̄e uba m̄o te len lij̄endl gbe u'gb̄en̄ent k̄e bo. U laa' Yesu, n̄e ki baa' ki lá p̄uon' u'nun b̄o, ki gb̄aan' w̄o ki ye: «Yonbdaan, a ȳie la, a li fre k̄i c̄ere r̄i l̄ùore.» <sup>13</sup> N̄e \*Yesu t̄ende' u'nūo ki m̄e' w̄o, n̄e ki ye: «N ȳie, l̄ùore.» N̄e lij̄endl nn̄o p̄ok ki gben' i ya t̄aan bo. <sup>14</sup> N̄e \*Yesu k̄pek̄pe' u'bo ki ye u la t̄ake nil n̄a tien', n̄e ki t̄ake w̄o ki ye: «Li jo k̄i t̄i l̄e ut̄atūr̄k̄e, k̄i tien mil̄uorm ya tūarl̄ ten Moyis là ye b̄e r̄i li teh ma bo. N̄en n̄e li wūon k̄i ye a l̄ùore.»

<sup>15</sup> \*Yesu ya yel t̄ùr̄eh ki kp̄ienh, n̄e inigol taakeh u'saan b̄e r̄i cenge u'gber ki ȳebe, ki nuunh w̄o r̄i buu bi'ni bà yé biwīenb. <sup>16</sup> Ama u s̄obe ki s̄ier̄eh bi'saan n̄e, ki joh nib ñ̄a te n̄a saan, ki t̄i k̄aareh.

### *Uj̄e uba ya t̄aan nin u'nūo faan' Yesu c̄ere' u faake'*

*(Matie 9:1-8; Mark 2:1-12)*

<sup>17</sup> Lidaali liba n̄e \*Yesu te ki w̄oknh Uwien ya gber. \*Faris̄ienm̄be nin \*Yiko ya w̄onw̄oknb bà ñ̄en' Galile nin Sude ya tinf̄enm ya du k̄e ni nin Yerusalem b̄o ní nn̄o m̄o te ni'saan. Yonbdaan Uwien ya tūm c̄ereh u buuh biwīenb. <sup>18</sup> N̄e bij̄eb biba tuke' uj̄e uba linagenl bo ki baa' ní. Uj̄e nn̄o ya t̄aan nin u'nūo n̄e là faan'. Bi nuunh b̄e r̄i taa w̄o k̄i kūon kuduku ni k̄i t̄i ble \*Yesu ya nun b̄o n̄e. <sup>19</sup> Linigol nn̄o bo ba laa' f̄enm b̄e r̄i kūon w̄o Yesu saan ma nn̄o, n̄e ki don' u te kudulekaaku k̄ua ni nn̄o ya paaki, ki cube' lib̄onl, n̄e ki taa' w̄o ki kūon' ki yekn' nin linagenl nn̄o, ki ble' siik ni \*Yesu ya nun b̄o. <sup>20</sup> \*Yesu laa' bi teke' w̄o ki jin' ma nn̄o, n̄e ki t̄ake' uj̄e w̄a ya t̄aan nin u'nūo faan' nn̄o ki ye: «N f̄ere' ñ̄e a'biere ñ̄o.»

<sup>21</sup> N̄en saan n̄e \*Yiko ya w̄onw̄oknb nin \*Faris̄ienm̄be cin' ki maaleh ki teh: «U yé ñ̄me n̄e ki sukreh Uwien n̄o? Uwien baba ñ̄a ñ̄i la, ñ̄me li fre k̄i f̄ere binib bi'biere?» <sup>22</sup> \*Yesu b̄ende' bi'ȳenmaale, n̄e ki niire' b̄e ki ye: «B̄e tien' ni maaleh n̄o nn̄o ni'ȳenm ni?» <sup>23</sup> Ni l̄e ba n̄e faa? N̄ t̄ake w̄o k̄i ye n f̄ere' w̄o u'biere n̄e faa bii w̄o r̄i fii k̄i li cuonh n̄e faa? <sup>24</sup> N̄en bo, n li wūon n̄e k̄i ye Unil ya Bij̄e ñ̄m̄obe mitūm uñ̄endun wuu ni w̄o r̄i f̄ere binib bi'biere.



Nε ki tɔke' uje wà ya tàan nin u'nuɔ faan' nnɔ ki ye: «N lienh sin nε, fii, kí yuure a'nagenl, kí li kunh.» »

<sup>25</sup> I ya tàan bo nε u pɔk ki fii' bi'nun bó, ki yuure' linagenl là u bi dɔ li'bo nnɔ, ki pèkeh Uwien ki kunh. <sup>26</sup> Ní cuo' bi'ke miyɔkm cεen, nε bi pèkeh Uwien. Bujɛwaanbu cuo' bε, nε bi lienh ki teh: «Ti laa' miyɔkm ya bonn dinnɔ.»

*Yesu yin' Lefi wɔ ní paan u'bo*  
(Matie 9:9-13; Mark 2:13-17)

<sup>27</sup> Ni ya puoli bó nε \*Yesu siere' ni'saan ki joh, ki laa' ulenpotekl uba bi yih wɔ Lefi, u kε lenpotekbùol. \*Yesu tɔke' wɔ ki ye: «Paan n'bo ní.» <sup>28</sup> Nε u dàan' ni'ke, ki fii' ki paan' u'bo.

<sup>29</sup> Lefi tien' tijier u'den tù yεbe ki teke' \*Yesu kucènku. Bilenpotekb ligol nin binitɔb mɔ là te tijier nnɔ ya jim. <sup>30</sup> Nà ηmaake' \*Farisienmbε nin bi'yaab bà yé \*Yiko ya wɔnwɔknb nnɔ, nε bi niire' \*Yesu ya panpaankaab ki ye: «Bε tien' ni jinh, ki ñuh nin bilenpotekb nin bibiερdenb-i?» <sup>31</sup> Nε \*Yesu tɔke' bε ki ye: «Binib bà ηmɔbe laanfιε ηa nuunh dɔktie, bà bun nε nuunh dɔktie. <sup>32</sup> Ma baa' ní yin nimɔnb, n baa' ní yin bibiερdenb nε bε ní lèbre bi'tetem.»

*Uñlòle ya gber*  
(Matie 9:14-17; Mark 2:18-22)

<sup>33</sup> \*Farisienmbε nnɔ tɔke' \*Yesu ki ye: «San ya panpaankaab nin tinbi \*Farisienmbε yaab sɔbe ki lùoh buñɔbu nε, ki kàareh, nε a'yaab ben jinh ki ñuh-a!» <sup>34</sup> Nε u jiin' bε ki ye: «Ni li fre kí cère binib bà bi yin' bε upiikuɔn nnɔ ní lòle buñɔbu uyo wà piicε laan te bi'saan-ii? <sup>35</sup> Ama uyo uba we ní bε ní ñen piicε bi'saan. U ya yo nε bi li lòle buñɔbu.» <sup>36</sup> Nε u tí pɔn' bε mikpenjenm ki ye: «Uba ηa ní jie kí lekre liliερfèn� ya kpelciεku kí lekn likpaal. U tien' nnɔ la, u li saa lifèn� nnɔ, nε lifèn� ya kpelciεku nnɔ ηa ní tuo kí cuo nin likpaal nnɔ. <sup>37</sup> Uba mɔ ηa ní taa midaam mà ηa laan muɔ' ki ben' kí pieke iyɔkpaan ni. U tien' nnɔ la, midaam nnɔ li kpien iyɔl nnɔ, kí wule kí ñende nε iyɔl mɔ ní saa. <sup>38</sup> Ama bi piekeh midaam mà ηa laan muɔ' ki ben' iyɔfèn ni nε. <sup>39</sup> Wà kε ñun' midaam mà muɔ' ki ben' la, wa ji yie mà ηa laan muɔ' ki ben', u li ye: «Mà muɔ' ki ben' nnɔ nε ηmε.» »

## 6

*Saba ya daali ya gber*  
(Matie 12:1-8; Mark 2:23-28)

<sup>1</sup> \*Saba uba ya daali, \*Yesu nin u'panpaankaab gèbreh ikpàan iba ni, nε u'panpaankaab coh ijifen\* ki cienh ki nukeh ki ηmɔnh. <sup>2</sup> Nε \*Farisienmbε biba niire' bε ki ye: «Bε tien' ni teh yiko kùɔn' nà \*Saba ya daali?» <sup>3</sup> Nε \*Yesu jiin' bε ki ye: «Na kaan' \*Dafid là tien' ma bo nε-εε? Mikònm là cuo' wɔn nin u'nib ma nnɔ, <sup>4</sup> u kɔn' Uwien ya ninbonl ni, ki taa' kpɔnɔ wà bi taa' ki de' Uwien nnɔ ki ηmɔn', ki taa' ki de' u'nib, bi'mɔ ηmɔn'. Ama bitɔtuɔrkaab baba nε là ηmɔbe usen bε ní ηmɔn kpɔnɔ nnɔ.» <sup>5</sup> Nε ki tɔke' bε ki ye: «Unil ya Bijε nε ηmɔbe usen wɔ ní wuɔn bi li tien nà Saba ya daali.»

*Uje uba ya nuɔ faan', Yesu cère' u faake' Saba ya daali*  
(Matie 12:9-14; Mark 3:16)

<sup>6</sup> \*Saba ya detɔl liba, \*Yesu tí kɔn' litaanl ya duku ni, ki wɔknh binib Uwien ya gber. Uje uba mɔ te len, u'nojie faan'. <sup>7</sup> \*Yiko ya wɔnwɔknb nin \*Farisienmbε sekndeh bε ní liike u li cère unil ní faake \*Saba ya daali bii wa ní cère, kime bi nuunh bε ní lε bi li dule nà bo kí biin wɔ nε. <sup>8</sup> \*Yesu ben bi'yennaale ma nnɔ nε ki tɔke' uje wà ya nuɔ faan' nnɔ ki ye: «Fii kí sere siik ni.» U fii' ki sere', <sup>9</sup> nε \*Yesu niire' bε ki ye: «\*Saba ya daali la, unil ηmɔbe usen wɔ ní tien nà mɔn bii nà bre nε? U ηmɔbe usen wɔ ní ηmien unil bii wɔ ní ku wɔ nε?» <sup>10</sup> U liike' bi'ke ki gɔbre' ki bòn', nε ki tɔke' uje wà ya nuɔ faan' nnɔ ki ye: «Tende a'nuɔ.» U tende' u'nuɔ, nε u jire' u'ciem. <sup>11</sup> Bi'benku ni ben' cεen, nε bi gbierreh bε ní liike bi li tien \*Yesu ma.

\* 6:1 Liike Matie 12:1.

*Yesu gènde' u'tondb piik nin bile  
(Matie 10:1-4; Mark 3:13-19)*

<sup>12</sup> Lidaali liba ne \*Yesu don' lijuəl bo wə rí tĩ kàare, ki gòn' ki kàareh <sup>13</sup> nĩ tĩ faa', ne u yin' u'panpaankaab ki gènde' bi'ni piik nin bile, ki yin' be u'tondb. <sup>14</sup> U'tondb nnə ya yel sə: Simən, wà u yin' wə Pier nnə nin u'ninje Andre nin Saak nin San nin Filip nin Batelemi <sup>15</sup> nin Matie nin Toma nin Alfe ya bije Saak nin Simən wà ya nun món u'du ya gber bo, <sup>16</sup> nin Saak ya bije Sudas nin Sudas Iskariyət wà lá li kuore Yesu.

*Yesu kpaandeh Uwien ya gber, ki buuh biwienb  
(Matie 4:23-25)*

<sup>17</sup> Yesu nin u'tondb jinh lijuəl nnə bo, ki lá sere' li'niel, u'panpaankaab yebe ná saan nnə. Linigocienl liba mə là te ni'saan. Lí nien' ní Sude ya tinfenm ke ni nin Yerusalem ni nin Tir ni nin Sidən ya du ni ne. Idu nnə te miñunciem ya gbaal ne. <sup>18</sup> Bi baa' be rí cenge u'gber ne, kí nuunh wə rí buu bi'ni bà yé biwienb. Ne u buu' be, ki ηəre' isenpol mə ĩ ηməbe binib bà ki jèndeh nnə saan. <sup>19</sup> Linigol nnə ke nuunh be rí me wə, kime mituəm miba ne nien u'ni ki cèreh bi'ke faakreh.

*Uwien ya mən̄m te ni'bo  
(Matie 5:1-12)*

<sup>20</sup> Nən saan ne Yesu caan' u'panpaankaab bo inun, ki ye:  
«Ninbi bijiinbe, Uwien ya mən̄m te ni'bo,  
kime Uwien ya bel yé ni'yaal ne.

<sup>21</sup> Ninbi bà mikònm ηməbe ne fenfennə nə,  
Uwien ya mən̄m te ni'bo,  
kime ni lá li ji kí gbo.  
Ninbi bà muəh fenfennə nə, Uwien ya mən̄m te ni'bo,  
kime ni lá li lè.

<sup>22</sup> «Binib nən ne,  
ka yie be rí li lenh ne,  
ki sukreh ne,  
ki saah ni'yel Unil ya Bijə bo la, Uwien ya mən̄m te ni'bo.  
<sup>23</sup> Bi teh ne nnə la, cère mən̄m ni'yenm rí li sange ní li poknh,  
kime ni li le lisuul là yebe paaki bó.  
Bi'yaajeb mə là teh nnə ne Uwien ya n̄əbonsəkn̄b.»

*Nĩ bre binib bo*

<sup>24</sup> «Ama ninbi bifaadēnbē, nĩ bre ni'bo,  
kime ni jin' ni'ηmaa ηə.

<sup>25</sup> Ninbi bà jinh ki gbiēh fenfennə nə,  
nĩ bre ni'bo,  
kime mikònm lá li cuo ne.  
Ninbi bà leh fenfennə nə,  
nĩ bre ni'bo,  
kime ni'yenm lá li saa ten ni ke mikuum ne ki muəh.

<sup>26</sup> Binib ke pèkeh ne la, nĩ bre ni'bo.  
Bi'yaajeb mə là teh nnə ne bitonnēn̄əbonsəkn̄b.»

*Li yie mən̄m ni'nennendb  
(Matie 5:38-48; 7:12a)*

<sup>27</sup> «N təkēh ninbi bà cengeh nni nə ne, li yie mən̄m ni'nennendb, kí li teh bà nən ne mən̄mən̄m. <sup>28</sup> Li təkēh mən̄m binib bà wiēnh ne miñuum ki teh Uwien rí tien be u'mən̄m, kí li kàareh ki dienh bà sukreh ne. <sup>29</sup> Unil kpəbe' a'kpienku kuba la, pekre kutaku mə kí de wə. Unil fie' a'lierḡbenku la, cèbe wə a'lierwawaal mə. <sup>30</sup> Wà ke mie' ηe nibonn la, pu wə.

Wà mɔ taa' a'bonn la, la niire wɔ ni'ból. <sup>31</sup> Ni yíe binib ní li teh ne ná nnɔ, ni'mɔ ní li teh be nen.

<sup>32</sup> «Ni yíe bà yíe ne baba la, ni li le ku le penpeku? Bibierdenb mɔnɔn yíe bà yíe be ne. <sup>33</sup> Ni teh mɔnmɔnm bà teh ne mɔnmɔnm baba ne la, ni li le ku le penpeku? Bibierdenb mɔnɔn teh nnɔ ne. <sup>34</sup> Ni kpendeh bà ni daan ki ye bi li jiin ne baba la, ni li le ku le penpeku? Bibierdenb mɔnɔn kpendeh bi'tɔb ne, ki daan ki teh bi li jiin be bi kpende' ná nnɔ. <sup>35</sup> Ama ninbi li yíe men ni'nennendb, kí li teh be ná mɔn, kí li kpendeh binib tibont, ki la daan ki ye bi li jiin ne tù. Ni teh nnɔ la, ni li le lisuul là yebe, ne ki li yé Uwien Wà ɲa ɲmɔbe Nacentɔ ya bumu. Wɔn mɔnɔn teh bibierdenb nin binib bà ɲa faareh wɔ tinimɔnt ne. <sup>36</sup> Li teh men tinimɔnt ten ni'Baa Uwien teh ma bo.»

*La li biindeh men tɔb  
(Matie 7:1-5)*

<sup>37</sup> «La biindeh men nib ɲɔ Uwien mɔ la biin ne. La ye men uba kpe utudere ɲɔ Uwien mɔ la ye ni'mɔ kpe utudere. Li fèreh men binib bi'biere ɲɔ Uwien mɔ ní fère ne ni'yi. <sup>38</sup> Li punh men binib ɲɔ Uwien mɔ ní li punh ne. U li gbien ni'yiek kè ní gbe wɔ ní yeyeke, kí ñiñi kí gbien nè ní wule, ne kí de ne, kime ni taah ná ki bikreh tibont ki dienh binitɔb nnɔ Uwien mɔ li taa nen ne kí biike kí de ne.»

<sup>39</sup> \*Yesu tí pɔn' be mikpenjenm ki ye: «Ujuɔn li fre kí ðie u'juɔntɔ-ɔɔ? Bi'ke bile ɲa ní lu kubùoku ni-ii? <sup>40</sup> Wà bengeh ɲa cɛn' wà wɔknh wɔ. Ama wà ke benge' ki tí gben' la, u li te ten u'cɛnbaa ne.

<sup>41</sup> «Be tien' a lenh kumuɔku kù a te a'tɔ ya nunbu ni, ka ji lenh jaantelke wà puɔn a'yaabu ni? <sup>42</sup> A li tien mila kí tɔke a'tɔ kí ye: «Cère ní ñen kumuɔku kù a te a'nunbu ni nɔ», ɲɔ ka lenh jaantelke wà puɔn a'yaabu ni nnɔ. Sin iñuɔn ilele ya nilɔ, kpie kí ñen jaantelke wà puɔn a'nunbu ni nnɔ, kí li lenh mɔnmɔnm, kí yaan kí fre kí ñen kumuɔku a'tɔ yaabu ni.»

*Busubu nin bu'bii ya gber  
(Matie 7:16-20; 12:33-35)*

<sup>43</sup> \*Yesu tí tɔke' be ki ye: «Busumɔnmɔnbu ɲa ní fre kí lùon ibii yà ɲa mɔn. Busubu bù a ɲa mɔn mɔ ɲa ní fre kí lùon ibii yà mɔn. <sup>44</sup> Busubu ya bii ne cèreh bi bendehe bù yé busubu bù a ya bol. Ba pɔh kɛnkɛn konkonbu bo, ka pɔh cɛce mɔ benenk bo. <sup>45</sup> Unimɔn ya yenmaalmɔnmɔn yà te u'fèl bo ne cèreh u teh ná mɔn, ne ubierdaan ya yenmaalbiere cèreh u teh ná bre, kime unil ke len' ki kun' ná bó la, ni ñen' iyenmaale yà te u'fèl bo ne.»

*Binib bile men' bi'dur ma bo  
(Matie 7:24-27)*

<sup>46</sup> «Be bo ne ni yih nni: «Yonbdaan, Yonbdaan,» ka teh n tɔkeh ne ní li teh ma bo. <sup>47</sup> Wà ke baa' n'saan, ki ciuh n'gber, ki teh tù ye ma la, n li wuɔn ne u naan udaan wà. <sup>48</sup> U naan uje wà yíe wɔ ní me kuduku ɲɔ ki gbin' ní ñuɔke', ki pu' litenpuul kutentiɛku bo ne. Miwuɔm kɔn' ki puube' ki yile' kuduku nnɔ bo, ne ka fre' ki jenge' kù, kime udaan nnɔ men' kù mɔnmɔnm ne. <sup>49</sup> Ama unil wà ciuh n'gber, ka teh tù ye ma la, u naan uje wà men' kuduku utintele bo ne. Miwuɔm kɔn', ki puube' ki yile' ku'bo, ne kù pɔk ki lu' kpelkpel.»

## 7

*Yesu buu' sojaciɛn uba ya tonsɔnl  
(Matie 8:5-13)*

<sup>1</sup> \*Yesu tɔke' binib nnɔ tigber ki gben', ne ki bure' Kapernawum ya du bó. <sup>2</sup> Sojambe kobk ya ciɛn uba là te ki ɲmɔbe utonsɔnl uba ki yíe wɔ cɛɛn. Utonsɔnl nnɔ lá bun ki benh wɔ ní kpo. <sup>3</sup> Sojaciɛn nnɔ cii' bi lienh Yesu bó, ne u sɔn' Sufmbe ya ciɛnb u'saan, be ní tí gbáan wɔ wɔ ní baa kí lá ɲmien u'tonsɔnl nnɔ. <sup>4</sup> Biciɛnb nnɔ baa' \*Yesu saan, ne ki tùɔreh ki gbáanh wɔ ki teh: «Sojaciɛn nnɔ kpe á tore wɔ ne, <sup>5</sup> kime u yíe tí'du ya nib, ne wɔn ne men' tí'taanl ya duku.»

<sup>6</sup> Nɛn saan nɛ Yesu paan' bi'bo ki bure', ki tɪ nɛke sojaciɛn nnɔ den, nɛ u sɔn' u'jɔtieb bi tuobe' wɔ usɛn bɔ, ki tɔke' wɔ ki ye: «Yonbdaan, sojaciɛn nnɔ ye a la ji n' jɛnde a'ba, kimɛ wa kpɛ á baa kí kɔ u'den. <sup>7</sup> Nɛn bo nɛ u maale' ki ye wa kpɛ wɔ r' bugbɛn r' tuobe nɛ usɛn bɔ mɔnɔn. A li len' ki ye faake la, u'tonsɔnl nnɔ li faake nɛ. <sup>8</sup> Kimɛ wɔn mɔnɔn nɛmɔbe binib bà yé nin wɔ biciɛnb, nɛ ki mɔ yé sojambɛ biba ya ciɛn. U tɔke' uba ki ye: «Li joh» la, u joh nɛ, u tɔke' utɔ ki ye: «Dɛn» la, u bàareh nɛ. U tɪ tɔke' u'tonsɔnl ki ye: «Tien niɛ» la, u teh nɛn nɛ.»

<sup>9</sup> \*Yesu cii' u'ñɔbon nnɔ ma nnɔ, nɪ cuo' wɔ miyɔkm, nɛ u jiɛbe' ki liike' linigol là pɛ u'bo nnɔ ki ye: «N tɔkeh nɛ nɛ, ma laan laa' miɛ ya tekjim ya tunbu Israyel yaab mɔnɔn ni.»

<sup>10</sup> Binib bà tuobe' \*Yesu usɛn bɔ nnɔ liɛbe' sojaciɛn nnɔ den, ki laa' u'tonsɔnl nnɔ faake'-a.

### *Yesu mɛkre' ukpopii uba ya bijɛ*

<sup>11</sup> Lidaali liba nɛ \*Yesu joh udu uba bɔ, bi yih wù Nayinn, ki tɔke nin u'panpaankaab nin binib ligol. <sup>12</sup> U tɪ tuo wɔ r' kɔ udu nnɔ ni, nɛ ki laa' ukpopii uba ya bubaabk kpo' bi tuke ki joh kukaaku bɔ, nɛ udu nnɔ ya nib pɛ ka dindin. <sup>13</sup> Yonbdaan laa' ukpopii nnɔ ma nnɔ, nɛ ki muɔ' wɔ micɛcɛkm, ki tɔke' wɔ ki ye: «Ji la muɔh», nɛ <sup>14</sup> ki cuon' ki nɛkn' ikɛliɛn, ki tɛnde' u'nuɔ ki mɛ' yè. Binib bà tuke utɛnkpii nnɔ sere', nɛ u ye: «Unaciɛn, n lienh sin nɛ, fii.» <sup>15</sup> U fii' ki kèle', ki cin' ki lienh, nɛ \*Yesu taa' wɔ ki de' u'naa. <sup>16</sup> Nɛn saan nɛ bujɛwaanbu cuo' bi'kɛ, nɛ bi pèkeh Uwien ki teh: «Uwien ya ñɔbonsɔknciɛn uba nɛ ñɛn' tɪ'ni. Uwien nɛ baa' wɔ r' nɛmɛn u'nib.»

<sup>17</sup> Nɛ bi tɔkeh \*Yesu tien' nà nnɔ Sude ya tinfɛnm kɛ ni nin itengbaan yà kɛ nɛke Sude nnɔ ni.

### *San wà siih binib Uwien ya ñunm sɔn' u'panpaankaab Yesu saan (Matie 11:2-19)*

<sup>18</sup> San wà siih binib Uwien ya ñunm nnɔ ya panpaankaab jon' ki tɪ tɔke' wɔ tigber nnɔ kɛ. Nɛ u yin' bi'ni bile, <sup>19</sup> ki sɔn' bɛ Yonbdaan saan, bɛ r' tɪ niire wɔ kí ye wɔn nɛ yé wà li baa\* ní nnɔ bii bi li guure utɔ nɛ?

<sup>20</sup> San ya panpaankaab nnɔ baa' \*Yesu saan nɛ ki tɔke' wɔ ki ye: « «San wà siih binib Uwien ya ñunm nnɔ nɛ sɔn' tɛ a'saan tɪ lá niire nɛ» kí ye: «Sin nɛ yé wà li baa ní nnɔ bii tɪ li guure utɔ nɛ?» » <sup>21</sup> U ya yo ki laa' \*Yesu cèreh biwiɛnb bà yɛbe faakreh, ki cèreh iwɔb cuonh, ki nɛwɔh isɛnpol binib saan, ki likreh ijùɔn i yɛbe; <sup>22</sup> nɛ ki tɔke' San ya panpaankaab nnɔ ki ye: «Liɛbe mɛn kí tɪ tɔke San ni laa' nà nin ni cii' nà: ijùɔn likreh, iwɔb cuonh, ijend lùoreh, igbaan ciih, bitɛnkpiib mɛkreh, nɛ bijiiɛnb ciih tigbɛmɔnmɔnt. <sup>23</sup> Wà nɛ tùre' Uwien ya sɛn min bo la, Uwien ya mɔnm te u'bo.»

<sup>24</sup> San ya panpaankaab liɛbe' uyo wà nnɔ, nɛ Yesu cin' ki tɔkeh linigol San ya gbɛr ki teh: «Ni là jon' kupenpelku ni ní tɪ liike ba? Ni là jon' ní tɪ liike limuɔnl là mitafaam jɛngɛh lè nɛ-ɛɛ? <sup>25</sup> Ní nín là jon' ní tɪ liike ba? Ni là jon' ní tɪ liike unil wà guo tikpɛlcɛmɔnmɔnt nɛ-ɛɛ? Binib bà guoh tikpɛlcɛmɔnmɔnt, ki te liwiɛl ni nnɔ kɔh bibɛrb den nɛ. <sup>26</sup> Tɔ, ni nín là jon' ní tɪ liike ni lɛ bonn nɛ? Ni là jon' ní tɪ liike Uwien ya ñɔbonsɔknl nɛ-ɛɛ? N tɔkeh nɛ imɔn nɛ, u cɛn' Uwien ya ñɔbonsɔknl mɔnɔn. <sup>27</sup> Kimɛ wɔn San bo nɛ nɪ kɛle' \*Uwien ya gbɔnku ni ki ye:

«Liike, n li sɔn n'tond wɔ r' liere nɛ,

kí lá tùɔre a'sɛn.»

<sup>28</sup> «N tɔkeh nɛ nɛ, ba laan maa' nil uba, u cɛn' San. Ama unil wà yé uwaal Uwien ya bɛl ni cɛn' wɔ.

<sup>29</sup> «Udu ya nib kɛ, haali nin bilɛnpotekb kɛ cii' San ya gbɛr, ki bɛnde' ki ye Uwien yé ugɛmɔndaan, nɛ ki cère' u sii' bɛ Uwien ya ñunm. <sup>30</sup> Ama Farisiɛnmbɛ nin bà bɛn yiko mɔnmɔnm nɛ tuo' u sii' bɛ Uwien ya ñunm. Nɛn nɛ wuɔn' ki ye bi yíe' Uwien yíe nà.»

<sup>31</sup> Yesu tɪ len' ki ye: «N nín li taa ba kí nɛnge fɛnfɛnnɔ ya nib-i? Bi naan ba? <sup>32</sup> Bi naan tɛn mubumu nɛ kɛ kidaak ni ki jeleh, ki tɔkeh mu'tomu ki teh:

\* **7:19** Liike Matie 11:3.

⟨Ti piebe' nε liwol, nε na η̄on' cik̄k.

Ti ḡen' ikuyuon, nε na muo'.⟩

<sup>33</sup> Kimε San wà siih binib Uwien ya ñunm baa' ki kùò tijier tubambe, ka ñuh daam, nε ni ye usenpol nε ñaake wò. <sup>34</sup> Unil ya Bijε baa', ki jinh ki ñuh, nε ni ye: ⟨Liike m̄en uje wuò yé uf̄onfuòb nε ki yé udeyibl, ki j̄oreh nin bil̄enpotekb nin bibierdenb.⟩ <sup>35</sup> Ama binib bà kε tuo' Uwien ya yenfuom nε ben m̄i m̄on ki kpe ma bo.⟩

### *Upii uba kpieke' Yesu*

<sup>36</sup> Lidaali liba nε Farisien uba yin' \*Yesu wò ñ baa kí lá ji u'den, nε u jon' Farisien nnò den, ki t̄i kε ki jinh. <sup>37</sup> Upiis̄ons̄ond uba m̄ò là te udu nnò ni. U cii' \*Yesu te Farisien nnò den ki jinh, nε ki tuke ní l̄efina uba alabaat† ya dingl ni, <sup>38</sup> ki baa' ki lá sere' \*Yesu ya puoli bó u'taan saan, ki muòh, u'nunsiir luh \*Yesu ya taan bo, ki s̄ekndeh yè, nε u taah u'yur ki η̄mireh yè, ki bibeh yè, ki taah l̄efina nnò ki faanh yè. <sup>39</sup> Farisien nnò laa' nnò ma nnò, nε ki maale' u'yenm ni ki ye: «Uje wuò bi yé \*Uwien ya ñ̄abons̄oknl la, u bi li b̄ende upii wà miekeh wò nò yé udaan wà. U bi li b̄ende kí ye u yé us̄ons̄ond nε.»

<sup>40</sup> Nε \*Yesu t̄ake' Farisien nnò ki ye: «Sim̄on, n η̄m̄obe tigber tuba ñ t̄ake η̄ε.» Nε u ye: «Len n'c̄enbaa» <sup>41</sup> Nε \*Yesu ye: «Uje uba nε kpende' binib bile ilike. U kpende' uba milikbim itur kobiin̄un, ki kpende' utò milikbim itur pīun. <sup>42</sup> Bi'ke bile η̄a ñ fre kí p̄e wò ma nnò, nε u c̄èbe' bε bi'f̄en. Bijeb bile nnò ni, u l̄e li yíe ulikdaan nnò ki c̄en' utò.» <sup>43</sup> Nε Sim̄on j̄iin' wò ki ye: «N maale' ki ye wà ya f̄enl yebe nnò nε li yíe wò ki c̄en'.» Nε \*Yesu t̄ake' wò ki ye: «A t̄ake' bù te.» <sup>44</sup> Nε ki pekre' upii nnò bó, ki t̄ake' Sim̄on ki ye: «A laa' upii wuò-wò? N k̄on' ní a'den ma η̄a de' ñunm bε ñ s̄akre n'taan, ama upii wuò w̄on, u taa' u'nunsiir nε ki s̄ekn' yè, ki taa' u'yur ki η̄mīmire' yè. <sup>45</sup> Ña l̄okn' nni ama n t̄i k̄on' ní ma w̄on η̄a d̄aan n'taan ya bibm haali nin f̄enf̄ennò. <sup>46</sup> Sin η̄a taa' k̄p̄om m̄on̄on ki f̄aan' n'yul, ama w̄on taa' l̄efina nε ki f̄aan' n'taan. <sup>47</sup> N̄en bo, n t̄akeh η̄ε nε, n f̄ere' wò u'biere ì yebe ma nnò, nε c̄ere' u yíe nni ki gbien', kimε unil wà n f̄ere' wò ibiere waamu la, udaan m̄ò yíe nni waamu nε.» <sup>48</sup> N̄en saan nε u t̄ake' upii nnò m̄ò ki ye: «N f̄ere' η̄ε a'biere.» <sup>49</sup> Nε w̄on nin binib bà jinh nnò maaleh bi'yenm ni ki teh: «Uje wuò yé η̄m̄ε nε, ki t̄i f̄ereh binib bi'biere?» <sup>50</sup> Nε \*Yesu t̄ake' upii nnò ki ye: «A'tekjim nε η̄mien' η̄ε. Li joh nin uȳenduon.»

## 8

### *Yesu ya tondb nin bipiib biba p̄ereh wò*

<sup>1</sup> Ni ya puoli bó nε \*Yesu joh iduc̄encīen nin iduwawaale ni, ki kpaandeh Uwien ya b̄el ya gb̄em̄onm̄ont, nε u'tondb piik nin bile nnò p̄e u'bo. <sup>2</sup> Bipiiib bà u là c̄ere' bi faake' nin u là ñ̄ore' bà saan isenpol nnò m̄ò p̄e u'bo. Ben si: Mari wà bi yih wò Madelenn nnò, \*Yesu là ñ̄ore' isenpol ilole w̄on saan nε <sup>3</sup> nin Herod ya tons̄onb ya cīen Kusa ya po Sann nin Susann nin bipiit̄ob ligol, nε bi'ke taah bi'bont ki toreh w̄on nin u'tondb.

### *Wà plè' tibonbuor ya bim ya kpenjenm*

*(Matie 13:1-9; Mark 4:1-9)*

<sup>4</sup> Tò, binib ñ̄en' ní idu kε ni, ki baa' \*Yesu saan, ki taan' ki tien' linigocīenl, nε u p̄on' bε mikpenjenm ki ye: <sup>5</sup> «Ukpaal uba nε là jon' wò ñ t̄i plè tibonbuor ya bim. U plèh ma nnò, miba lu' usengbe, nε binib tete' mi'bo, nε inuon baa' ki lá jin' mè. <sup>6</sup> Mit̄om lu' kutentīeku bo, ki p̄en'. Ní'saan η̄a s̄onge ma nnò, nε mipīem nnò kuore'. <sup>7</sup> Mit̄om m̄ò lu' kujegorku ni, ki p̄en'. Nε mipīem nnò nin kujegorku kε kpīenh, nε kujegorku w̄on', ki ku' mè. <sup>8</sup> Mit̄om m̄ò lu' kitinm̄onm̄onk bo, ki p̄en' ki k̄p̄ere', nε ki l̄on' kokobk.» \*Yesu len' ki pukn' ki ye: «Wà η̄m̄obe litubl la, wò ñ cii.»

### *Bε tien' Yesu p̄ah binib mikpenjenm-i?*

*(Matie 13:10-17; Mark 4:10-12)*

† 7:37 Liike Matie 26:7.

<sup>9</sup>\*Yesu ya panpaankaab niire' wə mikpenjenm nnə ya tingi. <sup>10</sup>Nε u jiin' bε ki ye: «Uwien nε cère' ninbi bende' u'bel ya gbəbəlkaar. Ama bitəb bən wən, nǐ yé mikpenjenm nε bi'bo ηə

↳ bε nǐ li likeh ka lenh,  
kǐ li cengeh ka ciuh ni'tingi.» »

*Wə plè' tibonbuor ya bim ya kpenjenm ya tingi*  
(Matie 13:18-23; Mark 4:13-20)

<sup>11</sup> «Mikpenjenm nnə ya tingi sə: tibonbuor nnə yé Uwien ya gber nε. <sup>12</sup>Mibim mà lu' usengbε nnə yé binib bà ciuh Uwien ya gber, usenpol bàareh kǐ lá n̄endeh tù bi'fèl ni ηə bi la teke Uwien kǐ jǐ kǐ ηm̄ere nε. <sup>13</sup>Mibim mà lu' kutentiεku bo nnə mə yé binib bà ciuh Uwien ya gber, kǐ teknh tù nin uyensonge, ama ka cèreh tù kpaakeh n̄aan bi'fèl ni nε. Bi teke' Uwien kǐ jin' nǐ wuəke' waamu, mibiikm tu' bε la, bi pək kǐ wiε Uwien ya sən nε. <sup>14</sup>Mibim mà lu' kujεgorku ni nnə mə yé binib bà ciuh Uwien ya gber nε kǐ cèreh uηendun ya gber nin lifaal ya yēnmaale nin uηendun ya ηmaa wəbndeh tigber nnə kǐ cèreh ta fəreh mən̄mən̄m bi'fèl ni nε. <sup>15</sup>Mibim mà lu' kitinmən̄mən̄k bo nnə mə yé binib bà ya fèl bo mən, bi ηm̄obe tigbēm̄nt, kǐ cengeh tigber nnə, kǐ taah tù kǐ blinh bi'fèl bo, kǐ n̄ikndeh kǐ cèreh tù sən̄h itūon nε.»

*Yesu sureh binib bε nǐ li cengeh u'gber*  
(Mark 4:21-25)

<sup>16</sup>\*Yesu tí ye: «Uba ηa nǐ sε frl kǐ taa lisenl kǐ cubn li'bo bii kǐ taa lè kǐ sien gado ya tingi. Ama u li taa lè kǐ tuən likpenkpenl bo nε ηə bà kε kəh nǐ iden ni nǐ li lenh. <sup>17</sup>Kimε bonn ηa te kǐ buə ηə ba lá li lε n̄e, gber mə ηa te kǐ buə ηə ka lá li n̄e upaan bo. <sup>18</sup>Nεn bo, liike mēn ni'yul bo nin ni cengeh n'gber ma bo, kimε wə ηm̄obe la, bi li de wə kǐ pukn, wə ηa ηm̄obe la, bi li tonde kǐ fie u maaleh kǐ teh u ηm̄obe nà waamu nnə mən̄n nε.»

*Yesu ya naa nin u'ninjieb*  
(Matie 12:46-50; Mark 3:31-35)

<sup>19</sup>\*Yesu ya naa nin u'ninjieb baa' kǐ nuunh wə. Linigol te ma nnə nε ba fre' kǐ kən' kǐ laa' wə. <sup>20</sup>Nε bi təkε' wə ki ye: «A'naa nin a'ninjieb te saali kǐ yíe bε nǐ lε ηε.» <sup>21</sup>Nε u təkε' bε ki ye: «N'naa nin n'ninjieb si binib bà kε ciuh Uwien ya gber kǐ teh tù ye ma bo nε.»

*Yesu cère' kutafaaku ηmile'*  
(Matie 8:18, 23-27; Mark 4:35-41)

<sup>22</sup>Lidaali liba nε \*Yesu nin u'panpaankaab kən' buñerbu, nε u təkε' bε ki ye: «Cère mēn tí puore kǐ jo miñunciēm̄ ya gbaatəl bó.» Nε bi bure'. <sup>23</sup>Bi te miñunm bo kǐ joh ma nnə nε \*Yesu duən' kǐ gəh. Kutafaabiiku kuba pək kǐ fii' miñunm bo, kǐ cèreh miñunm fih kǐ kəh buñerbu nnə ni kǐ gbiekeh. Nǐ là yé kinunbən̄k nε bi'bo. <sup>24</sup>Nε bi baa' kǐ lá finde' \*Yesu kǐ təkε' wə ki ye: «Cēnbaa, Cēnbaa, ti benh tí luo nε.» \*Yesu finde', kǐ tien' kutafaaku nin iñungbegbel nnə bo. Kutafaaku go, iñungbegbel nnə lu' nε ni'kε ηmile'. <sup>25</sup>Nε u niire' u'panpaankaab kǐ ye: «Nǐ lε ni'tekjim-i?» \*Yesu tien' nà nnə cuo' bε miyək̄m, kǐ cuo' bε bujεwaanbu, nε bi niireh təb kǐ teh: «U cinbe kǐ yé bε ya nitunbu sə nə? U tengeh kutafaaku nin miñunm mən̄n bo, nε ni'kε boh wə.»

*Yesu ηəre' isenpol uje uba saan*  
(Matie 8:28-34; Mark 5:1-20)

<sup>26</sup>Bi tí baa' Gerasa yaab ya tinfenm ni. Mitinfenm nnə kuo Galile ya nunciēm̄ nε. <sup>27</sup>\*Yesu n̄eh buñerbu ni uyo wə nnə, nε mitinfenm nnə ya jε uba cende' wə. Isenpol nε là n̄aake wə. U cuonh upuntenge nǐ wuəke', ka jǐ te den, kǐ kə bi subeh bitenkpiib tijəlulnt tà ni nnə ni. <sup>28</sup>Ujε nnə laa' \*Yesu ma nnə nε kǐ gbaan' u'nintuəli, nε isenpol nnə cère' u wuure' ufaa bo kǐ ye: «Yesu, Uwien wə ηa ηm̄obe Nacentə ya Bijε, min nin sin tu lε nε? N gbáanh ηε nε, la jènde nni.» <sup>29</sup>Yesu təkε' usenpol nnə kǐ ye wə nǐ siere kǐ dāan uje nnə ma nnə nε cère' u len' nnə. Usenpol nnə cuo' uje bugben nǐ wuəke'. Bi là kuəndeh wə

mugbiemu, ki lùoh wə tikudəkr, u la jo niba saan ne, ama u cienh tikudəkr nnə ne ki kəh mugbiemu nnə. Usenpol nnə tukeh wə ki joh nib ŋa te nà saan ne. <sup>30</sup> \*Yesu niire' wə ki ye: «Bi yih ŋe ba?» Ne u ye: «Bi yih nni Ligol ne.» Isenpol ŋaake wə ki yebe ma nnə ne cère' u ye nnə. <sup>31</sup> Ne isenpol nnə gbáan' \*Yesu ki ye u la wəbn yè, yè ní jo kubùoku\* kùà ñə ka ŋməbe bien nnə ni.

<sup>32</sup> Tə, fangambə biba mə là te ligbengbenl bo ki yebe ka dindin, bi kpaah bə. Isenpol nnə gbáan' \*Yesu ki ye wə ní cère yè, yè ní jo kí tí kə fangambə nnə. U tuo', <sup>33</sup> ne ì dāan' uje nnə, ki jon' ki tí kən' fangambə nnə. Ne fangambə nnə kə sen' ki tinde' ligbengbenl nnə, ki tí lu' miñunm ni ki luo'.

<sup>34</sup> Bə kpaah fangambə nnə laa' nà tien', ne ki sen' ki jon' udu ni nin idugbaan, ki tí təkə' binib tigber nnə. <sup>35</sup> Ne bi ñen' ki joh bə ní tí liike nà tien'. Bi tí baa', ki laa' uje wə isenpol dāan' wə nnə ya yənm jire' u kə \*Yesu saan, ki guo, ne bujəwaanbu cuo' bə. <sup>36</sup> Binib bə là te ni'saan ki laa' tibont nnə kə tentien' ma bo nnə təkə' bə \*Yesu cère' uje nnə faake' ma bo. <sup>37</sup> Ne bujəwaanbu cuo' Gerasa ya tinfenm yaab kə cəen. Nen ne cère' bi təkə' \*Yesu ki ye wə ní jende bi'saan. \*Yesu liebe' ki kən' buñerbu, wə ní bure, <sup>38</sup> ne uje wə isenpol dāan' wə nnə gbáanh wə ki teh wə ní cère wə ní paan u'bo, ne \*Yesu ŋa tuo', ki təkə' wə ki ye: <sup>39</sup> «Liebe kí kun kí tí təkə' binib Uwien tien' nà kə ki de' ŋe.» Ne u bure', ki cuonh udu ni ni'kə saan, ki təkə' binib \*Yesu tien' nà kə ki de' wə.

*Yesu cère' upii uba faake', ki məkre' kibupiik kiba mə  
(Matie 9:18-26; Mark 5:21-43)*

<sup>40</sup> \*Yesu liebe' ki baa' miñunciem ya gbaatəl, ne linigol teke' wə, kime bi'kə là gu wə ne. <sup>41</sup> Ne \*Sufmbə ya taanl ya duku ya cien uba, bi yih wə Yayirus, baa' ki lá gbaan' \*Yesu ya nintuəli, ki gbáan' wə ki ye wə ní den u'den, <sup>42</sup> kime u'bubaabk ne bun, ki benh kè ní kpo; kí ŋməbe ibin piik nin ile ne. Ne \*Yesu paan' u'bo ki bure'.

U joh ma nnə ne linigol pə u'bo ki pəbeh wə, wa ji tí freh ki fuoreh. <sup>43</sup> Upii uba mə te ni'saan, ki laa' tifer ibin piik nin ile ta gben'. U jon' daktiembə saan, ki ñende' u'like kí tí gben'. Uba ŋa fre' ki buu' wə. <sup>44</sup> U baa' \*Yesu ya puoli bó, ki lá mə' u'wəngolkaar ya ñəgben, ne u'fer nnə pək ki gben' i ya tään bo. <sup>45</sup> Ne \*Yesu niire' ki ye: «ŋmə mə' nni?» Bi'kə ni'e' ki ye ba mə' wə ma nnə ne Pier təkə' wə ki ye: «Cənbaa, linigol là guən' ŋe nə ne pəbeh ŋe.» <sup>46</sup> Ne \*Yesu ye: «Unil uba mə' nni, kime n laa' mituəm miba ñen' nni.» <sup>47</sup> Upii nnə laa' wa ní fre kí bəle, bujəwaanbu cuo' wə, u'gbenent ŋəh, ne u baa' ki lá gbaan' \*Yesu ya nintuəli, ki təkə' wə binib kə ya nun bó, nà cère' u mə' wə nin u faake' i ya tään bo ma bo. <sup>48</sup> Ne \*Yesu təkə' wə ki ye: «N'bisə, a'tekjim ne ŋmien' ŋe. Li joh nin uyənduən.» <sup>49</sup> \*Yesu laan te ki lienh ne unil uba ñen' Yayirus donbó ki lá tuobe' bə usen ni, ki təkə' Yayirus ki ye: «A'bisə kpo'-a! La ji ní li ŋməbe Cənbaa yəñjaabe.» <sup>50</sup> \*Yesu cii' bi len' ma bo, nin nen kə ŋə u təkə' Yayirus ki ye: «La fənge, teke nni kí ji baba, u li ŋməre.»

<sup>51</sup> \*Yesu tí baa' Yayirus den, ne ka cère' binib kə paan' u'bo ki kən'. U cère' Pier nin San nin Saak nin kibupiik nnə ya naa nin ki'baa baba ne paan' u'bo ki kən'. <sup>52</sup> Binib bə kə te ni'saan nnə muəh ki'kuum bo ne ki kpiendeh. Ne \*Yesu təkə' bə ki ye: «La ji muəh mən, ka kpo', kí gəh ne.»

<sup>53</sup> Ne bi leh Yesu, kime bi ben ki ye kibuk nnə kpo'-a! <sup>54</sup> \*Yesu cuo' ki'nuə, ki təkə' kè ki ye: «N'bukə, fii.» <sup>55</sup> Ne ki'naank liebe' ní i ya tään bo, kí fii' ne \*Yesu ye bə ní de kè tijier kè ní ji. <sup>56</sup> Ní cuo' ki'naa nin ki'baa miyəkkm, ne \*Yesu kpekpə' bi'bo ki ye bi la təkə' nil nà tien' nə.

## 9

*Yesu sən' u'tondb piik nin bile  
(Matie 10:5-15; Mark 6:7-13)*

\* **8:31** Sufmbə là maaleh ki teh kubùoku kuba ne te bi pəkndeh len isenpol ki gu lidaali là Uwien li bu yè tibuur.

<sup>1</sup> \*Yesu taan' u'tondb piik nin bile, ki de' be mituom nin usen be ri li nuoh isenpol ke ya bol binib saan, ki li buuh iwien. <sup>2</sup> U son' be, be ri li takeh binib Uwien ya bel ya gber, ki li buuh biwienb, <sup>3</sup> ne ki take' be ki ye: «Ni joh la, ni la take bonn. Ni la take gbien, ki la take kol, ki la take jier, ki la take like, ki la take lier ile mo. <sup>4</sup> Ni ti baa' iden ya ke bi teke' ne la, ni li te nen saan ki ti baa lidaali la ni li siere udu nno ni. <sup>5</sup> Udu wa ya nib na teke' ne la, ni kpakpaare ni'taan ya tengunku\* ki wie ne, ki siere. Nen ne li ye ni'saan ya nib bo kudieku.» <sup>6</sup> To, bi bure', ne ki joh idu ni, ki takeh binib tigbemomont, ki cereh biwienb faakreh ni'ke saan.

*Herod nuunh wa ri bende Yesu ye udaan wa*  
(Matie 14:1-12; Mark 6:14-29)

<sup>7</sup> Gobina Herod cii' bi lienh \*Yesu teh tibont ta ke nno bo, ne ka ben u li maale ki ye ba. Kimε biba lienh ki teh: «San wa la siih binib Uwien ya nunm nno ne mekre',» <sup>8</sup> bitab lienh ki teh: «Eli ne liebe' ni», bitab mo lienh ki teh: «Uwien ya nabonsoknb ba la te uyo bo nno ya uba ne mekre' ki liebe' ni.» <sup>9</sup> Ne Herod ye: «Min bugben ne la cere' bi tukre' San ya yul-a! N cii' bi lienh wa mo bo no, u'mo ye nme ne?» Ne ki nuunh wa ri le Yesu.

*Yesu jin' linigocienl liba*  
(Matie 14:13-21; Mark 6:30-44; San 6:1-14)

<sup>10</sup> \*Yesu ya tondb liebe' ni, ki la take' wa bi tien' na ke, ne u taa' be ki jende' bi ti te bi'baba Betsayida ya du bo ya kele. <sup>11</sup> Inigol nno cii' u bure' ma nno ne ki paan' u'bo. \*Yesu teke' be, ki takeh be Uwien ya bel ya gber, ne ki buuh bi'ni ba ye biwienb.

<sup>12</sup> Uwien benh wu ri lu, ne u'tondb piik nin bile nno nekn' wa ki take' wa ki ye: «Ti te nien na te na saan ne, cere linigol lie ri jo idu bo, ki ti nuun tijier nin gogobool.» <sup>13</sup> Ne \*Yesu ye: «Ninbi bugben, de be men be ri ji.» Ne bi ye: «Ti nmabe kpono unun nin ijen ile baba ne, ti'bugben ne na nin jon' ki ti de' tijier ki la de' bie ya nib ke na ri la.» <sup>14</sup> Bijeb la li baa ten itur unun. Ne \*Yesu take' u'panpaankaab ki ye: «Cere men linigol nno ri kele tingi ni, icek icek binib pinunjun.»

<sup>15</sup> Ne bi cere' bi'ke kele' nno. <sup>16</sup> Ne \*Yesu yuure' kpono unun nin ijen ile nno, ki yaare' ki liike' paaki, ki faare' Uwien tu'bo, ki kokuo', ki taa' ki de' u'panpaankaab be ri gbiire linigol nno. <sup>17</sup> Bi'ke nmom' ki gbo', ne bi tantaan' tijenjent ta sien' nno, ki gbien' ikpencub piik nin ile.

*Pier ye Yesu ye Uwien ya Nigendke Kristo ne*  
(Matie 16:13-19; Mark 8:27-29)

<sup>18</sup> Lidaali liba ne \*Yesu jende' ki ti kaareh, ne u'panpaankaab te u'saan. U niire' be ki ye: «Inigol lienh ki teh n ye nme ne?» <sup>19</sup> Ne bi jiin' wa ki ye: «Biba lienh ki teh a ye San wa siih binib Uwien ya nunm nno ne, bitab lienh ki teh a ye Eli ne, bitab mo lienh ki teh Uwien ya nabonsoknb ba la te uyo bo nno ya uba ne mekre' ki liebe' ni.» <sup>20</sup> Ne u niire' be ki ye: «Ninbi nin teh n ye nme ne?» Ne Pier jiin' wa ki ye: «A ye Uwien ya Nigendke Kristo ne.» <sup>21</sup> Ne \*Yesu tuore' ki kpekre' bi'bo ki ye bi la take tu nil.

*Yesu len' u'kuum nin u'mekrm bo*  
(Matie 16:24-28; Mark 8:30-9:1)

<sup>22</sup> Yesu take' be ki ye: «Ni kpe Unil ya Bijε ri ji ijend ki gbien ne. \*Sufmbe ya cienb nin bitatuarcienb nin \*Yiko ya wonwoknb li wie u'gber, ki ku wa, ne wienta daali wa ri mekre bitenkpiib ni.»

<sup>23</sup> Ne ki take' bi'ke ki ye: «Unil ye wa ri paan n'bo la, u la tonge u'ba. Wa ri li yuunh u'doponpon daan ke daan ki bukeh ki paakeh n'bo. <sup>24</sup> Kimε wa ke ye wa ri fie u'miel la, won ne li kpo ki juore fεnm. Ama wa ke li tuo ki kpo min bo nno, won ne li nmere. <sup>25</sup> Unil laa' unendun wuu ni ya bont ke na ki ti luo' limiel la, u laa' be ya kpele? <sup>26</sup> Unil ye min

\* 9:5 Sufmbe bo ki kpakpaare itaan ya tengunku ya tingi si: na ke ji tu unil la, na ye uba yaar, ni ji ye u'yaar ne.



nin n'gber ηmabe wə ife la, uyo wà Unil ya Bijε lá li baa ní kí li ηmabe wən nin u'Baa nin u'tondb ya kpieke nnə, udaan mə li ηmabe wə ife nε. <sup>27</sup> N təkheh nε imən nε, ninbi bà se niε saan nə ya biba li lε Uwien ya bel nε kí yaan kí kpo.»

*Yesu ya gbenent lèbre'*

*(Matie 17:1-8; Mark 9:2-8)*

<sup>28</sup> \*Yesu len' ki gben' ma nnə, iwien iniin gèbre', nε u taa' Pier nin San nin Saak, ki don' lijuəl liba bo wə ní tì kàare. <sup>29</sup> U tì te ki kàareh ma nnə nε u'nun bó lèbre', u'wengolkaar pende' kponkpon, ki dənbeh inun bó. <sup>30</sup> Nε bi laa' bijε bile u'saan bi təkheh tigber. Moyis nin Eli nε. <sup>31</sup> Bi'mə windeh tein. Bi təkheh wə u li kpo Yerusalem ni ma bo ya gber nε. <sup>32</sup> U ya yo ki laa' migùənm ñənde' Pier nin u ya təb, nε bi də ki gəh. Bi fīnde', nε ki laa' \*Yesu windeh ki dənbeh inun bó, ki laa' bijεb bile nnə mə se u'saan. <sup>33</sup> Uyo wà, bijεb nnə ye bε ní siere \*Yesu saan nnə, nε Pier təkhe' wə ki ye: «Cenbaa, ti te niε saan ma nə ní mən nε. Cère tí pə ininbon† ita, sin liba, Moyis liba, Eli mə liba.» Pier len' nnə, kime wa bən u li len kí ye bà nε.

<sup>34</sup> U lienh nnə u'ñəbu ηa laan lu', nε kutεwəlgənkku kuba baa' ki lá pibn' bi'bo. Kù pibndeh bi'bo uyo wà nnə nε bujεwaanbu cuo' Pier nin u'təb nnə. <sup>35</sup> U ya yo nε bi cii' unieke uba bó kutεwəlgənkku nnə ni u ye: «N'Bijε sə nə, n gènde' wən nε. Li cengeh mən u'bó.» <sup>36</sup> Unieke nnə tì ηmile' uyo wà nnə, bi laa' \*Yesu baba nε ji se. Nε bi bəle' tigber nnə bi'ba ya buol, ka tuo' ki təkhe' nil bi laa' nà nnə u ya yo.

*Yesu ηəre' usenpol kibuk kiba saan*

*(Matie 17:14-18; Mark 9:14-27)*

<sup>37</sup> Kutaaku faa', nε bi jiiere' ní lijuəl nnə bo. Nε linigocienl tuobe' \*Yesu usen bó. <sup>38</sup> Linigol nnə ni uje uba wuure' ki ye: «Cenbaa, n gbáanh ηe nε, muə n'bijε, kime u yé n'bubaabk nε. <sup>39</sup> Usenpol uba nε səbe ki coh kè, ki cèreh kí ciikeh ki wuureh, ki'gbenent tereh, kuñinsenjujuku ñeh ki'ñəbu bó. Usenpol nnə bungreh kè ki gbiekeh, nε ka wienh kè tonm. <sup>40</sup> N gbáan' a'panpaankaab bε ní ηəre usenpol nnə ki'saan, nε ba fre'.»

<sup>41</sup> Nε \*Yesu ye: «Ninbi fεnfennə ya nibε, na teke' Uwien ki jin', ki yé binib bà bre. N li wuəke ni'saan kí tì kpaan mila nε? N li ηmabe sukle ni'bo kí tì kpaan mila nε? Nε ki təkhe' uje nnə ki ye: «Taa a'bijε ní.» <sup>42</sup> Kibuk nnə we ní uyo wà nnə nε usenpol nnə tí gbəbe' kè tingi ni, ki cère' ki tereh. Nε \*Yesu tien' usenpol nnə bo, ki buu' kibuk nnə, ki taa' kè ki de' ki'baa. <sup>43</sup> Nì cuo' linigol nnə kε miyəkm nε bi lienh ki teh: «Uwien ηmabe mituəm.»

*Yesu tì len' u'kuum nin u'mεkrm bó*

*(Matie 17:22-23; Mark 9:30-32)*

\*Yesu teh nà nnə beke' linigol nnə kε, nε u təkhe' u'panpaankaab ki ye: <sup>44</sup> «Tùəre kí cenge mən n ye ní təkhe nε nà nə. Nà ní taande bi li taa Unil ya Bijε kí ηukn binib.» <sup>45</sup> Nε ba cii' ni'tingi. Uwien nε bəle' nε ηə bi la bende. Nε ba kaabe' bε ní niire \*Yesu ni'tingi mə.

*Ŋmε yé unikpekpiek-i?*

*(Matie 18:1-5; Mark 9:33-37)*

<sup>46</sup> \*Yesu ya panpaankaab cin' ki niεh nin təb bε ní bende wà yé bi'ke ya cien nε. <sup>47</sup> \*Yesu bən bi'yenmaale, nε ki taa' kibuk kiba ki sien' u'ba saan, <sup>48</sup> ki təkhe' bε ki ye: «Wà kε teke' kibuk tən kiε n'yel bo la, u teke' min nε. Wà kε teke' nni la, u teke' wà sən' nni ní nnə nε. Imən, wà yé uwaal ni'ni la, wən nε yé ni'ke ya cien.»

*Wà ηa nən nε la, u se ni'ciεk bó nε*

*(Mark 9:38-40)*

<sup>49</sup> Nən saan nε San təkhe' wə ki ye: «Cenbaa, ti laa' unil uba u ηuəh isenpol binib saan a'yel bo. Wa pε a'bo tən tinbi ma nnə nε ti pien' wə.» <sup>50</sup> Nε \*Yesu təkhe' wə ki ye: «La ji ní pien wə mən, kime wà ηa nən nε la, u se ni'ciεk bó nε.»

† 9:33 Liike Matie 17:4.

### *Samariyaab biba ŋa teke' Yesu*

<sup>51</sup> Uyo wà \*Yesu li liɛbe kí dùo paaki bó nnɔ nɛkn' ní. Nɛ u caan' ki ye u li jo Yerusalem nɛ, pɛrm ŋa te len, <sup>52</sup> nɛ ki sɔn' u'tondb bɛ ní liere usɛn. Bi bure' ki tí baa' Samari ya du uba ni, bɛ ní bonde kí li gu wɔ. <sup>53</sup> Ama udu nnɔ ya nib ŋa teke' wɔ, kime u joh Yerusalem bó nɛ. <sup>54</sup> U'panpaankaab Saak nin San laa' nnɔ ma nnɔ nɛ ki tɔke' wɔ ki ye: «Yonbdaan, a yíe tí cère umu ní jiiere ní kí lá wi bɛ-ɛɛ?» <sup>55</sup> Nɛ \*Yesu jiɛbe' ki liike' Saak nin San, ki kɔn' nin bɛ. <sup>56</sup> Nɛ wɔn nin u'panpaankaab siere' ní'saan, ki bure' udu tɔ bó.

### *Binib bà yíe bɛ ní paan Yesu bo ya gbɛr* (Matie 8:19-22)

<sup>57</sup> Bi joh ma nnɔ nɛ ujɛ uba tɔke' \*Yesu ki ye: «A joh nà bó kɛ la, n li pɛ a'bo nɛ.» <sup>58</sup> Nɛ \*Yesu tɔke' wɔ ki ye: «Iŋɛk ŋmɔbe ifɛle, inuɔn mɔ ŋmɔbe titer, ama Unil ya Bijɛ wɔn ŋa ŋmɔbe u li kpɔkn nà saan yul.» <sup>59</sup> U tí tɔke' utɔ mɔ ki ye: «Paan n'bo ní.» Nɛ u ye: «Yonbdaan, cèbe nni ní jo kí tí sube n'baa ŋɔ kí liɛbe ní kí paan a'bo.» <sup>60</sup> Nɛ \*Yesu tɔke' wɔ ki ye: «Cère bitɛnkpiib ní li subeh bi'tɔb. Sin wɔn li joh kí tí li tɔkeh binib Uwien ya bɛl ya gbɛr.»

<sup>61</sup> Nɛ utɔ mɔ tí tɔke' \*Yesu ki ye: «Yonbdaan, n li paan a'bo, ama cère ní kun kí tí cèbe n'den yaab ŋɔ.» <sup>62</sup> Nɛ \*Yesu tɔke' u'mɔ ki ye: «Wà kɛ ŋa teke' Uwien ya tuonl tinɔjɛr tule la, wa kpɛ wɔ ní sɔn Uwien ya bɛl ni ya tuonl.»

## 10

### *Yesu sɔn' u'panpaankaab pilole nin bile*

<sup>1</sup> Ni ya puoli bó nɛ Yonbdaan \*Yesu liɛbe' ki gènde' binib pilole nin bile\*, ki sɔn' bɛ, bilele bɛ ní liere kí jo wɔn bugbɛn li jo idu yà kɛ ni nnɔ. <sup>2</sup> Nɛ ki tɔke' bɛ ki ye: «Tijier ben' ki yebe, ama bà li taan tù ŋa yebe. Nɛn bo gbáan mɛn ukpɛdaan wɔ ní sɔn bitonsɔnb bɛ ní tí taan u'jier. <sup>3</sup> Li joh mɛn. N sɔnh nɛ ma nɔ, ni li te tɛn mupebumu nɛ te ikèr ya siik ni. <sup>4</sup> Ni la tuke likbu, ki la tuke kɔl, ki la taa tacaan, ki la fuonde nil sɛn ni. <sup>5</sup> Ni kɔn' iden yà la, ní kpíɛ kí fuonde iden nnɔ ya nib kí ye: «Li te mɛn uyɛnduɔn ni.» <sup>6</sup> Unil te ní'saan ki nuunh uyɛnduɔn la, u li lɛ ní'yɛnduɔn nnɔ. Nnɔ ŋa ní la, ní'yɛnduɔn nnɔ li juore ní'yu nɛ. <sup>7</sup> Ní li te i ya den, ki la lèbre dentɔ, kí li jinh ki ñuh bi dienh nɛ nà, kime utonsɔnl kɛ kpɛ bɛ ní li pèh wɔ nɛ. <sup>8</sup> Ni kɔn' udu wà ni, bi teke' nɛ la, ní li jinh bi li de nɛ nà, <sup>9</sup> kí li buuh biwienb bà te ní'saan, kí li tɔkeh bɛ ki teh Uwien ya bɛl nɛkn' bɛ ŋɔ. <sup>10</sup> Ama ni kɔn' udu wà ni, ba teke' nɛ la, jo mɛn binib taakeh nà saan kí tí tɔke bɛ kí ye: <sup>11</sup> «Ní'du wuu ya tɛngunku kùà mɔnɔn tɛbn' tí'tàan bo nɔ, ti pipre' kun nɛ kí wiɛ ní'bo. Ama ní nín li bɛn kí ye Uwien ya bɛl nɛkn' nɛ ŋɔ.» <sup>12</sup> \*Yesu tí tɔke' bɛ ki ye: «N tɔkeh nɛ nɛ, lidaali là Uwien li bu binib tibuur nnɔ, binib nnɔ ya tudɛre li cɛn Sodəm† yaab yu.» »

### *Idu yà ŋa tuo' ki teke' Yesu ki jin'* (Matie 11:20-24)

<sup>13</sup> \*Yesu tí len' ki ye: «Korasinn yaabɛ, ní bre ní'bo. Betsayida yaabɛ, ní bre ní'mɔ bo. Kime ni laa' miyɔkm ya bont tà ní'bùol nɔ, Tir nin Sidɔn yaab mɔ bi là laa' tù la, bi bi tien' tɛn bi kɛ mikuun nɛ, kí pùnpùkn mifɛntɛm ŋɔ kí wuɔn kí ye bi lèbre' bi'tetem ní wuɔke'. <sup>14</sup> Lidaali là Uwien li bu binib tibuur nnɔ, ni ya tudɛre li cɛn Tir nin Sidɔn yaab yu. <sup>15</sup> Ninbi Kapɛrnawum yaabɛ, ni maaleh ki teh Uwien li duon nɛ paaki nɛ-ɛɛ? U li jiin nɛ kutenkpiiku ni nɛ.»

<sup>16</sup> \*Yesu tɔke' u'panpaankaab ki ye: «Wà cengeh ní'gbɛr la, u cengeh ní'yaar nɛ. Wà nɛn nɛ la, u nɛn min nɛ. Wà nɛn nni la, u nɛn wà sɔn' nni ní nɛ.»

### *Yesu ya panpaankaab pilole nin bile nnɔ liɛbe' ní*

<sup>17</sup> \*Yesu ya panpaankaab pilole nin bile nnɔ liɛbe' ní nin uyɛnsɔnge, ki tɔke' wɔ ki ye: «Yonbdaan, isɛnpól mɔnɔn tuonh tí'ñɔbu bó nɛ a'yel bo.» <sup>18</sup> Nɛ u tɔke' bɛ ki ye: «N laa'

\* **10:1** Bi kpíɛ' ki kɛle' tigbɔnt tà nnɔ ya tuba ni bi ye binib pilole nɛ. † **10:12** Sodəm yé uyo bo ya du uba nɛ. U'nib là teh ibiere cɛen nɛ.

\*Satan cere' kutaaku bo ten uteməknde ki lá lu'. <sup>19</sup> Liike men, n de' ne mituom ní li taanh iwε nin inen bo, kí li ηmabe mituom ki cen' unennend ya tuom ke. Bonn ηa rí tien ne. <sup>20</sup> La li poknh men isenpol tuo' ni'ñabu bó ma nnó bo, ama li poknh men Uwien ke'le' ni'yel paaki bó ma nnó bo.»

*Yesu ye wón bo ηa ní la, uba ηa rí fre ki bende Uwien  
(Matie 11:25-27; 13:16-17)*

<sup>21</sup> U ya yo ne \*Mifuoñaanm cère' \*Yesu ya yenn sange cèen ne u len' ki ye: «Baa, sin kutaaku nin kitink ya Yonbdaan, a bəle' tibont tà biyenfodenb nin bibenbenb nnó, a taa' tù ki wuon' biwaab ne. Nen bo ne n pèkeh ηe. Imòn, Baa, a yíe ne ki tien' nnó.»

<sup>22</sup> \*Yesu tí len' ki ye: «N'Baa ne taa' tibont ke ki ηukn' nni. N'Baa ηa ní la, uba ηa ben min u'Bije yé udaan wà. Min u'Bije ηa ní la, uba mɔ ηa ben n'Baa yé udaan wà. Binib bà n yíe' ki taa' n'Baa ki wuon' be nnó mɔ ben u yé udaan wà.»

<sup>23</sup> Ne ki jibe' ki liike' u'panpaankaab, ki tɔke' ben baba ki ye: «Ní'nunbu laa' nà nɔ, Uwien ya mɔnm te ni'bo. <sup>24</sup> N tɔkeh ne ne, \*Uwien ya ñabonsəknb nin biberb ligol là yíe be rí le ni lenh nà nɔ, ne ka laa' nè. Bi là yíe be rí cii ni ciih nà nɔ, ne ka cii' nè.»

*Samari ya jenimòn uba ya gber*

<sup>25</sup> Nen saan ne bà ben \*yiko mɔnmɔnm nnó ya uba fii' ki sere' ki nuunh wɔ rí biike \*Yesu ne ki niire' wɔ ki ye: «Uwónwɔknlɔ, n li tien mila kí le limiel là ηa ηmabe gbenm-i?» <sup>26</sup> Ne \*Yesu niire' wɔ ki ye: «Be ke'le' \*Yiko ya gbɔnku ni? A kàanh be len-i?» <sup>27</sup> Ne u jiin' wɔ ki ye: «Li yíe a'Yonbdaan Uwien nin a'fɛl ke nin a'tetem ke nin a'tuom ke nin a'yennaale ke, kí li yíe a'tɔ mɔ ten a yíe a'ba ma bo.» <sup>28</sup> Ne \*Yesu tɔke' wɔ ki ye: «A jiin' mɔnmɔnm. Li teh nnó kí le limiel là ηa ηmabe gbenm.»

<sup>29</sup> Ama u yíe wɔ rí wuon' kí ye u cuube ma nnó, ne ki tí niire' \*Yesu ki ye: «ηme ne nín yé n'tɔ?» <sup>30</sup> Ne \*Yesu tɔke' wɔ ki ye: «Uje uba ne là ñen' Yerusalem ki joh Seriko bó, ki tí lu' idukond ya nuɔ ni. Idukond nnó fie' u'went ke, ki ñi' wɔ u tí benh wɔ rí kpo, ne ì siere' ki dāan' wɔ. <sup>31</sup> Nibonn yaam, utɔtuɔrke uba mɔ kpe u ya sen ki lá leke' u'bo, ne ki lɔke' ki gèbre'. <sup>32</sup> Ní te pupuki, ne Lefi ya bol ya nil uba mɔ kpe u ya sen ki mɔ lá leke' u'bo, ne ki mɔ lɔke' ki gèbre'. <sup>33</sup> Ama Samari ya nil uba mɔ là joh usen ki tí baa' ní'saan ki laa' wɔ, ne ki muɔ' wɔ micɛckm cèen. <sup>34</sup> U cuon' ki nek'n' wɔ, ki taa' midaam mà bi yih mɛ fen nnó ki sɔsɔkre' u'gbien, ki taa' mikpɔm ki tentien' yè, ki taa' tikpɛlcer ki lɔlɔle' yè, ki taa' wɔ ki jek'n' wɔn bugben ya ηuun bo, ki taa' wɔ ki jon' ticendur tuba saan, ki tí liike' wɔ. <sup>35</sup> Kutaaku faa' ne u ñen' ilike ki de' ticendur nnó ya daan, ki tɔke' wɔ ki ye: «Liike nni wɔ. A ñen' ilike ki pukn' yii bó la, n lá liebe' ní la, min bugben ne li pè ηe.» »

<sup>36</sup> Ne \*Yesu niire' wà ben \*yiko nnó ki ye: «A ya bùol bijeb bita nnó ni, ηme ne yíe wà lu' idukond ya nuɔ ni nnó?» <sup>37</sup> Ne u jiin' wɔ ki ye: «Wà muɔ' wɔ micɛckm nnó.» Ne \*Yesu ye: «Li joh ki mɔ rí tí rí li teh nnó.»

*Yesu jon' ki tí fuonde' Mart nin Mari*

<sup>38</sup> \*Yesu nin u'panpaankaab te usen ni ki joh ma nnó ne ki tí baa' udu uba ni, ne upii uba teke' wɔ u'den, bi yih wɔ Mart. <sup>39</sup> U ηmabe ninse uba, bi yih wɔ Mari. Mari nnó baa' ki lá kèle' Yonbdaan \*Yesu saan, ki cengeh u'gber. <sup>40</sup> Ama Mart wɔn ya nun mɔn tijier ya tienm bo ne. Nen bo ne u kpriere' ní ki lá tɔke' \*Yesu ki ye: «Yonbdaan, n'ninse cèbe' min baba ne itùon ne nà teh ηe niba? Tɔke wɔ wɔ rí tore nni-a!» <sup>41</sup> Ne Yonbdaan tɔke' wɔ ki ye: «Mart, Mart, a cère' a'nun mɔn tibont tà yebe bo ne, nen ne cère' a jieh. <sup>42</sup> Ama nibonn niba kpein ne yé nibonmònn. Mari wɔn gènde' nen ne. Uba ηa rí fie nè u'saan.»

## 11

*Yesu wɔkn' u'panpaankaab bi li kàareh ma bo  
(Matie 6:9-13; 7:7-11)*

<sup>1</sup> Lidaali liba ne \*Yesu te niba saan ki kàareh. U kàare' ki tĩ gben', ne u'panpaankaab ya uba tãke' wã ki ye: «Yonbdaan, San wã siih binib Uwien ya ñunm wãkn' u'panpaankaab bi li kàareh ma bo ne, a'mã ní wãkn te ti li kàareh ma bo.» <sup>2</sup> Ne \*Yesu tãke' be ki ye: «Ni kàareh la, ní li teh:

«Ti'Baa,

cère binib ke ní li boh a'yel,

cère' a'bel ní baa ní,

<sup>3</sup> Li dienh te daanl ke daanl ya wentunl ya jier.

<sup>4</sup> Fère te ti'biere, kimε ti'mã fèreh bà ke biih te nnã ne.

La cère tí lu mibiikm ni.» »

<sup>5</sup> \*Yesu tí tãke' be ki ye: «Tentεn, ni'ni uba ní li ηmãbe jã, ne u'jã nnã ní baa u'den kuyãku ya siik kí len kí ye: «N'jã, kpende nni kpãnã uta, <sup>6</sup> kimε n'jã uba ne ñen' usen ki baa' n'den, ne ma ηmãbe jier ní de wã.» <sup>7</sup> Ne u'jã nnã ní jiin kuduku ni ki ye: «La ηmãbe nni yenñaabe, min nin n'bumu ke duãn' ki piin'-a, ma ní fre kí fii kí de ηε.» <sup>8</sup> N tãkeh ne ne, wa ní fii kí de wã kujãtieku bo mãnãn la, u li fii kí de wã u yie nã ke, u gbien' wã uyenñaabe ma nnã bo. <sup>9</sup> Nen bo ne n tãkeh ne, li mieh mæn, bi li pu ne; li nuunh mæn, ni li le; li ñih mæn kunagenku, bi li piire. <sup>10</sup> Kimε wã ke mieh la, bi punh wã ne. Wã ke nuunh la, u lenh ne. Wã ke mã ñih kunagenku la, bi piireh ne. <sup>11</sup> Ni'ni uba ya buk mie' wã ujen la, u li de kè uwε-εε? <sup>12</sup> Bii kí mie' wã lijènl la, u li de kè unen-ii? <sup>13</sup> Ninbi bibiερdenb, ni ben ki dienh ni'bumu nã mãn la, be li tien ni'Baa wã te paaki bó ηa ní cère \*Mifuoñaanm ní jiire ní binib bà mieh wã mè nnã bo!»

*Biba ye Yesu ηmãbe Belsebul ya tuãm ne*

*(Matie 12:22-30; Mark 3:20-27)*

<sup>14</sup> Ujε uba ne là te usenpol cère' u'lenl tεbe. \*Yesu ηãre' usenpol nnã u'saan, ne u ji freh ki lienh. Ni beke' linigol cεen. <sup>15</sup> Ama bi'ni biba lienh ki teh u taah isenpol ya cien Belsebul ya tuãm ne ki ηuãh isenpol binib saan.

<sup>16</sup> Bitãb mã yie be ní biike wã, ne ki tãke' wã ki ye wã ní tien miyãkm ya bonn nã li wuãn kí ye u'tuãm ñen' Uwien saan ne. <sup>17</sup> Ama u ben bi'yenmaale ma nnã ne ki tãke' be ki ye: «Libel là ke ya nib bore' tãb ki kãnh bi'ηmiel ni la, libel nnã li juore fεnm ne, ne li'ñib ya dur ní lulu tu'tãr bo. <sup>18</sup> Ni lienh ki teh n taah isenpol ya cien Belsebul ya tuãm ne ki ηuãh isenpol binib saan bii ba? \*Satan ya nib tãh lituãl bi'ηmiel ni la, u'bel li tien mila ka ní juore fεnm-i? <sup>19</sup> Ni ye min taah isenpol ya cien Belsebul ya tuãm ne ki ηuãh isenpol binib saan la, ni'yaab taa' ηmε ya tuãm ki ηuãh isenpol binib saan? Ni'yaab teh ma bo ne li wuãn kí ye na ηmãbe mãn. <sup>20</sup> Ama min taa' Uwien ya tuãm ne ki ηuãh isenpol binib saan. Nen ne wuãn' ki ye \*Uwien ya bel baa' ní ni'saan.

<sup>21</sup> «Ufεfaa bèle' u'jekãnwent, ki ke ki gu u'den la, niba ηa ní tien u'faal. <sup>22</sup> Ama wã mã faa ki cen' wãn pi' wã ki faake' nin wã la, u li fie u'jekãnwent tà u du tu'bo nnã ke, kí fie u'faal mã kí gbigbiire binib.

<sup>23</sup> «Wã ke ηa se n'ciεk bó la, u nen nni ne. Wã ke ηa taakeh ki toreh nni la, u kpiendeh ne.»

*Isenpol liebe' unil saan la, nĩ bre u'bo ma bo*

*(Matie 12:43-45)*

<sup>24</sup> «Usenpol siere' ki dãn unil la, u cuonh ki lindeh kupenpelku ni ne, ki nuunh u li kèle nã saan kí fuore. U tĩ luõ' la, ne wã ní ye u li liebe kí tĩ ηεkn u là siere' ki dãn wã nnã ne.

<sup>25</sup> U li liebe ní kí le bi tũre' ki ηèñère' u'kãnkũãn nnã, ki tien' tibonmãnmont len. <sup>26</sup> Nen saan ne u li jo kí tĩ taa ní isenpol ilole yã bre ki cen' wãn, i'ke ní lá ηεkn unil nnã kí li te, kí cère wã ní juore fεnm kí cen u là te mikpiεkm ma bo.»

*Uwien ya mãn m li te binib bà bo*

\* **11:11** Bi kpiε' ki kele' tigbãnt tà nnã ya tuba ni ní kele' ki ye: Ni'ni uba ya buk mie' wã kpãnã la, u li de kè litenl-ii?

<sup>27</sup> \*Yesu laan biε ki lienh, nε upii uba len' ufaa bo linigol nnɔ ni ki ye: «Upii wà maa' nε ki njaan' nε nnɔ Uwien ya mɔnm te u'bo.» <sup>28</sup> Nε \*Yesu ye: «Binib bà cengeh Uwien ya gber, ki boh tù nnɔ, Uwien ya mɔnm te ben bo nε.»

*Bi yie Yesu n tien miyɔkm ya bonn*  
(Matie 12:38-42)

<sup>29</sup> Binib taakeh \*Yesu saan ki yeβreh, nε u len' ki ye: «Fenfennɔ ya nib biε yé bibiερdenb nε, ki nuunh be ní le miyɔkm ya bonn. \*Uwien ya nɔbonsɔknl Sonas ya yɔkm ya bonn baba nja ní la, ba ji li le yɔkm ya bontɔnn niba. <sup>30</sup> Uwien là tien' Sonas nà nnɔ là yé kudiekku nε Ninif yaab bo. Nnɔ nε, u li tien Unil ya Bijε nà nnɔ mɔ li yé kudiekku fenfennɔ ya nib bo. <sup>31</sup> Uwien li bu binib tibuur lidaali là nnɔ, Seba ya piiber li fii kí biin fenfennɔ ya nib, kime u là nien' ní fɔnfɔkm nε wɔ ní lá cenge Salomɔn ya yenfogber. Ama unil uba te nie saan nɔ ki cen' Salomɔn. <sup>32</sup> Uwien li bu binib tibuur lidaali là nnɔ, Ninif ya nib mɔ li fii kí biin fenfennɔ ya nib, kime Sonas là tɔke' be Uwien ya gber, nε bi lèbre' bi'tetem. Ama unil te nie saan nɔ ki cen' Sonas.»

*Inun yé tigbenent ya frl nε*  
(Matie 5:15; 6:22-23)

<sup>33</sup> «Uba nja ní se frl kí taa lè kí bɔle bii kí taa kusenku kí cubn li'bo, ama u li taa lè kí tuɔn likpenkpenl bo nε nɔ bà ke kɔh ní iden ni ní li lenh. <sup>34</sup> A'nunbu yé a'gbenent ya frl nε. A'nun mɔn la, a'gbenent ke te kuwenwenku ni nε. A'nun nja mɔn la, a'gbenent ke te licinñunl ni nε. <sup>35</sup> Nen bo, fiin kí liike kuwenwenku kùà te a'bo nnɔ la li yé licinñunl-a! <sup>36</sup> Kuwenwenku wendeh nε, ka sien' niba saan la, a'gbenent ke te ku'ni nε. Ní te ten lifrl là wien cεen nε wendeh nε.»

*Yesu biin' Farisienmbε nin Yiko ya wɔnwɔknb*  
(Matie 23:1-36; Mark 12:38-40)

<sup>37</sup> \*Yesu len' ki ghen', nε Farisien uba yin' wɔ wɔ ní baa kí lá ji u'den, nε u jon' Farisien nnɔ den ki tí ke ki jinh. <sup>38</sup> Farisien nnɔ laa' \*Yesu jinh ka nire' ki paan' iyaajebok ye ma bo, nε ní cuo' wɔ miyɔkm. <sup>39</sup> Nε Yonbdaan tɔke' wɔ ki ye: «\*Farisienmbε, liike men ni naan ma, ni ñikndeh ki cendeh isèn nin tiyer ya puoli nε, ama inasuyenmaale nin mibiern nε gbe ni'fèl ni. <sup>40</sup> Ijɔr ninbi, na ben ki ye Uwien wà nien' tibont tà ni lenh tù nnɔ, wɔn nε tien' unisaal ya fèl mɔ-ɔɔ? <sup>41</sup> Nen bo, taa men ni nɔmɔbe tibont tà, kí pu bijiinb nɔ ni'bont ke la li nɔmɔbe jɔknt.

<sup>42</sup> «Ninbi \*Farisienmbε, ní bre ni'bo, kime ni gbiinh ni'ninjo nin ni'gònt nin ni'kpinfetɔr bolm piik nε, ki taah miba ki dienh Uwien, ama ka tɔnge ní li cuube, ka yie Wien mɔ. Ní bi li teh nen nε, ki la sunde tibontɔr tà sien' nnɔ mɔ bó.

<sup>43</sup> «Ninbi \*Farisienmbε, ní bre ni'bo, kime ni yie ní li kaah binikpekpiεkb ya kànkàan nε itáan ya dur ni, ki yie binib ní li gbaandeh ki fuondeh nε mudaamu ni. <sup>44</sup> Ní bre ni'bo, kime ni naan ikul yà bere' nib nja ji lenh yè, ki cuonh ki taanh i'bo ka ben nε.»

<sup>45</sup> Nε bà ben \*yiko mɔnmɔnm nnɔ ya uba tɔke' wɔ ki ye: «Uwɔnwɔknɔ, a lienh nnɔ ma nɔ, a sukreh ti'mɔ nε-a!» <sup>46</sup> Nε \*Yesu ye: «Ninbi bà ben \*yiko mɔnmɔnm nnɔ, ní bre ni'mɔ bo, kime ni cèreh binib tukeh itukpekpiεk nε ka toh ni'bugben ní taa ni'nɔbil mɔnɔn kí mε yè. <sup>47</sup> Ní bre ni'bo, kime ni meh \*Uwien ya nɔbonsɔknb bà là te uyo bo nnɔ ya kul nε, ki sunde'-a ki ye ni ya yaajeb nε là ku' be. <sup>48</sup> Ní teh nà nε wɔngeh ki teh ni tuo' ni'yaajeb là tien' nà nnɔ nε, kime bi là ku' \*Uwien ya nɔbonsɔknb, nε ninbi ji meh bi'kul. <sup>49</sup> Nen bo nε Uwien len' nin miyɛnfuom ki ye: «N li sɔn n' nɔbonsɔknb nin bitondb bi'saan. Bi li ku bi'ni biba kí jènde bitɔb.» <sup>50</sup> Nen nε li cère Uwien ní dère fenfennɔ ya nib ya tub haali unɛndun ya cincinyo bi là ku' \*Uwien ya nɔbonsɔknb bà ke nnɔ bo kí lá tu fenfennɔ, <sup>51</sup> kí cin Abel, kí tí baa' Sakari, wà bi là ku' wɔ Uwien ya duku ya luo bo nnɔ. N tɔkeh nε imɔn nε, Uwien li dère fenfennɔ ya nib ya tub binib nnɔ ke ya kuum bo.

<sup>52</sup> «Ninbi bà ben \*yiko mənəmən nən, nì bre nì'bo, kimε na dienh nib sən be rí bende Uwien. Ninbi ηa pe Uwien ya sən bo, nε ki piendeh binib bà yíe be rí paan u'bo nən mə.»

<sup>53</sup> \*Yesu řnen' uyo wà nən, nε \*Yiko ya wənwəknb nin \*Farisienmbε taa' u'bo ubenpiebe nε ki niireh wə iniire tigber ke ya bol bo, <sup>54</sup> ki nuunh be rí dele kí cuo wə u'lenm ni.

## 12

### *Li ben mən iřuən ilele ya nib bó*

*(Matie 10:26-27)*

<sup>1</sup> U ya yo nε binib itur itur taan' \*Yesu saan, haali ki tì pebeh táb. Nε \*Yesu cin' ki tókeh u'panpaankaab ki teh: «Li ben mən \*Farisienmbε ya kpənə ya řəke bó, bi yé iřuən ilele ya nib nε. <sup>2</sup> Niba ηa te ki buə ηə ka lá li řε upaan bo. Tigber tuba mə ηa te ki juore' kí li buə ηə ba lá li bende tū. <sup>3</sup> Ni len' nà ke licinřunl ni la, bi li cii nè kuwenwenku ni nε. Ni bunbe' nà litubl ni kudubenku bó nən, bi li kpaande nè kuduku ya paaki nε.»

### *Li fenge mən Uwien baba*

*(Matie 10:28-31)*

<sup>4</sup> «Ninbi bà yé n'jotieb nən, n tókeh ninbi nε: la fenge mən bà kuuleh tigbenent, ka ji li fre kí tien niba kí pukn. <sup>5</sup> N li wuən nε udaan wà nì kpe ní li fenge wə. Li fenge mən Uwien. Wən nε li fre kí cère ní kpo nε ki ηməbe mituəm wə rí taa nε kí wiε umu wà ηa rí kpiin ni. N tókeh nε nε, li fenge mən wən.

<sup>6</sup> «Bi li fre kí kuəre inuən iřun iře nε? Nin nən ke ηə Uwien ηa rí sunde i'ni uba mənən bó. <sup>7</sup> Nən bo, la fenge mən, kimε ni cən' inuən ligol. Uwien ben haali ni'yur mənən ya řəbu.»

### *Li lienh binib ya nun bó ki teh a yé Yesu yə*

*(Matie 10:32-33; 12:32; 10:19-20)*

<sup>8</sup> «N tókeh nε nε, wà ke lienh binib ya nun bó ki teh u yé n'yə la, Unil ya Bijε mə li len Uwien ya tondb ya nun bó kí ye udaan mə yé u'yə nε. <sup>9</sup> Ama wà ke lienh binib ya nun bó ki teh wa yé n'yə la, n'mə li len Uwien ya tondb ya nun bó kí ye udaan mə ηa yé n'yə. <sup>10</sup> Unil len' Unil ya Bijε bo fεnfεnm la, Uwien li fère wə. Ama unil suke' \*Mifuořaanm mən la, Uwien ηa rí fère wə.

<sup>11</sup> «Bi taa' nε ki jon' itáan ya dur ni bii tibuur ya cienb saan bii udu ya cienb saan be rí bu nε tibuur uyo wà la, la nřin mən ni li len ma bo bii ni li len bà kí řε len. <sup>12</sup> Kimε \*Mifuořaanm nε li cère ní bende ni li len kí ye bà u ya yo.»

### *Uřaadεnjər uba ya kpenjεnm*

<sup>13</sup> Linigol nən ni uje uba tóke' \*Yesu ki ye: «Cεnbaa, tóke n'ninje kí ye wə rí gbiire ti'baa ya faal kí de nni n ya bó.» <sup>14</sup> Nε \*Yesu tóke' wə ki ye: «Uje, ηmε de' nni usen rí tūəre ni'gber bii rí gbiire nε ni'faal-i?» <sup>15</sup> Nε ki tóke' linigol nən ki ye: «Li ben mən ki la cère ni'nun rí li fəke lifaal bo, kimε unil ηməbe lifaaciεnl mənən la, na yé len nε li cère wa rí kpo.»

<sup>16</sup> Nε ki pən' be mikpenjεnm ki ye: «Uřaadaan uba nε là te u'kpàan lūon' cεen. <sup>17</sup> Nε u maaleh u'fəl ni ki teh: «N li tien mila? Kimε ma ji ηməbe rí li cūən nà saan n'jier.» <sup>18</sup> Nε ki ye: «N li tien ma sə: n li we n'bənbuən ke nε, kí mε icεncien, kí cūən n'jier nin n'bont ke, <sup>19</sup> nε kí ye n ηməbe lifaal li yebe ki li baa nni ibin ibin. Nən bo, n li fuoreh nε, kí li jinh, kí řuh, kí poknh.» <sup>20</sup> Nən saan nε Uwien tóke' wə ki ye: «Ujər sin, a li kpo kuřənkku kuu ke. A taan' lifaal là ke nə, ηmε ji li si lè?» <sup>21</sup> Unil wà ke nuunh lifaal ki dəkndeh, ka ηməbe nà yé lifaal Uwien ya nun bó nən yaam mə te nən nε.»

### *La cère mən ni'nun rí li mən tijier nin tiwεngolkaar bo*

<sup>22</sup> \*Yesu tóke' u'panpaankaab ki ye: «Nən bo nε n tókeh nε ki teh ni la cère nè rí li wiεbe nε ni li tien ma kí li fuobe bo, ní li maaleh ki teh: «Ti li ji ba?» Ki la cère nè rí li wiεbe nε ni'gbenent bo, ní li maaleh ki teh: «Ti li gole ba?» <sup>23</sup> Kimε limiel cən' tijier, nε

tigbenent mɔ cɛn' tiwɛngolkaar. <sup>24</sup> Maale mɛn kɪ liike ikankaan te ma bo. Ya koh, ka ceh, ka ɲmɔbe bɔnbuɔn, ka ɲmɔbe jieblibùol. Ama Uwien nɛ jindeh yè. Na nɪn cɛn' inuɔn-ii? <sup>25</sup> Ni'ni ɲmɛ nɛ u'nɪnm ni, u li fre kɪ fɔkn u'miɛl waamu kɪ pukn-i? <sup>26</sup> Na nɪn li fre kɪ tien nibonwawaann ma nɔ, bɛ tien' ni nɪnh tibontɔr bo? <sup>27</sup> Maale mɛn kɪ liike tisir puh ma bo. Ta loh kunkum, ka loh kpɛlcɛr mɔ. Ama n tɔkeh nɛ nɛ, ubɛr Salomɔn nin u'fàaciɛnl kɛ wa là gole' kpɛlcɛr tù mɔn ki baa' mipuum nɔ ya miba mɔnɔn. <sup>28</sup> Uwien cèreh timɔsir tà te kubaaku ni dinnɔ ki li wun teke umu puh mipúmɔnmɔnm la, bɛ li cère wa rɪ tien ninbi binib mimɔnm kɪ cɛn timuɔr-i? Ni'tekjim nɛ pɔre' nɛ. <sup>29</sup> Ninbi la cère mɛn ni'nun rɪ li mɔn ni li ji bà nin ni li ɲu bà bo, ki la cère iyɛnmaale rɪ li jèndeh nɛ. <sup>30</sup> Kimɛ uɲɛndun yaab bà ɲa pɛ Uwien ya sɛn bo ya nun nɛ mɔn tu ya bont kɛ bo. Ama ninbi bɛn wɔn, ni'Baa Uwien bɛn ki ye ni cieke tù. <sup>31</sup> Nɛn bo, cère mɛn ni'nun rɪ li mɔn \*Uwien ya bɛl bo, u li taa tibont nɔ kɪ pukn nɛ. <sup>32</sup> Kicɛkwawaak ya nibɛ, la fɛnge mɛn, kimɛ ni'Baa Uwien yíe rɪ li te u'bel ni nɛ.»

*Lifaal là ɲa ɲmɔbe gbenm*  
(Matie 6:19-21)

<sup>33</sup> «Kuɔre mɛn ni ɲmɔbe nà, kɪ taa ilike nɔ kɪ pu bijiinb, ɲɔ kɪ li ɲmɔbe muliksɔrmu mùa ɲa rɪ saa, kɪ li ɲmɔbe Uwien saan lifaal là ɲa ɲmɔbe gbenm. Nasu ɲa rɪ nɛkn nɛn saan, kuotuul mɔ ɲa te ni'saan kɪ mɔ lè. <sup>34</sup> Kimɛ ni'faal te nà saan la, ni'fɛl mɔ dɔ nɛn saan nɛ.»

*Bonde mɛn kɪ li gu Yonbdaan*

<sup>35</sup> «Li bondeh mɛn ni'ba, ki la cère ni'fr rɪ kpɪin. <sup>36</sup> Li te mɛn tɛn bitonsɔnb bà gu uyo wà bi'cɛnbaa ɲɛn' upiikuɔn bó ki lá ɲi' kunagɛnku la, bɛ rɪ pɔk kɪ piire nɔ. <sup>37</sup> Uwien ya mɔnm te bitonsɔnb bà bi'cɛnbaa li baa ki lɛ bà gɔh nɔ bo. N tɔkeh nɛ imɔn nɛ, u li taa u'tonsɔnkpɛlcɛr kɪ gole kɪ cère bɛn nɛ rɪ kèle, wɔn rɪ taa tijier kɪ gbiire bɛ. <sup>38</sup> U baa' kuyɔku ya siik bii ukuojɛmuɔyo mɔnɔn ki laa' bi bonde' la, Uwien ya mɔnm te bi'bo. <sup>39</sup> Ni bɛn ki ye ududaan bi bɛn uyo wà unasu li baa la, wa bi li cère nasu rɪ kɔ u'den. <sup>40</sup> Ni'mɔ rɪ bonde kɪ li gu, kimɛ uyo wà na maaleh ki teh Unil ya Bijɛ li baa rɪ nɔ, u ya yo nɛ u li baa.»

*Utonsɔnl wà mɔn nin wà bre ya gbɛr*  
(Matie 24:45-51)

<sup>41</sup> Nɛn saan nɛ Pier niire' \*Yesu ki ye: «Yonbdaan, a pɔn' tinbi nɛ mikpɛnjenm miɛ bii a pɔn' mè binib kɛ nɛ?» <sup>42</sup> Nɛ u jiin' wɔ ki ye: «U lɛ tonsɔnl ba nɛ ɲmɔbe mibɛnm u'cɛnbaa du u'bo? Wɔn si: wà ya cɛnbaa li de wɔ ticiɛnt wɔ rɪ li likeh u'tonsɔntɔb, kɪ li loh bɛ tijier uyo wà ɲi kpɛ nɛ. <sup>43</sup> Utonsɔnl nɔ ya cɛnbaa baa' ki laa' u sɔnh lituonl nɔ li'donbɔ la, Uwien ya mɔnm li te utonsɔnl bugbɛn bo. <sup>44</sup> N tɔkeh nɛ imɔn nɛ, u'cɛnbaa li de wɔ ticiɛnt wɔ rɪ li likeh u'bont kɛ. <sup>45</sup> Ama n'ba la, utonsɔnl nɔ li maale u'yɛnm ni kɪ ye u'cɛnbaa li wuɔke, nɛ kɪ cin kɪ li ɲih u'tonsɔntɔb, bijɛb nin bipiib kɛ, kɪ li jinh, ki ɲuh ki yibeh. <sup>46</sup> Utonsɔnl nɔ ya cɛnbaa li baa rɪ lidaali là nin uyo wà wa maaleh ki teh u li baa, nɛ kɪ bien u'gbɛn cɛɛn, kɪ cère wɔ rɪ lɛ bà ɲa tuo' Uwien ya ɲɔbu bó li lɛ utudɛre wà nɔ.

<sup>47</sup> «Utonsɔnl wà bɛn u'cɛnbaa yíe ma, ka bonde' bonn, ka tien' u'cɛnbaa yíe ma la, bi li bien u ya gbɛn nɛ kɪ gbien. <sup>48</sup> Ama utonsɔnl wà ɲa bɛn u'cɛnbaa yíe ma, ki sɔnh lituonl là kpɛ bɛ rɪ ɲi wɔ mɔnɔn la, bi li ɲi wɔ waamu nɛ. Nɛn bo nɛ bi de' wà ɲi yebe la, bi niireh wɔn nɛ bi de' wɔ nà nɔ bó ki gbiekeh. Bi guun' wà tibont tù yebe la, bi niireh wɔn nɛ tu'bó ki gbiekeh.»

*Na yé ɲɔkpaan, ɲi yé umaapàare nɛ*  
(Matie 10:34-36)

<sup>49</sup> «N tuke umu nɛ ki lá wiɛ' kitink bo, nɛ n bi yíe wù rɪ pɔk kɪ teke nɛ. <sup>50</sup> N li jènde kɪ tɪ kɛnde. Ma jènde' ki tɪ gben' la, n'yɛnm ɲa rɪ duɔn. <sup>51</sup> Ni maaleh ki teh n tuke uɲɔkpaan nɛ ki baa' uɲɛndun wuu ni-ii? Na te nɔ, n tɔkeh nɛ nɛ, n tuke umaapàare nɛ ki baa'. <sup>52</sup> Kimɛ

fɛnfɛnnɔ kɪ taa kɪ li joh, binib biɲun te iden iba la, bi li pàare tɔb. Bitaa li nɛn bile, bile nno mɔ li nɛn bita.

<sup>53</sup> Bibaa li nɛn u'bijɛ,  
u'bijɛ mɔ li nɛn wɔ;  
binaa li nɛn u'bisɛ,  
u'bisɛ mɔ li nɛn wɔ;  
upii li nɛn u'yaabisɛ,  
u'yaabisɛ mɔ li nɛn wɔ.»

*Binib ɲa ciɪh Uwien teh tibont tà fɛnfɛnnɔ nɔ ya tingi*  
(Matie 16:2-3)

<sup>54</sup> \*Yesu tɔke' linigol nno ki ye: «Ni laa' titɛwɔlgbɔnt te nintuɔli bó la, ni pɔk tɔkeh ki teh: «utaa li nii nɛ», nɛ wɔ ní nii. <sup>55</sup> Mitafaam ɲɛn' unɔgɛn bó ní la, ni tɔkeh ki teh kutòntònkɔ li cùun, nɛ kù ní cùun. <sup>56</sup> Ninbi iɲuɔn ilele ya nibɛ, ni freh ki sekndeh ki bɛndeh kutaaku nin kitink ya bont teteh ma bo, bɛ tien' na fre' ki sekn' ki bɛnde' Uwien teh tibont tà fɛnfɛnnɔ nɔ ya tingi?»

*A bii' unil la, cuo u'dunl tonm*  
(Matie 5:25-26)

<sup>57</sup> «Bɛ tien' ninbi bugbɛn ɲa freh ki maaleh ki bɛndeh nà mɔn-i? <sup>58</sup> Sin nin unil ɲmɔbe mimaam, nɛ u tuke mɛ kɪ jo tibuur la, cɛrɛ ní gben mɛ uyo wà ni laan te usɛn ni. Nno ɲa ní la, u li taa ɲɛ kɪ tɪ ɲukn tibuur ya ciɛn, u'mɔ ní taa ɲɛ kɪ tɪ ɲukn lipɛkl ya ciɛn wɔ ní pɛkn ɲɛ. <sup>59</sup> N tɔkeh ɲɛ nɛ, ɲa tɪ pɛn' ki gben' tibuur ya like la, ɲa ní ɲɛ len.»

## 13

*Lèbre mɛn ni'tetem*

<sup>1</sup> U ya yo nɛ binib biba baa' ki lá tɔke' \*Yesu ki ye Galile yaab biba là te ki teh lituɔrl ki dienh Uwien, nɛ Pilat ku' bɛ. <sup>2</sup> Nɛ \*Yesu jiin' bɛ ki ye: «Ni maaleh ki teh Galile ya nib nno là yé bibiɛrdɛnb ki cɛn' Galile ya nitɔb nɛ cɛrɛ' bi jɛnde' bɛ nno-ɔɔ? <sup>3</sup> Na te nno. N tɔkeh nɛ nɛ, na lèbre' ni'tetem la, ni'kɛ mɔ li kpo nno nɛ.» <sup>4</sup> \*Yesu tí len' ki ye: «Likpɛnkpɛnfɔfɔkrl là lu' ki ku' bijɛb piik nin biniin Silowe ni ma nno, ni maaleh ki teh bi là teh ibiɛrɛ ki cɛn' Yerusalem ya nitɔb kɛ nɛ-ɛɛ? <sup>5</sup> Na te nno. N tɔkeh nɛ nɛ, na lèbre' ni'tetem la, ni'kɛ mɔ li kpo nno nɛ.»

*Busubu bùa ɲa lùonh ya kpɛnɲɛnm*

<sup>6</sup> Nɛ ki pɔn' bɛ mikpɛnɲɛnm ki ye: «Bukɛnkɛnbu buba nɛ là se uɲɛ uba ya kpàabu ni. Nɪ tete nɛ u lá baa' wɔ ní liike bù lùon' bii bua lùon'-i? Nɛ ki laa' bua lùon'. <sup>7</sup> Nɛ u tɔke' u'tonsɔnl wà gu bukpàabu nno ki ye: «Ibin ita sɔ n baa' ma kɛ ní pùɔ ikɛnkɛn busubu buu bo la, ma lenh bonn. Gɛ bù, la cɛrɛ bù ní ji ní li se ki teknh kitink ya sensenm fɛnm.» <sup>8</sup> Nɛ utonsɔnl nno tɔke' wɔ ki ye: «Cɛnbaa, dàan bù libinl liɛ nɔ, ní gbii bu'ɲiɛl, kɪ nuun tiwɛnt ya bint kɪ tien bù. <sup>9</sup> N'ba la, libinl là we ní nɔ, bù li lùon. Bua lùon' la, á ji ní gɛ bù.» »

*Yesu cɛrɛ' upii uba faake' Saba ya daali*

<sup>10</sup> \*Saba uba ya daali nɛ \*Yesu te Sufmbɛ ya taanl ya duku kuba ni, ki wɔknh binib Uwien ya gbɛr. <sup>11</sup> Ki laa' upii uba mɔ te len, usɛnpol ɲaake wɔ, ki tien' wɔ uwien ibin piik nin iniin, u bɔ ka freh ki yaareh. <sup>12</sup> \*Yesu laa' wɔ, ki yin' wɔ, nɛ ki tɔke' wɔ ki ye: «Upii, a laa' a'ba,» <sup>13</sup> ki taa' u'nuɔ ki paan' u'bo, nɛ u yaare' i ya tàan bo, ki cin' ki pɛkeh Uwien.

<sup>14</sup> \*Yesu cɛrɛ' upii nno faake' \*Saba ya daali ma nno nɛ litaanl ya duku nno ya ciɛn ya benku ni ben' nɛ u tɔke' linigol nno ki ye: «Ni ɲmɔbe iwien iluob nɛ ní li sɔnh itùon. Nɪ li bàareh i ya wien nɛ u buuh nɛ, na yé \*Saba ya daali nɛ ni li bàareh u buuh nɛ.»

<sup>15</sup> Nɛ Yonbdaan \*Yesu tɔke' wɔ ki ye: «Ninbi iɲuɔn ilele ya nibɛ, ni'ni ɲmɛ ɲa ɲɛndeh u'nɛ bii u'ɲuun \*Saba ya daali ki tɪ ɲɛndeh? <sup>16</sup> Upii wuɔ yé \*Abraham ya yaabil nɛ, nɛ \*Satan cɛrɛ' u bun ibin piik nin iniin ka ní fre kɪ yaare. Ma bi li cɛrɛ wɔ ní faake \*Saba ya daali



bii?» <sup>17</sup> \*Yesu len' nnɔ ma nnɔ nɛ ifɛ cuo' binib bà kɛ niɛh nin wɔ miniɛm nnɔ. Ama linigol nnɔ kɛ ya yɛnm sɔngɛ' u tien' miyɔkm ya bont tà kɛ nnɔ bo.

*Mibim mà ñilke ya kpenjɛnm*  
(Matie 13:31-32; Mark 4:30-32)

<sup>18</sup> Nɛn saan nɛ \*Yesu ye: «Uwien ya bɛl naan ba? N li taa ba kí nɛngɛ lɛ? <sup>19</sup> Li naan mibim mà bi yih mè mutaar uɛ uba taa' ki bule' u'kpàabu ni nɛ. Mì pɛn' ki kpére' ki tɔn' isigben, nɛ inuɔn tereh i'bo ki kɔh.»

*Kpɔnɔ ya ñake ya kpenjɛnm*  
(Matie 13:33)

<sup>20</sup> \*Yesu tí ye: «N tí li taa ba kí nɛngɛ Uwien ya bɛl-i? <sup>21</sup> Li naan kpɔnɔ ya ñake wà upii uba bun' kpɔnɔyom mà dindin, ki taa' wù ki tien' len, kpɔnɔ nnɔ kɛ nuule' nɛ.»

*Ni li ñɛ bunañɔbu bùa kí kɔ*  
(Matie 7:13-14, 21-23)

<sup>22</sup> \*Yesu joh Yerusalem, nɛ ki ñɛh iducɛnciɛn nin iduwawaale ni ki wɔknh binib Uwien ya gbɛr. <sup>23</sup> Nɛ udaan uba niire' wɔ ki ye: «Yonbdaan, bà li ñmɛrɛ ña yɛbe nɛ-ɛɛ?» Nɛ \*Yesu tɔkɛ' bɛ ki ye: <sup>24</sup> «Cère mɛn ni'nun n li mɔn ní ñɛ bunañɔbu bùa wiɛbe kí kɔ. N tɔkɛh nɛ nɛ, kime binib bà yɛbe li nuunh bɛ ní ñɛ bù kí kɔ ka ní fre. <sup>25</sup> Uyo uba ududaan lá li fii kí piin bunañɔbu, nɛ ni juore' kí li se saali ki ñih kunagɛnku ki teh: «Yonbdaan, piire tɛ bunañɔbu.» U li tɔkɛ nɛ kí ye: «Ma bɛn ni yé nà bó yaab.» <sup>26</sup> Nɛn saan nɛ ni li lienh ki teh: «Tinbi nin sin nɛ là taakeh ki jinh ki ñuh. A là te tí'ɔdu ya sɛnjɛ ni nɛ ki wɔknh binib Uwien ya gbɛr.» <sup>27</sup> Nɛ wɔ ní tɔkɛ nɛ kí ye: «N tɔkɛh nɛ nɛ, jɛnde mɛn n'saan, ma bɛn ni yé nà bó yaab. Ninbi, ni'kɛ teh nà bre nɛ.» <sup>28</sup> Nɛn nɛ cère' bi li juon nɛ saali, ní li muɔh ki ñmɔnh iñɔgbɛn uyo wà ni li lɛ \*Abraham nin \*Isaak nin Sakɔb nin \*Uwien ya ñɔbonsɔknb kɛ te Uwien ya bɛl ni nnɔ. <sup>29</sup> Binib li ñɛ lɛnpuoli bó ní nin nintuɔli bó ní nin ikele kɛ ní kí lá kɛle kí ji tijier Uwien ya bɛl ni. <sup>30</sup> Nnɔ nɛ bà paan' puoli ya biba lá li liere usɛn. Bà mɔ liere' usɛn ya biba lá li paan puoli.»

*Yesu kpiɛndeh Yerusalem bo*  
(Matie 23:37-39)

<sup>31</sup> U ya yo nɛ \*Farisiɛnmbɛ biba nɛkn' \*Yesu ki tɔkɛ' wɔ ki ye: «Siere libùol liɛ kí li joh, kime Herod yíɛ wɔ ní ku ñɛ nɛ.» <sup>32</sup> Nɛ \*Yesu tɔkɛ' bɛ kí ye: «Li joh mɛn kí tí tɔkɛ u ya tiibe ki ye: «Dinnɔ n ñuɔh isɛnpol binib saan, ki cèreh biwiɛnb faakreh, ki tí li wun tien nnɔ wenli mɔ, nɛ n'tuonl ní gben wienta daali.» <sup>33</sup> Ama n li cuon dinnɔ nin wenli nin daalibó nɛ kí baa Yerusalem, kime na kpe \*Uwien ya ñɔbonsɔknl ní kpo niba saan, ki kɛnde' Yerusalem ni.»

<sup>34</sup> Nɛ ki ye: «Yerusalem, Yerusalem, a kuuleh \*Uwien ya ñɔbonsɔknb, ki yèkreh u sɔnh binib bà a'saan nnɔ itɛn ki kuuleh bɛ. Uyo kɛ n là yíɛ ní taan a'nib n'ba saan tɛn ukuoñɔ taakeh u'bumu u'fiɛbe ni ma bo, nɛ ba tuo'. <sup>35</sup> Liike mɛn Uwien sɛln' nɛ ni'kɔnkuɔn ma. N tɔkɛh nɛ nɛ, na ji li lɛ nni, kí tí baa uyo wà ni li len kí ye: «Uwien ya mɔnm ní li te wà we ní Yonbdaan ya yel bo nnɔ bo.» »

## 14

*Yesu cère' uwiɛn uba faake' Saba ya daali*

<sup>1</sup> \*Saba uba ya daali nɛ \*Yesu jon' \*Farisiɛnmbɛ ya ciɛn uba den wɔ ní tí ji tijier, nɛ binib bà te ni'saan nnɔ sieke wɔ. <sup>2</sup> Uɛ uba mɔ te ni'saan ki se \*Yesu ya nun bó u'gbɛnɛnt cɔncuɔn', <sup>3</sup> nɛ \*Yesu niire' bà bɛn \*yiko mɔnmɔnm nnɔ nin \*Farisiɛnmbɛ ki ye: «Unil ñmɔbe usɛn wɔ ní buu biwiɛnb \*Saba ya daali bii wa ñmɔbe?» <sup>4</sup> Bi ñmin, nɛ \*Yesu mɛ' uɛ nnɔ ki cère' u faake', nɛ u cèbe' wɔ u bure'. <sup>5</sup> Nɛ u niire' bɛ ki ye: «Ní'ni ñmɛ ya buk bii u'ne lu' liñunbunl ni \*Saba ya daali la, wa ní ñɛn wɔ i ya tãan bo?» <sup>6</sup> Nɛ ba fre' ki jiin' wɔ u'niire nnɔ.

### *Yesu tãkeh binib ukankãan ya gber*

7 \*Yesu laa' bi yin' binib bà tijier ya jim nnò gèndeh binikpɛkpiɛkb ya kãnkãan ki kaah, nɛ u pɔn' bɛ mikpɛnjɛnm ki ye: 8 «Unil yin' nɛ upiikuɔn ya jier ya jim la, la jo kí tĩ kèle binikpɛkpiɛkb ya kãnkãan. Nba la, u yin' uba mɔ u cɛn' nɛ u' mɔ ní lá baa ní, 9 nɛ wà yin' ní'kɛ bile nnò ní baa kí lá tãke nɛ kí ye: «Cère uje wuɔ ní kèle a kɛ ná saan nɔ.» Nɛ a fii kí tĩ kèle puoli bó nin ifɛ. 10 Nɛn bo, unil yin' nɛ tijier ya jim la, jo kí tĩ kèle puoli bó, nɔ wà yin' nɛ nnò lá baa' la, wɔ ní tãke nɛ kí ye: «N'jɔ, dɛn inun bó ní.» Nɛn saan nɛ ní li yé a'bo ukpiɛke sin nin bà kɛ jinh tijier nnò ya nun bó. 11 Kimɛ wà kɛ kpiɛkreh u'ba la, Uwien li yuɔn wɔ. Wà kɛ jiiindeh u'ba tingi la, Uwien li kpiɛke wɔ.»

12 Nɛ \*Yesu tãke' wà yin' wɔ tijier ya jim nnò ki ye: «A ye á yin binib tijier ya jim la, la yin a'jɔtieb, ki la yin a'ninjieɓ, ki la yin a kpi nin bà, ki la yin a'kɔnkuɔnlieɓ bà yé bifãadɛnb, kimɛ bi' mɔ li fre kí yin nɛ á ji kí jiiin. 13 Ama a ye á yin binib tijier ya jim la, yin bijiinb nin itɛjenb nin iwɔɓ nin ijùɔn. 14 Uwien ya mɔnm li te a'bo, kimɛ bɛn nɔ nɔmɔbe niba bɛ ní jiiin nɛ. Uwien nɛ li su nɛ uyo wà u li cère binimɔnb ní mɛkre bitenkpiib ní nnò.»

### *Tipiikuɔnjier ya kpɛnjɛnm (Matie 22:1-10)*

15 Wɔn nin binib bà jinh tijier nnò ya uba cii' u len' ma bo nɛ ki tãke' wɔ ki ye: «Bà li ji tijier Uwien ya bel ni nnò, Uwien ya mɔnm te bi'bo.» 16 Nɛ \*Yesu tãke' wɔ ki ye: «Uje uba nɛ là tien' tijier tù yɛbe, ki yin' binib ligol bɛ ní baa kí lá ji. 17 Tijier nnò ya jijiyo baa' nɛ u sɔn' u'tonsɔnl u nɔn' ki tãke' bɛ kí ye bɛ ní dɛn bi bonde' ní'kɛ ki gben'-a. 18 Nɛ bi'kɛ yie', a li ye bi kpaan' iyɛ nɛ. Ukpiɛk ye: «Tien' nni kafala, ma ní fre kí baa, kimɛ n de' bukpãabu nɛ ki yie' ní jo kí tĩ liike bù.» 19 Utɔ ye: «Tien' nni kafala, ma ní fre kí baa, kimɛ n de' inaje piik nɛ ki yie' ní jo kí tĩ wɔkn yè.» 20 Utɔ mɔ ye: «N laan kuɔn' upii sɔ, nɛn bo nɛ ma ní fre kí baa.» 21 Nɛ utonsɔnl nnò liebe' u'cɛnbaa saan, ki tĩ tãke' wɔ bi'kɛ len' ma bo. Nɛn saan nɛ u'cɛnbaa nnò ya benku ni ben', nɛ u tãke' u'tonsɔnl nnò ki ye: «Jo tontonm isɛnje nin musɛnbumu ni, kí tĩ taa ní bijiinb nin itɛjenb nin ijùɔn nin iwɔɓ, bɛ ní baa kí lá ji.» 22 Nɛ utonsɔnl nnò liebe' ní ki lá tãke' u'cɛnbaa ki ye: «Cɛnbaa, n tien' a ye ma nnò, ama mifɛnm biɛ ki sien'.» 23 Nɛ u'cɛnbaa tãke' wɔ ki ye: «Nnò la, jo isɛn ni nin ikpãan ni, kí tĩ cékn binib bɛ ní baa nɔ n'den ní gbe. 24 N tãkeh nɛ nɛ, binib bà n là kpiɛ' ki yin' bɛ nnò uba mɔnɔn nɔ ní lèn n'jier.»

### *Dãan mɛn tibont kɛ kí paan Yesu bo (Matie 10:37-38)*

25 \*Yesu joh ma nnò nɛ binib pɛ u'bo ki yɛbe. U jieɓe' ki liike' bɛ, nɛ ki tãke' bɛ ki ye: 26 «Unil baa' wɔ ní paan n'bo, ka yie' nni ki cɛn' u'naa nin u'baa nin u'po nin u'bumu nin u'ninjieɓ nin u'ninsieɓ nin u'miel mɔnɔn la, wa kpɛ wɔ ní li yé n'panpaanke. 27 Unil wà kɛ nɔ yuunh u'dɔpɔnpɔn ki bukeh ki paakeh n'bo la, wa ní fre kí li yé n'panpaanke. 28 Ni'ni nɔmɛ nɛ yie' wɔ ní mɛ kuduku la, wa ní kpiɛ kí kèle kí bù kí liike u'like li baa bii ya ní baa? 29 Wà tien' nnò nɔ ki pu' kuduku nnò ka fre' ki mɛn' ki faa' kù la, binib bà kɛ li lɛ kuduku nnò li lè wɔ nɛ, 30 kí len' kí ye: «Liike mɛn udaan wuɔ cin' ki mɛh kuduku nɛ ka fre' ki faa' kù.» 31 U lɛ bɛr ba nɛ nɔmɔbe sojambɛ itur piik ki yie' wɔ ní jo kí tĩ jèke' ubertɔ wà nɔmɔbe sojambɛ itur pile, nɔ ka ní kpiɛ kí kèle kí maale kí liike, u li fre kí taa u'sojambɛ itur piik nnò kí tuobe ubertɔ wà nɔmɔbe sojambɛ itur pile nnò bii wa ní fre? 32 U laa' wa ní fre la, wɔn nnò laan te fãkm ma nnò, u li sɔn ucɛndɛnduol nɛ wɔ ní cɛnde wɔ usɛn ni kí tãke' wɔ kí ye wɔ ní cère bɛ ní gben tigber nnò. 33 Nnò nɛ ní'ni wà kɛ nɔmɔbe dàan' u nɔmɔbe ná kɛ la, wa ní fre kí li yé n'panpaanke.»

### *Miyaam ya kpɛnjɛnm (Matie 5:13; Mark 9:50)*

<sup>34</sup> «Miyaam yé nibonn nà mən nε. Ama m̄ saa' ka ji ηmε la, niba ηa te kí ji ní fre kí ηmaake mε. <sup>35</sup> M̄ li juore fεnm nε, ma ji li ηmabe tuonl. Bi li taa mε kí wule nε. Wà ηmabe litubl la, wə ní cii.»

## 15

### *Upe wà bole' ya kpenjenm* (Matie 18:12-14)

<sup>1</sup> Bilenpotekb nin bibierdentəb kε nekndeh \*Yesu saan bε ní cenge u'gbεr. <sup>2</sup> Nε \*Farisienmbε nin Yiko ya wənwəknb bunbeh u'bo ki teh: «Uje wuə teknh bibierdenb nε ki taakeh ki jinh nin bε.»

<sup>3</sup> Nεn saan nε \*Yesu pən' bε mikpenjenm ki ye: <sup>4</sup> «Ní'ni ηmε ηmabe ipe kobk ηə uba bole' la, wa ní cère ipe piwε nin iwε yà s̄en' nnə kumuəku ni, kí jo kí tí nuun wà bole' nnə haali kí tí lε wə? <sup>5</sup> U tí laa' wə la, u'yεnm li s̄onge nε wə ní yuure wə kí buke. <sup>6</sup> U tí baa' iden la, u li yin u'jətieb nin u'kənkuanlieb, kí t̄ake bε kí ye: «Cère mən tí li poknh, kimε n laa' n'pe wà là bole' nnə.» <sup>7</sup> Nnə nε n t̄akeh nε, ubierdaan uba mənən lèbre' u'tetem la, Uwien ya yεnm li s̄onge u'bo kí cən binib piwε nin biwε bà cuube ka ηmabe bε ní lèbre bi'tetem nnə bo.»

### *Bulikbu bùa bole' ya kpenjenm*

<sup>8</sup> «U lε pii ba ηmabe milikbim piik ηə miba bole' la, wa ní sε lifrl, kí ηère kuduku, kí t̄əre kí nuun kí tí lε m̄? <sup>9</sup> U tí laa' m̄ la, u li yin u'jətieb nin u'kənkuanlieb kí t̄ake bε kí ye: «Cère mən tí li poknh, kimε n laa' n'likbu bùa là bole' nnə.» <sup>10</sup> Nnə nε n t̄akeh nε, ubierdaan uba mənən lèbre' u'tetem la, Uwien ya tondb li pokn u'bo.»

### *Kibuk kà gaare' ya kpenjenm*

<sup>11</sup> \*Yesu tí ye: «Uje uba nε là te ki ηmabe bijieb bile. <sup>12</sup> Nε uwaal t̄ake' u'baa ki ye: «N'Baa, gbiire a'faal kí taa n lá li ji nà bó kí de nni.» Nε u'baa gbiire' u'faal ki de' bi'ke bi ya bó. <sup>13</sup> Na wuəke', nε uwaal nnə taan' u'faal kε, ki bure' fənfəkm udu uba bó, kí tí te ní' bó ki teh fεnfεnm, kí n̄ende' u'faal kε. <sup>14</sup> U tí n̄ende' ni'ke ki gben', nε mikəncienm miba lu' udu nnə ni. U ya yo nε tijiint kən' wə. <sup>15</sup> Nεn saan nε u jon' udu nnə ya jε uba saan wə ní taa wə lituonl, nε uje nnə jon' wə u'kp̄aabó u tí gu fangambε. <sup>16</sup> U yíe wə ní ji fangambε nnə ya jier mənən, ama uba ηa dienh wə t̄u. <sup>17</sup> Nε u maale' u'yεnm ni ki ye: «N'baa ya tonsənb kε jinh ki gbieh nε, nε mikənm benh m̄ ní ku min niε saan. <sup>18</sup> N li fii kí liebe n'baa bó, kí tí t̄ake wə kí ye: «N'Baa, n bii' Uwien, ki bii' a'mə. <sup>19</sup> Ma ji kpe á yin nni a'bije. Li teh nni tən n yé a'tonsənb ya uba nε.» <sup>20</sup> Nε ki fii' ki liebeh u'baa bó.

«U tí tuo iden, ki laan biε ki te fəkm, nε u'baa laa' wə, n̄i cuo' wə micεcεkm, nε u s̄en' ki tuobe' wə usen bó, ki ləkn' wə. <sup>21</sup> Nε u'bije t̄ake' wə ki ye: «N'baa, n bii' Uwien, ki bii' a'mə. Ma ji kpe á yin nni a'bije.» <sup>22</sup> Ama u'baa t̄ake' u'tonsənb ki ye: «Taa mən liliermənəm̄n̄l ní tonm kí lá goln wə, kí piln wə mifl̄im, kí cεkn wə itacaan, <sup>23</sup> kí taa ní unafanfaan wà gbenge, kí lá kòre, tí jele kunacenku. <sup>24</sup> Kimε n là maaleh ki teh n'bije wuə nə kpo' nε, jaan u fuobe. U là bole' nε, nε n piire' wə.» Nε bi cin' ki jeleh kunacenku.

<sup>25</sup> «U ya yo ki laa' u'bije ucien te ukp̄aabó nε. U n̄en' ukp̄aabó ní ki lá tuo iden, nε ki cii' inacenjelgangaan nin kujaanku bó. <sup>26</sup> Nε u yin' bitonsənb ya uba, ki niire' wə nà tien'. <sup>27</sup> Nε u t̄ake' wə ki ye: «A'waake nε liebe' ní. U liebe' ní nin laanf̄ie ma nnə, nε a'baa cère' bi kòre' unafanfaan wà gbenge.» <sup>28</sup> U cii' nnə ma nnə nε u'benku ni ben', u je' ka kən', nε u'baa n̄en' ki gbāan' wə. <sup>29</sup> Nε u t̄ake' u'baa ki ye: «Liike, n s̄anh ηε it̄on ibin ibin nε, ka yíe' a'n̄əbu bó fiebu, ama ηa de' nni wəbuk mənən, min nin n'jətieb ní jele kunacenku. <sup>30</sup> Ama a'bije wuə, wən là paan' ijenkpend bo nε, ki tí n̄ende' a'faal ki lá liebe' ní, nε a kòre' wə unafanfaan wà gbenge-a!» <sup>31</sup> Nε u'baa jiin' wə ki ye: «N'bukε, sin te n'saan uyo kε nε. Sin nε si n ηmabe tibont t̄a kε. <sup>32</sup> A'waake wən, n là maaleh ki teh u kpo' nε, jaan u fuobe. U là bole' nε, nε n piire' wə. Nεn bo nε n̄i kpe tí jele kunacenku kí pokn.» »

## 16

*Utonsɔnl wà ηmɔbe miyɛnfuom*

<sup>1</sup> \*Yesu tɔke' u'panpaankaab ki ye: «Ufàadaan uba nɛ là te ki ηmɔbe utons�nl uba u likeh u'bont kɛ. Bi linde' u'puoli bó ki lá tɔke' u'cɛnbaa ki ye u nɛndeh u'faal nɛ. <sup>2</sup> Nɛ u'cɛnbaa yin' wɔ ki lá niire' wɔ ki ye: «N ciih bi lienh a'bo bɛ ya gbɛr sɔ? Wuɔn nni a tentien' n'bont ma bo, kimɛ ηa ji li yé n'tonsɔnl.» <sup>3</sup> Nɛ utonsɔnl nnɔ maale' u'yɛnm ni ki ye: «N'cɛnbaa li nɛn nni lituonl ni ma, n li tien mila? Ma ηmɔbe tuɔm rí ko kpàar-a! Ki ye n li miɛh mɔ la, nɛ ηmɔbe nni ifɛ nɛ. <sup>4</sup> Tɔ, n bɛn n li tien ma ηɔ n'cɛnbaa nɛn' nni lituonl ni la, biba rí teke nni bi'den.» <sup>5</sup> Nɛ ki yih bà ηmɔbe u'cɛnbaa ya fɛnl nnɔ uba uba, nɛ ki niire' ukpiɛk ki ye: «A ηmɔbe n'cɛnbaa ya fɛnl inɛ?» <sup>6</sup> Nɛ u ye: «Mikpɔm tikucinwawaart\* kobk.» Nɛ u tɔke' wɔ ki ye: «Taa a'fɛnl ya gbɔnku ní kí kɛle tonm, kí kɛle tikucinwawaart piɔun.» <sup>7</sup> Nɛ ki niire' utɔ ki ye: «Sin, a'mɔ ηmɔbe u'fɛnl inɛ?» Nɛ u ye: «Iji tibɔtɔcɛncient† kobk.» Nɛ u tɔke' u'mɔ ki ye: «Taa a'fɛnl ya gbɔnku kí kɛle tibɔtɔcɛncient piniin.» <sup>8</sup> Utonsɔnl wà ηa ηmɔbe gbɛmɔnt nnɔ ya cɛnbaa cii' nnɔ ma nnɔ, nɛ ki pɛke' wɔ ki ye u ηmɔbe miyɛnfuom nɛ ki tien' nnɔ. Kimɛ uɛndun wuu ya nib ηmɔbe miyɛnfuom bi'tɔb bo ki cɛn' bà yé Uwien yaab.

<sup>9</sup> «N tɔkeh nɛ nɛ, ní li taah uɛndun wuu ni ya faal là lɛreh binib, ki coh binib kujɔtieku, ηɔ lí lá gben' la, Uwien rí teke nɛ u'den yà tuu ki te ni. <sup>10</sup> Wà yé unimɔn nibonwawaann ni la, u li yé unimɔn nɛ niboncɛncienn mɔ ni. Wà ηa yé nimɔn bonwawaann ni la, wa rí li yé nimɔn boncɛncienn mɔ ni. <sup>11</sup> Na yé nimɔnb uɛndun wuu ya faal ni la, ηmɛ ji li de nɛ lifaamɔnl-i? <sup>12</sup> Na likeh utɔ ya bont mɔnmɔnm la, ηmɛ ji li de nɛ ni'yaar-i?

<sup>13</sup> «Utonsɔnl uba ηa rí fre kí li pɛ cɛnbaambɛ bile bo. U li nɛn uba nɛ, kí li yíe utɔ. U li se uba ya ciɛk bó nɛ, kí li likeh utɔ fɛnm. Na rí fre kí li pɛ Uwien bo ki liɛbe' ki pɛ ilike mɔ bo.»

*Yesu len' tigbɛtɔr tù yɛbe*

(*Matie 11:12-13; 5:31-32; Mark 10:11-12*)

<sup>14</sup> \*Farisienmbɛ cii' \*Yesu len' tigbɛr tà kɛ nnɔ nɛ ki leh wɔ, kimɛ bi yíe ilike ki gbien'. <sup>15</sup> Nɛ u tɔke' bɛ ki ye: «Ninbi, ni yé binib bà yih ni'ba binimɔnb nɛ binib ya nun bó, ama Uwien bɛn ni'fɛl ni te ma bo, kimɛ binib likeh nà tɛn nɛ yé nibonmɔnn la, nɛ yé fɛnm nɛ Uwien ya nun bó.

<sup>16</sup> «Uwien de' Moyis \*yiko wà nnɔ, binib là pɛ wɔn nin \*Uwien ya nɔbonsɔknɔ ya gbɛr bo nɛ ki tɛ baa' San ya yo. Kí nɛ u ya yo nɛ bi tɔke' binib Uwien ya bɛl ya gbɛmɔnmɔnt, nɛ unil kɛ mɔh ki nuunh wɔ rí kɔ lí'ni nin ufaa. <sup>17</sup> Nin nɛn kɛ ηɔ nɛ faa nin Yiko ya gbɛyɔyɔl liba mɔnɔn rí juore fɛnm ki cɛn' kutaaku nin kitink ya gbenm.

<sup>18</sup> «Ujɛ wà kɛ wiɛ' u'po ki tí kuɔn' upiitɔ la, u tien' linaɔmaal nɛ. Upii ya cɛ wiɛ' wɔ, ujetɔ kuɔn' wɔ la, ujɛ nnɔ mɔ tien' linaɔmaal nɛ.»

*Ufàadaan uba nin Lasaar ya gbɛr*

<sup>19</sup> «Ufàadaan uba nɛ là te, ki guoh tiwɛnmɔnmɔnt tà ηmɔbe kudaaku, ki teh tinacent idaan kɛ, ki jinh nà ηmɛ, ki poknh. <sup>20</sup> Ucɛɛkdaan uba mɔ là dɔ ufàadaan nnɔ ya nañɔjɛbu saan inɛl yèyèke' wɔ ni'kɛ saan, bi yih wɔ Lasaar. <sup>21</sup> U yíe wɔ rí ji ijieyɔyɔl yà nɛh ufàadaan nnɔ ya tebl bo ki luh nnɔ mɔnɔn ka rí lɛ. Isengbele nɛ bàareh ki lá liɛreh u'nɛl nnɔ. <sup>22</sup> Nɛ tete nɛ ucɛɛkdaan nnɔ lá kpo'. Nɛ Uwien ya tondb baa' ki lá yuure' wɔ ki don' paaki bó \*Abraham saan. Ufàadaan nnɔ mɔ lá kpo', nɛ bi sube' wɔ. <sup>23</sup> U te kutɛnkpiiku ni ki jɛndeh, nɛ ki lá yaare' ki laa' \*Abraham fɔnfɔkm, ki laa' Lasaar mɔ te u'saan. <sup>24</sup> Nɛ u wuure' ki ye: «N'baa \*Abraham, muɔ nni micɛɛkm, kí sɔn Lasaar wɔ rí tɛ taa u'nɔbijom, kí tuun miñunm ni kí lá sɛkn n'lenl, kimɛ n jɛndeh umu wuu ni ki gbiekeh nɛ.» <sup>25</sup> Nɛ \*Abraham tɔke' wɔ ki ye: «N'bukɛ, tiere kí ye a là fuobe ma nnɔ, a là te liwiɛl ni nɛ, nɛ Lasaar te

\* **16:6** Bi yih tikucinwawaart nnɔ nɛ bat. Kuba li fre kí teke tɛn litr pita nin uluob. † **16:7** Bi yih tibɔtɔcɛncient nnɔ nɛ Kɔr. Kuba li fre kí teke tɛn litr kobiita nin piluob.

ijend ni. Fɛnfɛnnɔ Lasaar ji te uyɛnsɔnge ni nɛ niɛ saan, nɛ sin te ijend ni. <sup>26</sup> Nitɔnn mɔ si: kubùoku kùà ñà ka ñmɔbe biɛn nɛ te tinbi nin ninbi ya siik ni, ñɔ unil yíe wɔ ñ ñɛ ti'saan kí jo ni'bó la, u la fre, uba mɔ ña ñ fre kí ñɛ ni'saan kí baa ti'bùol.» <sup>27</sup> Nɛ ufáadaan nɔ tɔke' \*Abraham ki ye: «Wee, n'baa, ñi te nɔ la, ñ gbáanh ñɛ nɛ, sɔn Lasaar wɔ ñ jo n'baa den <sup>28</sup> kime n'ninjieɓ biɲun sien' ni'bó. Wɔ ñ tí gbiere bɛ, ñɔ bi la baa niɛ saan, kí mɔ ñ lá li jèndeh.» <sup>29</sup> Nɛ \*Abraham tɔke' wɔ ki ye: «Bi ñmɔbe Uwien de' Moyis \*yiko wà nɔ nin \*Uwien ya ñɔbonsɔknɓ ya gɛr. Bɛ ñ li pɛ \*yiko nɔ bo, kí li cengeh tigɛr nɔ teh bà.» <sup>30</sup> Nɛ u ye: «N'baa \*Abraham, na te nɔ, ba ñ cii, ama unil ñɛn' kutɛnkpiiku ni kí jon' bi'saan la, bi li lèbre bi'tetem.» <sup>31</sup> Nɛ \*Abraham tɔke' wɔ ki ye: «Ba paan' Uwien de' Moyis \*yiko wà nɔ bo, ka cenge' \*Uwien ya ñɔbonsɔknɓ ya gɛr la, unil mɛkre' bitɛnkpiib ni mɔnɔn la, ba ñ tuo kí lèbre bi'tetem.» »

## 17

### *La cère uba ñ tùre Uwien ya sɛn* (Matie 18:6-7, 21-22; Mark 9:42)

<sup>1</sup> \*Yesu tɔke' u'panpaankaab ki ye: «Nà li cère binib ñ tùre Uwien ya sɛn ña lí li lúo, ama wà li cère utɔ ñ tùre nɔ, ñi bre u'bo. <sup>2</sup> Bi bi taa' linèciɛnl kí jɔn' u'tule ni, kí ture' wɔ kí wiɛ' miñunciɛnm ni la, ñi bi li tu u'bo, nin wɔ ñ cère ibaan yiɛ ya uba ñ tùre Uwien ya sɛn. <sup>3</sup> Nɛn bo, li bɛn mɛn.

A'tɔ bii' ñɛ la, wuɔn wɔ u'biil. U tuo' kí ye u bii' la, á fère wɔ. <sup>4</sup> U bii' ñɛ uwien uba bolm milole, kí baa' a'saan bolm milole kí tɔke' kí ye u bii' ñɛ la, á fère wɔ.»

### *Mitekjim ya gɛr* (Matie 17:19-20)

<sup>5</sup> Nɛ u'tondb tɔke' wɔ ki ye: «Yonbdaan, cère ti'tekjim ñ yɛbre kí pukn.» <sup>6</sup> Nɛ u tɔke' bɛ ki ye: «Ni bi ñmɔbe mitekjim mí waa tɛn kusiiku kùà bi yih kù mutaar nɔ ya bim mɔnɔn la, ni bi li tɔke busubu buu kí ye bù ñ ñɛbe bu'ba kí tí caan miñunciɛnm ni, nɛ bù ñ tuo ni'ñɔbu bó.»

### *Utonsɔnl bi li sɔnh ma bo u'cɛnbaa ya bùol*

<sup>7</sup> «Ni'ni ñmɛ ñmɔbe utons�nl u koh wɔ bukpaabu bii u kpaah wɔ tiwɛnt, kí ñɛn' ni'bó ní la, u li tɔke wɔ kí ye: «Dɛn tonm kí lá ji?» <sup>8</sup> Na te nɔ. U li tɔke wɔ kí ye: «Lèbre a'kpɛlɛr, kí tien tijier, kí taa kí lá sien nni ñ ji kí ñu kí tí gben kí yaan a'mɔ ñ ji kí ñu.» <sup>9</sup> Utonsɔnl tien' u'cɛnbaa ye wɔ ñ tien nà la, u li de wɔ faala-aa? <sup>10</sup> Ni'mɔ yaam te nɔ nɛ. Ni tien' Uwien ye ní tien nà kɛ la, ní tɔke kí ye: «Ti yé bitonsɔnb bà ña nuunh bɛ ñ pèke te nɛ, ti tien' ti bi li tien nà nɛ.» »

### *Yesu cère' ijend piik lùore'*

<sup>11</sup> \*Yesu joh Yerusalem ma nɔ, nɛ kí ñɛn' Samari nin Galile ya tinbien. <sup>12</sup> U tí kɔh udu uba ni uyo wà nɔ, nɛ ijend piik tobreh wɔ usɛn bó, kí te fɔnfɔkm, <sup>13</sup> kí lienh ufaa bo kí teh: «Cɛnbaa Yesu, muɔ tɛ micɛɛkm.» <sup>14</sup> \*Yesu laa' yè nɛ kí tɔke' yè ki ye: «Li joh mɛn bitɔtuarkaab saan bɛ ñ tí fiin nɛ.»

I joh ma nɔ nɛ kí lùore'. <sup>15</sup> Bi'ni uba laa' u lùore' ma nɔ, nɛ kí liɛbe' ní kí lá pèkeh Uwien ufaa bo, <sup>16</sup> nɛ kí gbaan' \*Yesu ya nintuɔli, kí faare' wɔ. Ujɛ bugɛn yé Samari ya nil nɛ. <sup>17</sup> Nɛn saan nɛ \*Yesu ye: «Ijend piik nɔ kɛ ña lùore' bi? Biwɛ nɔ nín te lɛ saan-i? <sup>18</sup> Ucaan wuɔ baba ña ñi la, bi'ni uba mɔnɔn ña maale' wɔ ñ liɛbe ní kí kpiɛke Uwien-a!» <sup>19</sup> Nɛ kí tɔke' wɔ ki ye: «Fii, kí li joh, a'tekjim nɛ ñmien' ñɛ.»

### *Uwien ya bɛl li baa ní* (Matie 24:23-28, 37-41)

<sup>20</sup> \*Farisienmbɛ niire' \*Yesu ki ye: «Uwien ya bɛl li baa ní u lɛ yo ba?» Nɛ u tɔke' bɛ ki ye: «Uwien ya bɛl ya baam ña yé bonn nà binib lɛnh nɛ. <sup>21</sup> Ba ñ ye: «Liike mɛn lí te niɛ saan bii lí te niɛ bó.» Kimɛ Uwien ya bɛl te ni'ni nɛ.»

<sup>22</sup> Nε ki tɔke' u'panpaankaab ki ye: «Uyo uba we ní, ni'nun li mɔn ní tien Unil ya Bijε saan liwentunl liba mɔnɔn, ka rí lε wɔ. <sup>23</sup> Bi li tɔke nε kí ye: «Liike mɛn, u te niε bó,» bii «U te niε saan.» La jo mɛn, ki la jekbeh. <sup>24</sup> Kimε utemεknde ñeh kutaaku ya kele uba, ki muɔreh ki tí bàareh ukeltɔ ma bo nnɔ, Unil ya Bijε yaam mɔ li te nnɔ nε lidaali là u li baa ní nnɔ. <sup>25</sup> Ama nǐ kpε wɔ rí ji ijend kí gbien nε. Fɛnfennɔ ya nib li wiε u'gber nε kí yaan tibont nnɔ kε rí tien. <sup>26</sup> Nǐ là te ma bo Nowe ya yo nnɔ, Unil ya Bijε ya babaayo mɔ lá li te nnɔ nε. <sup>27</sup> Binib là jinh nε ki ñuh, bijεb kuɔndeh bipiib, bipiib mɔ kunh ticε, ki tí baa' lidaali là Nowe kɔn' buñercienbu, nε miwuɔm kɔn' ki jin' bi'kε. <sup>28</sup> Bii nǐ li te tɛn nǐ là te ma bo Lɔt ya yo nε. Binib là jinh nε ki ñuh, ki teh ukpenkpende, ki koh tikpàar, ki mɛh tidur. <sup>29</sup> Ama lidaali là Lɔt ñɛn' Sodɔm ya du ni nnɔ, nε umu nin mitɛnñɔkjiem ñɛn' paaki bó ní utaa yaam ki lá ku' bi'kε. <sup>30</sup> Lidaali là Unil ya Bijε lá li puɔ ni' bó ní nnɔ, nǐ li te nnɔ nε.

<sup>31</sup> «U ya yo wà te kudulekaaku ya paaki, u'wɛnt te kuduku ni la, u la jiiire kí kɔ kí taa tù. Wà mɔ te ikpàan bó la, u la liebe kí kun. <sup>32</sup> Tière mɛn Lɔt ya po bó. <sup>33</sup> Wà nuunh wɔ rí fie u'miel la, wɔn nε li kpo kí juore fɛnm. Wà li tuo kí kpo min bo nnɔ, wɔn nε li lε limiel. <sup>34</sup> N tɔkeh nε nε, ni'daali ya ñɔnku, binib bile li dɔ gado uba bo, bε rí taa uba kí dàan utɔ. <sup>35</sup> Bipiib bile li tε ki nàanh unεgɔn uba bo, bε rí taa uba kí dàan utɔ. <sup>36</sup> [Bijεb bile li te bukpàabu ni, bε rí taa uba kí dàan utɔ.]\*»

<sup>37</sup> Nε u'panpaankaab niire' wɔ ki ye: «Yonbdaan, nǐ li tien lε saan-i?» Nε u tɔke' bε ki ye: «Liwenkpil te nà saan la, inɛnyobl taakeh nɛn nε.»

## 18

### *Ukpopii uba nin tibuur ya nil uba ya gber*

<sup>1</sup> Nε \*Yesu pɔn' bε mikpenjɛnm, wɔ rí wuɔn bε kí ye nǐ mɔn bε rí li kàareh uyo kε nε, ki la cère bi'gbɛnɛnt rí ñɛnde. <sup>2</sup> U tɔke' ki ye: «Tibuur ya nil uba nε là te udu uba ni, ka fenge Wien, ka boh nib. <sup>3</sup> Ukpopii uba mɔ là te udu nnɔ ni, ki bàareh u'saan, ki tɔkeh wɔ ki teh: «Liike min nin n'ɛnnɛnd ya gber tuu kí kun nni imɔn.» <sup>4</sup> U tuu ki yienh nǐ tí wuɔke', nε u maale' u'yɛnm ni ki ye: «Nin ma fenge Wien, ka boh nib ma kε nnɔ, <sup>5</sup> n li kun wɔ imɔn nε, kimε u gbien' nni uyɛnñaabe nε. Ma kun' wɔ mɔn la, u li tuu ki bàareh nε n'yɛnm rí tí ñɛ n'ba ni.»»

<sup>6</sup> \*Yesu tí tɔke' u'panpaankaab ki ye: «Ni cii' tibuur ya nil wà ña buh buur tu'donbó nnɔ len' ma bo-a! <sup>7</sup> Uwien nε ña ji li kun u'ngendkaab bà muɔh ki yih wɔ ñɔnku nin wien ni nnɔ imɔn-ii? U li taande-ee? <sup>8</sup> N tɔkeh nε nε, u li kun bε imɔn na rí taande. Ama Unil ya Bijε lá li baa ní uyo wà nnɔ, u li biε kí lε binib ñmɔbe mitekjim kitink kíε bo-oo?»

### *Farisiɛn uba nin ulɛnpotekl uba ya gber*

<sup>9</sup> \*Yesu tí pɔn' mikpenjɛnm wɔ rí wuɔn binib bà maaleh ki teh bi cuube ki yindeh binitɔb nnɔ. <sup>10</sup> U ye: «Bijεb bile nε don' Uwien ya duku bó, bε rí tí kàare. Uba yé Farisiɛn, nε utɔ yé ulɛnpotekl. <sup>11</sup> Farisiɛn nnɔ se nε ki kàareh u'yɛnm ni ki teh: «Uwien, n faareh ñɛ nin ma te tɛn binitɔb te ma nnɔ bo. Ma suh, ka teh nà bre, ka teh nañmaal, ka te tɛn ulɛnpotekl wuɔ nɔ. <sup>12</sup> N lùoh buñɔbu bolm mile nε iwien ilole ni. N lenh nà kε nnɔ, n gbiinh nε bolm piik nε, ki taah miba ki dienh ñɛ.» <sup>13</sup> Ama ulɛnpotekl nnɔ, wɔn se fɔnfɔkm nε, ka kaabe wɔ rí yaare kí liike paaki bó mɔnɔn, ki gbiknh liyul ki teh: «O, Uwien muɔ min ubierdaan micεcεkm.» <sup>14</sup> N tɔkeh nε nε, Uwien bù' ulɛnpotekl nnɔ nε ugbemàndaan, u kun', nà yé Farisiɛn nnɔ, kimε wà kε kpiεkreh u'ba la, Uwien li yuɔn wɔ nε. Wà kε jiiindeh u'ba tingi la, Uwien li kpiεke wɔ nε.»

*Yesu nin mucɛnfɛndmu  
(Matie 19:13-15; Mark 10:13-16)*

\* **17:36** Bi kpiε' ki kele' tigbont tà nnɔ ya tuba ni migbiirm 36 ña te tu'ni.

15 Binib tukeh mucenfendmu ki bàareh \*Yesu saan ɲɔ wɔ́ rí taa u'nuɔ́ kí mɛ̀ mù. U'panpaankaab laa' nnɔ́ ma nnɔ́, nɛ̀ ki kɔ́nh nin bɛ̀. 16 Ama \*Yesu cère' bi taa' mù ki baa' u'saan, nɛ̀ u ye: «Cère mɛ̀n mubuwawaamu mù rí li bàareh n'saan. La piendeh mù mɛ̀n, kime binib bà te tɛ̀n mubumu nɛ̀ si Uwien ya bɛ̀l. 17 N tɔ́keh nɛ̀ imɔ́n nɛ̀, wà kɛ̀ ɲa teke' Uwien ya bɛ̀l ya gbɛ̀r kibuk yaam la, wa rí kɔ́ li'ni.»

### *Ufàadaan uba ya gbɛ̀r*

*(Matie 19:16-30; Mark 10:17-31)*

18 \*Sufmbɛ̀ ya ciɛ̀n uba niire' \*Yesu ki ye: «Cɛ̀nbaa wà mɔ́n, n li tien mila kí lɛ̀ limiel là ɲa ɲmɔ̀be gbenm-i?» 19 Nɛ̀ \*Yesu ye: «Bɛ̀ tien' a yih nni wà mɔ́n-i? Uwien baba ɲa rí la, uba ɲa mɔ́n. 20 A bɛ̀n iwɔ̀b yà ye: «La teh nanmaal, ki la ku nil, ki la suh, ki la nɛ̀ndeh nib bo, kí li boh a'naa nin a'baa nnɔ́.» » 21 Nɛ̀ uciɛ̀n nnɔ́ tɔ́ke' wɔ́ ki ye: «N boh ni'kɛ̀ haali n'buwaam ni nɛ̀.» 22 \*Yesu cii' nnɔ́ ma nnɔ́ nɛ̀ ki tɔ́ke' wɔ́ ki ye: «Nibonn niba biɛ̀ ki pɔ̀re' ɲɛ̀. Kuɔ̀re a ɲmɔ̀be tibont tà kɛ̀, kí taa ilike nnɔ́ kí de bijiinb, kí li ɲmɔ̀be lifaal paaki bó, ɲɔ́ kí baa kí lá paan n'bo.» 23 Ama u cii' nnɔ́ ma nnɔ́ nɛ̀ u'yɛ̀nm saa' ki gbien', kime u'faal yɛ̀be.

24 \*Yesu laa' u'yɛ̀nm saa' ma nnɔ́ nɛ̀ u ye: «Nì faa ki gbien' nin binib bà ɲmɔ̀be lifaal rí kɔ́ Uwien ya bɛ̀l ni. 25 Nì faa nin ufàadaan rí kɔ́ Uwien ya bɛ̀l ni ki cɛ̀n' nin ɲɔ́kma rí càare mikpɛ̀lpienbonm ni.» 26 Nɛ̀ binib bà cengeh u'bó nnɔ́ ye: «O, nì te nnɔ́ la, ɲmɛ̀ li fre kí ɲmɛ̀re?» 27 Nɛ̀ \*Yesu ye: «Binib nɛ̀ ɲa rí fre, Uwien wɔ́n ɲa gbɛ̀le' niba.»

28 Nɛ̀ Pìɛ̀r tɔ́ke' wɔ́ ki ye: «Tinbi wɔ́n la, ti dàan' ti'faal nɛ̀ ki paan' a'bo-a!» 29 Nɛ̀ \*Yesu tɔ́ke' bɛ̀ ki ye: «N tɔ́keh nɛ̀ imɔ́n nɛ̀, unil wà kɛ̀ dàan' u'den bii u'po bii u'ninjiɛ̀b bii u'naa bii u'baa bii u'bumu, Uwien ya bɛ̀l bo la, 30 u li lɛ̀ haali kí tì gèbre tibont tà kɛ̀ u dàan' tù nnɔ́ fɛ̀nfɛ̀nnɔ́ wuɔ́ nɔ́. Nɛ̀ uyo wà we ní nnɔ́, u li lɛ̀ limiel là ɲa ɲmɔ̀be gbenm mɔ́.»

### *Yesu len' u'kuum nin u'mɛ̀krm bó nta bo*

*(Matie 20:17-19; Mark 10:32-34)*

31 \*Yesu nin u'panpaankaab piik nin bile nnɔ́ cuonh ki joh, nɛ̀ u tɔ́ke' bɛ̀ ki ye: «Li cengeh mɛ̀n, ti doh Yerusalem bó sɔ́, \*Uwien ya ɲɔ̀bonsɔ́knb là kɛ̀le' nà kɛ̀ Unil ya Bijɛ̀ bo nnɔ́ li tien nɛ̀. 32 Kime bi li taa wɔ́ kí ɲukn bà ɲa yé Sufmbɛ̀, bɛ̀ rí lè wɔ́, kí jènde wɔ́, kí cère u'bo tiñinsɛ̀nt, 33 kí ɲì wɔ́ inalɛ̀be, kí yaan kí ku wɔ́, nɛ̀ wienta daali wɔ́ rí mɛ̀kre bitɛ̀nkpiib ni.» 34 U'panpaankaab nnɔ́ ɲa cii' ni'tingi, kime iñɔ̀bon nnɔ́ ya tingi buɔ́ nɛ̀, nɛ̀ ba bɛ̀nde' ì ye yè rí ye bà.

### *Yesu likre' ujuɔ́n uba*

*(Matie 20:29-34; Mark 10:46-52)*

35 \*Yesu tì nɛ̀kn' Seriko ya du ni. Ujuɔ́n uba là te udu nnɔ́ ni, ki kaah sɛ̀ngbaal ki miɛ̀h binib tibont. 36 U cii' linigol gèbreh ma nnɔ́ nɛ̀ u niire' ki ye: «Bɛ̀ teh nɔ́?» 37 Nɛ̀ bi tɔ́ke' wɔ́ ki ye: «Nasaret ya \*Yesu nɛ̀ gèbreh.» 38 Nɛ̀ u yin' ufaa bo ki ye: «Yesu, \*Dafid ya yaabile, muɔ́ nni micɛ̀cɛ̀km.» 39 Binib bà le \*Yesu usɛ̀n nnɔ́ tɛ̀ngɛ̀h u'bo ki teh wɔ́ rí ɲmile, ama u tùɔ̀reh ki wuureh nɛ̀ ki teh: «\*Dafid ya yaabile, muɔ́ nni micɛ̀cɛ̀km.» 40 Nɛ̀ \*Yesu sere' ki ye bɛ̀ rí taa wɔ́ ní. U nɛ̀kn' \*ma nnɔ́ nɛ̀ Yesu niire' wɔ́ ki ye: 41 «A yíe rí tien bà kí de ɲɛ̀?» Nɛ̀ u ye: «Yonbdaan, n yíe rí likre nɛ̀.» 42 Nɛ̀ \*Yesu ye: «Likre, a'tekjim nɛ̀ ɲmien' ɲɛ̀.» 43 U likre' i ya tãan bo, nɛ̀ ki paan' u'bo, ki pèkeh Uwien. Binib nnɔ́ kɛ̀ laa' nnɔ́ ma nnɔ́ nɛ̀ ki mɔ́ pèkeh Uwien.

## 19

### *Uɛ̀npotekl uba teke' Yesu u'den*

1 \*Yesu kɔ́n' Seriko ya du ni, ki joh wɔ́ rí càare. 2 Ujɛ̀ uba là te len, bi yih wɔ́ Sase, u yé bilɛ̀npotekb ya ciɛ̀n nɛ̀, ki yé ufàadaan mɔ́, 3 ki nuunh wɔ́ rí lɛ̀ \*Yesu kí bɛ̀nde wɔ́. Ama linigol te ma nnɔ́, wa fre' ki laa' wɔ́, kime u yé kinijenjenk nɛ̀. 4 Nɛ̀ u sɛ̀n' ki liere' usɛ̀n ki tì don' busubu buba, \*Yesu li gèbre nà saan, ɲɔ́ u lá gèbreh la, wɔ́ rí lɛ̀ wɔ́. 5 \*Yesu tì baa'

ni'saan, ki yaare' ki liike', nε ki tōke' wō ki ye: «Sase, jiiire ní tonm, kimε dinnō wuō nō nī kpe ní gō a'den nε.»

<sup>6</sup> U jiiire' ní tonm, nε ki teke' \*Yesu nin uyεnsōnge. <sup>7</sup> Linigol nnō laa' nnō ma nnō nε bi'ke bunbeh ki teh: «U jon' ki tī càan' ubierdaan nε.»

<sup>8</sup> Nε Sase fii', ki sere', ki tōke' Yonbdaan ki ye: «Yonbdaan a ben-ii! N li gbiire n'faal mile kí taa miba kí de bijiinb. N là jin' unil ya bonn la, n li jiiin nè bolm minan nε kí de udaan.»

<sup>9</sup> Nε \*Yesu tōke' wō ki ye: «Dinnō Uηmienl baa' iden yii, kimε a'mō yé \*Abraham ya yaabil nε. <sup>10</sup> Unil ya Bijε baa' wō ní lá nuun bà bole' nε, kí ηmien bε.»

### *Bitonsōnb bita ya kpenjεnm*

*(Matie 25:14-30)*

<sup>11</sup> Binib bà cengeh \*Yesu ya gber nnō maaleh ki teh u nεke Yerusalem ma nnō, bi li pōk kí lε Uwien ya bεl i ya tãan bo nε, nε u tí pōn' bε mikpenjεnm, <sup>12</sup> ki ye: «Unikpekpiεk uba là yíe wō ní jo udu uba bó nī fōke, bε ní tī jin wō libel wō ní liebe ní. <sup>13</sup> Nεn saan nε u yin' u'tonsōnb piik, ki de' unil kε milikbim, nε ki tōke' bε ki ye: «Taa mēn kí li teh ukpenkpende, kí tī baa uyo wà n li liebe ní.» <sup>14</sup> U'du ni ya nib là nēn wō, nε ki sōn' binib ki ye bε ní upaan u'bo kí tī tōke ubεrcien kí ye: «Ta yíe uje wuō ní li ye tí'ber.» <sup>15</sup> Ama u jin' libel nnō, ki liebe' ki kun' ní, nε ki yin' u'tonsōnb bà u là de' bε ilike nnō ηō wō ní liike wà kε tien' ukpenkpende, ki laa' kpele wà. <sup>16</sup> Ukpiεk baa', ki lá tōke' wō ki ye: «Cεnbaa, a là de' nni milikbim mà nnō, n taa' mè ki tien' ukpenkpende, ki laa' piik ki pukn'.» <sup>17</sup> Nε u tōke' wō ki ye: «Nī mōn. A yé utonsōnmōnmōn nε. A tien' unimōn nibonwawaann ni ma nō, n li cère a li likeh idu piik.» <sup>18</sup> Nε nle mō baa', ki lá tōke' wō ki ye: «Cεnbaa, a là de' nni milikbim mà nnō, n taa' mè ki tien' ukpenkpende, ki laa' miηun ki pukn'.» <sup>19</sup> Nε u tōke' u'mō ki ye: «Li yé idu iηun ya cien.» <sup>20</sup> Nε utō mō baa', ki lá tōke' wō ki ye: «Cεnbaa, liike, a'likbim nnō sō. N là pōbn' mè kukpεlcieku ni nε ki bōle'. <sup>21</sup> Kimε n fεnge ηε nε. A'gber faa nε, a yuunh ηa ble' nà, nε ki ceh ηa bule' nà.» <sup>22</sup> Nε u tōke' wō ki ye: «Utonsōnbierō sin, a len' ki lòle' a'ba nε. N li nī nēn bo nε kí bu ηε tibuur. A ye a ben n'bó, n'gber faa nε, n yuunh ma ble' nà, nε ki ceh ma bule' nà. <sup>23</sup> Bε tien' ηa nín taa' n'like ki tī ble' banki n lá baa' ní la, ní lε n'like nin kpele kí pukn-i?» <sup>24</sup> Nε ki tōke' bà te ni'saan nnō ki ye: «Fie mēn u'saan milikbim nnō, kí taa kí pukn wà ηmōbe milikbim piik nnō.» <sup>25</sup> Nε bi tōke' wō ki ye: «Cεnbaa, u ηmōbe milikbim piik-a!» <sup>26</sup> Nε u ye: «N tōkeh nε nε, wà kε ηmōbe la, bi li de wōn nε kí pukn. Wà ηa ηmōbe la, bi li tonde kí fie u ηmōbe nà waamu nnō mōnōn nε. <sup>27</sup> N'nennendb ben wōn, ba là yíe ní li yé bi'ber. Nēn bo, taa mēn bε ní, kí lá kōkōre bε n'nun bó.» »

### *Binib kpiεkreh Yesu u tī kōn' Yerusalem ni*

*(Matie 21:1-11; Mark 11:1-11; San 12:12-19)*

<sup>28</sup> \*Yesu pōn' bε mikpenjεnm nnō ki tī gben', nε ki liere' bε usen bi doh Yerusalem bó. <sup>29</sup> U tī nεkn' Bεtifaaje nin Betani ya du. I te lijuəl liba saan nε, bi yih lè Olifi ya siin ya juəl. Nēn saan nε u sōn' u'panpaankaab bile <sup>30</sup> ki ye: «Li joh mēn udu wà te inun bó nō ni. Ni tī kōn' u'ni la, ni li lε uηuunfanfaan uba lùo. Uba ηa laan jèke' wō. Ní lore wō kí taa ní. <sup>31</sup> Unil niire' nε ki ye bε tien' ni loreh wō la, ní tōke wō kí ye: «Yonbdaan nε cieke wō.» »

<sup>32</sup> \*Yesu sōn' bà nnō, bure' ki tī laa' tibont nnō kε te tēn u bi tōke' bε ma bo. <sup>33</sup> Bi loreh uηuunfanfaan nnō uyo wà nnō, nε u'dēnb niire' bε ki ye: «Bε tien' ni loreh wō?» <sup>34</sup> Nε bi jiiin' bε ki ye: «Yonbdaan nε cieke wō.» <sup>35</sup> Nε ki tuke wō ki baa' \*Yesu saan, nε ki taa' bi'liergbengt ki paan' uηuunfanfaan nnō bo, ki cère' \*Yesu jèke'. <sup>36</sup> U joh ma nnō nε binib taah bi'liergbengt ki pèreh usen ni. <sup>37</sup> U tī nεkn' Yerusalem ki baa' Olifi ya siin ya juəl ya tintindbùol, nε u'panpaankaab kε ligol cin' ki poknh, ki lienh ufaa bo ki pèkeh Uwien bi là laa' \*Yesu tien' miyōkm ya bont tà kε nnō bo,

<sup>38</sup> ki wuureh ki teh:

«Uwien ya mōnm ní li te

uber wà we ní Yonbdaan ya yel bo nnō bo.



Uyenduɔn ɔ́ li te paaki bó,  
pèke mɛn Uwien paaki bó.»

<sup>39</sup> \*Farisienbɛ bà te linigol nnɔ́ ni ya biba tɔke' \*Yesu ki ye: «Cɛnbaa, tɔke a'panpaankaab biɛ bɛ ɔ́ ɔ́mɛ.» <sup>40</sup> Nɛ \*Yesu tɔke' bɛ ki ye: «N tɔkeh nɛ nɛ, bi ɔ́mɛ' mɔnɔn la, itɛn li wuure kí pèke nni nɛ.»

### *Yesu muɔh Yerusalem bo*

<sup>41</sup> \*Yesu nɛkn' Yerusalem ya du, ki laa' wù ma nnɔ́ nɛ ki muɔh u'bo, <sup>42</sup> ki teh: «Yerusalem, a bi bɛn uyenduɔn ya sɛn dinnɔ́ la, nɔ́ bi li mɔn a'bo. Ama fɛnfɛnnɔ́ ɔ́a ji li ɛ wù, kimɛ u buɔ́ nɛ. <sup>43</sup> Uyo uba we ní a'nɛnnɛndb lá li n̄ɛ ni'kɛ bó ní kí lá jebe ɔ́ɛ, <sup>44</sup> kí ku a'nib kɛ, kí bere a'dur kɛ, ka ɔ́ cɛrɛ tɛnl liba ɔ́ juore kí li pɛ tɔl bo, kimɛ ɔ́a bɛnde' uyo wà Uwien baa' wɔ́ ɔ́ tore ɔ́ɛ.»

### *Yesu ɔ́rɛ' ikpenkpend Uwien ya duku ya luo bo* (Matie 21:12-17; Mark 11:15-19; San 2:13-22)

<sup>45</sup> \*Yesu kɔ́n' Uwien ya duku ya luo bo, nɛ ki cin' ki ɔ́uɔh bà kuɔreh tibont u'bo nnɔ́ ki n̄ɛndɛh.

<sup>46</sup> Nɛ ki tɔkeh bɛ ki teh:  
«Nì kɛle' \*Uwien ya gbɔ́nku ni ki ye:  
«N'duku li yé ikaare ya duku nɛ,  
ama ninbi taa' kù ki tien' binasub ya tantaanbùol nɛ.» »

<sup>47</sup> Idaan kɛ \*Yesu te Uwien ya duku ya luo bo nɛ, ki wɔ́knɛ binib Uwien ya gbɛr. Nɛ bitɔtuɔrciɛnb nin \*Yiko ya wɔ́nwɔ́knɛ nin \*Sufmbɛ ya ciɛnb nuunh bɛ ɔ́ ku wɔ́, <sup>48</sup> ka laa' bi li n̄ɛ isɛn yà, kimɛ binib kɛ ya nun mɔ́n bɛ ɔ́ cenge u'gbɛr nɛ.

## 20

### *Bi niire' Yesu wà de' wɔ́ usɛn wɔ́ ɔ́ tien u teh nà nɔ́* (Matie 21:23-27; Mark 11:27-33)

<sup>1</sup> Lidaali liba nɛ \*Yesu te Uwien ya duku ya luo bo, ki wɔ́knɛ binib Uwien ya gbɛr, ki tɔkeh bɛ tigbɛmɔnmɔnt, nɛ bitɔtuɔrciɛnb nin \*Yiko ya wɔ́nwɔ́knɛ nin \*Sufmbɛ ya ciɛnb baa', <sup>2</sup> kí lá niire' wɔ́ ki ye: «Tɔke tɛ, a ɔ́mɔbe usɛn a tien' a teh nà nɔ́-ɔ́ɔ́? N̄mɛ nɛ de' ɔ́ɛ u ya sɛn-i?» <sup>3</sup> Nɛ u jii'n' bɛ ki ye: «N'mɔ́ li niire nɛ iniire iba nɛ. Tɔke nni mɛn. <sup>4</sup> San là siih binib Uwien ya n̄unm ma nnɔ́, ɔ́mɛ là de' wɔ́ usɛn-i? Uwien bii binib nɛ?»

<sup>5</sup> Nɛn saan nɛ bi tɔkeh tɔb ki teh: «Ti ye Uwien nɛ de' wɔ́ usɛn la, u li niire tɛ kí ye: «Bɛ tien' ta là teke' wɔ́ ki jin'-i?» <sup>6</sup> Ti tí ye binib nɛ de' wɔ́ usɛn la, linigol liɛ li yèke tɛ itɛn kí ku tɛ, kimɛ bi'kɛ tuo' ki ye San là yé \*Uwien ya n̄ɔ́bonsɔ́knl nɛ.» <sup>7</sup> Nɛ bi jii'n' \*Yesu ki ye ba bɛn wà là de' San usɛn. <sup>8</sup> Nɛ u'mɔ́ ye: «N'mɔ́ ɔ́a bɛn, ka ɔ́ tɔke nɛ wà de' nni usɛn ɔ́ tien n teh nà nɔ́ mɔ́.»

### *Bikpàab bà bre ya kpenjenm* (Matie 21:33-46; Mark 12:1-12)

<sup>9</sup> Ni ya puoli bó nɛ u pɔ́n' binib mikpenjenm ki ye: «Ujɛ uba nɛ là ɔ́mɔbe bukpàabu, ki caan' bukpàabu nnɔ́ ni tisir tà bi taah tu' bii ki ɔ́ɛh fɛn nnɔ́, ki taa' bù ki guun' bukpàab biba, nɛ ki bure' usɛn, ki t̄ wuɔke' ni'bó. <sup>10</sup> Uyo wà isibii nnɔ́ t̄ ben' nnɔ́, nɛ u sɔ́n' utonsɔ́nl uba bukpàab nnɔ́ saan bɛ ɔ́ t̄ de wɔ́ u ya bó ní. Ama bukpàab nnɔ́ t̄ n̄i' wɔ́, ki ɔ́rɛ' wɔ́ u bure' inɔ́pien. <sup>11</sup> Nɛ u tí sɔ́n' utonsɔ́ntɔ́, bi tí n̄i' u'mɔ́, ki suke' wɔ́, ki ɔ́rɛ' u'mɔ́ u bure' inɔ́pien. <sup>12</sup> Nɛ u tí liɛbe' ki sɔ́n' nta, bi tí n̄i' u'mɔ́ ki bunbunge' wɔ́, nɛ ki ɔ́rɛ' wɔ́. <sup>13</sup> Nɛ ukpɛdaan nnɔ́ ye: «N li tien mila? N li sɔ́n n'bijɛ wà n yíe wɔ́ nɛ. Nba la, bi li t̄ bo wɔ́n.» <sup>14</sup> Ama bukpàab nnɔ́ laa' u'bijɛ nnɔ́ we ní ma nnɔ́, nɛ bi tɔke' tɔb ki ye: «Wɔ́n nɛ yé u'faajil, cɛrɛ mɛn tí ku wɔ́ ɔ́ lifaal nnɔ́ ɔ́ juore tí'yaal.» <sup>15</sup> Nɛ bi n̄ɛn' wɔ́ ukpɛgbɛ, ki t̄ ku' wɔ́.

«Nɛn bo ukpɛdaan nnɔ́ li tien bɛ mila? <sup>16</sup> U li baa kí lá ku bukpàab nnɔ́, nɛ kí taa bukpàabu nnɔ́ kí guun bukpɛtɔb.»

Linigol nnɔ́ cii' u len' nnɔ́ ma nnɔ́, nɛ bi ye: «Uwien la cɛrɛ nɛ ɔ́ tien.»

17 \*Yesu caan' bi'bo inun ne ki ye: «Na te nnɔ la, na kele' \*Uwien ya gbɔnku ni ki ye: <Litɛnl là bidumɛb wie' lè nnɔ, len ne lá tien' litɛnkpiekɩ là co kuduku> nnɔ ya tingi si ba?»  
 18 Wà ke lu' litɛnl nnɔ bo la, u li kòkuɔ ne. Litɛnl nnɔ lu' wà mɔ bo la, li li memere wɔ ne.  
 19 \*Yiko ya wɔnwɔknɔb nin bitɔtuɔrcienɔb bende' ki ye \*Yesu pɔn' ben ne mikpenjenm nnɔ. Nen bo ne bi nun mɔn be ní cuo wɔ i ya tãan bo, ne ki fenge' linigol nnɔ.

*Sesa ya lenpolike*

*(Matie 22:15-22; Mark 12:13-17)*

20 U ya yo ne bi cin' ki pingeh Yesu, ne ki sɔn' biffinfinɔb biba u'saan, be ní li teh ten bi yé binimɔnb ne ki yíe be ní cenge u'gber, nɔ kí dule u'lenm bo kí cuo wɔ, kí nɔkn udu nnɔ ya gobina. Wɔn ne nɔmɔbe mituɔm udu nnɔ bo. 21 Ne bi baa' ki lá niire' wɔ ki ye: «Cɛnbaa, ti ben ki ye a lienɩ ná nin a wɔknɩ binib ná ke nnɔ cuube ne, ki ben ki ye nɔ boh uba ki cen' utɔ, ki wɔknɩ mɔnmɔnm binib li tien ma kí li pɛ Uwien ya sen bo. 22 Tɔke tɛ, ti nɔmɔbe usen tí li pèh lenpo ki dienɩ ubercien Sesa bii ta nɔmɔbe?»

23 Ama \*Yesu ben bi'cekn ne ki tɔke' be ki ye: 24 «Wuɔn nni mɛn milikbim miba.» Bi wuɔn' wɔ, ne u niire' be ki ye: «Nɔmɛ si kunɛnnɛnku nin liyel là te mi'bo nɔ?» Ne bi ye: «Ubercien Sesa.» 25 Ne u tɔke' be ki ye: «Taa mɛn ná yé Sesa yaann kí de Sesa, kí taa ná mɔ yé Uwien yaann kí de Uwien.» 26 Ba fre' ki laa' bi li dule ná bo kí cuo \*Yesu u'lenm ni binib ya nun bó. U'lenm ni, u jiin' bi'niire ma bo nnɔ cuo' be miyɔkm, ne ba ji ye niba.

*Bitɛnkpib ya mɛkrm ya gber*

*(Matie 22:23-33; Mark 12:18-27)*

27 Saduseyɛnmbɛ biba mɔ nekɩ' Yesu. Ben ne lienɩ ki teh bitɛnkpib nɔ ní mɛkre nnɔ. Bi niire' wɔ 28 ki ye: «Cɛnbaa, Moyis là kele' yiko ki de' tɛ ki ye: <Unil ya ninjɛ kpo' ki cɛrɛ u'po, ka nɔmɔbe buk la, wɔ ní kere ukpooii nnɔ, kí maa mubumu kí de u'ninjɛ wà kpo' nnɔ.> 29 Tɔ, ninjɛb bilole biba ne là te, ne ukpɛk lá kuɔn' upii, ki kpo', ka maa' buk. 30 Ne ulie kere' ukpooii nnɔ, ki mɔ kpo', ka maa' buk. 31 Nta mɔ tien' nnɔ, ki mɔ kpo', ka maa' buk. Bi teteh nnɔ ne jɛb bilole nnɔ ke tí kuɔn' upii nnɔ ki bɔn', ki kpo', ka maa' buk. 32 Upii nnɔ mɔ tí fɔrɛ' ki kpo'. 33 Tɔ, bitɛnkpib lá mɛkre' uyo wà la, nɔmɛ li si upii nnɔ? Kimɛ bi'ke bilole kuɔn' wɔ ki tí bɔn' ne.»

34 Ne \*Yesu tɔke' be ki ye: «Uɛɛndun wuu ni ne bijɛb kuɔndeh bipiib, bipiib kunh ticɛr. 35 Ama binib bà Uwien ye bi kpɛ be ní mɛkre bitɛnkpib ni, kí li yé uɛɛndun wà we ní yaab nnɔ; wun ni jɛb nɔ ní kuɔn piib, bipiib mɔ nɔ ní kun cɛr. 36 Ba ji li kpo, kimɛ bi li te ten Uwien ya tonɔb ne. Bi li mɛkre ma nnɔ, bi li yé Uwien ya bumu ne. 37 Moyis mɔnɔn là wuɔn' tɛ ní wien ki ye bà kpo' li mɛkre. U laa' ná saan kufɛtuku kuba kù teknh umu ka wih nnɔ, u yin' Yonbdaan ki ye \*Abraham nin \*Isaak nin Sakɔb ya Wien ne. 38 Uwien nɔ yé tenkpib ya Wien, u yé bà fuobe ya Wien ne, kimɛ wɔn bo bi'ke fuobe ne.»

39 Ne \*Yiko ya wɔnwɔknɔb biba tɔke' \*Yesu ki ye: «Cɛnbaa, a len' mɔnmɔnm.» 40 Ne uba nɔ ji kaabe' wɔ ní niire wɔ niire niba bo.

*Uwien ya Nigɛndkɛ Kristo nin Dafid ya gber*

*(Matie 22:41-46; Mark 12:35-37)*

41 Ne \*Yesu niire' be ki ye: «Nì tien' mila, binib lienɩ ki teh Uwien ya Nigɛndkɛ Kristo yé \*Dafid ya yaabil-i? 42 Kimɛ \*Dafid bugben là len' Uwien ya yuon ya gbɔnku ni ki ye: <Yonbdaan Uwien tɔke' n'Yonbdaan ki ye:

Kɛle n'nojie bó,

43 kí tí baa uyo wà n li cɛrɛ á tɛ a'nɛnnɛndɔb bo litaal.>

44 \*Dafid yih \*Uwien ya Nigɛndkɛ Kristo u'Yonbdaan la, u ji tien' mila ki liɛbe' ki yé u'yaabil mɔ?»

*Li ben mɛn Yiko ya wɔnwɔknɔb bó*

*(Matie 23:1-36; Mark 12:38-40)*

<sup>45</sup> Linigol nnɔ cengeh \*Yesu ya gber, nɛ u tɔke' u'panpaankaab ki ye: <sup>46</sup> «Li ben men \*Yiko ya wɔnwɔknɔ bɔ. Bi yie be ɔ li guoh tiliɛrgbengt nɛ ki gaakeh, ki yie binib ɔ li gbaandeh ki fuondeh be mudaamu ni, ki yie be ɔ li kaah binikpɛkpiɛkb ya kɔnkɔan itɔan ya dur nin tinacent ni. <sup>47</sup> Ben nɛ jinh ki pendeh bikpopiib, ki kɔareh ni wuɔkreh ɔ binib ɔ ye bi yie binimɔnb. Uwien li dere bi'tub kɔ gbien kɔ cɛn binitɔb.»

## 21

### *Ukpopiicɛɛkdaan uba ya pum* (Mark 12:41-44)

<sup>1</sup> \*Yesu liike', ki laa' bifaaɛnb bɔareh ki kpɛndeh ilike Uwien ya pum ya likkpienbɔol, <sup>2</sup> ki laa' ukpopiicɛɛkdaan uba mɔ baa' ki lɔ kpɛn' milikbim mile. <sup>3</sup> Nɛ u ye: «N tɔkeh nɛ imɔn nɛ, ukpopiicɛɛkdaan wuɔ kpɛn' ilike ki cɛn' bi'ke. <sup>4</sup> Kimɛ bi'ke de' ka pɔkre' bi'like ya pɔkl. Ama wɔn yie ucɛɛkdaan nɛ, nɛ ki tonde' u ɔmɔbe nɔ ke nnɔ ki baa', ki lɔ kpɛn'.»

### *Bi lɔ li bere Uwien ya duku* (Matie 24:1-2; Mark 13:1-2)

<sup>5</sup> Binib lienh Uwien ya duku ya gber ki teh bi taa' iten yɔ ki men' kɔ nnɔ nin binib pun' Uwien tibont tɔ, bi taa' ki tien' ku'ni nnɔ mɔn cɛen. Nɛ \*Yesu tɔke' be ki ye: <sup>6</sup> «Ni likeh nɔ nɔ, uyo uba we ni, tenl ɔa ɔ juore kɔ li pɛ tɔl bo, bi li bere ni'ke nɛ.»

### *Ijend ya yo lɔ li te ma bo* (Matie 24:3-14; Mark 13:3-13)

<sup>7</sup> Nɛ bi niire' wɔ ki ye: «Cɛnbaa, ni li tien nnɔ u le yo ba? Ku le dɛku ba li wuɔn te kɔ ye uyo baa'?» <sup>8</sup> Nɛ u jiin' be ki ye: «Li ben men, ki la cɛre uba ɔ tuln nɛ. Kimɛ binib lɔ li baa ki yebe, kɔ li ɔmɔbe n'yel ki teh bi yie min nɛ, kɔ tɔke kɔ ye uyo nnɔ baa' ɔ. Ni la paan bi'bo. <sup>9</sup> Ni lɔ cii' binib tɔh lituɔl kɔnkɔnm, ki cii' binib yienh bi'berb ya ɔuɔn bɔ la, ni la cɛre nɛ ɔ cuo nɛ jɛwaanbu, kimɛ tu ya bont ke li tien nɛ kɔ yaan. Ama na yie uɔendun li pɔk kɔ gben i ya tɔan bo nɛ.»

<sup>10</sup> Nen saan nɛ u tɔ tɔke' be ki ye: «Linibol liba li jɛke linibotɔl. Libel liba ya nib mɔ li jɛke libetɔl yaab. <sup>11</sup> Kitink li jenge kɔ gbien, nɛ mikɔnm nin iwienbiere mɔ ɔ lu bɔol, bɔol. Micincilncienm li tien kutaaku bo.

<sup>12</sup> «Ama kɔ yaan nen ke ɔ tien nnɔ, bi li cuo nɛ, kɔ jende nɛ, kɔ cɛre be ɔ bu nɛ tibuur \*Sufmbe ya tɔan ya dur ni, kɔ taa nɛ kɔ jon lipɛkl. Min bo nɛ bi lɔ li tuke nɛ kɔ jon tibuur biberb nin idu ya cɛnb saan. <sup>13</sup> Nnɔ nɛ ni li yie n'mɔnkunb bi'saan. <sup>14</sup> Taa men kɔ ble ni'yul ni kɔ ye na ɔ li nuunh ni li tɔ len ma kɔ ɔmɛre. <sup>15</sup> Kimɛ min nɛ li tɔke nɛ, ni li tɔ len ma bo nin miyɛnfuom, ɔ ni n'ɛnnɛndb ya uba la fre kɔ niɛ nin nɛ, ki la fre kɔ len kɔ jiin nɛ. <sup>16</sup> Haali ni'baambe nin ni'naambe nin ni'ninjieb nin ni'yaab nin ni'jɔtieb mɔnɔn li kuɔre nɛ. Nɛ bi li ku ni'ni biba. <sup>17</sup> Min bo nɛ binib ke li nen nɛ. <sup>18</sup> Ama ni'ni uba mɔnɔn ya yul ɔa ɔ gɔare. <sup>19</sup> Ni mɔnde' ijend ke ni la, ni li le limiel lɔ ɔa ɔmɔbe gbenm.»

### *Bi lɔ li bere Yerusalem ya du* (Matie 24:15-21; Mark 13:14-19)

<sup>20</sup> «Ni lɔ laa' sojambe jebe' Yerusalem ya du uyo wɔ la, li ben men kɔ ye bi li bere wɔ, na ɔ taande. <sup>21</sup> Uyo nnɔ lɔ baa' la, bɔ te Sude ya tinfenm ni nnɔ, be ɔ sen kɔ jo ijuɔn bɔ. Bɔ mɔ te Yerusalem ni la, be ɔ sen kɔ ɔ nɛ u'ni. Bɔ mɔ te idugbaan bɔ la, bi la ji ɔ kɔ udu ya benku ni. <sup>22</sup> Kimɛ u ya yo nɛ Uwien li dere Yerusalem ya nib ya tub, ɔ nɔ ke kɛle' \*Uwien ya gbɔnku ni nnɔ ɔ tien. <sup>23</sup> U ya yo, bipiib bɔ punbe' nin bɔ ɔmɔbe mubumu mɔa ɔaanh, li ɔmɔbe micɛɛkm nɛ, kimɛ Uwien ya benku ni ben' udu nnɔ ya nib bo ma nnɔ, bi li jende kɔ gbien. <sup>24</sup> Bi li ku biba nin kijusiek, kɔ cuo bitɔb kɔ jon inibol ke ya du bɔ, nɛ bɔ ɔa yie \*Sufmbe nnɔ li ɔuuke Yerusalem bugben kɔ tɔ baa uyo wɔ Uwien sien' nnɔ.»

### *Unil ya Bijɛ ya baam ya gber* (Matie 24:29-31; Mark 13:24-27)

<sup>25</sup> «Micincilm ya bont li tien uwien nin unmaal nin inmaabii bo. Inungbegbel li fii miñunciem bo, kí li ñmabe kuwaaku kí gbien, kí ñaabe binib ya yem ba ji li ben bi li tien ma. <sup>26</sup> Tibont tà ñmabe paaki bó mituam li jenge, binib li maaleh ná li tu unendun wuu nò bo ne bi'fèl ní sen kí tí kende. <sup>27</sup> U ya yo ne bi li le Unil ya Bijé te kutewalgbanku ni, ki we ní, ki ñmabe ufaa nin ukpíeke ki gbien'. <sup>28</sup> Ni lá laa' tu ya bont ke cin' ki teh la, ní cuo ni'ba, kí cère ni'yul ní li ce, kime ni'ñmenmeryo nek'n ní ño.»

### *Bukenkenbu ya kpenjem*

<sup>29</sup> Yesu tí pón' be mikpenjem ki ye: «Sekn men bukenkenbu nin isito ke. <sup>30</sup> Ni lá laa' i bundeh la, ninbi nin ni'yul ben kí ye ni neke uñalend ne. <sup>31</sup> Ni'mo yaam te nno ne. Ni lá laa' tibont nno teh la, ní li ben kí ye Uwien ya bel nek'n ní ño.

<sup>32</sup> «N takeh ne imàn ne, tibont nno ke li tien, kí le fenfennò ya nib bié ña laan kpo' ki gben'. <sup>33</sup> Kutaaku nin kitink li gben, ama n'gber tun ña ñmabe tù ní gben.»

### *La gòh men ño Unil ya bijé ya baam la pìln ne*

<sup>34</sup> «Liike men ni'yul bo, ki la cère tideyibr nin ujinciem nin unendun ya bont ya nuunm ní yebre ni'fèl ni ño Unil ya Bijé ya babaadaali la pìln ne, <sup>35</sup> ten bubebu pìlndeh ijén ma bo, kime Unil ya Bijé ya baam li ci binib bà ke te utingben bo ne. <sup>36</sup> La gòh men, kí li kàareh uyo ke, ño kí le mituam kí ñe ijend yà ke we ní nno ni, kí fre kí sere Unil ya Bijé ya nun bó.»

<sup>37</sup> Uwien ni la, \*Yesu te Uwien ya duku ya luo bo ne ki wòknh binib Uwien ya gber, ne ni biire' la, u joh ki tí gòh Olifi ya siin ya juál bo. <sup>38</sup> Ne udu ya nib ke bàareh u'saan Uwien ya duku ya luo bo kutenñesansanku ki cengeh u'gber.

## 22

### *Bi kpaan' iye be ní ku Yesu*

*(Matie 26:1-5, 14-16; Mark 14:1-2, 10-11; San 11:45-53)*

<sup>1</sup> Kpónò wà ña ñmabe ñòke ya nacenku kùà bi yih kù \*Sufmbé ya Pak nno nek'n ní. <sup>2</sup> Ne bitatuarcienb nin \*Yiko ya wónwòknb nuunh bi li tien ma kí ku Yesu, ne ki ji fenge udu ya nib.

### *Sudas yie wò ní kuare Yesu*

*(Mark 14:10-11; Matie 26:14-16)*

<sup>3</sup> Nen saan ne \*Satan kón' Sudas Iskariyot ya fèl ni. U yé \*Yesu ya panpaakaab piik nin bile nno ya uba ne. <sup>4</sup> U jon' bitatuarcienb nin Uwien ya duku ya guguurb ya cienb saan, wò ní tí tòke be u li tien ma kí taa \*Yesu kí ñukn be. <sup>5</sup> Bi'yem sònge' ceen, ne bi kpaan' buñabu ki ye bi li de wò ilike. <sup>6</sup> U tuo', ne ki nuunh u li ñe isen yà kí taa \*Yesu kí ñukn be ki la cère linigol nno ní bende.

### *Yesu nin u'panpaankaab jele' Sufmbé ya Pak*

*(Matie 26:17-29; Mark 14:12-26)*

<sup>7</sup> Lidaali là bi jeleh kpónò wà ña ñmabe ñòke ya nacenku nno baa'. Nen daali ne bi kòreh \*Sufmbé ya Pak ya pefanfaan. <sup>8</sup> Ne \*Yesu sòn' Pier nin San ki tòke' be ki ye: «Jo men kí tí tien te Pak ya jier tí ji.» <sup>9</sup> Ne bi niire' wò ki ye: «A yíe tí tien ku'jier le saan-i?» <sup>10</sup> Ne u ye: «Cenge men, ni tí kón' udu ni la, ni li le uje uba tuke liñuncuál ki cendeh ne. Ní paan u'bo, kí tí kò u li kò iden yà ni nno ni, <sup>11</sup> kí tòke udendaan ki ye: «Ti'cenbaa ye wón nin u'panpaankaab li ji Pak ya nacenku ya jier ku le duku ni?» <sup>12</sup> U li wuon ne lidutatuál ya paaki ya ducienku kuba, bi bonde' kù ño. Ní tien kunacenku nno ya jier kun ni.» <sup>13</sup> Bi bure', ki tí baa' ki laa' \*Yesu bi tòke' be ki ye bi li le ná nno ke, ne ki tien' kunacenku nno ya jier.

### *Yonbdaan ya jier*

*(Matie 26:26-30; Mark 14:22-26; 1 Korént 11:23-25)*

14 Tijier nnɔ ya jijiyo baa', nɛ \*Yesu nin u'tondb kɛle' ki jinh. 15 Nɛ u tɔke' bɛ ki ye: «N'nun là mɔn min nin ninbi n taan kɪ ji kunacenu ya jier nɛ kɪ yaan n jɛnde. 16 N tɔkeh nɛ nɛ, kimɛ ma ji li ji ku'jier kɪ tɪ baa uyo wà ku'tingi li tɔre kɪ wende Uwien ya bɛl ni.»

17 Nɛ ki taa' midaam, ki faare' Uwien ki ye: «Teke mɛn midaam miɛ kɪ gbiire. 18 N tɔkeh nɛ nɛ, ma ji li faa kɪ n̄u sibii ya daam, kɪ tɪ baa uyo wà Uwien ya bɛl li baa nɪ.»

19 Nɛ ki taa' kpɔnɔ, ki faare' Uwien, ki kɔkuɔ', ki taa' ki de' bɛ, nɛ ki ye: «Nà sɔ yé n'gbɛnɛnt, n taa' ki de' nɛ. Li teh mɛn nnɔ kɪ li tien n'bó.» 20 Bi jin' ki tɪ gben', nɛ u taa' midaam mɔ, ki faare' Uwien, nɛ ki ye: Midaam miɛ yé n'sɛm nɛ, ki wɔngɛh ki teh Uwien cuo' nin binib kujɔtiefɛnku. Ninbi bo nɛ mɪ li puube.

21 «Liike mɛn, wà li kuɔre nni nnɔ kɛ niɛ saan ki jinh nin nni. 22 Unil ya Bijɛ li kpo Uwien sien' wɔ ma bo nɛ. Ama unil wà li kuɔre wɔ nnɔ, n̄i bre udaan bo. 23 Nɛ u'panpaankaab cin' ki niireh tɔb ki teh: <Ti'ni n̄mɛ li tien ni ya bonn-i?> »

*Yesu ya panpaankaab findeh ticiɛnt bo*  
(Matie 18:1; 20:25-28; Mark 9:34; 10:42-45)

24 Uyo uba nɛ \*Yesu ya panpaankaab findeh nin tɔb wà li yé uciɛn bi'ni. 25 Nɛ u tɔke' bɛ ki ye: «Idu ya bɛrb wɔbndeh i'nib nɛ, nɛ bà n̄mɔbe ticiɛnt bi'bo cɛreh bi yih bɛ binimɔnb. 26 Ninbi yaam n̄a te nnɔ. Wà yé uciɛn ni'ni la, wɔ n̄ tien u'ba uwaal. Wà yé usɛnlier la, wɔ n̄ tien u'ba utonsɔnl. 27 Wà teh tijier nin wà jinh, n̄mɛ cɛn' utɔ? Na yé wà jinh-ii? Nin nɛn kɛ n̄ɔ min te ni'ni ten utonsɔnl nɛ.

28 «Ninbi nɛ n̄ikn' ka siere' ki dāan' nni uyo wà kɛ n̄i faa n'bo. 29 Nɛn bo, n'Baa cɛre' u'bɛl yé n'yaal ma nnɔ, n'mɔ li cɛre lɛ n̄ li yé ni'yaal, 30 n̄ɔ n̄i li jinh ki n̄uh nin nni n'bɛl ni, kɪ kɛle mubɛrbiɛmu bo, kɪ bu Israyɛl yaab ya baamul piik nin ile nnɔ tibuur.»

*Yesu tɔke' Pier ki ye u li niɛ ki ye wa bɛn wɔ*  
(Matie 26:31-35; Mark 14:27-31; San 13:36-38)

31 \*Yesu tɔke' Simɔn ki ye: «Simɔn, Simɔn, liike \*Satan miɛ' usɛn wɔ n̄ yoyoke nɛ ten bi yoknh kufenku ma bo ki n̄ɛndeh mibim nɛ. 32 Ama n kàare' ki de' sin n̄ɔ a'tekjim la pɔre n̄ɛ. Uyo wà a liebe' n̄i ki paan' n'bo la, á saake a'ninjieb ya gbɛnɛnt.» 33 Nɛ Pier tɔke' wɔ ki ye: «Yonbdaan, n li tuo bɛ n̄ pɛkn min nin sin, bii kɪ kpo nin n̄ɛ mɔnɔn-a!» 34 Nɛ \*Yesu ye: «Pier, n tɔkeh n̄ɛ nɛ, dinnɔ mɔnɔn, a li niɛ bolm mita kɪ ye n̄a bɛn nni nɛ kɪ yaan ukuoje n̄ muɔ.»

*Bonde mɛn ni'ba, n̄i yé lituɔl nɛ ni'bo*

35 Nɛ ki niire' bɛ ki ye: «N là sɔn' nɛ ma, ki ye ni la tuke like, ki la tuke kɔl, ki la taa tacaan nnɔ, ni là luɔ' niba-aa?» Nɛ bi ye: «Ta là luɔ' niba.» 36 Nɛ u ye: «Fɛnfɛnnɔ wà n̄mɔbe bulikbu la, wɔ n̄ li tuke. Wà mɔ n̄mɔbe likɔl la, wɔ n̄ li tuke. Wà n̄a n̄mɔbe jusiek la, wɔ n̄ kuɔre u'lierku kɪ dɛ. 37 N tɔkeh nɛ nɛ, kimɛ nà kɛle' n'bo \*Uwien ya gbɔnku ni nnɔ li tien nɛ.

N̄i kɛle' ki ye:

<Bi kaan' wɔ ki kpɔbn' idukond bó nɛ,>

<bi li mɔnbe kɪ tien nni nnɔ nɛ fɛnfɛnnɔ.> »

38 Nɛ bi ye: «Yonbdaan, liike-a mujusiemu mule sɔ.» Nɛ u tɔke' bɛ ki ye: «N̄i li dɛkre.»

*Yesu kàare' Olifi ya siin ya juɔl bo*  
(Matie 26:36-46; Mark 14:32-42)

39 \*Yesu n̄ɛn' ni'saan ki jon' Olifi ya siin ya juɔl bo ten u tɪ n̄ joh uyo kɛ ma bo, nɛ u'panpaankaab mɔ paan' u'bo. 40 U tɪ baa' ni'saan, nɛ ki tɔke' bɛ ki ye: «Li kàareh mɛn n̄ɔ kɪ la lu biikm ni.» 41 Nɛ ki dāan' bɛ, ki jɛnde' waamu, ki gbaan' ki kàareh 42 ki teh: «N'Baa, a yíe la, cɛre ijɛnd yíe n̄ jɛnde nni. Ama la cɛre n ya yíem n̄ tien, cɛre a'yaam n̄ tien.» [ 43 Nɛn saan nɛ Uwien ya tond uba n̄ɛn' paaki bó n̄i, ki baa' u'saan ki saake' u'gbɛnɛnt.

44 \*Yesu ya yɛnm saa' ki tĩ kɛnde', nɛ u tũɔre' ki kàare' nin inunmón; nɛ kutòntònkɔ ñɛh wɔ ki naan misɛm ki tuoreh tingi ni.]\*

45 U kàare' ki gben' nɛ ki fii' ki liebe' u'panpaankaab bita nnɔ saan, ki laa' bi'yɛnm saa' ki gbien', bi dɔ ki gɔh, 46 nɛ u ye: «O! Nĩ tuo', ni dɔ ki gɔh-ɔɔ? Fii mɛn, kí li kàareh ŋɔ ki la lu biikm ni.»

### *Yesu ya cuom*

*(Matie 26:47-56; Mark 14:43-50; San 18:3-11)*

47 \*Yesu laan biɛ ki lienh nɛ linigol liba puɔ' bi'bo, bi yih wà Sudas, u yé \*Yesu ya panpaankaab piik nin bile ya uba nnɔ le bɛ usɛn. U nɛkn' \*Yesu nɛ ki lɔkn' wɔ. 48 Nɛ \*Yesu tɔke' wɔ ki ye: «Sudas! A li lɔkn Unil ya Bijɛ nɛ kí kuɔre wɔ-ɔɔ!» 49 \*Bà te nin Yesu nnɔ laa' nà benh nè rí tien, nɛ ki niire' wɔ ki ye: «Yonbdaan, tí taa mujusiemu kí gɛgɛ bɛ-ɛɛ?» 50 Nɛ bi'ni uba taa' kijusiek ki gɛ' ki paare' bitɔtuɔrcienb ya cien ya tonsɔnl uba ya nɔjietubl. 51 Nɛ \*Yesu ye: «Dàan mɛn, nĩ li dɛkre», nɛ ki mɛ' utonsɔnl nnɔ ya tubl nnɔ ki cɛre' u faake'. 52 Nɛ ki tɔke' bitɔtuɔrcienb nin Uwien ya duku ya guguurb ya cienb nin \*Sufmbɛ ya cienb bà baa' bɛ rí lá cuo wɔ nnɔ ki ye: «Nĩ tuke mujusiemu nin ilɛnbɛn ní lá cuo nni tɛn n yé udukond nɛ-a! 53 N là te nin nɛ Uwien ya duku ya luo bo idaan kɛ, nɛ na cuo' nni. Ama fɛnfɛnnɔ ninbi nin ubiɛɔ ya tuɔm ya yo nɛ baa'.»

### *Pier nie' ki ye wa ben Yesu*

*(Matie 26:57-58, 69-75; Mark 14:53-54, 66-72; San 18:12-18, 25-27)*

54 Nɛn saan nɛ bi cuo' \*Yesu ki taa' wɔ ki jon' bitɔtuɔrcienb ya cien den. Nɛ Pier pɛ bi'bo ki te fɔnfɔkm. 55 Bi sɛre' umu uluo ya siik, nɛ ki kɛle' ki jebe' wù. Pier mɔ baa' ki kɛle' bi'ni. 56 Upiitonsɔnl uba laa' wɔ u kɛ umu saan, nɛ u caan' u'bo inun ki ye: «Ujɛ wuɔ nɔ mɔ bi te nin \*Yesu nɛ.» 57 Nɛ u nie' ki ye: «Upii, ma ben wɔ.» 58 Nĩ pukn' waamu, nɛ unitɔ mɔ laa' wɔ, ki tɔke' wɔ ki ye: «A'mɔ yé bi ya uba nɛ.» Nɛ Pier ye: «Kayi! Ma yé bi'yɔ.» 59 Nĩ tien tɛn kukurku kuba, nɛ unitɔ mɔ len' ki ye: «Nĩ yé imɔn nɛ, ujɛ wuɔ mɔ bi te nin \*Yesu nɛ, kimɛ u yé Galile yɔ nɛ.» 60 Nɛ Pier jiin' wɔ ki ye: «Ujɛ, ma ben a ye a ye bà.» U laan biɛ ki lienh nɛ ukuoje pɔk ki muɔ'. 61 U ya yo nɛ Yonbdaan jibebe' ki caan' Pier bo inun. Nɛ Pier tiere' Yonbdaan bi tɔke' wɔ ma ki ye: «Dinnɔ, a li nie bolm mita kí ye ŋa ben nni nɛ kí yaan ukuoje rí muɔ nnɔ.» 62 Nɛ u fii' ki ñɛn' saali, ki tĩ muɔ' ki gbiɛnde' cɛɛn.

### *Biguguurb sukreh Yesu ki yieke ki ñih wɔ*

*(Matie 26:67-68; Mark 14:65)*

63 Nɛn saan nɛ binib bà gu \*Yesu nnɔ leh wɔ, ki yieke ki ñih wɔ, 64 ki taa' kukpɛlciɛku ki pibn' u'nun bó, ki tɔkeh wɔ ki teh: «Bukre' wà ñi' ŋɛ.» 65 Nɛ ki liebe' ki sukreh wɔ isuk mɔ ì yebe.

### *Sufmbɛ ya buur ya cɛkl yaab bun' Yesu tibuur*

66 Nĩ faa' kutɛnɛsɔnsɔnkɔ, nɛ \*Sufmbɛ ya cienb nin bitɔtuɔrcienb nin \*Yiko ya wɔnwɔknb taan', ki cɛre' bi taa' \*Yesu ki baa' bi'buur ya cɛkl yaab saan. 67 Nɛ bi niire' wɔ ki ye: «A yé Uwien ya Nigɛndkɛ Kristo nɛ la, tɔke tɛ.» Nɛ u jiin' bɛ ki ye: «N tɔke' nɛ mɔnɔn la, na li li teke kí ji. 68 N tí niire' nɛ iniire mɔ la, na rí jiin nni. 69 Ama kí ñɛ fɛnfɛnnɔ kí taa kí li joh, Unil ya Bijɛ li kɛle Uwien, mituɔm kɛ ya daan ya jie bó.» 70 Nɛ bi'kɛ ye: «Nɛn mɛn la, a yé Uwien ya Bijɛ nɛ-a!» Nɛ \*Yesu jiin' bɛ ki ye: «Ninbi mɔnɔn len' bù te, n yé wɔn nɛ.» 71 Nɛn saan nɛ bi ye: «Ta ji nuunh mɔnkunl, tinbi mɔnɔn cii' u'ñɔbu ni.»

## 23

### *Bi tuke Yesu ki jon' Pilat saan tibuur*

*(Matie 27:1-2, 11-14; Mark 15:1-5; San 18:28-38)*

\* 22:44 Bi kpiɛ' ki kele' tigbɔnt tà nnɔ ya tuba ni migbiirm 43 nin 44 ŋa te tu'ni.

<sup>1</sup> Nε bi'kε fii', ki taa' \*Yesu ki jon' Pilat saan, <sup>2</sup> ki cin' ki biindeh wə ki teh: «Ti laa' uje wuə sureh ti'du ya nib nε be n kpre, ki təkheh be ki teh, bi la ji n li pəh ubercien Sesa lenpo, ki teh u yé Uwien ya Nigendke Kristo, uer nε.» <sup>3</sup> Nε Pilat niire' wə ki ye: «Sin, a yé \*Sufmbe ya ber nε-εε?» Nε u jiin' wə ki ye: «Sin nε ye nnə.» <sup>4</sup> Nε Pilat təkhe' bitətuərcienb nin linigol nnə ki ye: «Ma laa' uje wuə ya biil.» <sup>5</sup> Nε bi nniikeh ki teh: «U wəknh Sude ya tinfenm kε ni nε, ki cèreh binib kpreh. U cin' Galile ya tinfenm ni nε, ki ηməηməbe ki lá baa' niε saan.»

### *Herod bun' Yesu tibuur*

<sup>6</sup> Pilat cii' nnə ma nnə, nε ki niire' ki ye: «Uje bugben yé Galile yə nε-εε?» <sup>7</sup> Pilat cii' \*Yesu nien' Galile ma nnə, nε u ye be n taa wə kί jo Herod saan, kimε Herod nε likeh Galile ya nib, ki te Yerusalem ni i ya den. <sup>8</sup> Herod laa' \*Yesu ma nnə, nε u'yenm sange cεen, kimε u là cii' u'bó, nε ki nuunh wə n lε wə n tī wuəke', ki daan wə n tien miyəkm ya bonn ηə wə n lε. <sup>9</sup> U niire' \*Yesu iniire i yεbe, ama \*Yesu ηa jiin' wə nəbonl. <sup>10</sup> Bitətuərcienb nin \*Yiko ya wənwəknb mə te ni'saan ki biindeh wə ufaa bo. <sup>11</sup> Herod nin u'səjambε liike' wə fenm, ki lè' wə, nε Herod taa' kulierku kuba, kù mən cεen ki goln' wə, ki cère' bi taa' wə ki jiin' Pilat saan. <sup>12</sup> Herod nin Pilat ηa là ηmε. Nεn daali nε bi ηmaake'.

### *Bi bun' Yesu tibuur ki ye u kpe mikuum*

*(Matie 27:15-26; Mark 15:6-15; San 18:39-19:16)*

<sup>13</sup> Nεn saan nε Pilat yin' bitətuərcienb nin \*Sufmbe ya cienb nin udu ya nib, <sup>14</sup> ki təkhe' be ki ye: «Ni taa' uje wuə ki baa' n'saan ki ye u gaandeh binib nε. Nεn bo nε n bun' wə tibuur ni'kε ya nun bó, ki niire' wə iniire ni biindeh wə isen yà ni nnə, ka laa' u bii' bà. <sup>15</sup> Herod mə ηa laa' u bii' bà. Nεn bo nε u jiin' wə n tī'saan. Tə, wa tien' nà kpe kuum. <sup>16</sup> Nεn bo, n li cère be n nī wə nε, kί taa wə kί wiε.» <sup>17</sup> [Binl kε binl, kunacenku nnə ya yo la, Pilat niendeh lipekli ya nil uba nε ki wiεnh.]\* <sup>18</sup> Nε bi'kε taan' ki wuure' ki ye: «Ku uje wuə nə, kί wiε tε Barabas.» <sup>19</sup> Bi là cuo' Barabas ki pekni', kimε u là cère' binib kpi' udu ni, nε ki ku' unil mə.

<sup>20</sup> Pilat yie wə n wiε \*Yesu ma nnə, nεn nε cère' u liebe' ki len' nin binib nnə. <sup>21</sup> Ama be n wuureh nε ki teh: «Kpe wə udəpənpən bo! Kpe wə udəpənpən bo!» <sup>22</sup> Nε u tī niire' be nta bo ki ye: «U tén ki bii' li lε biil be nε? Min ηa laa' u tien' nà nī kpe kuum. N li cère be n nī wə nε, kί taa wə kί wiε.» <sup>23</sup> Ama bi nniikeh ki wuureh ufaa bo nε ki teh be n kpe wə udəpənpən bo. Bi wuure' ki tī faake' <sup>24</sup> nin Pilat, nε u gbεle' ki tuo' bi ye ma. <sup>25</sup> U pekre' Barabas wà là cère' binib kpi' udu ni, ki ku unil mə nnə ki wiε'. Bi là ye wə n wiε' wən nε. Ama \*Yesu wən, u taa' wə ki de' be be n tī tien wə bi yie ma nε.

### *Bi kpe' Yesu udəpənpən bo*

*(Matie 27:32-44; Mark 15:21-32; San 19:17-27)*

<sup>26</sup> Bi taa' \*Yesu ki bure'. Bi joh ma nnə nε ki tī cende' uje uba bi yih wə Simən, u yé Sirenn ya du ya nil nε, ki nien' ikpàan bó nī. Bi cuo' uje bugben ki wəbn' ki bukn' wə udəpənpən nε u pε \*Yesu ya puoli bó. <sup>27</sup> Linigocienl pε \*Yesu bo. Bi'ni biba yé bipiib nε, ki muəh ki kpiende' u'bo. <sup>28</sup> \*Yesu jibe' ki liike' be, nε ki ye: «Yerusalem ya piibe, la muəh mən min bo, li muəh mən ninbi nin ni'bumu bo. <sup>29</sup> Kimε uyo uba we nī bi li len kί ye: «Bipiib bà yé inəl, ka maa', ka ηaan' nnə yaam tu.» <sup>30</sup> U ya yo nε binib li təkhe ijuən kί ye: «Bere mən kί nēkn ti'bo», kί təkhe igbengben mə kί ye: «Ləkn mən ti'bo.» <sup>31</sup> Kimε bi teh udəsange nə la, bi ji li tien mila udəkuon-i?»

<sup>32</sup> Bi là tuke' idukond ile mə, be n tī taan kί ku yen nin Yesu. <sup>33</sup> Bi tī baa' niba saan, bi yih nε «Kuyukpəbku ya Bùol.» Nεn saan nε bi kpe' \*Yesu udəpənpən bo, nε ki kpe' idukond ile nnə mə. Bi kpe' uba u'nəjie bó, ki kpe' utə u'nəgen bó. <sup>34</sup> [Nε \*Yesu ye: «N'Baa, fère be bi'biere, kimε ba ben bi teh nà.»]† Sojambε taa' u'wəngolkaar ki fùrere' imúəni ki gbiire' tū. <sup>35</sup> Nε udu ya nib se ki likeh. \*Sufmbe ya cienb ben leh \*Yesu nε ki teh: «U ηmien' bitəb nε.

\* **23:17** Bi kpiε' ki kele' tigbənt tà nnə ya tuba ni migbiirm 17 ηa te tu'ni. † **23:34** Bi kpiε' ki kele' tigbənt tà nnə ya tuba ni, «N'Baa, fère be bi'biere, kimε ba ben bi teh nà» ηa te tu'ni.

U yé Uwien ya Nigendkε Kristo la, wɔ́ n̄ ηmien u'ba mɔ́.» <sup>36</sup> Sojambε nnɔ́ mɔ́ sukreh wɔ́, ki nεkn' wɔ́ ki taa' midεηmiηmiikm ki tɛnde' wɔ́, <sup>37</sup> nε ki ye: «A yé \*Sufmbε ya bεr la, ηmien a'ba-a!» <sup>38</sup> Bi là kele' ki tɛbn' u'yul ya paaki bó, ki ye: «\*Sufmbε ya bεr sɔ́ nɔ́.»

<sup>39</sup> Idukond yà bi kpε' yè idɔ̀pɔ̀npɔ̀n bo nnɔ́ ya uba mɔ́ sukreh wɔ́ ki teh: «ŋa yé Uwien ya Nigendkε Kristo bi? Ŋmien a'ba ŋɔ́ kí ηmien ti'mɔ́!» <sup>40</sup> Nε udukondtɔ́ nnɔ́ tien' u'bo ki ye: «Tinbi nin wɔ́n taan' ki laa' utudεre uba, nε ŋa fεnge Wien-a! <sup>41</sup> Tinbi yaam kpε' utudεre wuu nε, kimε bi tien' tε ti'tuon kpε ma bo nε. Ama wɔ́n ŋa tien' biere iba.» <sup>42</sup> Nε ki ye: «Yesu, a lá jin' a'bel uyo wà la, á li tien n'bó.» <sup>43</sup> Nε \*Yesu jiiin' wɔ́ ki ye: «N tɔ́keh ηε imɔ́n nε, dinnɔ́ mɔ́nɔ́n a li te nin nni Uwien den nε.»

### *Yesu ya kuum udɔ̀pɔ̀npɔ̀n bo*

*(Matie 27:45-56; Mark 15:33-41; San 19:28-30)*

<sup>44</sup> N̄i là tuo kuwensiiku ya yo nε, n̄i ci' ki b̄iike' utingben kε bo ki t̄i baa' kutaajuɔ́ku tikur tuta ya yo. <sup>45</sup> Wien ŋa ji ñeh nε kukpɛlɛkɛkpɛkɛku kùà bore' Uwien ya duku ni bolm mile nnɔ́ kεre' ku'siik ni. <sup>46</sup> U ya yo nε \*Yesu wuure' ufaa bo ki ye: «N'Baa, n taa' n'miɛl ki ŋukn' ηε.» U len' nnɔ́ ki t̄i gben', nε ki kpo'. <sup>47</sup> Sojambε kobk ya cien laa' nnɔ́ ma nnɔ́, nε ki p̄εke' Uwien ki ye: «Ujε wuɔ́ mɔ́nbe ki yé ugbεmɔ́ndaan nε.»

<sup>48</sup> Binib bà kε baa' ligol bε n̄ lá liike nnɔ́, laa' tibont tà kε tien', nε ki liebe' ki kunh nin uyensaa. <sup>49</sup> Binib bà kε ben wɔ́ nin bipiib bà ñen' Galile ya tinfεnm bó ní, ki pε u'bo nnɔ́, se fɔ́nfɔ́km ki likeh.

### *Yesu ya subm*

*(Matie 27:57-61; Mark 15:42-47; San 19:38-42)*

<sup>50-51</sup> Ujε uba là te, bi yih wɔ́ Yosef, u ñen' \*Sufmbε ya du uba ni, nε bi yih wù Arimate. U là yé \*Sufmbε ya buur ya cεkl yaab ya uba nε, ki cuube, ki yé unimɔ́n, ki gu Uwien ya bεl li baa ní uyo wà. Wa là tuo' u'tɔ́b ye bε n̄ tien ma, nε ka kuɔ́n' u'ba bi'tuon ni. <sup>52</sup> U jon' Pilat saan ki t̄i tɔ́ke' wɔ́ ki ye wɔ́ n̄ c̄εbe wɔ́ \*Yesu ya gbεnɛnt ŋɔ́ wɔ́ n̄ jiiin' t̄u udɔ̀pɔ̀npɔ̀n bo kí t̄i sube. <sup>53</sup> Pilat tuo', nε Yosef jiiin' \*Yesu ya gbεnɛnt udɔ̀pɔ̀npɔ̀n bo, ki taa' kukpɛlciεku ki tenten' t̄u, ki taa' ki t̄i ble' ufele ni. Bi là cube' ufele nnɔ́ kujɔ́tɛnku kuba ya kele ni nε, ka laan sube' nil len‡. <sup>54</sup> Ni là yé lidaali là bi bondeh Saba nε, nε Saba bugben benh wɔ́ n̄ cin.

<sup>55</sup> Bipiib bà là ñen' Galile ya tinfεnm bó ní ki pε \*Yesu bo nnɔ́, paan' Yosef bo, ki t̄i laa' ufele nnɔ́, ki laa' bi taa' \*Yesu ya gbεnɛnt ki ble' len ma bo. <sup>56</sup> Bipiib nnɔ́ liebe' ki kun', ki t̄i bonde' lεfina nin mikpɔ́m. Nε ki juore' ki fuore' \*Saba ya daali liwɔ́bl ye ma bo.

## 24

### *Yesu mεkre' bitenkpiib ni*

*(Matie 28:1-10; Mark 16:1-8; San 20:1-10)*

<sup>1</sup> \*Saba ya daali ḡεbre', kutaaku kùà li faa nnɔ́, nε bipiib nnɔ́ wɔ́re' ki fii', ki taa' bi là bonde' mikpɔ́m mà mi'nu ηmε nnɔ́ ki jon' likul bó. <sup>2</sup> Bi t̄i baa', ki laa' kutɛnku kùà bi là taa' ki b̄iin' likul nnɔ́ ŋa ji bi. <sup>3</sup> Nε bi kɔ́n' ka laa' Yonbdaan \*Yesu ya gbεnɛnt. <sup>4</sup> N̄i bεke' bε c̄εen nε ba ji ben bi li ye bà. I ya t̄aan bo nε bi laa' bijεb bile baa' ki lá sere' bi'saan, ki guo tikpɛlɛr t̄u windeh ki dɔ́nbeh inun bó. <sup>5</sup> Bujewaanbu cuo' bipiib nnɔ́, nε ba ji kaabe' ki liike' bijεb nnɔ́, nε bi niire' bε ki ye: «Bε tien' ni nuunh unifuob bitenkpiib ni? <sup>6</sup> Wa ji te niε saan. U mεkre'-a. Tiere mɛn u là tɔ́ke' nε ki ye bà uyo wà u laan là te Galile ni nnɔ́. <sup>7</sup> U là ye n̄i kpε bε n̄ taa Unil ya Bijε kí ŋukn' bibiɛrdɛnb, bε n̄ kpε wɔ́ udɔ̀pɔ̀npɔ̀n bo, ŋɔ́ wienta daali wɔ́ n̄ mεkre bitenkpiib ni nε.»

<sup>8</sup> N̄en saan nε bipiib nnɔ́ tiere' \*Yesu la len' ki ye bà. <sup>9</sup> Bi siere' likul nnɔ́ saan ki liebe' ki kun', ki taa' tigber nnɔ́ kε ki tɔ́ke' \*Yesu ya tondb piik nin uba nnɔ́ nin binitɔ́b bà kε mɔ́ là pε u'bo nnɔ́. <sup>10</sup> Bipiib nnɔ́ ya yel si: Mari Madelenn nin Sann nin Mari Saak ya naa. Ben nin bipiitɔ́b nε taa' tigber nnɔ́ ki tɔ́ke' \*Yesu ya tondb. <sup>11</sup> Bi tɔ́ke' bε ma nnɔ́ nε bi maaleh

‡ 23:53 Liike Matie 27:60.



ki teh ni yé mijòrlenm nε, nε ka teke' tigber nnò ki jin'. <sup>12</sup> Nεn saan nε Pier fii' ki sen' ki jon' likul nnò saan, ki gbien' ki liike', ki laa' kukpɛlciεku nnò baba nε dɔ len. Nibonn nà tien' nnò cuo' wɔ miyɔkm cεen, nε u liebe' ki kun'.

*Yesu cère' u'panpaankaab bile laa' wɔ Emayus ya sen ni  
(Mark 16:12-13)*

<sup>13</sup> Nεn daali nε \*Yesu ya panpaankaab ya bile joh udu uba bó bi yih wù Emayus. Kí nε Yerusalem kí tì baa udu nnò nì te tɛn kɔnsini piik nin uba nε. <sup>14</sup> Bi joh ma nnò nε ki lienh tibont tà kε tien' nnò bó. <sup>15</sup> Bi lienh ki niεh nin tɔb uyo wà nnò, nε \*Yesu nɛnde' bε, bi tɔke ki joh. <sup>16</sup> Nì libe' bi'yɛnm nε ba bɛnde' wɔ. <sup>17</sup> U niire' bε ki ye: «Nì cuonh ki lienh bε ya gber nε?» Bi'yɛnm saa' nε bi sere'. <sup>18</sup> Bi'ni bi yih wà Kleyopas nnò jiin' wɔ ki ye: «N maale' ki ye sin baba nε te Yerusalem ni, ka bɛn nà tien' len idɛn yiε nɔ.» <sup>19</sup> Nε u ye: «Bε ya bonn tien'-i?» Nε bi tɔke' wɔ ki ye: «Tì lienh nà tu' Nasaret ya \*Yesu nnò ya gber nε. U là yé \*Uwien ya nɔbonsɔknl nε, ki n̄mɔbe mituɔm u'lenm nin u'tuon kε ni, binib nin Uwien ya nun bó. <sup>20</sup> Ama ti'yaab bà yé bitɔtuɔrciɛnb nin ti'du ya ciɛnb taa' wɔ ki tì n̄ukn' Erom ya ciɛnb, bi bun' wɔ ki ye u kpe mikum, nε ki kpe' wɔ udɔpɔnpɔn bo. <sup>21</sup> Tinbi là daan ki ye wɔn nε li teke tinbi Israyel yaab kí wiε. Nin ti'dɛndɛnl kε n̄ɔ tibont nnò kε tien' ma dinnɔ wienta sɔ. <sup>22</sup> Ama ti'cɛkl ya piib biba tɔke' tε tigber tuba tù jin' tε. Bi wɔre' ki fii' ki jon' likul bó, <sup>23</sup> ka tì laa' \*Yesu ya gbɛnɛnt, nε ki liebe' ní ki lá tɔke' tε ki ye Uwien ya tondb biba baa' bi'saan ki tɔke' bε ki ye u fuobe. <sup>24</sup> Nε ti'yaab biba mɔ jon' likul nnò bó, ki tì laa' nì te tɛn bipiib nnò len' ma nε. Ama wɔn wɔn, ba laa' wɔ.»

<sup>25</sup> Nε \*Yesu tɔke' bε ki ye: «O, bijεbε, mibɛnm nε pɔre' nε. Na teke' \*Uwien ya nɔbonsɔknb là len' nà kε nnò tonm. <sup>26</sup> Nì kpe Uwien ya Nigɛndkε Kristo rí jɛnde nε kí yaan Uwien rí kpiεke wɔ.» <sup>27</sup> Nε ki cin' ki tɔkeh bε nà kε kele' u'bo Uwien ya gbɔnt ni nnò. U cin' ki tɔkeh bε Moyis là kele' nà u'bo nε ki tì baa' \*Uwien ya nɔbonsɔknb kε mɔ là kele' nà.

<sup>28</sup> Bi tì nεkn' bi joh udu wà ni nnò, nε \*Yesu tien' tɛn u ye wɔ rí gèbre nε. <sup>29</sup> Nε bi cékn' wɔ ki ye wɔ rí juore bi'saan, uwien benh wù rí lu nε, nì li biire na rí wuɔke. Nε u juore' bi'saan. <sup>30</sup> Bi kèle' bε rí ji uyo wà nnò, nε u yuure' kpɔnɔ, ki faare' Uwien, ki kɔkuɔ' ki de' bε. <sup>31</sup> Nεn saan nε bi'yɛnm cibre', bi bɛnde' wɔ, nε u pɔk ki fele'. <sup>32</sup> Nε bi tɔke' tɔb ki ye: «U bi lienh ki tɔreh ki tɔkeh tε \*Uwien ya gbɔnku ya gber ya tingi usɛn ni ma nnò, nà bi sienh ti'fèl ni tɛn umu-uu?»

<sup>33</sup> Nε bi fii' ki liebe' Yerusalem i ya tãan bo ki tì laa' \*Yesu ya tondb piik nin uba nnò nin binitɔb taan' ki te. <sup>34</sup> Bi tɔke' bipanpaankaab bile nnò ki ye: «Yonbdaan mɔnbe ki mεkre'. U cère' Simɔn laa' wɔ.» <sup>35</sup> Nε bipanpaankaab bile nnò mɔ tɔke' bε nà tien' usɛn ni, ki tɔke' bε ki ye bi bɛnde' wɔ uyo wà u kɔkuɔ' kpɔnɔ nnò nε.

*Yesu cère' u'panpaakaab piik nin uba laa' wɔ  
(Matie 28:16-20; Mark 16:14-18; San 20:19-23; Ituon 1:6-8)*

<sup>36</sup> Bi lienh bi'n̄ɔbu n̄a lu', nε \*Yesu baa' ki lá sere' bi'siik ni, ki tɔke' bε ki ye: «Li te mɛn uyɛnduɔn ni.» <sup>37</sup> Nì fɛnde' bε ki gbien', bujɛwaanbu cuo' bε, kime bi maaleh ki teh ni yé ufɛnfɛnd nε. <sup>38</sup> Nε u niire' bε ki ye: «Bε tien' nì cuo' nε bujɛwaanbu, ni maaleh milele? <sup>39</sup> Liike mɛn n'nuɔ nin n'tãan, min lɪ nε. Mɛ nni mɛn kí liike, ni li lɛ n̄ n̄mɔbe tigbɛnɛnt nin ikpɔb. Fɛnfɛnd n̄a n̄mɔbe gbɛnɛnt ki niireh nin kpɔbl.» <sup>40</sup> U lienh nnò uyo wà nnò, nε ki wɔngɛh bε u'nuɔ nin u'tãan. <sup>41</sup> Nεn saan nε bi'yɛnm sɔngɛ', ama ba laan teke' ki jin' ki gbɛn', ki biε ki te miyɔkm ni. Nε u niire' bε ki ye: «Nì n̄mɔbe niba libùol liε ní ji-ii?» <sup>42</sup> Bi de' wɔ lijɛnjenpulkaal liba. <sup>43</sup> Nε u teke', ki n̄mɔn' bi'nun bó.

<sup>44</sup> Nε ki tɔke' bε ki ye: «N laan là te nin nε uyo wà nnò, n là tɔke' nε ki ye: nì kpe Moyis là kele' nà nin \*Uwien ya nɔbonsɔknb là kele' nà nin nà kε kele' Uwien ya yuon ya gbɔnku ni n'bo nnò, kε rí tien nε.»

<sup>45</sup> Nɛn saan nɛ u cɪbre' bi'yɛnm bɛ ɾi fre kɪ cii nà kɛle' \*Uwien ya gbɔnku ni nnɔ ya tingi. <sup>46</sup> Nɛ ki tɪ tɔke' bɛ ki ye: «Nɪ kɛle' ki ye nɪ kpɛ Uwien ya Nigɛndkɛ Kristo ɾi jɛnde, kɪ kpo kɪ mɛkre bitɛnkpiib ni wienta daali. <sup>47</sup> Bi li tɔke uɛndun ya nib kɛ n'gbɛr, kɪ ye bɛ ɾi lɛbre bi'tetem ɳɔ Uwien ɾi fɛre bɛ bi'biɛre. Bi li cin Yerusalem ni nɛ kɪ li tɔkeh tɹ. <sup>48</sup> Ninbi nɛ yɛ n'mɔnkunb tibont nnɔ kɛ bo. <sup>49</sup> Min nin n'yul nɛ li cɛre ɾi lɛ n'Baa là pɹon' ki ye u li de nɛ nà nnɔ. Nɪ li te Yerusalem ni, kɪ tɪ baa lidaali là ni li lɛ mituɔm mà li ɾi paaki bó ɾi nnɔ.»

*Yesu don' paaki bó ma bo*

*(Mark 16:19-20; Itɹon 1:9-11)*

<sup>50</sup> \*Yesu taa' bɛ ki jon' Betani ya du bó ya kɛle, ki tɪ yuon' u'nuɔ ki tien' bɛ Uwien ya mɔnm. <sup>51</sup> U teh bɛ Uwien ya mɔnm uyo wà nnɔ, nɛ ki dɔan' bɛ, Uwien cɛre' u don' paaki bó. <sup>52</sup> Bi gbaan' ki kpiɛke' wɔ, nɛ ki liɛbe' Yerusalem nin uyɛnsɔngciɛn. <sup>53</sup> Bi là tuu ki te Uwien ya duku ya luo bo nɛ ki pɛkeh Uwien.

## Tigbɛmɔnmɔnt tà San kɛle' tù nnɔ Nà wɔngɛh kugbɔnku kuu te ma bo

Yesu ya tond San nɛ kɛle' kugbɔnku kuu nnɔ. U yíe binib ní bɛnde Yesu yé udaan wà nɛ. Yesu yé Uwien ya Nigɛndkɛ Kristo nɛ. Wɔn nɛ liɛbe' ki yé Uwien ya Bijɛ.

San kɛle' tigbɛmɔnmɔnt ma bo nnɔ bore' nin Matie nin Mark nin Luk kɛle' tù ma bo. U yíe binib ní tùɔre kí cii Yesu tien' tibont tà nin u len' tà nnɔ ya tingi nɛ. San ya gbɔnku ya cincinm (1:1-18) u tɔkeh binib ki teh Yesu bugbɛn nɛ yé Uwien ya ñɔbonl. U là te nin Uwien nɛ haali ucincinyo nɛ ki baa' ki lá kɔn' nin binib (1:1-18).

San ya gbɔnku gbiire' ibɔk ile nɛ. Libɔkkpɛkl ni (1:18–12:50), San lienh Yesu tien' miyɔkm ya bont tà nnɔ bó nɛ. U tien' tù ki tí dukn' bolm milole nɛ. Tu ya bont nɛ wɔngɛh ki teh Yesu yé Uwien ya Bijɛ. Sufmbɛ ya ciɛnb tuu ki findeh nin wɔ ki teh u taah u'ba ki kpàandeh Uwien nɛ, ki kɛndeh Saba ya daali ya yiko bo. Yesu tɔke' binib ki ye wɔn nɛ yé tijier tà dienh limiɛl, ki yé kuwenwenku kùa wendeh uɲɛndun.

Libɔkliɛl ni (13:1–21:25), San liɛbe' ki ye Yesu nɛ yé usɛn wà unisaal li kpɛn wù kí baa Baa Uwien saan, ki liɛbe' ki ye Yesu siere' uɲɛndun wuu ni ki liɛbe' u'Baa bó (iyul 13–17). Li ya bɔkl ni San lienh bi cuo' Yesu ma bo, ki bun' wɔ tibuur ki ye u kpɛ mikuum, ki kpɛ' wɔ udɔpɔnpɔn ma bo nɛ. U mɛkre' bitɛnkpiib ni, ki cɛre' u'panpaankaab laa' wɔ u fuobe (iyul 18–21).

### *Yesu Kristo nɛ yé Uwien ya ñɔbonl*

<sup>1</sup> Uwien ña laan là ñɛn' uɲɛndun ma nnɔ ki laa' Liñɔbonl te nɛ. Lí là te nin Uwien nɛ, ki yé Uwien. <sup>2</sup> Lí là te nin Uwien nɛ micincinm. <sup>3</sup> Uwien là ñɛn' tibont kɛ nin lɛn nɛ. Uwien ña ñɛn' bonn niba ñɔ la te ní ñɛnm ni. <sup>4</sup> Lɛn nɛ yé limiɛl ya daan. Limiɛl nnɔ nɛ dienh binib kuwenwenku. <sup>5</sup> Kuwenwenku nnɔ wendeh licinñunl ni, nɛ licinñunl ña fre' ki kpiin' kù.\*

<sup>6</sup> Uwien sɔn' unil uba ní, bi yih wɔ San. <sup>7</sup> U baa' wɔ ní kun kuwenwenku nnɔ bo imɔn nɛ, ñɔ wɔn bo binib kɛ ní teke kù kí jí. <sup>8</sup> Wɔn ña yé kuwenwenku nnɔ, ama u baa' wɔ ní kun ku'bo imɔn nɛ. <sup>9</sup> Kù yé kuwenwenmɔnku kùa baa' uɲɛndun ni kù ní wende binib kɛ nɛ.

<sup>10</sup> Uwien ñɛn' uɲɛndun nin Liñɔbonl nnɔ nɛ. Lí baa' uɲɛndun ni ama uɲɛndun ya nib ña bɛnde' lè. <sup>11</sup> Lí baa' li'yaab saan, nɛ li'yaab ña teke' lè. <sup>12</sup> Ama binib bà kɛ teke' lè nnɔ, bi teke' lè ki jin' nɛ, nɛ lí de' bɛ usɛn bɛ ní li yé Uwien ya bumu. <sup>13</sup> Bi yé Uwien ya bumu ma nnɔ, na yé u maa' bɛ tɛn unisaal maa' mubumu ma bo nɛ, Uwien nɛ yíe ki cɛre' bi yé u'bumu.

<sup>14</sup> Liñɔbonl nnɔ tien' li'ba unisaal, ki baa' ki lá kɔn' ti'ni, ki teh tinimɔnt cɛɛn, ki tɔkeh tigbɛmɔnt baba. Ti laa' u'kpɛike. Ukpɛike wà u'Baa Uwien de' wɔ wù, kimɛ u yé u'bubaabk nɛ. <sup>15</sup> San kun' u'bo imɔn ki kpaande' ki ye: «N là lienh wɔn bo nɛ ki teh wà li paan n'bo ní nnɔ cɛn' nni, kimɛ u là te ki laa' ba laan maa' nni.»

<sup>16</sup> U'nimɔnt ni nɛ u de' ti'kɛ bupaabu, ki li liɛbe kí de tɛ bù kí pukn. <sup>17</sup> Imɔn, Moyis nɛ là de' tɛ \*yiko. Tinimɔnt nin tigbɛmɔnt tun wɔn, \*Yesu Kristo nɛ baa' nin tù. <sup>18</sup> Uba ña kpele ki laa' Wien. Ama u'Bijɛbaab wà yé Uwien ki te nin Uwien nnɔ nɛ cɛre' ti bɛnde' wɔ.

### *San wà siih binib Uwien ya ñunm ya gbɛr*

*(Matie 3:1-12; Mark 1:1-8; Luk 3:1-18)*

<sup>19</sup> Sufmbɛ ya ciɛnb bà te Yerusalem ni nnɔ sɔn' bitɔtuɔrkaab nin Lefi yaab† San saan, nɛ bi tí niire' wɔ ki ye: «A yé ñmɛ nɛ?» <sup>20</sup> Nɛ San kun' imɔn ki ye: «Min ña yé Uwien ya

\* **1:5** Bi li fre kí lɛbre licinñunl ña fre' ki kpiin' kù kí ye licinñunl ña teke' kù mɔ. † **1:19** Lefi yaab yé binib bà là toreh bitɔtuɔrkaab Uwien ya duku ni nɛ.

Nigendkε Kristo.» <sup>21</sup> Nε bi liεbe' ki niire' wɔ ki ye: «A nín yé ημε? A yé Eli nε-εε?» Nε u ye: «Ma yé Eli.» Bi tí niire' wɔ ki ye: «A yé \*Uwien ya ñɔbonsɔknl wà li baa ní nnɔ nε-εε?» Nε u ye: «Hnhn.» <sup>22</sup> Nε bi tí niire' wɔ ki ye: «A nín yé ημε nε? A bugben tɔke tε a yé udaan wà, ηɔ tí bende ti li tí jiin bà sɔn' tε ní nnɔ kí ye bà.»

<sup>23</sup> Nεn saan nε San jiin' bε ki ye: «N yé wà wuureh kupenpelku ni ki teh:

⟨Tùɔre mεn kí cubn Yonbdaan ya sεn,⟩ nnɔ nε.

\*Uwien ya ñɔbonsɔknl Esayi là len' nnɔ nε.»

<sup>24</sup> Bi sɔn' binib bà San saan nnɔ ya biba là yé \*Farisiεnmbε nε. <sup>25</sup> Bi liεbe' ki niire' wɔ ki ye: «Ŋa yé Uwien ya Nigendkε Kristo, ka yé Eli, ka yé \*Uwien ya ñɔbonsɔknl wà li baa ní nnɔ mɔ la, bε nín tien' a siih binib Uwien ya ñunm-i?» <sup>26</sup> Nε u tɔke' bε ki ye: «Min taah miñunm nε ki siih binib Uwien ya ñunm. Ama uba te ni'siik ni, na bεn wɔ. <sup>27</sup> U pε n'puoli bó ní nε, ama ma kpε í lore u'tacεningben mɔnɔn.»

<sup>28</sup> Ní'kε là tien' Betani ya du ni nε, Sudεn ya kpenpuol bó. San là siih binib Uwien ya ñunm nεn saan nε.

### *Yesu nε yé Uwien ya Pebuk*

<sup>29</sup> Kutaaku faa', San laa' \*Yesu we ní u'saan, nε u ye: «Liike mεn, Uwien ya \*Pebuk kà ñendeh uɲendun ya nib ya biere nnɔ sɔ. <sup>30</sup> N là tɔke' wɔn ya gber nε ki ye uje uba pε n'puoli bó ní ki cεn' nni nnɔ, kime u là te ki laa' ba laan maa' nni. <sup>31</sup> Min mɔnɔn ηa là bεn udaan wà nε, ama n baa' ki siih binib Uwien ya ñunm ηɔ Israyel yaab nε í bende wɔ.»

<sup>32</sup> Nε San tɔke' binib ki ye: «N laa' \*Mifuoñaanm ñεn' paaki bó ki jiinh ní, ki naan unεnjel, ki lá te u'bo. <sup>33</sup> Min mɔnɔn ηa là bεn udaan wà nε, ama Uwien wà sɔn' nni í li siih binib u'ñunm nnɔ, nε tɔke' nni ki ye n li lε \*Mifuoñaanm jjiire' ní ki lá te uje uba bo. Wɔn nε li cère \*Mifuoñaanm í jjiire ní binib bo. <sup>34</sup> N laa', nε ki kun' imɔn ki ye wɔn nε yé Uwien ya Bijε.»

### *Bà kpiε' ki tien' Yesu ya panpaankaab*

<sup>35</sup> Kutaaku faa', nε San tí te ní'saan nin u'panpaankaab bile. <sup>36</sup> U laa' \*Yesu gèbreh, nε u caan' u'bo inun, ki ye: «Liike mεn, Uwien ya Pebuk sɔ.» <sup>37</sup> San ya panpaankaab bile nnɔ cii' u len' nà, nε ki paan' \*Yesu bo. <sup>38</sup> \*Yesu jjiεbe', ki laa' bi pε u'bo, nε u niire' bε ki ye: «Ní yíε ba?» Nε bi ye: «Rabi, a te lε saan-i?» Rabi ya tingi si: Uwɔnwɔknl bii Cεnbaa nε. <sup>39</sup> Nε u ye: «Dεn mεn, ni li lε.» Ní là te kutaajuɔku tikur tunan ya yo nε. Bi paan' u'bo ki tí laa' u te nà saan, nε ki juore' u'saan ki tonde' ní'daali ya wentunl.

<sup>40</sup> Bijεb bile bà là cii' San ya lenm ηɔ ki paan' \*Yesu bo nnɔ, bi yih uba Andre, u yé Simɔn Pier ya ninje. <sup>41</sup> U kpiε' ki jon' ki tí laa' u'ninje Simɔn nε ki tɔke' wɔ ki ye: «Ti laa' Mεsi.» Mεsi ya tingi si: Uwien ya Nigendkε Kristo nε. <sup>42</sup> Nε ki taa' wɔ ki baa' \*Yesu saan. \*Yesu caan' Simɔn bo inun, ki tɔke' wɔ ki ye: «Bi yih ηε Simɔn nε, San ya bijε. Bi ji li yih ηε Sefas nε.» Sefas ya tingi si: Litenpenl nε.

<sup>43</sup> Kutaaku tí faa' nε \*Yesu yíε wɔ í jo Galile ya tinfεnm bó. U laa' Filip nε ki tɔke' wɔ ki ye: «Paan n'bo ní.» <sup>44</sup> Filip nnɔ yé Betsayida ya du yɔ nε. Andre nin Pier mɔ yé nεn bó yaab nε. <sup>45</sup> Filip jon' ki tí laa' Natanayel nε ki tɔke' wɔ ki ye: «Ti laa' unil wà Moyis là kele' u'gber Yiko ya gbɔnku ni nnɔ. \*Uwien ya ñɔbonsɔknb mɔ là len' u'gber. Wɔn si: Nasaret ya Yesu, Yosεf ya bijε.» <sup>46</sup> Nε Natanayel niire' wɔ ki ye: «Nibonmɔnmɔnn li fre kí ñε ní Nasaret ya du ni-ii?» Nε Filip tɔke' wɔ ki ye: «Dεn kí tí liike.»

<sup>47</sup> \*Yesu laa' Natanayel we ní u'saan, nε u ye: «Liike mεn, Israyel ya bol ya nil tenten sɔ, u yé ugbe mɔndaan nε.» <sup>48</sup> Nε Natanayel niire' wɔ ki ye: «A bεn nni lε saan-i?» Nε \*Yesu ye: «A bi te bukenkenbu ni ma nnɔ n kpiε' ki laa' ηε nε ki yaan Filip yin' ηε.» <sup>49</sup> Nε Natanayel ye: «Cεnbaa, a mɔnbe ki yé Uwien ya Bijε nε. A yé Israyel ya bercien nε.» <sup>50</sup> Nε \*Yesu ye: «N tɔke' ηε ki ye n laa' ηε bukenkenbu ni ma nnɔ nε a teke' nni ki jin'. A li lε miyɔkm ya

bont tà yεbe ki cεn' niε nɔ.» <sup>51</sup> Nε ki ye: «N tɔkeh nε imɔn nε, ni li lε kutaaku yε, kí lε Uwien ya tondb doh kutaaku ki jiinh ní \*Unil ya Bijε ya yul ya paaki.»

## 2

### *Bi tien' upiikuɔn uba Kana ya du ni*

<sup>1</sup> Wienta daali nε bi tien' upiikuɔn uba Kana ya du ni, Galile ya tinfenm ni. \*Yesu ya naa mɔ là te ni'saan. <sup>2</sup> Bi là yin' \*Yesu nin u'panpaankaab mɔ upiikuɔn nɔ. <sup>3</sup> Midaam là pɔre', nε \*Yesu ya naa tɔke' wɔ ki ye: «Ba ji ηmɔbe daam.» <sup>4</sup> Nε \*Yesu jiin' wɔ ki ye: «Uɔii, min nin sin tu lε nε? N'yo ηa laan baa'-a!» <sup>5</sup> Nε u'naa tɔke' bitonsɔnb ki ye: «U ye ma la, ní tien nɔ.»

<sup>6</sup> Tɔ, icincenciεn iluob iba là se ni'saan. Cin kε cin là li fre kí teke tεn icùɔn iniin bii icùɔn piik nin ile. \*Sufmbε là kuonh i ya cin ni nε miñunm ki taah ki sɔkreh bi'ba, ki paakeh iyaaɛbok ye ma bo. <sup>7</sup> \*Yesu tɔke' bitonsɔnb nɔ ki ye: «Gbien mεn icin yii nɔ miñunm.» Nε bi gbien' i'kε miεn. <sup>8</sup> Nε u ye: «Kon mεn kí tĩ de wà likeh kunacenu ya tòn.» Nε bi kon' ki tĩ de' wɔ, <sup>9</sup> ki laa' miñunm nɔ kpεnde' midaam ηɔ. Nε u wube' ki liike', ka bεn mĩ ñen' nà saan. Ama bitonsɔnb bà kon' ki tĩ de' wɔ nɔ, bεn bεn. Nε u yin' piice, <sup>10</sup> ki tɔke' wɔ ki ye: «Wà kε ye wɔ ní de midaam la, u kpĩereh ki dienh mà ηmε nε. Binib ñun' ki tĩ gbo' la, nε u ji dienh mà ηa ηmε ki gbien'. Sin sien' ma ηmε ki tĩ kende' nε ki yùɔn' ki de'-a!»

<sup>11</sup> Nεn nε yé miyɔkm ya bonn nà \*Yesu cin' ki tien' nè. U là tien' miyɔkm ya bonn bugben Kana ni nε, Galile ya tinfenm ni, ki cεre' binib laa' u ηmɔbe ukpiεke ma bo. Nε u'panpaankaab teke' wɔ ki jin'.

<sup>12</sup> Nĩ ya puoli bó nε wɔn nin u'naa nin u'ninjieb nin u'panpaankaab jiiire' Kapernawum ya du bó, ki tĩ tien' ni' bó iwenkàankε.

### *Yesu ηɔre' ikpenkpend Uwien ya duku ya luo bo (Matie 21:12-13; Mark 11:15-17; Luk 19:45-46)*

<sup>13</sup> Nĩ là sien' waamu nε \*Sufmbε ya Pak ní jele, nε \*Yesu don' Yerusalem bó, <sup>14</sup> ki tĩ kɔn' Uwien ya duku\* ya luo bo, ki laa' binib te u'bo. Biba kuɔreh inε nin ipe nin inεnjel, bitɔb kpεndeh ilike. <sup>15</sup> Nε u taa' iηmi ki tien' unalεbe yaam, ki ηɔre' biwenkuɔrb nɔ nin bi'pe nin bi'nε nɔ kε ki ñen' saali, ki kpεnkpien' bilikkpεndb nɔ ya like, ki tuture' bi'teb ki gbògbòbe'. <sup>16</sup> Nε ki tɔke' binεnjekuɔrb nɔ ki ye: «Ñen mεn ni'kε niε saan! Ni la taa n'Baa ya duku kí tien kukpenkpendduku.» <sup>17</sup> Nε u'panpaankaab tiere' ki ye ní kele' \*Uwien ya gbɔnku ni ki ye: «Uwien, n'nun món a'duku ya gber bo cεen, nε ní sienh n'fèl ni tεn umu.»

<sup>18</sup> Nε \*Sufmbε ya ciεnb niire' wɔ ki ye: «A li tien mi lε yɔkm ya bonn kí wuɔn tε kí ye a ηmɔbe usen á tien a teh nà nɔ?» <sup>19</sup> Nε u ye: «We mεn Uwien ya duku kuu, ηɔ ní taa iwien ita kí liεbe kí mε kù.» <sup>20</sup> Nε bi ye: «Bi taa' ibin pinan nin iluob nε ki mεn' Uwien ya duku kuu nɔ, nε sin ye a li taa iwien ita kí liεbe kí mε kù-uu?» <sup>21</sup> Ama \*Yesu lienh Uwien ya duku kùà bó nɔ, u niireh u'gbenεnt nε. <sup>22</sup> Uyo wà u mεkre' bitenkpiib ni nɔ, nε u'panpaankaab tiere' ki ye u là len' nɔ. Nε ki teke' nà kele' \*Uwien ya gbɔnku ni nɔ nin \*Yesu ya lenm ki jin'.

### *Yesu bεn nà te unil ya fèl ni*

<sup>23</sup> \*Yesu là te Yerusalem ni nε Pak ya nacenku nɔ ya yo, ki tien' miyɔkm ya bont, binib laa', nε bà yεbe teke' wɔ ki jin'. <sup>24</sup> Ama wɔn ηa du bi'bo, kime u bεn binib kε ya yεnmaale. <sup>25</sup> Wa nuunh uba ní tɔke wɔ unil ya gber. Kime wɔn bugben bεn nà te unil ya fèl ni.

## 3

### *Yesu nin Nikodεm ya gber*

<sup>1</sup> Ujε uba là te bi yih wɔ Nikodεm, u yé \*Farisiεnmbε ya cεkl ya nil nε, ki yé Sufmbε ya ciεnb ya uba. <sup>2</sup> U baa' \*Yesu saan kuñɔnku ki tɔke' wɔ ki ye: «Cεnbaa, ti bεn ki ye Uwien

\* **2:14** Liike Matie 12:5; Mark 11:11; Luk 2:27.

nε sɔn' ηε ní á lá wɔkn tε, kime Uwien ηa te nin nil la, wa rí fre kí tien yɔkm ya bont tɛn a teh ma bo nɔ.» <sup>3</sup> Nε \*Yesu tɔke' wɔ ki ye: «N tɔkeh ηε imɔn nε, ba maa' unil wà ki lere' la\*, udaan ηa rí fre kí lε Uwien ya bεl.» <sup>4</sup> Nε Nikodεm ye: «Unil tien' ucien la, bi li tien mila kí maa wɔ kí lere? U li fre kí liebe kí kɔ u'naa ya benku ni ηɔ bε rí maa wɔ kí lere-ee?» <sup>5</sup> Nε \*Yesu ye: «N tɔkeh ηε imɔn nε, ba maa' nil wà miñunm nin \*Mifuoñaanm ni la, udaan ηa rí fre kí kɔ Uwien ya bεl ni. <sup>6</sup> Unisaal maa' nà la, nǐ yé unisaal nε. \*Mifuoñaanm maa' nà la, nǐ yé \*Mifuoñaanm yaann nε. <sup>7</sup> La cère n tɔke' ηε ma ki ye nǐ kpε bε rí maa nε kí lere nɔ rí cuo ηε miyɔkm. <sup>8</sup> Mitafaam† joh mǐ yíe nà bó nε, nε a ciuh mi'waaku bó, ka ben mǐ ñen' nà, ki niireh nin mǐ joh nà. Unil wà kε \*Mifuoñaanm maa' wɔ la, u'mɔ yaam te nɔ nε.»

<sup>9</sup> Nε Nikodεm niire' wɔ ki ye: «Nǐ li tien mila kí tien-i?» <sup>10</sup> Nε \*Yesu jiin' wɔ ki ye: «A yé unil wà wɔknh Israyel yaab Uwien ya gbεr, nε ka ben n len' nà nɔ ya tingi-ii? <sup>11</sup> N tɔkeh ηε imɔn nε, ti lienh ti ben nà nε, ki kundeh imɔn ti'nun laa' nà bo, nε na teknh ti'mɔnkun ki jinh. <sup>12</sup> N tɔkeh nε uηɛndun wuu ni ya gbεr, nε na teknh tù ki jinh. N tɔke' nε paaki bó yaar la, ni li tien mila kí teke tù kí ji? <sup>13</sup> Unil ya Bijε wà ñen' paaki bó ki jüre' ní ηa rí la, uba ηa don' paaki bó.

<sup>14</sup> «Bi li fin Unil ya Bijε paaki bó tɛn Moyis là fin' ma uwe udɔ bo ki caan' kupenpelku ni nɔ nε, <sup>15</sup> ηɔ unil wà kε teke' wɔ ki jin' la, wɔ rí lε limiel là ηa ηmɔbe gbenm.» <sup>16</sup> Imɔn, Uwien yíe uηɛndun ya nib ki gbien', nε ki taa' u'Bubaabk ki de' ηɔ wà kε teke' wɔ ki jin' la, u la kpo kí juore fεnm, ama wɔ rí lε \*limiel là ηa ηmɔbe gbenm. <sup>17</sup> Kime Uwien ηa sɔn' ní u'Bijε uηɛndun ni wɔ rí lá biin uηɛndun ya nib, u sɔn' wɔ ní wɔ rí lá ηmiεn bε nε. <sup>18</sup> Wà kε teke' wɔ ki jin' la, Uwien ηa rí biin wɔ. Ama wà kε ηa teke' wɔ ki jin' la, Uwien biin' wɔ ηɔ, kime wa teke' wɔn Uwien ya Bubaabk ki jin'. <sup>19</sup> Uwien ñiikeh nà bo sɔ ki biindeh binib: kuwenwenku baa' uηɛndun ni, nε binib yíe licinñunl ki cɛn' kuwenwenku, kime bi'tuon bre nε. <sup>20</sup> Wà kε teh nà bre nɛn kuwenwenku nε, ka yíe wɔ rí nεkn kù, kime u jie u'tuonbiere nɔ li ñε upaan bo nε. <sup>21</sup> Wà kε teh nà mɔn joh kuwenwenku ni nε, nε binib rí lε u'tuon kí bende kí ye u teh Uwien yíe nà nε.

### *San len' Yesu ya gbεr ma bo*

<sup>22</sup> Ni ya puoli bó nε \*Yesu nin u'panpaankaab jon' Sude ya tinfεnm ni, ki tǐ te ni'bó, nε u siih binib Uwien ya ñunm. <sup>23</sup> San mɔ là siih binib Uwien ya ñunm, εnɔn ya du ni nε, kime miñunm là yebe ni'saan. Udu nɔ kpieke Salim ya du nε. Binib là bàareh u'saan, nε u siih bε Uwien ya ñunm. <sup>24</sup> U ya yo ki laa' ba laan là cuo' San ki tǐ pεkn'.

<sup>25</sup> San ya panpaankaab findeh nin Suf uba bi sɔkreh bi'ba ki paakeh iyaaje bok ye ma bo nɔ bo nε. <sup>26</sup> San ya panpaankaab baa' ki lá tɔke' wɔ ki ye: «Cεnbaa, unil wà là te a'saan Sudεn ya kpenpuol bó, a tɔke' binib u'gbεr nɔ, u'mɔ ji siih binib Uwien ya ñunm nε, nε binib kε ji joh wɔn saan.» <sup>27</sup> Nε San tɔke' bε ki ye: «Nil ηa rí fre kí li ηmɔbe niba ηɔ Wien ηa de' wɔ nε. <sup>28</sup> Ninbi bugben yé n'mɔnkunb ki ye n là len' ki ye min ηa yé Uwien ya Nigendke \*Kristo, ama Uwien sɔn' nni rí liere wɔn nε usen. <sup>29</sup> Ujε kuɔndeh upii la, wɔn si upii. Piice ya jɔ wɔn te ugbe nε ki cengeh u'jɔ bó. U tǐ cii' u'jɔ ya niεke bó uyo wà la, nε u'yεnm rí sɔnge cεn. N'mɔ ηmɔbe u ya yεnsonge nε ki tǐ gben'. <sup>30</sup> Nǐ kpε wɔn \*Kristo ya yel rí li tùɔreh ki kpíenh, nε n'yaal rí li sondeh.»

### *Unil wà ñen' paaki bó ni ya gbεr*

<sup>31</sup> Wɔn wà ñen' paaki bó ní nɔ nε cɛn' nà kε te. Unil wà ñen' uηɛndun ni yé uηɛndun ya nil nε, ki lienh uηɛndun ya lenm. Unil wà ñen' paaki bó ní nε cɛn' nà kε te. <sup>32</sup> U kundeh imɔn u laa' nà nin u cii' nà bo nε. Ama uba mɔnɔn ηa teke' u'mɔnkun nɔ. <sup>33</sup> Wà kε teke' u'mɔnkun nɔ la, u tuo' ki ye Uwien yé ugbe mɔndaan nε. <sup>34</sup> Unil wà Uwien sɔn' wɔ ní nɔ lienh wɔn Uwien ya gbεr nε, kime Uwien taa' \*u'Fuoñaanm ki de' wɔ ki tǐ gben' nε.

\* **3:3** Grεkmbε ya lenm ya ñɔbonl là teh kí maa kí lere nɔ li fre kí ye kí maa paaki bó mɔ. † **3:8** Grεkmbε ya lenm ya ñɔbonl là teh Mifuoñaanm nɔ li fre kí ye mitafaam mɔ.

<sup>35</sup> Uwien Baa yíe u'Bijε, nε ki taa' nà kε te ki ηukn' wə. <sup>36</sup> Wà teke' Uwien ya Bijε ki jin' la, u ηməbe limiel là ηa ηməbe gbenm nε. Ama wà ηa tuo' ki teke' Uwien ya Bijε ki jin' la, wa rí lε limiel nnə. Uwien ya mutuol li tuu ki te u'bo nε.

## 4

### *Yesu nin Samari ya pii uba ya gber*

<sup>1</sup> \*Yesu cii' binib təke' \*Farisiεnmbe ki ye u teh binib u'panpaankaab ki siih be Uwien ya n̄unm ki cεn' San. <sup>2</sup> Imə̀n, \*Yesu bugben ηa là siih nib Uwien ya n̄unm. U'panpaankaab nε là siih be. <sup>3</sup> \*Yesu cii' bi lienh nnə ma nnə nε u siere' Sude ya tinfenm ni, ki liebeh Galile ya tinfenm bó. <sup>4</sup> U joh Galile la, u li n̄ε \*Samari ya tinfenm ni nε.

<sup>5</sup> U t̄i baa' Samari ya du uba ni, bi yih wù Sikar. Sakəb là de' u'bijε Yosef bukpaabu b̄ua nnə ηa fəke nin ni'saan. <sup>6</sup> Sakəb ya n̄unbunl te n̄en saan nε. \*Yesu cuon' ki jii', nε ki k̄ele' liñunbunl nnə ya n̄əgbel bo. N̄i là tuo kuwensiiku ya yo nε.

<sup>7</sup> Samari ya pii uba baa' wə rí lun miñunm, nε \*Yesu təke' wə ki ye: «Pu nni miñunm rí n̄u.» <sup>8</sup> U ya yo ki laa' u'panpaankaab jon' udu ya benku ni be rí t̄i de tijer.

<sup>9</sup> Nε upii nnə ye: «Kí ye be bo? Sin Suf mə lá mieh min Samari ya pii miñunm-ii?» U len' nnə, kimε Sufmbe ηa là nekndeh Samari yaab.

<sup>10</sup> Nε \*Yesu ye: «A bi ben Uwien ya paabu, ki t̄i bi ben wà mieh ηε miñunm nə la, sin nε bi li mie wə, nε u bi li de ηε mifuobm ya n̄unm.\*» <sup>11</sup> Nε upii nnə ye: «Cεnbaa, ηa ηməbe bonlunkaann, liñunbunl nnə mə n̄ə, a li lε mifuobm ya n̄unm nnə lε saan-i? <sup>12</sup> T̄i'yaaje Sakəb nε là de' te liñunbunl lie nə. Wə̀n nin u'bijieb nin u'went kε là n̄un' li'ñunm. Sin nε cεn' wə̀n-ii?» <sup>13</sup> Nε \*Yesu təke' wə ki ye: «Wà kε n̄uh mie ya n̄unm la, uñuñun li liebeh ki coh wə nε. <sup>14</sup> Ama wà kε li n̄u n li de wə miñunm m̄a nnə, n̄uñun ηa ji li cuo wə fiebu. N li de wə miñunm m̄a nnə li te t̄en liñunbunl nε u'ni, kí li dienh wə limiel là ηa ηməbe gbenm.» <sup>15</sup> Nε upii nnə ye: «Cεnbaa, de nni mi ya n̄unm, n̄uñun ji la cuo nni ηə n ji la b̄aareh niε saan ki luh.»

<sup>16</sup> Nε \*Yesu ye: «Jo kí t̄i yin a'cε kí liebe ní.» <sup>17</sup> Nε u ye: «Ma ηməbe cε.» Nε \*Yesu j̄iin' wə ki ye: «A ye ηa ηməbe cε ma nə, n̄i yé imə̀n nε. <sup>18</sup> Kimε a kun' ticer ki t̄i dukn' jeb bijun nε. A ji te uje wà saan fenfenno nə ηa yé a'cε. A len' ma nə, a təke' tigbemə̀nt nε.» <sup>19</sup> Nε upii nnə ye: «Cεnbaa, n bende' ki ye a yé \*Uwien ya n̄əbonsəkn̄l nε. <sup>20</sup> Tinbi Samari yaab ya yaajeb puke' Uwien lijuəl lie bo nε, nε ninbi \*Sufmbe ye bi li pukeh Uwien nà saan si: Yerusalem ni nε.»

<sup>21</sup> Nε \*Yesu təke' wə ki ye: «Upii, teke kí ji kí ye, uyo we ní, nib ηa ji lá li pukeh Baa Uwien lijuəl lie bo, ka ji li pukeh wə Yerusalem mə ni. <sup>22</sup> Ninbi Samari yaab pukeh Uwien, nε ka ben wə. Tinbi \*Sufmbe wə̀n, ti ben wə, nε ki pukeh wə. Kimε wà li ηmien binib kε n̄en' \*Sufmbe ni nε. <sup>23</sup> Uyo we ní, nε n̄i yé fenfenno nε, bipupukmə̀nb li pukeh Baa Uwien bi'f̄el ni nε imə̀nmə̀n. Kimε Uwien nuunh bi ya nib ya bol nε be rí li pukeh wə. <sup>24</sup> Uwien ηa ηməbe gbenent, ba lenh wə. Binib b̄a kε pukeh wə nnə li pukeh wə bi'f̄el ni† nε imə̀nmə̀n.»

<sup>25</sup> Nε upii nnə ye: «N ben ki ye Uwien ya Nigendkε, wà bi yih wə \*Kristo nnə, li baa ní. U lá baa' la, u li təke te tibont kε ya tingi.» <sup>26</sup> Nε \*Yesu ye: «Min wà lienh ηε nə, n yé wə̀n nε.»

<sup>27</sup> U ya yo nε u'panpaankaab liebe' ní. Bi laa' wə̀n nin upii təkeh tigber ma nnə nε n̄i cuo' be miyəkm, ama uba ηa kaabe' ki niire' wə ki ye: «A yíe ba u'saan-i?» Bii «A təkeh wə be ya gber-i?»

<sup>28</sup> N̄en saan nε upii nnə taa' u'cuəl ki sien', ki jon' udu ya benku ni, ki t̄i təke' binib ki ye: <sup>29</sup> «D̄en m̄en kí t̄i liike uje wà təke' nni n tien' nà kε nə-a! Wa lii yé Uwien ya Nigendkε Kristo-oo?» <sup>30</sup> Nε bi n̄en' udu ni ki joh \*Yesu bó.

\* **4:10** Grεkmbε ya lenm ya n̄əbonl là te mifuobm ya n̄unm nnə li fre kí ye miñunbungkaam mə. † **4:24** Grεkmbε ya lenm ya n̄əbonl là teh bi'f̄el ni nnə li fre kí ye Mifuoñaanm ya tuəm bo mə.

31 Upii nnɔ liebe' udu bó uyo wà nnɔ, nɛ \*Yesu ya panpaankaab gbáanh wɔ ki teh: «Cɛnbaa, ji tijier.» 32 Nɛ u tɔke' bɛ ki ye: «N ηmɔbe tijier tuba ní ji na ben tù.»

33 Nɛ u'panpaankaab niireh tɔb ki teh: «Uba nɛ nín tuke' tijier ki lá de' wɔ bii?» 34 Nɛ u tɔke' bɛ ki ye: «N'jier si ní tien wà sɔn' nni ní yíe nà nɛ, kí sɔn u'tuonl kí tí gben. 35 Ninbi pɔh mikpenjɛnm ki teh: «Ní sɛn' inmaale inan nɛ nè ní kpaan tikpejier ya taanm.» Ama min tɔkeh nɛ nɛ: yaare mɛn kí liike, tikpejier ben' ki kpaan' mitaanm ηɔ. 36 Wà taakeh tikpejier teknh u'paaku nɛ, ki taakeh ní'kɛ limiel là ηa ηmɔbe gbenm bo. Nɛn nɛ li cère wà buuh nin wà taakeh kɛ ní li ηmɔbe uyɛnsɔnge. 37 Mikpenjɛnm mà teh: «Uba buuh, nɛ utɔ taakeh» nnɔ yé imɔn nɛ. 38 Kimɛ n sɔn' nɛ ní tí taan tikpejier tà na jènde' tu'bo nɛ. Biba nɛ jènde' ki sɔn', nɛ ninbi jondɛh bi'tontonku bo.»

39 Upii nnɔ tɔke' Samari ya tinfɛnm yaab ki ye \*Yesu tɔke' wɔ u tien' nà kɛ ma nnɔ nɛ bi teke' \*Yesu ki jin' ki yebe, 40 ki baa' u'saan, ki gbáan' wɔ ki ye wɔ ní juore bi'saan, nɛ u tien' nin bɛ iwien ile. 41 Binib teke' wɔ ki jin' wɔn bugbɛn ya lenm bo ki yebe ki cɛn' bà teke' wɔ ki jin' upii nnɔ ya lenm bo nnɔ. 42 Nɛ bi tɔke' upii nnɔ ki ye: «Na ji yé a ya lenm baba bo nɛ ti teke' wɔ ki jin'. Tinbi bugbɛn cii' u len' ma bo, ki bɛnde' ki ye u mɔnbe ki yé uɛndun ya Nmienl nɛ.»

### *Yesu cère' utonsɔncien uba ya buk faake'*

43 Iwien ile nnɔ gèbre', nɛ \*Yesu ñɛn' ni'saan ki jon' Galile ya tinfɛnm ni. 44 Wɔn bugbɛn nɛ là len' ki ye \*Uwien ya ñɔbonsɔknl kɛ ñɔbonsɔknl ya tiema du ni yaab nɛ ηa boh wɔ. 45 Ama u tí baa' Galile ya tinfɛnm ni ma nnɔ, bi teke' wɔ kucɛnku mɔnmɔnm nɛ, kimɛ bi'mɔ là jon' Yerusalem bɛ ní tí jele kunacɛnku ma nnɔ, bi là laa' u tien' nà kɛ kunacɛnku nnɔ ya yo.

46 U liebe' ki baa' Kana ya du ni, Galile ya tinfɛnm ni, u là cère' miñunm kpɛnde' midaam nà saan nnɔ. Gobina ya tonsɔncien uba te Kapɛrnawum ya du ni u'bijɛ bun. 47 Utonsɔncien nnɔ cii' \*Yesu ñɛn' Sude ya tinfɛnm bó ki baa' Galile ya tinfɛnm ni, nɛ u baa' ki gbáan' \*Yesu ki ye wɔ ní jo u'den, kí cère u'bijɛ ní faake, kimɛ u benh wɔ ní kpo nɛ. 48 Nɛ \*Yesu tɔke' wɔ ki ye: «Na laa' yɔkm ya ðiɛku nin yɔkm ya bonn la, na li li teke nni kí ji-a!» 49 Nɛ utonsɔncien nnɔ tɔke' wɔ ki ye: «Yonbdaan, jo n'den tonm! A taande' la, a li tí baa kí lɛ n'buk nnɔ kpo'-a.» 50 Nɛ \*Yesu ye: «Li kunh, a'bijɛ faake'-a.»

Ujɛ nnɔ teke' \*Yesu tɔke' wɔ nà nnɔ ki jin', nɛ ki liebe' ki kùnh. 51 U kùnh ma nnɔ nɛ u'tonsɔnb tuobe' wɔ usɛn ni ki tɔke' wɔ ki ye: «A'bijɛ faake'-a.»

52 Nɛ u niire' bɛ ki ye: «U lɛ yo ba nɛ u'gbɛnɛnt tunge?» Nɛ bi tɔke' wɔ ki ye: «Wenli kutaajuɔku kukurku kuba ya yo nɛ u'gbɛnɛnt wun sɔnge'.» 53 Nɛ ujɛ nnɔ bɛnde' ki ye u ya yo nɛ \*Yesu wun tɔke' wɔ ki ye u'bijɛ faake' ηɔ. Nɛn saan nɛ wɔn nin u'den yaab kɛ teke' \*Yesu ki jin'.

54 Nɛn nɛ tien' miyɔkm ya bonlienn nà \*Yesu tien' nè uyo wà u ñɛn' Sude ya tinfɛnm ni, ki liebe' ní Galile ya tinfɛnm ni nnɔ.

## 5

### *Ujɛ uba ya tɔan nin u'nuɔ faan' Yesu cère' u faake'*

1 Ni ya puoli bó nɛ Sufmbe ya nacɛnku kuba te Yerusalem ni, nɛ \*Yesu don' ni'bó. 2 Bi là lùke' kujɛbieku kuba Yerusalem ni, kù te bi yih nà saan ipe ya nañɔbu nnɔ. \*Sufmbe ya lenm ni, bi yih kujɛbieku nnɔ Betsata nɛ. Tininbont tunjun là se ki guɔn' kù. 3 Biwiɛnb ðɔðɔ tininbont nnɔ ni ki yebe. Biba yé ijùɔn, bitɔb yé idien, bitɔb mɔ ya nuɔ nin bi'taan kɛ faan'. [Bi'kɛ là ðɔ ki gu uyo wà miñunm li jènge nɛ. 4 Kimɛ uyo uba la, Uwien ya tond uba tí ní jiire ní nɛ kí lá kɔ kujɛbieku nnɔ ni, kí kùkùre miñunm. Uyo wà u baa' ki lá kùreh uwien wà kpiɛ' ki kɔn' la, u bun iwien yà kɛ la, u li faake nɛ.]\* 5 Ujɛ uba mɔ là te ni'saan ki bun ibin pita nin iniin. 6 \*Yesu laa' u ðɔ, nɛ u bɛnde' ki ye u bunge' ní wuɔke'-a. Nɛ u

\* 5:4 Bi kpiɛ' ki kele' tigbɔnt tà nnɔ ya tuba ni migbiirm 5:3b-4 ηa te tu'ni.



niire' wə ki ye: «A yíe á faake-ee?» <sup>7</sup> Nε uwien nnə jiin' wə ki ye: «Yonbdaan, miñunm lá jèngèh la, ma ηməbe nil wà li taa nni kí kuəñ mi'ni. N benh rí kə la, nε uba rí kpiε nin nni kí kə.» <sup>8</sup> Nε \*Yesu təkε' wə ki ye: «Fii, kí yuure a'nagεnl, kí li cuonh.» <sup>9</sup> Nε u faake' i ya taañ bo, ki yuure' u'nagεnl, ki cuonh.

Ni'daali là yé \*Saba ya daali nε. <sup>10</sup> Nεn bo nε \*Sufmbε ya ciεnb təkε' uje wà faake' nnə ki ye: «Dinnə yé \*Saba ya daali nε, ηa ηməbe sεn a yuure' a'nagεnl kí tuke.» <sup>11</sup> Nε u təkε' bε ki ye: «Uje wà cère' n faake' nnə, wəñ nε ye rí yuure n'nagεnl kí li cuonh.» <sup>12</sup> Nε bi niire' wə ki ye: «U lε daan nε ye á yuure a'nagεnl kí li cuonh-i?»

<sup>13</sup> Nε uje wà faake' nnə ηa bende' unil wà nε, kimε linigol là te ni'saan ma nnə wa bende' \*Yesu taa' nà bó.

<sup>14</sup> Uyo uba nε \*Yesu lá laa' wə Uwien ya duku ya luo bo, nε ki təkε' wə ki ye: «Liike, fεnfennə a faake'-a! A la ji rí tien biere ηə ijend yà cεn' yíe nə la tu ηε.» <sup>15</sup> Nε uje nnə jon' ki tí təkε' \*Sufmbε ya ciεnb ki ye \*Yesu nε cère' u faake'. <sup>16</sup> Nεn bo nε Sufmbε ya ciεnb cin' ki kəñh nin Yesu, kimε u cère' unil faake' \*Saba ya daali. <sup>17</sup> Ama \*Yesu təkε' bε ki ye: «N'Baa sənñ itùon nε haali nin fεnfennə, nε n'mə sənñ.» <sup>18</sup> \*Yesu len' nnə ma nnə nε Sufmbε ya ciεnb tùrèh ki nuunh bε rí ku wə. Na yé u saa' \*Saba ya daali ya kuəl baba nε bi nuunh bε rí ku wə, kimε u yin' Uwien wəñ bugbεn ya Baa ma nnə u taa' u'ba ki kraan' Uwien nε.

### *Uwien de' u'Bijε mituəm*

<sup>19</sup> Nεn saan nε \*Yesu liebe' ki təkε' bε ki ye: «N təkεh nε iməñ nε, Uwien ya Bijε ηa rí fre kí tien niba u'ba bo. U laa' u'Baa teh nà nnə, u'mə teh nεn nε. U'Baa teh nà nnə, u'mə teh nεn nε, <sup>20</sup> kimε Baa yíe u'Bijε, nε ki wuəñ' wə u teh nà kε. U li wuəñ wə itùon yà cεn' yíe nə, ηə nè rí tùrèh kí cuo nε miyəkkm. <sup>21</sup> Uwien Baa məkreh bitenkpiib, ki cèreh bi fuobe ma nnə, nnə nε u'Bijε mə li cère u yíe bà nnə rí li fuobe. <sup>22</sup> Uwien Baa ηa buh nil uba buur, u cèbe' u'Bijε nε tibuur kε, <sup>23</sup> ηə binib kε rí kpiεke u'Bijε tεn bi kpiεkreh u'Baa ma bo. Unil wà kε ηa kpiεke' Uwien ya Bijε la, wa kpiεke' u'Baa wà sən' wə ní nnə mə nε.

<sup>24</sup> «N təkεh nε iməñ nε, unil wà kε cii' n'gber, ki teke' wà sən' nni ní ki jin' la, u laa' limiél là ηa ηməbe gbenm nε. Uwien ηa rí biin udaan. U ñεn' mikuum ni nε, ki kəñ' mifuobm ni. <sup>25</sup> N təkεh nε iməñ nε, uyo we ní, nε nì yé fεnfennə nε, bitenkpiib li cii Uwien ya Bijε ya niεke bó. Bà li cii nnə li lε limiél. <sup>26</sup> Baa yé limiél ya daan ma nnə nε ki cère' u'Bijε mə yé limiél ya daan, <sup>27</sup> ki de' wə ufaa wə rí bu binib tibuur, kimε u yé Unil ya Bijε nε. <sup>28</sup> La cère mεn niε kε rí cuo nε miyəkkm. Uyo we ní, binib bà kε te ikul ni nnə li cii u'niεke bó, <sup>29</sup> kí ñε ní. Bà sən' lituonmənəmnl nnə li məkre kí lε limiél, nε bà sən' itùonbiere nnə mə li məkre ηə Uwien rí bu bε tibuur.»

### *Nà wəngèh ki teh Yesu mənbe ki ñεn' ní u'Baa Uwien saan*

<sup>30</sup> «Ma rí fre kí tien niba n'ba bo. N buh binib tibuur n'Baa ye ma bo nε. N'buur cuube nε, kimε ma nuunh n yíe nà, n nuunh wà sən' nni ní nnə yíe nà nε. <sup>31</sup> N kundeh n'ba bo iməñ la, na rí tuo n'məñkun nnə. <sup>32</sup> Uba nε kundeh n'bo iməñ, nε n bεn ki ye u lienh n'bo nà nnə, yé iməñ nε. <sup>33</sup> Ninbi bugbεn là sən' ni'tondb San saan, nε u tí len' n'bo tigbεmənt. <sup>34</sup> Na yé n nuunh unil ya məñkun nε cère' n tiere' nε San ya gber. N lienh nnə ηə ní ηmεre nε. <sup>35</sup> San là te tεn lifrl là bi se' lè li wendeh nε. Ninbi bugbεn là tuo' ki pokn' u'wenwenku ni uyo uba. <sup>36</sup> Ama niba kundeh n'bo iməñ, ki cεn' San ya məñkun. Nεn si: n'Baa de' nni itùon yà nnə n sənñ yεn nε, nε n li sən yè kí tí gben nε. Itùon bugbεn nε wəngèh ki teh n'Baa nε sən' nni ní. <sup>37</sup> N'Baa wà sən' nni ní nnə, wəñ bugbεn kundeh n'bo iməñ nε. Ama na cii' u'niεke bó, ka laa' wə mə. <sup>38</sup> U'gber ηa te ni'fèl ni, kimε na teke' u sən' wà ní nnə ki jin'. <sup>39</sup> Ni tùrèh ki fiinh \*Uwien ya gbəñku, ki maaleh ki teh, ni li lε kun ni nε limiél là ηa ηməbe gbenm. Kugbəñku nnə nε kundeh n'bo iməñ. <sup>40</sup> Nε na yíe ní baa n'saan kí lε limiél nnə.

<sup>41</sup> «Na yé n nuunh ukpiεke binib saan nε. <sup>42</sup> Ama n bεn nε, ninbi ηa ηməbe Wien ya yíem ni'fèl ni. <sup>43</sup> Min baa' n'Baa ya yel bo nε, nε na teke' nni. Ama unil baa' wəñ bugbεn

ya yel bo la, ni teknh wə nɛ. <sup>44</sup> Ni yíe ní li kpiɛkreh tɔb nɛ, ka nuunh kpiɛke wà ñɛh ní Uwien baba saan nnɔ. Nɛn bo, ni li tien mila kí teke nni kí ji? <sup>45</sup> Ni la maaleh ki teh min nɛ li biin nɛ n'Baa saan. Ni du Moyis wà bo nnɔ, wɔn nɛ li biin nɛ. <sup>46</sup> Ni bi teke' Moyis ki jin' la, ni bi li teke n'mɔ kí ji nɛ, kimɛ Moyis là kele' n ya gber nɛ. <sup>47</sup> Na teke' Moyis kele' nà nnɔ ki jin' ma nnɔ, ni li tien mila kí teke n'gber kí ji?»

## 6

### *Yesu jin' linigociɛnl liba*

*(Matie 14:13-21; Mark 6:30-44; Luk 9:10-17)*

<sup>1</sup> Ni ya puoli bó nɛ \*Yesu puore' Galile ya ñunciɛnm mà bi liebe' ki yih mè Tiberiyad ya ñunciɛnm nnɔ. <sup>2</sup> Binib laa' u teh miyɔkm ya bont, ki cèreh biwiɛnb faakreh ma nnɔ nɛ bi pɛ u'bo ki yebe. <sup>3</sup> Nɛ \*Yesu nin u'panpaankaab don' lijuɔl ki tí kèle'. <sup>4</sup> Ni là sɛn' waamu nɛ \*Sufmbɛ ya Pak í jele. <sup>5</sup> \*Yesu yaare' ki laa' binib we ní u'saan ligol, nɛ u niire' Filip ki ye: «Ti li de tijier ɛ saan nɔ binib biɛ í ji?» <sup>6</sup> Wɔn bugben là ben u li tien ma bo, nɛ ki niire' Filip nɔ wə í cii u li len kí ye bà. <sup>7</sup> Nɛ Filip jiiin' wə ki ye: «Ti taa' iwien kobiile ya tuonl ya paaku mɔnɔn ki de' tijier la, ta í baa unil kɛ í ɛ finfimu kí ji.»

<sup>8</sup> Nɛ u'panpaankaab ya uba, bi yih wà Andre u yé Simɔn Pier ya ninjɛ nnɔ tɔke' \*Yesu ki ye: <sup>9</sup> «Kibujɛbuk kiba te niɛ saan ki ñmɔbe kpɔnɔ unun nin mujɛnwawaamu mule ama binib biɛ yebe ki kpɛ ma nɔ, ní li tien bɛ ba?»

<sup>10</sup> Nɛ \*Yesu tɔke' bɛ ki ye: «Cère mɛn binib nnɔ kɛ í kèle.» Timɔsɔngt là yebe ni'saan, nɛ bi kèle' tu'bo. Bijɛb là li baa tɛn itur inun. <sup>11</sup> \*Yesu yuure' kpɔnɔ nnɔ, ki faare' Uwien, ki gbiire' binib nnɔ, nɛ ki tien' nnɔ mujɛnwawaamu nnɔ mɔ. U là de' bi'kɛ bi yíe ma bo nɛ. <sup>12</sup> Bi'kɛ ñmɔn' ki gbo', nɛ u tɔke' u'panpaankaab ki ye bɛ í tantaan tijenjɛnt tà sɛn' nnɔ nɔ niba la ñende. <sup>13</sup> Bi tantaan' binib nnɔ ñmɔn' kpɔnɔ unun nnɔ ki gbo' tijenjɛnt tà sɛn' nnɔ, ki gbien' ikpɛncub piik nin ile.

<sup>14</sup> Binib nnɔ laa' \*Yesu tien' miyɔkm ya bonn nnɔ ma nnɔ nɛ ki ye: «Ujɛ wuɔ mɔnbe ki ye \*Uwien ya ñabonsɔknl wà li baa unɛndun wuu ni nnɔ nɛ.» <sup>15</sup> \*Yesu bɛnde' ki ye bi nuunh bɛ í cuo wə kí tien bi'ber, nɛ ki siere' bi'saan, ki liebe' ki don' lijuɔl u'baba.

### *Yesu cuonh miñunm bo*

*(Matie 14:22-33; Mark 6:45-52)*

<sup>16</sup> Kutaajuɔku juɔre' ma nnɔ nɛ u'panpaankaab bure' miñunciɛnm bó, <sup>17</sup> ki tí kɔn' buñɛrbu, ki joh miñunciɛnm ya kpenpuol, Kapɛrnawum ya du bó. Ni biire' ki laa' \*Yesu ña laan baa' bi'saan. <sup>18</sup> Kutafaaku fii' ki joh ki gbiekeh, nɛ iñungbegbel fih. <sup>19</sup> Bi kùre' buñɛrbu ki baa' kɔnsini unun bii uluob, nɛ ki laa' \*Yesu cuonh miñunm bo ki ñekndeh buñɛrbu nnɔ, nɛ bujɛwaanbu cuo' bɛ. <sup>20</sup> Nɛ u tɔke' bɛ ki ye: «Min nɛ. La sɛn mɛn jɛwaanbu.» <sup>21</sup> U len' nnɔ ma nnɔ bi'yɛnm sɔnge nɛ bi taa' wə buñɛrbu nnɔ ni. Nɛ i ya tãan bo bi pɔk ki baa' ugbe, bi li ñɛ nà saan buñɛrbu ni.

### *Linigol nuunh Yesu*

<sup>22</sup> Kutaaku faa', nɛ linigol là juore' miñunciɛnm ya gbaatɔl nnɔ tiere' ki ye buñɛrbu buba nɛ wun te ni'saan, ki bɛnde' ki ye bù wun fii' uyo wà nnɔ, \*Yesu ña kɔn' bù, u'panpaankaab baba nɛ wun kɔn' bù ki bure'. <sup>23</sup> Ama iñertɔ ñɛn' Tiberiyad ya du bó ní ki baa' nà saan Yonbdaan wun taa' kpɔnɔ ki faare' Uwien, ki de' binib bi ñmɔn' nnɔ. <sup>24</sup> Linigol nnɔ laa' \*Yesu nin u'panpaankaab ña ji te ni'saan ma nnɔ nɛ bi kɔn' iñerde nnɔ, ki joh miñunciɛnm ya kpenpuol, Kapɛrnawum ya du bó, bɛ í tí nuun wə.

### *Yesu nɛ yé limiɛl ya jier*

<sup>25</sup> Bi tí laa' wə miñunciɛnm ya kpenpuol, nɛ ki niire' wə ki ye: «Cɛnbaa, a baa' niɛ saan u ɛ yo ba?» <sup>26</sup> Nɛ u tɔke' bɛ ki ye: «N tɔkeh nɛ imɔn nɛ, ni jin' tijier ki gbo' ma nnɔ, nɛn bo nɛ ni nuunh nni, na yé ni bɛnde' miyɔkm ya bont nnɔ ya tingi nɛ ki nuunh nni. <sup>27</sup> La sɔnh mɛn ki nuunh tijier tà saah. Ama li sɔnh mɛn ki nuunh tijier tà dien nɛ limiɛl là ña

ημῶβε gbenm. Unil ya Bijε ne li de ne tijier bugben, kime Baa Uwien bugben wuon' ki ye u de' wɔn ne u'tuam.»

<sup>28</sup> Ne bi niire' wɔ ki ye: «Ti li tien mila kí sɔn Uwien yie ituon yà?» <sup>29</sup> Ne \*Yesu ye: «Uwien yie lituonl là si: ní teke min wà u sɔn' nni ní nnɔ ne kí ji.» <sup>30</sup> Ne bi ye: «A li tien mi le yɔkm ya bonn tí le ηɔ kí teke ηε kí ji? A li sɔn ba?» <sup>31</sup> Ti'yaajeb là jin' tijier tà bi yih tù \*mann nnɔ kupenpelku ni. Ní kele' \*Uwien ya gbɔnku ni ki ye: «U de' be tijier tà ñen' paaki bó ní be ní ji.» <sup>32</sup> Ne \*Yesu ye: «N tɔkeh ne imɔn ne, na yé Moyis ne là de' ne tijier tà ñen' paaki bó ní nnɔ. Ama n'Baa ne dienh ne tijiemɔnt tà ñeh paaki bó ní. <sup>33</sup> Kime tijier tà Uwien dienh ne tù nnɔ, tun ne ñeh paaki bó ní ki dienh uɛndun ya nib limiel.» <sup>34</sup> Ne bi ye: «Yonbdaan, li dienh te tu ya jier uyo ke.» <sup>35</sup> Ne u ye: «Min ne yé limiel ya jier. Wà ke baa' n'saan la, kɔnm ηa ji li cuo wɔ. Wà ke teke' nni ki jin' la, ñuñun ηa ji li cuo wɔ. <sup>36</sup> N kpie' ki tɔke' ne ηɔ: ni laa' nni, ama na nín teke' nni ki jin'. <sup>37</sup> Binib bà ke n'Baa taah be ki dienh nni li baa n'saan. Wà ke baa' n'saan la, ma ní wiε wɔ. <sup>38</sup> Kime n ñen' paaki bó ní ní lá tien wà sɔn' nni ní yie nà ne, ma baa' ní tien n'bugben yie nà. <sup>39</sup> Wà sɔn' nni ní yie nà si: u de' nni binib bà ke nnɔ, n la cère bi'ni uba ní bole, ama ní mekre bi'ke uwenfɔrke ya daali\*. <sup>40</sup> Kime n'Baa yie nà si: «Binib bà ke laa' min u'Bijε ki teke' nni ki jin' nnɔ ní le limiel là ηa ηmῶβε gbenm ne. Ne n li mekre be uwenfɔrke ya daali.» »

<sup>41</sup> U ya yo ne Sufmbe ya cienb bunbeh u'bo, kime u len' ki ye: «Min ne yé tijier tà ñen' paaki bó ní.» <sup>42</sup> Ne ki tɔkeh tɔb ki teh: «Uje wuɔ Yosef ya bijε \*Yesu ηa ní-ii? Ti ben u'naa nin u'baa-a! Be tien' u len' ki ye u ñen' paaki bó ní?»

<sup>43</sup> Ne \*Yesu liebe' ki tɔke' be ki ye: «La bunbeh mɛn tɔb saan. <sup>44</sup> N'Baa wà sɔn' nni ní nnɔ ηa dère' nil, ki baa' n'saan la, nil ηa ní fre kí baa n'saan. Unil wà ke baa' n'saan la, n li mekre udaan uwenfɔrke ya daali. <sup>45</sup> Uwien ya ñɔbonsɔknb là kele' ki ye: «Uwien li wɔkn bi'ke miwɔknm.» Unil wà ke cii' n'Baa len' nà miwɔknm nnɔ ni, ki teke' nè la, udaan li baa n'saan. <sup>46</sup> Uba ηa laa' Baa Uwien, wà ñen' ní u'saan nnɔ baba ne laa' wɔ. <sup>47</sup> N tɔkeh ne imɔn ne, unil wà teke' nni ki jin' la, u ηmῶβε limiel là ηa ηmῶβε gbenm ne. <sup>48</sup> Min ne yé limiel ya jier. <sup>49</sup> Ni'yaajeb là jin' tijier tà bi yih tù \*mann nnɔ kupenpelku ni. Nin nen ke ηɔ bi kpo'. <sup>50</sup> Ama tijier tà ñen' paaki bó ní nnɔ, unil jin' tun la, wa ní kpo. <sup>51</sup> Min ne yé tijier tà ñen' paaki bó ní ki dienh binib limiel. Unil jin' tu ya jier la, u li fuobe ne uyo ke. N'gbenent ne yé tijier tà n li de tù uɛndun ya nib ηɔ be ní le limiel.» <sup>52</sup> Nen bo ne \*Sufmbe findeh bi'ηmiel ni ki teh: «Uje wuɔ li tien mila kí de' te u'gbenent tí ηmɔn-i?»

<sup>53</sup> Ne \*Yesu ye: «N tɔkeh ne imɔn ne, na ηmɔnh Unil ya Bijε ya gbenent, ka ñuh u'sèm la, miel ηa te ni'ni. <sup>54</sup> Unil wà ηmɔnh n'gbenent ki ñuh n'sèm la, limiel là ηa ηmῶβε gbenm te u'ni, ne n li mekre wɔ uwenfɔrke ya daali. <sup>55</sup> Kime n'gbenent yé tijiemɔnt ne, ne n'sèm yé midemɔnm. <sup>56</sup> Unil wà ηmɔnh n'gbenent ki ñuh n'sèm la, u te nin nni, ne n'mɔ te nin wɔ. <sup>57</sup> N'Baa yé limiel ya daan ne ki sɔn' nni ní, wɔn bo ne n fuobe. Nnɔ ne unil ηmɔnh n'gbenent la, min bo ne u'mɔ li fuobe. <sup>58</sup> Tijier tà ñen' paaki bó ní te nnɔ ne. Ta te ten ni'yaajeb là jin' tà nnɔ. Ben kpo'-a. Ama unil jin' tu ya jier la, u li fuobe ne uyo ke.» <sup>59</sup> \*Yesu là wɔknh \*Sufmbe ya taanl ya duku kùà te Kapernawum ni nnɔ ne ki len' nen ke.

### *Yesu ya panpaankaab biba siere' u'saan*

<sup>60</sup> U'panpaankaab cii' nnɔ ma nnɔ ne bi'ni bà yebe ye: «Tigber tuu faa ne. Nme li fre kí cenge tù?»

<sup>61</sup> U bende' u'yenm ni ki ye bi bunbeh tigber nnɔ bo, ne ki niire' be ki ye: «Nì saa' ni'yenm ne-εε? <sup>62</sup> Ní nín ji bi laa' Unil ya Bijε liebe' ki doh paaki bó u là te nà saan ne le? <sup>63</sup> \*Mifuoñaanm ne dienh limiel. Unisaal baba ηa ní fre kí tien bonn. Tigber tà n tɔke' ne nɔ ñen' \*Mifuoñaanm saan ne ki dienh limiel. <sup>64</sup> Ama ni'ni biba ηa teke' ki jin'.» Kime \*Yesu là ben haali micincinm bà ηa teke' wɔ ki jin', ki ben wà lá li kuore wɔ mɔ. <sup>65</sup> Ne u tí ye: «Nen bo ne n tɔke' ne ki ye n'Baa ηa cèbe' wà la, wa ní fre kí baa n'saan.»

\* **6:39** Uwenfɔrke ya daali yé lidaali là Uwien li bu binib ke tibuur nnɔ ne.

<sup>66</sup> Kí ñε u ya yo nε u'panpaankaab ni bà yεbe siere' u'saan ka ji tãkeh nin wã. <sup>67</sup> Nε u niire' piik nin bile nnã ki ye: «Ni'mã yíe ní siere bi?» <sup>68</sup> Nε Simãon Pier jiin' wã ki ye: «Yonbdaan, ti siere' la, ti li jo ημε saan-i? Sin nε ημãbe limiel là ηã ημãbe gbenm ya gber. <sup>69</sup> Ti teke' ki jin', ki ben ki ye sin nε yé Uwien ya Niñaan.»

<sup>70</sup> Nε u tãke' bε ki ye: «Min nε ηã gènde' nε piik nin bile-ee? Ama ni'ni uba yé usenpol nε.» <sup>71</sup> \*Yesu len' nnã ma nnã, u niireh Simãon Iskariyot ya bijε Sudas nε. Nin Sudas mã yé u'panpaankaab piik nin bile nnã ya uba ma kε nnã, wãn nε lá li kuãre wã.

## 7

### *Yesu ya ninjiεb ηã teke' wã ki jin'*

<sup>1</sup> Ni ya puoli bó nε \*Yesu cuonh Galile ya tinfenm ni, ka yíe wã rí jo Sude ya tinfenm ni, kime Sufmbε ya cienb bà te ni'bó nnã nuunh bε rí ku wã nε. <sup>2</sup> Tã, ñí là s'ien' waamu nε \*Sufmbε rí jele kunacenku kúa bi yih kù Ininbon ya nacenku nnã. <sup>3</sup> Nε u'ninjiεb tãke' wã ki ye: «Siere nie saan, kí li joh Sude ya tinfenm bó ηã a'panpaankaab mã rí tí lε a teh miyãkm ya bont tà. <sup>4</sup> Unil yíe u'yel rí fii la, wa buãh u sãnh nã. A teh miyãkm ya bont tà nnã, cère binib kε rí lε a teh nã.» <sup>5</sup> Kime ben u'ninjiεb mãnãn ηã là teke' wã ki jin'.

<sup>6</sup> Nε \*Yesu tãke' bε ki ye: «N'yo ηã laan baa'. Ninbi wãn uyo kε mãn ni'bo nε. <sup>7</sup> Uηendun ya nib ηã rí fre kí li nen ninbi. Bi nen min nε, kime n lienh ki teh bi'tuon bre nε. <sup>8</sup> Ninbi li joh men kunacenku nnã. Min ηã rí jo, kime n'yo ηã laan baa'.» <sup>9</sup> U là tãke' bε nnã nε ki juore' Galile ya tinfenm ni.

### *Yesu jon' Ininbon ya nacenku ya jelm*

<sup>10</sup> \*Yesu ya ninjiεb bure' kunacenku nnã ma nnã nε u'mã lãkre' ki paan'. <sup>11</sup> \*Sufmbε ya cienb nuunh wã kunacenku nnã ni, nε ki niireh ki teh: «U te lε sã?»

<sup>12</sup> Nε linigol nnã bunbeh ki tãkeh tãb u'gber. Biba teh u yé unimãn, nε bitãb teh wa yé nimãn, u tulndeh binib nε. <sup>13</sup> Ama uba ηã len' u'gber paan bo, kime bi fenge \*Sufmbε ya cienb nε.

<sup>14</sup> Bi jele' kunacenku ki tí gbiire' siik ni uyo wã nnã, nε \*Yesu jon' Uwien ya duku bó, ki tí wãknh binib Uwien ya gber. <sup>15</sup> Ní cuo' \*Sufmbε miyãkm, nε bi len' ki ye: «Uje wuã ηã benge' gbãnkú-a! U tien' mila ki ben kugbãnkú miε ya benm-i?» <sup>16</sup> Nε u tãke' bε ki ye: «N wãknh binib nã nã, na yé min bugben ya wãknm. Ní yé wã sãn' nni ní nnã ya wãknm nε. <sup>17</sup> Unil yíe wã rí tien Uwien yíe nã la, u li bende n wãknh binib nã nã, ní yé Uwien ya wãknm nε bii n lienh min bugben ya yel bo nε. <sup>18</sup> Unil wã lienh wãn bugben ya yel bo la, u nuunh u'tiema kpiεke nε. Unil wã nuunh wã sãn' wã ya kpiεke la, wãn nε yé ugbe mãndaan, ka ηmãbe tonnεnku. <sup>19</sup> Moyis nε ηã là de' nε \*yiko-oo? Nin nen kε ni'ni uba ηã pε yiko nnã bo. Bε tien' ni nuunh ní ku nni?»

<sup>20</sup> Nε linigol nnã tãke' wã ki ye: «Usenpol nε ηãake ηε! Nme nuunh wã rí ku ηε?» <sup>21</sup> Nε u ye: «N tien' miyãkm ya bonn niba kpein nε \*Saba ya daali, nε ní cuo' ni'kε miyãkm. <sup>22</sup> Moyis là ye ní li jeh ipun. Upunjiε ηã ñen' Moyis saan, u ñen' ni'yaajεkpiεkb saan nε. Nen bo nε \*Saba ya daali mãnãn, kibuk kã kpaan' ní jiε ki'punl la, ni jeh kε nε. <sup>23</sup> Ni jeh ipun \*Saba ya daali ηã ni la saa Moyis ya yiko nε. Nε min cère' uwien ya gbenent kε faake' \*Saba ya daali, nε ni'benku ni ben' n'bo-oo? <sup>24</sup> La likeh men nib ya nun bó ki buh bε buur. Cère men ni'buur rí li cuube.»

### *Binib nuunh bε rí bende Yesu yé udaan wã*

<sup>25</sup> Yerusalēm yaab biba lienh ki teh: «Uje wã bi nuunh bε rí ku wã nnã ηã sã-ã? <sup>26</sup> Wãn nε lienh binib ya nun bó ba teh wã niba nã! Bii ti'cienb mãnbe ki bende' ki ye u yé Uwien ya Nigendkε Kristo nε? <sup>27</sup> \*Kristo lá baa' la, uba ηã rí bende u ñen' nã saan. Ama uje wuã wãn ti'kε ben u ñen' nã saan.»

<sup>28</sup> \*Yesu te Uwien ya duku ya luo bo, ki wãknh binib, nε ki len' ufaa bo ki ye: «Ni mãnbe ki ben nni ki ben n ñen' nã saan-a! Nin nen kε ηã ma baa' n'ba ya baam. Wã sãn' nni ní

nnɔ yé ugbemɔndaan nɛ. Ama ninbi ɲa bɛn wɔ. <sup>29</sup> Min wɔn, n bɛn wɔ, kimɛ n ɲɛn' wɔn saan nɛ, nɛ wɔn nɛ sɔn' nni ní.»

<sup>30</sup> Nɛn saan nɛ bi nuunh bɛ ɲi cuo wɔ. Ama uba ɲa tien' wɔ niba, kimɛ u'yo ɲa laan là baa'. <sup>31</sup> Linigol nnɔ ni binib bà yɛbe nɛ teke' wɔ ki jin', nɛ ki len' ki ye: «Uwien ya Nigɛndkɛ Kristo lá baa' la, u li tien miyɔkm ya bont kí cɛn ujɛ wuɔ tien' ma bo nɔ-ɔɔ?»

### *Farisɛnmbɛ nin bitɔtuɔrciɛnb nuunh bɛ ɲi cuo Yesu*

<sup>32</sup> \*Farisɛnmbɛ cii' linigol nnɔ bunbeh \*Yesu bo ná kɛ nnɔ, nɛ bɛn nin bitɔtuɔrciɛnb sɔn' biguguurb bɛ ɲi tɪ cuo wɔ ní. <sup>33</sup> Nɛ \*Yesu tɔke' linigol nnɔ ki ye: «Ma ji li wuɔke ni'saan, n li liɛbe wà sɔn' nni ní nnɔ bó. <sup>34</sup> Ni lá li nuun nni ka ɲi lɛ nni, kimɛ na ɲi fre kí jo n tɪ li te ná saan nnɔ.»

<sup>35</sup> Nɛ \*Sufmbɛ niireh tɔb ki teh: «U li jo lɛ saan nɛ ta ɲi lɛ wɔ? U li jo Grɛkmbɛ ya tinfɛnm mà \*Sufmbɛ yere' ki te mi'ni nnɔ nɛ kí tɪ ɲi wɔknh Grɛkmbɛ-ɛɛ? <sup>36</sup> U len' ki ye ti li nuun wɔ, ka ɲi lɛ wɔ, ka ɲi fre kí jo u tɪ li te ná saan nnɔ. U'lenm miɛ nɔ ya tingi si ba?»

### *Miɲunm mà dienh limiɛl ya gbɛr*

<sup>37</sup> Kunacɛnku nnɔ ya tontonddaali là yé uwengbenge nɛ. Nɛn daali nɛ \*Yesu sere' ki len' ufaa bo ki ye: «Uɲuɲun ɲmɔbe wà la, wɔ ɲi dɛn n'saan kí ɲu. <sup>38</sup> Unil wà teke' nni ki jin' la, miɲunm mà dienh limiɛl li puube u'fɛl ni tɛn likpenl nɛ. Nɪ keɛle' nnɔ nɛ \*Uwien ya gbɔnku ni.» <sup>39</sup> U len' nnɔ ma nnɔ, u niireh \*Mifuoɲaanm mà Uwien lá li de mè binib bà teke' wɔ ki jin' nnɔ nɛ. U ya yo ki laa' \*Mifuoɲaanm ɲa laan là jiiere' ní, kimɛ Uwien ɲa laan là kpɛke' Yesu.

### *Yesu bo, binib ɲa len' ki cii' tɔb bó*

<sup>40</sup> Linigol nnɔ cii' \*Yesu len' ná nnɔ nɛ biba len' ki ye: «Ujɛ wuɔ mɔnbe ki yé \*Uwien ya ɲɔbonsɔknl wà li baa ní nnɔ nɛ.» <sup>41</sup> Bitɔb ye: «U yé Uwien ya Nigɛndkɛ Kristo nɛ.» Nɛ bitɔb mɔ ye: «Kristo li fre kí li yé Galile ya nil-ii? <sup>42</sup> Na keɛle' Uwien ya gbɔnku ni ki ye u li yé ti'yaajɛ \*Dafid ya yaabil, kí li yé \*Dafid ya du Betelɛm ya nil nɛ-ɛɛ?» <sup>43</sup> Nnɔ nɛ Yesu bo, linigol nnɔ ɲa len' ki cii' tɔb bó, nɛ ki gbiire' icɛk ile. <sup>44</sup> Bi'ni biba là nuunh bɛ ɲi cuo wɔ ufaa bo nɛ, ama uba ɲa tien' wɔ niba.

<sup>45</sup> Biguguurb bà bitɔtuɔrciɛnb nin \*Farisɛnmbɛ sɔn' bɛ bɛ ɲi tɪ cuo \*Yesu nnɔ liɛbe' bi'saan, nɛ bi niire' bɛ ki ye: «Bɛ tien' na cuo' wɔ ní?» <sup>46</sup> Nɛ bi ye: «Nil uba ɲa laan len' tɛn u ya jɛ.» <sup>47</sup> Nɛ \*Farisɛnmbɛ nnɔ ye: «Ninbi mɔ cɛre' u tuln' nɛ nɛ-ɛɛ? <sup>48</sup> Biciɛnb nin tinbi \*Farisɛnmbɛ ni, unil te ki teke' wɔ ki jin'-ii? <sup>49</sup> Linigol là teke' wɔ ki jin' nnɔ ɲa bɛn \*yiko ya gbɛr nɛ. Bi yé binib bà Uwien wiɛ' bɛ miɲunm nɛ.»

<sup>50</sup> Nikodɛm, \*Farisɛnmbɛ ya uba, wà là jon' \*Yesu saan uyo uba nnɔ niire' bɛ ki ye: <sup>51</sup> «Ti'yiko bo, ti li fre kí biin unil, ka kpɛ' ki bun' wɔ tibuur ki bɛnde' u tien' ná-aa?» <sup>52</sup> Nɛ bi ye: «Sin, a'mɔ yé Galile yɔ nɛ-ɛɛ? Tùɔre kí fiin \*Uwien ya gbɔnku kí liike, a li lɛ Galile ya nil uba mɔnɔn ɲa laan ɲɛn' \*Wien ya ɲɔbonsɔknl?»

### *Upiinaɲmaa uba ya gbɛr*

<sup>53</sup> [Nɛ bi'kɛ kùn'.]

## 8

<sup>1</sup> \*Yesu don' lijuɔl liba bo, bi yih lè Olifi ya siin ya juɔl. <sup>2</sup> Nɪ faa' kutɛnɲɛsɔnsɔnku, nɛ u liɛbe' Uwien ya duku bó. Binib taan' u'saan ki yɛbe, nɛ u kɛle' ki wɔknh bɛ Uwien ya gbɛr. <sup>3</sup> Nɛn saan nɛ \*Yiko ya wɔnwɔknh nin \*Farisɛnmbɛ tuke' ní upii uba bi pɪln' wɔn nin ujɛ, ki lá sien' linigol nnɔ ya nun bó, <sup>4</sup> nɛ ki tɔke' \*Yesu ki ye: «Cɛnbaa, upii wuɔ nɔ, bi pɪln' wɔn nin jɛ nɛ. <sup>5</sup> Moyis ya yiko ni, nɪ yé liwɔbl nɛ bɛ ɲi li yèkreh itɛn kí kuuleh ni ya piibol. Tɔ, sin ye ba?» <sup>6</sup> Bi là len' nnɔ ɲɔ bɛ ɲi dɛle \*Yesu kudiɛku nɛ, kí lɛ bi li dule ná bo kí biin wɔ. Nɛ \*Yesu gòn' ki ɲmɔbe u'nɔbil ki dɛngɛh tingi ni.

<sup>7</sup> Bi ɲaake ki niireh wɔ ma nnɔ nɛ u yaare' ki tɔke' bɛ ki ye: «Ni'ni wà ɲa laan tien' biere la, wɔn ɲi kpɛ kí wiɛ wɔ litɛnl,» <sup>8</sup> ki liɛbe' ki gòn' ki ɲmɔbe u'nɔbil ki dɛngɛh tingi ni. <sup>9</sup> Bi

cii' u len' nnɔ ma nnɔ nɛ bi'kɛ siereh uba uba, ki cin' biciɛnb ki tɪ fɔre' biwaab, ki tɪ dɔan' \*Yesu nin upii nnɔ, u se \*Yesu ya nun bɔ. <sup>10</sup> Nɛ \*Yesu yaare' ki niire' wɔ ki ye: «Upii, bi te lɛ saan-i? Uba ŋa biin' ŋɛ-a?» <sup>11</sup> Nɛ u ye: «Yonbdaan, uba ŋa biin' nni.» Nɛ \*Yesu ye: «N'mɔ ŋa ɳ biin ŋɛ. Li joh, ki la ji ɳ li teh biere.»<sup>\*</sup>

### *Yesu nɛ yé unɛndun ya wenwenku*

<sup>12</sup> \*Yesu tɪ tɔke' linigol ki ye: «Min nɛ yé unɛndun ya wenwenku. Unil wà kɛ pɛ n'bo la, wa ɳ li cuonh cinɲunl ni, ama u li lɛ kuwenwenku kùa dienh limiel.

<sup>13</sup> «U len' nnɔ ma nnɔ nɛ \*Farisiɛnmbɛ tɔke' wɔ ki ye: «A kundeh a'ba bo nɛ imɔn. A'mɔnkun nnɔ ŋa yé mɔn.» »

<sup>14</sup> Nɛ u tɔke' bɛ ki ye: «N kundeh n'ba bo imɔn mɔnɔn la, n'mɔnkun nnɔ yé imɔn nɛ, kimɛ n bɛn n ɳɛn' nà saan, ki bɛn n joh nà saan mɔ. Ninbi nɛ ŋa bɛn n ɳɛn' nà saan, ka bɛn n joh nà saan mɔ. <sup>15</sup> Ni buh tibuur unisaal buh ma bo nɛ. Min ŋa buh uba buur. <sup>16</sup> N li buh binib tibuur mɔnɔn la, n'buur cuube nɛ, kimɛ na yé min baba nɛ buh binib tibuur, min nin n'Baa wà sɔn' nni ní nnɔ nɛ buh binib tibuur. <sup>17</sup> Ni'yiko ni, nɳ kele' ki ye bimɔnkunb bile len' tigbɛbaabt la, bi'mɔnkun nnɔ yé imɔn nɛ. <sup>18</sup> N yé n'bugbɛn ya mɔnkunl nɛ. Nɛ n'Baa wà sɔn' nni ní nnɔ mɔ yé n'mɔnkunl.» <sup>19</sup> Nɛ bi niire' wɔ ki ye: «A'baa te la?» Nɛ u jiin' bɛ ki ye: «Na bɛn nni, ka bɛn n'Baa mɔ. Ni bi bɛn nni la, ni bi li bɛnde n'Baa mɔ.»

<sup>20</sup> U lienh nnɔ, ki laa' u te Uwien ya duku ya luo bo nɛ, bi dienh Uwien mipum nà saan nnɔ, ki wɔknh binib. Uba ŋa cuo' wɔ, kimɛ u'yo ŋa laan baa'.

### *Yesu len' ki ye u ɳɛn' ni paaki bó nɛ*

<sup>21</sup> \*Yesu tɪ tɔke' bɛ ki ye: «N bureh nɛ. Ni li nuun nni, ka ɳ lɛ nni, kí tɪ kpo nin ni'biere. N joh nà saan nnɔ, na ɳ fre kí jo ni'saan.»

<sup>22</sup> Nɛ Sufmbɛ niireh tɔb ki teh: «U ye wɔ ɳ ku u'ba nɛ bii? Kimɛ u len' ki ye u jo nà saan nnɔ, ta ɳ fre kí jo ni'saan.»

<sup>23</sup> Nɛ u tɔke' bɛ ki ye: «Ninbi yé kitink bo yaab nɛ. Ama min ɳɛn' ní paaki bó nɛ. Ni yé unɛndun wuu yaab nɛ, nɛ min ŋa yé unɛndun wuu yɔ. <sup>24</sup> Nɛn bo nɛ n tɔke' nɛ ki ye ni li kpo nin ni'biere. Kimɛ na teke' ki jin' ki ye n yé n yé wà ma nnɔ ni li kpo nin ni'biere nɛ.»

<sup>25</sup> Nɛ bi niire' wɔ ki ye: «A yé ŋmɛ?» Nɛ u ye: «N tɔke' nɛ micincinm ki ye n yé wà nnɔ, n yé wɔn nɛ. <sup>26</sup> N ŋmɔbe tigbɛr tɪ yɛbe ɳ len' ni'bo kí biin nɛ. Ama wà sɔn' nni ní nnɔ yé ugbɛmɔndaan nɛ. N cii' tigbɛr tà u'saan nnɔ n tɔkeh tun nɛ unɛndun yaab.»

<sup>27</sup> \*Yesu len' nnɔ ma nnɔ, ba bɛnde' ki ye u lienh u'Baa ya gbɛr nɛ. <sup>28</sup> Nɛn saan nɛ u tɔke' bɛ ki ye: «Ni li fin Unil ya Bijɛ uyo wà paaki bó nnɔ nɛ kí bɛnde kí ye «n yé n yé wà» nɛ. Ni li bɛnde kí ye ma sɔnh niba n'ba bo. N tɔkeh n'Baa wɔkn' nni nà nɛ. <sup>29</sup> Wà sɔn' nni ní nnɔ te nin nni nɛ. Wa dɔan nni n'baba, kimɛ n teh nà sɔnge u'yɛnm nɛ uyo kɛ.» <sup>30</sup> \*Yesu lienh nnɔ ma nnɔ nɛ binib teke' wɔ ki jin' ki yɛbe.

### *Ibiere coh binib tiyonbt yaam*

<sup>31</sup> Nɛ \*Yesu tɔke' \*Sufmbɛ bà teke' wɔ ki jin' nnɔ ki ye: «Ni pɛ n'gbɛr bo ka dɔan' tɪ la, ni mɔnbe ki yé n'panpaankaab nɛ, <sup>32</sup> ki li bɛnde tigbɛmɔnt. Nɛ tigbɛmɔnt nnɔ li ɳɛn nɛ tiyonbt ni.» <sup>33</sup> Nɛ bi ye: «Ti yé \*Abraham ya yaabii nɛ. Uba ŋa li cuo' te yonbt. Bɛ tien' a ye tɪ li ɳɛ tiyonbt ni?» <sup>34</sup> Nɛ u ye: «N tɔkeh nɛ imɔn nɛ, wà kɛ teh ibiere la, u yé ibiere ya yonb nɛ. <sup>35</sup> Uyonb ŋa ɳ li tuu ki yé u'yonbdaan den yɔ. Ama unil maa' u'bije la, u li tuu ki yé u'den yɔ uyo kɛ nɛ. <sup>36</sup> Nɛn bo nɛ Uwien ya Bijɛ ɳɛn' nɛ tiyonbt ni la, ni li mɔnbe kí ɳɛ tu'ni nɛ. <sup>37</sup> N bɛn ki ye ni yé \*Abraham ya yaabii nɛ. Ama ni nuunh ní ku nni nɛ, kimɛ na tuo' n'gbɛr. <sup>38</sup> Min tɔkeh nɛ n laa' nà n'Baa saan nɛ. Nɛ ninbi teh ni cii' nà ni'baa saan.» <sup>39</sup> Nɛ bi ye: «Ti'baa si \*Abraham nɛ.» Nɛ u ye: «Ni bi yé \*Abraham ya bumu la, ni bi li sɔnh u là sɔn' ma bo nɛ. <sup>40</sup> N tɔke' nɛ n cii' tigbɛmɔnt tà Uwien saan nnɔ, nɛ ni nuunh ní ku nni. \*Abraham ŋa là tien' nnɔ. <sup>41</sup> Ninbi teh ten ni'baa nɛ.» Nɛ bi ye: «Tinbi ŋa yé gbaandbumu.

\* **8:11** Bi kpie' ki kele' tigbɔnt tà nnɔ ya tuba ni migbiirm 7:53 kí tɪ baa 8:11 ŋa te tu'ni.

Ti ηmabe Baa uba ne. Wɔn si Uwien.» <sup>42</sup> Ne u ye: «Ni'baa bi si Uwien la, ni bi li yie nni ne, kime n ñen' ní Uwien saan ne. Ma baa' n'ba ya baam, wɔn ne sɔn' nni ní. <sup>43</sup> Be tien' na ciuh n lienh ki teh bà? Kimε na li yie ní cenge n'gber ne. <sup>44</sup> Ni'baa si usenpol ne, ne ni nuunh ní li teh u yie ná. U yé unikul ne haali unɛndun ya cinm, ka tɔkeh gbemɔnt, kime gbemɔnt ηa te u'ni. U'lenm si kutonnεnku ne, kime u yé utonnendaan ne, ki yé kutonnεnku ya baa. <sup>45</sup> Ama min tɔkeh tigbεmɔnt ne. Nen ne cère' na teknh n'gber ki jinh. <sup>46</sup> Ni'ni, ηme li fre kí wɔn kí ye n fii' ma, n tien' ibiere? N tɔkeh tigbεmɔnt ne. Be tien' na teknh n'gber ki jinh-i? <sup>47</sup> Unil wà ke yé Uwien yɔ la, wɔn ne ciuh Uwien ya gber. Ninbi ηa ciuh, kime na yé u'yaab.»

### *Unil wà ke boh Yesu ya gber ηa ní kpo fiebu*

<sup>48</sup> \*Sufmbe tɔke' wɔ ki ye: «Ta bi len'-ii? A yé Samari ya nil ne. Usenpol ne ηaake ηe.» <sup>49</sup> Ne u tɔke' be ki ye: «Senpol ηa ηaake nni. N boh n'Baa ne, ne ninbi ηa boh nni. <sup>50</sup> Min ηa nuunh ní kpieke n'ba; uba ne kpiekreh nni. Wɔn ne si wɔ ní liike tu ya gber. <sup>51</sup> N tɔkeh ne imɔn ne, unil boh n'gber la, wa ní kpo fiebu.»

<sup>52</sup> Ne \*Sufmbe tɔke' wɔ ki ye: «Fenfennɔ wuɔ ti bende' ki ye usenpol ne ηaake ηe. Ti'yaaje \*Abraham nin \*Uwien ya ñɔbonsɔknɔ là kpo', ne sin len' ki ye unil boh a'gber la, wa ní kpo fiebu-a! <sup>53</sup> A cen' ti'yaaje \*Abraham ne-εε? Wɔn nin \*Uwien ya ñɔbonsɔknɔ ke kpo'. Sin yé ηme ne?» <sup>54</sup> Ne u tɔke' be ki ye: «N bi kpiekreh n'ba ne la, n'kpieke nnɔ bi yé fεnm ne. N'Baa ne kpiekreh nni, wɔn wà ni ye u yé ni'Wien nnɔ. <sup>55</sup> Na ben wɔ, ama min ben wɔ. N bi ye ma ben wɔ la, n bi li tien utonnendaan ten ninbi ne. Ama min ben wɔ, ne ki boh u'gber. <sup>56</sup> Ni'yaaje \*Abraham là maale' ki ye u li le n'yo, ne ki pokn'. U laa' n'yo nnɔ, nen bo ne u là ηmabe uyensonge.» <sup>57</sup> Ne \*Sufmbe ye: «ηa baa' ibin pinun, ne ki ye a laa' \*Abraham?» <sup>58</sup> Ne u ye: «N tɔke' ne imɔn ne, ba laan là maa' \*Abraham ma nnɔ ki laa' n te ne.»

<sup>59</sup> Nen saan ne bi gende' iten be ní yèke kí ku wɔ, ne u lɔkre' ki ñen' Uwien ya duku ya luo bo.

## 9

### *Yesu likre' uje uba bi maa' wɔ ujuɔn*

<sup>1</sup> \*Yesu cuonh ki joh ne ki tí laa' uje uba, bi maa' wɔ ujuɔn. <sup>2</sup> Ne u'panpaankaab niire' wɔ ki ye: «Cenbaa, uje wuɔ ne tien' ibiere bii u'naa nin u'baa ne tien' ηɔ bi maa' wɔ ujuɔn-i?» <sup>3</sup> Ne \*Yesu jiiin' be ki ye: «Na yé uje bugben ya biere bo, ka yé u'naa bii u'baa ya biere mɔ bo. Ní te nnɔ ηɔ unil ke ní le Uwien li sɔn lituonl là kí de wɔ ne. <sup>4</sup> Ní laan wien ma nɔ, ní kpe tí sɔn wà sɔn' nni ní nnɔ ya tuonl ne. Ní li biire, ne nil ηa ní fre kí sɔn. <sup>5</sup> N laan te unɛndun ní ma nɔ, n yé unɛndun ya wenwenku ne.»

<sup>6</sup> U len' nnɔ ki tí gben', ne ki sii' tiñinsent tingi ni, ki taa' u'nɔbil ki bunbun' titent, ki fàan' ujuɔn nnɔ ya nun, <sup>7</sup> ki tɔke' wɔ ki ye: «Jo kí tí fende kujebieku kùa bi yih kù Silowe nnɔ ni.» Silowe ya tingi si: Bi sɔn' wà. Ujuɔn nnɔ jon' ki tí fende' ki liebeh ní ma nnɔ, u ji like ne.

<sup>8</sup> Ne ukonkuɔnlieb nin binib bà ben ki ye u yé wà tí ní mieh nnɔ niireh tɔb ki teh: «Na yé uje wuɔ ne là tí ní ke ki mieh nnɔ-ɔɔ?» <sup>9</sup> Biba ye wɔn ne. Bitɔb ye bi naan ne, wɔn ηa ní. Ne wɔn bugben ye: «Min ne.» <sup>10</sup> Ne bi niire' wɔ ki ye: «A'nun likre' mila bo?» <sup>11</sup> Ne u tɔke' be ki ye: «Uje wà bi yih wɔ \*Yesu nnɔ, wɔn ne bun' titent ki fàan' n'nun, ne ki tɔke' nni ki ye ní li joh Silowe ya jebieku ni kí tí fende. N jon' ki tí fende', ne ki likre'.» <sup>12</sup> Ne bi niire' wɔ ki ye: «U te le saan-i?» Ne u ye: «Ma ben.»

### *Farisienmbe niire' ujuɔn wà likre' nnɔ iniire*

<sup>13</sup> Ne bi taa' wɔ ki jon' \*Farisienmbe saan. <sup>14</sup> Tɔ, lidaali là \*Yesu bun' titent ki likre' ujuɔn nnɔ là yé \*Saba ya daali ne. <sup>15</sup> Ne \*Farisienmbe mɔ niire' uje wà là yé ujuɔn nnɔ ní tien ma bo ηɔ u likre'. Ne u tɔke' be ki ye: «U bun' titent ne ki fàan' n'nun, ne n fende', ki likre'.»

16 Nε \*Farisienmbε ya biba ye: «Uje bugben ηa ñen' ní Wien saan, kime wa boh \*Saba ya daali.» Nε bitɔb ye: «Unil yé ubierdaan la, wa ní fre kí tien yɔkm ya bont ten u teh ma nɔ.» Bi len' ka cii' tɔb bó nε ki gbiire' icεk ile. 17 Nε bi liebe' ki niire' uje wà là yé ujuɔn nɔ ki ye: «Sin wà u likre' ηε nɔ, a maaleh ki teh u yé ηme nε?» Nε u ye: «U yé \*Uwien ya ñɔbonsɔknl uba nε.»

18 \*Sufmbε ya cienb ηa teke' ki jin' ki ye u là yé ujuɔn, nε ki likre'. Nε ki yin' u'naa nin u'baa ní 19 ki lá niire' bε ki ye: «Ni'bijε sɔ nɔ-ɔɔ? Ni maa' wɔ ujuɔn nε-εε? Ní tien' mila u ji likeh fεnfennɔ wuɔ nɔ?» 20 Nε u'naa nin u'baa ye: «Ti ben ki ye ti'bijε nε. Ti là maa' wɔ ujuɔn nε. 21 Ama ta ben ní tien' ma u likre' fεnfennɔ wuɔ nɔ, ka ben udaan wà likre' wɔ mɔ. Wa ji yé buk, niire wɔ mεn. U li tɔke nε u'gber.» 22 U'naa nin u'baa là fεnge \*Sufmbε ya cienb ma nɔ nε cère' bi len' nɔ, kime \*Sufmbε ya cienb là kpaan' buñɔbu ki ye wà len' ki ye \*Yesu yé Uwien ya Nigendkε Kristo la, bi li ηɔre wɔ bi'taanl ya duku ni nε. 23 Nεn bo nε u'naa nin u'baa len' ki ye: «Wa ji yé buk, niire wɔ mεn.»

24 \*Farisienmbε tí yin' uje wà là yé ujuɔn nɔ, ki lá tɔke' wɔ ki ye: «Tɔke tigbemɔnt Uwien ya nun bó. Tinbi ben ki ye uje bugben yé ubierdaan nε.» 25 Nε u ye: «U yé ubierdaan la, ma ben. N ben nà nɔ nεn si: N là yé ujuɔn nε, fεnfennɔ wuɔ n likre'.» 26 Nε bi niire' wɔ ki ye: «U tien' mila ki likre' ηε?» 27 Nε u jiin' bε ki ye: «N kpiε' ki tɔke' nε, nε na tuo' ní cii. Bε bo nε ni nuunh ní tí ní liebe kí tɔke nε? Ni'mɔ la lii nuunh ní tien u'panpaankaab nε-a?» 28 U len' nɔ ma nɔ nε bi suke' wɔ, ki tɔke' wɔ ki ye: «Sin nε yé u'panpaankε. Tinbi yé Moyis ya panpaankaab nε. 29 Tinbi ben ki ye Uwien là tɔke' Moyis nε tigber, ama uje wuɔ wɔn, ta ben u ñen' nà saan.» 30 Nε u ye: «Liike mεn miyɔkm ya bonn-a! U likre' nni, nε na ben u ñen' nà saan-a! 31 Ti ben ki ye Uwien ηa cengeh bierdaan ya kaare. Unil boh Uwien ki teh Uwien ya yíem la, Uwien cengeh u ya kaare nε. 32 Uηendun ya cincinyo kí lá baa dinnɔ, ta laan cii' nil likre' wà bi maa' wɔ ujuɔn. 33 Uje bugben ηa bi ñen' ní Uwien saan la, wa bi li fre kí tien niba.» 34 Nε bi tɔke' wɔ ki ye: «Bi maa' sin a yé ubierdaan, nε a yíe á wɔkn tinbi-ii?» Nε ki ηɔre' wɔ ki ñen' litaanl ya duku ni.

### *Bà cinbe ki yé ijùɔn*

35 \*Yesu cii' bi ηɔre' wɔ ki ñen' litaanl ya duku ni. Nε u jon' ki tí laa' wɔ, ki niire' wɔ ki ye: «Sin, a teke' Unil ya Bijε ki jin'-ii?» 36 Nε u jiin' wɔ ki ye: «Cεnbaa, ηme nε yé Unil ya Bijε? Tɔke nni ηɔ ní teke wɔ kí ji.» 37 Nε \*Yesu ye: «A laa' wɔ; wɔn nε tɔkeh ηε tigber nɔ.» 38 Nε u ye: «Yonbdaan, n teke' ηε ki jin',» nε ki gbaan' u'nintuɔli ki puke' wɔ.

39 Nε \*Yesu ye: «N baa' uηendun wuu ni, ní bu tibuur nε, kí cère binib bà ηa lenh ní likre, ηɔ bà like ní juɔn.» 40 Farisienmbε bà te u'saan nɔ cii' u len' ma bo, nε ki niire' wɔ ki ye: «Ti'mɔ yé ijùɔn nε-εε?» 41 Nε u tɔke' bε ki ye: «Ni bi yé ijùɔn la, na bi li ηmɔbe biere. Ama ni lienh ki teh ni yé binunyaanb nε, nεn bo nε ni juore' ki te ni'biere ni.»

## 10

### *Yesu nε yé upekpaamɔn*

1 «N tɔkeh nε imɔn nε, unil wà maabe' ki kɔn' upepeke ni, ka ñen' nañɔbu ki kɔn' la, u yé unasu nε, ki yé udukond. 2 Ama unil wà ñeh bunañɔbu ki kɔh nɔ, wɔn nε yé upekpaal. 3 Unil wà gu bunañɔbu nɔ li piire wɔ bù nε. Ipe ben u'nieke. U yih wɔn bugben ya pe ya yel, nε ki ñendeh yè. 4 U tí ñen' u'pe kε la, u le usen nε ì pe u'bo, kime ì ben u'nieke. 5 Ya ní paan caan bo. I li sen wɔ nε mɔnɔn, kime ya ben cenb ya nieke.»\*

6 \*Yesu pɔn' bε mikpenjenm miε nɔ, ama ba cii' mi'tingi.

7 Nε u tí tɔke' bε ki ye: «N tɔkeh nε imɔn nε, min nε yé upepeke ya nañɔbu. 8 Binib bà kε kpiε' ki baa' nin nni nɔ yé binasub nε, ki yé idukond, ama ipe ηa cenge' bi'bó. 9 Min nε

\* 10:5 \*Yesu ya yo nɔ upedaan nin u'yul nε là sɔbe ki yé upekpaal. Bi là taakeh bi'pe ki gɔndeh upepeke uba ni nε, nε uguguurl gu yè. Ní faa' la, nε wà kε ní baa upepeke nɔ saan kí yin u'pe, yè ní ñε kí paan u'bo.



yé bunañɔbu. Unil ñen' min ki kɔn' la, u li ñmɛre, kí li kɔh ki ñeh, ki li lɛ u li ji bà. <sup>10</sup> Unasu baa' la, u nuunh wɔ ní suu ipe kí kòkòre kí sasaa nɛ. Min baa' ní lá de yè limiel nɛ, ñɔ niba la pɔre i'fuobm ni.

<sup>11</sup> «Min nɛ yé upekpaamɔn. Upekpaamɔn li tuo kí kpo u'pe bo. <sup>12</sup> Unil wà ña cinbe ki yé pekpaal ki kpaah ipe ilike bo, ñɔ ka yé pedaan mɔ nnɔ, laa' ukèr we ní la, u li sɛn kí cère yè nɛ. Ukèr li cuo iba, nɛ yà s'ien' ní yeyere. <sup>13</sup> Wà kpaah ipe ilike bo nnɔ ña tɔnge yè. Nɛn nɛ cère u li sɛn kí dàan yè. <sup>14</sup> Min yé upekpaamɔn nɛ, ki bɛn n'pe, nɛ n'pe mɔ bɛn nni, <sup>15</sup> tɛn n'Baa bɛn nni ma, n'mɔ bɛn wɔ nnɔ. Nɛ min li tuo kí kpo n'pe bo. <sup>16</sup> N ñmɔbe ipetɔ yà ña yé upepeke wuu ya pe. N li li kpaah i'mɔ nɛ, nɛ ì li cengeh n'niɛke bó. I'ke li taan kí tien upepeke uba nɛ, kí li ñmɔbe upekpaal uba. <sup>17</sup> N'Baa yíe nni, kimɛ n li tuo kí kpo, ñɔ kí liebe kí mɛkre. <sup>18</sup> Uba ña ní fre kí ku nni. Min nɛ tuo' bɛ ní ku nni. N ñmɔbe mituɔm ní kpo, ki ñmɔbe mituɔm ní mɛkre mɔ. N'Baa nɛ cèbe nni ní tien nnɔ.»

<sup>19</sup> \*Yesu len' nnɔ nɛ Sufmbɛ ya gber ña tí cende'. <sup>20</sup> Bi'ni bà yebe tɔke' ki ye: «Usɛnpol uba nɛ ñaake wɔ. U waare' nɛ. Bɛ tien' ni cengeh u'bó?» <sup>21</sup> Nɛ bitɔb ye: «U'lenm ña yé unil wà usɛnpol ñaake wɔ ya lenm. Unil wà usɛnpol ñaake wɔ li fre kí likre ijùɔn-ii?»

### *Sufmbɛ ña teke' Yesu ki jin'*

<sup>22</sup> Sufmbɛ là jelah kunacunku Yerusalem ni ki tien bi là tien' lituɔrl ki mɔnge' Uwien ya duku uyo wà nnɔ nɛ. Nì là yé tiwɔrcient ya yo nɛ.† <sup>23</sup> \*Yesu là cuonh ki joh ki liebeh Salomɔn ya ninbonku ni Uwien ya duku ya luo bo. <sup>24</sup> \*Sufmbɛ ya ciɛnb guɔn' wɔ, nɛ ki niire' wɔ ki ye: «A li cère tí li jie nè ní tí wuɔke-a? A yé Uwien ya Nigendke Kristo la, tɔke tɛ imɔn.»

<sup>25</sup> Nɛ u tɔke' bɛ ki ye: «N là tɔke' nɛ, nɛ na teke' nni ki jin'. N sɔnh ituɔn yà n'Baa ya yel bo nnɔ nɛ wɔngeh n yé udaan wà. <sup>26</sup> Ninbi ña yé n'pe. Nɛn bo nɛ na teke' nni ki jin'. <sup>27</sup> N'pe cengeh n'niɛke bó. N bɛn yè, nɛ ì pɛ n'bo. <sup>28</sup> N dienh n'pe limiel là ña ñmɔbe gbenm. Ya ní kpo kí juore fɛnm, uba mɔ ña ní fre kí fie yè n'saan. <sup>29</sup> N'Baa nɛ de' nni yè; u'tuɔm cɛn' mituɔm kɛ.‡ Uba ña ní fre kí fie bonn wɔn n'Baa ya nuɔ ni. <sup>30</sup> Min nin n'Baa te miba nɛ.»

<sup>31</sup> Nɛ \*Sufmbɛ ya ciɛnb tí yuure' iten bɛ ní yèke kí ku wɔ. <sup>32</sup> Nɛ u tɔke' bɛ ki ye: «N sɔn' ni'nun bó ituɔnmɔnmɔn ì yebe n'Baa ya yel bo. Li lɛ tuonl bo nɛ ni nuunh ní yèke nni iten kí ku nni?» <sup>33</sup> Nɛ \*Sufmbɛ ya ciɛnb ye: «Na yé tuonmɔnmɔnl bo nɛ ti nuunh tí yèke ñɛ iten kí ku ñɛ. A suke' Uwien nɛ. Sin yé unil, nɛ ki taah a'ba ki teh Uwien.» <sup>34</sup> Nɛ u ye: «Nì kele' ni'yiko ya gbɔnku ni ki ye ni yé iwien nɛ. <sup>35</sup> Ti bɛn ki ye uba ña ní fre kí ñmire nà kele' \*Uwien ya gbɔnku ni. Tɔ, Uwien là tɔke' binib bà u'gber nnɔ, u ye bi yé iwien nɛ. <sup>36</sup> Nɛ min wà Uwien gènde' nni ki sɔn' nni ní uɛndun wuu ni nnɔ, n len' ki ye n yé u'Bijɛ, nɛ ni ye n suke' wɔ-wɔ? <sup>37</sup> Ma sɔnh n'Baa ya tuɔn la, la teke nni mɛn kí ji. <sup>38</sup> Ama n sɔnh yè la, na li li teke nni kí ji mɔnɔn la, teke mɛn n sɔnh ituɔn yà nnɔ kí ji, ñɔ kí bɛnde mɔnmɔnmɔn kí ye n'Baa tɛ nin nni, nɛ n'mɔ tɛ nin wɔ.»

<sup>39</sup> Nɛn saan nɛ bi tí nuunh bɛ ní cuo wɔ, nɛ u ñmɛre' bi'nuɔ ni.

<sup>40</sup> U liebe' ki jon' Sudɛn ya kpenpuol bó, ki tì te San là cin' ki siih binib Uwien ya ñunm nà saan nnɔ. <sup>41</sup> Nɛ binib baa' u'saan ki yebe, ki len' ki ye: «San ña là tien' yɔkm ya bonn niba, ama u là len' uje wuɔ ya gber tà nnɔ yé imɔn nɛ.» <sup>42</sup> Nɛ binib teke' Yesu ki jin' ni'saan ki yebe.

## 11

### *Lasaar ya kuum*

<sup>1-2</sup> Uje uba nɛ là te ki bun, bi yih wɔ Lasaar. U yé Mari nin Mart ya ninje nɛ. Wɔn nin bɛn kɛ là kɔh udu uba ni nɛ, bi yih wù Betani. Mari nnɔ yé upii wà là taa' lɛfina ki wule'

† **10:22** Ba ña yé Sufmbɛ là kɔn' Uwien ya duku ni ki kuɔn' kù tijɔnkt, nɛ bi tien' lituɔrl ki liebe' ki mɔnge' kù. Sufmbɛ ji là jelah kunacunku ki tien nɛn bó nɛ. ‡ **10:29** Bi kpiɛ' ki kele' tigbɔnt tà nnɔ ya tuba ni nì kele' ki ye: «N'Baa de' nni nà nnɔ yebe ki cɛn' nibonn kɛ» nɛ.

Yonbdaan ya tàan bo, ki taa' u'yur ki ηminηmire' yè nnò nε. <sup>3</sup> Ujε nnò ya ninsieβ nnò sòn' bi tì tǎke' \*Yesu ki ye: «Yonbdaan, unil wà a yíe wò nnò bun nε.»

<sup>4</sup> Yesu cii' ma nnò nε ki ye: «Iwìen bugben ηa yé kuum. Ama ì li cère binib ní kpíeke Uwien ηò kí kpíeke wòn Uwien ya Bijε mǎ.»

<sup>5</sup> Yesu là yíe Mart nin u'ninse nin Lasaar ya gber. <sup>6</sup> U cii' Lasaar bun ma nnò nε u juore' ki tien' u te nà saan nnò iwien ile. <sup>7</sup> Iwien ile nnò gèbre' nε u tǎke' u'panpaankaab ki ye: «Cère mèn tí liebe Sude ya tinfenm bó.» <sup>8</sup> Nε u'panpaankaab ye: «Cenbaa, na yé iden yíe nε Sufmbe là nuunh be ní yèke iten kí ku ηe ni'bó nε a tí liebeh ni'bó-oo?» <sup>9</sup> Nε u jiin' be ki ye: «Uwien uba ηa te tikur piik nin tule-ee? Unil cuonh uwien ni la, wa ní gbiere, kime uηendun wuu ya wenwenku nε cèreh u lenh. <sup>10</sup> Ama unil cuonh kuñonku la, u li gbiere nε, kime na wien.» <sup>11</sup> Yesu len' nnò ki tì gben', nε ki tí ye: «Tí'jò Lasaar gùon'-a, ama n li jo kí tì finde wò.» <sup>12</sup> Nε u'panpaankaab ye: «Yonbdaan, u gùon' la, u li faake-a!»

<sup>13</sup> Yesu là yíe wò ní tǎke kí ye Lasaar kpo' nε. Ama u'panpaankaab ben maaleh ki teh u lienh migòmòm ya gber nε. <sup>14</sup> Nεn saan nε \*Yesu ji tǎke' be ní wien ki ye: «Lasaar kpo'-a! <sup>15</sup> U kpo', ma te ní'saan ma nnò, ninbi bo nε ní tien' nni uyensonge, kime nεn nε li cère ní tùore kí teke nni kí ji. Tí jo mèn u'bó.» <sup>16</sup> Nε u'panpaankaab ya uba, bi yih wà Toma ki liebe' ki yih wò lilebl nnò tǎke' bitǎb ki ye: «Cère mèn tí'mǎ ní jo kí tì kpo' nin wò.»

### *Yesu nε yé mimekrm, ki yé limiel*

<sup>17</sup> \*Yesu tì baa' Betani ya du ni uyo wà nnò, ki laa' Lasaar tien' likul ni iwien inan nínò.\* <sup>18</sup> Betani ηa fǎke nin Yerusalem. Ní li te ten kǎnsini uta nε. <sup>19</sup> Nεn nε cère' Sufmbe là baa' Mart nin Mari saan, be ní lá suon be bi'ninje ya kuum bo ki yebe.

<sup>20</sup> Mart cii' \*Yesu we ní, nε u tobreh wò usen bó. Ama Mari wòn juore' ki ke iden nε. <sup>21</sup> Mart tì tǎke' \*Yesu ki ye: «Yonbdaan, a bi te niε saan la, n'ninje ηa bi kpo'. <sup>22</sup> Ama n ben ki ye fenfenno wuò mǎnǎn, a mie' Uwien nibonn nà ke la, u li de ηe nè nε.» <sup>23</sup> Nε \*Yesu tǎke' wò ki ye: «A'ninje li mǎkre.» <sup>24</sup> Nε Mart ye: «N ben ki ye u lá li mǎkre uwenfǎrke ya daali, lidaali là binib li mǎkre nnò nε.» <sup>25</sup> Nε Yesu ye: «Min nε yé mimekrm ki yé limiel. Unil teke' nni ki jin' la, u kpo' mǎnǎn la, u li fuobe nε. <sup>26</sup> Wà ke fuobe ki teke' nni ki jin' la, wa ní kpo' fiebu. A teke' n len' nà nò ki jin-ii?» <sup>27</sup> Nε Mart ye: «Hnn, Yonbdaan, n teke' ki jin' ki ye a yé Uwien ya Bijε nε, ki yé Uwien ya Nigendke Kristo wà li baa ní uηendun ni nnò.»

<sup>28</sup> Mart len' nnò, nε ki bure' ki tì yin' u'ninse Mari, ki bunbe' ki tǎke' wò ki ye: «Cenbaa baa' ní, ki yih ηε.»

<sup>29</sup> Mari cii' nnò ma nnò nε ki pǎk ki fii', ki jon' u'saan. <sup>30</sup> \*Yesu ηa laan kǎn' udu ni, u laan te usen ni, Mart tuobe' wò nà saan nnò nε. <sup>31</sup> \*Sufmbe bà te iden Mari saan, ki suondeh wò nnò laa' u pǎk ki fii' ki ñen' saali ma nnò nε bi'mǎ paan' u'bo. Bi là maaleh ki teh u joh likul bó nε wò ní tì muò.

<sup>32</sup> Mari tì baa' \*Yesu te nà saan uyo wà ki laa' wò nnò, nε ki gbaan' u'nintuoli, ki tǎke' wò ki ye: «Yonbdaan, a bi te niε saan la, n'ninje ηa bi kpo'.» <sup>33</sup> Yesu laa' u muòh, ki laa' \*Sufmbe bà pε u'bo nnò mǎ muòh ma nnò, nε u'yenm saa' ki gbien', <sup>34</sup> nε u niire' be ki ye: «Ni sube' wò le saan-i?» Nε bi ye: «Yonbdaan, den kí tì liike-a!»

<sup>35</sup> Nε saan nε Yesu muò'. <sup>36</sup> Nε \*Sufmbe ye: «Liike mèn u là yíe wò ní tì kpε ma.» <sup>37</sup> Nε bi'ni biba ye: «Wòn wà là likre' ujuon-ii? Wa bi li fre kí cère Lasaar la kpo-oo?»

<sup>38</sup> Nεn saan nε \*Yesu ya yenm tí saa' ki gbien', nε u bure' likul bó. Ní là yé kujòlulnku nε, nε litenl bi ku'ñǎbu. <sup>39</sup> Yesu ye: «Biire mèn litenl nnò.» Ujε wà kpo' nnò ya ninse Mart tǎke' wò ki ye: «Yonbdaan, u lii nuuke'-a! Kime u tien' len iwien inan sǎ.» <sup>40</sup> Nε \*Yesu ye: «Ma tǎke' ηe ki ye a teke' nni ki jin' la, a li le Uwien ηmǎbe ukpíeke ma bo-oo?» <sup>41</sup> Nεn saan nε bi biire' litenl nnò, nε u yaare' ki liike' paaki ki ye: «N'Baa, n faareh ηe nin a cenge' n'bó ma nǎ. <sup>42</sup> N ben ki ye uyo ke a cengeh n'bó nε. Ama linigol lie bo nε cère' n len' nnò, ηò be ní teke kí ji kí ye sin nε sòn' nni ní.» <sup>43</sup> U len' nnò, nε ki tien' ufaa bo ki ye: «Lasaar, ñe ní!» <sup>44</sup> Nε

\* 11:17 Liike Matie 27:60.

uje wà bi yé utenkpii nnò ñen' likul ni ní, tikpelcer biε ki tenten' u'nuò nin u'taan, kutòku piibe u'nun bó. Nε Yesu tòke' bε ki ye: «Ñenñen men tikpelcer nnò, kí cère wò rí li joh.»

*Bi kpaan' iyε bε rí ku Yesu*

*(Matie 26:1-5; Mark 14:1-2; Luk 22:1-2)*

<sup>45</sup> Sufmbε bà là baa' Mari saan ki laa' Yesu tien' nibonn nà nnò, bi'ni bà yebe teke' wò ki jin'. <sup>46</sup> Ama bi'ni biba mò jon' \*Farisienmbε saan ki tí tòke' bε \*Yesu tien' nà nnò. <sup>47</sup> Nεn saan nε bitòtuarcienb nin \*Farisienmbε nnò yin' bi'buur ya cekl yaab ki taan', nε ki tòke' bε ki ye: «Tí li tien mila? Kimε uje bugben teh miyòkm ya bont cεen nε. <sup>48</sup> Tí cère' u tuu ki teh nnò la, binib kε li teke' wò kí ji, nε Erom yaab li baa kí lá bere tí'Wien ya duku, kí gben tí'bol ya nib kε.»

<sup>49</sup> Bi yih bi'ni uba Kayif, wòn nε là yé bitòtuarcienb ya cien libinl nnò, nε u tòke' bitòb ki ye: «Na ben niba, <sup>50</sup> ka ben ki ye ní mòn unibaab rí kpo tí'du ya nib bo ηò tí'bol kε la gben-ii?» <sup>51</sup> U len' ma nnò, na yé wòn bugben ya yεnm ni nε u len' nnò. U là yé bitòtuarcienb ya cien libinl nnò ma nnò, nε cère' u len' ten uñòbonsòknl ki ye \*Yesu li kpo bi'bol ya nib kε bo. <sup>52</sup> Na yé bi'bol ya nib baba bo nε u li kpo. U li kpo kí taan Uwien ya bumu mùa yere' ní'kε saan nnò kí tien bε unibaab nε.

<sup>53</sup> Kí ñε nεn daali nε bi sien' ki ye bi li ku Yesu nε. <sup>54</sup> Nεn bo nε \*Yesu ηa ji cèreh \*Sufmbε lenh wò. U siere' ní'saan ki bure' udu uba bó, bi yih wù Efrayim, wa fòke nin kupenpelku, nε wòn nin u'panpaankaab tí te ní'bó.

<sup>55</sup> Ní là sien' waamu nε bε rí jele \*Sufmbε ya Pak ya nacenku. Nε binib ñen' idugbaan ni ki baa' Yerusalem ki yebe, bε rí lá ñen bi'yul bo tijòknt kí bonde kunacenku nnò. <sup>56</sup> Bi te Uwien ya duku ya luo bo ki nuunh Yesu ma nnò nε ki niireh tób ki teh: «Ní maaleh mila? U li baa kunacenku kuu bii wa rí baa?» <sup>57</sup> Bitòtuarcienb nin \*Farisienmbε là len' ki ye unil ben u te nà saan la, wò rí wuòn bε, bε rí jo kí tí cuo wò.

## 12

*Mari fàan' Yesu ya tàan lεfina*

*(Matie 26:6-13; Mark 14:3-9)*

<sup>1</sup> Ní là sien' iwien iluob nε Sufmbε rí jele bi'Pak ya nacenku, nε \*Yesu jon' Betani ya du ni. Lasaar wà u là mεkre' wò nnò, kòh nεn ni nε. <sup>2</sup> Bi tien' \*Yesu tijier ní'saan. Mart nε là gbiinh bε tijier nnò nε Lasaar mò yé bà jinh tijier \*Yesu saan nnò ya uba. <sup>3</sup> Mari taa' lεfina uba u te litrjenku, u'daaku faa cεen, bi yih lεfina nnò naar, ki lá fanfaan' \*Yesu ya tàan, ki taa' u'yur ki ηminmire' yè. Lεfina nnò ya nu teke' kuduku kε. <sup>4</sup> Nε \*Yesu ya panpaankaab ya uba, bi yih wà Sudas Iskariyòt, wòn wà lá li kuòre Yesu nnò ye: <sup>5</sup> «Bε tien' ba rí taa lεfina nnò kí kuòre kí lε iwentun kobiita ya paaku kí taa kí de bijiinb-i?» <sup>6</sup> Na yé Sudas tangeh bijiinb nε. Kimε u là yé unasu nε. Wòn nε ηuuke kiliksòrk ma nnò, u suh bi taah ilike ya ki kpiendeh len nnò nε. Nεn nε cère' u len' nnò. <sup>7</sup> Nε \*Yesu tòke' Sudas ki ye: «Cère wò wò rí fuore. U taa' lεfina wuò wò rí bonde n'subm nε. <sup>8</sup> Bijiinb li li te ní'saan uyo kε nε; ama min ηa rí li te ní'saan uyo kε.»

<sup>9</sup> Sufmbε ligol cii' \*Yesu te Betani ya du ni, nε ki baa' u'saan. Na yé Yesu baba bo nε bi baa'. Bi nuunh bε rí lε Lasaar wà \*Yesu là mεkre' wò bitenkpiib ni nnò mò nε. <sup>10</sup> Nεn saan nε bitòtuarcienb sien' ki ye bi li ku Lasaar mò, <sup>11</sup> kimε wòn bo nε \*Sufmbε teke' \*Yesu ki jin' ki yebe, ka ji pε ben bitòtuarcienb bo.

*Bi kpiεkreh Yesu u tí kòn' Yerusalem ní*

*(Matie 21:1-11; Mark 11:1-11; Luk 19:28-40)*

<sup>12</sup> Kutaaku faa', nε linigocienl là baa' Yerusalem ní lè rí jele kunacenku nnò cii' \*Yesu we ní, <sup>13</sup> nε bi bere' mubiεbisiimu ya fεr ki tobreh wò usen bó, ki wuureh ki teh:

«Osana!

Uwien ya mòm rí li te wà we ní

Yonbdaan ya yel bo nnɔ bo.

Uwien ya mɔnm ń li te Israyel yaab ya bɛr bo.»

14 \*Yesu laa' uŋuunfanfaan ki jɛke' tɛn ń kɛle' ma \*Uwien ya gbɔnku ni ki ye:

15 «\*Siyɔn\* yaabɛ, la cɛrɛ mɛn nɛ ń cuo nɛ jɛwaanbu.

Liike mɛn, ni'berciɛn we ní,  
ki jɛke uŋuunfanfaan.»

16 \*Yesu ya panpaankaab ɲa laan là cii' ni'tingi u ya yo. Uwien kpiɛke' wɔ uyo wà nnɔ, nɛ bi tiere' ki ye ní kɛle' u'bo nnɔ nɛ \*Uwien ya gbɔnku ni, ki bɛnde' ki ye linigol nnɔ tien' wɔ bi bi li tien wɔ ma bo nɛ.

17 Linigol là là te \*Yesu saan lidaali là u là mɛkre' Lasaar ki yin' wɔ ki ye wɔ ń ńɛ ní likul ni nnɔ, bɛn nɛ là tɔke' binib tigbɛr nnɔ. 18 Nɛn bo nɛ binib ligol tuobe' wɔ usɛn bó, kimɛ bi là cii' u tien' miyɔkm ya bonn nnɔ ma bo. 19 Nɛn saan nɛ \*Farisiɛnmbɛ tɔkeh tɔb ki teh: «Ni laa'-aa? Ninbi ɲa ji li fre kí tien niba. Uɲɛndun ya nib kɛ ji pɛ wɔn bo nɛ.»

### *Grɛkmbɛ biba nuunh bɛ ń lɛ Yesu*

20 Grɛkmbɛ† biba mɔ là baa' Yerusalem kunacɛnku nnɔ ya yo bɛ ń lá puke Uwien. 21 Bi nɛkn' Filip. U yé Betsayida ya du wà te Galile ya tinfɛnm ni nnɔ yɔ nɛ, nɛ ki tɔke' wɔ ki ye: «Uciɛn, ti yíe tí lɛ \*Yesu nɛ.» 22 Nɛ Filip jon' ki tí tɔke' Andre. Nɛ bi'kɛ bile jon' ki tí tɔke' Yesu. 23 Nɛ \*Yesu tɔke' bɛ ki ye: «Uyo wà Uwien li kpiɛke Unil ya Bijɛ nnɔ baa' ní ɲɔ. 24 N tɔkeh nɛ imɔn nɛ, bi bule' mijibim ma kpo' la, mɪ li juore mi'baba nɛ. Ama mɪ kpo' la, mɪ li pɔrɛ kí yɛbre nɛ. 25 Wà kɛ yíe wɔ ń fie u'miel la, wɔn nɛ li kpo kí juore fɛnm. Ama wà kɛ ɲa tɔngɛh u'miel uɲɛndun wuu ni la, wɔn nɛ li lɛ limiel là ɲa ɲmɔbe gbenm. 26 Unil yíe wɔ ń sɔn n'tuon la, udaan ń li pɛ n'bo. N te nà saan la, n'tonsɔnl mɔ li te nɛn saan nɛ. Unil sɔnh n'tuon la, n'Baa li kpiɛke wɔ.»

### *Yesu lienh u'kuum bo*

27 «Fɛnfɛnnɔ, n'yɛnm saa' ki gbien'-a! N li len kí ye ba? N ye: «N'Baa, ńɛ nni ijɛnd yà we ní nɔ ni-ii?» Ama n baa' nɛn bo nɛ ki lá tu' uyo wuu nɔ. 28 N'Baa, wuɔn a'kpiɛke.»

Nɛn saan nɛ unieke uba ńɛn' paaki bó ní ki ye: «N wuɔn' n'kpiɛke ɲɔ, ki li liɛbe kí wuɔn wù mɔ nɛ.»

29 Linigol là se ni'saan ki cii' unieke nnɔ bó nnɔ, ya biba ye utaa nɛ dun', nɛ bitɔb ye Uwien ya tond uba nɛ len' wɔ.

30 Nɛ u ye: «Na yé min bo nɛ cɛrɛ' udaan wà len' nɔ len', ninbi bo nɛ u len'. 31 Fɛnfɛnnɔ wuɔ nɛ Uwien li bu uɲɛndun wuu ya nib tibuur. Fɛnfɛnnɔ nɛ Uwien li ɲɔrɛ wà yé uɲɛndun wuu ya ciɛn nnɔ. 32 Min wɔn, uyo wà bi li fin nni paaki bó nnɔ‡, nɛ n li dɛrɛ binib kɛ kí nɛkn n'ba.» 33 U len' nnɔ ɲɔ wɔ ń wuɔn u li kpo mikuum mà ya bol nɛ.

34 Nɛ linigol nnɔ tɔke' wɔ ki ye: «Ti cii' \*Uwien ya gbɔnku ye Uwien ya Nigɛndkɛ \*Kristo li fuobe uyo kɛ nɛ. A tien' mila ki len' ki ye bi li fin Unil ya Bijɛ udɔpɔnpɔn bo paaki bó? Nɲɛ yé Unil ya Bijɛ bugbɛn-i?» 35 Nɛ u tɔke' bɛ ki ye: «Kuwenwenku ɲa ji li wuɔke' ni'ni. Li cuonh mɛn uyo wà kuwenwenku laan te, ɲɔ licinɲunl la pɪln nɛ. Unil wà kɛ cuonh licinɲunl ni la, wa bɛn u joh nà bó. 36 Kuwenwenku laan te ma nɔ, teke mɛn kù kí ji, ɲɔ kí li yé kuwenwenku yaab.»

\*Yesu len' nnɔ, nɛ ki ńɛn' ni'saan ki jɛnde' ki tí bɔle'.

### *Sufmbɛ ɲa teke' Yesu ki jin'*

37 Nin u là tien' miyɔkm ya bont tù yɛbe bi'nun ni ma kɛ nnɔ, ba teke' wɔ ki jin'. 38 Ba teke' wɔ ki jin' ɲɔ \*Uwien ya ńɔbonsɔknl Esayi là len' nà nnɔ nɛ ń tien nɛ. U là ye: «Yonbdaan, ɲmɛ tuo' ki teke' ti len' nà nnɔ ki jin'-i? Nɲɛ bɛnde' a ɲmɔbe mituɔm ma bo?»

39 Esayi tí là len' nà bo cɛrɛ' ba li li fre kí teke kí ji. U là ye:

\* 12:15 Bi liɛbe' ki yih Yerusalem nɛ Siyɔn. † 12:20 Migbiirm miɛ ni bi ye Grɛkmbɛ la, bi niireh bà ɲa yé Sufmbɛ nɛ. ‡ 12:32 Bi li fin nni paaki bó nnɔ ya tingi te bolm mile bo nɛ. Miba si: kí fin udɔpɔnpɔn bo. Mitɔm si: kí dùɔ paaki u'Baa saan.

40 «Uwien juon bi'nun,  
ki libe' bi'yenm,  
ɲɔ bi la lenh,  
ki la cii' ni'tingi bi'yenm ni,  
ki la lèbre bi'tetem,  
ɲɔ wɔ ɲ buu be.»

41 Esayi là len' nnɔ, kimɛ u là laa' \*Yesu ya kpiɛke ma nnɔ nɛ cère' u len' u'gber.

42 Nin nɛn kɛ, \*Sufmbɛ ya ciɛnb bà yebe mɔnɔn là teke' \*Yesu ki jin'; ama \*Farisiɛnmbɛ bo nɛ ba len' upaan bo ki ye bi teke' wɔ ki jin'. Bi là fenge' bi li ɲɔre be litaanl ya duku ni nɛ. 43 Kimɛ bi yie binib ya kpiɛkm ki cɛn' Uwien yaam.

*Yesu tɔke' binib tigber tà nnɔ nɛ lá li biin be*

44 \*Yesu len' ufaa bo ki ye: «Wà kɛ teke' nni ki jin' la, na yé u teke' min baba nɛ ki jin', u teke' wà sɔn' nni ní nnɔ mɔ ki jin' nɛ. 45 Wà kɛ laa' nni la, u laa' wà sɔn' nni ní nnɔ mɔ nɛ. 46 Min yé kuwenwenku nɛ ki baa' uɲɛndun ni, ɲɔ unil wà kɛ teke' nni ki jin' la, u la juore cinɲunl ni. 47 Unil cii' n'gber, ka bon' tù la, na yé min nɛ li biin wɔ, kimɛ ma baa' ɲ lá biin uɲɛndun ya nib, n baa' ɲ lá ɲmɛn be nɛ. 48 Wà kɛ wiɛ' nni, ka teke' n'gber la, u laa' nibonn ná li biin wɔ. Uwenfɔrke ya daali la, n'gber nnɔ nɛ li biin wɔ, 49 kimɛ ma tɔkeh n'bugben ya gber. N'Baa wà sɔn' nni ní nnɔ, wɔn nɛ tɔke' nni n li len ma bo nin n li wɔkn ma bo. 50 N ben ki ye u'gber dienb binib limiɛl là ɲa ɲmɔbe gbenm nɛ. Nnɔ nɛ n tɔkeh tà kɛ nɔ n tɔkeh tù n'Baa tɔke' nni tù ma bo nɛ.»

## 13

*Yesu sɔkre' u'panpaankaab ya tàan*

1 Ni là sien' waamu nɛ \*Sufmbɛ ya Pak ya nacenku ɲ jele. \*Yesu ben ki ye u'yo baa' wɔ ɲ ɲɛ uɲɛndun wuu ni, kí liebe u'Baa bó. U là yie u'nib bà te uɲɛndun ni nnɔ. U là yie be ki tɪ gben' nɛ.

2 \*Yesu nin u'panpaankaab là jinh kutaajuɔku ya jier uyo wà nnɔ ki laa' usɛnpol de' Simɔn Iskariyɔt ya bijɛ Sudas iyɛnmaale ɲɔ wɔ ɲ kuɔre Yesu. 3 Yesu ben ki ye u'Baa de' wɔ mituɔm tibont kɛ bo, ki ben mɔ ki ye u'ɲɛn' ní Uwien saan nɛ, ki tí liebeh Uwien saan. 4 Wɔn nin u'panpaankaab kɛ ki jinh, nɛ u fii' ki sere', ki gore' u'paaki bó ya liɛrl ki ble', ki taa' kukpɛlciɛku ki gbin' u'ciɛk ni, 5 nɛ ki taa' miɲunm ki kuore' kusɛnku ni, ki cin' ki sɔkreh u'panpaankaab ya tàan\*, ki taah u gbin kukpɛlciɛku kùà nnɔ ki ɲmireh yè. 6 U tɪ baa' Simɔn Pier saan, nɛ u tɔke' wɔ ki ye: «Yonbdaan, sin ɲ lá sɔkre min ya tàan-ii?» 7 Nɛ \*Yesu ye: «Fɛnfɛnnɔ ɲa ɲ cii' n teh ná nɔ ya tingi, ama a lá li cii' nɛ uyo uba nɛ.» 8 Nɛ Pier ye: «ɲa li li sɔkre n'tàan fiebu.» Nɛ \*Yesu ye: «Ma sɔkre' a'tàan la, ɲa ɲ lɛ gbiin n'saan.» 9 Nɛ Simɔn Pier ye: «Yonbdaan, nnɔ la, la sɔkre n'tàan baba. Sɔkre n'nuɔ nin n'yul mɔ.» 10 Nɛ \*Yesu ye: «Unil sii' la, wa ɲ li nuunh wɔ ɲ pɔk kí sii' kí lere, u li sɔkre u'tàan baba nɛ, kimɛ u'gbenɛnt kɛ wien nɛ. Ni'mɔ wien nɛ, ama na nín yé ni'kɛ nɛ wien.» 11 Kimɛ \*Yesu ben udaan wà li kuɔre wɔ, nɛn nɛ cère' u len' ki ye: «Na yé ni'kɛ nɛ wien.»

12 Tɔ, u sɔkre' bi'tàan ki tɪ gben', ki gole' u'liɛrl nnɔ, nɛ ki liebe' ki tɪ kèle', ki niire' be ki ye: «Ni cii' n tien' nɛ ná nɔ ya tingi-ii? 13 Ni yih nni ni'Cɛnbaa nin ni'Yonbdaan ma nɔ, ni ɲmɔbe imɔn nɛ, kimɛ n yé wɔn nɛ. 14 Min ni'Yonbdaan nin ni'Cɛnbaa sɔkre' ni'tàan ma nɔ, ni'mɔ ɲ li sɔkreh ni'tɔb ya tàan nnɔ. 15 Kimɛ min wuɔn' nɛ ni li teh ma nɛ, ni'mɔ ɲ li teh ni'tɔb ten n tien' nɛ ma nɔ. 16 N tɔkeh nɛ imɔn nɛ, utonsɔnl ɲa cɛn' u'cɛnbaa, utond mɔ ɲa cɛn' wà sɔn' wɔ. 17 Ni bɛnde' n len' ná nɔ ya tingi ma nɔ, ni teh nnɔ la, Uwien ya mɔnm li te ni'bo nɛ.

18 «Ma lienb ni'kɛ bo, min n ben n gènde' binib bà; ama ná kele' \*Uwien ya gbɔnku ni nnɔ li tien nɛ. Ni kèle' ki ye: «Min nin unil wà taakeh ki jinh n'jier nɛ fii' ki sere' n'bo.» 19 N

\* 13:5 Itàan ya sɔkrm là yé liyonbtuonl nɛ.

tòke' nε nibonn nà ña laan tien' ya gber fεnfennò, ñò nǐ lá tien' la, ní bende kí ye <n yé n yé wà> nε†. <sup>20</sup> N tókeh nε imòn nε, unil teke' n sòn' unil wà la, u teke' min nε. Unil teke' nni la, u teke' wà sòn' nni ní nnò nε.»

*Yesu tóke' u'panpaankaab ki ye bi'ni uba li kuàre wò*  
(*Matie 26:20-25; Mark 14:17-21; Luk 22:21-23*)

<sup>21</sup> \*Yesu len' nnò ki tǐ gben', u'yεnm saa' ki gbien', nε u tóke' bε ki ye: «N tókeh nε imòn nε, nǐ'ni uba li kuàre nni.» <sup>22</sup> Nε u'panpaankaab jiebeh ki likeh tób, ka ben u niireh wà. <sup>23</sup> Bi jinh ma nnò, u'panpaankaab ni u yíe wà ki gbien' nnò nε kε ki buòke wò. <sup>24</sup> Nε Simòn Pier kεnbe' wò ki ye wò ñ niire \*Yesu kí ye u niireh ñmε nε? <sup>25</sup> Nε u'panpaankε nnò gbien' \*Yesu bo, ki niire' wò ki ye: «Yonbdaan, ñmε nε?» <sup>26</sup> Nε \*Yesu tóke' wò ki ye: «N wóre' kpònò ki se' ki de' wà la‡, wòn nínò.» Nε ki wóre' kpònò ki se', ki de' Simòn Iskariyot ya bije Sudas. <sup>27</sup> Sudas teke' kpònò nnò uyo wà nnò, nε \*Satan kòn' u'fèl ni. Nε \*Yesu tóke' wò ki ye: «Tien a ye á tien nà nnò tonm!»

<sup>28</sup> Binib bà kε ki jinh tijier nnò ni uba mònòn ña bende' nà cère' \*Yesu tóke' wò ki ye nnò. <sup>29</sup> Sudas nε ñuuke kiliksòrk ma nnò, biba maale' ki ye \*Yesu tóke' wò ki ye wò ñ jo kí tǐ de bε kunacenku ya bont nε, bii wò ñ jo kí tǐ de bijiinb nε niba. <sup>30</sup> Sudas teke' kpònò nnò ma nnò nε ki pòk ki ñen' i ya tàan bo. Nǐ là yé kuñonku nε.

*Yesu gbiereh u'panpaankaab bε ñ li yíe tób*

<sup>31</sup> Sudas ñen' uyo wà nnò nε \*Yesu tóke' bε ki ye: «Fεnfennò Uwien kpiεke' Unil ya Bijε. Wòn bo nε bi li kpiεke Uwien mò. <sup>32</sup> Wòn bo nε bi kpiεke' Uwien la, Uwien bugben mò li kpiεke wò. U li kpiεke wò fεnfennò nε. <sup>33</sup> N'bumu, ma ji li wuòke ni'saan. Ni li nuun nni, ama n là tóke' \*Sufmbε ya cienb nà nnò, n ji li tóke ni'mò nε fεnfennò, kí ye: «Na ñ fre kí jo n joh nà saan.» <sup>34</sup> N de' nε liwòbfèl nε: «li yíe mèn tób.» N yíe nε ma nnò, ni'mò ñ li yíe tób nnò. <sup>35</sup> Ni yíe tób la, nen nε li cère binib kε ñ bende kí ye ni yé n'panpaankaab.»

*Yesu tóke' ki ye Pier li niε kí ye wa ben wò*  
(*Matie 26:31-35; Mark 14:27-31; Luk 22:31-34*)

<sup>36</sup> Nε Simòn Pier niire' wò ki ye: «Yonbdaan, a joh lε bó?» Nε \*Yesu jiiin' wò ki ye: «N joh nà bó nnò ña ñ fre kí paan n'bo fεnfennò. A lá li paan n'bo uyo uba nε.» <sup>37</sup> Nε Pier niire' wò ki ye: «Yonbdaan, bε bo nε ma ñ fre kí paan a'bo fεnfennò? N li tuo kí kpo a'bo-a!» <sup>38</sup> Nε \*Yesu tóke' wò ki ye: «A li mònbe kí tuo kí kpo n'bo-oo? N tókeh ñε imòn nε, a li niε bolm mita kí ye ña ben nni nε kí yaan ukuoje ñ muò.»

## 14

*Yesu nε yé usen wà joh Uwien saan*

<sup>1</sup> \*Yesu tóke' u'panpaankaab ki ye: «La cère mèn ni'yεnm ñ saa. Teke mèn Uwien kí ji, kí teke n'mò kí ji. <sup>2</sup> Mifεnm yebe n'Baa den. Ma bi yebe la, n bi li tóke nε kí ye n joh ñ tǐ bonde mifεnm kí ble nε-εε? <sup>3</sup> N jon' ki tǐ bonde' mifεnm ki ble' nε la, n li liebe ní, kí lá taa nε, ñò ni'mò ñ tǐ ñ li te min te nà saan. <sup>4</sup> N joh nà bó nnò, ni ben ni bó ya sen.» <sup>5</sup> Nε Toma tóke' wò ki ye: «Yonbdaan, ta ben a joh nà bó, ti li tien mila kí bende ni'bó ya sen-i?» <sup>6</sup> Nε \*Yesu tóke' wò ki ye: «Min nε yé usen wà wòngεh binib tigbεmònt, ki dienh bε limiεl. Uba ña ñ fre kí jo n'Baa saan ka ñen' min saan. <sup>7</sup> Ni bi ben nni la, ni bi li bende n'Baa mò nε. Fεnfennò ni ben wò, ki laa' wò mò.»

<sup>8</sup> Nε Filip tóke' wò ki ye: «Yonbdaan, wuòn tε a'Baa nε nǐ li dèkre tε.» <sup>9</sup> Nε \*Yesu tóke' wò ki ye: «Filip, n te ni'saan nǐ wuòke' ki kpaan' nò, nε ña ben nni-ii! Unil wà laa' nni la, u laa' n'Baa nε. Bε tien' a tóke' ki ye ñ wuòn nε n'Baa? <sup>10</sup> Ña teke' ki jin' ki ye n tε nin n'Baa nε, nε n'Baa mò tε nin nni-ii? N tókeh nε tigber tà nò ña yé n'bugben yaar. N'Baa wà tε nin nni nnò nε sòn h u'tùon.

† 13:19 Liike 8:28. ‡ 13:26 Ki wóre' kpònò ki se' ki de' unil yé kujotieku ya ñεku nε Sufmbε bo.

11 «Teke men kí ji kí ye n te nin n'Baa ne, ne n'Baa mo te nin nni. Na teke' n'gber ki jin' la, teke nni men kí ji miyokm ya bont nno bo. 12 N tókeh ne imòn ne, unil wà ke teke' nni ki jin' la, u li sòn itùon yà n sòn' yè nò. U li sòn itùon yà yebe nin n sòn' yà nò mònòn, kime n joh n'Baa bó ne. 13 Ni mié' nà ke n'yel bo la, n li tien nè, ò b e r k p i e k e n'Baa min u'bijé bo. 14 Ni mié' nni \* nà ke n'yel bo la, n li tien nè.»

### *Uwien li sòn Utotorl uba ni*

15 Ni yíe nni la, ni li boh n'wòb ne, 16 ne n li gbáan n'Baa wò rí de ne Utotortò wò rí li te ni'saan uyo ke. 17 U yé \*Mifuoñaanm ne, ki yé tigbemònt ya daan. Uñendun ya nib òa rí fre kí teke mè, kime ba lenh mè, ka ben mè mò. Ama Ninbi wòn, ni ben mè; mĩ te ni'saan, ki li te ni'ni mò.

18 Ma rí cère ne ní li te ten mutenkpiibumu. N li lièbe ní ni'saan. 19 Nĩ s'ien' waamu, uñendun ya nib òa ji li le nni, ama ninbi li le nni, kime n fuobe, ne ni'mò li fuobe. 20 Nĩ daali baa' la, ni li bende kí ye min nin n'Baa taan' ki yé unibaab ne, ne ninbi nin min mò taan' ki yé unibaab.

21 «Unil wà yíe nni si: wà ben n'wòb ki boh yè ne. N'Baa li yíe unil wà yíe nni, ne n'mò li yíe udaan, kí cère udaan rí bende nni.»

22 Ne Sudastò, wà òa yé Sudas Iskariyòt nno niire' wò ki ye: «Yonbdaan, be bo ne a li cère tinbi rí bende òe, ka rí cère uñendun ya nib rí bende òe?» 23 Ne \*Yesu jiin' wò ki ye: «Wà yíe nni la, u li boh n'gber ne, n'Baa li yíe wò, ne ti li baa u'saan, kí li kòh u'saan. 24 Wà òa yíe nni la, wa rí li boh n'gber. Ni cengeh tigber tà nò òa yé n'yaar, tù yé n'Baa wà sòn' nni ní nno yaar ne.

25 «N laan bié ki te ni'saan ma nno ne ki tóke' ne tigber tuu nò. 26 Ama \*Mifuoñaanm mà yé Utotorl nno, n'Baa li sòn mè ní n'yel bo. Men ne li wòkn ne ni'ke, kí tiere ne n tóke' ne tigber tà nno.

27 «Li te men uyenduòn ni. N dienh ne n òmòbe uyenduòn wà nno ne; ma dienh ne wù ten uñendun ya nib dienh ma bo. La cère men ni'yenm rí saa, ki la sen jèwaanbu. 28 Ni cii' n tóke' ne ki ye n li jo kí lièbe ní ni'saan. Ni yíe nni la, n joh n'Baa saan ma nno ni bi li òmòbe uyensonge ne, kime n'Baa cèn' nni. 29 N tókeh ne nibonn nà òa laan tien' ya gber fènfennò, òa nĩ lá tien' la, ní teke kí ji ne. 30 Ma ji li tóke ne tigber nè rí wuòke, kime uñendun wuu ya cien we ní, wa rí fre kí tien nni niba. 31 Ama nĩ kpe uñendun ya nib rí bende kí ye n yíe n'Baa, ne ki teh u tóke' nni ma bo. <Fii men tí jo.> »

## 15

### *Yesu ne yé busumònbu*

1 «Min ne yé busumònbu\* ne n'Baa yé ukpaal wà tùòreh busubu nno. 2 Isigben yà ke te n'bo ka lùonh nno, u li ge yí kí wié ne. Ama isigben yà ke lùonh nno, u li kpekpeke kí tùòre yí, ne yí rí tùòre kí lùon. 3 N tóke' ne tigber tà nò tùòre' ni'tetem òa. 4 Li te men nin nni, ten n te nin ne ma. Usigben te u'ba, ka tuuke busubu bo la, wà rí fre kí lùon. Nno ne ni'mò òa te nin nni la, na rí fre kí tien bonn.

5 «Min ne yé busubu, ne ninbi yé isigben. Unil wà ke te nin nni, n'mò te nin udaan la, u li te ten usigben wà lùonh ki gbiekeh ne. Na te nin nni la, na rí fre kí tien bonn. 6 Unil wà òa te nin nni la, bi li jende wò kí tĩ wié ne wò rí kuore ten usigben wà òa tuuke subu bo. Isigben yà kuore' la, bi gèndeh yí ki kpiendeh umu ni ne í wih. 7 Ni te nin nni, ki òmòbe n'gber ni'fèl ni, ki mié' Uwien ni yíe nà la, u li de ne nè ne. 8 Ni yé n'panpaakaab, ki te ten isigben yà lùonh ki gbiekeh la, nen ne kpièkreh n'Baa. 9 N'Baa yíe nni ma nno ne n'mò yíe ne. Li te men n'yíem ni. 10 N boh n'Baa ya wòb, ne ki te u'yíem ni. Ni'mò boh n ya wòb la, ni'mò li te n'yíem ni ne.

\* 14:14 Bi kpié' ki kele' tigbont tà nno ya tuba ni nni òa te tu'ni.

\* 15:1 Busubu nno yé tisir tà bi taah tu'bii ki òeh fèn nno ne.

11 «N tǎke' nε nεn kε ηǝ ní li ηmǎbe uyensǎnge wǎ n ηmǎbe wù nnǎ nε; ηǝ ní'yenm rí li sǎnge kí tǐ gben. 12 N yíe ní li teh nǎ si: li yíe mεn tǎb tεn n yíe nε ma bo. 13 Nil ηǎ ηmǎbe yíem kí cεn' wǎ li tuo kí kpo u'jǎtieb bo. 14 Ni teh n tǎke' nε nǎ la, ni yé n'jǎtieb nε. 15 Ma ji li yih nε n'tonsǎnb; n li yih nε n'jǎtieb nε, kime utonsǎnl ηǎ ben u'cεnbaa ya gber kε; ama min tǎke' nε tigber tǎ kε n cii' tǔ n'Baa saan nnǎ. 16 Na yé ninbi nε gǎnde' nni, min nε gǎnde' nε, kí de' nε lituonl kí ye ní li joh, kí li te tεn isigben yǎ lǔonh isibii yǎ li tuu kí te. Nεn bo, ni mie' n'Baa nibonn nǎ kε n'yel bo la, u li de nε nè nε. 17 N yíe ní li teh nǎ si: ní li yíe tǎb nε.»

### *Uηendun ya nib li nεn Yesu nin u'yaab*

18 «Uηendun ya nib nεn nε la, ní li ben kí ye bi kpie' kí nεnde' min nε. 19 Ni bi yé uηendun yaab la, uηendun yaab bi li yíe nε nε, kime uηendun ya nib yíe bi'yaab nε. Ama ninbi ηǎ yé uηendun yaab. N ñεn' nε uηendun ya nib ni ma nnǎ nε cère' bi nεn nε. 20 Li tien mεn n là tǎke' nε nǎ kí ye: «Utonsǎnl ηǎ cεn' u'cεnbaa nnǎ.» Bi jǎnde' min la, bi li jǎnde ni'mǎ nε. Bi tuo' n'gber la, bi li tuo ni'mǎ yaar nε. 21 Min bo nε bi li tien nε nεn kε, kime ba ben wǎ sǎn' nni ní. 22 Ma bi baa' kí lá tǎke' bε n'gber la, uba ηǎ bi li biin bε kí ye bi tien' ibiere, ama fεnfennǎ, ba ji li fre kí dule niba bo kí ye ba tien' biere. 23 Unil nεn nni la, u nεn n'Baa mǎ nε. 24 Ma bi sǎn' yǎkm ya tǔon yǎ nisaal ηǎ laan sǎn' yè bi laa' la, uba ηǎ bi li biin bε kí ye bi tien' biere. Ama fεnfennǎ bi laa' yè nε kí nεn min nin n'Baa kε. 25 Ama nεn kε tien' ηǝ nè rí cère nǎ kele' bi'yiko ya gbǎnku † ni nnǎ nè rí tien nε. Nǐ kele' kí ye: «Bi nεn nni nε ka ηmǎbe bi nεn nni bǎ bo.»

26 «Tǎ, n'Baa li cère rí sǎn Utotorl ní. U yé \*Mifuoñaanm nε, kí yé tigbεmǎnt ya daan, kí ñεn' ní n'Baa saan. Mǐ lá baa' uyo wǎ la, mǐ li kun n'bo imǎn. 27 Nǐ'mǎ li kun n'bo imǎn, kime ni te n'saan haali n'tuonl ya cincinyo nε.»

## 16

1 «N tǎke' nε nεn kε ηǝ nǐ lá tien' la, ni la wiε ni'tekjim nε. 2 Bi li ηǝre nε itáan ya dur ni. Uyo uba mǎnǎn we ní, unil ku' nε la, u li maaleh kí teh u tien' lituǎrl nε kí de' Uwien. 3 Ba bende' n'Baa yé udaan wǎ, ka bende' n'mǎ yé udaan wǎ, nεn nε li cère bε rí tien' nε nnǎ. 4 N tǎke' nε bi lá li tien' nε ma bo, ηǝ u ya yo lá baa' la, ní li tien kí ye n là tǎke' nε nè ηǝ.»

### *Mifuoñaanm ya tuonl*

«Ma là tǎke' nε tǔ n'tuonl ya cincinyo, kime min nin ninbi nε là te. 5 Ama fεnfennǎ, n liebeh wǎ sǎn' nni ní nnǎ saan nε, nε ni'ni uba ηǎ niire' nni n joh nǎ bo-a?» 6 Kime n len' kí ye n li bure kí cère nε ma nnǎ nε ni'yenm saa' kí gbien'. 7 Ama n tǎkeh nε imǎn nε, n jon' nε la, nǐ li mǎn ni'bo, kime ma jon' la, Utotorl nnǎ ηǎ rí baa ní. N jon' la, n li sǎn wǎ ní ni'saan. 8 U lá baa' la, u li cère uηendun ya nib rí bende kí ye bi yé bibierdεnb, kí cère bε rí bende kí ye Uwien cuube, kí bende kí ye Uwien li bu bε tibuur. 9 U li cère bε rí bende kí ye bi yé bibierdεnb, kime ba teke' nni kí jin'. 10 U li cère bε rí bende kí ye Uwien cuube, kime n li jo n'Baa saan, nε na ji li lε nni. 11 U li cère bε rí bende kí ye bi li bu bε tibuur, kime Uwien bun' uηendun wuu ya cien tibuur ηǝ.

12 «N bie kí ηmǎbe tigber tǔ yebe rí tǎke nε, ama tǔ li kpieke nin nε fεnfennǎ. 13 Uyo wǎ \*Mifuoñaanm lá li baa nnǎ; mεn mǎ yé tigbεmǎnt ya daan nnǎ; mǐ li pekre nε tigbεmǎnt ya sεn kε ni. Ma rí tǎke mǐ'bugben ya gber, ama mǐ cii' tǎ nnǎ, tun nε mǐ li tǎke nε. Mǐ li tǎke nε nǎ lá li tien' ya gber mǎ. 14 Mǐ li kpieke nni, kime mǐ li taa n ya gber nε kí tǎke nε. 15 N'Baa ya bont kε yé n'yaar nε, nεn nε cère' n ye mǐ li taa n ya gber nε kí tǎke nε.»

### *Ni'yensaa li kpεnde uyensǎnge*

16 «Nǐ sǐen' waamu, na ji li lε nni, nǐ pukn' waamu la, ni li lε nni.»

† 15:25 Bi ye bi'yiko ya gbǎnku la, bi niireh Uwien ya jǎtiekpaaku ya gbǎnku nε. Liike 10:34.



<sup>17</sup> Nε u'panpaankaab biba niireh tɔb ki teh: «U len' nà nɔ ya tingi si ba? U ye n̄ s̄ien' waamu, ta ji li ε wɔ, n̄ pukn' waamu la, ti li ε wɔ, ki ye u joh u'Baa bó! <sup>18</sup> Nε ki tí ye «U yih ba waamu?» Ta ben u ye wɔ rí ye bà?»

<sup>19</sup> \*Yesu bende' bi yíe bε rí niire wɔ iniire, nε u tɔke' bε ki ye: «Ni niireh tɔb n len' ma ki ye: «n̄ s̄ien' waamu, na ji li ε nni, n̄ pukn' waamu la, ni li ε nni nnɔ ya tingi nε-a?» <sup>20</sup> N tɔkeh nε imɔn nε, ninbi li muɔ kí kpiende, nε uɲɛndun ya nib li pokn. Ninbi ya yεnm li saa, ama ni'yensaa nnɔ lá li kpende uyensonge. <sup>21</sup> Upii benh nin timɛr la, u te uyensaa ni nε u'mɛrwiɛn bo. Ama u tí maa' ki gben' la, uyensonge li cère wa ji li tiere imɛrwiɛn nnɔ bó, kimε unifaan kɔn' uɲɛndun ni. <sup>22</sup> N̄i te nnɔ nε ni'mɔ bo; fɛnfennɔ, ni te uyensaa ni nε. Ama n lá li liεbe kí ε nε, nε ní li te uyensonge ni. Uba ɲa rí fre kí n̄ɛn ni'yensonge nnɔ ni'fɛl ni.

<sup>23</sup> «Nɛn daali na ji li niire nni bonn niba bó. N tɔkeh nε imɔn nε, ni miε' n'Baa nibonn n'yel bo la, u li de nε n̄ɛ nε. <sup>24</sup> Na laan miε' bonn n'yel bo haali nin fɛnfennɔ. Miε mɛn, ní li ε ɲɔ kí ε uyensonge kí tí gben.»

### *Yesu faake' nin uɲɛndun*

<sup>25</sup> «N tɔke' nε ni'kε mikpenjɛnm ni nε. Uyo uba we ní ma ji li pɔ kpenjɛnm kí tɔke nε gber. Ama n li tɔke nε n'Baa ya gber n̄ɛ rí li wien nε. <sup>26</sup> Ni'daali ni li miε n'Baa tibont n'yel bo. Ma tɔkeh nε ki teh min nε li miε n'Baa kí de nε, <sup>27</sup> kimε n'Baa bugben nε yíe nε, ni yíe nni, ki teke' ki jin' ki ye n n̄ɛn' ní wɔn saan ma nnɔ bo. <sup>28</sup> Tɔ, n n̄ɛn' n'Baa saan nε ki baa' uɲɛndun ni, n tí li n̄ɛ uɲɛndun ni kí liεbe n'Baa bó.»

<sup>29</sup> Nε u'panpaankaab tɔke' wɔ ki ye: «A laa'-aa! Fɛnfennɔ a ji lienh n̄i wien nε, ɲa ji pɔh kpenjɛnm. <sup>30</sup> Fɛnfennɔ ti bende' ki ye a ben tibont kε, ɲa nuunh nil rí niire ɲε niire kí yaan á bende u ye wɔ rí niire kí ye bà; nɛn nε cère' ti teke' ki jin' ki ye a n̄ɛn' ní Uwien saan nε.» <sup>31</sup> Nε \*Yesu niire' bε ki ye: «Ni teke' ki jin' fɛnfennɔ wuɔ nɔ-ɔɔ? <sup>32</sup> Tɔ, uyo uba we ní, ki lí baa'-a, ni'kε li yere wà kε rí taa u ya bó kí cère nni n'baba; ama ma te n'baba, kimε n'Baa te nin nni. <sup>33</sup> N tɔke' nε tigber tuu nɔ ɲɔ ni te nin nni ma nnɔ, ní li te uyenduɔn ni nε. Uɲɛndun wuu ni, ni te ijend ni nε, ama li co mɛn ni'ba, kimε n faake' nin uɲɛndun ki gben' u'tuɔm ɲɔ.»

## 17

### *Yesu kàareh Uwien*

<sup>1</sup> Tɔ, \*Yesu len' nnɔ ki gben', nε ki yaare' ki liike' paaki bó, ki ye: «N'Baa, uyo baa', wuɔn a'Bijε ya kpiεke, ɲɔ a'Bijε mɔ rí wuɔn a'kpiεke. <sup>2</sup> A de' wɔ mituɔm unisaal kε bo ɲɔ wɔ rí taa limiɛl là ɲa ɲmɔbe gbenm kí de a de' wɔ binib bà nnɔ kε nε. <sup>3</sup> Limiɛl là ɲa ɲmɔbe gbenm si ben rí bende kí ye sin baba nε yé Uwien imɔn, kí bende \*Yesu Kristo wà a sɔn' wɔ ní nnɔ mɔ. <sup>4</sup> Min wuɔn' a'kpiεke kitink bo, ki sɔn' a de' nni lituonl là rí sɔn nnɔ ki gben'. <sup>5</sup> N'Baa, fɛnfennɔ, kpiεke nni a'saan. De nni ukpiεke wà n là ɲmɔbe wù a'saan ki laa' uɲɛndun ɲa laan te nnɔ.

<sup>6</sup> «N cère' binib bà a gènde' bε uɲɛndun ya nib ni, ki de' nni nnɔ bende' a yé udaan wà. Bi là yé a'yaab nε, nε a taa' bε ki de' nni, nε bi boh a'gber. <sup>7</sup> Fɛnfennɔ, bi bende' ki ye a de' nni nibonn nà kε nnɔ n̄ɛn' a'saan nε, <sup>8</sup> kimε n tɔke' bε a tɔke' nni tigber tà nnɔ, nε bi teke' tù, ki mɔnbe ki bende' ki ye n n̄ɛn' ní a'saan nε, ki teke' ki jin' ki ye sin nε sɔn' nni ní.

<sup>9</sup> «N kàareh ɲε ki dienh ben nε. Ma kàareh ɲε ki dienh uɲɛndun ya nib. Ama n kàareh ɲε ki dienh binib bà a de' nni bε nnɔ nε, kimε bi yé a'yaab nε. <sup>10</sup> Nà kε yé n'yaann yé a'yaann nε, nε nà kε mɔ yé a'yaann yé n'yaann nε. Ben nε cèreh binib lenh n'kpiεke. <sup>11</sup> Ma ji li te uɲɛndun ni, ben nε li te uɲɛndun ni; min we ní a'saan nε. N'Baa uñaan, a de' nni a'yel là nnɔ, cère liyel bugben ya tuɔm rí li gu bε, bε rí li yé unibaab tɛn min nin sin yé unibaab ma bo. <sup>12</sup> N là te bi'saan uyo wà nnɔ, n là gu bε nin a'yel là a de' nni nnɔ ya tuɔm nε. N guure' bε, nε n̄i kpaan' wà rí kpo kí juore fɛnm nnɔ baba ɲa n̄i la, bi'ni uba ɲa kpo' ki juore' fɛnm. U kpo' ki juore' fɛnm ɲɔ nà kεle' a'gbɔnku ni nnɔ n̄ɛ rí tien nε. <sup>13</sup> Fɛnfennɔ, n

we ní a'saan ne. N laan te uɛndun ni ma nnɔ ne ki lienh nnɔ, ɲɔ be ɾ li ɲmɔbe uyensɔnge wà n ɲmɔbe wù nnɔ kí tí gben. <sup>14</sup> N tɔke' be a'gber, ne ɲendun ya nib nɛnde' be, kime ba yé ɲendun yaab, ten n'mɔ ɲa yé ɲendun yɔ ma. <sup>15</sup> Ma kàareh ɲe ki teh á ɲen be uɛndun ni, ama n kàareh ɲe ki teh a la cère usenpol ubierɔ ne ɾ tien be niba. <sup>16</sup> Ba yé ɲendun yaab ten n'mɔ ɲa yé ɲendun yɔ ma. <sup>17</sup> Cère ben li cinbe ki yé a'yaab tigbemònt bo. A'gber ne yé tigbemònt nnɔ. <sup>18</sup> A sɔn' nni ní uɛndun ni ma nnɔ, ne n'mɔ sɔn' ben uɛndun ni. <sup>19</sup> Ben bo ne n taa' n'ba ki de' ɲe, ɲɔ bi'mɔ ɾ li cinbe ki yé a'yaab tigbemònt bo.

<sup>20</sup> «Ma kàareh ɲe ki dienh ben baba, n kàareh ɲe ki dienh binib bà bi li tɔke be n'gber be ɾ teke nni kí ji nnɔ mɔ ne. <sup>21</sup> N kàareh ɲe ɲɔ bi'ke ɾ taan kí li yé unibaab ne. Ten sin n'Baa a te nin nni ma n'mɔ te nin ɲe nnɔ, cère bi'mɔ ɾ li te nin te, ɲɔ uɛndun ya nib ɾ teke kí ji kí ye sin ne sɔn' nni ní. <sup>22</sup> A de' nni ukpieke wà nnɔ, n'mɔ de' be wù, ɲɔ be ɾ taan kí li yé unibaab ten min nin sin yé unibaab ma, <sup>23</sup> kime n te nin be, ne a'mɔ te nin nni. Nnɔ ne bi taan' ki yé unibaab ki tí gben', ɲɔ uɛndun ya nib ɾ bende kí ye sin ne sɔn' nni ní, kí bende kí ye a yíe be ten a yíe nni ma bo. <sup>24</sup> N'Baa, a de' nni binib bà nnɔ, n yíe ɾ te nà saan la, bi'mɔ ɾ li te nin nni ne, kí le a de' nni ukpieke wà nnɔ, kime a yíe nni ki laa' ɲa laan ɲen' uɛndun. <sup>25</sup> N'Baa ugbemòndaan, uɛndun ya nib ɲa ben ɲe, ama min ben ɲe. Ne bie nɔ mɔ ben ki ye sin ne sɔn' nni ní. <sup>26</sup> N cère' bi bende' a yé udaan wà, ki li liebe kí cère be ɾ bende ɲe, ɲɔ a yíe nni miyiem ma nnɔ ɾ li te bi'ni, ɲɔ n'mɔ ɾ li te nin be.»

## 18

### *Yesu ya cuom*

*(Matie 26:47-56; Mark 14:43-50; Luk 22:47-53)*

<sup>1</sup> \*Yesu len' nnɔ ki tí gben', ne wɔn nin u'panpaankaab bure' ki tí puore' kubunbunku kù a bi yih kù Sedrɔn nnɔ. Isiin ya kpàabu buba te ni'saan, ne wɔn nin u'panpaankaab kɔn' bu'ni. <sup>2</sup> Sudas, wà kuɔre' \*Yesu nnɔ, mɔ ben ni'saan, kime \*Yesu nin u'panpaankaab là sɔbe ki taakeh nè ne. <sup>3</sup> Ne Sudas taa' Erom ya sojacɛkl liba nin Uwien ya duku ya guguurb bà bitɔtuɔrcienb nin \*Farisienmbe sɔn' be nnɔ, bi joh ni'saan ki tuke ifr nin imɔnafin nin tijekɔnwent. <sup>4</sup> \*Yesu ben nà ke li tu wɔ ma nnɔ, ne ki tuobe' be usen bó, ki niire' be ki ye: «Ni nuunh ɲme?» <sup>5</sup> Ne bi ye: «Ti nuunh Nasaret ya \*Yesu ne.» Ne u ye: «Min sɔ.» Sudas wà kuɔre' wɔ nnɔ mɔ te bi'ni. <sup>6</sup> U len' ki ye wɔn sɔ ma nnɔ, ne bi sulnh puoli bó ki luh. <sup>7</sup> \*Yesu tí niire' be ki ye: «Ni nuunh ɲme?» Ne bi ye: «Ti nuunh Nasaret ya \*Yesu ne.» <sup>8</sup> Ne u ye: «N tɔke' ne ki ye min sɔ nɔ. Ni nuunh min ne la, cère men bie be ɾ li joh.» <sup>9</sup> U len' nnɔ ɲɔ u là len' tigber tà nnɔ tù ɾ tien ne. U là len' ki ye: «N'Baa a de' nni binib bà nnɔ, ma cère' uba mɔnɔn bole'.»

<sup>10</sup> Tɔ, Simɔn Pier ɲmɔbe kijusiek, ne ki nère' ki ge' ki paare' bitɔtuɔrcienb ya cien ya tonsɔnl uba ya nɔjietubl. Bi yih utons�nl nnɔ Malkus ne. <sup>11</sup> Ne \*Yesu tɔke' Pier ki ye: «Jiin a'jusiek kí cùɔn kí tuɔku ni. N'Baa sien' ki ye ɾ ji ijend yà nnɔ n la ji yè-εε?»

### *Bi tuke' Yesu ki jon' Anni saan*

<sup>12</sup> Sojacɛkl nnɔ nin li'cien nin Sufmbe ya guguurb nnɔ cuo' \*Yesu ki lòle' u'nuɔ, <sup>13</sup> ne ki kpie' ki tuke' wɔ ki jon' Anni saan. Anni yé Kayif ya cuɔje ne. Kayif ne là yé bitɔtuɔrcienb ya cien libinl nnɔ. <sup>14</sup> Wɔn Kayif ne là tɔke' \*Sufmbe ya cienb ki ye nì mɔn unibaab ɾ kpo bi'du ya nib bo nnɔ.

### *Pier ni' ki ye wa ben Yesu*

*(Matie 26:69-70; Mark 14:66-68; Luk 22:55-57)*

<sup>15</sup> Bi tuke' \*Yesu ki joh ma nnɔ, ne Simɔn Pier nin \*Yesu ya panpaanketɔ uba pe u'bo. Bitɔtuɔrcienb ya cien ben \*Yesu ya panpaanketɔ bugben. Nen bo ne u paan' \*Yesu bo ki kɔn' bitɔtuɔrcienb ya cien nnɔ den uluo bo. <sup>16</sup> Ama Pier wɔn juore' ki se saali ne bunañbu saan. Ne upanpaanketɔ wà bitɔtuɔrcienb ya cien ben wɔ nnɔ jon' ki tí laa' upiitonsɔnl wà

gu bunañɔbu nnɔ, nɛ ki cɛrɛ' Pɛr kɔn'. <sup>17</sup> Nɛ upii nnɔ niire' Pɛr ki ye: «Sin, a'mɔ ɲa lii yɛ uɲɛ wuɔ ya panpaankaab ya uba-aa?» Nɛ u jiiin' wɔ ki ye: «Ma yɛ u'panpaanke.»

<sup>18</sup> Tiwɔr lɔ te, nɛ bitɔtuɔrciɛnb ya ciɛn ya tonsɔnb nin biguguurb sɛrɛ' umu, ki lokreh. Nɛ Pɛr mɔ te bi'saan ki lokreh.

*Bitɔtuɔrciɛnb ya ciɛn niire' Yesu iniire*

*(Matie 26:59-66; Mark 14:55-64; Luk 22:66-71)*

<sup>19</sup> Bitɔtuɔrciɛnb ya ciɛn niire' \*Yesu iniire u'panpaankaab bo nin u wɔknh miwɔknm ma nnɔ bo. <sup>20</sup> Nɛ \*Yesu jiiin' wɔ ki ye: «N len' binib kɛ ya nun bɔ nɛ, ki wɔkn' uyo kɛ ni'taan ya dur ni nin Uwien ya duku ya luo bo, \*Sufmbɛ kɛ taakeh nɔ saan. Ma len' gbɛr tuba bɔlm ni. <sup>21</sup> Bɛ tien' a niireh min-i? Niire binib bɔ cenge' n'gbɛr n tɔke' bɛ ki ye bɔ. Bɛn bɛn n tɔke' bɛ ki ye bɔ mɔnmɔnm.»

<sup>22</sup> \*Yesu len' nnɔ ma nnɔ, ki laa' biguguurb ya uba se ki nɛke wɔ, nɛ ki kpɔbe' wɔ utɛnpɛ, ki niire' wɔ ki ye: «A jiiindeh bitɔtuɔrciɛnb ya ciɛn nɛ nɔ nnɔ-ɔɔ?» <sup>23</sup> Nɛ \*Yesu jiiin' wɔ ki ye: «N len' ni bre nɛ la, wuɔn nɔ cɛrɛ' ni bre; nɛ n tɔ len' ni mɔn nɛ la, bɛ tien' a ɲih nni?»

<sup>24</sup> Nɛn saan nɛ Anni cɛrɛ' bi taa' \*Yesu ki jon' bitɔtuɔrciɛnb ya ciɛn Kayif saan u'nuɔ juore' ki luo.

*Pɛr ti niɛ' ki ye wa bɛn Yesu*

*(Matie 26:71-75; Mark 14:69-72; Luk 22:58-62)*

<sup>25</sup> Simɔn Pɛr se ki lokreh umu, nɛ bi niire' wɔ ki ye: «Sin, a'mɔ ɲa lii yɛ u'panpaankaab ya uba-aa?» Nɛ u niɛ' ki ye: «Ma yɛ u'panpaanke.» <sup>26</sup> Nɛ bitɔtuɔrciɛnb ya ciɛn ya tonsɔnb ya uba, wɔ Pɛr bi ge' ki paare' u'tubl nnɔ ya den yɔ uba tɔke' Pɛr ki ye: «Ma bi laa' ɲɛ u'saan bukpaabu nnɔ ni-ii?» <sup>27</sup> Nɛ Pɛr tɔ niɛ' ki ye wa bɛn Yesu. Nɛ ukuoɲɛ pɔk ki muɔ' i ya taan bo.

*Bi taa' Yesu ki jon' Pilat saan*

*(Matie 27:1-2, 11-14; Mark 15:1-5; Luk 23:1-5)*

<sup>28</sup> Nɛn saan nɛ bi taa' \*Yesu ki ɲɛn' Kayif den, ki jon' udu nnɔ ya gobina den, bi yih wɔ Pilat. Ni lɔ yɛ kutɛnɲɛsɔnsɔnku nɛ. \*Sufmbɛ ya ciɛnb ɲa lɔ yɛ bɛ ɲ kuɔn bi'ba jɔknt ɲɔ kɔ fre kɔ jele bi'Pak ya nacenku nɛ. Nɛn nɛ cɛrɛ' ba tuo' ki kɔn' Pilat den\*. <sup>29</sup> Nɛn bo nɛ Pilat ɲɛn' saali bi'saan, ki niire' bɛ ki ye: «Uɲɛ wuɔ tien' ba ni biindeh wɔ?» <sup>30</sup> Nɛ bi jiiin' wɔ ki ye: «Wa bi yɛ nibiɛrɔ la, ta bi cuo' wɔ ki ɲukn' ɲɛ.» <sup>31</sup> Nɛ Pilat ye: «Ninbi bugbɛn, taa wɔ mɛn kɔ tɔ bu wɔ ni'yiko ye ma bo.» Nɛ bi ye: «Tinbi Sufmbɛ ɲa ɲmɔbe sɛn tɔ ku nil.»

<sup>32</sup> Bi len' nɔ nɔ nɛ wuɔn' ki ye \*Yesu lɔ len' nɔ ki tɔke' binib, u li kpɔ mikuum mɔ ya bol nnɔ nɛ ɲ tien. <sup>33</sup> Pilat tɔ liɛbe' ki kɔn' tibuur ya duku ni, ki yin' \*Yesu ki lɔ niire' wɔ ki ye: «Sin, a yɛ \*Sufmbɛ ya bɛr nɛ-ɛɛ?» <sup>34</sup> Nɛ \*Yesu jiiin' wɔ ki ye: «A len' nɔ nɔ, a maale' a'ba nɛ bii bi tɔke' ɲɛ nɛ ki ye n yɛ \*Sufmbɛ ya bɛr-i?» <sup>35</sup> Nɛ Pilat tɔke' wɔ ki ye: «Min ɲa yɛ Suf-a! A'bol ya nib nin bitɔtuɔrciɛnb nɛ taa' ɲɛ ki ɲukn' nni. A tien' bɛ nɛ?» <sup>36</sup> Nɛ \*Yesu ye: «N'bel ɲa yɛ uɲɛndun wuu ni ya bɛl. N'bel bi yɛ uɲɛndun wuu ni ya bɛl la, n'nib bi li kɔn tijɛr ɲɔ \*Sufmbɛ ya ciɛnb la fre kɔ cuo nni. Ama fɛnfɛnnɔ, n'bel ɲa nɔn te niɛ saan.» <sup>37</sup> Nɛ Pilat tɔke' wɔ ki ye: «Nɛn mɛn la, a yɛ ubɛr nɛ-a!» Nɛ \*Yesu jiiin' wɔ ki ye: «Sin nɛ ye n yɛ ubɛr. N baa' uɲɛndun wuu ni ɲ lɔ tɔke' binib tigbɛmɔnt nɛ. Nɛn bo nɛ bi maa' nni. Unil wɔ kɛ pɛ tigbɛrmɔnt bo nɛ cengeh n'bɔ.» <sup>38</sup> Nɛ Pilat niire' wɔ ki ye: «Tigbɛmɔnt si ba?»

*Bi bun' Yesu tibuur ki ye u kpɛ mikuum*

*(Matie 27:15-31; Mark 15:6-20; Luk 23:13-25)*

Pilat len' nnɔ ma nnɔ nɛ ki tɔ ɲɛn' \*Sufmbɛ bɔ, ki tɔ tɔke' bɛ ki ye: «Min ɲa laa' u'biil. <sup>39</sup> Ama binl kɛ binl ni'Pak ya nacenku ya yo la, n tuu ki ɲɛndeh lipɛkl ya nil uba nɛ ki wiɛnh. Nɛn bo, ni yɛ ɲ taa \*Sufmbɛ ya bɛr nnɔ nɛ kɔ wiɛ-ɛɛ?» <sup>40</sup> Nɛ bi wuure' ki ye: «La wiɛ wɔn, wiɛ Barabas.» Barabas nnɔ lɔ yɛ unil wɔ yɛ' Erom yaab ya ɲɔbu bɔ nɛ.

\* **18:28** Sufmbɛ kɔn' bɔ ɲa yɛ Sufmbɛ den la, bi saa' bi'yiko nɛ, ki kuɔn' bi'ba tijɔknt kɔ tɔ kpaan uyo uba.

## 19

<sup>1</sup> Nɛn saan nɛ Pilat cɛrɛ' bi taa' \*Yesu ki n̄i' wɔ inalɛbe. <sup>2</sup> Sojambɛ taa' ikonkon ki lɔnlɔn' uyukpɛkpiɛ ki kpɛlɛ' u'yul, ki taa' kuliermɔnmɔnku kuba ki gɔln' wɔ, <sup>3</sup> nɛ ki nɛkndɛh wɔ ki tɔkeh wɔ ki teh: «Sufmbɛ ya bɛrɔ, ti fuondɛh nɛ-a!» Nɛ ki kpɔbɛh wɔ itɛnpɛ.

<sup>4</sup> Nɛ Pilat t̄i n̄ɛn' saali, ki tɔkɛ' \*Sufmbɛ ki ye: «N li taa wɔ k̄i n̄ɛn n̄i saali n̄i'saan n̄ɔ n̄i bɛndɛ k̄i ye ma laa' u'biil.» <sup>5</sup> Nɛn saan nɛ \*Yesu n̄ɛn' n̄i saali ki kpɛ ikonkon ya yukpɛkpiɛ, ki guo kuliermɔnmɔnku n̄nɔ. Nɛ Pilat tɔkɛ' bɛ ki ye: «Ujɛ bugbɛn sɔ.»

<sup>6</sup> Ama bitɔtuɔrciɛnb nin biguguurb laa' wɔ ma n̄nɔ nɛ ki wuureh ki teh: «Kpɛ wɔ udɔpɔnpɔn bo! Kpɛ wɔ udɔpɔnpɔn bo!» Nɛ Pilat tɔkɛ' bɛ ki ye: «N̄i'bugbɛn r̄i taa wɔ k̄i t̄i kpɛ wɔ udɔpɔnpɔn bo, kimɛ min n̄a laa' u' bii' n̄a n̄i kpɛ kuum.» <sup>7</sup> Nɛ bi tɔkɛ' wɔ ki ye: «Tinbi n̄mɔbɛ yiko uba nɛ, nɛ yiko n̄nɔ bo, u kpɛ mikuum nɛ, kimɛ u taa' u'ba ki tien' Uwien ya Bijɛ nɛ.»

<sup>8</sup> Pilat cii' bi ye \*Yesu taa' u'ba ki tien' Uwien ya Bijɛ ma n̄nɔ, nɛ bujɛwaanbu t̄uɔrɛ' ki cuo' wɔ cɛɛn. <sup>9</sup> Nɛ u t̄i liɛbɛ' ki kɔn' tibuur ya duku n̄nɔ ni ki t̄i niirɛ' \*Yesu ki ye: «Sin, a yɛ lɛ bɔ yɔ nɛ?» Ama \*Yesu n̄a jii'n' wɔ. <sup>10</sup> Nɛ Pilat tɔkɛ' wɔ ki ye: «N̄a gɛrɛh min nɛ-ɛɛ? N̄a bɛn ki ye n̄ n̄mɔbɛ mituɔm r̄i wiɛ n̄ɛ bii' r̄i kpɛ n̄ɛ udɔpɔnpɔn bo-oo?» <sup>11</sup> Nɛ \*Yesu tɔkɛ' wɔ ki ye: «Uwien dɛ' n̄ɛ mituɔm m̄a n̄nɔ baba n̄a n̄i la, n̄a n̄mɔbɛ tuɔm miba n'bo. Nɛn bo nɛ unil w̄a taa' nni ki n̄ukn' n̄ɛ n̄nɔ ya biil cɛn' a'yaal.»

<sup>12</sup> Nɛn saan nɛ Pilat nuunh u li tien ma k̄i wiɛ Yesu, ama \*Sufmbɛ wuureh nɛ ki teh: «A wiɛ' wɔ la, n̄a ji yɛ ubɛrciɛn Sesa\* ya jɔ, kimɛ unil w̄a kɛ yih u'ba ubɛr la, u yɛ Sesa ya nennɛnd nɛ.»

<sup>13</sup> Pilat cii' bi len' n̄nɔ ma n̄nɔ, nɛ ki t̄i n̄ɛn' \*Yesu saali, nɛ ki k̄ɛlɛ' tibuur ya biɛk bo, bi yih libuol l̄a «itɛn ya bɛnbɛn l̄ n̄nɔ.» \*Sufmbɛ ya lenm ni, bi yih n̄i'saan ki teh «Gabata» nɛ.

<sup>14</sup> N̄i l̄a yɛ lidaali l̄a \*Sufmbɛ bondeh bi'Pak ya nacɛnku n̄nɔ nɛ, ki tuo liwenyul ya yo, nɛ Pilat tɔkɛ' bɛ ki ye: «N̄i'ber sɔ.» <sup>15</sup> Nɛ bi wuure' ki ye: «U kpɛ mikuum nɛ! U kpɛ mikuum nɛ! Kpɛ wɔ udɔpɔnpɔn bo!» Nɛ Pilat niirɛ' bɛ ki ye: «N kpɛ n̄i'ber udɔpɔnpɔn bo-oo?» Nɛ bitɔtuɔrciɛnb jii'n' wɔ ki ye: «Ta n̄mɔbɛ bɛrɔ ki kɛndɛ' ubɛrciɛn Sesa bo.» <sup>16</sup> Nɛn saan nɛ Pilat taa' \*Yesu ki n̄ukn' bɛ bɛ r̄i t̄i kpɛ wɔ udɔpɔnpɔn bo. Nɛ bi taa' wɔ ki bure'.

*Bi kpɛ' Yesu udɔpɔnpɔn bo**(Matie 27:32-44; Mark 15:21-32; Luk 23:26-43)*

<sup>17</sup> \*Yesu bugbɛn tɔkɛ' u' dɔpɔnpɔn ki n̄ɛn' udu ni, ki joh niba saan, bi yih n̄ɛ «Kuyukpɔbku ya Buol.» \*Sufmbɛ ya lenm ni, bi yih n̄i'saan «Golgota» nɛ. <sup>18</sup> Bi kpɛ' wɔ udɔpɔnpɔn bo nɛn saan nɛ, nɛ ki kpɛ' bijɛb bile m̄ɔ; uba ukɛlɛ uba, utɔ m̄ɔ ukɛltɔ, nɛ \*Yesu fo siik ni. <sup>19</sup> Pilat kɛlɛ' mikɛlm miba ki ye: «Nasaret ya \*Yesu w̄a yɛ \*Sufmbɛ ya bɛr n̄nɔ sɔ», nɛ ki cɛrɛ bi taa' ki tɛbn' u' dɔpɔnpɔn bo. <sup>20</sup> N̄i kɛlɛ' \*Sufmbɛ ya lenm ni nin Erom yaab ya lenm ni nin Grɛkmbɛ ya lenm ni nɛ. Bi kpɛ' \*Yesu udɔpɔnpɔn bo n̄a saan n̄nɔ n̄a fɔkɛ nin udu ni, nɛn nɛ cɛrɛ' \*Sufmbɛ b̄a yɛbɛ kaan' mikɛlm n̄nɔ. <sup>21</sup> Nɛ \*Sufmbɛ ya tɔtuɔrciɛnb tɔkɛ' Pilat ki ye: «N̄a bi li kɛlɛ k̄i ye \*Sufmbɛ ya bɛr, a bi li kɛlɛ k̄i ye: wɔn nɛ ye u yɛ \*Sufmbɛ ya bɛr nɛ.»

<sup>22</sup> Nɛ Pilat tɔkɛ' bɛ ki ye: «N kɛlɛ' n̄a n̄ n̄ kɛlɛ' nɛ.»

<sup>23</sup> Sojambɛ kpɛ' \*Yesu udɔpɔnpɔn bo ki gben', nɛ ki gbiirɛ' u'wɛngolkaar igbiin inan, w̄a kɛ ugbiin uba ki t̄i sien' u'lierfɔfɔkrku. Kulierfɔfɔkrku n̄nɔ n̄a n̄mɔbɛ n̄ɛn̄iɛ k̄i n̄ɛ paaki k̄i t̄i ci tingi, kimɛ bi l̄a lɔn' k̄u nɛ. <sup>24</sup> Nɛn saan nɛ bi tɔkɛ' tɔb ki ye: «Ti la kɛrɛ k̄u mɛn, cɛrɛ mɛn t̄i f̄uɔrɛ im̄uɔn, k̄i liikɛ w̄a li ji k̄u.» Nɛn kɛ tien' n̄ɔ n̄a kɛlɛ' \*Uwien ya gbɔnku ni n̄nɔ n̄ɛ r̄i tien nɛ. N̄i kɛlɛ' ki ye:

«Bi gbiirɛ' n'wɛngolkaar,  
nɛ ki f̄uɔrɛ' im̄uɔn,  
bɛ r̄i liikɛ w̄a li ji n'lierku.»

Tɔ, sojambɛ n̄nɔ tien' nɛn nɛ.

\* 19:12 Sesa nɛ l̄a yɛ Erom yaab likɛh mitinfɛnm m̄a n̄nɔ kɛ ya bɛrciɛn.

25 \*Yesu ya naa nin u'naa ya ninse nin Klopas ya po Mari nin Mari Madelenn se u'dɔpɔnpɔn saan. 26 \*Yesu laa' u'naa nin u'panpaanke wà u yíe wɔ ki gbien' nnɔ se ki buɔke, nɛ u tɔke' u'naa ki ye: «Upii, a'bije sɔ,» 27 nɛ ki tɔke' u'panpaanke nnɔ mɔ ki ye: «A'naa sɔ.» Kí ñɛ nɛn daali nɛ u'panpaanke nnɔ cère' \*Yesu ya naa te u'den.

*Yesu ya kuum udɔpɔnpɔn bo*

*(Matie 27:45-56; Mark 15:33-41; Luk 23:44-49)*

28 Ni ya puoli bó nɛ \*Yesu ben ki ye fɛnfennɔ u sɔn' u'tuon kɛ ki gben'-a, nɛ ki len' ki ye: «Uñuñun nɛ nɛmɔbe nni,» nɔ nà kɛle' \*Uwien ya gbɔnku ni nnɔ n' tien. 29 Licuɔl liba se ni'saan ki gbe midɛnɛmɛmɛmɛmɛ miba, nɛ bi taa' ticitɔnt ki sɛkn' mi'ni, ki taa' ki tuun' kusiiku kùà bi yih kù isɔp nnɔ ya lenbenl bo, ki tɛnde' ki kòle' u'ñɔbu. 30 U muɔre' midaam nnɔ nɛ ki ye: «N tien' ni'kɛ ki gben' nínɔ», ki gòn', nɛ ki kpo'.

*Soja uba cɔke' Yesu ya kɛle ni likpaanl*

31 Ní là yé lidaali là \*Sufmbɛ bondeh bi'Saba nɛ. U ya \*Saba là yé uwengbenge nɛ. Nɛn bo nɛ \*Sufmbɛ ya ciɛnb nɔ là yíe nikipil n' li te dɔpɔnpɔn bo, nɛ ki tɔke' Pilat ki ye wɔ n' cère u'sojambɛ n' n' k' k' kuɔ bi kpe' binib bà nnɔ ya tãan†, k' jiin bɛ. 32 Nɛ sojambɛ nnɔ baa' ki n' k' k' kuɔ' binib bà bi kpe' bɛ idɔpɔnpɔn bo nin \*Yesu nnɔ ya tãan. Bi n' k' k' kuɔ' ukpiɛk ye, ki n' k' k' kuɔ' ulie mɔ ye. 33 Ama bi t' baa' \*Yesu saan ma nnɔ, ki laa' u kpo'-a, nɛn bo nɛ ba kuɔ' u'yɛ. 34 Nɛ sojambɛ nnɔ ya uba taa' likpaanl ki cɔke' \*Yesu ya kɛle ni. Nɛ misɛm nin miñunm pɔk ki ñɛn' i ya tãan bo. 35 Unil wà laa' tibont nnɔ nɛ tɔke' u laa' nà. U len' nà nɔ yé imàn nɛ, nɛ u ben ki ye u tɔke' tigbɛmɔnt nɛ, nɔ ni'mɔ n' teke k' ji. 36 Bi tien' \*Yesu nnɔ nɔ nà kɛle' \*Uwien ya gbɔnku ni nnɔ n' tien nɛ. Ní kɛle' ki ye: «Ba n' kuɔ u'kpɔbl liba mɔnɔn.» 37 Ní t' liebe' ki kɛle' \*Uwien ya gbɔnku ni ki ye: «Bi li caan unil wà bi cɔke' wɔ likpaanl nnɔ bo inun.»

*Yesu ya subm*

*(Matie 27:57-61; Mark 15:42-47; Luk 23:50-56)*

38 Ni ya puoli bó nɛ Yosef wà yé Arimate ya du ya nil nnɔ baa' ki miɛ' Pilat ki ye wɔ n' cère wɔ wɔ n' jiin' \*Yesu ya gbɛnɛnt udɔpɔnpɔn bo. Pilat tuo', nɛ u jon' ki t' jiin' t' tu. Yosef bugben là yé \*Yesu ya panpaanke nɛ ka tuo' nil n' bende, kimɛ u là fenge \*Sufmbɛ ya ciɛnb nɛ. 39 Nikodem, wà là baa' \*Yesu saan miba kuñɔnku nnɔ mɔ baa', ki tuke' lɛfina. Bi cùuke lɛfina wà bi yih wɔ \*miir nnɔ nin bi yih wà alowɛs nnɔ nɛ. Lɛfina nnɔ ya kpiɛke li baa' ten kilo pita. 40 Yosef nin Nicodem taa' kukpɛlciɛku ki tɛntɛn' \*Yesu ya gbɛnɛnt, nɛ ki taa' lɛfina nnɔ ki tien' tu'bo, \*Sufmbɛ subeh bitɛnkpiib ma bo. 41 Isiin ya kpàabu buba te bi kpe' \*Yesu nà saan nnɔ. Bi là gbin' ufele uba bukpaabu nnɔ ni ka laan sube' nil len. 42 Ní là yé lidaali là \*Sufmbɛ bondeh Saba nɛ, nɛ ufele nnɔ mɔ nɔ nɔ nin ni'saan. Nɛn bo nɛ bi taa' \*Yesu ki t' sube' u'ni.

## 20

*Yesu mɛkre' bitɛnkpiib ni*

*(Matie 28:1-8; Mark 16:1-8; Luk 24:1-12)*

1 \*Saba ya daali gèbre', kutaaku kùà li faa nnɔ nɛ Mari Madelenn wɔre' ki fii' n' biike, ki bure' likul nnɔ bó. U t' baa' ki laa' kutɛnku kùà bi là taa' ki biin' likul nnɔ nɔ nɔ nɔ nɔ nɔ nɔ. 2 Nɛ u sɛn' ki jon' Simɔn Pier nin \*Yesu ya panpaankɛtɔ wà u yíe wɔ ki gbien' nnɔ saan, ki t' tɔke' bɛ ki ye: «Bi ñɛn' Yonbdaan likul nnɔ ni nɔ! Ta ben bi taa' wɔ ki ble' nà saan!»

3 Nɛn saan nɛ Pier nin \*Yesu ya panpaankɛtɔ nnɔ ñɛn' ki joh likul nnɔ bó. 4 Bi joh ma nnɔ bi'kɛ bile tiinh nɛ, ama upanpaankɛtɔ nnɔ sɛn' ki cɛn' Pier ki kpiɛ' ki baa' li'saan, 5 nɛ ki gbien' ki liike', ki laa' tikpɛlɛɛr nnɔ nɛ dɔ len, ama wa kɔn'. 6 Simɔn Pier, wà paan' puoli bó ní nnɔ, mɔ baa', nɛ ki kɔn' likul nnɔ ni, ki laa' tikpɛlɛɛr nnɔ dɔ len, 7 ki laa' kukpɛlciɛku kùà

† 19:31 Bi là n'ih ki kàh binib bà bi kpaakeh bɛ idɔpɔnpɔn bo ya tãan nɔ bɛ n' kpo tonm nɛ.

bi là taa' ki pibn' \*Yesu ya yul nnɔ jɛnde' ki dɔ likonkonl, ku'ba. <sup>8</sup> Nɛn saan nɛ upanpaanke wà bi kpɛ' ki baa' likul saan nnɔ mɔ kɔn' ki laa', nɛ ki teke' ki jin'. <sup>9</sup> Kimɛ haali nin u ya yo ba laan là cii' nà kɛle' \*Uwien ya gbɔnku ni ki ye \*Yesu lá li mɛkre bitɛnkpɛib ni nnɔ ya tingi. <sup>10</sup> Nɛ \*Yesu ya panpaankaab nnɔ liɛbe' ki kùn'.

*Yesu cère' Mari Madelenn laa' wɔ*  
(Matie 28:9-10; Mark 16:9-11)

<sup>11</sup> Tɔ, Mari juore' ki se saali nɛ likul nnɔ saan ki muɔh. U se ki muɔh, nɛ ki lá gbɛn' ki liike' li'ni, <sup>12</sup> ki laa' Uwien ya tondb bile bi guo tiwɛnpenpiɛnt ki kɛ \*Yesu ya gbɛnɛnt là dɔ nà saan nnɔ. Uba kɛ u'yul là kunh nà bó, nɛ utɔ mɔ kɛ u'taan là kunh nà bó nnɔ. <sup>13</sup> Nɛ bi niire' wɔ ki ye: «Upii, bɛ tien' a muɔh?» Nɛ u jiin' bɛ ki ye: «Bi ñɛn' n'Yonbdaan nɛ, ma bɛn bi taa' wɔ ki ble' nà saan.» <sup>14</sup> U len' nnɔ ma nnɔ nɛ ki jiɛbe' ki laa' \*Yesu se, ama wa bɛnde' ki ye \*Yesu nɛ. <sup>15</sup> Nɛ \*Yesu niire' wɔ ki ye: «Upii, bɛ tien' a muɔh? A nuunh ɲmɛ?» Mari maale' ki ye uje wà gu bukpaabu nnɔ nɛ, nɛ ki tɔke' wɔ ki ye: «Cɛnbaa, sin nɛ taa' wɔ la, wuɔn' nni, a ble' wɔ nà saan ń jo kí taa.» <sup>16</sup> Nɛ \*Yesu ye: «Mari.» Nɛ u jiɛbe' ki tɔke' wɔ \*Sufmbɛ ya lenm ni ki ye: «Rabuni.» Ni'tingi si «Cɛnbaa.» <sup>17</sup> Nɛ \*Yesu ye: «La li co nni\*, kimɛ ma laan don' n'Baa bó, ama jo kí tí tɔke' n'ninjiɛb kí ye: n doh n'Baa wà yé ni'mɔ ya baa nnɔ bó nɛ. U yé n'Wien nɛ, ki yé ni'mɔ ya Wien.» <sup>18</sup> Nɛ Mari Madelenn jon' ki tí tɔke' \*Yesu ya panpaankaab ki ye: «N laa' Yonbdaan,» nɛ ki tɔke' bɛ \*Yesu tɔke' wɔ tigber tà nnɔ.

*Yesu cère' u'panpaankaab laa' wɔ*  
(Matie 28:16-20; Mark 16:14-18; Luk 24:36-49)

<sup>19</sup> Tɔ, \*Saba ya daali gɛbre', kutaaku kùà li faa' nnɔ ya tajuɔku, nɛ \*Yesu ya panpaankaab taan' ki te kuduku kuba ni ki pɛnpɛin' inaɲuɔn, kimɛ bi là fɛnge \*Sufmbɛ ya ciɛnb nɛ. Nɛ \*Yesu baa' ki lá sere' bi'siik ni, ki tɔke' bɛ ki ye: «Li te mɛn uyɛnduɔn ni.» <sup>20</sup> U len' nnɔ, nɛ ki wuɔn' bɛ u'nuɔ nin u'kɛle ni ya gbɛn. U'panpaankaab laa' wɔ ma nnɔ, nɛ bi'yɛnm sɔnge. <sup>21</sup> Nɛ u tí tɔke' bɛ ki ye: «Li te mɛn uyɛnduɔn ni. N'Baa sɔn' nni ma nnɔ, nɛ n'mɔ sɔn' ninbi.» <sup>22</sup> U len' nnɔ, nɛ ki piebe' bi'bo, ki tɔke' bɛ ki ye: «Teke mɛn \*Mifuoɲaanm. <sup>23</sup> Ni fère' binib bà bi'biere la, Uwien mɔ li fère bɛ. Na fère' bà la, Uwien mɔ ɲa ń fère bɛ.»

*Toma laa' Yesu nɛ ki teke' ki jin'*

<sup>24</sup> \*Yesu ya panpaankaab piik nin bile ya uba bi yih wà Toma, ki liɛbe' ki yih wɔ lilebl nnɔ, ɲa là te nin bitɔb uyo wà \*Yesu baa' bi'saan nnɔ. <sup>25</sup> Bipanpaankɛtɔb tɔke' wɔ ki ye: «Ti laa' Yonbdaan.» Nɛ u tɔke' bɛ ki ye: «Ma laa' bi là kpɛ' u'nuɔ ni ipɛnjen nà saan ya gbɛn, ka taa' n'nɔbil ki tuun' igbɛn nnɔ ni, ka taa' n'nuɔ ki tuun' bi là cɔke' u'kɛle ni nà saan nnɔ ya gbɛl ni la, ma ń teke kí ji fiebu.»

<sup>26</sup> Tɔ, iwien iniin gɛbre', nɛ \*Yesu ya panpaankaab tí taan' ki te kuduku ni. Toma mɔ ji te bi'ni. Nin inaɲuɔn pipi ma kɛ nnɔ \*Yesu baa' ki lá sere' bi'siik ni ki ye: «Li te mɛn uyɛnduɔn ni.» <sup>27</sup> Nɛ ki tɔke' Toma ki ye: «Tɛnde a'nɔbil kí mɛ niɛ saan, kí liike n'nuɔ ya gbɛn, kí tɛnde a'nuɔ kí tuun n'kɛle ya gbɛl mɔ ni. Ji la maaleh tɛma, teke kí ji.» <sup>28</sup> Nɛ Toma ye: «A yé n'Yonbdaan nin n'Wien nɛ.» <sup>29</sup> Nɛ \*Yesu tɔke' wɔ ki ye: «A laa' nni ma nnɔ nɛ ki teke' ki jin'. Bà ɲa laa' nni ki teke' ki jin' nnɔ, Uwien ya mɔnm te bi'bo.»

*Nà cère' San kɛle' kugbɔnku kuu*

<sup>30</sup> \*Yesu tien' miyɔkm ya bontɔr mɔ tù yɛbe u'panpaankaab ya nun ni. Ba kɛle' tù kugbɔnku kuu ni. <sup>31</sup> Bi kɛle' tuu nɔ ɲɔ ní teke kí ji kí ye \*Yesu yé Uwien ya Nigɛndke Kristo, ki yé Uwien ya Bijɛ nɛ. Ni teke' wɔ ki jin' la, wɔn bo nɛ ni li ɛ limiɛl.

## 21

*Yesu tí cère' u'panpaankaab laa' wɔ*

\* 20:17 Bi li fre kí ɛbre la li co nni kí ye la mɛ nni mɔ.

<sup>1</sup> Ni ya puoli bó nɛ \*Yesu tí cèrè' u'panpaankaab laa' wɔ Tiberiyad ya ñunciɛnm ya gbaal. U cèrè' bi laa' wɔ ma sɔ: <sup>2</sup> Simɔn Piɛr nin Toma wà bi liɛbe' ki yih wɔ lilebl nnɔ nin Natanayɛl wà ñɛn' ní Kana ya du wà te Galile ya tinɛnm ni nnɔ nin Sebede ya bijieɛb nin \*Yesu ya panpaankaatɔb bile nɛ là taan' ki te. <sup>3</sup> Nɛ Simɔn Piɛr tɔke' bɛ ki ye: «N joh lijenbɛl nɛ.» Nɛ bi ye: «Tí'mɔ li paan a'bo.» Nɛ bi ñɛn' ki bure' ki tí kɔn' buñɛrbu. Ba cuo' bonn haali kuñɔnɛmɛnku.

<sup>4</sup> Ni tí wendeh uyo wà nnɔ, nɛ bi laa' \*Yesu se miñunm ya gbaal. Ama u'panpaankaab nnɔ ña bɛnde' ki ye wɔn nɛ. <sup>5</sup> Nɛ u niire' bɛ ki ye: «Hee! Nacɛnɛ, na laa' bonn bi?» Nɛ bi ye: «Ta laa' bonn.» <sup>6</sup> Nɛ u tɔke' bɛ ki ye: «Wiɛ mɛn bubɛbu buñɛrbu ya jie bó, ni li lɛ.» Bi wiɛ' ki cuo' ijɛn ì yebe cɛɛn nɛ ka fre' ki dɛrɛ' bubɛbu nnɔ ki jiin' ní.

<sup>7</sup> Nɛ \*Yesu ya panpaankɛ wà u yíe wɔ ki gbien' nnɔ tɔke' Piɛr ki ye: «Yonbdaan nɛ.» Simɔn Piɛr cii' Yonbdaan nɛ ma nnɔ, ki laa' u te liñil nɛ, nɛ u taa' u'liɛrl ki gole', ki lu' miñunm ni ki joh u'saan. <sup>8</sup> U'panpaankɛtɔb bà sɛn' nnɔ we ní buñɛrbu ni ki dieh bubɛbu bù gbe ijɛn. Ba là fɔke nin ñunm ya gbaal. Ní li te tɛn meta kobk nɛ. <sup>9</sup> Bi tí baa' miñunm ya gbaal ki ñɛn' buñɛrbu ni nɛ ki laa' ikuɔn ya mu uba, ujen puu u'ni, ki laa' kpɔnɔ mɔ. <sup>10</sup> Nɛ \*Yesu tɔke' bɛ ki ye: «Taa ní mɛn ni cuo' ijɛn yà nɔ ya iba.»

<sup>11</sup> Nɛn saan nɛ Simɔn Piɛr liɛbe' buñɛrbu nnɔ ni, ki tí dɛrɛ' bubɛbu ki ñɛn' liwɛl bo, bù gbe ijɛngbɛngbɛnge kobk nin piñun nin ita. Nin ì yebe ma kɛ nnɔ, bubɛbu nnɔ ña kɛrɛ'. <sup>12</sup> Nɛ \*Yesu tɔke' bɛ ki ye: «Dɛn mɛn kí ñmɔn.» U'panpaankaab ya uba mɔnɔn ña tɔnge wɔ ní niire wɔ kí ye: «Sin ñmɛ nɛ?» Kimɛ bi bɛn ki ye Yonbdaan nɛ. <sup>13</sup> Nɛn saan nɛ \*Yesu nɛkn', ki yuure' kpɔnɔ ki de' bɛ, ki taa' ujen nnɔ mɔ ki de' bɛ. <sup>14</sup> \*Yesu tí mɛkre' bitɛnkpiib ni ki cèrè' u'panpaankaab laa' wɔ ma, bolmta sɔ.

### *Yesu ye Piɛr ní li likeh u'nib*

<sup>15</sup> Bi jin' tijier nnɔ ki gben' uyo wà nnɔ, nɛ \*Yesu niire' Simɔn Piɛr ki ye: «Simɔn, San ya bijɛ, a yíe nni ki cɛn' biɛ nɔ-ɔɔ\*?» Nɛ u jiin' wɔ ki ye: «Hnn, Yonbdaan, sin mɔnɔn bɛn ki ye n fɛ ñɛ.» Nɛ \*Yesu tɔke' wɔ ki ye: «Li likeh n'pebumu.» <sup>16</sup> Nɛ ki liɛbe' ki niire' wɔ ki lere' ki ye: «Simɔn, San ya bijɛ, a yíe nni-ii?» Nɛ u tí jiin' wɔ ki ye: «Hnn, Yonbdaan, sin mɔnɔn bɛn ki ye n fɛ ñɛ.» Nɛ \*Yesu tɔke' wɔ ki ye: «Li yé n'pekpaal.» <sup>17</sup> Nɛ ki liɛbe' ki niire' wɔ nta ki ye: «Simɔn, San ya bijɛ, a fɛ nni-ii?» Nɛ Piɛr ya yɛnm saa', kimɛ \*Yesu niire' wɔ bolmta sɔ ki ye: «A fɛ nni-ii?» Nɛ u jiin' wɔ ki ye: «Yonbdaan, a bɛn tibont kɛ, ki bɛn ki ye n fɛ ñɛ.» Nɛ \*Yesu tɔke' wɔ ki ye: «Li kpaah n'pe. <sup>18</sup> N tɔkeh ñɛ imɔn nɛ, a là yé unacɛnfaan ma nnɔ, a là guoh a'kpɛlɛɛr a'ba nɛ, ki joh a yíe nà bó. Ama a tí pore' uyo wà la, a li yuon a'nuɔ, nɛ unitɔ ní goln ñɛ, kí taa ñɛ kí jo ña yíe nà bó.» <sup>19</sup> U len' nnɔ ñɔ wɔ ní wuɔn, Piɛr lá li kpo mikuum mà ya bol kí kpiɛke Uwien nɛ. U len' nnɔ ki gben', nɛ ki tɔke' wɔ ki ye: «Paan n'bo ní.»

### *Piɛr niire' Yesu upanpaankɛtɔ nnɔ ya gber*

<sup>20</sup> Piɛr jiebe', ki laa' \*Yesu yíe upanpaankɛ wà ki gbien' nnɔ pɛ bi'bo. Upanpaankɛ nnɔ nɛ là gbien' \*Yesu bo, bi là jinh tijier uyo wà nnɔ, ki niire' wɔ ki ye: «Yonbdaan, ñmɛ ye wɔ ní kuɔrɛ ñɛ?» <sup>21</sup> Piɛr laa' wɔ ma nnɔ, nɛ ki niire' \*Yesu ki ye: «Yonbdaan, bɛ lá li tu wuɔ mɔ?» <sup>22</sup> Nɛ \*Yesu jiin' wɔ ki ye: «N yíe wɔ ní li te kí tí baa uyo wà n li baa ní la, ní yé a'gber-ii? Sin, li pɛ n'bo ní dee.»

<sup>23</sup> Li ya ñɔbonl bo nɛ \*Yesu yaab ni bi lienh ki teh u'panpaankɛ nnɔ ña ní kpo. \*Yesu wɔn ña tɔke' ki ye wa ní kpo. Ama u tɔke' wɔ ki ye: «N yíe wɔ li te kí tí baa uyo wà n li baa ní la, ní yé a'gber-ii» nɛ?

<sup>24</sup> Upanpaankɛ nnɔ nɛ tɔke' binib tigber tuu, ki kɛle' tù kugbɔnku kuu ni. Nɛ ti bɛn ki ye u'gber nnɔ yé imɔn nɛ.

\* **21:15** Grɛkmbɛ ya lenm ya ñɔbonl là ya tingi si: biɛ nɔ nnɔ li fre kí li yé binitɔb bii tibontɔr mɔ.

<sup>25</sup>\*Yesu tien' tibont t̀̀ yεbe. Bi bi ye bέ n̄ kele tu'kέ jεjε la, n maale' ki ye uɲεndun wuu ya fεnm n̄ baa bέ n̄ ble bi li kele tıgbont t̀̀ nno.



## Yesu ya tondb ya tùon Nà wɔngɛh kugbɔnku kuu te ma bo

Bi yih wà kɛlɛ' kugbɔnku kuu nnɔ Luk nɛ. Kugbɔnku bugbɛn yé tɪgbɛmɔnmɔnt tà u kɛlɛ' tù nnɔ ya tutukl nɛ. Kù tɔkɛh Yesu ya tondb là kpaande' u'gbɛmɔnmɔnt uɛɛndun ni ma bo nɛ. Bi cin' ki kpaande' tù Yerusalem ni nɛ, ki tuɔn' mitinfɛnm mà guɔn' Yerusalem nnɔ, ki ɛmɔɛmɔbe ki tɪ baa' idu yà kɛ guɔn' Mediterane ya ñunciɛnm nnɔ.

Kugbɔnku kuu cin' nin Yesu ya dùom paaki bó Uwien saan ya gbɛr nɛ (1:9). U cèrɛ' Mifuoñaanm jìirɛ' ní u'tondb bo ki toreh bɛ bi'tùon ni (2:1-12).

Kí cin iyul 2 kí tɪ baa iyul 12, bi lienh Yesu ya tond Pier bo nɛ nɪ yɛbe. Binib bà là kpiɛ' ki teke' Yesu ki jin' nnɔ kɛ là yé Sufmbɛ nɛ. Sufmbɛ ya ciɛnb là jèndɛ' bi'mɔ tɛn bi là jèndɛ' Yesu ma bo nɛ. Nin bi jèndɛh bɛ ma kɛ nnɔ Mifuoñaanm diɛnh bɛ lifɛl nɛ bi tɔkɛh binib Yesu ya gbɛmɔnmɔnt, ki teh miyɔkm ya bont (3-8).

Kí cin iyul 13 kí tɪ baa ku'biɛn, bi ji lienh Pɔl bo nɛ nɪ yɛbe. Bi lienh Pɔl concuon' ma bo ki tɔkɛ' binib Uwien ya gbɛr nɛ. Pɔl mɔ là yé Suf nɛ, ki yé Farisiɛnmɛ ya cɛkl ya uba, ki yé unil wà jèndɛh Kristo ya taanl yaab cɛɛn.

Lidaali liba nɛ u lá joh Damas ya du bó wɔ ní tɪ tɪ jèndɛ bà mɔ teke' Yesu ki jin' ni'bo nnɔ. Nɛ Yesu tɪ jìɛ' wɔ usɛn ki cèrɛ' u tien' u'yɔ. U ya Pɔl nɛ ji cèrɛ' Yesu ya gbɛmɔnmɔnt yɛrɛ' Mediterane ya ñunciɛnm ya tinfɛnm ni, ki ɛmɔɛmɔbe ki tɪ baa' uduciɛn Erom ni.

### *Yesu pùon' ki ye u li de u'tondb Mifuoñaanm*

<sup>1</sup> N'jɔ Teofil, n'gbɔnkpiɛku ni, n tɔkɛ' ɛɛ \*Yesu cin' ki tien' nà nin u wɔkn' nà, <sup>2</sup> ki tɪ baa' lidaali là Uwien taa' wɔ ki don' paaki bó nnɔ. Kí yaan Uwien ní taa wɔ kí dùo paaki bó nnɔ \*Mifuoñaanm cèrɛ' u wɔkn' binib bà u gèndɛ' bɛ ki tien' u'tondb nnɔ bi li kpe isɛn yà. <sup>3</sup> U kpo' ki mɛkre' bitɛnkpiib ni ma nnɔ, u cèrɛ' bɛn nɛ laa' wɔ mibolm mà yɛbe, ki tɪ baa' iwien pinan, ɛɛ wɔ ní wuɔn bɛ kí ye u mɔnbɛ ki fuobe. U cèrɛ' bi laa' wɔ, nɛ u tɔkɛ' bɛ Uwien ya bɛl ya gbɛr. <sup>4</sup> Lidaali liba wɔn nin bɛn jinh tijier\*, nɛ u tɔkɛ' bɛ ki ye: «Ni la jɛnde Yerusalem ni, ama ní li te len, kí tɪ baa lidaali là n'Baa Uwien li de nɛ u là pùon' ki ye u li de nɛ nà nnɔ. Ni cii' lipuonl nnɔ min saan nɛ. <sup>5</sup> Ni là cii' n ye: San là taa' miñunm nɛ ki sɪi' binib Uwien ya ñunm, ama ninbi wɔn, nɪ sɪɛn' iwenkàankɛ nɛ, n li cèrɛ' \*Mifuoñaanm nɛ ní jìirɛ ní ni'bo.»

### *Uwien cèrɛ' Yesu don' paaki bó*

<sup>6</sup> \*Yesu ya tondb taan' u'saan nɛ ki niirɛ' wɔ ki ye: «Yonbdaan, nɛn mɛn la, fɛnfɛnnɔ nɛ a li fie tinbi Israyɛl yaab ya bɛl, kí jìin kí de tɛ-ɛɛ?»

<sup>7</sup> Nɛ \*Yesu jìin' bɛ ki ye: «Lidaali là nin uyo wà tibont nnɔ li tien nnɔ ɛɛ yé ni'gbɛr, Baa Uwien nɛ sɪɛn' ni'kɛ u yíe ma bo. <sup>8</sup> Ama uyo wà \*Mifuoñaanm li jìirɛ ní ni'bo nnɔ, ni li lɛ mituɔm, kí li yé n'mònkunb Yerusalem ni nin Sude ya tinfɛnm kɛ ni nin Samari ya tinfɛnm kɛ ni nin utingbɛn kɛ bo.»

<sup>9</sup> U len' nnɔ ma nnɔ nɛ Uwien cèrɛ' u doh paaki bó bi'nun ni. Nɛ kutɛwɔlgbɔnku kuba baa' ki lèkn' u'bo, ba ji laa' wɔ. <sup>10</sup> U doh uyo wà nnɔ nɛ bi juore' ki se ki likeh paaki bó. Bi se ki likeh ma nnɔ nɛ ki laa' i ya tàan bo bijɛb bile se bi'saan, ki guo tikpɛlcɛpiɛnt, <sup>11</sup> ki niirɛ' bɛ ki ye: «Galile yaabɛ, bɛ tien' ni se ki likeh paaki nɔ? Uwien nɛ ñɛn' \*Yesu wuɔ ni'saan ki don' paaki. U li baa ní tɛn ni laa' u doh ma bo nɔ nɛ.»

### *Yesu ya tondb nin binitɔb taan' bɛ ní kàare*

<sup>12</sup> Tɔ, \*Yesu ya tondb siere' lijuɔl là bi yih lè Olifi ya siin ya juɔl nnɔ bo ki liebe' Yerusalem ni. Lijuɔl nnɔ ɛɛ fɔke nin Yerusalem. Ní lii te kɔnsini uba nɛ. <sup>13</sup> Bi tɪ baa' Yerusalem ni ma

\* **1:4** Bi li fre kí lɛbre wɔn nin bɛn jinh tijier nnɔ kí yé wɔn nin bɛn te mɔ.

nnɔ nɛ ki kɔn' bi tĩ ní taakeh ki te paaki ya duku kùà ni nnɔ. Pìer nin San nin Saak nin Andre nin Filip nin Toma nin Batelemi nin Matie nin Alfe ya bije Saak nin Simɔn wà ya nun mɔn u'du bo ya gber nin Saak ya bije Sudas nɛ kɔn' ki te kuduku nnɔ ni. <sup>14</sup> Bipiib biba mɔ là te bi'ni, bi ya uba si: \*Yesu ya naa Mari nin \*Yesu ya ninjieb. Bi'ke kpaan' buñɔbu, nɛ ki tuu ki taakeh ki kàareh.

### *Bi gènde' Matiyas ki lère' Sudas ya lènl*

<sup>15</sup> I ya den nɛ binib bà teke' \*Yesu ki jin' nnɔ taan' litaanl. Bi là li baa binib kobk nin pile. Nɛ Pìer fii' ki sere' bi'siik ni, ki tɔke' bɛ ki ye: <sup>16</sup> «N'yaabɛ, nĩ kpe \*Mifuoñaanm là cère' \*Dafid len' Sudas ya gber tà, bi kele' tù \*Uwien ya gbɔnku ni nnɔ ní tien nɛ. Wɔn Sudas nɛ là le ki wɔngeh binib bà cuo' \*Yesu nnɔ usen. <sup>17</sup> Sudas là yé tinbi \*Yesu ya tondb ya uba nɛ. \*Yesu là gènde' u'mɔ ki de' wɔ ti sɔnh lituonl là nɔ nɛ.» <sup>18</sup> (Sudas tien' nibonn nà bre, nɛ bi pèn' wɔ ilike, u taa' ki dɛ' kitink kiba; nɛ ki lu' ki'bo libenlibl u'puoku kpiere', nɛ u'nier kɛ ñen'. <sup>19</sup> \*Yerusalem ya nib kɛ cii' tigber nnɔ. Nɛn bo nɛ bi yin' kitink nnɔ bi'lenm ni ki ye: «Akaldama» Ni'tingi si: Misèm ya tink.) <sup>20</sup> Pìer tí len' ki ye: «Nĩ kele' iyuon ya gbɔnku kùà te \*Uwien ya gbɔnku ni nnɔ ni ki ye:

⟨U'den ní tien kulengbonku, ñɔ nil la ji ní li kɔ yĩ.⟩

Nĩ tí kele' ki ye:

⟨Unitɔ ní lère u'lènl.⟩

<sup>21</sup> Binib te ki tɔke' nin tɛ uyo wà kɛ Yonbdaan \*Yesu là te nin tɛ ti joh ni'ke saan nnɔ, <sup>22</sup> ki cin' uyo wà San là siih binib Uwien ya ñunm ki tí baa' lidaali là Uwien ñen' wɔ ti'bùol ki cère' u don' paaki nnɔ. Nĩ kpe bɛn ya uba nɛ ní kpɔbn ti'bó, kí li yé umònkunl Yonbdaan ya mɛkrm bo.⟩

<sup>23</sup> Nɛn saan nɛ bi gènde' bijeb bile. Bi yih uba Yosef, ki baanh wɔ Basabas, ki liebe' ki baanh wɔ Yustus mɔ, ki yih utɔ Matiyas. <sup>24</sup> Nɛ bi kàare' ki ye: «Yonbdaan, sin nɛ bɛn binib kɛ ya fèl ni te ma bo. Binib bile biɛ ni, wuɔn tɛ a gènde' wà, <sup>25</sup> ñɔ wɔ ní lère Sudas ya lènl a'tondb ya tuonl ni, kimɛ Sudas dàan' lè nɛ ki jon' u kpe wɔn li te nà saan». <sup>26</sup> Bi kàare' Yonbdaan ki gben', nɛ ki fùore' imúɔn bɛ ní liike bi li gènde wà. Nɛn nɛ wuɔn' bɛ ki ye bi li gènde Matiyas nɛ. Nɛ bi taa' wɔ ki kpɔbn' \*Yesu ya tondb piik nin uba nnɔ bó.

## 2

### *Mifuoñaanm ya baam*

<sup>1</sup> \*Pantekot ya nacenku ya daali, nɛ binib bà teke' \*Yesu ki jin' nnɔ kɛ taan' ki te bùol liba. <sup>2</sup> Nɛ bi cii' i ya tàan bo kuwaaku kuba ñen' ní kutaaku bó, ki naan tɛn kutafaabiiku, ki lá gbe kuduku kùà bi kɛ ku'ni nnɔ. <sup>3</sup> Nɛn saan nɛ bi laa' nibonn niba baa' ki naan imupien, ki pàareh ki paakeh wà kɛ ya yul bo. <sup>4</sup> Nɛ \*Mifuoñaanm kɔn' bi'ke ki tí gben', ki cère' bi lienh ilenbol, mĩ yíe wà kɛ ní len ma bo.

<sup>5</sup> U ya yo ki laa' \*Sufmbɛ bà pɛ Uwien bo mɔnmɔnm nnɔ te Yerusalem ni nɛ. Bi ñen' idu yà kɛ te uɛndun ni nɛ ki baa'. <sup>6</sup> Bi cii' binib bà teke' \*Yesu ki jin' nnɔ ya waaku bó ma nnɔ nɛ ki taan' ni'saan ki yebe. Bi cii' bi lienh ma nnɔ nɛ nĩ beke' bɛ ki gbien', kimɛ wà kɛ ciih bi lienh u'tiema lenm nɛ. <sup>7</sup> Nĩ beke' bɛ ki gbien' ba ji bɛn bi li ye bà, ki ñuɔreh binib bà teke' \*Yesu ki jin' nnɔ, nɛ ki ye: «O, binib bà lienh nɔ, bi'ke ña yé Galile yaab-ii? <sup>8</sup> Nĩ tien' mila ñɔ ti'ni wà kɛ ciih bi lienh u'yaajelenm-i? <sup>9</sup> Ti'ni biba ñen' Pat ya du bó ní nɛ, bitɔb ñen' Medi ya du bó ní, bitɔb mɔ ñen' Elam ya du bó ní, bitɔb mɔ ñen' Mesopotami bó ní, bitɔb mɔ yé Sude ya tinfenm yaab, bitɔb mɔ ñen' Kapadosi ya tinfenm bó ní, bitɔb mɔ ñen' Pɔnt ya tinfenm bó ní, bitɔb mɔ ñen' Asi ya tinfenm bó ní, <sup>10</sup> bitɔb mɔ ñen' Friji ya tinfenm bó ní, bitɔb mɔ ñen' Panfili bó ní, bitɔb mɔ ñen' Esipt bó ní, bitɔb mɔ ñen' Libi ya du wà bi yih wù Sirenn nnɔ ya tinfenm bó ní. Bitɔb mɔ ñen' Erom bó ní. <sup>11</sup> Ti'ni, biba yé \*Sufmbɛ nɛ, bitɔb mɔ yé Sufkpenkpend. Bitɔb mɔ yé Kret yaab, bitɔb mɔ yé Arabi yaab. Ti'ke ciih bi lienh ti'lenm ni nɛ ki tɔkeh Uwien sɔn' itùonciɛn yà nnɔ.» <sup>12</sup> Nĩ beke' bɛ ki gbien', ba ji

bɛn bi li maale kí ye bà, nɛ ki niireh tɔb ki teh: «Ni'tingi si ba?» <sup>13</sup> Ama biba mɔ sukreh bɛ nɛ ki teh bi ñun' midaam nɛ ki yibe'.

*Piɛr tɔke' linigol Uwien ya gɛr*

<sup>14</sup> Nɛn saan nɛ Piɛr nin u'tɔb piik nin uba nnɔ fii' ki sere', nɛ Piɛr len' ufaa bo, ki tɔke' linigol nnɔ ki ye: «Ninbi \*Sufmbɛ nin ninbi bà kɛ te \*Yerusalem ni nɔ, cenge mɛn n'ból mɔnmɔnm, ní tɔke nɛ ni'tingi. <sup>15</sup> Ni maaleh ki teh binib biɛ ñun' midaam nɛ ki yibe'-ee? Ba ñun' daam, kime ní laan te kutɛnɲaaku ya kur tuwɛ nɛ. <sup>16</sup> Ama \*Uwien ya ñɔbonsɔknl Sowɛl là len' nà nnɔ nɛ teh. U là len' ki ye:

<sup>17</sup> «Uwien ye: iwenfɔrkɛ yà we ní nɔ;  
n li cère n'Fuoñaanm ní baa binib kɛ bo,  
ni'bijiɛb nin ni'bisieɓ li sɔnkn n'ñɔbon,  
ni'nacɛnfɛnb nin ni'jɛciɛn li lɛ tibont tidɛknt yaam.

<sup>18</sup> U ya yo nɛ n lá li cère n'Fuoñaanm ní baa n'tonsɔnb,  
bijɛb nin bipiib bo,  
bɛ ní tien n'ñɔbonsɔknb.

<sup>19</sup> N li tien micincilnm kutaaku nin kitink bo,  
n li cère misɛm nin umu nin kumuñiijuɔku ní li te,

<sup>20</sup> uwien li biike tɛn licinñunl,  
nɛ uɲmaal ní mɔnde tɛn misɛm,  
kí yaan Yonbdaan ya daali ní baa ní,  
u li yé uwɛngbenge nɛ, ki li ɲmɔbe ukpieke.

<sup>21</sup> Nɛn daali wà kɛ li muɔ kí yin Yonbdaan ya yel nɛ li ɲmɛrɛ.» »

<sup>22</sup> Piɛr tí len' ki pukn' ki ye: «Israyɛl yaabɛ, cenge mɛn n'ból. Ninbi mɔnɔn bɛn ki ye Uwien cère' Nasarɛt ya \*Yesu tien' miyɔkm ya bont nin tibont tà kɛ nisaal ɲa ní fre kí tien tù, ɲɔ wɔ ní wuɔn nɛ \*Yesu yé udaan wà nɛ. <sup>23</sup> Bi taa' wɔ ki ɲukn' nɛ, nɛ ni cère' bà ɲa pɛ yiko bo kpɛ' wɔ udɔpɔnɔn bo ki ku' wɔ. Uwien là bɛn nɛ ki sien' ki ye nè ní tien nnɔ. <sup>24</sup> Ama Uwien mɛkre' wɔ ki ñɛn' wɔ mikuum ya jɛnd ni, kime kuum ɲa ɲmɔbe tuɔm mè ní juon wɔ kutɛnkpiiku ni. <sup>25</sup> \*Dafid là len' u'bo ki ye:

«N tuu ki lɛnh Yonbdaan n'nun bó nɛ.  
U te n'ɲɔjie bó,

ɲɔ niba la sɛn n'fɛl nɛ.

<sup>26</sup> Nɛn bo nɛ n ɲmɔbe uyɛnsɔnge,

ki liɛnh miyɛnsɔnglenm,

n bɛn ki ye n li kpo,

ama n ɲmɔbe lidɛndɛnl,

<sup>27</sup> kime ɲa ní cère ní juore kutɛnkpiiku ni,

ka ní cère min a'niñaan ní bùrɛ.

<sup>28</sup> A wuɔn' nni limiɛl ya sɛn.

A te n'saan ma nnɔ,

a li cère n li ɲmɔbe uyɛnsɔnge kí tí gben nɛ.» »

<sup>29</sup> Piɛr tí len' ki ye: «N'yaabɛ, ní kpɛ ní tùɔrɛ kí tɔke nɛ ti'yaajɛ \*Dafid ya gɛr nɛ. U là kpo', nɛ bi sube' wɔ. U'kul biɛ ki te ti'du ni haali nin dinnɔ. <sup>30</sup> U là yé \*Uwien ya ñɔbonsɔknl nɛ, ki bɛn ki ye Uwien là pùon' ki pole' ki ye u lá li cère u'yaabil liba ní kèlɛ u'berbiek bo.

<sup>31</sup> Uwien là cère' \*Dafid bɛnde' ki ye u'Nigɛndkɛ Kristo lá li mɛkre bitɛnkpiib ni. Nɛn bo nɛ \*Dafid là len' u'bo ki ye:

«Uwien ɲa cère' u juore' kutɛnkpiiku ni,

ka cère' u'gɛnɛnt bùrɛ'.»

<sup>32</sup> U ya \*Yesu nɛ Uwien mɛkre' wɔ bitɛnkpiib ni, nɛ ti'kɛ yé bimɔnkunb. <sup>33</sup> U'Baa Uwien kpiɛke' wɔ, ki taa' wɔ ki kàan' u'jie bó, ki de' wɔ u là pùon' ki ye u li de wɔ Mifuoñaanm

mà nnò, nɛ u cère' mǎ baa' ti'bo. Ni ciìh nà, ki likeh nè nò, nǐ yé \*Mifuoñaanm ya tuonl nɛ.  
 34 Ti bɛn ki ye \*Dafid ɲa là don' paaki, ama wɔn bugbɛn là len' ki ye:

«Yonbdaan Uwien tɔke' n'Yonbdaan ki ye:  
 Kèle n'nojie bó,

35 kí tí baa uyo wà n li cère á tɛ a'nennɛndb bo litaal.» »

36 Nɛ Pier tí len' ki ye: «Israyel yaabɛ, ni'kɛ ní mɔnbe kí bɛnde kí ye ninbi kpɛ' \*Yesu wà udɔpɔnpɔn bo nnò, Uwien tien' wɔn nɛ Yonbdaan, ki tien' wɔ Kristo u'Nigɛndkɛ.»

37 Linigol nnò cii' Pier len' nnò ma nnò nɛ nǐ jin' bɛ, ki saa' bi'yɛnm ki gbien', nɛ bi niire' Pier nin \*Yesu ya tondtɔb ki ye: «Ti'yaabɛ, ti nín li tien mila?»

38 Nɛ Pier jiin' bɛ ki ye: «Lèbre mɛn ni'tetem, kí cère tí sǐi ni'ni wà kɛ Uwien ya ñunm \*Yesu Kristo ya yel bo, ɲɔ Uwien ní fère nɛ ni'biere, kí pu nɛ \*Mifuoñaanm, 39 kime ti'Yonbdaan Uwien là pùon' lipuonl ki ye u li taa \*Mifuoñaanm kí de u yin' binib bà kɛ nnò. Bɛn si: ninbi nin ni'bumu nin bà kɛ te fɔkm nnò.»

40 Pier taah inɔbontɔ ì yebe ki sureh bɛ, ki saakreh bi'gbɛnɛnt ki teh: «Wiɛ mɛn fɛnfɛnnò ya nib bà yé bibierdenb nnò ya gɛr ɲɔ Uwien ní ɲmɛn nɛ.»

### *Binikipiekb bà là teke' Yesu ki jin' nnò là fuobe ma bo*

41 Nɛ bi sǐi' binib bà tuo' u'gɛr nnò Uwien ya ñunm. Ni'daali binib bà pukn' bà teke' \*Yesu ki jin' bó nnò li baa tɛn itur ita. 42 Bi tuu ki cengeh \*Yesu ya tondb ya wɔknm nin inunmón nɛ, ki te tɛn bi tɛ naa nin baa, ki taakeh ki jinh tijier\*, ki taakeh ki kàareh. 43 Tɔ, Uwien cère' \*Yesu ya tondb teh miyɔkm ya bont cɛɛn. Nɛn bo nɛ binib kɛ fɛnge Uwien. 44 Binib bà kɛ teke' \*Yesu ki jin' nnò kpɛ buñɔbu nɛ, ki taah bi'bont kɛ ki gbiinh tɔb. 45 Bi kuɔreh bi'tinmu nin bi ɲmɔbe tibont tà, nɛ ki taah ilike ki gbiinh tɔb, nǐ wiebe bɛ ma bo. 46 Idaan kɛ bi là kpɛ buñɔbu nɛ, ki tuu ki taakeh Uwien ya duku ya luo bo, ki taakeh tɔb den ki jinh tijier, ki ɲmɔbe uyɛɲɲmaa nin lifɛsɔngl, 47 ki pèkeh Uwien, nɛ bi'du ya nib kɛ yíe bi'gɛr. Nɛ idaan kɛ Yonbdaan ɲmiɛndeh binib ki pukndeh bi'bó.

## 3

### *Pier nin San cère' uwɔb uba faake'*

1 Lidaali liba nɛ Pier nin San joh Uwien ya duku bó tikur tuta ya kaare ya yo. 2 Tɔ, uje uba là te bi maa' wɔ uwɔb. Idaan kɛ bi yuunh wɔ ki lá kaandeh Uwien ya duku ya nañɔbu bùa bi yih bù Bunañmɔnmɔnbu nnò saan, wɔ ní li miɛh binib bà kɔh Uwien ya duku ya luo bo nnò nɛ tibont. 3 U laa' Pier nin San tuo bɛ ní kɔ Uwien ya duku ya luo bo, nɛ u miɛ' bɛ nibonn. 4 Pier nin San caan' u'bo inun, nɛ Pier tɔke' wɔ ki ye: «Liike tɛ.» 5 Nɛ u tɔɔrɛ' ki likeh bɛ, ki daan u li ɛ bi'saan nibonn nɛ. 6 Nɛ Pier tɔke' wɔ ki ye: «Ma ɲmɔbe like, ka ɲmɔbe ñɔkm. Ama n li de ɲɛ n ɲmɔbe nà nɛ. \*Yesu Kristo wà yé Nasaret ya nil nnò ya yel bo, fii kí cuon!» 7 Nɛ ki cuo' u'nojie, ki fin' wɔ. Nɛ u'tàan nin u'tɛgbiɛmu pɔk ki faake' i ya tàan bo. 8 U maabe' ki ci', ki sere', ki cin' ki cuonh, nɛ ki paan' bi'bo ki kɔn' Uwien ya duku ya luo bo, ki cuonh, ki mɛbreh, ki pèkeh Uwien. 9 Linigol kɛ laa' u cuonh ki pèkeh Uwien. 10 Bi bɛnde' ki ye wɔn nɛ tí ní kɛ Uwien ya duku ya Nañmɔnmɔnbu saan ki miɛh nnò. Bi laa' u faake' ma nnò nɛ nǐ cuo' bɛ miyɔkm nin bujɛwaanbu.

### *Pier lienh nin linigol Uwien ya duku ya luo bo*

11 Uje nnò ɲa dàan' Pier nin San. Nǐ cuo' binib nnò kɛ miyɔkm nɛ bi sɛn' ki baa' bi'saan kuninbonku\* kuba ni, bi yih kù «Salomɔn ya ninbonku.» 12 Tɔ, Pier laa' binib nnò ma nnò, nɛ ki niire' bɛ ki ye: «Israyel yaabɛ, bɛ tien' nǐ cuo' nɛ miyɔkm-i? Bɛ tien' ni likeh tɛ tɛn ti'tiɛma tuɔm nin ti pɛ Uwien bo mɔnmɔnm ma nnò nɛ cère' uje wuɔ faake'? 13 Uwien wà \*Abraham nin \*Isaak nin Sakɔb nin ti'yaajɛb là pukeh wɔ nnò nɛ kpieke' u'tonsɔnl \*Yesu

\* 2:42 Bi taakeh ki jinh tijier tà nnò li fre kí li yé Yonbdaan ya jier bii tijiefɛnt tuba. \* 3:11 Bi yih nà saan kuninbonku nnò te Uwien ya duku ya luo bo nɛ. Bi là taa' iten nɛ ki mɛn' ku'kpenkpen, ki lɛ' ki yekn' Uwien ya duku ya luo ya guoncɛncienl là guɔn' ki linde' kù nnò.

wà ninbi kuɔre' wɔ ki yie' wɔ Pilat ya nun bó nnɔ. Pilat wɔn là yie wɔ rí taa wɔ kí wiε nε, nε na tuo'. <sup>14</sup> Ninbi, yie' wà yé uñaan, ki yé ugbemɔndaan, nε ki ji tɔke' Pilat ki ye wɔ rí taa unikul kí wiε. <sup>15</sup> Ni ku' wà yé limiel ya daan, nε Uwien mεkre' wɔ bitenkpiib ni. Tinbi nε yé bimɔnkunb. <sup>16</sup> Ti du u'yel bo ma nnɔ nε liyel bugben ya tuɔm cère' uje wà ni likeh wɔ ki ben wɔ nɔ faake'. Ti teke' \*Yesu ki jin' ma nnɔ nε cère' uje wuɔ laa' laanfie ki tĩ gben' ki se ni'ke ya nun bó nɔ.

<sup>17</sup> «N'yaabε, n ben ki ye ninbi nin ni'ciεnb ku' \*Yesu ma nnɔ, na ben nε ki sɔn' li ya tuonl. <sup>18</sup> Uwien là cère' u'ñɔbonsɔknb kε len' uyo bo ki ye u'Nigendkε Kristo lá li jènde nε. Nεn nε tien'. <sup>19</sup> Nεn bo, lèbre mεn ni'tetem, kí liebe kí paan Uwien bo ηɔ wɔ rí fère nε ni'biere. <sup>20</sup> Nnɔ nε Yonbdaan li de nε lifuorl, ki li sɔn ní u'Nigendkε Kristo ni'saan. Wɔn si \*Yesu; u là gènde' wɔ ninbi bo nε. <sup>21</sup> Nĩ kpε wɔn \*Yesu rí li te paaki bó nε, kí tĩ baa uyo wà Uwien li fènde tibont kε. Nĩ te tɛn u là cère' u'ñɔbonsɔknb len' nà kε uyo bo nnɔ nε. <sup>22</sup> Moyis wɔn là len' ki ye: <Yonbdaan Uwien li cère ni'ni uba rí ñε uñɔbonsɔknl ni'bo tɛn min. Ní cenge u li tɔke nε nà kε. <sup>23</sup> Unil wà kε ηa tuo' uñɔbonsɔknl nnɔ ya ñɔbu bó la, Uwien li ñεn wɔ u'nib ni nε ki gben' u'gber.> <sup>24</sup> \*Uwien ya ñɔbonsɔknb kε, ki cin' Samiel nin biñɔbonsɔkntɔb bà paan' u'bo nnɔ mɔ là len' nà teh iden yiε nɔ ya gber. <sup>25</sup> Ninbi nε yé Uwien ya ñɔbonsɔknb nnɔ ya yaabii, nε ki li jonde kujɔtieku kùu u là cuo' kù nin ni'yaajeb nnɔ bo. U là tɔke' ni'yaaje \*Abraham ki ye u li tien inibol yà kε te utingben bo nnɔ u'mɔnm u ya yaabii bo nε. <sup>26</sup> Mikpiekm, ninbi bo nε Uwien là gènde' u'tonsɔnl Yesu, ki sɔn' wɔ ni'saan wɔ rí lá tien nε Uwien ya mɔnm, kí ñεn ni'ni wà kε u'tuonbiere ni.»

## 4

### *Sufmbε ya buur ya cεkl yaab bun' Pier nin San tibuur*

<sup>1</sup> Pier nin San laan biε ki lienh nin linigol nnɔ; u ya yo nε bitɔtuɔrkaab nin Uwien ya duguurb ya ciεn nin Saduseyεnmbε baa' bi'saan. <sup>2</sup> Bi'benku ni ben' Pier nin San bo, kime bi wɔknh binib ki teh \*Yesu mεkre' bitenkpiib ni ma nnɔ, binib bà kpo' mɔ li mεkre nε. <sup>3</sup> Bi cuo' bε ki laa' uwien lu' ηɔ, nε bi taa' bε ki tĩ peknl ki cère' bi te len nĩ tĩ faa'. <sup>4</sup> Nin nεn kε, binib bà cii' Pier nin San len' nà nnɔ, bi'ni bà yebe teke' \*Yesu ki jin'. Bijeb bà teke' wɔ ki jin' nnɔ li baa tɛn itur inun.

<sup>5</sup> Kutaaku faa', nε bitɔtuɔrciεnb nin \*Sufmbε ya ciεnb nin \*Yiko ya wɔnwɔknb taan' Yerusalem ni. <sup>6</sup> Bà là taan' nnɔ ya biba si: bitɔtuɔrciεnb ya ciεn Anni nin Kayif nin San nin Aleksand nin bitɔtuɔrciεnb ya cεkl ya nitɔb kε. <sup>7</sup> Bi cère' Pier nin San sere' bi'siik ni nε bi niire' bε ki ye: «Ni taa' ba ya tuɔm nε bii ni taa' ηmε ya yel nε ki buu' uwɔb wuɔ nɔ?»

<sup>8</sup> Nεn saan nε \*Mifuoñaanm cère' Pier tɔke' bε ki ye: «Bitɔtuɔrciεnb nin \*Sufmbε ya ciεnbε, <sup>9</sup> ti tore' uwɔb nnɔ ma nnɔ, nε ni buh tε tibuur dinnɔ, ki niireh tε ki teh ti tien' mila ki buu' wɔ. <sup>10</sup> Tɔ, ninbi nin Israyel ya nitɔb kε rí bende kí ye Nasaret ya \*Yesu Kristo wà ninbi kpε' wɔ udɔpɔnpɔn bo nnɔ, Uwien mεkre' wɔ bitenkpiib ni. U ya yel ya tuɔm nε cère' uje wuɔ faake' ki se ni'nun bó nɔ. <sup>11</sup> \*Yesu bo nε nĩ kele' \*Uwien ya gbɔnku ni ki ye: <Litɛnl là ninbi bidumεb wiε' lè nnɔ, len nε lá tien' litenkpiekl là co kuduku.>

<sup>12</sup> Miñmiiεnm ηa rí ñε uba saan ki kende' \*Yesu saan, kime \*Yesu ya yel baba ηa ñí la, Uwien ηa de' nil uba liyel uñendun wuu ni ηɔ len bo tí fre kí ηmεre.»

<sup>13</sup> Bi sekn' ki laa' Pier nin San ηa yé nikpekpiekb udu ni, ka ben gbɔnku ki gbien', ki ηmɔbe lifɛl ki lienh ma nnɔ, nε nĩ cuo' bε miyɔkm. Nε bi bende' ki ye ben nin \*Yesu nε là te. <sup>14</sup> Tɔ, bi laa' uje wà faake' nnɔ se Pier nin San saan ma nnɔ nε ba ji ben bi li ye bà. <sup>15</sup> Bi cère' bi ñεn' Pier nin San tibuur ya duku nnɔ ni, nε bi cin' ki gbierεh <sup>16</sup> ki teh: «Ti li tien mila binib biε nɔ? Binib bà kε te Yerusalem ni ben ki ye bi mɔnbe ki tien' miyɔkm ya bonn nε, ta rí fre kí niε. <sup>17</sup> Ama ta yie tigger nnɔ rí yebre udu ni ni'ke saan. Nεn bo, cère mεn tí mɔnde bi'bo inun kí wɔbn bε, bi la ji rí tɔke nil \*Yesu ya gber.»

18 Nε bi liebe' ki yin' bε ki kuɔn', ki pien' bε ki ye bi la ji ń wɔkn nil \*Yesu ya gber, ki la ji ń tε u'yel mɔ. 19 Ama Pier nin San tɔke' bε ki ye: «Nì kpε tí tuo ni ya ñɔbu bó bii Uwien ya ñɔbu bó nε? Ninbi mɔnɔn maale mɛn kí liike. Ni lε ba mɔn Uwien saan ní-i? 20 Tinbi ɲa ń fre kí li ɲmin kí la tɔke ti laa' nà nin ti cii' nà.» 21 Biciɛnb nnɔ tí mɔnde' bi'bo inun nε ki taa' bε ki wiε'. Ba laa' bi li dule nà bo kí dεre bi'tub, kime udu ya nib kε pèkeh Uwien miyɔkm ya bonn nnɔ bo nε. 22 Pier nin San tien' miyɔkm ya bonn, ki cère' uje wà faake' nnɔ ya bin gèbre' ibin pinan.

*Binib bà teke' Yesu ki jin' nnɔ kàareh*

23 Tɔ, bi taa' Pier nin San ki wiε' ma nnɔ nε bi liebe' ki jon' bi'tɔb saan, ki tí tɔke' bε bitɔtuɔrciɛnb nin \*Sufmbε ya ciɛnb nnɔ tɔke' bε nà nnɔ kε. 24 Bi cii' ma nnɔ nε bi'kε kpaan' buñɔbu, ki kàareh Uwien ki teh: «Yonbdaan, sin nε ñen' kutaaku nin kitink nin miñunciɛnm, ki ñen' tibont tà kε te kutaaku bo nin tà kε te kitink bo nin tà kε te miñunciɛnm ni. 25 Sin nε là cère' Mifuoñaanm ya tuɔm bo, a'tonsɔnl ti'yaaje \*Dafid len' ki ye:

«Bε bo nε bà ɲa yé \*Sufmbε ya benku ni ben' ki tí kende'?

Bε bo nε idu ya nib maaleh yɛnmaalfɛnm-i?

26 Uɲɛndun ya bεrciɛnb bonde' bi'ba,

nε idu ya bεrb taan' bi'tɔb saan,

bε ń kɔn nin Yonbdaan nin u'Nigɛndkε Kristo tijε.»

27 Imɔn nε, ubεr Herod nin Pɔns Pilat nin bà ɲa yé Israyel yaab nin Israyel yaab là taan' udu wuu ni, ki ku' \*Yesu wà yé a'tonsɔnñaan ki yé a'Nigɛndkε nnɔ. 28 Bi taan' ki tien' a'tuɔm nin a'yiem bo, a là sien' ki ye nà ń tien nnɔ nε. 29 Yonbdaan, fɛnfɛnnɔ gbien kí liike bi wɔbndeh tε liwɔbl là ba, kí de tinbi a'tonsɔnb lifɛl ɲɔ tí li tɔkeh binib a'gber ki la fεnge. 30 Wuɔn a'tuɔm kí cère biwiɛnb ń faake, miyɔkm ya bont ń li teh, a'tonsɔnñaan \*Yesu ya yel bo.»

31 Bi kàare' ki gben' ma nnɔ nε bi taan' ki te nà saan nnɔ jènge'. \*Mifuoñaanm baa' bi'kε bo, nε bi laa' lifɛl ki tɔkeh binib Uwien ya gber.

*Binib bà teke' Yesu ki jin' nnɔ taakeh bi'bont ki gbiinh tɔb*

32 Linigol là teke' \*Yesu ki jin' nnɔ kpε buñɔbu nε, ki ɲmɔbe iyɛnmaale iba. Uba ɲa lienh ki teh u'bonn yé u'baba yaann. Bi'kε là taakeh bi'bont nε ki gbiinh. 33 \*Yesu ya tondb ɲmɔbe mitɔciɛnm ki kundeh imɔn ki teh Yonbdaan \*Yesu mɔnbe ki mεkre' bitɛnkpiib ni. Nε Uwien juokeh bi'kε ki gbiekeh. 34 Bi'ni uba ɲa te ki luɔ' niba, kime bà kε ɲmɔbe mutinmu bii iden nnɔ kuɔreh nε ki taah bi kuɔreh ki lenh ilike yà nnɔ, 35 ki lá dienh \*Yesu ya tondb, nε bi gbiinh, ki dienh unil kε nì wiebe wɔ ma bo.

36 Uje uba te bi'ni, bi yih wɔ Yosef. Nε \*Yesu ya tondb baanh wɔ Banabas, ni'tingi si: «wà sɔngreh binib ya yɛnm.» U yé Lefi ya yaabil nε. Bi maa' wɔ Ciip ya du ni nε. 37 U ɲmɔbe bukpaabu buba, ki kuɔre' bù, nε ki taa' u kuɔre' ki laa' ilike yà nnɔ, ki lá de' \*Yesu ya tondb.

## 5

*Ananiyas nin u'po Safira ya gber*

1 Tɔ, ujetɔ mɔ là te bi'ni, bi yih wɔ Ananiyas, ki yih u'po Safira. U kuɔre' u'kpàabu buba, ki teke' ilike. 2 Wɔn nin u'po kpaan' buñɔbu nε u bore' ilike nnɔ ya niba bó ki taa' u'ba, ki tuke' nà bó sien' nnɔ ki lá de' \*Yesu ya tondb. 3 Nε Pier niire' wɔ ki ye: «Ananiyas, bε tien' a taa' a'fɛl ki cèbe' \*Satan nɔ nnɔ, ki lere' \*Mifuoñaanm, ki bore' bukpaabu nnɔ ya like ya niba bó ki taa' a'ba! 4 ɲa laan là kuɔre' bukpaabu nnɔ ma nnɔ, bù là yé a'yaabu nε. A kuɔre' bù ma nɔ, ilike nnɔ mɔ yé a'yi nε. Bε tien' a maale' a'fɛl ni á tien nɔ? A lere' Uwien nε, ɲa lere' nib.» 5 Ananiyas cii' iñɔbon nnɔ ma nnɔ, nε ki lu' ki kpo'. Nε bujewaanciɛnbu

cuo' binib bà ke cii' tigber nnò. <sup>6</sup> Nen saan ne binacenfènba baa' ki taa' bukpelbu, ki pòbn' wò, ki yuure' ki ñen' ki tí sube'.

<sup>7</sup> Nì tien' ten tikur tuta, ne u'po kòn' ní, ka ben nà tien'. <sup>8</sup> Ne Pier niire' wò ki ye: «Tòke nni tigbemànt, ni kuàre' bukpàabu bùa nnò ya like kèkè sò-sò?» Ne u ye: «Hnn, i'kèkè nínò.»

<sup>9</sup> Ne Pier tòke' wò ki ye: «Be tien' sin nin a'cè ke kpaan' buñòbu ki biike' \*Yonbdaan ya Fuoñaanm-i? Liike, bà sube' a'cè nnò ne tuo bunañòbu nò. Bi li yuure a'mò, kí ñen.» <sup>10</sup> Ne u'mò lu' u'nun bó i ya tàan bo ki kpo'. Binacenfènba nnò kòn' ní ki laa' u kpo', ne bi tí yuure' u'mò, ki tí sube' u'cè saan. <sup>11</sup> Bujèwaancienbu cuo' Kristo ya taanl yaab ke nin binib bà ke cii' tigber nnò.

### *Yesu ya tondb teh miyòkm ya bont*

<sup>12</sup> \*Yesu ya tondb teh miyòkm ya bont udu ya nib ni cèen. Binib bà teke' \*Yesu ki jin' nnò ke kpe buñòbu ne, ki taan' ki te Salomòn ya ninbonku\* ni. <sup>13</sup> Nitòb ña kaabe' ki taakeh nin be, ama udu ya nib ke là pèkeh be ne. <sup>14</sup> Ne binib ligol, bijeb nin bipiib ke teknh Yonbdaan ki jinh uyo ke ki pukndeh bi'bó. <sup>15</sup> \*Yesu ya tondb teh miyòkm ya bont ma nnò, ne binib yuunh biwiènb ki là blinh tikaagbont nin igado bo isengbe, ñò Pier lá gèbreh, u'jinjinku mònòn lu' bi'bo la, be ní faake. <sup>16</sup> Linigol mò tukeh biwiènb nin binib bà isenpol ñaake be nnò, ki ñeh ní idu yà neke Yerusalem nnò ni, ki bàareh \*Yesu ya tondb saan ne bi cèreh bi'ke faakreh.

### *Bi cuo' Yesu ya tondb*

<sup>17</sup> Tò, bitòtuàrcienb ya cien nin binib bà ke pe u'bo ki yé Saduseyenmbe nnò laa' \*Yesu ya tondb teh nnò ma nnò, ne bi taa' bi'bo iponponbe, ki jon' <sup>18</sup> ki cuo' be, ki tí pek'n' udu nnò ya pekl ni. <sup>19</sup> Ama ni'daali ya ñònkù, ne Yonbdaan Uwien ya tond baa' ki lá piire' lipèkl ya nagenku, ki ñen' be, ne ki tòke' be ki ye: <sup>20</sup> «Li joh men Uwien ya duku ya luo bo, kí tí ní li tòkeh binib mifuobfènm miè ya gber ke.» <sup>21</sup> Bi tuo' u'ñòbu bó, ne kutenñesònsònkù bi kòn' Uwien ya duku ya luo bo, ki wòknh binib Uwien ya gber.

Bitòtuàrcienb ya cien nin binib bà pe u'bo nnò baa' ki lá yin' \*Sufmbe ya buur ya cekl yaab bà bi lièbe' ki yih be Israyel ya cienb nnò ke ki taan', ne ki sòn' biguguurb be ní jo lipèkl bó kí tí taa' \*Yesu ya tondb ní. <sup>22</sup> Bi tí baa' ni'saan ka laa' be, ne ki lièbe' ní ki lá tòke' ki ye: <sup>23</sup> «Tí tí baa' ki laa' lipèkl ya duku pi mòmòmòm ne, biguguurb mò se kunagenku saan ki gu. Nin nen ke ti piire' ma, ta laa' nil uba mònòn len.» <sup>24</sup> Uwien ya duku ya guguurb ya cien nin bitòtuàrcienb cii' tigber nnò ma nnò, ne ní beke' be \*Yesu ya tondb bo cèen, kime ba ben ní tien' ma† <sup>25</sup> Nen saan ne unil uba baa', ki tòke' be ki ye: «Liike men-a! Bijeb bà ni pek'n' be nnò, bi te Uwien ya duku ya luo bo ki wòknh binib Uwien ya gber.» <sup>26</sup> Nen saan ne Uwien ya duku ya guguurb ya cien nin u'nib bure' be ní tí cuo' \*Yesu ya tondb ní. Ba cuo' be nin ufaa, bi tuke' be ní suoo ne, kime bi fenge udu ya nib la yèke be ten ne.

<sup>27</sup> Bi tuke' be ki tí baa', ne ki cère' bi sere' \*Sufmbe ya buur ya cekl yaab ya nun bó, ne bitòtuàrcienb ya cien tòke' be ki ye: <sup>28</sup> «Ta là wòbn' ki pien' ne ki ye ni la ji ní wòkn nil \*Yesu ya gber-ii? Ne ni cère' ni'wòknm gbe Yerusalem ni ni'ke saan-a! Ni yíe ní ye uje bugben ya kuum ñen' tinbi ne-a!»

<sup>29</sup> Ne Pier nin \*Yesu ya tondtòb tòke' be ki ye: «Nì kpe tí tuo Uwien ya ñòbu bó ki cen' nin tí tuo binib ya ñòbu bó. <sup>30</sup> Ninbi ne kpe' \*Yesu udòpònpòn bo, ki ku' wò, ne ti'yaajeb ya Wien mekre' wò bitenkpiib ni, <sup>31</sup> ki kpieke' wò, ki taa' wò ki kàan' u'jie bó, wò ní li yé uber, kí li yé Uñmienl, kí cère Israyel yaab ní lèbre bi'tetem ñò Uwien ní fère be bi'biere. <sup>32</sup> Tinbi ne yé tigber nnò ya mònkunb, ne Uwien taa' \*Mifuoñaanm mà ki de' binib bà boh wò nnò mò yé tu'mònkunl.»

<sup>33</sup> \*Sufmbe ya buur ya cekl yaab cii' bi len' nnò ma nnò, ne bi'benku ni ben' bi'bo ki tí kende', ne bi yíe be ní ku be. <sup>34</sup> Tibuur yaab nnò ya uba fii' ki sere' bi'nun bó, bi yih

\* 5:12 Liike 3:11. † 5:24 Bi li fre kí lebre ba ben ní tien' ma kí ye ba ben tigber nnò li kpaan ma mò.

wə Gamaliel. U yé \*Farisiɛnmbɛ ya uba nɛ, ki yé \*Yiko ya wənwəknl mə, ki ɲməbe liyel \*Sufmbɛ kɛ saan. U təkɛ' bɛ ki ye bɛ rí taa \*Yesu ya tondb nnə kí ñɛ saali waamu. <sup>35</sup> Bi ñɛn' saali, nɛ u təkɛ' tibuur ya cɛkl yaab nnə ki ye: «Israyel yaabɛ, liike mɛn ni'yul bo nin ni yíe ní tien bijɛb biɛ nà nə. <sup>36</sup> Kimɛ uje uba nɛ là te nà laan wuəke', bi yih wə Teyuda. U là yih u'ba unikpekpiɛk nɛ, nɛ bijɛb kobiinan pɛ u'bo. Bi ku' wə nɛ binib bà kɛ pɛ u'bo nnə yɛrɛ', nɛ licɛkl nnə juore' fɛnm. <sup>37</sup> Uje nnə yaam gɛbrɛ', nɛ Galile ya nil uba mə fii' ki sure' binib bi paan' u'bo ki yɛbe, bi yih wə Sudas. Ní là yé uyo wà bi kàanh kukɛ̀nku nnə nɛ. Bi ku' u'mə, nɛ binib bà kɛ pɛ u'mə bo nnə, mə yɛrɛ'. <sup>38</sup> Nɛn bo nɛ n təkɛh nɛ, ji la tuuke mɛn bijɛb biɛ ya gɛɛr. Cɛrɛ bɛ mɛn bɛ rí li joh. Bi lienh nà nə nin bi sɔnh lituonl là nə yé unisaal yaam nɛ la, ní li juore fɛnm nɛ. <sup>39</sup> Ama ní yé Uwien yaam nɛ la, na rí fre kí pien bɛ. Ni kɔnh nin bɛ tijer la, nba la, ni lá li lɛ ni kɔnh nin Uwien nɛ.»

Gamaliel len' nnə ma nnə, nɛ bi tuo'. <sup>40</sup> Bi yin' \*Yesu ya tondb, bi liɛbe' ki kɔn' ní, nɛ bi ñi' bɛ, ki pien' bɛ ki ye bi la ji rí li təkɛh nil \*Yesu ya gɛɛr, nɛ ki taa' bɛ ki wiɛ'. <sup>41</sup> \*Yesu ya tondb siere' bi'saan nin uyɛnsɔnge, kimɛ bi ben ní kpɛ bɛ rí ji ifɛ \*Yesu ya yel bo nɛ. <sup>42</sup> Idaan kɛ, bi tuu ki joh Uwien ya duku ya luo bo nin binib den nɛ, ki tí wəknh binib, ki təkɛh tigbɛmɔnmɔnt ki teh \*Yesu nɛ yé Uwien ya Nigɛndkɛ Kristo.

## 6

### *Bi gɛ̀ndɛ' jɛb bilole bɛ rí li toreh Yesu ya tondb*

<sup>1</sup> Idɛn yà binib bà teke' \*Yesu ki jin' ya cɛkl yɛbrɛh ki pukndɛh nnə, nɛ \*Sufmbɛ bà teke' \*Yesu ki jin' ki lienh Grɛkmbɛ ya lenm nnə cin' ki kɔnh nin Suftəb bà lienh bi'yaajɛlenm nnə\* ki teh daan kɛ daan bi gbiinh tibont la, bi sundɛh bi ya kpopiib bó nɛ. <sup>2</sup> Nɛ \*Yesu ya tondb piik nin bile nnə yin' binib bà kɛ teke' \*Yesu ki jin' nnə ki taan', nɛ ki təkɛ' bɛ ki ye: «Na mɔn tí juore tijier ya gbiirm bo kí dāan Uwien ya gɛɛr ya təkɛm. <sup>3</sup> Nɛn bo, tí yaabɛ, gɛ̀ndɛ mɛn ni'ni jɛb bilole bà \*Uwien ya Fuoñaanm te bi'bo, bi ɲməbe miyɛnfuom, ki yé binimənb binib ya nun bó, ɲə tí cɛrɛ bɛ rí li sɔnh li ya tuonl. <sup>4</sup> Tinbi \*Yesu ya tondb wə, tí li mɔndɛh ki kàareh nɛ, kí li təkɛh binib Uwien ya gɛɛr.»

<sup>5</sup> \*Yesu ya tondb len' nà nnə ɲmaake' binib nnə kɛ, nɛ bi gɛ̀ndɛ' Etienn, u teke' \*Yesu ki jin' mɔnmɔnm, \*Mifuoñaanm te u'bo. Bi gɛ̀ndɛ' Filip nin Prokər nin Nikanər nin Timɔn nin Pamena nin Antiyok ya Nikola, u yé Sufkɛnkpɛnd. <sup>6</sup> Bi taa' jɛb bilole nnə ki wuən' \*Yesu ya tondb, bi taa' bi'nuə ki paan' bi'bo nɛ ki kàare' ki de' bɛ.

<sup>7</sup> Uwien ya gɛɛr yɛrɛh ni'kɛ saan, nɛ binib teknh \*Yesu ki jinh ki yɛbrɛh ki pukndɛh Yerusalem ni. Bitətuərkaab ligol mə tuo' ki teke' \*Yesu ki jin'.

### *Bi cuo' Etienn*

<sup>8</sup> Uwien juoke' Etienn ki gbien', ki de' wə mituəm ki gbien', ki cɛrɛ' u teh miyəkɛm ya bont udu ya nib ni. <sup>9</sup> \*Sufmbɛ bà te litaanl ya duku kua bi yih kù bà ɲa ji yé yonbe ya taanl ya duku nnə, ya biba nin Sirɛnn ya du nin Aleksandri ya du nin Silisi ya du nin Asi ya tinfɛnm yaab kɛ taan' ki findeh nin Etienn. <sup>10</sup> Ama ba fre' ki faake' nin wə, kimɛ u lienh nin \*Mifuoñaanm de' wə miyɛnfuom mà nnə nɛ. <sup>11</sup> Nɛn saan nɛ bi de' bijɛb biba ilike bɛ rí nɛn u'bo kí ye bi cii' u suke' Moyis nin Uwien. <sup>12</sup> Bi len' nnə ma nnə nɛ udu ya nib nin bi'ciɛnb nin \*Yiko ya wənwəknb kpɛrɛ', nɛ ki bere' ki tí cuo' Etienn, ki taa' wə ki jon' \*Sufmbɛ ya buur ya cɛkl yaab saan, <sup>13</sup> nɛ ki tuke' bitonnɛndɛnb ní bi lá len' ki ye: «Uyo kɛ uje wuə sukreh Uwien ya duku nɛ, ki saah Moyis ya yiko. <sup>14</sup> Kimɛ ti cii' u len' ki ye Nasarɛt ya \*Yesu li we Uwien ya duku kuu, kí lɛbrɛ mitetɛm mà Moyis là wəknh tɛ mɛ nnə.» <sup>15</sup> Nɛ tibuur ya cɛkl yaab nnə kɛ caan' Etienn bo inun ki laa' u'nun bó te tɛn Uwien ya tond ya nun bó.

\* **6:1** U ya yo binib bà là teknh \*Yesu ki jiinh nnə, biyɛbnb là yé \*Sufmbɛ nɛ. Bi'ni biba là lienh Grɛkmbɛ ya lenm nɛ, ki pɛ Grɛkmbɛ ya tentienm bo. Bitəb lienh bi'yaajɛlenm, ki pɛ bi'yaajɛtentienm bo. Ben nɛ là yɛbe.



## 7

*Etienn len' ki jin' Sufmbε ya buur ya cεklyaab*

<sup>1</sup> Nεn saan nε bitɔtuɔrciɛnb ya ciɛn niire' Etienn ki ye: «Bi len' ma nɔ, tɔ te-ee?» <sup>2</sup> Nε Etienn jii'n' ki ye: «N'baambε nin n'ninjieβε, li cengeh mεn. Uyo wà ti'yaaje \*Abraham laan là kɔ Mesopotami ya du ni, ka laan jon' ki tɔ kɔn' Haraan ya du ni nɔ, nε Uwien wà ηmɔbe ukpieke puɔ' u'saan, <sup>3</sup> ki tɔke' wɔ ki ye: «Nε a'du ni nin a'yaab ni, kí jo n li wuɔn ηε udu wà nɔ ni.» <sup>4</sup> Nεn saan nε u fii' Kalde yaab ya du ni, ki tɔ kɔn' Haraan ya du ni. U te wun ni nε haali u'baa tɔ kpo', nε Uwien cère' u baa' ki kɔn' udu wà ni kɔ u'ni fεnfennɔ nɔ. <sup>5</sup> Uwien ηa de' wɔ tink kiba udu wuu ni, wa de' wɔ tink kí kpe nin kutεpenku ya pɛn mɔnɔn, ama u pùon' ki ye u li taa udu wuu kí de wɔn nin u'yaabii nε, wù ní li yé bi'yu uyo kε. Uyo wà Uwien pùon' lipuonl liε nɔ, ki laa' \*Abraham ηa laan ηmɔbe buk. <sup>6</sup> Nε Uwien tɔke' wɔ ki ye: «A'yaabii lá li tien bicεnb udutɔ ni, nε u'nib ní taa bε kí tien iyonbe, kí jènde bε ibin kobiinan. <sup>7</sup> Ama min Uwien nε li dεre bi li yé udu wà ya nib ya yonbe nɔ ya tub. Ni ya puoli bó nε a'yaabii li nε udu nɔ ni, kí baa kí lá li pukeh nni niε saan.» <sup>8</sup> Nε Uwien cuo' nin \*Abraham kujɔtieku ki tɔke' wɔ ki ye upunjiε nε yé kudieku kua wɔngeh bi'jɔtieku nɔ. Nεn bo nε \*Abraham maa' \*Isaak, nε ki jie' u'punl wienniin daali. \*Isaak mɔ maa' Sakɔb, ki mɔ jie' u'punl. Sakɔk mɔ tien' nɔ u'bijieβ. Bεn nε yé ti'yaajεβ piik nin bile nɔ.

<sup>9</sup> «Ti'yaajεβ nɔ taa' iponponbe bi'waake Yosεf bo, nε ki kuɔre' wɔ binib bo wɔ ní tɔ ní li yé uyonb Esipt bó. Ama Uwien là te nin wɔ, <sup>10</sup> nε ki n̄en' wɔ u'jend kε ni, ki juoke' wɔ, ki de' wɔ miyεnfuom, ki cère' Esipt ya bεrciɛn Farahɔn yie u'gber; nε ki taa' wɔ ki tien' udu nɔ nin u'den kε ya ciɛn. <sup>11</sup> Tɔ, mikɔnm miba ya bol lu' Esipt nin Kanaan ya du ni ni'kε saan. Ní là yé micεckciɛnm nε binib bo. Ti'yaajεβ ηa ji là ηmɔbe bi li ji bà. <sup>12</sup> Sakɔb cii' tijier te Esipt ni, nε u cère' u'bijieβ jon' miba ki tɔ dε'. <sup>13</sup> Bi jon' nle ma nɔ, nε Yosεf cère' u'ninjieβ bende' wɔ, nε Farahɔn mɔ bende' Yosεf ya bol si là. <sup>14</sup> Nεn saan nε Yosεf sɔn' bε ní tɔ taa u'baa Sakɔb nin u'den yaab kε ní Esipt ni. Bi là te binib pilole nin biɔun nε. <sup>15</sup> Sakɔb nin u'den yaab kε jon' ki tɔ kɔ Esipt ni, nε u tɔ kpo'. Ní tete nε u'bijieβ, ti'yaajεβ mɔ tɔ kpo', <sup>16</sup> nε bi taa' bε ki tɔ sube' ufele uba ni Sikεm ya du ni. \*Abraham nε là taa' ilike ki dε' ufele nɔ Sikεm ni, Hemɔr yaab saan.

<sup>17</sup> «Uyo wà Uwien li tien u là pùon' lipuonl là ki de' \*Abraham nɔ nεkn' ní. U ya yo nε ti'bol ya nib p̄re' ki yεbre' Esipt ni, <sup>18</sup> ki tɔ baa' uyo wà ubertɔ teke' libel Esipt ni. Wɔn ηa tu' Yosεf. <sup>19</sup> U là lere' ti'bol ya nib, ki jènde' ti'yaajεβ, ki wɔbn' bε bε ní taa bi'cεnfendmu kí tɔ wie mù ní kpo. <sup>20</sup> U ya yo nε bi maa' Moyis, u là yé kibuk kà mɔn Uwien ya nun bó nε. Bi wube' kè ki'baa den in̄maale ita nε. <sup>21</sup> Bi taa' kè ki tɔ wie' uyo wà nɔ, nε Farahɔn ya bise leke' ki'bo, ki yuure' kè, ki wube' kè ten u'tiema buk. <sup>22</sup> Bi wɔkn' Moyis Esipt yaab ya yεnfuom kε. U là yé unil wà ηmɔbe mituɔm u'lenm ni nin u'tùon ni nε.

<sup>23</sup> «Tɔ, uyo wà u laa' ibin pinan nɔ, nε u taa' iyεnmaale ki jon' wɔ ní tɔ fuonde u'yaab Israyel yaab. <sup>24</sup> U tɔ baa' ki laa' Esipt ya nil uba ηmɔbe Israyel yɔ uba ki jèndeh, nε u teke' Israyel yɔ bo, ki n̄i' ki ku' Esipt yɔ nɔ. <sup>25</sup> U tien' nɔ ki maaleh ki teh u'yaab li bende kí ye Uwien li cère wɔn nε ní n̄en bε bi'nennεndb ya nuɔ ni, ama ba bende'. <sup>26</sup> Kutaaku faa' sɔ u laa' Israyel yaab bile kɔnh. U yie wɔ ní pàa bε, nε ki tɔke' bε ki ye: «Ní'ninjieβ nε, bε tien' ni ηmɔbe tɔb ki jèndeh?» <sup>27</sup> Ama wà ηmɔbe u'tɔ ki jèndeh nɔ pe' Moyis ki jende', ki tɔke' wɔ ki ye: «N̄mε nε kàan' ηε ti'ber ηɔ a li buh te tibuur-i? <sup>28</sup> A yie á ku nni ten a wun ku' Esipt yɔ ma nɔ nε-a!» <sup>29</sup> U len' nɔ ma nɔ nε Moyis sɛn' ki jon' Madiyan ya du ni, ki tɔ kɔ, nε ki maa' mubujεbumu mule ni'bó.

<sup>30</sup> «Ibin pinan gèbre', nε Uwien ya tond uba baa' Moyis saan kupenpelku ni, Sinayi ya juɔl saan, ki te kufetuku kuba ni kù teknh umu ka wih. <sup>31</sup> Moyis laa' n̄ε ma nɔ, nε ní cuo' wɔ miyɔkm. Uyo wà u nεkn̄deh wɔ ní liike nɔ, nε ki cii' Yonbdaan len' ki ye: <sup>32</sup> «Min nε yé a'yaajεβ ya Wien, ki yé \*Abraham nin \*Isaak nin Sakɔb ya Wien.» Bujεwaanbu cuo'

Moyis, u'gbenent ñòh, nε wa ji kaabe' ki liike'. <sup>33</sup> Nεn saan nε Yonbdaan tɔke' wɔ ki ye: <Cεkre a'tacaan, kimε a se nà saan nɔ n te ni'saan nε. <sup>34</sup> Imòñ, n laa' n'nib Israyel yaab ya cεcεkm kpε ma bo Esipt ni, ki cii' bi'kpiende bó, nε ki jiiire' ní rí ñmien bε. Fεnfennɔ li joh, n sɔn' ñε Esipt bó, á tí ñen bε len nε.>

<sup>35</sup> «Moyis wà Israyel yaab là yìe' wɔ, ki tɔke' ki ye ñmε kàan' wɔ ubεr wɔ rí li buh bε tibuur nnɔ, Uwien tien' wɔn nε ubεr nin Uñmienl, ki sɔn' wɔ, ki cère' u'tond wà là baa' u'saan kufetuku kuba ni nnɔ toreh wɔ. <sup>36</sup> Wɔn nε ñen' bε Esipt ni. U tien' miyɔkm ya bont udu nnɔ ni nin miñuncienmónmónm saan nin kupenpelku ni ibin pinan. <sup>37</sup> Wɔn Moyis nε tɔke' Israyel yaab ki ye: <Uwien li cère ni'ni uba rí ñε uñòbonsɔknl ni'bo tɛn min.> <sup>38</sup> Israyel yaab là taan' kupenpelku ni uyo wà nnɔ, wɔn nε là te ti'yaajeb nin Uwien ya tond wà lienh nin wɔ nnɔ ya siik ni. Utond nnɔ là tɔke' wɔ tigbεr tà dienh limiel Sinayi ya juɔl bo wɔ rí lá tɔke tε nε. <sup>39</sup> Nin nεn kε ti'yaajeb ña tuo' ki bon' wɔ. Bi yìe' u'ñòbu bó, nε ki yìe bε rí liεbe Esipt ni, <sup>40</sup> nε ki tɔke' Arɔn ki ye: <Mε tε ibule yì rí li le tε usen, kimε Moyis wà ñen' tε Esipt ni nnɔ, ta ben nà tu' wɔ.> <sup>41</sup> U ya yo nε bi mɛn' ubul uba u naan kinabuk, ki tùɔre' lituɔrl ki de' wɔ, nε ki jele' kunacenku ki pokn' bi mɛn' ubul wà nnɔ bo ki gbien'. <sup>42</sup> Nεn nε cère' Uwien búle' bε ibuɔn, ki sɛln' bε bi pukeh tiwenwent tà te kutaaku bo nnɔ, tɛn \*Uwien ya ñòbonsɔknb kele' ma \*Uwien ya gbɔnku ni. Bi kele' ki ye:

<Israyel yaabε, ni là kòre' tiwent ki tien' ituɔre yà nin ni tien' ituɔrtɔ yà kupenpelku ni ibin pinan nnɔ, ni là tien' ki de' min nε-εε?>

<sup>43</sup> Na là tien' ki de' min,  
ama ni là yuure' ubul Molok ya ninbonl nε ki tuke',  
ki yuure' ubul wà naan liñmaabil bi yih wɔ Erefann nnɔ mɔ.  
Ni là mɛn' ibule nnɔ ki ye ni li gbaandeh ki pukeh yin nε.  
Nεn bo nε n li cère bε rí cuo nε tiyonbt  
kí jon nà bó fɔke ki cɛn' nin \*Babilonn.>

<sup>44</sup> «Ti'yaajeb là te kupenpelku ni ma nnɔ bi là ñmɔbe ben nin Uwien cendeh lininbonl là ni nε. Kujɔtiεku ya gbɔnku mɔ là te lɛn ni nε. Uwien nε là tɔke' Moyis ki ye wɔ rí tien lininbonl nnɔ. Nε Moyis tien' lè Uwien wuɔn' wɔ ki ye lè rí li naan ma bo nnɔ. <sup>45</sup> Ti'yaajeb là taa' lininbonl nnɔ ki de' bi'yaabii. Nε bi teke' lè ki ñuuke ki tí baa' uyo wà Sosuwe yé bi'senlierl nnɔ. Ben nin Sosuwe là joh bε rí tí teke udu wà, ben bo Uwien là ñɔre' inibol u'ni nnɔ ma nnɔ, bi là tuke lè nε. Lininbonl nnɔ là te nεn saan nε, ki tí baa' ubεr \*Dafid ya yo. <sup>46</sup> Uwien ya yεnm sɔnge \*Dafid bo, nε \*Dafid miε' wɔ usen wɔ rí mε kuduku ki de' wɔn Uwien wà yé u'yaajε Sakɔb ya Wien nnɔ\*. <sup>47</sup> U'bijε Salomɔn nε mɛn' Uwien kuduku.

<sup>48</sup> «Ama Uwien wà ña ñmɔbe Nacentɔ ña kòh nib mɛn' tidur tà ni tɛn \*Uwien ya ñòbonsɔknl là len' ma ki ye Uwien ye:

<sup>49</sup> <Kutaaku nε yé n'berbiεk,  
kitink yé n'taan taanh nà bo nε,  
ni li mε bε ya dubol nε kí de nni,  
ñɔ rí li kòh ku'ni ki fuoreh?>

<sup>50</sup> Na yé min nε ñen' tibont kε-εε?> »

<sup>51</sup> Etienn tí len' ki ye: «Ni'yul faa, nε ni'fɛl bo te tɛn binib bà ña pε Wien bo, ka cengeh u'gbεr, ki yienh \*Mifuoñaanm uyo kε. Ni te tɛn ni'yaajeb nε. <sup>52</sup> Ni'yaajeb là jènde' \*Uwien ya ñòbonsɔknb kε, ki ku' binib bà tɔkeh ki teh Uwien ya Gbεmòndaan li baa ní nnɔ. Fεnfennɔ, u baa' ní, nε ni kuɔre' wɔ, ki ku' wɔ. <sup>53</sup> Uwien là sɔn' u'tondb bi lá de' ninbi nε u'yiko, nε na bon' wɔ.»

*Bi yèke' Etienn iten ki ku' wɔ*

\* **7:46** Bi kpiε' ki kele' tigbont tà nnɔ ya tuba ni, ni kele' ki ye kí mε kuduku kí de Sakɔb nε.

<sup>54</sup> Etienn len' nnɔ ma nnɔ nɛ bi'benku ni ben' ki tĩ kɛnde', nɛ bi gbienh u'bo inɔbii. <sup>55</sup> Ama \*Mifuoñaanm te Etienn bo ma nnɔ, nɛ u yaare' ki liike' kutaaku bo, ki laa' Uwien ya wenwenku windeh, ki laa' \*Yesu se Uwien ya jie bó. <sup>56</sup> Nɛ u ye: «Liike mɛn, n laa' kutaaku yɛ, nɛ ki laa' Unil ya Bijɛ† se Uwien ya jie bó.»

<sup>57</sup> U len' nnɔ ma nnɔ nɛ bi wuure' ufaa bo, ki pipi' bi'tub, nɛ ki taan' ki bere' ki tĩ cuo' wɔ, <sup>58</sup> ki ñɛn' wɔ udu nnɔ ni, bɛ ń tĩ yɛke wɔ itɛn kí ku wɔ, nɛ ki gore' bi'liercenciɛn ki ble' ki guun' unacenfaan uba bi yih wɔ Sɔl. <sup>59</sup> Bi yèkreh wɔ itɛn uyo wà nnɔ, nɛ u kàareh ki teh: «Yonbdaan Yesu, teke n'naank.» <sup>60</sup> Nɛ ki gbaan', ki wuure' ufaa bo ki ye: «Yonbdaan, la tange bi'biere yii nɔ.» U len' nnɔ ki gben', nɛ ki kpo'.

## 8

<sup>1</sup> Sɔl mɔ se bà ku' Etienn nnɔ ya ciɛk bó nɛ.

### *Sɔl jɛndeh Kristo ya taanl yaab*

Kí ñɛ nɛn daali nɛ bi cin' ki jɛndeh \*Kristo ya taanl yaab bà te Yerusalem ni nnɔ ki gbiekeh. Nɛn bo nɛ bi'kɛ yere', ki jon' Sude nin Samari ya tinfɛnm ni. \*Yesu ya tondb baba nɛ ji là sɛn' Yerusalem ni. <sup>2</sup> Binib bà pɛ Uwien bo mɔnmɔnm nnɔ nɛ sube' Etienn, ki muɔ' u'kuum ki gbien'. <sup>3</sup> Sɔl wɔn là ñikndeh wɔ ń bere \*Kristo ya taanl nɛ. U joh iden nɛ kí tĩ coh bijɛb nin bipiib ufaa bo kí tĩ pɛkndeh.

### *Filip tɔkeh Uwien ya gbɛmɔnmɔnt Samari ni*

<sup>4</sup> \*Kristo ya taanl yaab yere' ma nnɔ, nɛ ki cuonh ni'kɛ saan ki tɔkeh binib u'gbɛmɔnmɔnt. <sup>5</sup> Filip jon' Samari ya tinfɛnm ya du uba ni ki tĩ tɔkeh binib Uwien ya Nigɛndkɛ Kristo ya gbɛr. <sup>6</sup> Udu nnɔ ya nib cengeh Filip bó, ki lɛnh u teh miyɔkm ya bont tà nnɔ mɔ, nɛn nɛ cɛrɛ' bi pɛ u'gbɛr bo mɔnmɔnm. <sup>7</sup> Isɛnpol ñaake binib bi yɛbe nɛ u ñuɔh yè bi'saan, ì siereh ki wuureh ufaa bo. U cɛreh iwɔb nin idien mɔ faakreh ki yɛbe. <sup>8</sup> Nɛn bo nɛ udu nnɔ ya nib ya yɛnm sɔnge' ki gbien'.

<sup>9</sup> Ujɛ uba mɔ là te udu nnɔ ni, bi yih wɔ Simɔn, u teh inɔke ñi coh Samari ya tinfɛnm ya nib miyɔkm. U là yih uba unikpɛkpiɛk nɛ. <sup>10</sup> Nɛ binib kɛ tuo' u'ñɔbu bó, ka tuuke wà yé wà, ki lienh u'bo ki teh: «Uwien ya tuɔm nɛ kpɛnde' unil wuɔ. Bi yih nɛn nɛ mitɔciɛnm.» <sup>11</sup> Bi tuonh u'ñɔbu bó, kimɛ u ñɛn' uyo nɛ ki teh inɔke ñi coh bɛ miyɔkm. <sup>12</sup> Ama Filip baa' ki lá tɔke' bɛ Uwien ya bɛl ya gbɛmɔnmɔnt, ki liɛbe' ki tɔke' bɛ \*Yesu Kristo yé udaan wà, bi teke' ki jin' nɛ u sɛi' bijɛb nin bipiib kɛ Uwien ya ñunm. <sup>13</sup> Simɔn, uñɔkdaan nnɔ mɔnɔn teke' ki jin', nɛ Filip sɛi' u'mɔ Uwien ya ñunm. Wa ji siereh Filip saan, ki lɛnh u teh miyɔkciɛnm ya bont, nɛ ñi coh wɔ miyɔkm cɛɛn. <sup>14</sup> \*Yesu ya tondb bà te Yerusalem ni nnɔ cii' Samari ya tinfɛnm ya nib mɔ teke' Uwien ya gbɛr ki jin', nɛ bi sɔn' Pier nin San ni'bó. <sup>15</sup> Bi tĩ baa', nɛ ki kàare' ki de' Samari ya nib bà teke' ki jin' nnɔ, ñɔ Uwien ń de bɛ \*Mifuoñaanm. <sup>16</sup> Kimɛ \*Mifuoñaanm ña laan là jiiɛ' ní bi'ni uba mɔnɔn bo. Bi là sɛi' bɛ Uwien ya ñunm baba nɛ, Yonbdaan \*Yesu ya yel bo. <sup>17</sup> Nɛn saan nɛ Pier nin San taa' bi'nuɔ ki paan' bi'bo, ki kàare' ki de' bɛ, nɛ \*Mifuoñaanm jiiɛ' ní bi'bo. <sup>18</sup> Simɔn uñɔkdaan nnɔ, laa' \*Yesu ya tondb taa' bi'nuɔ ki paan' binib bo, \*Mifuoñaanm jiiɛ' ní bi'bo ma nnɔ, nɛ u ye u li de bɛ ilike, <sup>19</sup> bɛ ń de wɔ mituɔm nnɔ, ñɔ u'mɔ taa' u'nuɔ ki paan' unil wà bo la, \*Mifuoñaanm ń jiiɛ' ní udaan bo. <sup>20</sup> Nɛ Pier tɔke' wɔ ki ye: «Sin nin a'like kɛ ń juore fɛnm, kimɛ a maale' ki ye a li fre kí taa ilike kí de Uwien ya paabu nɛ. <sup>21</sup> A'niba ña li te tigbɛr tuu ni, kimɛ a'yɛnmaale ña cuube Uwien ya nun bó. <sup>22</sup> Lɛbre a'tetem, kí wiɛ a'biɛrm miɛ nɔ, kí kàare Yonbdaan, nba la, u li fɛrɛ ñɛ a'yɛnmaalbiere yii nɔ. <sup>23</sup> Kimɛ n laa' a ñmɔbe iponponbe ki gbien', nɛ ibiɛrɛ lùo ñɛ inɛmi yaam.» <sup>24</sup> Nɛ Simɔn uñɔkdaan nnɔ, tɔke' Pier nin San ki ye: «Ni bugbɛn kàare mɛn Yonbdaan kí de nni, ñɔ ni len' nà nɔ niba la tu nni.» <sup>25</sup> Pier nin San kun' Yonbdaan bo imɔn, ki tɔke' binib u'gbɛr ki tĩ gben' nɛ

† 7:56 Bi liɛbe' ki yih Yesu nɛ Unil ya Bijɛ.

ki liebeh Yerusalem. Bi joh ma nnò nε ki tǎkeh tìgbemǎnmǎnt Samari ya tinfenm ya du yà yebe ni.

### *Etiyopi ya keracicien uba teke' Yesu ki jin'*

<sup>26</sup> Lidaali liba nε Yonbdaan ya tond uba tǎke' Filip ki ye: «Fii, kí taa unǎgen bó, kí tí kp̄ien usen wǎ ñeh Yerusalem ki joh Gasa ya du bó nnò. Nib ña ji kp̄iendeh usen bugben.» <sup>27</sup> Filip fii' ki bure'. U joh ma nnò nε ki laa' ujeǎarke uba, u yé Etiyopi ya keracicien uba nε. Wǎn nε likeh Etiyopi ya piiber Kandasi ya faal ke. U là baa' Yerusalem ni ki puke' Uwien nε. <sup>28</sup> U liebe' ki kunh ki kaa kutenlolku ni, nε ki kǎanh \*Uwien ya ñǎbonsǎknl Esayi là kele' kugbǎnku kùà nnò. <sup>29</sup> Nε Mifuoñaanm tǎke' Filip ki ye: «Cuon kí nεkn kutenlolku kuu nǎ.» <sup>30</sup> Filip sen' ki nεkn' kù, nε ki cii' u kǎanh \*Uwien ya ñǎbonsǎknl Esayi là kele' kugbǎnku kùà nnò. Nε Filip niire' wǎ ki ye: «A kǎanh kugbǎnku kùà nǎ, a ciih ku'tingi-ii?» <sup>31</sup> Nε u ye: «Nil ña wuǎn' nni ku'tingi la, n li tien mila kí cii?» Nε ki tǎke' Filip ki ye wǎ ñ kǎ ní kí kèle u'saan. <sup>32</sup> U kǎanh \*Uwien ya gbǎnku ni nà saan nnò, ñ kéle' ki ye:

«Bi tuke wǎ ten bi tuke upe nε ki joh be ñ tí kǎre.

U te ten bi gureh kipebuk ya kobr nε ka muǎh.

Nnò nε u'mǎ ña len' tuba.

<sup>33</sup> Bi yuǎn' wǎ, nε ki mun' wǎ imǎn,

ñmε ji li len u'yaabii bó?

Kimε bi gben' u'miél unǎndun wuu ni ñǎ.»

<sup>34</sup> Nε uje nnò tǎke' Filip ki ye: «N faare' ñε nε, laan tǎke nni, \*Uwien ya ñǎbonsǎknl nnò len' ñmε ya gber nε? Wǎn bugben ya gber nε bii u len' uba yaar nε?» <sup>35</sup> Nεn saan nε Filip ñi' mikelm nnò bo ki tǎke' wǎ \*Yesu ya gbemǎnmǎnt. <sup>36</sup> Bi jo joh ki tí baa' libùol liba miñunm te ni'saan, nε uje nnò tǎke' Filip ki ye: «Liike-a, miñunm sǎ-a! A li tuo kí s̄ii nni Uwien ya ñunm-ii?» <sup>37</sup> [Nε Filip ye: «A teke' \*Yesu ki jin' mǎnmǎnm la, usen te.» Nε u ye: «N teke' ki jin' ki ye \*Yesu Kristo yé Uwien ya Bijε nε.»]\* <sup>38</sup> Nεn saan nε u cère' bi sien' kutenlolku nnò, nε wǎn nin Filip ke bile jiiire', ki kǎn' miñunm ni, nε Filip s̄ii' wǎ Uwien ya ñunm. <sup>39</sup> Bi ñen' miñunm ni uyo wǎ nnò, nε Yonbdaan ya Fuoñaanm taa' Filip ki bure'. Uje nnò ña ji laa' wǎ nε ki liebe' ki kǎn' u'tenlolku ni, ki joh nin uyensonge. <sup>40</sup> Filip wǎn, bi tí laa' wǎ Asǎt ya du ni nε. U ñeh idu yà ke ni nnò, u tǎkeh binib tìgbemǎnmǎnt nε, ki tí baa' Sesare ya du ni.

## 9

### *Sǎl pekre' ki paan' Yesu bo*

<sup>1</sup> U ya yo ki laa' Sǎl laan biε ki ñmǎbe limutuol binib bà teke' Yonbdaan ki jin' nnò bo nε, ki nuunh wǎ ñ ku be. U jon' bitǎtuǎrcienb ya cien saan, <sup>2</sup> wǎ ñ kele kugbǎnku kí de wǎ usen wǎ ñ jo \*Sufmbe ya tǎan ya dur tǎ te Damas ya du ni nnò. U tí laa' ni' bó binib bà pe \*Yesu ya sen bo, ñ yé bijeb bii bipiib la, wǎ ñ cuo be kí lòle, kí taa be ní Yerusalem ni.

<sup>3</sup> Sǎl joh ki tí nεke Damas ya du ma nnò, nε kuwenwenku kuba ñen' paaki bó ní i ya tǎan bo, ki wende' ki yile' u'bo. <sup>4</sup> U lu' tingi ni, nε ki cii' unieke uba bó u teh: «Sǎl, Sǎl, be tien' a jèndeh nni?» <sup>5</sup> Nε Sǎl niire' ki ye: «Yonbdaan, a yé u le daan nε?» Nε u tǎke' wǎ ki ye: «Min \*Yesu nε, a jèndeh min nε. <sup>6</sup> Ama fii, kí kǎ udu ni, bi li tǎke ñε a li tien ma bo.» <sup>7</sup> Sǎl nin bijeb bà tǎke nnò jeke ki se, ka ji li fre kí len, kimε bi cii' unieke bó nε, ama ba laa' wǎ lienh. <sup>8</sup> Sǎl fii', u'nunbii ke, ama wa ji lenh. Nε bi cuo' u'nuǎ, ki dère' wǎ ki kǎn' Damas ya du ni. <sup>9</sup> U tien' iwien ita ka lenh, ka jinh, ka ñuh mǎ.

<sup>10</sup> Tǎ, unil uba là te Damas ya du ni, ki teke' Yonbdaan ki jin', bi yih wǎ Ananiyas. Yonbdaan yin' wǎ tidεknt yaam ki ye: «Ananiyas.» Nε u ye: «Min sǎ, Yonbdaan.» <sup>11</sup> Nε Yonbdaan tǎke' wǎ ki ye: «Fii, kí tí kp̄ien usen wǎ bi yih wù usen wǎ cuube nnò, kí li joh Sudas den, kí tí niire uje uba bó, u te ki kǎareh, bi yih wǎ Sǎl. U yé Tars ya du ya nil nε. <sup>12</sup> U

\* **8:37** Bi kp̄ie' ki kele' tìgbǎnt tǎ nnò ya tuba ni migbiirm 37 ña te tu'ni.

laa' uje uba tidεknt yaam, bi yih wə Ananiyas, u kən' ní u'saan, ki lá taa' u'nuə ki paan' u'bo, wə ní likre.» <sup>13</sup> Nε Ananiyas jiin' ki ye: «Yonbdaan, n cii' binib len' uje bugben ya gber ki yebe. Bi ye u jènde' a'nib ki gbien' Yerusalem ni. <sup>14</sup> Bitətuərçiənb de' wə usen u baa' niε saan mə wə ní cuo binib bà taakeh a'yel bo nnə nε.» <sup>15</sup> Nin nən kε Yonbdaan təkε' wə ki ye: «Li joh u'saan, kimε min nε gènde' wə, wə ní cère bà ηa yé Israyel yaab nin bi'berb nin Israyel yaab ní bende n yé udaan wà. <sup>16</sup> Min bugben nε li wuən wə u li ji ijend yà kε n'yel bo.» <sup>17</sup> Nən saan nε Ananiyas fii' ki jon' Suda den, ki tì kən' Səl saan, ki taa' u'nuə ki paan' u'bo, nε ki ye: «N'ninjε Səl, Yonbdaan \*Yesu wà cère' a laa' wə usen ni, uyo wà a we ní nnə nε sən' nni ní, ní baa kí cère á likre, kí cère \*Mifuoñaanm ní jire ní a'bo.» <sup>18</sup> Nε nibonn niba ñen' Səl ya nun ni i ya taaan bo ki lu' ki naan tijənpəkr. U ya yo nε u likre', ki fii', bi sii' wə Uwien ya ñunm, <sup>19</sup> nε u jin' tijier ki laa' mituəm.

### *Səl kpaande' Uwien ya gber Damas ya du ni*

Səl tien' Damas ya du ni iwenkàankε binib bà teke' Yonbdaan ki jin' nnə saan. <sup>20</sup> Nε ki cin' i ya taaan bo ki kəh \*Sufmbε ya taaan ya dur ni, ki təkεh binib ki teh \*Yesu yé Uwien ya Bijε nε. <sup>21</sup> Miyəkm cuo' binib bà kε ciih u təkεh tigber tà nnə, nε bi niireh təb ki teh: «Bo, na yé wən nε là jèndeh binib bà taakeh \*Yesu ya yel bo Yerusalem ni nnə-əə? Wa baa' wə ní lá cuo bà mə te niε saan nə nε, kí ləle bε, kí taa bε kí jo Yerusalem, kí tì ηukn bitətuərçiənb-ii?» <sup>22</sup> Səl wən tūəreh ki faakreh nε, ki lienh ki jinh \*Sufmbε bà te Damas ya du ni nnə, ki wəngεh bε ki teh \*Yesu mənbe ki yé Uwien ya Nigendkε Kristo nε.

<sup>23</sup> Iwien yà yebe gèbre', nε \*Sufmbε nnə gbiere' ki kpaan' bε ní ku Səl. <sup>24</sup> Idaan kε, ñonku nin wien ni, bi kε ki gu udu nnə ya guon ya nañuən nε, Səl lá ñen' ní la, bε ní ku wə. Nε u cii' bi kpaan' u'bo iyε ma bo. <sup>25</sup> Nε kuñonku kuba, wən nin binib bà te nnə yuure' wə kukəndəncənciənkə kuba ni, ki ñen' liguonl.

### *Səl liεbe' Yerusalem bó*

<sup>26</sup> Nε Səl bure' ki tì baa' Yerusalem, ki yie wə ní taan nin binib bà teke' \*Yesu ki jin' nnə; nε bi'kε fεnge' wə, ka teke' ki jin' ki ye u'mə ji yé unil wà teke' \*Yesu ki jin' nε. <sup>27</sup> Nən saan nε Banabas taa' wə ki jon' \*Yesu ya tondb saan, ki tì təkε' bε Səl là laa' Yonbdaan usen ni ma bo nin Yonbdaan len' nin wə ma bo nin u laa' lifəl ki təkε' binib \*Yesu ya gber Damas ya du ni ma bo. <sup>28</sup> Banabas təkε' bε ma nnə nε bi tuo' ki cère' Səl nin bən te. U təkεh nin bε ki cuonh Yerusalem ni ni'kε saan, ki təkεh binib Yonbdaan ya gber nin lifəl. <sup>29</sup> U là təkε' \*Sufmbε bà lienh Grəkmbε ya lenm nnə mə tigber nnə, nε bi finde' nin wə, ki nuunh bε ní ku wə. <sup>30</sup> Binib bà teke' \*Yesu ki jin' nnə cii' bi nuunh bε ní ku Səl ma nnə, nε bi taa' wə ki jon' Sesare ya du ni, ki cère' u bure' Tars ya du bó. <sup>31</sup> \*Kristo ya taanl yaab bà te Sude ya tinfənm ni nin Galile ya tinfənm ni nin Samari ya tinfənm ni nnə kε là te uyənduən ni nε, ki faakreh mitekjim ni, ki boh Yonbdaan bi'fuobm ni nε, \*Mifuoñaanm saakreh bi'gbənənt ki cèreh bi yəbreh ki pukndeh.

### *Piεr cère' Ene faake'*

<sup>32</sup> Tə, Piεr joh ni'kε saan ma nnə, nε ki jon' Lida ya du ya nib bà teke' \*Yesu ki jin' nnə mə saan. <sup>33</sup> U laa' uje uba ni'saan u'gbənənt faan' bi yih wə Ene. U də kukaagbənku bo haali ibin iniin ka freh ki fih. <sup>34</sup> Nən saan nε Piεr təkε' wə ki ye: «Ene, \*Yesu Kristo de' ηε laanfie ηə. Fii, kí gbəgbəbe a'kaagbənku.» Nε u pək ki fii' i ya taaan bo. <sup>35</sup> Binib bà kε te Lida ya du ni nin Sarənn ya du ni nnə laa' wə, nε ki lèbre' bi'tetem, ki paan' Yonbdaan ya sən bo.

### *Piεr cère' upii uba məkεre' Yope ya du ni*

<sup>36</sup> Upii uba là te Yope ya du ni ki teke' \*Yesu ki jin', bi yih wə Tabita, ki liεbe' ki yih u'yel bugben Grəkmbε ya lenm ni ki teh Dorkas, ni'tingi si: «upiεcεl». U là sən h itùonmən mən i yebe, nε ki punh bijiinb mipum. <sup>37</sup> Uwien uba sə u lá bunge', ki kpo'. Bi sii' wə, nε ki taa' wə ki tì ble' lidutətuəl ya duku kuba ni paaki. <sup>38</sup> Yope ya du ya nib bà teke' \*Yesu ki jin'

nnò cii' Pìer te Lida ya du ni. Idu nnò ña fàke nin i'tò ma nnò, nε bi sòn' bijeb bile, bε rí tí yin Pìer wò rí ñikn kí baa bi'saan tonm. <sup>39</sup> Bi tí baa' ki tòke' Pìer nε u fii' ki paan' bi'bo ki bure'. U tí baa' ni'saan, nε bi taa' wò ki don' paaki ya duku nnò ni. Bikpopiib bà kε taan' ni'saan nnò te Pìer ya nun bó ki muòh, ki wòngèh wò tikpɛlɛr tà Dorkas là ñele' tù uyo wà u là fuobe nnò. <sup>40</sup> Pìer ñore' bi'kε ki ñen', nε ki gbaan', ki kàare', ki pekre' utenkpii nnò bó ki len' ki ye: «Tabita, fii.» Nε u likre', ki laa' Pìer, nε ki fii' ki kèle'. <sup>41</sup> Pìer cuo' u'nuò ki fin' wò, nε ki yin' binib bà teke' \*Yesu ki jin' nnò nin bikpopiib nnò, ki taa' wò ki wuòn' bε u fuobe. <sup>42</sup> Binib bà kε te Yope ya du ni nnò cii' tigber nnò. Nεn bo nε binib teke' Yonbdaan ki jin' ki yebe. <sup>43</sup> Pìer tien' Yope ya du ni ki wuòke'. U là te uje u'ba den nε, bi yih wò Simòn u yé ugbònjèbl.

## 10

### *Kòrneyi laa' Yonbdaan ya tond uba tidεknt yaam*

<sup>1</sup> Uje uba là te Sesare ya du ni, bi yih wò Kòrneyi. U yé Sojambε kobk ya ciεn nε. Bi yih Sojacεkl nnò «Itali ya Sojambε nε.» <sup>2</sup> Kòrneyi nin u'den yaab kε pε Uwien bo mòmòm nε, ki boh wò. U punh bijiinb mipum ki gbiekeh, ki kàareh idaan kε. <sup>3</sup> Lidaali liba ya tajuòku tikur tuta ya yo, nε u cinbe ki laa' Uwien ya tond uba tidεknt yaam, u kòn' ní u'saan ki yin' wò ki ye: «Kòrneyi.» <sup>4</sup> U liike' Uwien ya tond nnò, nε bujewaambu cuo' wò, nε u ye: «Yonbdaan, a ye ba?» Nε Uwien ya tond nnò tòke' wò ki ye: «A'kaare nin a punh bijiinb mipum ma nnò nε cère' Uwien tiere' a'bó. <sup>5</sup> Fεnfεnnò, sòn binib bε rí jo Yope ya du ni, kí tí yin uje uba ní, bi yih wò Simòn, ki baanh wò Pìer. <sup>6</sup> U te ugbònjèbl uba den nε, bi yih u'mò Simòn. Iden nnò te miñunciεnm ya gbaal nε.» <sup>7</sup> Uwien ya tond wà len' nin Kòrneyi nnò bure', nε Kòrneyi pòk ki yin' u'tonsònb ni bile nin u'sojambε bà te u'saan idaan kε, ki sòn h wò itùon nnò ni ya uba, wà pε Uwien bo mòmòm nnò, <sup>8</sup> ki tòke' bε u laa' nà nnò kε, nε ki sòn' bε Yope ya du bó.

### *Uwien wuòn' Pìer nibonn niba tidεknt yaam*

<sup>9</sup> Kutaaku faa' ki laa' bi te usen ni ki nεke Yope ya du. Kuwensiiku ya yo, nε Pìer don' u te kudulekaaku kùà ni nnò ya paaki wò rí kàare. <sup>10</sup> Mikònm cuo' wò, nε u yíe wò rí ji. Bi teh tijier bε rí de wò uyo wà nnò, nε u laa' tidεknt yaam, <sup>11</sup> kutaaku ye, ki laa' nibonn niba, ní naan bukpɛlbu ki piε, bi co ni'ñògben inan ní jiih ní tingi. <sup>12</sup> Itàan inan ya wεnt kε ya bol nin tiwεnt tà fuunh kubenku bo kε ya bol nin inuòn kε ya bol te nibonn nnò bo. <sup>13</sup> Nε u cii' uniεke uba bó u ye: «Pìer, fii kí ku kí ñmòn.» <sup>14</sup> Nε Pìer ye: «Kayi, Yonbdaan, n tí fii' ma, ma ñmòn' nibonn nà yé likuòl, ki yé tijòknt ya bonn fiebu.» <sup>15</sup> Nε uniεke nnò tí ye: «Uwien mänge' nà la, la ye ní yé jòknt.» <sup>16</sup> Uniεke nnò ye nnò bolm mita, nε nibonn nnò pòk ki liebe' ki don' kutaaku. <sup>17</sup> Uyo wà Pìer te ki maaleh wò rí bende u laa' nibonn nà tidεknt yaam nnò ya tingi nnò, nε binib bà Kòrneyi sòn' bε, bi te ki niireh bε rí bende Simòn den nnò baa' ni'saan, ki lá sere' bunañòbu ni, <sup>18</sup> nε ki yin' ki niire' ki ye: «Uje wà bi yih wò Simòn, ki baanh wò Pìer nnò te iden yà sò-òò?» <sup>19</sup> Pìer laan biε ki te ki maaleh u laa' nibonn nà tidεknt yaam nnò ya tingi, nε \*Mifuoñaanm tòke' wò ki ye: «Liike, bijeb bita biba nuunh ñε. <sup>20</sup> Fii kí jiiire, kí paan bi'bo, ki la jie, kime min nε sòn' bε ní.» <sup>21</sup> Nε Pìer jiiire', ki tòke' bijeb nnò ki ye: «Min nε yé unil wà ni nuunh wò nnò. Ni nuunh nni bε bo?» <sup>22</sup> Nε bi tòke' wò ki ye: «Kòrneyi nε sòn' te ní. U yé Sojambε kobk ya ciεn nε, ki yé ugbεmòndaan, ki boh Uwien. \*Sufmbε kε pèkeh wò ki gbiekeh nε. Uwien ya tond uba tòke' wò ki ye wò rí yin ñε, á baa u'den wò rí cenge a'gber.» <sup>23</sup> Pìer taa' bε ki kòn', ki cère' bi gòn'.

Ní faa' nε u fii' ki paan' bi'bo. Yope ya du ya nib bà teke' \*Yesu ki jin' nnò ya biba pìere' wò. <sup>24</sup> Ní tí liebe' ki faa' nε Pìer baa' Sesare ya du ni. U baa' ki laa' Kòrneyi yin' u'den yaab nin u'jòtiemònb bi taan' ñò, ki kε ki gu wò. <sup>25</sup> Pìer baa' uyo wà nnò, nε Kòrneyi tuobe' wò, ki lá gbaan' u'nintuòli, ki puke' wò. <sup>26</sup> Nε Pìer tòke' wò ki ye: «Fii», nε ki cuo' wò ki fin' ki

ye: «N'mò yé unisaal nε.» <sup>27</sup> U lienh nin wò ki tí kòn', nε ki laa' binib taan' ki yεbe. <sup>28</sup> Nε u tóke' bε ki ye: «Ninbi, ni bεn ki ye unil wà kε yé Suf ηa ηmòbe sεn wò ní kò wà ηa yé Suf den bii wò ní taan nin udaan. Ama min wòn Uwien wuòn' nni ki ye n la ye uba yé jòknt ka kpe ní nεkn wò. <sup>29</sup> Nεn bo nε ni yin' nni ma nnò, n baa', ka yíe'. N ji niireh nε nε, ni cinbe ki yin' nni bε bo?» <sup>30</sup> Nε Kòrneyi tóke' wò ki ye: «Dεtòlbó ya tajuòku tikur tuta ya yo, tεn wu ya yo, n là te n'den ki kàareh, nε ki laa' uje uba i ya tàan bo, u se n'nun bó ki guo tikpεlçer tù windeh teen. <sup>31</sup> Nε u tóke' nni ki ye: «Kòrneyi, Uwien teke' a'kaare, ki tiere' a punh bijiinb mipum ma nnò bó. <sup>32</sup> Nεn bo, sòn binib bε ní jo Yope ya du ni, kí tí yin uje wà te ní'bó, bi yih wò Simòn, ki baanh wò Pier nnò ní. U te ugbònjebl uba den nε, bi yih u'mò Simòn, u'den te miñunciεnm ya gbaal.» <sup>33</sup> U tóke' nni ma nnò, i ya tàan bo, nε n sòn' bε ní tí yin ηε ní. A baa' ma nò, ní mòn. Fεnfennò, tí'kε te niε saan Uwien ya nun bó nε, ki yíe tí cii tigber tà kε u tóke' ηε á lá tóke te nnò.»

### *Pier tóke' Uwien ya gber Kòrneyi den*

<sup>34</sup> Nε Pier len' ki ye: «Imòn nε, fεnfennò n bende' ki ye Uwien ηa yíe uba ki cεn' utò. <sup>35</sup> Inibol kε ni, unil te ki boh Uwien, ki teh nà cuube la, Uwien ya yεnm sange u'bo nε. <sup>36</sup> Ni bεn tigbermòmònt tà Uwien cère' Israyel yaab cii' tù nnò. Tù yé tigber tà cère' Uwien nin binib taan' buñòbu kí ñε \*Yesu Kristo wà yé unil kε ya Yonbdaan nnò bo nε. <sup>37</sup> Ki bεn San là kpaandeh uyo wà ki teh binib ní lèbre bi'tetem wò ní sii bε Uwien ya ñunm nnò gèbre' ma nnò, nibonn nà tien', ki cin' Galile ya tinfεnm ni ki tí baa' Sude ya tinfεnm kε ni. <sup>38</sup> Ki bεn mò ki ye Uwien cère' \*Mifuoñaanm te Nasaret ya \*Yesu bo, ki de' wò mituòm. U là cuonh ní'kε saan nε ki teh nà mòn, ki cèreh binib bà kε usεnpol jèndeh bε nnò faakreh, kime Uwien là te nin wò. <sup>39</sup> U tien' tibont tà kε \*Sufmbε ya du ni nin Yerusalem ni nnò, tinbi nε yé tu'mònkunb. U ya \*Yesu nε bi kpe' wò udòpònpòn bo, ki ku' wò. <sup>40</sup> Ama wòn nε, Uwien mεkre' wò wienta daali bitεnkpiib ni, ki cère' binib laa' wò. <sup>41</sup> Wa cère' udu ya nib kε laa' wò, ama Uwien gènde' tinbi bà uyoyo ti yé bimònkunb nnò, u cère' tinbi nε laa' wò. U mεkre' bitεnkpiib ni ma nnò, tinbi nin wòn nε taan' ki jin', ki ñun'. <sup>42</sup> U tóke' tinbi nε ki ye tí li kpaandeh ki tókeh udu ya nib u'gber, kí li yé u'mònkunb ki ye Uwien gènde' wòn nε, wò ní bu binifuob nin bitεnkpiib kε tibuur. <sup>43</sup> \*Uwien ya ñòbonsòknb kε là kun' wòn \*Yesu bo imòn ki ye wà kε teke' wò ki jin' la, Uwien li fère udaan u'biere u'yel bo.»

### *Mifuoñaanm jiiere' ní bà ηa yé Sufmbε bo*

<sup>44</sup> Pier laan biε ki lienh, nε \*Mifuoñaanm jiiere' ní binib bà kε cengeh u lienh tigber tà nnò bo. <sup>45</sup> Nε \*Sufmbε bà teke' \*Yesu ki jin' ki piere' Pier nnò, laa' Uwien de' bà ηa yé \*Sufmbε nnò mò \*Mifuoñaanm nε ní cuo' bε miyòkm. <sup>46</sup> Bi cii' bi lienh ilenbol ki pèkeh Uwien. Nεn saan nε Pier len' ki ye: <sup>47</sup> «Uwien de' binib biε mò \*Mifuoñaanm tεn tinbi ma nò, ηmε ji li fre kí ye bi la sii bε Uwien ya ñunm-i?» <sup>48</sup> Nε ki de' usεn bi sii' bi'kε Uwien ya ñunm, \*Yesu Kristo ya yel bo. Nεn saan nε bi gbáan' Pier ki ye wò ní tien bi'saan iwenkàanke kí pukn.

## 11

### *Pier liεbe' ní Yerusalem ki tóke' Kristo ya taan' yaab u tien' nà*

<sup>1</sup> \*Yesu ya tondb nin Sude ya tinfεnm yaab bà kε teke' \*Yesu ki jin' nnò cii' bà ηa yé \*Sufmbε mò teke' Uwien ya gber ki jin'. <sup>2</sup> Pier liεbe' ní Yerusalem u yo wà nnò nε \*Sufmbε bà teke' \*Yesu ki jin' nnò findeh nin wò <sup>3</sup> ki teh: «Bε tien' a kòn' bà ηa yé \*Sufmbε den, ki jin' nin bε tijier-i?» <sup>4</sup> Nεn saan nε Pier taa' tigber cin' ma bo, ki tóke' bε tù tentien' ma bo ki ye: <sup>5</sup> «N là te Yope ya du ni ki kàareh, nε ki laa' nibonn niba tidεknt yaam, ní ñεn' ní kutaaku bo, ki naan bukpeibu ki piε, bi co ní'ñògben inan, ní jiih ní ki lá nεkn' nni. <sup>6</sup> N liike' nè mòmòm, nε ki laa' itàan inan ya went kε ya bol nin kumuòku ni ya went kε ya bol nin tiwent tà fuunh kubenku bo kε ya bol nin inuòn kε ya bol te nibonn nnò bo. <sup>7</sup> Nε n cii' uniεke uba bó u tóke' nni ki ye: «Pier, fii kí ku kí ηmòn.» <sup>8</sup> Nε n ye: «Kayi, Yonbdaan, n tí

fii' ma, nibonn nà yé likuəl ki yé tijəkt ya bonn ŋa laan kən' n'ñəbu ni fiebu.»<sup>9</sup> Nε unieke nnə tí len' kutaaku bo ki ye: «Uwien mənge' nà la, la ye nǐ yé jəkt.»<sup>10</sup> Unieke nnə ye nnə bolm mita, nε nǐ'kε liebe' ki don' kutaaku.<sup>11</sup> Nε i ya tǎan bo, bijeb bita baa' nǐ ti te\* iden yá nnə ya nǎñəbu saan. Bi sən' bε Sesare ya du bó nǐ nε bε nǐ lá yin nni.<sup>12</sup> Nε \*Mifuoñaanm təke' nni ki ye nǐ paan bi'bo, ki la ŋməbe gəngənde. Nε tí'ninjieɓ biluob biε nə pǐere' nni, tí tí baa' ki kən' uje nnə den,<sup>13</sup> nε u təke' tε u laa' Uwien ya tond uba baa' u'den ma bo, ki təke' wə ki ye wə nǐ sən binib bε nǐ jo Yope ya du ni, kí tí yin uje wə bi yih wə Simən, ki baanh wə Pier nnə nǐ.<sup>14</sup> U li təke wə tigber tǎ li cère wən nin u'den yaab kε nǐ ŋmεre.<sup>15</sup> N cin' n li lienh, nε \*Mifuoñaanm pək ki jiiere' nǐ bi'bo tən mǐ là jiiere' nǐ ti'bo micincinm ma nnə.<sup>16</sup> Nεn saan nε n tiere' Yonbdaan là təke' tε liñəbonl là nnə. U là ye: «San là taa' miñunm nε ki sǐi' binib Uwien ya ñunm, ama ninbi wən, n li cère \*Mifuoñaanm nε nǐ jiiere nǐ ni'bo.»<sup>17</sup> Uwien de' tinbi bà teke' Yonbdaan \*Yesu Kristo ki jin' bupaabu búa nnə, u de' bi'mə bu ya paabaabu nε. Min yé ŋmε nε kí fre kí pien Uwien u la tien u yíe ma?»<sup>18</sup> \*Sufmbε nnə cii' Pier len' nnə ma nnə, nε ba ji finde' nin wə. Bi pəke' Uwien, nε ki təke' ki ye: «Imən, Uwien nε mənbe ki cère' bà ŋa yé \*Sufmbε nnə mə lèbre' bi'tetem ki laa' limiel.»

### *Antiyək yaab teke' Yesu ki jin'*

<sup>19</sup> Tə, bi ku' Etienn uyo wə nnə, nε bi cin' ki jəndeh binib bà teke' \*Yesu ki jin', nε bi yere' nǐ'kε saan, ki tí baa' Fenisi ya tinfenm nin Ciip nin Antiyək ya du ni, ki təkeh \*Sufmbε baba \*Yesu ya gber.<sup>20</sup> Ama bi'ni bà yé Ciip nin Sirenn yaab nnə baa' Antiyək ya du ni, nε ki cin' ki təkeh bà ŋa yé \*Sufmbε nnə mə Yonbdaan \*Yesu ya gbemənmənt.<sup>21</sup> Bi là ŋməbe Yonbdaan ya tuəm nε. Nεn bo nε binib teke' Yonbdaan ki jin', ki lèbre' bi'tetem, ki paan' u'sen bo ki yebe.<sup>22</sup> Tigber nnə lu' \*Kristo ya taanl yaab bà te Yerusalem ni nnə ya tubl ni, nε bi sən' Banabas Antiyək ya du bó.<sup>23</sup> U tí baa' ki laa' Uwien tien' bε tinimənt ma nnə nε u'yenm sənge' ki gbien'. Nε u saake' bi'kε ya gbənent ki ye bε nǐ li pε Yonbdaan ya sen bo nin inunmən.<sup>24</sup> Banabas là yé unimən nε, ki teke' \*Yesu ki jin', nε \*Mifuoñaanm te u'bo. Nεn bo nε binib là teke' Yonbdaan ki jin' ki yebe ki pukn' u'bó.

<sup>25</sup> Ni ya puoli bó nε Banabas bure' Tars ya du bó wə nǐ tí nuun Səl.<sup>26</sup> U tí laa' wə, nε ki taa' wə ki baa' Antiyək ya du ni. Banabas nin Səl tien' len libinŋmenl nε ki te Kristo ya taanl yaab ni ki wəkn' linigol Uwien ya gber. Bi cin' ki yin' binib bà teke' Yesu ki jin' «Kristo yaab» Antiyək ya du ni nε.

<sup>27</sup> U ya yo nε \*Uwien ya ñəbonsəknb biba ñen' Yerusalem, ki baa' Antiyək ya du ni.<sup>28</sup> Bi yih uba Agabus. U fii' ki sere', nε \*Mifuoñaanm cère' u len' ki ye mikəncienm miba li lu utingben kε bo. (Mikəncienm nnə mənbe ki lu' ubercien Klod ya yo nε.)<sup>29</sup> Agabus len' nnə ma nnə nε bà teke' \*Yesu ki jin' nnə ye unil kε nǐ de u li fre kí de nà, bε nǐ taa' kí tí tore bi ya tǎb bà te Sude ya tinfenm ni nnə.<sup>30</sup> Bi'kε de', nε bi taa' ki sən' Banabas nin Səl bε nǐ tí de \*Kristo ya taanl ya cienb bà te Sude ni nnə.

## 12

### *Uber Herod jənde' bà teke' Yesu ki jin'*

<sup>1</sup> U ya yo nε uber Herod cin' ki jəndeh \*Kristo ya taanl yaab biba.<sup>2</sup> U cère' bi ku' San ya ninje Saak nin kijusiek.<sup>3</sup> U tien' nnə, ki laa' nǐ ŋmaake' Sufmbε, nε u cère' bi tí cuo' Pier mə. Nǐ là yé uyo wə \*Sufmbε jelah kunacenu kúa bi ŋmənh kpənə wə ŋa ŋməbe ñəke nnə nε.<sup>4</sup> Bi cuo' wə ma nnə nε ki taa' wə ki tí pəkñ'. Nε ki cère' Sojambε icek inan gu wə. Cεkl kε cεkl ŋməbe sojambε binan nε. Herod yíe \*Sufmbε ya Pak nǐ gəbre ŋə nε wə nǐ ñen Pier kí bu wə tibuur udu ya nib ya nun bó.<sup>5</sup> Pier te lipεkl ni ma nnə nε \*Kristo ya taanl yaab mə te ki kàareh Uwien nin inunmən, ki dienh wə.

### *Uwien ya tond uba ñen' Pier lipεkl ni*

\* 11:11 Bi kpiε' ki kele' tigbont tǎ nnə ya tuba ni, nǐ kele' ki ye n te nε.



<sup>6</sup> Tɔ, kutaaku kua li faa ηɔ Herod ń ñen Pier kí bu wɔ tibuur nnɔ ya ñanku ki laa' Pier dɔ sojambɛ bile ya siik ni nɛ ki gɔh, ki luo tikudɔkr tule. Biguguurb mɔ se bunañɔbu saan ki gu. <sup>7</sup> Nɛ Yonbdaan Uwien ya tond uba pɔk ki puɔ' nɛ u'wenwenku wende' kuduku nnɔ ni. U ñi' Pier ya kele ni ki finde' wɔ, nɛ ki tɔke' wɔ ki ye: «Fii tonm», nɛ tikudɔkr nnɔ lore' u'nuɔ ni ki lu'. <sup>8</sup> Nɛ utond nnɔ tí tɔke' wɔ ki ye: «Gbin a'ningbenl, kí cɛke a'tacaan.» Pier tien' nnɔ, nɛ u tí ye: «Gole a'liergbenku kí paan n'bo ní.» <sup>9</sup> Nɛ Pier paan' u'bo ki ñeh, ki maaleh ki teh ní yé tidɛknt nɛ. Wa maaleh ki teh utond nnɔ tien' nà nnɔ mɔnbe ki yé imɔn nɛ. <sup>10</sup> Bi ñeh ma nnɔ nɛ ki gɛbre' uguguurl uba, ki tí gɛbre' ulie, ki tí baa' tikur ya nagenku kua pi saali ya nañɔbu nnɔ. Kunagenku nnɔ piire' ku'ba, nɛ bi ñen', ki kp̄ien' usen uba ki cuon' waamu, nɛ utond nnɔ pɔk ki bure' ki daan' wɔ. <sup>11</sup> Nɛn saan nɛ Pier ya nun bó wende', nɛ u ye: «Fɛnfennɔ nɛ n bende' ki ye ní yé tigbɛmɔnt. Yonbdaan nɛ mɔnbe ki sɔn' u'tond ní u lá fie' nni Herod ya nuɔ ni, ki ñen' nni \*Sufmbɛ yíe bɛ ń tien nni nà nnɔ ni.»

<sup>12</sup> Pier cii' nà tien' wɔ nnɔ ya tingi, nɛ ki bure' San wà bi baanh wɔ Mark nnɔ ya naa Mari donbó. Binib taan' ni'saan ki kàareh ki yebe. <sup>13</sup> U tí baa', ki ñi' saali ya nagenku, nɛ upiitonsɔnl uba baa' ki lá liike' udaan wà ñih. Bi yih upii nnɔ Loda. <sup>14</sup> U bende' Pier ya niɛke, u'yɛnm sɔnge ki gbien' nɛ wa piire, ki sɛn' ki liɛbe' u'tɔb saan, ki tí tɔke' bɛ ki ye Pier nɛ se bunañɔbu saan saali. <sup>15</sup> U len' nnɔ ma nnɔ, nɛ bi tɔke' wɔ ki ye u waare' nɛ. Nin nɛn kɛ u ñiikeh ki teh ní yé imɔn nɛ. Nɛ bi tɔke' wɔ ki ye ní lii yé Uwien ya tond wà gu wɔ nɛ. <sup>16</sup> Pier biɛ ki se ki ñih kunagenku, bi piire' ki laa' wɔn nɛ, nɛ ní beke' bɛ cɛɛn. <sup>17</sup> Nɛn saan nɛ u yuon' u'nuɔ ki wuɔn' bɛ ki ye bɛ ń ηmile. Bi ηmile' nɛ u tɔke' bɛ Yonbdaan tien' ma ki ñen' wɔ lipɛkl ni, nɛ ki len' ki pukn' ki ye bɛ ń jo kí tí tɔke Saak nin bi ya tɔb tigber nnɔ. Nɛ ki ñen' ki bure' niba bó. <sup>18</sup> Ní faa' uyo wà nnɔ, nɛ sojambɛ nnɔ ya yɛnm saa' ki gbien', nɛ bi niireh tɔb ki teh Pier wuɔ nín tien' mila? <sup>19</sup> Nɛn saan nɛ Herod cɛre' bi nuun' wɔ. Bi nuun' wɔ, ka laa', nɛ u yin' biguguurb nnɔ, ki niire' bɛ tigber nnɔ, nɛ ki cɛre' bi ku' bɛ, nɛ ki siere' Sude ya tinfɛnm ni, ki bure' Sesare ya du bó, ki tí tien' ni'bó idɛn ile.

### *Uɓɛr Herod ya kuum*

<sup>20</sup> Herod ya benku ni piebe' Tir nin Sidɔn ya nib bo ki gbien'. Nɛ bi'kɛ kpaan' buñɔbu bɛ ń jo kí lɛ wɔ. Bi kpiɛ' ki laa' uje uba nɛ bi yih wɔ Blatus, wɔn nɛ gu Herod ya dugɔkaaku. Wɔn nin ben kpaan' tɔ ηɔ wɔ ń cuo uɓɛr ya dunl tigber nnɔ ń gben nɛ, kime tijier ñeh Herod ya du ni nɛ ki bāareh bi'du ni. <sup>21</sup> Bi sien' lidaali là bɛ ń cende tɔb nnɔ baa', nɛ Herod gole' u'berlierl, ki kɛle' u'berbiek bo, nɛ ki cin' ki lienh binib kɛ ya nun bó. <sup>22</sup> U lienh ma nnɔ, nɛ bi'kɛ wuureh ki teh: «Nì yé Uwien ya niɛke nɛ, na yé nisaal yu.» <sup>23</sup> Nɛ Yonbdaan ya tond uba pebe' wɔ i ya taa' bo, ki cɛre' iwien iba ya bol lu' u'bo, nɛ ininbieb ηmɔnh wɔ u tí kpo', kime wa kpieke' Uwien.

<sup>24</sup> U ya yo nɛ Uwien ya gber tɔɔre' ki yere' ki gbe ni'kɛ saan. <sup>25</sup> Banabas nin Sɔl bɛn wɔn, bi là taa' mipum ki tí de' \*Kristo ya taanl ya cɛnb Yerusalem ni ma nnɔ, nɛ ki taa' San wà bi baanh wɔ Mark nnɔ, ki liɛbe' ki jon' Antiyɔk ya du bó.

## 13

### *Mifuoñaanm cɛre' bi gɛnde' Banabas nin Sɔl ki sɔn' bɛ*

<sup>1</sup> \*Kristo ya taanl yaab bà te Antiyɔk ya du ni nnɔ, \*Uwien ya ñɔbonsɔknb nin \*Yesu ya gber ya wɔnwɔknb te bi'ni. Bɛn si: Banabas nin Simeyɔn, bi baanh wɔ unibɔn nin Lusiyus, u yé Sirenn ya du ya nil nin Manayenn, bi taan' ki wube' wɔn nin Herod Antipas nɛ. Utɔ si Sɔl. <sup>2</sup> Lidaali liba nɛ bi lɔle' buñɔbu ki taan' bɔl liba ki dondeh Yonbdaan, nɛ \*Mifuoñaanm tɔke' bɛ ki ye: «Bore nni mɛn Banabas nin Sɔl bi'ba, bɛ ń sɔn n yin' bɛ lituonl là bo nnɔ.» <sup>3</sup> Bi lɔle' buñɔbu ki kàare' ki tí gben' ma nnɔ, nɛ ki taa' bi'nuɔ ki paan' Banabas nin Sɔl bo, ki cɛbe' bɛ bi bure'.

### *Banabas nin Sɔl jon' Ciip ya dekl bó*

<sup>4</sup> Tò, \*Mifuoñaanm sòn' Banabas nin Sòl ma nnò, nè bi bure' ki tì baa' Selusi ya du ni, ki kòn' buñercienbu, ki bure' Ciip ya dekl bó. <sup>5</sup> Bi tì baa' lidekl nnò ya du uba ni bi yih wù Salaminn, nè ki kòh \*Sufmbè ya táan ya dur ni ki tòkeh binib Uwien ya gbèr. San Mark mò là tòke nin bè ki toreh bè. <sup>6</sup> Bi cuon' ki càare' lidekl nnò kè, nè ki tì baa' ligbaatòl ya du uba ni, bi yih wù Pafos, ki cende' ujè uba, u yé uñòkdaan, ki yé utonnenñòbonsòknl. U yé Suf nè, bi yih wò Bar Yesu. <sup>7</sup> Uñòkdaan nnò là te lidekl nnò ya gobina saan nè, u yé ununwiendaan, u'yel si Sègiyus Pòlus. U cièke wò ñ cii Uwien ya gbèr, nè ki cèrè' bi yin' Banabas nin Sòl ní. <sup>8</sup> Bar \*Yesu nnò ya yetòl si Elimas nè. Grèkmbè ya lenm ni Elimas ya tingi si uñòkdaan nè. U jèh Banabas nin Sòl ya gbèr, nè ki ñikndeh wò ñ pien gobina nnò u la teke \*Yesu kí ji. <sup>9</sup> Nè \*Mifuoñaanm cèrè' Sòl, wà bi liebe' ki yih wò Pòl nnò caan' Elimas bo inun, <sup>10</sup> ki tòke' wò ki ye: «Utonnendaan sin, a'biere nè yèbre' nin ñè, a yé usenpol ya bijè nè, ki nèn nà kè mòn. A nuunh á saa Yonbdaan ya gbemònt kí tì kpaan mila nè? <sup>11</sup> Fènfènnò, sin nin Yonbdaan nè kòlè'. U li cèrè á juòn teteli, ka ji li lenh bònbonl mònòn kí tì baa uyo wà u yíe.» I ya táan bo, ñi tien' ten ligunl yaam ki biike' u'nun bó, nè u yekn' ki juòn', ki tulnh ki nuunh wà li cuo u'nuò kí diè wò. <sup>12</sup> Gobina nnò laa' ñi tien' nnò ma nnò, nè u teke' Yonbdaan ki jin', kime Yonbdaan ya gbèr tà bi wòkn' wò nnò jin' wò cèen.

*Pòl nin Banabas jon' Pisidi ya tinfenm ya du uba ni bi yih wù Antiyòk*

<sup>13</sup> Pòl nin u'tòntòknlieb kòn' buñercienbu Pafos ya du ni, ki bure' ki tì baa' Pèje ya du ni, u te Panfili ya tinfenm ni. Nèn saan nè San Mark dàan' bè ki liebe' Yerusalem. <sup>14</sup> Pòl nin Banabas bèn siere' Pèje ya du ni, ki bure' ki tì baa' Antiyòk ya du ni, u te Pisidi ya tinfenm ni. \*Saba ya daali, nè bi kòn' ki kèlè' bi'taanl ya duku ni. <sup>15</sup> Bi kaan' Moyis là kèlè' \*yiko ya gbònkù kùà nnò ni nin \*Uwien ya ñòbonsòknb là kèlè' nà nnò ki gben', nè litaanl ya duku nnò ya ciènb sòn' bè ñ tì tòke bè kí ye bi ñmòbe tigbèr bè ñ tòke kí saake binib ya gbènent la, bè ñ tòke. <sup>16</sup> Nèn saan nè Pòl fii' ki sere' ki yuon' unuò ki len' ki ye: «Israyèl yaab nin ninbi bà kè boh Uwien nnò, li cengeh mèn. <sup>17</sup> Tinbi Israyèl ya bol ya Wien nè là gènde' ti'yaajèb, ki cèrè' bi pòrè' uyo wà bi là te Esipt ni nnò. Nè Uwien taa' u'tuòm ki ñèn' bè u'ni. <sup>18</sup> U jènde' nin bè kupenpelku ni ibin pinan nè, <sup>19</sup> ki yaan ki gben' inibol ilole yà là kò Kanaan ya tink bo nnò, ki taa' bi'tink nnò ki de' tè, kí kpènde' ti'yaak.

<sup>20</sup> «Kí ñè uyo wà Israyèl yaab là kò Esipt ni nnò kí tì baa uyo wà Uwien de' bè Kanaan ya tink nnò, ñi tien' ten ibin kobiinan nin pinun nè. Ni ya puoli bó nè Uwien gèndeh bi'ni biba ki teh bi'senlierb, ki ñmòñmòbe ki tì baa' u'ñòbonsòknl Samièl ya yo. <sup>21</sup> U ya yo nè bi ye bi yíe bè ñ li ñmòbe ubèr, nè Uwien gènde' Kis ya bijè Sawul, u yé Bensamèn\* ya baamul ya nil ki tien' bi'ber. U yé bi'ber ki tì baa' ibin pinan, <sup>22</sup> nè Uwien ñèn' wò libèl ni, ki taa' \*Dafid ki tien' bi'ber. Uwien len' wòn \*Dafid bo nè ki ye: «N laa' Yèse ya bijè \*Dafid, u yé unil wà n'yènm sònge u'bo nè. U li tien n yíe nà kè.» <sup>23</sup> Uwien ñèn' wòn \*Dafid ya yaabii ni nè \*Yesu ki tien' Israyèl yaab ya Ñmieni kí ñè u là pùon' lipuonl là nnò bo. <sup>24</sup> San liere' \*Yesu usen ki baa' ki lá tòke' Israyèl yaab ki ye bè ñ lèbre bi'tetem ñò wò ñ sii bè Uwien ya ñunm. <sup>25</sup> San là benh wò ñ gben u'tuonl ma nnò, nè ki niire' bè ki ye: «Ni bèn n yé ni maaleh ki teh n yé wà nnò nè-èè? Na te nnò, wòn pè ní n'puoli bó nè, ama ma ñin kpè ñ lore u'taceningbèn mònòn.» »

<sup>26</sup> Tò, nè Pòl tì tòke' bè ki ye: «N'yaab \*Abraham ya yaabii nin bà ña yé \*Sufmbè ki boh Uwien nnò, Uwien là cèrè' tinbi nè cii' tigbèr tà li cèrè tí ñmèrè nnò. <sup>27</sup> Nin nèn kè Yerusalem ya nib nin bi'berb ña bènde' \*Yesu yé udaan wà, ka cii' \*Uwien ya ñòbonsòknb là len' nà, bi kàanh nè \*Saba kè Saba ya daali nnò ya tingi. Nèn bo nè bi bun' \*Yesu tibuur. \*Uwien ya ñòbonsòknb là len' ki ye bi li tien nnò nè. <sup>28</sup> Ba laa' bi li dule nà bo kí ye u kpè mikuum. Nin nèn kè bi miè' Pilat usen bè ñ ku wò. <sup>29</sup> Bi tien' wò ñi kèlè' \*Uwien ya gbònkù ni ki ye bi li tien wò ma bo ki gben' ma nnò nè ki jiin' wò udòpònpòn bo, ki taa' wò ki tì

\* **13:21** Bensamèn yé Sakòb ya bufòrkaak nè, ki yé Israyèl yaab ya baamul piik nin ile nnò ya liba ya yaaje.

sube'. <sup>30</sup> Ama Uwien cèrè' u mækre' bitenkpiib ni. <sup>31</sup> \*Yesu cèrè' binib bà là pɛ u'bo ki ñɛn' Galile ki lá baa' Yerusalem nnɔ laa' wɔ iwien yà yɛbe. Fɛnfennɔ bɛn nɛ yé u'mònkunb udu ya nib ya nun bó. <sup>32</sup> Tinbi mɔnɔn tɔkeh nɛ tu ya gbɛmɔnmɔnt nɛ ki teh Uwien là pùon' lipuonl ki de' ti'yaajɛb nɛ. <sup>33</sup> U tien' lipuonl nnɔ ki de' tinbi bà yé bi'yaabii nɛ; ki mækre' \*Yesu tɛn nǐ kele' ma Uwien ya yuon ya gbɔnku ni, iyul ile, ki ye:

«Sin nɛ yé n'Bijɛ.

Dinnɔ nɛ n wuɔn' ki ye n yé a'Baa.»

<sup>34</sup> Uwien cèrè' \*Yesu mækre' bitenkpiib ni, ka ji li liɛbe len, ki niireh nin wɔ rí bùrɛ. U là len' nɛn nɛ ki ye:

«N li de nɛ tibont tà n là pùon' ki ye n li de tù \*Dafid nnɔ, tù ñɛn' ní n ya bùol nɛ, ki kpɛ bɛ rí li du tu'bo.»

<sup>35</sup> Nɛn bo nɛ nǐ tí kele' kugbɔnku nnɔ ni niba saan ki ye:

«Ŋa rí cèrɛ a'niñaan rí bùrɛ.»

<sup>36</sup> \*Dafid là fuobe uyo wà nnɔ, u là yé Uwien ya tonsɔnl nɛ, ki teh Uwien yíe ma. U tí kpo', nɛ bi sube' wɔ u'yaajɛb saan, u bùrɛ'. <sup>37</sup> \*Yesu wɔn, Uwien mækre' wɔ nɛ, wa bùrɛ'.

<sup>38-39</sup> N'yaabɛ, Moyis ya yiko ŋa là fre' ki bù' nɛ gbɛmòndɛnb ama wa kɛ teke' \*Yesu ki jin' la, Uwien li bù wɔ ugbɛmòndaan nɛ. Ní li bɛn kí ye wɔn bo nɛ bi tɔkeh nɛ ki teh Uwien li fère nɛ ni'biere. <sup>40</sup> Tɔ, liike mɛn ni'yul bo ki la cèrɛ \*Uwien ya ñɔbonsɔknb là len' nà nnɔ rí tu nɛ. Bi là len' ki ye: <sup>41</sup> «Ninbi bà yih bitɔb fɛnm nnɔ, liike mɛn,

kí cèrɛ nè rí ji nɛ ní juore fɛnm,

kimɛ n li tien miyɔkm ya bonn niba,

uyo wà ni laan fuobe,

unil tɔke' nɛ lituonl nnɔ bó la,

na rí teke kí ji.» »

<sup>42</sup> Pɔl nin Banabas ñɛh litaanl ya duku nnɔ ni uyo wà nnɔ, nɛ bi gbáan' bɛ ki ye \*Saba wà we ní nnɔ ya daali, bɛ rí tí rí liɛbe ní, kí lá tɔke bɛ tu ya gɛr. <sup>43</sup> Litaanl nnɔ yaare' uyo wà nnɔ, nɛ \*Sufmbɛ ligol nin binib bà yé Sufkɛnkɛnd ki pukeh Uwien nnɔ paan' Pɔl nin Banabas bo. Nɛ Pɔl nin Banabas tɔkeh bɛ ki teh Uwien juoke' bɛ ma nnɔ, bɛ rí li tuu ki pɛ u'sɛn bo mɔnmɔnm.

<sup>44</sup> Tɔ, \*Saba wà tuɔn' nnɔ ya daali, udu nnɔ ya nib bà yɛbe taan' bɛ rí cenge Yonbdaan ya gɛr. <sup>45</sup> \*Sufmbɛ ya ciɛnb laa' linigol nnɔ taan' ma nnɔ, nɛ bi ponbe' nin bɛ ki gbien', ki sukreh Pɔl, ki saah u tɔkeh tigbɛr tà nnɔ. <sup>46</sup> Nin nɛn kɛ Pɔl nin Banabas laa' lifɛl ki tɔke' bɛ ki ye: «Ní bi kpɛ tí kpɛ kí tɔke ninbi nɛ Uwien ya gɛr. Nɛ ni yíe', ka teke' tù, ki maale' ki ye na kpɛ ní lɛ limiɛl là ŋa ŋmɔbe gbenm. Nɛn bo nɛ ti li pekre bà ŋa yé \*Sufmbɛ bó.

<sup>47</sup> Yonbdaan tɔke' tɛ nà sɔ. U ye:

«N tien' sin nɛ kuwenwenku á li wende inibol kɛ,

kí cèrɛ binib bà kɛ te utingbɛn bo rí ŋmɛrɛ.» »

<sup>48</sup> Binib bà ŋa yé \*Sufmbɛ nnɔ cii' bi len' nnɔ ma nnɔ, nɛ bi'yɛnm sɔnge' ki gbien', nɛ bi pèkeh Yonbdaan ya gɛr cɛɛn. Nɛ binib bà kɛ Uwien sien' ki ye bɛ rí lɛ limiɛl là ŋa ŋmɔbe gbenm nnɔ, teke' ki jin'. <sup>49</sup> Nɛn saan nɛ Yonbdaan ya gɛr yɛrɛh mitinfɛnm nnɔ kɛ ni.

<sup>50</sup> \*Sufmbɛ bɛn wɔn, bi cèrɛ' bipiikpɛkpiɛkb bà te udu nnɔ ni, ki pukeh Uwien nnɔ nin udu nnɔ ya ciɛnb kpɛr' Pɔl nin Banabas bo, ki jènde' bɛ, nɛ ki ñɔrɛ' bɛ ki ñɛn' bi'du ni.

<sup>51</sup> Pɔl nin Banabas kpakpaare' bi'taan ya tɛngunku ki wiɛ' nè†, nɛ ki bure' Ikoniyaɔm ya du bó. <sup>52</sup> Binib bà teke' \*Yesu ki jin' Antiyɔk ya du ni nnɔ wɔn \*Mifuoñaanm te bi'bo nɛ bi ŋmɔbe uyɛnsɔnge ki gbien'.

## 14

### *Pɔl nin Banabas te Ikoniyaɔm ya du ni*

† 13:51 Sufmbɛ bo kí kpakpaare itaan ya tɛngunku ya tingi si: nà kɛ ji tu unil la, nǐ yé u'yaar nɛ, na ji yé uba yaar.

<sup>1</sup> Pól nin Banabas tí baa' Ikoniýom ya du ni, ne ki tien' bi bi tien' mà Antiyók ni nnò. Bi kòn' \*Sufmbε ya taanl ya duku ni ki tóke' binib Uwien ya gber. Nεn bo ne \*Sufmbε nin Grεkmbε teke' ki jin' ki yebe. <sup>2</sup> Ama \*Sufmbε biba tien' uyufaa, ka teke' ki jin', ki sure' bà ña yé \*Sufmbε nnò bi kpre' binib bà teke' \*Yesu ki jin' nnò bo, ki maaleh bi'bo nà bre. <sup>3</sup> Nin nεn ke Pól nin Banabas tien' udu nnò ni ki wuóke'. Bi là ηmòbe lifèl ki lienh ki du Yonbdaan bo ne, ne u cèreh bi teh miyók m ya bont ηò wò ní wuón kí ye bi tókeh u'juokm ya gber tà nnò yé imò n ne. <sup>4</sup> Ama udu nnò ya nib ña len' ki cii' tób bó, ne ki gbiire' icεk ile. Biba se \*Sufmbε ya ciεk bó, ne bitób mò se \*Yesu ya tondb ya ciεk bó. <sup>5</sup> \*Sufmbε nin bi'ciεnb nin bà ña yé \*Sufmbε nnò ya biba bonde' bi li tien' \*Yesu ya tondb ma, ki ye bi li jènde be ne, kí yéke be iten kí ku be. <sup>6</sup> Pól nin Banabas cii' bi nuunh be ní tien' be ma, ne ki sen' ki jon' Likawoni ya tinfenm ya du Lista nin Dεbe nin idu nnò ya tengbaan ni. <sup>7</sup> Ne ki tókeh ni'mò bó yaab tigbεmònmònt nnò.

### *Pól nin Banabas te Lista ya du ni*

<sup>8</sup> Ujε uba là te Lista ya du ni, u'tàan faan wà ní fre kí fii kí sere. Bi maa' wò uwòb ne, wa cuon' fiebu. <sup>9</sup> Lidaali liba Pól lienh ne u cengeh. Pól caan' u'bo inun, ki bende' ki ye u'tekjim li cère wò ní faake. <sup>10</sup> Ne ki len' ufaa bo ki ye: «Fii kí sere.» Ne ujε nnò fii' ki maabe' ki ci', ki cin' ki cuonh. <sup>11</sup> Linigol laa' Pól tien' nà nnò, ne ki wuure' Likawoni yaab ya lenm ni ki ye: «Ho! Ibule ne kpεnde' binib ki baa' ti'saan-a!» <sup>12</sup> Ne bi yin' Banabas \*Seyus, ki yin' Pól Hεrmes\*, kimε Pól ne sòbe ki lienh. <sup>13</sup> Ubul \*Seyus nnò ya duku te udu nnò ya guon ya nañòbu saan ne saali. Seyus ya tóturkε tuke' ní inaje nin misipuum mà u tien' mè uyukpεkpiε yaam ki baa' iguon nnò ya nañòbu saan, ki yíe wòn nin linigol nnò ní tùre lituòrl kí de Banabas nin Pól.

<sup>14</sup> Ama \*Yesu ya tondb Banabas nin Pól cii' nnò ma nnò, bi'yεnm saa' ki gbien', ne bi cuo' bi'lier ki kere'†, ki sen' ki kòn' linigol nnò ya siik ni, ne ki wuureh <sup>15</sup> ki teh: «Ti'jótiebe, be bo ne ni teh niε ya bonn-i? Ti'mò yé binib ten ninbi ne. Ti baa' ki tókeh ne tigbεmònmònt ne ki teh ni'bule yii yé fenm ne, ní wiε yí ki paan' Uwien wà fuobe bo. Wòn ne ñen' kutaaku nin kitink nin miñunciεnm nin tibont ke. <sup>16</sup> Uyo bo, u là cère' inibol ke pε ÿ yíe nà bo ne. <sup>17</sup> Nin nεn ke wà dàan' mimònm ya tienm ηò wò ní wuón binib u yé udaan wà. U cèreh utaa niih, tijier teh, ni jinh ki gbuokeh, ki te liwiεl ni.» <sup>18</sup> Nin \*Yesu ya tondb len' nà ke nnò bi ñikn' ne ki tí pien' linigol nnò lí la tùre tuòrl kí de be.

<sup>19</sup> Nεn saan ne \*Sufmbε biba ñen' Antiyók nin Ikoniýom ya du bó ki baa' ní, ki lá sure' linigol nnò, ki cère' lí kpre' Pól nin Banabas bo, ki yéke' Pól iten, ki fuun' wò ki ñen' udu ni, ki maaleh ki teh u kpo' ne. <sup>20</sup> Binib bà teke' \*Yesu ki jin' nnò baa' ki lá sere' ki guón' wò, ne u fii', ki liεbe' ki kòn' udu nnò ni.

### *Pól nin Banabas liεbe' ki jon' Antiyók ya du ni*

Kutaaku faa' ne Pól nin Banabas siere' ki jon' Dεbe ya du bó, <sup>21</sup> ki tí tókeh ni'bó yaab tigbεmònmònt nnò. Ne binib teke' tù ki paan' \*Yesu ya sen bo ki yebe. Bi siere' ki liεbe' Lista ya du nin Ikoniýom ya du nin Antiyók ya du wà te Pisidi ya tinfenm ni nnò ni. <sup>22</sup> Bi gèbreh idu nnò ni ma nnò, ne ki saakreh bà teke' \*Yesu ki jin' nnò ya gbεnεnt, ki gbierεh be ki teh be ní li tuu ki ηmòbe mitekjim, ki tókeh be ki teh ti lí jènde kí gbien ne kí yaan kí kò Uwien ya bεl ni. <sup>23</sup> Nεn saan ne bi gènde' \*Kristo ya táan ke ni biciεnb, ne ki lóle' buñòbu, ki kàare' ki de' be, ki taa' be ki ηukn' Yonbdaan wà bi teke' wò ki jin' nnò.

<sup>24</sup> Pól nin Banabas ñen' Pisidi ya tinfenm ni, ne ki jon' Panfili ya tinfenm ni. <sup>25</sup> Bi tí baa' Pεje ya du ni ki tóke' udu nnò ya nib Uwien ya gber, ne ki bure' Atali ya du bó. <sup>26</sup> Bi tí baa', ne ki kòn' buñεrciεnbu, ki puore' miñunciεnm ki liεbe' Antiyók ya du bó. U ya du ni ne \*Kristo ya taanl yaab kàare' ki ye Uwien ní juoke be bi sòn' lituonl là nnò bo.

\* 14:12 Grεkmbε ya du ni bi yih ibule ya ciεn ne Seyus, ne ki yih i'tond Hεrmes. † 14:14 Liike Matie 26:65.

<sup>27</sup> Bi tí baa', nɛ ki taan' \*Kristo ya taanl yaab, ki tɔke' bɛ Uwien cère' bi tien' tibont tà kɛ nnɔ nin u wuɔn' bà ɲa yé \*Sufmbɛ mitekjim ya sɛn ma bo. <sup>28</sup> Pɔl nin Banabas tien' binib bà teke' \*Yesu ki jin' nnɔ saan ki wuɔke'.

## 15

### *Bi finde' upunjie bo Antiyɔk ya du ni*

<sup>1</sup> Tɔ, binib biba ñɛn' Sude ya tinfɛnm bó ní ki baa' Antiyɔk ya du ni, ki lá wɔknh binib bà teke' \*Yesu ki jin' nnɔ ki teh: «Na jie' ní'pun Moyis ya yiko ye ma bo la, Uwien ɲa ní ɲmiɛn nɛ.» <sup>2</sup> Pɔl nin Banabas ɲa tuo', nɛ ki finde' nin bɛ tigbɛr nnɔ bo ki gbien'. Nɛn bo nɛ bi'kɛ tuo' ki ye Pɔl nin Banabas nin binitɔb biba ní jo Yerusalem, kí tí lɛ \*Yesu ya tondb nin u'taanl ya ciɛnb ifinfinde nnɔ bo. <sup>3</sup> Nɛ \*Kristo ya taanl yaab bà te Antiyɔk ni nnɔ pɛrɛ' bɛ\*. Bi joh ma nnɔ nɛ ki ñɛh binib bà teke' \*Yesu ki jin', ki te Fenisi nin Samari ya tinfɛnm ni nnɔ saan, ki tɔkeh bɛ ki teh bà ɲa yé \*Sufmbɛ mɔ lèbre' bi'tetem ki teke' \*Yesu ki jin'. Nɛ ní sɔngreh bi'kɛ ya yɛnm ki gbiekeh.

### *Bi taan' litaanl Yerusalem ni*

<sup>4</sup> Bi tí baa' Yerusalem ni, nɛ \*Kristo ya taanl yaab nin bi'ciɛnb nin \*Yesu ya tondb teke' bɛ kucɛnku. Nɛ Pɔl nin Banabas tɔke' bɛ Uwien cère' bi tien' tibont tà kɛ nnɔ. <sup>5</sup> \*Farisienmbɛ ya cɛkl yaab bà lèbre' bi'tetem ki teke' \*Yesu ki jin' nnɔ ya biba, fii' ki sere', ki len' ki ye bà ɲa yé \*Sufmbɛ ki teke' \*Yesu ki jin' nnɔ, ní kpɛ bɛ ní jie' bi'pun nɛ, kí li boh Moyis ya yiko. <sup>6</sup> Nɛn saan nɛ \*Yesu ya tondb nin u'taanl ya ciɛnb taan' bɛ ní liike bi li tien ma tigbɛr nnɔ. <sup>7</sup> Bi finde' ki gbien' ma nnɔ, nɛ Piɛr fii' ki sere', ki tɔke' bɛ ki ye: «N'yaabɛ, ni bɛn ki ye Uwien gɛnde' nni ní'ni ní wuɔke' ɲɔ bà ɲa yé \*Sufmbɛ ní cii u'gbɛmɔnmɔnt n'ñɔbu ni, kí teke' \*Yesu kí ji nɛ. <sup>8</sup> Uwien bɛn binib ya fɛl ni te ma bo, nɛ ki de' bɛ \*Mifuoñaanm tɛn u là de' ti'mɔ ma bo ɲɔ wɔ ní wuɔn bɛ, kí ye u gɛnde' bɛ nɛ. <sup>9</sup> Wa bore' tinbi nin bɛn, kimɛ mitekjim bo nɛ u sɔkre' bi'fɛl bo ya jɔknt. <sup>10</sup> Ní te nnɔ la, bɛ tien' fɛnfɛnnɔ ni dɛlkeh Uwien, ki wɔbndeh bɛ, bɛ ní tuke litukl là tinbi nin ti'yaajɛb ɲa fre' ki tuke' lè? <sup>11</sup> Ama tinbi wɔn, Yonbdaan \*Yesu ya juokm bo nɛ ti teke' wɔ ki jin' ki ɲmɛrɛ'. Ní te nnɔ nɛ bà ɲa yé \*Sufmbɛ mɔ ya bùol.»

<sup>12</sup> Piɛr len' ki gben', nɛ linigol nnɔ ɲmile', ki cengeh Banabas nin Pɔl li len kí ye bà. Nɛ bi cin' ki tɔkeh bɛ Uwien cère' bi tien' miyɔkm ya bont tà bà ɲa yé \*Sufmbɛ ni nnɔ ma bo. <sup>13</sup> Banabas nin Pɔl len' ki gben' ma nnɔ nɛ Saak mɔ ye: «N'yaabɛ, cenge mɛn. <sup>14</sup> Simɔn tɔke' tɛ Uwien cin' ki tien' ma bo. U gɛnde' bà ɲa yé \*Sufmbɛ mɔ ni binib ki tien' u'yaab. <sup>15</sup> Ní tien' tɛn \*Uwien ya ñɔbonsɔknb là len' ma bo nɛ, kimɛ ní kɛle' \*Uwien ya gbɔnku ni ki ye:

<sup>16</sup> <Yonbdaan là len' ki ye:

\*Dafid ya den lu'†, n li liɛbe ní kí mɛ yí,

N li liɛbe ní kí fin lilɛngbenl nnɔ kí cère iden nnɔ ní li se.

<sup>17</sup> Nɛn bo nɛ binib bà sɛn' kɛ li nuun min Yonbdaan.

Inibol yà kɛ n yin' yè, yè ní li yé n'yɛ nnɔ li nuun nni.

Yonbdaan nɛ len' nnɔ,

nɛ ki tien' tibont nnɔ kɛ.

<sup>18</sup> U cère' binib bɛnde' tibont nnɔ haali uyo bo nɛ.»

<sup>19</sup> Saak tí len' ki ye: «Nɛn bo nɛ n maale' ki ye ní mɔn ti la li wɔbndeh bà ɲa yé \*Sufmbɛ, ki lèbre' bi'tetem ki paan' Uwien bo nnɔ nin ti'yaajɛtɛntienm. <sup>20</sup> Ama cère mɛn tí kɛle kugbɔnku kí tɔke bɛ kí ye: bi la li jinh bule ya jier, kimɛ tù yé tijɔknt nɛ, ki la teh nanmaal, ki la ɲmɔnh wɛnkpil, ki la ji sɛm. <sup>21</sup> Kimɛ haali ti'yaajɛb ya yo kí lá baa dinnɔ, Moyis ɲmɔbe binib bà wɔknh u'yiko nɛ idu kɛ ni. Bi tuu ki kàanh wɔ nɛ \*Saba kɛ \*Saba ya daali \*Sufmbɛ ya táan ya dur ni.»

\* **15:3** Bi li fre kí lèbre ki pɛrɛ' kí ye ki tore' mɔ. † **15:16** Migbiirm miɛ ya ciim te bolm mile bo nɛ. Dafid ya den lu' bii Dafid ya bɛl lu'.

*Bi kele' kugbɔnku ki de' bà ña yé Sufmbɛ*

<sup>22</sup> Nɛn saan nɛ \*Yesu ya tondb nin u'taanl yaab kɛ nin bi'ciɛnb gbierɛ' ki kpaan' ki gɛnde' bijɛb biba bi'ni ki pukn' Pɔl nin Banabas bó bɛ rí sɔn bɛ Antiyɔk ya du bó. Bi gɛnde' Sudas wà bi baanh wɔ Basabas nin Silas nɛ. Bi yé binib bà bi boh bɛ \*Kristo ya taanl yaab ni nɛ. <sup>23</sup> Bi de' bɛ kugbɔnku kùà nnɔ bi kele' ku'ni ki ye ma sɔ: «Tinbi \*Yesu ya tondb nin \*Kristo ya taanl ya ciɛnb, fuondeh ti'yaab bà ña yé Sufmbɛ ki te Antiyɔk ya du ni nin Siri ya tinfɛnm ni nin Silisi ya tinfɛnm ni nnɔ. <sup>24</sup> Ti cii' ti'yaab biba jon' ni'saan, ki tĩ tɔke' nɛ tigbɛr tà ñaabɛh ni'yɛnm ki diɛnh nɛ iyɛnmaale. Ta sɔn' bɛ bɛ rí tĩ tɔke nɛ gbɛr. <sup>25</sup> Nɛn bo nɛ ti taan' ki kpaan' buñɔbu, ki gɛnde' ti'ni binib, tí sɔn bɛ ni'saan, bɛn nin Banabas nin Pɔl, ti'yaab bà ti yíe bɛ nnɔ. <sup>26</sup> Bi yé binib bà ña tɔnge' bi'miel Yonbdaan \*Yesu Kristo ya tuonl bo nɛ. <sup>27</sup> Ti sɔn' Sudas nin Silas, bɛ rí lá tɔke nɛ buñɔbu ni tigbɛr tà ti kele' tù kugbɔnku kuu ni nnɔ nɛ. <sup>28</sup> \*Mifuoñaanm tore' tɛ ti kpaan' buñɔbu, ti la wɔbn nɛ kí de nɛ \*yiko uba wɔ rí li yé ni'bo litukl kí pukn tibont tà yé ni'bo tibonmɔnt nnɔ bó. Tun si: <sup>29</sup> ni la ñmɔnh tɔtuɔrnɔnt, ki la jinh sɛm, ki la ñmɔnh wɛnkpil, ki la teh nañmaal. Ni cuo' ni'ba tu ya bont bo la, nɛn nɛ mɔn. Ni'yaam rí li ñmɛ.»

<sup>30</sup> Tɔ, bi cɛbɛ' bi sɔn' binib bà nnɔ bi bure' Antiyɔk ya du bó. Bi tĩ baa' ni'bó, nɛ ki taan' \*Kristo ya taanl yaab kɛ, ki taa' kugbɔnku nnɔ ki ñukn' bɛ. <sup>31</sup> Bi kaan' kù ma nnɔ, nɛ bi'kɛ ya yɛnm sɔnge', kime kù saake' bi'gbɛnɛnt. <sup>32</sup> Sudas nin Silas yé \*Uwien ya ñɔbonsɔknɛ ma nnɔ, nɛ ki tɔke' bɛ tigbɛr tù yɛbe ki saake' bi'gbɛnɛnt bɛ rí li pɛ Uwien ya sɛn bo mɔnmɔnm. <sup>33</sup> Bi wuɔke' ni'saan waamu nɛ ki yaan binib bà teke' \*Yesu ki jin' nnɔ cɛbɛ' bɛ bɛ rí liɛbe bà sɔn' bɛ nnɔ saan nin uyenduɔn. <sup>34</sup> [Silas wɔn juore' ki te Antiyɔk ya du ni nɛ.]‡

<sup>35</sup> Pɔl nin Banabas mɔ juore' Antiyɔk ya du ni, ki tɔkeh nin binib bi yɛbe ki tĩ wɔknɛh binib, ki tɔkeh bɛ Yonbdaan ya gbɛr.

*Pɔl nin Banabas pɔare' tɔb*

<sup>36</sup> Iwɛnkáanɛ gɛbre', nɛ Pɔl tɔke' Banabas ki ye: «Cère tí liɛbe idu yà kɛ ni, ti là tɔke' binib Yonbdaan ya gbɛr nnɔ, kí tĩ fuonde binib bà teke' \*Yesu ki jin' nnɔ kí liike bi ñuuke u'gbɛr ma bo.» <sup>37</sup> Banabas là yíe wɔ rí tuke San wà bi liɛbe' ki yih wɔ Mark nnɔ nɛ. <sup>38</sup> Ama Pɔl ña tuo' wɔ rí liɛbe kí tɔke nin San Mark, kime u là siere' ki dàan' bɛ Panfili ya tinfɛnm ni, nɛ ka tore' bɛ bi'tùon ni. <sup>39</sup> Pɔl nin Banabas finde' nin tɔb nĩ tĩ ben' ki fiire', nɛ wà kɛ taa' u ya bó. Nɛn saan nɛ Banabas taa' San Mark ki kɔn' buñɛrciɛnbu, ki bure' Ciip ya dekl bó. <sup>40</sup> Nɛ Pɔl gɛnde' Silas wɔ rí pìere wɔ. Binib bà teke' \*Yesu ki jin' nnɔ kàare' Yonbdaan ki ye wɔ rí juoke bɛ, nɛ bi bure', <sup>41</sup> ki ñɛh \*Kristo ya táan yà te Siri nin Silisi ya tinfɛnm ni nnɔ saan, ki cɛreh i'ñib faakreh mitekjim ni.

## 16

*Timote pìere' Pɔl nin Silas*

<sup>1</sup> Pɔl nin Silas tĩ baa' Dɛbe nin Lista ya du ni, ki laa' uje uba teke' \*Yesu ki jin' ki te mifɛnm nnɔ, bi yih wɔ Timote. U'naa yé Suf nɛ, ki teke' \*Yesu ki jin', nɛ u'baa yé Grɛk. <sup>2</sup> Binib bà teke' \*Yesu ki jin' ki te Lista nin Ikoniyaam ya du ni nnɔ kɛ pèkeh Timote nɛ. <sup>3</sup> Pɔl yíe Timote rí pìere wɔ. \*Sufmbɛ bà te ni'saan nnɔ bo nɛ u jìe' Timote ya punl, kime \*Sufmbɛ nnɔ kɛ bɛn ki ye Timote ya baa yé Grɛk nɛ. <sup>4</sup> Bi cuonh ki ñɛh idu ni ma nnɔ, nɛ ki tɔkeh binib bà teke' ki jin' ki te i'ni nnɔ, \*Yesu ya tondb nin u'taanl yaab ya ciɛnb bà te Yerusalem ni ñɛn' isɛn yà nnɔ, nɛ ki sureh bɛ bɛ rí li pɛ i'bo. <sup>5</sup> Nɛn bo nɛ \*Kristo ya táan yaab faakreh mitekjim ni, nɛ binitɔb teknh wɔ ki jinh ki pukndeh bi'bó daan kɛ daan.

*Uwien yíe Pɔl rí jo Maseduɔnn ya tinfɛnm bó*

<sup>6</sup> \*Mifuoñaanm pien' Pɔl nin u'tántɔknlieb bi la tɔke Uwien ya gbɛr Asi ya tinfɛnm ni. Nɛn bo nɛ bi gɛbre' Friji nin Galasi ya tinfɛnm, <sup>7</sup> ki tĩ baa' Misi ya tinbiɛn, ki maaleh bɛ rí

‡ 15:34 Bi kpìe' ki kele' tigbɔnt tà nnɔ ya tuba ni migbiirm 34 ña te tu'ni.

jo Bitini ya tinfenm ni, ne \*Yesu ya Fuoñaanm ña de' be sen. <sup>8</sup> N'en saan ne bi gèbre' Misi ya tinfenm, ki tì baa' Trowas ya du ni. <sup>9</sup> Kuñonku ne Pól laa' Maseduonn ya tinfenm ya je uba tideknt yaam, u se u'saan ki gbáanh wó ki teh wó ní baa ní Maseduonn kí lá tore be. <sup>10</sup> Pól laa' Maseduonn ya je nnó tideknt yaam ma nnó, ne ti \* pók ki bonde' i ya tãan bo, tí jo Maseduonn ya tinfenm bó, kimé ti bende' ki ye Uwien ne yin' te ni'bó tí tì tóke u'gbemómant.

### *Upii uba teke' Yesu ki jin' Filip ya du ni*

<sup>11</sup> N'en saan ne ti kón' buñercienbu Trowas ya du ni, ki cubn' Samotras ya dekl bó. Kutaaku faa' ne ti bure' Neyapoli ya du bó. <sup>12</sup> Ne ki ñen' nen saan, ki jon' Filip ya du bó; u yé Maseduonn ya tinfenm ya ducenciën ne. Erom yaab ne ñuuke udu nnó. Ti tien' u'ni iwenkãanke ne. <sup>13</sup> \*Saba ya daali, ne ti ñen' udu nnó ni, ki jon' ukpen uba ya gbaal. Ti maale' ki ye \*Sufmbé taakeh ná saan ki kãareh lii te nè ne. Ti laa' bipiib biba taan' ni'saan, ne ti kèle' ki tóke' be Uwien ya gber. <sup>14</sup> Upii uba là te bi'ni, bi yih wó Lidi. U yé Tiyatiir ya du ya pii ne, ki pukeh Uwien, ki kuóreh ikpélde ì mán ki yé imónmón. Yonbdaan cìbre' u'yenm ki cère' u cenge' mómómnm, ki tuo' Pól len' ná nnó. <sup>15</sup> Ti sñi' wón nin u'den yaab ké Uwien ya ñunm ma nnó, ne u tóke' te ki ye: «Ni tuo' ki ye n mánbe ki teke' Yonbdaan ki jin' la, den men, kí li te n'den.» Ne ki cékn' te ti tuo'.

### *Bi pekñ' Pól nin Silas Filip ya du ni*

<sup>16</sup> Lidaali liba ne ti tí là joh bi taakeh ná saan ki kãareh nnó. Ne ujefaan uba cende' te usen ni, ki yé uyónb; ki ñmóbe ipol iba, ki tókeh binib ná li wun ní tien. U teh nnó ne ki lenh lifaal lí yebe ki dienh u'cénbaambe. <sup>17</sup> U paan' tinbi nin Pól bo ki wuureh ki teh: «Binib bié nò yé Uwien wá ña ñmóbe Nacentó ya tonsónb ne. Bi tókeh ne ni li kpñen usen wá kí ñmere ne.» <sup>18</sup> U teh nnó ne idaan ké, Pól ya benku ni tí piebe', ne u jiebe' ki tóke' ipol nnó ki ye: «Yesu Kristo ya yel bo, siere men u'saan.» Ne ì siere' u'saan i ya tãan bo. <sup>19</sup> Tó, ujefaan nnó ya cénbaambe laa' ba ji li fre kí lé faal u'bo, ne bi cuo' Pól nin Silas, ki tuke' be ufaa bo ki jon' udu nnó ya nib taakeh ná saan nnó, ñó u'cienb ní bu be tibuur. <sup>20</sup> Ne ki taa' be ki wuón' Erom yaab ya buur ya cienb ki ye: «Binib bié nò yé \*Sufmbé ne, ki tuke' fenfenm ki baa' tí du ni, <sup>21</sup> ki wóknh mitetem mà ña kpé tinbi Erom yaab ní tuo mè, ki niireh nin tí paan mi'bo.»

<sup>22</sup> Bi len' nnó ma nnó ne linigol kpre' bi'bo. Tibuur yaab nnó dère' ki gore' Pól nin Silas ya went, ne ki ye be ní ñí be ilenben. <sup>23</sup> Bi ñí' be cèen, ne ki taa' be ki tí pekñ', ki tóke' wá gu lipékl nnó ki ye wó ní li gu be mómómnm. <sup>24</sup> Bi tóke' wó ma nnó ne u kuón' be lipékl ya dubenku ni, ki taa' bi'tãan ki sekn' idó ya ñmóbe ibon ni, ki lòle' ki mókñ' yí.

<sup>25</sup> Ní tí tuo kuyóku, ne Pól nin Silas te ki kãareh, ki gèh iyuon ki pèkeh Uwien, ne lipékl ya nitób cengeh bi'bó. <sup>26</sup> Ne kitink jènge' i ya tãan bo ki gbien', ki cère' lipékl ya duku ya tenpuul mó jènge', ne li'nagent ké pípiire'. Tikudókr tà lùo lipékl ya nib nnó ké cecere'. <sup>27</sup> Wá gu lipékl nnó finde', ki laa' tinagent yeyé ma nnó, ne u nère' u'jusiek wó ní ku u'ba, ki maaleh ki teh lipékl ya nib nnó ké ñen' ki sensen' ne. <sup>28</sup> Ne Pól tien' u'bo ki ye: «La tien a'ba ná bre, tí ké te ni'saan.»

<sup>29</sup> Wá gu lipékl nnó ye be ní taa umu ní, ne ki tòre' ki kón' lipékl ya du ni, ki gbaan' Pól nin Silas ya nun bó, u'gbenent ké ñóh. <sup>30</sup> Ni ya puoli bó ne u taa' be ki ñen' saali, ki niire' be ki ye: «Biciënbe, n li tien mila kí ñmere?» <sup>31</sup> Ne bi jiin' wó ki ye: «Teke Yonbdaan \*Yesu kí ji, sin nin a'den yaab ké li ñmere.» <sup>32</sup> N'en saan ne bi tóke' wón nin u'den yaab ké Yonbdaan ya gber. <sup>33</sup> Ne u taa' be u ya yo kuñonku nnó ké ki tí sókre' bi wun ñiñi' be ma nnó ya gbien. Ne Pól nin Silas sñi' wón nin u'den yaab ké Uwien ya ñunm i ya tãan bo. <sup>34</sup> Ne u taa' Pól nin Silas ki jon' u'den, ki tí de' be tijier. U teke' Uwien ki jin' ma nnó ne wón nin u'den yaab te uyensonge ni.

\* **16:10** Wá kele' kugbónku kuu nnó ye tinbi ma nnó, ní wuón' ki ye u'mó tóke nin Pól ne.

<sup>35</sup> Kutaaku faa' nε Erom ya buur yaab nnə sən' bi' sojambε bε rí jo kí tí tǎke wà gu lipεkl nnə wə rí taa bijεb nnə kí wiε. <sup>36</sup> Wà gu lipεkl nnə tǎke' Pəl ki ye tibuur yaab sən' ki tǎke' nni ki ye rí taa nε kí wiε. Nεn bo, nε mεn kí li joh nin uyenduən. <sup>37</sup> Nε Pəl ye: «Tibuur yaab cère' bi nīni' tinbi Erom yaab binib ya nun bó ka bun' tε buur, nε ki pεkn' tε. Fεnfennə bi ji yíe bε rí bǎle kí wiε tε ma nə, ta rí tuo. Cère tibuur yaab bugbεn rí baa kí nēn tε.»

<sup>38</sup> Sojambε nnə liεbe' ki tí tǎke' tibuur yaab nnə Pəl len' nà nnə. Bi cii' Pəl nin Silas yé Erom yaab ma nnə nε bujεwaanbu cuo' bε. <sup>39</sup> Nε bi baa' Pəl nin Silas saan ki tien' bε kafala, nε ki nēn' bε lipεkl ni, ki gbáan' bε bε rí siere udu nnə ni. <sup>40</sup> Pəl nin Silas nēn' kupεnpεkndu nnə ni, nε ki jon' Lidi den, ki laa' binib bǎ teke' \*Yesu ki jin' nnə, ki saake' bi' gbεnεnt, nε ki bure'.

## 17

### *Pəl nin Silas te Tesalonik ya du ni*

<sup>1</sup> Pəl nin Silas siere' Filip ya du ni, nε ki gèbre' Anfipolis nin Apoloni ya du ni, ki tí baa' Tesalonik ya du ni. \*Sufmbε ya taanl ya duku kuba te len. <sup>2</sup> Pəl kǎn' litaanl ya duku nnə ni tεn u tí rí teh ma bo. Nε ki taa' \*Saba uta ki tǎkeh bε \*Uwien ya gbǎnku ya gbεr. <sup>3</sup> U tǎkeh tigbεr nnə ya tingi ki teh Uwien ya Nigεndkε Kristo li jènde, kí kpo kí mεkre bitεnkpiib ni nε. Nε ki teh n tǎkeh nε \*Yesu wà ya gbεr nə, wən nε yé Uwien ya Nigεndkε Kristo. <sup>4</sup> \*Sufmbε biba nin Grεkmbε bǎ pukeh Uwien nnə ligol nin bipiikpεkpiεkb mǎ ligol ya yεnm sǎnge' Pəl len' nà nnə bo, nε bi kpǎbn' wən nin Silas bó.

<sup>5</sup> \*Sufmbε bǎ ya yεnm nǎ sǎnge' Pəl len' nà nnə bo nnə, taa' u'bo iponponbe, nε ki taa' idukond isεnje ni, ki kpǎbn' bi' bǎ bó, ki cère' udu nnə ya nib taan' ki yεbe ki kpre' Pəl nin Silas bo, ki teh fεnfεnm udu ni. Bi jon' uje uba den, bi yih wə Sasən ki tí kǎn' nin mituəm, ki nuunh bε rí taa Pəl nin Silas kí jo udu nnə ya nib taan' nà saan nnə, <sup>6</sup> nε ka laa' bε. Ba laa' bε ma nnə nε ki cuo' Sasən nin binib bǎ teke' \*Yesu ki jin' nnə ya biba ufaa bo, ki taa' bε ki jon' udu nnə ya ciεnb saan, nε ki wuureh ki teh: «Binib bǎ cuon' ki saa' ujεndun kε nnə, baa' niε saan mǎ, <sup>7</sup> nε Sasən teke' bε u'den. Bi kende' ubεrciεn Sesa ya yiko bo, nε ki lienh ki teh ubεrtǎ te, bi yih wə Yesu.» <sup>8</sup> Tigbεr nnə cǎke' linigol nin udu nnə ya ciεnb kε, <sup>9</sup> nε bi teke' Sasən nin bi'tǎb nnə ilike, ki yaan ki wiε' bε.

### *Pəl nin Silas te Bere ya du ni*

<sup>10</sup> Nī biire' nε binib bǎ teke' \*Yesu ki jin' nnə cère' Pəl nin Silas bure' i ya tǎan bo Bere ya du bó. Bi tí baa' nε ki jon' \*Sufmbε ya taanl ya duku bó. <sup>11</sup> \*Sufmbε bǎ kǎ Bere ya du ni nnə teknh tigbεr ki cεn' Tesalonik yaab. Nεn bo nε bi teke' Pəl tǎke' bε tigbεr tǎ nnə mǎnmǎnm, nε ki fiinh \*Uwien ya gbǎnku daan kε daan bε rí liike tǔ te bii ta te. <sup>12</sup> Bi'ni binib teke' \*Yesu ki jin' ki yεbe. Nε Grεkmbε ya piikpεkpiεkb nin bijεb mǎ teke' wə ki jin' ka dindin. <sup>13</sup> Ama uyo wà \*Sufmbε bǎ te Tesalonik ya du ni nnə cii' Pəl te Bere ya du mǎ ni ki tǎkeh binib Uwien ya gbεr nnə, nε bi jon' ni'mǎ bó ki tí tí cère' linigol kpre'. <sup>14</sup> Nεn saan nε binib bǎ teke' \*Yesu ki jin' nnə cère' Pəl siere' i ya tǎan bo ki kpīen' usεn wà joh miñunciεnm bó nnə. Silas nin Timote bεn juore' Bere ya du ni nε. <sup>15</sup> Bǎ pīereh Pəl nnə, pīere' wə ki tí baa' Atεnn ya du ni nε. Nε Pəl tǎke' bε ki ye bi tí baa' la, bε rí tǎke Silas nin Timote kí ye bε rí baa ní u'saan tonm.

### *Pəl tǎkeh Uwien ya gbεr Atεnn ya du ni*

<sup>16</sup> Pəl gu Silas nin Timote Atεnn ya du ni uyo wà nnə, nε ki laa' ibule gbe udu nnə ni, nε u'yεnm saa' ki gbien'. <sup>17</sup> U te \*Sufmbε ya taanl ya duku ni, nε wən nin \*Sufmbε nin binib bǎ pukeh Uwien nnə tǎkeh tigbεr. Idaan kε u joh binib taakeh nà saan nε ki tǎkeh binib bǎ bǎareh ni'saan nnə \*Yesu ya gbεr. <sup>18</sup> Binib biba mǎ là te ni'saan ki bεnge' miyεnfuom, bεn nin Pəl lienh. Biba yé \*Epikuryεnmbε, nε bitǎb yé \*Stoyisiεnmbε. Biba lienh ki teh «Uje wuə nǎñǎbleh ki teh ba nε?» Nε bitǎb lienh ki teh: «U lii lienh niba bó ya bule ya gbεr nε.» Bi len' nnə, kimε Pəl tǎkeh \*Yesu ya gbεmǎnmǎnt nin mimεkrm ya gbεr nε. <sup>19</sup> Bεn



nin wòn jon' udu nnò ya buur ya bùol, bi yih nà saan Ayeropaji\* nnò, nè bi niire' wò ki ye: «A li fre kí tòke tɛ a wòknh binib miwòknfɛnm mà nò-ɔɔ?» <sup>20</sup> Kimɛ a kpaakeh ti'tub nè nin a'gbɛɛnt tuu, nè ti yíe tí cii tu'tingi. <sup>21</sup> Tò, Atɛnn ya du ya nib kɛ nin bicɛnb bà te udu nnò ni nnò fɛ tìgbɛɛnt ya tòm nɛ. Nɛn bo nè bi taakeh ki kaah uyo kɛ ki tòkeh tù.

<sup>22</sup> Pól fii' ki sere' Ayeropaji ya nib nnò ya siik ni, nè ki ye: «Atɛnn yaabɛ, n sekn' ki laa' ni pɛ ibule bo cɛɛn nɛ. <sup>23</sup> N cuonh ni'du ni uyo wà nnò nè ki likeh ni'ponpob, ki tí laa' liba bi kele' li'bo ki ye: «Ta bɛn wà nnò mɔ yaal sɔ.» Ni pukeh wà, ka bɛn wò nnò min baa' rí tòke nɛ u ya gɛr nɛ. <sup>24</sup> Wòn nɛ yé Uwien, ki ñɛn' uɲɛndun nin tibont tà kɛ te u'ni nò. Wòn wà yé kutaaku nin kitink ya Yonbdaan nnò, ɲa kò nib mɛn' tidur tà nnò ni. <sup>25</sup> Wa nuunh nil ya torm, niba ɲa pàre' wò, kimɛ wòn nɛ dienh binib limiel nin mitafaam mà bi fuoreh mè nò nin tibont kɛ. <sup>26</sup> U ñɛn' unibaab nɛ, ki cèrɛ' u pòrɛ' inibol yà te utingbɛn kɛ bo nò. Wòn Uwien nɛ sien' iyo kɛ, ki bobore' inibol kɛ nin i'kònkun. <sup>27</sup> U là tien' nnò ɲò binib rí li nuunh wò nɛ. Nba la, bi ɲanɲaanh kí nuunh wò la, bi li tí lɛ wò. Imòn wa lí jɛnde' tí'ni uba mònòn saan. <sup>28</sup> Wòn bo nè ti te, ki fuobe, ki cuonh. Ni'yonyuonb biba mɔ là len' nnò nɛ. Bi là len' ki ye: «Tí'mò yé Uwien ya bumu nɛ.» <sup>29</sup> Ti yé Uwien ya bumu ma nnò, ta bi li maaleh ki teh Uwien naan tɛn ibule nɛ. Unisaal nɛ taa' u'yɛnmaale nin u'bɛnm ki kpen' itɛn, ki duore' miñòkm nin ilike ya kurku ki tien' yí. <sup>30</sup> Uwien ɲa tange binib ɲa laan là bɛn wò ki teh tibont tà nnò. Ama fɛnfɛnnò u ji tòkeh uɲɛndun ya nib kɛ nɛ ki teh bɛ rí lèbre bi'tetem. <sup>31</sup> Kimɛ u sien' lidaali là u li bu uɲɛndun ya nib kɛ tibuur tù rí li cuube. U gènde' unil wà li bu binib tibuur nnò. U cèrɛ' udaan mɛkre' bitɛnkpiib ni ɲò wò rí wuòn binib kí ye u mònbe ki gènde' wòn nɛ.»

<sup>32</sup> Binib nnò cii' Pól len' ki ye binib li mɛkre bitɛnkpiib ni ma nnò, nè biba lɛ' wò, bitòb mɔ len' ki ye: «Tí lá li cenge a'gbɛr tuu uyo uba nɛ.» <sup>33</sup> Nɛ Pól siere' bi'saan ki bure'. <sup>34</sup> Nin nɛn kɛ binib biba teke' \*Yesu ki jin', ki kpòbn' Pól bó. Bi'ni bi yih uba Denis u yé Ayeropaji ya nil, utò mɔ yé upii, bi yih wò Damaris nin binitòb mɔ.

## 18

### *Pól te Korɛnt ya du ni*

<sup>1</sup> Pól siere' Atɛnn ni, nè ki jon' Korɛnt ya du bó. <sup>2</sup> U tí cende' Suf uba bi yih wò Akilas nin u'po. Bi maa' wò Pònt ya tinfɛnm ni nɛ, ki yih u'po Prisil. Bi ñɛn' Itali ya ducien Erom bó nè ki baa' na wuòke'. Kimɛ ubɛrcien Klod nè là ble' liwòbl ki ye \*Sufmbɛ kɛ rí ñɛ Erom ya du ni. Pól nin bɛn cuo' kujòtiɛku. <sup>3</sup> Bɛn nin Pól ya tuonl kɛ là tɛ nɛ, bi là pòh ininbon\* nɛ. Nɛn bo nè Pól jon' ki tí te bi'den, bi tɛ ki sònh. <sup>4</sup> \*Saba kɛ \*Saba ya daali Pól joh \*Sufmbɛ ya taanl ya duku ni nè bi tòkeh tìgbɛr, nè u ñikndeh \*Sufmbɛ nin Grɛkmbɛ rí teke \*Yesu kí ji.

<sup>5</sup> Silas nin Timote ñɛn' Maseduànn ya du bó, ki baa' ní uyo wà nnò, nè Pól taa' u'ba ki de' Uwien ya gɛr ya tòm baba, ki tùɔrɛh ki tòkeh \*Sufmbɛ ki teh \*Yesu nè yé Uwien ya Nigɛndkɛ Kristo. <sup>6</sup> Ba tuo' Pól ya ñòbu bó, ki sukreh wò ma nnò, nè u gbɛgbɛ' u'wɛngolkaar ya tɛngunku ki tòke' bɛ ki ye: «Na ɲmɛrɛ' la, ni'yaar bo, na ñɛn' min. Fɛnfɛnnò n li pekɛrè bà ɲa yé \*Sufmbɛ bó nɛ.» <sup>7</sup> Pól siere' ni'saan, ki jon' uje uba den, bi yih wò Titiyus Yustus, u yé unil wà pukeh Uwien nɛ. U'den nin litaanl ya duku nnò buòke nɛ. <sup>8</sup> Litaanl ya duku nnò ya cɛn Krispus nin u'den yaab kɛ teke' Yonbdaan ki jin'. Korɛnt yaab mɔ cii' Pól tòkeh \*Yesu ya gɛr tà nnò, ki teke' ki jin' ki yɛbe, nè bi sɛi' bɛ Uwien ya ñunm.

<sup>9</sup> Kuñònkɛ kuba nè Yonbdaan tòke' Pól tidɛknt yaam, ki ye: «La li fɛnge, li tòkeh binib tìgbɛmòn mɔnt nnò, ki la li ɲmin. <sup>10</sup> N te nin ɲɛ, uba ɲa rí fre kí tien ɲɛ nà bre, kimɛ n'yaab yɛbe udu wuu ni.» <sup>11</sup> Pól tien' ni'saan libinl liba nin inɲmaale iluob nɛ, ki wòknh binib Uwien ya gɛr.

\* **17:19** Ayeropaji yé ligbɛngbɛnl liba ya yel nè Grɛkmbɛ ya lenm ni. Bi là liɛbe' ki yih binib bà taakeh li'bo nnò mɔ ki teh Ayeropaji yaab nɛ. \* **18:3** Bi là nukeh tìgbònt nè ki pòh ininbon nnò, mitòm la, bi taah tikpɛlɛɛr nè ki pòh yè.

### *Bi tuke' Pəl ki jon' Galiyən saan tibuur*

<sup>12</sup> Tə, uyo wə Galiyən là yé Akayi ya tinfenm ya gobina nnə nɛ \*Sufmbɛ ya ciɛnb kpaan' Pəl bo iyɛ, nɛ ki cuo' wə, ki jon' tibuur, <sup>13</sup> ki tɪ təkɛ' ki ye: «Ujɛ wuə sureh binib bɛ ɾi li pukeh Uwien yiko ŋa ye ma bo nɛ.» <sup>14</sup> Pəl yàare' wə ɾi len, nɛ Galiyən təkɛ' \*Sufmbɛ nnə ki ye: «U bi bii' libiil liba nɛ, bii u bi tien' kinunbɔnk kiba nɛ la, ninbi Sufmbɛ, n bi li duən n'yeɛnm kí cenge ni'ból. <sup>15</sup> Ama ni findeh nin tɔb iŋəbon bo nin binib ya yel bo nin ni'yiko bo wən la, nɪ yé ni'yaar nɛ. Min ŋa yíe n li yé wə li bu tuu ya gber.» <sup>16</sup> Nɛ ki ŋəre' bɛ ki ŋen' tibuur ya duku ni. <sup>17</sup> Nɛ binib bə kɛ te ni'saan nnə cuo' litaanl ya duku ya ciɛn, Səstɛnn, ki ŋih wə tibuur ya duku ya nun bó, ama Galiyən ŋa li tɔnge' tɪ.

### *Pəl liɛbe' Antiyək ya du bó*

<sup>18</sup> Pəl biɛ ki tien' Korɛnt ya du ni ki wuəkɛ'. U cèbe' binib bə teke' \*Yesu ki jin' nnə, nɛ wən nin Prisil nin Akilas bure' bɛ ɾi tɪ kə buŋɛrciɛnbu Sankre ya du ni. U kuo' u'yur wun ni nɛ u là pùon' lipuonl là nnə bo. Bi kən' buŋɛrciɛnbu u ya du ni nɛ ki cubn' Siri ya tinfenm bó. <sup>19</sup> Bi tɪ baa' Efɛs ya du ni nɛ Pəl dāan' u'tɔntɔknlieb, ki jon' \*Sufmbɛ ya taanl ya duku ni bi tɪ təkɛh tigber. <sup>20</sup> Bi gbáan' wə wə ɾi tien bi'saan iwenkàankɛ, nɛ wa tuo', <sup>21</sup> ki cèbe' bɛ, ki təkɛ' bɛ ki ye Uwien tuo' la, u tɪ li liɛbe ní bi'saan uyo uba. Nɛ ki kən' buŋɛrciɛnbu ki siere' Efɛs ya du ni, ki bure' <sup>22</sup> ki tɪ baa' Sesare ya du ni. U tɪ baa' ma nnə nɛ ki don' Yerusalem bó, ki fuonde' \*Kristo ya taanl yaab, nɛ ki ŋen' ni'ból ki cən' Antiyək ya du bó. <sup>23</sup> U tien' iwenkàankɛ Antiyək ya du ni, nɛ ki tɪ bure'. U joh ma nnə nɛ ki ŋen' Galasi nin Friji ya tinfenm ni, ki faake' binib bə teke' \*Yesu ki jin' nnə ya tekjim.

### *Apolos jon' Efɛs nin Korɛnt ya du ni*

<sup>24</sup> Ujɛ uba baa' Efɛs ya du ni, ki yé Suf, bi yih wə Apolos. Bi maa' wə Aleksandri ya du ni nɛ. U yé unil wə freh ki lienh nɛ, ki bɛn tigber tə kɛle' \*Uwien ya gbɔnku ni nnə mənəmnm. <sup>25</sup> Bi là wəkn' wə u li paan ma bo Yonbdaan ya sɛn bo. U'yɛnm pɛ \*Yesu ya gber bo cɛɛn, nɛ u təkɛh tɪ binib, ki wəknɛ bɛ tɪ te ma bo mənəmnm. Ama u bɛn San là siih binib Uwien ya ŋunm ma bo nnə baba nɛ. <sup>26</sup> Apolos kən' \*Sufmbɛ ya taanl ya duku ni, ki cin' ki təkɛh binib \*Yesu ya gber nin lifɛl. Prisil nin Akilas cenge' u'gber ki gben', nɛ ki taa' wə ki jon' bi'den, ki tɪ tɪrɛ' ki təkɛ' wə Uwien ya sɛn ya gber mənəmnm. <sup>27</sup> Apolos yíe wə ɾi jo Akayi ya tinfenm bó ma nnə nɛ binib bə teke' \*Yesu ki jin' nnə saake' u'gbɛnɛnt, ki kɛle' kugbɔnku ki de' wə wə ɾi tɪ de bi'tɔb bə te ni'ból nnə bɛ ɾi teke wə kucɛnku mənəmnm. U tɪ baa' ni'ból nɛ ki tore' binib bə teke' \*Yesu ki jin' Uwien ya juokm bo nnə nɪ yebe. <sup>28</sup> Kime u lienh ki jinh \*Sufmbɛ binib kɛ ya nun bó nɛ, nɛ ki ŋiikɛh nà kɛle' \*Uwien ya gbɔnku ni nnə bo, ki wəngɛh ki teh \*Yesu yé Uwien ya Nigendkɛ Kristo nɛ.

## 19

### *Pəl tɪ te Efɛs ya du ni*

<sup>1</sup> Apolos laan biɛ ki te Korɛnt ya du ni u yo wə nnə, nɛ Pəl ŋen' ijuən ya du bó, ki baa' Efɛs ya du ni, nɛ ki laa' binib bə teke' \*Yesu ki jin' nnə ya biba len, <sup>2</sup> ki niire' bɛ ki ye: «Ni tɪ teke' \*Yesu ki jin' ma nə, \*Mifuoŋaanm jiire' ni'bo ŋə-əə?» Nɛ bi ye: «Tinbi ŋa laan li cii' nil len' ki ye \*Mifuoŋaanm te mənən.» <sup>3</sup> Nɛ Pəl niire' bɛ ki ye: «Bi sii' nɛ Uwien ya ŋunsii u lɛ ba?» Nɛ bi jiin' wə ki ye: «Bi sii' tɛ San là siih binib Uwien ya ŋunsii wə nnə nɛ.» <sup>4</sup> Nɛ Pəl təkɛ' bɛ ki ye: «San là siih binib Uwien ya ŋunm mitetem ya lèbrm bo nɛ, nɛ ki təkɛh bɛ ki teh bɛ ɾi teke wə li paan u'puoli bó ní nnə kí ji. Ni'tingi si: bɛ ɾi teke \*Yesu kí ji.» <sup>5</sup> Bi cii' Pəl len' nà nnə, nɛ ki cère' u sii' bɛ Uwien ya ŋunm Yonbdaan \*Yesu ya yel bo. <sup>6</sup> Pəl taa' u'nuə ki paan' bi'bo, nɛ \*Mifuoŋaanm jiire' ní bi'bo, nɛ bi lienh milɛɛnm, ki səkndɛh Uwien ya ŋəbon. <sup>7</sup> Binib nnə kɛ là li baa piik nin bile.

<sup>8</sup> Pəl là joh \*Sufmbɛ ya taanl ya duku ni, ki tɪ baa' iŋmaale ita nɛ, ki lienh nin binib ka fɛnge, ki təkɛh bɛ Uwien ya bɛl ya gber, ki ŋikndɛh ki sureh bɛ bɛ ɾi tuo u təkɛh tigber tə nnə. <sup>9</sup> Ama bi'ni biba ya yul faa, ba tuo' ki teke' tigber nnə, nɛ ki séreh binib bə teke' \*Yesu

ki jin' ki pε u'sen bo nnə linigol ya nun bó. Nεn bo nε Pəl siere' ki dàan' bε, ki taa' bà teke' Yesu ki jin' nnə, ki jon' Tiranus ya keraduku bó ki tì wəknh bε idaan kε. <sup>10</sup> U tien' nnə ki tì dukn' ibin ile nε. Nεn bo nε Asi ya tinfenm ya nib, bà yé \*Sufmbε nin bà ηa yé \*Sufmbε kε cii' Yonbdaan ya gbεr.

### *Sikefa ya bijieɓ ya gbεr*

<sup>11</sup> Uwien cère' Pəl teh miyəkm ya bonciεnt cεεn, <sup>12</sup> haali bi tì taah mupapaajεmu nin tikpεlcεr tà kε mε' Pəl nnə mənən ki tì paakeh bi'wiεnb bo nin isεnpol ηaake binib bà bo, nε bi faakreh i ya taaan bo. <sup>13</sup> \*Sufmbε biba mə là te ki cuonh ni'kε saan ki ηuəh isεnpol binib saan. Bi yíe bε ní taa Yonbdaan \*Yesu ya yel, kí li ηuəh isεnpol binib saan, nε ki lienh ki teh: «\*Yesu wà Pəl təkεh binib u'gbεr nnə ya yel bo, siere mεn.» <sup>14</sup> Bitətuərciεnb ya ciεn uba nε là te ki ηməbe bijieɓ bilole, ki yé Suf, bi yih wə Sikefa. Bεn nε là cuonh ki teh nnə. <sup>15</sup> Nε usεnpol cère' uje wà u ηaake wə nnə təkε' bε ki ye: «N bεn Yesu, ki bεn Pəl yé udaan wà. Ninbi le? Ni'mə yé ηmεmbε nε?» <sup>16</sup> Nε ki fii' ki ciin' bε, ki faake' nin bi'kε ki jende' bε ki gbien', ki bunbunge' bε. Nε bi'kε sεn' ki n̄εn' u'den in̄il. <sup>17</sup> Efεs ya nib, bà yé \*Sufmbε nin bà ηa yé \*Sufmbε kε cii' tigbεr nnə, bujεwaanbu cuo' bi'kε; nε bi kpieke' Yonbdaan Yesu. <sup>18</sup> Linigol là teke' \*Yesu ki jin' nnə ya biba bàareh ki lá təkεh binib ya nun bó bi là teh nà na mən nin bi là teh in̄əke ma bo. <sup>19</sup> Bà là teh in̄əke nnə ya biba tukeh bi'n̄əkgbont ní ki lá taakeh ki cokndeh, ki sienh binib kε ya nun bó. Bi bù' tigbont nnə ya daaku, ki laa' n̄i te tilikur itur piŋun nε. <sup>20</sup> Nnə nε Yonbdaan ya tuəm bo, u'gbεr yere' ni'kε saan ki ηməbe mituəm.

### *Kukpiinku kpi' Efεs ya du ni*

<sup>21</sup> Ni ya puoli bó nε Pəl maale' ki ye u li n̄ε Maseduənn nin Akayi ya tinfenm bó nε kí jo Yerusalem. Nε ki ye: «N tì baa' ni'bó la, n li jo Erom ya du bó mə.» <sup>22</sup> Nεn saan nε u gende' bà toreh wə nnə ya bile, bi yih uba Timote, ki yih utə Erat, ki sən' bε Maseduənn ya tinfenm bó. Nε wən juore' Asi ya tinfenm ni ki tien' iwenkàankε.

<sup>23</sup> U ya yo nε kukpiinku kpi' Efεs ya du ni Yonbdaan ya sεn bo ki bre cεεn. <sup>24</sup> Uje uba là te udu nnə ni, bi yih wə Demetriyus. U taah ilike ya kur nε ki teh muduwawaamu mùa naan tən ubul \*Atemis ya duku, ki kuəreh binib bo. Lituonl nnə bo bitonsənb lenh kpele cεεn nε. <sup>25</sup> Demetriyus taan' binib bà kε sən̄h lituonl nnə nin binib bà mə sən̄h li ya tuonbol, nε ki təkε' bε ki ye: «N'jətiebε, ni bεn ki ye ti fuobe lituonl là bo sə-a! <sup>26</sup> Ama Pəl wən lienh ki teh, ibule ηa yé bonn, binib nε mεh yì. U sure' binib bà bi tuo' u'n̄əbu bó yεbe. Na yé niε saan Efεs ni baba, Asi ya tinfenm kε ni nε. Ninbi mənən cii', ki sekn' ki laa' mə. <sup>27</sup> U teh nnə la, na yé ti'tuonl baba nε li saa. Ubuciεn \*Atemis mə ya duku li juore fεnm nε. Atemis wà, Asi ya tinfenm ya nib nin uηendun ya nib kε pukeh wə nnə, mə ηa ji li ηməbe kpieke.»

<sup>28</sup> Binib nnə cii nnə ma nnə nε bi'benku ni ben' ki gbien' nε bi wuureh ki teh: «Efεs yaab ya bul \*Atemis yé ubuciεn nε.» <sup>29</sup> Nεn saan nε udu nnə ya nib kε kpre', ki təkε ligol ki joh udu nnə ya nib taakeh nà saan nnə, nε ki cuo' Pəl ya təntəknlieb bile usen ni. Bi yih uba Gayus, ki yih utə Aristak. Bi yé Maseduənn ya tinfenm ya nib nε. <sup>30</sup> Pəl yíe wə ní jo linigol nnə saan, nε binib bà teke' \*Yesu ki jin' nnə pien' wə. <sup>31</sup> Mitinfenm nnə ya ciεnb bà yé Pəl ya jətieb nnə mə sən' ki təkε' wə ki ye u la jo linigol nnə taan' nà saan nnə. <sup>32</sup> U ya yo nε linigol nnə ηməbe kuwaaku ki gbien', ka ji bεn nà bó si nà bó. Biba wuureh ki lienh tuba, bi'təb mə wuureh ki lienh tutə. Bi'ni biba ηa ji là bεn nà cère' bi taan' ni'saan mənən. <sup>33</sup> \*Sufmbε bà te ni'saan nnə gende' uje uba ki l̄ien' usen, bi yih wə Aleksand. Linigol nnə ni biba təkε' wə tigbεr nnə ya tingi, nε u yuon' unuə ki wuən' ki ye u yíe wə ní təkε linigol nnə tigbεr nnə ya tingi nε.

<sup>34</sup> Ama linigol nnə bende' ki ye u yé Suf ma nnə, nε bi taakeh ki wuureh ki tì baa' tən tikur tule ki teh: «Efεs yaab ya bul Atemis yé ubuciεn nε.»

<sup>35</sup> Udu nnò ya keraci cère' linigol nnò ñmile', nε u len' ki ye: «Efes yaabe, unil kε ben ki ye ninbi Efes yaab nε gu ubucien Atemis ya duku, ki ben ki ye u'nennεnku ñen' kutaaku bo nε ki jiiere' ní. <sup>36</sup> Uba ña ní fre kí niε kí ye ta te. Nen bo, ni bi li duon ni'yεnm nε, ki la tien niba ka maale'. <sup>37</sup> Kimε ninbi nε tuke' bijεb biε nò ki baa' niε saan. Ba saa' niba ubul ya duku ni, ka suke' ti'bule mò. <sup>38</sup> Demetriyus nin u'tonsɔnb ñmòbe tigber nin unil la, tibuur ya bùol te, bà buh tibuur mò te, bε ní jo nen bó kí tí len. <sup>39</sup> Ni tí ñmòbe tigbetɔr ki pukn' la, bi li tùore tù udu ya taancienl là ñendeñ \*yiko nnò ni nε. <sup>40</sup> Ta ben la, dinnò ya taanl liε bo, tí'du ya cienb li biin tε kí ye ti nuunh tí kp̄iin udu nε; kimε ta ñmòbe ti li ñi nà bo kí tòke nà cère' ti taan'.» U len' nnò ki gben', nε ki cère' bi'kε siere'.

## 20

### *Pɔl jon' Maseduonn nin Gres ya du ni*

<sup>1</sup> Kukpiinku nnò ya waaku tí ñmile' ma nnò, nε Pɔl cère' binib bà teke' \*Yesu ki jin' nnò taan' u'saan, nε u saake' bi'gbenent, ki cèbe' bε ki bure' Maseduonn ya tinfenm bó. <sup>2</sup> U ñeh idu yà te mitinfenm nnò ni, ki tòkeh binib bà teke' \*Yesu ki jin' nnò tigber tù yebe ki saakreh bi'gbenent, ki tí baa' Gres ya du ni, <sup>3</sup> ki tien' len inmaale ita. U là benh wò ní kò buñercienbu uyo wà kí jo Siri ya tinfenm bó nnò nε ki cii' \*Sufmbε kpaan' u'bo iye bε ní tien wò nà bre, nε u ye u li liebe' kí ñε Maseduonn ya tinfenm bó nε. <sup>4</sup> Nε binib biba p̄iere' wò. Bà p̄iere' wò nnò ya yel si: Sopater, u yé Bere ya du ya nil nε, ki yé Pirus ya bijε nin Aristak nin Sekundus, bi yé Tesalonik ya du ya nib nε nin Gayus, u yé Dεbe ya du ya nil nε nin Ticik nin Trofim, bi yé Asi ya tinfenm ya nib nε nin Timote. <sup>5</sup> Binib bugben liere' usen ki jon' Trowas ya du ni ki tí gu tε\*. <sup>6</sup> Tinbi wɔn, kp̄onò wà ña ñmòbe ñòke ya \*nacenku gèbre' nε ki yaan ti kɔn' buñercienbu Filip ya du ni. Tí tí tu' bε Trowas ya du ni wiennun daali nε, ki tien' len iwien ilole.

### *Pɔl te Trowas ya du ni*

<sup>7</sup> \*Saba ya daali ya tajuɔku nε ti taan' tí ji Yonbdaan ya jier, nε Pɔl cin' ki tòkeh binib Uwien ya gber. Ní faa' la, u li bure ma nnò nε u tòke' bε tù ki tí baa' kuyɔku ya siik. <sup>8</sup> Ti taan' lidutɔtuɔl liba ya paaki ya duku ni nε. Ifr yebe kuduku nnò ni. <sup>9</sup> Unacenfaan uba kε lidutɔtuɔl nnò ya dutaaku ya dubonl bo, bi yih wò Etikus. Pɔl tòke' tigber ki wuòke' ma nnò nε migùonm ñònde' unacenfaan nnò u gùon' ki gbòkre', nε ki cere' ki lu' tingi. Bi jiiere' bε ní fin wò ki laa' u kpo'-a! <sup>10</sup> Nen saan nε Pɔl jiiere' ki bùon' ki yuure' wò, nε ki tòke' bε ki ye: «Cuo men ni'ba, wa kpo'.» <sup>11</sup> Pɔl liebe' ki don' kuduku nnò ya paaki nε ki gbiire' Yonbdaan ya jier bi jin', nε u tí tòke' bε tigber ki wuòke'. Ní tí tuo mifaam, nε u bure'. <sup>12</sup> Bi tuke' unacenfaan nnò ní u fuobe nε unil kε ya yεnm duon'.

### *Pɔl ñen' Trowas ki jon' Mile*

<sup>13</sup> Tinbi kɔn' buñercienbu, ki liere' usen ki bure' Asos ya du bó. Pɔl ye ti li taa wò buñercienbu ni nen bó nε, kimε u là yíe wò ní cuon nε kí jo ni'bó. <sup>14</sup> U tí tu' tε Asos ni, nε ti taa' wò buñercienbu nnò ni ti bure' Mitilenn ya du bó. <sup>15</sup> Ti siere' ni'saan ki bure', ní ñmòñmòbe ki tí faa' ki laa' ti gaake Kiyò ya dekl nε. Kutaaku faa' nε ti baa' lidektɔl saan, bi yih lε Samòs, kutaaku tí liebe' ki faa' nε ti baa' Mile ya du ni. <sup>16</sup> Kimε Pɔl ña yíe wò ní wuòke Asi ya tinfenm ni nε ki lòke' Efes ya du. U là benh wò ní baa Yerusalem tonm nε, ki maaleh ní tuo' la, wò ní baa len \*Pantekot ya nacenku ya daali.

### *Pɔl cèbe' Kristo ya taanl là te Efes ni nnò ya cienb*

<sup>17</sup> Pɔl te Mile ya du ni, nε ki sɔn' ki yin' \*Kristo ya taanl ya cienb bà te Efes ya du ni nnò. <sup>18</sup> Bi baa' u'saan uyo wà nnò, nε u tòke' bε ki ye: «Kí ñε lidaali là n'taal tε Asi ya tinfenm ni nnò, ninbi nε ben n là fuobe nin nε idaan kε ma bo. <sup>19</sup> N jiin' n'ba tingi nε ki sɔn' Yonbdaan ya tuonl nin tinunsiir, ki jin' ijend, kimε \*Sufmbε biba là kpaan' iye bε ní li teh nni nà bre

\* 20:5 Liike 16:10.

nε. <sup>20</sup> N tǎke' nε \*Yesu ya gber binib taakeh nà saan nin ni'den ka bǎle' nε tigber tà kε li tore nε. <sup>21</sup> N tǎke' \*Sufmbε nin bà ɲa yé \*Sufmbε ki ye bε rí lèbre bi'tetem kí paan Uwien ya sɛn bo, kí teke Yonbdaan \*Yesu kí ji. <sup>22</sup> Fɛnfɛnnɔ min nε te usɛn ni ki joh Yerusalem nɔ. \*Uwien ya Fuoñaanm nε wǎbn' nni rí jo. Ma ben nà li tǐ tu nni ni'bó. <sup>23</sup> Ama n nín ben ki ye \*Mifuoñaanm tǎkeh nni idu kε ni ki teh bi li tǐ lòle nni ni'bó, kí jènde nni mɔ. <sup>24</sup> Ama min ɲa nín tǎngɛh n'miel tɛn len nε yé n'bo nibonmònn. N yíe rí sǎn ki tǐ baa' n'tuonl ya bien nε. N yíe rí tien Yonbdaan \*Yesu ye rí tien nà nnɔ nε. Nɛn si: rí tǎke binib Uwien ya juokm ya gbɛmɔnmɔnt.

<sup>25</sup> «N là cuonh ki tǎkeh ninbi bà kε Uwien ya bɛl ya gber nnɔ, n ben ki ye na ji li lε nni. <sup>26</sup> Nɛn bo nε n tǎkeh nε dinnɔ wuɔ ki teh ni'ni wà kε kpo' ki juore' fɛnfɛnm la, na ñɛn' min, <sup>27</sup> kimε n tǎke' nε Uwien yíe nà kε, ka bǎle' nε niba. <sup>28</sup> Li ɲuuke mɛn ni'ba mɔnmɔnm, kí li ɲuuke binib bà \*Mifuoñaanm guun' nε bε nnɔ mɔ mɔnmɔnm. Li likeh bε mɛn. Bi yé Uwien ya taanl nε. U taa' u'Bijε ya sɛm nε ki dɛ' lè. <sup>29</sup> N ben ki ye n bure' la, binib li kɔ ni'ni, kí li bre tɛn ikɛr, kí li nuunh bε rí bere litaanl nnɔ, kí tien li'nib nà bre ka rí lǎkre uba mɔnɔn. <sup>30</sup> Bitonnɛndɛnb li ñɛ ninbi mɔnɔn ni kí lɛre binib bà teke' \*Yesu ki jin' nnɔ bε rí wiε u'sɛn kí paan ben bo. <sup>31</sup> Nɛn bo, la gɔh mɛn, kí li tien kí ye ibin ita sɔ n gbierɛh ni'ni wà kε nin tinunsiir nε ñɔnku nin wien ni.

<sup>32</sup> «Fɛnfɛnnɔ n taa' nε ki ɲukn' Uwien; ki tǎkeh nε ki teh ní tiere Uwien ya juokm ya gber bó. Tigber nnɔ ɲmǎbe mituɔm, ki li cère ní li faa mitekjim ni, ki li de nε lifaal là u bonde' lè ki ble' binib bà kε yé u'yaab nnɔ. <sup>33</sup> N là te ni'saan ma nnɔ, ma binbe' uba ya likbu ki niireh nin u'wɛngolkaar. <sup>34</sup> Ninbi mɔnɔn ben ki ye n ya nǎjε bo nε min nin n'tǎntǎknlieb là fuobe. <sup>35</sup> N tuu ki sǎnh ki wǎngɛh nε ki teh ni'mɔ rí li sǎnh nin inunmón ɲɔ kí li toreh bijiinb, kí li tien Yonbdaan \*Yesu mɔnɔn là len' liñǎbonl là ki ye: «Wà dienh ya yɛnm sɔngɛ ki cɛn' wà teknh nnɔ.»

<sup>36</sup> Pǎl len' ki tǐ gben', nε wɔn nin ben kε gbaan' nε u kàare'. <sup>37</sup> Nɛn saan nε bi'kε cin' ki muɔh ki joh ki tǐ lǎkndeh Pǎl. <sup>38</sup> Bi'yɛnm tùare' ki saa' u len' liñǎbonl là ki ye ba ji li lε wɔ nnɔ bo nε, nε ki pǐere' wɔ, wɔ rí tǐ kɔ buñɛrciɛnbu.

## 21

### *Pǎl doh Yerusalem bó*

<sup>1</sup> Ti cèbe' bε ma nnɔ nε ki kɔn' buñɛrciɛnbu, ki bure' ki cubn' ki tǐ baa' Kɔs ya dekl; wienle daali nε ti baa' Lod ya dekl, ki ñɛn' nɛn saan ki bure' Patara ya du bó. <sup>2</sup> Ti laa' ni'saan buñɛrciɛnbu buba bù fih bù rí bure Fɛnisi ya tinfɛnm bó, nε ti kɔn' bù ki bure'. <sup>3</sup> Ti joh ki tǐ likeh Ciip ya dekl ti'nun bó, nε ki ɲmiεke' lè unǎgɛn bó, ki cubn' Siri ya tinfɛnm bó, ki tǐ baa' Tir ya du ni. Bi li ñɛn ituk buñɛrciɛnbu nnɔ ni nɛn saan nε. <sup>4</sup> Ti laa' binib bà teke' \*Yesu ki jin' udu nnɔ ni, nε ki tien' bi'saan iwien ilole. \*Mifuoñaanm cère' bi tǎke' Pǎl ki ye u la dùo Yerusalem bó. <sup>5</sup> Iwien ilole nnɔ gèbre' ma nnɔ, nε ti liεbe' ki bure'. Ti joh tí kɔ buñɛrciɛnbu, nε ben nin bi'puob nin bi'bumu kε pǐere' tε ki ñɛn' udu nnɔ ni. Ti'kε gbaan' miñunciɛnm nnɔ ya gbaal, ki kàare', <sup>6</sup> nε ti cèbe' tǎb, ti kɔn' buñɛrbu nnɔ, nε ben liεbe' ki kun'.

<sup>7</sup> Ti kɔn' buñɛrciɛnbu mifɔrkaam Tir ya du ni nε ki tǐ baa' Tolemays ya du ni. Ti jon' ki fuonde' binib bà teke' \*Yesu ki jin' ki te ni'saan nnɔ, nε ki tien' bi'saan uwien uba. <sup>8</sup> Kutaaku faa' nε ti tí liεbe' ki bure' ki tǐ baa' Sesare ya du ni, ki jon' ki tǐ te Filip wà tǎkeh \*Yesu ya gbɛmɔnmɔnt nnɔ den. U yé bi là gènde' jɛb bilole\* bà nnɔ ya uba nε. <sup>9</sup> U là ɲmǎbe bisieɓ binan nε ba ben jɛb, ki sǎkndeh Uwien ya ñǎbon. <sup>10</sup> Ti tien' ni'saan iwenkàanke, nε \*Uwien ya ñǎbonsǎknl uba ñɛn' Sude ya tinfɛnm bó ki baa' ní bi yih wɔ Agabus. <sup>11</sup> U tu' tε ni'saan nε ki teke' Pǎl ya ningbenl, ki lòle' wɔn Agabus ya tàan nin u'nuɔ, ki len' ki ye \*Mifuoñaanm ye ma sɔ: «Udaan wà si liningbenl liε nnɔ \*Sufmbε li tǐ lòle wɔ nnɔ nε Yerusalem ni, kí taa wɔ kí ɲukn bà ɲa yé \*Sufmbε.» <sup>12</sup> Ti cii' nnɔ ma nnɔ nε tinbi nin

\* 21:8 Liike 6:5.

binib bà te ni'saan nnò gbáan' Pól ki ye u la dùo Yerusalèm bó. <sup>13</sup> Nè Pól ye: «Ni teh bè nò, ki mòmuh ki saah n'yenm-i? Min bonde' ki ghen' nè. Bi li tí lóle nni bií bi li tí ku nni Yerusalèm ni Yonbdaan \*Yesu bo mənən la, n lí li jo nè.» <sup>14</sup> Wa tuo' tí'yaam ma nnò nè tí dään' wò, ki ye: «Yonbdaan ní tien u yíe ma.»

<sup>15</sup> Tí tien' ni'saan iwenkàanke yà nnò gèbre', nè ti bonde' ki tí ghen' ki don' Yerusalèm bó. <sup>16</sup> Binib bà teke' \*Yesu ki jin' ki te Sesare ya du ni nnò ya biba mọ pìere' tẹ. Bi tuke' tẹ ki jon' uje uba den tí tí gòn', bi yih wò Minasən, u yé Ciip ya nil nè, ki pẹ Yesu ya sən bo ní wuòke'.

### *Pól baa' Yerusalèm ni ki jon' Saak den*

<sup>17</sup> Tò, tí baa' Yerusalèm ni ma nnò nè binib bà teke' \*Yesu ki jin' nnò teke' tẹ nin uyensonge. <sup>18</sup> Kutaaku faa' nè tinbi nin Pól jon' Saak den ki tí fuonde' wò. \*Kristo ya taanl ya ciénb ké mọ là taan' ni'saan. <sup>19</sup> Pól fuonde' bè ki tí ghen', nè ki tọke' bè ní'ké dokdoki kí ñe u'tuonl bo Uwien tien' nà bà ña yé \*Sufmbẹ ya siik ni. <sup>20</sup> Bi cii' Pól len' nà nnò, nè bi pèke' Uwien, ki tọke' wò ki ye: «Tí'ninjẹ, a laa'-aa! \*Sufmbẹ itur itur nè teke' \*Yesu ki jin', nè bí'ké ya nun món bè ní li boh Moyis ya yiko nè. <sup>21</sup> Bi cii' bi ye a wəknh \*Sufmbẹ bà ké te inibotọ ya du ni nnò ki teh bi la jí ní li pẹ Moyis ya yiko bo, ki la jí ní li jẹh bí'bumu ya pun, ki la jí ní li pẹ bí'yaajebok bo. <sup>22</sup> Tí li tien mila? Bí lí li cii a'baam bó nè. <sup>23</sup> Tò, á tien tí li tọke ñe nà nò. Bijeb binan biba te tí'ni, ki là pùon' lipuonl; <sup>24</sup> taa bè ní jo Uwien ya duku ni, kí tí tien tíjoknt ya ñenm ya tuərl, á pè bi lí tí taa tibont tà kí tien lituərl nnò bo, ñọ bè ní kuo bí'yur. A tien' nnò la, binib ké li bende kí ye bi lienh tà a'bo nnò ta te, kí bende kí ye a'mọ pẹ Moyis ya yiko bo nè. <sup>25</sup> Binib bà ña yé \*Sufmbẹ ki teke' \*Yesu ki jin' nnò, bèn wən, tí là maale' ki ye ní mən tí kele kugbənku nè kí tọke bè kí ye bi la ñmənɔh tətərnənt, ki la ñmənɔh wənkpil, ki la jinh sèm, ki la teh nanmaal.»

<sup>26</sup> Kutaaku tí faa' nè Pól taa' bijeb nnò, wən nin bèn tí taan' ki cin' ki teh tíjoknt ya ñenm ya tuərl nnò. Nè u kən' Uwien ya duku ya luo bo, ki tọke' utətərkẹ lidaali là bi lí tien lituərl nnò kí ghen ñọ wà ké ní de Uwien u'pum.

### *Bi cuo' Pól Uwien ya duku ya luo bo*

<sup>27</sup> Tò, bi lí tien lituərl nnò kí tí dukn iwien ilole nè. Iwien nnò tí benh yí ní ghen, nè \*Sufmbẹ bà ñen' Asi ya tinfenm bó ní nnò laa' Pól Uwien ya duku ya luo bo, ki cère' linigol kpre' Pól bo, nè ki cuo' wò, <sup>28</sup> ki wuureh ki teh: «Israyel yaabẹ, la tuo mən, uje wà sọ cuonh ní'ké saan, ki wəknh binib ké miwəknm mà saah tinbi \*Sufmbẹ nin Moyis ya yiko nin Uwien ya duku. U tuke' binib bà ña yé \*Sufmbẹ mənən, ki kən' Uwien ya duku ni, ki kuən' kù tíjoknt.» <sup>29</sup> Kimẹ bi là laa' Pól nin Trofim, wà yé Efes ya du ya nil nnò tọke udu ni ma nnò nè bi maale' ki ye Pól taa' wò ki kən' Uwien ya duku ni nè.

<sup>30</sup> Kukpiinku kpi' udu ni ní'ké saan, nè udu nnò ya nib sən' ki taan' ní, ki cuo' Pól, ki dère' wò ki ñen' Uwien ya duku ni, nè ki pək ki plin' inañuən. <sup>31</sup> Uyo wà bi nuunh bè ní ku Pól nnò, nè Erom ya Sojambẹ ya cién cii' bi ye: «Yerusalèm ké kpi' ñọ.» <sup>32</sup> I ya tään bo, nè ucien nnò taa' Sojambẹ nin sojambẹ kobk ya ciénb biba, ki tiinh ki joh linigol nnò saan. Bi laa' Sojambẹ nnò nin bí'cién ma nnò, nè bi dään' ka jí ñih Pól. <sup>33</sup> Nən saan nè sojambẹ ya cién nnò cuon' ki nək'n' Pól, ki cuo' wò, ki tọke' u'sojambẹ ki ye bè ní taa tikudəkr tule kí lóle wò, nè ki niire' Pól yé udaan wà nin u tien' bà. <sup>34</sup> Ama linigol nnò ni, biba wuureh ki lienh tuba, nè bitəb mọ wuureh ki lienh tutə. Kuwaaku nnò bo nè sojambẹ ya cién nnò ña fre' ki bende' nà tien', nè ki tọke' u'sojambẹ ki ye bè ní taa Pól kí jo bí'tonsənduku saan. <sup>35</sup> Bi tuke wò ki joh ki tí baa' kuduku nnò ya nañəkəkəl saan, nè sojambẹ tí ghen' ki yuure' wò paaki, kimẹ linigol nnò ñməbe kinunbənk nè. <sup>36</sup> Udu nnò ya nib ké pẹ puoli nè ki wuureh ki teh: «Ku wə mən! Ku wə mən!»

### *Pól len' wò ní fie u'ba Sufmbẹ saan*

<sup>37</sup> Bi ye bè ní kuən Pól kuduku nnò ni uyo wà nnò nè u niire' sojambẹ ya cién nnò Grəkmbẹ ya lenm ni ki ye: «A lí tuo kí cèbe nni ní tọke ñe líñəbonl liba-aa?» Nè ucien nnò niire' wò

ki ye: «A ciih Grekmbe ya lenm nε-εε? <sup>38</sup> Nεn mεn la, sin ηa n̄i Esipt ya je wà cère' linigol yie' ti'du ya cienb ya n̄obu bó iden yie n̄o ki tuke' binikub itur inan ki jon' kupenpelku ni nn̄o-a?» <sup>39</sup> Nε P̄al ye: «Min yé Suf nε, ki maa' Tars ya du wà te Silisi ya tinfenm ni, u'yel kpére' nn̄o ni, ki yé len ya nil. A tuo' la, á cèbe nni n̄i len nin linigol lie n̄o.»

<sup>40</sup> U cèbe' P̄al ki ye w̄o n̄i len, nε P̄al sere' linañókókól nn̄o bo, ki yuon' unuò ki ye bε n̄i ηmile, bi ηmile' cim, nε u len' bε \*Sufmbε ya lenm ni ki ye:

## 22

<sup>1</sup> «N'baambε nin n'ninjiebε, cenge mεn fenfenn̄o n li t̄oke nε tigber tà kí fie n'ba n̄o.»

<sup>2</sup> Bi cii' u lienh bi ya lenm ma nn̄o, nε bi t̄ore' ki ηmile' cim.

Nεn saan nε P̄al ye: <sup>3</sup> «N yé Suf nε, ki maa' Tars ya du wà te Silisi ya tinfenm ni nn̄o ni. Ama bi wube' nni udu wà ni s̄o. Gamaliel nε là w̄okn' nni ti'yaajeb ya yiko ya bom m̄anm̄anm. Nε n'nun là m̄on Uwien ya tuonl bo, ten ni'ke ya nun m̄on ma li'bo fenfenn̄o wuò n̄o. <sup>4</sup> N là jèndeh binib bà pε \*Yesu ya s̄en bo nε haali bi t̄i kpukeh, ki coh bijeb nin bipiib, ki l̄oh bε tikud̄okr, ki t̄i pekndeh. <sup>5</sup> Bit̄ot̄uarcienb ya cien nin \*Sufmbε ya buur ya cekl yaab li fre kí t̄oke nε kí ye n len' n̄a n̄o n̄i yé im̄on nε. Bi là kele' tigb̄ont m̄on̄on ki de' nni n̄i t̄i de \*Sufmbε bà te Damas ya du ni nn̄o, bε n̄i cèbe nni n̄i cuo binib bà teke' \*Yesu ki jin' ki te ni'bó nn̄o, kí l̄ole bε tikud̄okr kí taa bε kí baa Yerusalem ni, kí lá d̄ere bi'tub.»

*P̄al t̄oke' bε u teke' Yesu ki jin' ma bo  
(Itùon 9:1-19; 26:12-18)*

<sup>6</sup> «N là joh ki t̄i nek̄n' Damas ya du, kuwensiiku ya yo, nε kuwenwencienku kuba ci' ki n̄en' paaki bó ní, ki wende' ki yile' n'bo. <sup>7</sup> N lu' tingi ni, nε ki cii' unieke uba bó u teh: «S̄ol, S̄ol, bε tien' a jèndeh nni?» <sup>8</sup> Nε n niire' ki ye: «Yonbdaan, a yé u le daan nε?» Nε u jiin' nni ki ye: «Min Nasaret ya \*Yesu nε, a jèndeh min nε.» <sup>9</sup> Min nin bà là te nn̄o laa' kuwenwenku nn̄o ama ba cii' wà lienh nni nn̄o ya nieke bó. <sup>10</sup> Nε n tí niire' ki ye: «Yonbdaan, n li tien mila?» Nε u jiin' nni ki ye: «Fii kí jo Damas ya du ni, bi li t̄i t̄oke ηε a li tien n̄a kε.» <sup>11</sup> Kuwenwenku nn̄o wende' n'nun ni ma nn̄o, ma ji lenh, nε min nin bà t̄oke nn̄o cuo' n'nuò ki d̄ieh n t̄i baa' Damas ya du ni.

<sup>12</sup> «Uje uba là te len, bi yih w̄o Ananias. U pε Uwien ya s̄en bo m̄anm̄anm, ki boh Moyis ya yiko nε \*Sufmbε bà kε k̄o Damas ni nn̄o p̄ek̄eh w̄o. <sup>13</sup> U baa' ki sere' n'saan nε ki t̄oke' nni ki ye: «N'ninje S̄ol, likre.» Nε n p̄ok ki likre' i ya t̄aan bo ki laa' w̄o. <sup>14</sup> Nε u t̄oke' nni ki ye: «Ti'yaajeb ya Wien juò' ki ḡende' ηε, á bende u'yiem, kí le \*Yesu ugbem̄ondaan, kí cii u'nieke bó. <sup>15</sup> Kimε a li yé u'm̄onkunl nε binib kε ya nun bó, kí t̄oke bε a laa' n̄a nin a cii' n̄a. <sup>16</sup> Ji la taande, fii kí cère bε n̄i s̄ii ηε Uwien ya n̄unm, á te u'yel w̄o n̄i f̄ere ηε a'biere.»

<sup>17</sup> «Ni ya puoli bó nε n liebe' Yerusalem. Lidaali liba nε n te Uwien ya duku ni ki k̄aareh nε n̄i tien' nni tid̄ek̄nt yaam, <sup>18</sup> n laa' Yonbdaan nε u t̄oke' nni ki ye: «Fii kí n̄e Yerusalem ni tonm, kimε len ya nib ηa n̄i teke a li t̄oke bε n'gber tà nn̄o.» <sup>19</sup> Nε n jiin' w̄o ki ye: «Yonbdaan, bi b̄en ki ye min nε là joh \*Sufmbε ya t̄aan ya dur ni, ki coh binib bà teke' ηε ki jin' nn̄o, ki t̄i pekndeh, ki jèndeh bε ki gbiekeh. <sup>20</sup> Bi là kuuleh a'm̄onkunl Etienn uyo wà nn̄o, min m̄on̄on là te ni'saan, ki tuo' ki ye n̄i m̄on, nε ki gu binib bà kuuleh w̄o nn̄o ya wengolkaar.» <sup>21</sup> Nε u t̄oke' nni ki ye: «Li joh, kimε n li s̄on ηε n̄a bó f̄oke, bà ηa yé \*Sufmbε nn̄o saan.» »

*Ba kaabe' ki n̄i' P̄al kimε u yé Erom ȳo nε*

<sup>22</sup> Linigol nn̄o cenge' P̄al bó ki t̄i baa' uyo wà u ye Yonbdaan ye w̄o n̄i jo bà ηa yé \*Sufmbε saan nn̄o, nε ki cin' ki wuureh ki teh: «Gben mεn unil wuò ya gber kitink bo, kimε na kpε w̄o n̄i li fuobe.» <sup>23</sup> Nε ki t̄oreh ki wuureh, ki goreh bi'liergbenkt ki wienh, ki yiih titent ki plèh paaki ki teh kutengunku. <sup>24</sup> Nε Sojambε ya cien nn̄o t̄oke' u'sojambε ki ye bε n̄i taa P̄al kí kuon bi'duku ni, kí n̄i w̄o inalebe, kí w̄obn w̄o w̄o n̄i t̄oke u tien' bà η̄o bi wuureh u'bo n̄o nn̄o. <sup>25</sup> Bi l̄ole' P̄al, bε n̄i n̄i w̄o inalebe uyo wà nn̄o, nε u t̄oke' Sojambε kobk ya cien wà se u'saan nn̄o ki ye: «Ni ηm̄obe usen n̄i n̄i Erom ȳo, ka kpie' ki bun' w̄o tibuur ki laa' u'biil-ii?»

<sup>26</sup> Sojambε kobk ya cien nnɔ cii' nnɔ ma nnɔ nε ki jon' bi'cien nnɔ saan, ki tĩ tɔke' wɔ ki ye: «A bi ye á tien bε sɔ! Ujε nnɔ yé Erom yɔ nε.» <sup>27</sup> Nε bi'cien nnɔ jon' Pɔl saan, ki tĩ niire' wɔ ki ye: «A yé Erom yɔ nε-εε?» Pɔl tuo'. <sup>28</sup> Nε ucien nnɔ ye: «Min pèn' ilike ì yebe nε ki yaan ki kpɛnde' Erom ya nil.» Nε Pɔl ye: «Bi maa' min n yé Erom ya nil nε.» <sup>29</sup> Pɔl len' nnɔ ma nnɔ nε bà bi li ñĩ wɔ kí wɔbn wɔ wɔ ñ len nnɔ sule' ki sere' i ya tãan bo. Uciεn nnɔ bende' ki ye u lòle' unil wà nnɔ yé Erom yɔ ma nnɔ nε bujεwaanbu cuo' wɔ.

### *Sufmbε ya buur ya cεkl yaab bun' Pɔl tibuur*

<sup>30</sup> Tɔ, sojambε ya cien nnɔ yíε wɔ ñ tũre kí bende \*Sufmbε biindeh Pɔl nibonn ná bo ma nnɔ, kutaaku faa' nε u lore' Pɔl, ki cère' bitɔtuɔrcienb nin \*Sufmbε ya buur ya cεkl yaab kε taan', nε u cère' Pɔl baa' ki lá sere' bi'nun bó.

## 23

<sup>1</sup> Pɔl caan' tibuur ya cien nnɔ bo inun nε ki ye: «N'yaabε, n ben n'yεnm ni ki ye ma ηmɔbe biil Uwien ya nun bó haali nin fεnfεnnɔ.» <sup>2</sup> U len' nnɔ ma nnɔ, nε bitɔtuɔrcienb ya cien Ananias tɔke' bà se ki nεke Pɔl nnɔ ki ye bε ñ ñĩ u'ñɔbu bó nε bi ñĩ'. <sup>3</sup> Nεn saan nε Pɔl tɔke' wɔ ki ye: «A yíε a li mɔn binib ya nun ni nε, Uwien nε li ñĩ sin. A kε niε saan ki ye a buh nni tibuur ti'yiko ye ma bo nε, nε ki kende' \*yiko bugben bo ki ye bε ñ ñĩ nni.» <sup>4</sup> Nε binib bà te ni'saan nnɔ tɔke' Pɔl ki ye: «A sukreh bitɔtuɔrcienb ya cien sɔ-ɔɔ?» <sup>5</sup> Nε Pɔl ye: «Weee! N'yaabε, ma ben ki ye u yé bitɔtuɔrcienb ya cien. N bi ben la, ma bi li len nnɔ, kime ñĩ kεle' \*Uwien ya gbɔnku ni ki ye: «Ña ñ len a'ɔdu ya cien fεnfεnm.» »

<sup>6</sup> Tɔ, Pɔl ben ki ye bi'ni biba yé Saduseyεnmbe nε, bitɔb mɔ yé Farisienmbε. Nε u wuure' tibuur ya cεkl yaab nnɔ ya siik ni ki ye: «N'yaabε, n yé Farisien nε, nε n'baa mɔ yé Farisien. N ηmɔbe lidendɛnl ki ye bitenkpiib li mεkre. Lidendɛnl nnɔ bo nε, bi buh nni tibuur.» <sup>7</sup> U len' nnɔ u'ñɔbu ηa lu', nε Farisienmbε nin Saduseyεnmbe cin' ki findeh nin tɔb, nε linigol nnɔ bore' mile. <sup>8</sup> Saduseyεnmbe ben, maaleh ki teh tenkpiib ηa ñ mεkre, Wien ya tondb ηa te, ciiku mɔ ηa te, ama \*Farisienmbε ben teh ni'kε te nε. <sup>9</sup> Bi biε findeh nin tɔb, ki ηmɔbe kuwaaku ki gbien', nε \*Yiko ya wɔnwɔknb ni bà yé \*Farisienmbε nnɔ ya biba fii' ki sere' ki len' ufaa bo ki ye: «Ta laa' ujε wuɔ ya biil. Nba la, Uwien ya tond bii niba nε len' nin wɔ.» <sup>10</sup> Ifinfinde nnɔ brikreh ki joh ma nnɔ, Sojambε ya cien nnɔ fεnge bi la lá dεre kí tɔnde Pɔl nε ki tɔke' u'sojambε ki ye bε ñ jire kí jo kí tĩ ñen Pɔl bi'ni, kí jiin bi'duku ni.

<sup>11</sup> Ni'daali ya ñɔnku nε Yonbdaan baa' Pɔl saan, ki tɔke' wɔ ki ye: «Cuo a'ba. A tɔke' binib n'gber Yerusalem ni ma bo nnɔ, a li tĩ tɔke tũ nnɔ nε Erom ya du ni mɔ.»

### *Sufmbε kpaan' iyε bε ñ ku Pɔl*

<sup>12</sup> Kutaaku faa' nε \*Sufmbε biba taan' ki kpaan' iyε ki pole' ki ye ba ku' Pɔl la, ba ñ ji ka ñ ñu mɔ. <sup>13</sup> Binib bà kpaan' iyε nnɔ gèbre' pinan. <sup>14</sup> Bi jon' bitɔtuɔrcienb nin \*Sufmbε ya cienb saan, ki tĩ tɔke' bε ki ye: «Ti pole' ki ye ta ku' Pɔl la, ta ñ ji bonn. <sup>15</sup> Fεnfεnnɔ ninbi nin \*Sufmbε ya buur ya cεkl yaab tuo' la, ñ sɔn unil wɔ ñ jo Sojambε ya cien saan kí tĩ tɔke wɔ kí ye wɔ ñ cère Pɔl ñ baa ni'saan, ñ tũre kí fiin u'gber. Tinbi bonde' ηɔ tí ku wɔ, wa ñ baa niε saan.»

<sup>16</sup> Pɔl ya ninse ya bijε cii' bi bonde' ma bo, nε ki jon' Sojambε ya tonsɔnduku bó, ki tĩ kɔn' ki tɔke' Pɔl. <sup>17</sup> Nεn saan nε Pɔl yin' Sojambε kobk ya cien uba, ki tɔke' wɔ ki ye: «Piεre unacien wuɔ ni'cien saan, kime u ηmɔbe tigber tuba wɔ ñ tɔke wɔ.» <sup>18</sup> Nε sojambε kobk ya cien nnɔ taa' wɔ ki jon' bi'cien nnɔ saan, ki tĩ tɔke' wɔ ki ye: «Lipekl ya nil Pɔl nε yin' nni ki tɔke' nni ki ye ñ piεre unacien wuɔ a'saan, u ηmɔbe tigber tuba wɔ ñ tɔke ηε.» <sup>19</sup> Sojambε ya cien nnɔ cuo' unacien nnɔ ya nuɔ bi jende', nε u niire' wɔ ki ye: «A yíε á tɔke nni bε ya gber-i?» <sup>20</sup> Nε u ye: «\*Sufmbε biba bonde', ki ye bi li tɔke ηε kí ye á wun taa Pɔl ní tibuur ya cienb saan, ηɔ bε ñ tũre kí fiin u'gber. <sup>21</sup> Bi tɔke' ηε la, a la tuo, kime bijεb bà nuunh bε ñ gùbn usen bó kí ku Pɔl nnɔ gèbre' pinan. Bi pole' ki ye ba ku' Pɔl la, ba ñ ji ka ñ ñu



mə. Fɛnfɛnnə bi bonde' ki gben'-a, bi ji cengeh sin bó nɛ.» <sup>22</sup> Nɛ Sojambɛ ya ciɛn nnə təkɛ' unacien nnə ki ye: «La təkɛ nil kí ye a təkɛ' nni tigbɛr tù nə», nɛ ki cɛrɛ' u bure'.

### *Bi taa' Pəl ki jon' gobina Feliks saan*

<sup>23</sup> Sojambɛ ya ciɛn nnə yin' sojambɛ kobk ya ciɛnb ni bile ki təkɛ' bɛ ki ye bɛ ní taa Sojambɛ kobiile nin bitɛnjɛkb pilole nin sojambɛ bà bukeh ikpaan nnə kobiile, bɛ ní bonde kí lá bure kuñanku tikur tuwɛ ya yo Sesare ya du bó. <sup>24</sup> Ní bonde itaan mə kí taa Pəl kí jo gobina Feliks saan, wə ní ñɛ caabu, niba la tien wə. <sup>25</sup> Sojambɛ ya ciɛn nnə kɛlɛ' kugbɔnku bɛ ní tɪ de gobina Feliks. U kele' ki ye:

<sup>26</sup> «Min Klod Lisiyas nɛ fuondɛh sin uciɛn, gobina Feliks. <sup>27</sup> \*Sufmbɛ là cuo' uɟɛ wuɔ ki bɛnh bɛ ní ku wə nɛ. N cii' u yé Erom yə ma nnə nɛ n taa' Sojambɛ ki tɪ fie' wə bi'saan. <sup>28</sup> N là yíe ní bɛndɛ bi biindɛh wə bà bo ma nnə, nɛ ki taa' wə ki jon' \*Sufmbɛ ya buur ya cɛkl yaab saan. <sup>29</sup> Bi bun' wə tibuur, nɛ n bɛndɛ' ki ye bi biindɛh wə bi'yiko bo nɛ. Ma laa' u tien' nà, nɪ kprɛ bɛ ní ku wə bii bɛ ní pɛkn wə. <sup>30</sup> N cii' bi ye \*Sufmbɛ kpaan' iyɛ bɛ ní bɔlɛ kí ku wə ma nnə nɛ n cɛrɛ' bi taa' wə i ya tãan bo ki baa' a'saan, ki təkɛ' binib bà biindɛh wə nnə ki ye bi'mə ní jo a'saan, kí tɪ təkɛ ɟɛ bi biindɛh wə bà bo.»

<sup>31</sup> Tə, Sojambɛ nnə paan' bi'ciɛn təkɛ' bɛ nà nnə bo, nɛ ki taa' Pəl kuñanku ki jon' Antipatis ya du bó. <sup>32</sup> Kutaaku faa' nɛ Sojambɛ bà cuonh tingi ni nnə liɛbɛ' bi'duku bó, nɛ bitɛnjɛkb nnə gɛbrɛ' nin Pəl ki joh Sesare ya du bó. <sup>33</sup> Bi tɪ baa' ki taa' kugbɔnku nnə ki de' gobina Feliks, nɛ ki taa' Pəl mə ki ɟukn' wə. <sup>34</sup> Gobina nnə kaan' kugbɔnku nnə ki gben', nɛ ki niirɛ' Pəl ki ye «A yé mi lɛ tinfɛnm bɛ yə nɛ?» Nɛ Pəl ye: «N yé Silisi yə nɛ.» U cii' u yé Silisi yə ma nnə, <sup>35</sup> nɛ u təkɛ' wə ki ye: «Binib bà biindɛh ɟɛ nnə mə baa' ní la, n li cenge a'gbɛr.» Ki cɛrɛ' u te ubɛr Herod là mɛn' kubɛrduku kùa nnə ni, nɛ bi gu wə.

## 24

### *Sufmbɛ biin' Pəl*

<sup>1</sup> Iwien ɪɟun gɛbrɛ', nɛ bitɔtuɔrciɛnb ya ciɛn Ananiyas baa' Sesare ya du ni nin \*Sufmbɛ ya ciɛnb biba nin lɔya uba bi yih wə Tɛtulus. Nɛ bi biin' Pəl gobina Feliks ya nun bó. <sup>2</sup> Bi yin' Pəl u baa' nɛ Tɛtulus cin' ki biindɛh wə ki teh: «Uciɛn Feliks, sin bo nɛ ti ɟmɔbɛ uñakpaan ki tɪ gben' kí ñɛ a laa' miyɛnfuom mà ki tuke' milèbrm ki baa' ti'du wuu ni nnə. <sup>3</sup> Ti lɛnh a teh mimɔnm mà uyo kɛ ni'kɛ saan, nɛ ki faareh ɟɛ. <sup>4</sup> Ma yíe ní len kí wuɔkɛ kí ɟaabe a'yɛnm. Nɛn bo, n gbáanh ɟɛ a'nimɔnt bo, á cenge ti'bo waamu. <sup>5</sup> Ti sekn' ki laa' uɟɛ wuɔ yé unibiɛrɔ nɛ. U kpɪindɛh \*Sufmbɛ bà kɛ te uɟɛndun wuu ni nɛ, ki cɛrɛh bi teh fɛnfɛnm. Wɔn nɛ yé licɛkl là pɛ Nasaret ya \*Yesu ya sɛn bo nnə ya ciɛn. <sup>6</sup> U là bikn' wə ní kuɔn Uwien ya duku tijɔknt mɔnɔn nɛ ti cuo' wə. [Ti là yíe tí bu wə tibuur ti'yiko ye ma bo nɛ. <sup>7</sup> Nɛ Sojambɛ ya ciɛn Lisiyas baa' ki lá taa' ufaa ki fie' wə ti'saan, <sup>8</sup> ki təkɛ' binib bà biindɛh wə nnə ki ye bɛ ní jo a'saan.]\* Sin mɔnɔn bun' wə tibuur la, a li bɛndɛ ti biindɛh wə bà bo.» <sup>9</sup> Sufmbɛ taan' Tɛtulus buñɔbu ki ye u len' tà nɔ tù te nɛ.

### *Pəl lienh Feliks ya nun bó wə ní fie u'ba*

<sup>10</sup> Nɛn saan nɛ Feliks yuon' unuɔ ki de' Pəl usɛn wə ní len. Nɛ Pəl ye: «N bɛn ki ye a ɟuuke udu wuu nɪ tien' ibin yà yɛbɛ, nɛn bo, n li təkɛ ɟɛ n'gbɛmɔnt nin midum. <sup>11</sup> N don' Yerusalem bó ki tɪ puke' Uwien ma na gɛbrɛ' iwien piik nin ile. A li fre kí niirɛ binib kí liike tù te bii ta te. <sup>12</sup> Nil ɟa laa' n te Uwien ya duku ni bii \*Sufmbɛ ya tãan ya dur ni bii udu ni niba saan ki findeh nin uba bii ki sureh binib bɛ ní kprɛ. <sup>13</sup> Ba ní fre kí wuɔn ɟɛ fɛnfɛnnə wuɔ nɔ bi biin' nni bà bo. <sup>14</sup> N bɛn nà sɔ ní təkɛ ɟɛ: n pɛ \*Yesu ya sɛn bo ɟɔ ní li pukeh ti'yaajɛb ya Wien mɔnmɔnm nɛ, nɛ bɛn \*Sufmbɛ lienh ki teh usɛn nnə ɟa yé sɛnmɔn. N boh nà kɛ kele' \*yiko ya gbɔnku ni nin \*Uwien ya ñɔbonsɔknɛ kele' nà kɛ nnə mə nɛ. <sup>15</sup> N ɟmɔbɛ lidɛndɛnl là nnə, bɛn mɔnɔn ɟmɔbɛ li ya dɛndɛnbaabl nɛ, ki ye Uwien

\* **24:8** Bi kpiɛ' ki kɛlɛ' tigbɔnt tà nnə ya tuba ni migbiirm 6b-8a ɟa te tu'ni.

li mækre bitenkpiib, bà mən nin bà bre ké. <sup>16</sup> Nən bo nε n tuu ki ñikndeh n la li ηmabe biil Uwien nin binib saan.

<sup>17</sup> «N tien' ibin yà yεbe ka te Yerusalem ni, nε ki liεbe' ní rí lá pu n' du ya jiiinb bupaabu, kí tũore lituərl kí de Uwien. <sup>18</sup> Nən saan nε bi laa' nni n te uyo wà Uwien ya duku ya luo bo ki teh tijoknt ya ñenm ya tuərl nnə. Ba laa' nni nin nigol, ka laa' n cère' nib mə kpre' ma. <sup>19</sup> Ama \*Sufmbε bà ñen' ní Asi ya tinfenm bó ní nnə, nε là laa' nni. Bi bi ηmabe n'bo tigber la, bεn nε bi li baa a'saan kí là biin nni, <sup>20</sup> bii bεn bà biindeh nni nə, bε rí təke ηε \*Sufmbε ya buur ya cekl yaab bun' nni tibuur Yerusalem ni ma nnə bi laa' n'biil li la? <sup>21</sup> Nba la, n là sere' bi'nun bó ma ki wuure' ki len' liñəbonl là baba ki ye: «N teke' ki jin' ki ye Uwien li mækre bitenkpiib nnə bo nε ni buh nni tibuur dinnə.» »

<sup>22</sup> Feliks bεn \*Yesu ya sən ya paanm bo ya gber mənəmnm. Nən bo nε u təke' bε ki ye: «Liεbe ní mən lidaali liba. Sojambε ya cien Lisiyas lá baa' ní la, n li liike ni' gber ya tingi.» <sup>23</sup> Nε ki təke' Sojambε kobk ya cien ki ye wə rí li gu Pəl, ki la li wəbndeh wə isen iba ni. U'yaab ye bε rí tore wə la, u la piendeh bε.

<sup>24</sup> Iwenkàanke gèbre', nε Feliks təke nin u'po Drusil ki baa' tibuur ni. U'po nnə yé Suf nε. Feliks sən' bε rí tī yin Pəl ní wə rí lá təke bε tigber tà li cère bε rí teke \*Yesu Kristo kí ji ηə bε rí cenge. <sup>25</sup> Pəl te ki lienh ki wəngēh unil li teh ma kí li cuube nin u li coh u'ba ma bo, kimε Uwien li bu binib tibuur ma nnə, nε bujəwaanbu cuo' Feliks, nε u ye: «Fenfennə á li fre kí li joh, n lá laa' mifēnm la, n li liεbe kí yin ηε.» <sup>26</sup> Feliks daan ki teh nba la Pəl li de wə ilike nε. Nən bo nε u sən h ki yih wə uyo ké bi təkeh tigber.

<sup>27</sup> Ibinñmen ile gèbre', nε gobina wà bi yih wə Pəsiyus Fəstus nnə baa' ki lá lère' Feliks ya lənl. Feliks yíe wə rí sənge \*Sufmbε ya yēnm ma nnə nε ki dāan' Pəl juore' ki paake.

## 25

### *Pəl ye ubercien Sesa nε li bu u'buur*

<sup>1</sup> Gobina Fəstus baa' Sesare ya du ni, ki tien' len iwien ita nε ki don' Yerusalem bó. <sup>2</sup> U tī baa' nε bitətuərcienb nin \*Sufmbε ya buur ya cekl yaab nnə ya sənlierb baa' u'saan, kí lá biin' Pəl, kí gbáan' Fəstus cēen, <sup>3</sup> kí ye u la yíe, wə rí ñikn kí cère bε rí taa Pəl kí baa Yerusalem ni. Kimε bi kpaan' iyε u we ní la, bε rí ku wə usen ni nε. <sup>4</sup> Nε Fəstus təke' bε kí ye: «Pəl laan biε kí te lipēkl ni nε Sesare ya du ni. Nε min mənən li liεbe kí kun i tāan yíe bo nε. <sup>5</sup> U ηmabe libiil la, cère mən ni' cienb rí paan n'bo kí tī biin wə nən bó.»

<sup>6</sup> Fəstus lii tien' Yerusalem ni iwien iniin bii iwien piik nε ki yaan ki liεbe' Sesare ya du bó. Kutaaku faa' nε u kən' kí kèle' tibuur ya duku ni kí sən' bε rí tī taa Pəl ní. <sup>7</sup> Pəl baa' ma nnə nε \*Sufmbε bà ñen' ní Yerusalem nnə guən' wə, kí biindeh wə nī bre isen yà yεbe ni, ka rí fre kí wuən kí ye bi lienh tà nnə tū te. <sup>8</sup> Pəl yíe wə rí fie u'ba nε kí len' kí ye: «Ma saa' \*Sufmbε ya yiko, ka saa' Uwien ya duku, ka bii' ubercien Sesa mə.»

<sup>9</sup> Fəstus yíe wə rí sənge \*Sufmbε ya yēnm, nε kí niire' Pəl kí ye: «A yíe á dùo Yerusalem bó bε rí tī bu ηε tibuur tigber tuu bo n'nun bó-oo?» <sup>10</sup> Nε Pəl jiiin' wə kí ye: «N li sere ubercien Sesa ya nun bó u'buur ya duku ni nε. Bi li bu nni tibuur nən saan nε. Sin mənən bεn mənəmnm kí ye ma bii' \*Sufmbε niba. <sup>11</sup> N bi bii' bii n bi tien' nibonn nà kpe mikuum la, ma bi li nuunh rí ηmēre. Ama bi biindeh nni nà bo ηa yé gbəmənt la, uba ηa rí fre kí taa nni kí ηukn bε. Ubertien Sesa nε li bu n'buur.» <sup>12</sup> Nən saan nε Fəstus nin u'gbegbierkaab taan' kí liike' tigber nnə nε u təke' Pəl kí ye: «A ye ubercien Sesa nε li bu a'buur ma nə a li jo wən saan nε.»

### *Uber Agripa yíe wə rí cenge Pəly gber*

<sup>13</sup> Iwenkàanke gèbre', nε uber Agripa nin u'ninsε Berenis təke kí baa' Sesare ya du ni, bε rí fuonde Fəstus. <sup>14</sup> Bi tien' len iden ile ma nnə nε Fəstus təke' uber Agripa Pəl ya gber kí ye: «Ujε uba te libùol liε nə, Feliks nε là pēkn' wə, u juore' kí te lipēkl ni. <sup>15</sup> N là jon' Yerusalem uyo wà nnə nε bitətuərcienb nin \*Sufmbε ya cienb baa' kí lá biin' uje bugbēn

ki ye u kpε mikuum nε. <sup>16</sup> Nε n jiin' bε ki ye tinbi Erom yaab ya tentienm ni, bi biin' unil la, ti tĩ rĩ kōle' wɔn nin binib bā biindeh wɔ nnɔ nε, wɔ rĩ cii bi biindeh wɔ bā bo, kĩ cère u'mɔ rĩ len u li len ma kí fie u'ba. Ta rĩ dεre nil ya tubl ka kpiε' ki bun' wɔ buur. <sup>17</sup> N tōke' bε nnɔ, nε bi baa' ní. Kutaaku faa' ma, ma taande', n kɔn' ki kēle' tibuur ya duku ni nε, ki sɔn' bi tĩ taa' uje nnɔ ní. <sup>18</sup> Nε binib bā biindeh wɔ nnɔ fii' ki sere' ki guɔn' wɔ ki biindeh wɔ. Min maaleh ki teh bi li biin wɔ nibonn nā bo nnɔ li bre ki tĩ kende' nε, ama na te nnɔ. <sup>19</sup> N laa' bi findeh nin wɔ nā bo nnɔ, yé bi'Wien bo ya paanm ya gber nε nin uje wā bi yih wɔ \*Yesu u kpo' ηɔ Pɔl lienh ki teh u fuobe nnɔ ya gber nε. <sup>20</sup> Ma là bεn n li tien ma tigber nnɔ. Nε n niire' Pɔl ki ye u yíe wɔ rĩ jo Yerusalem bε rĩ tĩ bu wɔ tibuur tigber nnɔ bo nεn bó-oo? <sup>21</sup> Ama u ye ubercien Sesa nε li bu u'buur. Nεn bo nε n cère' u te lipekɩ ni, kí tĩ baa lidaali là n li cère bε rĩ taa wɔ kí jo ubercien saan.»

<sup>22</sup> Nε ubεr Agripa tōke' Fεstus ki ye: «Min mɔnɔn bi yíe rĩ cenge uje bugbεn bó.» Nε Fεstus tōke' wɔ ki ye: «Wenli a li wun cenge u'ból.»

<sup>23</sup> Kutaaku faa' nε ubεr Agripa nin Berenis baa' binikpekpiεkb ya baam, ki tōke nin sojambe ya cienb nin udu nnɔ ni ya cienb, ki lá kɔn' kuducienku kua ubεr teknh binib ku'ni nnɔ ni. Nε Fεstus sɔn' bi taa' Pɔl ní. <sup>24</sup> Nε ki len' ki ye: «Uber Agripa nin ninbi bā kε te nin tε niε saan nɔ, ni likeh uje wā nɔ, \*Sufmbε kε là baa' n'saan Yerusalem ni, ki tí baa' niε saan mɔ, ki là wuureh ki teh na kpε wɔ rĩ ji li fuobe. <sup>25</sup> Min ya bùol ma laa' u tien' nā nĩ kpε kuum; ama wɔn nin u'yul ye ubercien nε li bu u'buur ma nnɔ, nε n ye nĩ mɔn rĩ jon wɔ nεn bó nε. <sup>26</sup> N yíe rĩ kele kugbɔnku kí de ubercien kí tōke wɔ Pɔl ya gber nε, ka bεn n li cinbe kí kele kí kun nā bó, nεn bo nε n taa' wɔ ki sien' ni'nun bó. N cinbe ki sien' wɔ sin ubεr Agripa ya nun bó nε, á niire wɔ u'gber nnɔ te ma bo, ηɔ n bende' n li kele kí kun nā bó. <sup>27</sup> Kimε n maale' ki ye nā mɔn rĩ cère bε rĩ taa' lipekɩ ya nil kí jo Ubercien saan ka tōke' bi biin' udaan nā bo.»

## 26

### *Pɔl len' wɔ rĩ fie u'ba Agripa ya nun bó*

<sup>1</sup> Tɔ, ubεr Agripa tōke' Pɔl ki ye: «A ηmɔbe usen á len kí fie a'ba.»

Nε Pɔl yuon' unuɔ ki cin' ki tōkeh ki teh: <sup>2</sup> «Uber Agripa, n'yεnm sɔnge cεen nin n laa' usen dinnɔ wuɔ ma rĩ len a'nun bó kí fie n'ba \*Sufmbε biin' nni mibiinm mà kε nnɔ ni. <sup>3</sup> N bεn ki ye a bεn \*Sufmbε ya tentienm kε, ki bεn bi findeh nin tɔb nā bo. Nεn bo nε n gbáanh ηε á duɔn a'yεnm kí li cengeh n li len kí ye bā.

<sup>4</sup> «\*Sufmbε kε bεn n là te ma n'nacenfεnm ni. Bi bεn haali micincinm n là fuobe ma bo n'du ya nib ni nin Yerusalem ni. <sup>5</sup> Bi bεn nni nĩ wuɔke' ki ye n yé Farisienmbε ya cεkl yɔ nε. Li ya cεkl nε boh Moyis ya yiko mɔnmɔnm ki cεn' icεktɔ. Bi yíe la, bi li fre kí kun imɔn. <sup>6</sup> N ηmɔbe lidendεnl Uwien là pùon' lipuonl là ki de' ti'yaajεb nnɔ bo nε. Nεn bo nε bi buh nni tibuur dinnɔ. <sup>7</sup> Tinbi \*Sufmbε ya baamul piik nin ile nnɔ kε pukeh Uwien nɔnku nin wien ni, nε ki daan ki ye Uwien li tien u'puonl nnɔ. Uber Agripa, li ya dεndεnl bo nε \*Sufmbε biindeh nni. <sup>8</sup> Ninbi Sufmbε, bε bo nε na teke' ki jin' ki maaleh ki teh Uwien ηa rĩ mεkre tenkpiib-i? <sup>9</sup> Min mɔnɔn là maaleh ki teh nĩ kpε, nĩ tuo' la, rĩ nĩε isen kε kí saa Nasaret ya \*Yesu ya yel nε. <sup>10</sup> N là teh nnɔ nε Yerusalem ni. Min nin n'yul là coh Uwien ya nib nε ki tĩ pekndeh, kí nĩε bitɔtuɔrcienb de' nni usen wā nnɔ bo. Bi là ye bi li ku bε la, n'mɔ se bi'ciεk bó nε. <sup>11</sup> Uyo kε n là joh \*Sufmbε ya táan ya dur ni nε ki tĩ jèndeh Uwien ya nib, ki wɔbndeh bε bε rĩ suke wɔ. N'benku ni là piebe' bi'bo ki gbien', nε n joh idu yā ηa te \*Sufmbε ya tinfεnm ni bó, ki tĩ jèndeh bε.»

### *Pɔl tōke' u teke' Yesu ki jin' ma bo*

*(Ituon 9:1-19; 22:6-16)*

<sup>12</sup> «Nnɔ nε lidaali liba bitɔtuɔrcienb de' nni usen rĩ jo kí tĩ cuo binib bā teke' \*Yesu ki jin' ki te Damas ya du ni nnɔ. <sup>13</sup> Uber Agripa, n là te usen ni ki joh Damas bó ma nnɔ, kuwensiiku ya yo nε n laa' kuwenwenku kuba nĩεn' paaki bó ní ki windeh ki cεn' uwien,

ki wende' ki yile' min nin n'tòntòknlieb bo. <sup>14</sup> Ti'kε lu' tingi ni, nε n cii' uniεke uba bó u len' \*Sufmbε ya lenm ni ki ye: «Sòl, Sòl, bε tien' a jèndeh nni? Nì bre a'bo nin á mð nin Uwien.» <sup>15</sup> Nε n niire' wò ki ye: «Yonbdaan, a yé u lε daan nε?» Nε u tòke' nni ki ye: «Min \*Yesu nε, a jèndeh min nε. <sup>16</sup> Fii kí sere, kimε n baa' a'saan, ki gènde' ηε á sòn n'tuonl nε, kí li yé n cèrè' a laa' tibont tà nò nin n lá li cèrè á lε tà nnò ya m̀nkunl. <sup>17</sup> N sòn ηε \*Sufmbε nin bà ηa yé \*Sufmbε nnò saan nε. N li cèrè bi la fre kí tien ηε niba. <sup>18</sup> Tì wende bi'nun bó, kí n̄en bε licin̄unl ni, kí cèrè bε ní li te kuwenwenku ni, kí fie bε \*Satan ya nuò ni, kí taa bε kí ηukn Uwien, ηò Uwien ní fère bε bi'biere, kí de bε lifaal là Uwien li de lè binib bà teke' min \*Yesu ki jin' ki yé u'yaab nnò.» »

### *Pòl tòke' u teke' Yesu ki jin' ki sòn' itùon yà*

<sup>19</sup> «Tò, ubεr Agripa, kí n̄en nen daali ma, ma yìe' udaan wà len' nni paaki bó tidεknt yaam nnò ya n̄òbu bó. <sup>20</sup> N kpiε' ki tòke' Damas ya du ya nib nε Uwien ya gbεr, ki tuòn Yerusalem yaab nin Sude ya tinfenm kε yaab nin bà ηa yé Sufmbε. N tòke' bε ki ye bε ní lèbre bi'tetem kí paan Uwien ya sεn bo kí sòn itùon yà ẁngεh ki teh bi m̀nbe ki lèbre' bi'tetem. <sup>21</sup> Nεn bo nε \*Sufmbε cuo' nni Uwien ya duku ya luo bo, ki nuunh bε ní ku nni. <sup>22</sup> Ama Uwien pi n'bo haali nin dinnò, nε ki cèrè' n yé u'm̀nkunl mubumu nin bicienb kε ya nun bó. Ma tòkeh tuba ki kende' \*Uwien ya n̄òbonsòknb nin Moyis là len' ki ye tà li tien nnò. <sup>23</sup> N tòkeh ki teh Uwien ya Nigendkε Kristo li bi li ji ijend nε, kí li yé unil wà li kpiε kí mεkre bitenkpiib ni, kí li ẁngεh \*Sufmbε nin bà ηa yé \*Sufmbε Uwien ya wenwenku.»

<sup>24</sup> Pòl lienh wò ní fie u'ba ma nnò, nε Festus len' ufaa bo ki ye: «Pòl, a yé uwaar nε. A'benciεnm nε cèrè' a waare'.» <sup>25</sup> Nε Pòl jiiin' wò ki ye: «Uciεn Festus, ma yé waar. N lienh tigbεm̀nt nε, na yé waarlenm. <sup>26</sup> Uber Agripa bεn tigber nnò. Nεn bo nε n laa' lifèl ki lienh u'nun bó. N bεn ki ye tigber nnò tuba ηa luòn' wò, kimε tigber nnò ηa là tien' balm ni. <sup>27</sup> Uber Agripa, a teke' \*Uwien ya n̄òbonsòknb là len' nà nnò ki jin'-ii? N bεn ki ye a teke' ki jin'.»

<sup>28</sup> Nε Agripa niire' Pòl ki ye: «Nì sien' waamu nε á sure nni ní tien Kristo yò.» <sup>29</sup> Nε Pòl ye: «N kàareh Uwien tuo' la, nì yé fenfenno bii uyo uba nε la, sin nin binib bà kε cengeh n'bo nnò, ní tien \*Kristo yaab ten min nε. Ama ma yíe bε ní lòle nε tikudòkr ten min.»

<sup>30</sup> Nε ubεr Agripa nin gobina Festus nin Berenis nin binib bà kε te kuducenciεnku kùa ubεr teknh binib ku'ni nnò fii', <sup>31</sup> ki n̄eh nε ki tòkeh tób ki teh: «Ujε wuò ηa tien' nà kpe kuum bii pekł.» <sup>32</sup> Nε Agripa tòke' Festus ki ye: «Ujε bugbεn ηa bi ye uberciεn Sesa nε li bu u'buur la, ti bi li fre kí wiε wò.»

## 27

### *Bi taa' Pòl ki bure' Erom ya du bó*

<sup>1</sup> Tò, bi tòke' ki ye ti li jo Itali bó ma nnò, nε bi taa' Pòl nin lipεkl ya nitòb ki de' Sojambε kobk ya ciεn uba bi yih wò Juliyus. U te sojacεkl là ni nnò ya yel si «Uberciεn ya Sojambε nε.» <sup>2</sup> Buñerciεnbu buba là te ki yé Adramiti ya du ya n̄erbu, ki joh Asi ya tinfenm bó, nε ti kòn' bù ki bure'. Tinbi nin ujε uba nε là tòke bi yih wò Aristak. U yé Maseduonn ya tinfenm ya nil nε, ki kò Tesalonik ya du ni. <sup>3</sup> Kutaaku faa' nε ti baa' Sidòn ni. Sojambε ya ciεn Juliyus ηuuke Pòl nin tinim̀nt ma nnò nε ki cèbe' wò, wò ní jo u'jotieb saan bε ní tì teke wò kucènku. <sup>4</sup> Ti siere' ni'saan ki joh, kutafaaku tobreh tε ma nnò, nε ti likn' Ciip ya dekl ki nuòn lè, <sup>5</sup> ki tì puore' miñunciεnm mà nuòn Silisi nin Panfili ya tinfenm nnò, nε ki tì baa' Lisi ya tinfenm ya du uba ni bi yih wù Mira. <sup>6</sup> Nεn saan nε Sojambε ya ciεn nnò laa' Aleksandri ya du ya n̄erciεnbu buba, bù joh Itali ya du bó, nε u cèrè' ti kòn' bun.

<sup>7</sup> Ti là tien' iwenkàanke nε ki jènjèndeh ki tì nεkn' Kinid ya du. Tì n̄erbu là joh sosuo nε, kimε kutafaaku là tobreh tε nε, nε ti wiε' ti bi cuube nà bó nnò, ki cubn' Salomone ki tì linde' Krεt ya dekl, ki nuòn lè. <sup>8</sup> Ti kpàakeh miñunciεnm nnò nin ijend nε, ki ηmòηmòbe ki tì baa' libùol liba saan bi yih lè «ñersienbòm̀nm̀nl», ni'saan ηa fòke nin Lase ya du.

<sup>9</sup> Ti wuàke' usen ni ne \*Sufmbε ya ñólòle ya yo tí gèbre'. U ya yo gèbre' la, uñerkure ji ñmàbe kinunbànk ne. Nen bo ne Pól gbriere' be ki ye: <sup>10</sup> «N'jòtiebε, n likeh ma nà, ti biε ki joh nin buñerbu buu la, kinunbànk li tu tε, ne na yé buñerbu baba ne li saa ituk ní ñende, tinbi binib mánòn te len.» <sup>11</sup> Ama Sojambε ya ciεn nnò du uñerdaan nin uñerkurl bo ki cen' Pól len' nà nnò. <sup>12</sup> Ne ñersienbùol nnò mọ ña mán nil ní li te ni'saan tiwərcient ya yo ma nnò, bà yebe ye ní mán be ní bure ne, ní tuo' la, be ní baa Kret ya ñersienbùol bi yih ni'saan Feniks. Nersienbùol nnò ñmàbe kəkàbùon ile ne. Liba te nintuàli bó ugen bó, litól te nintuàli bó ujie bó. Bi yíe tiwərcient nnò ya yo kí ε bi te nen saan ne.

### *Kutafaabiiku fii' miñuncienm bo*

<sup>13</sup> Kutafaaku kuba ñen' ugen bó ní, ka faa ne bi ye bi bi maale' nà nnò li tuo, ne ki lore' buñercienbu nnò ki bure', ki kpàakeh Kret ya dekl. <sup>14</sup> Ama bi bure' ma, na taande' ne kutafaabiiku kuba fii' lidekl nnò bó ní ki yile' bi'bo bi yih kù «Lenpuoli ya jie bó ya tafaaku». <sup>15</sup> Kutafaaku nnò yile' buñerbu nnò bo ma nnò bua ji li fre kí tuobe kù. Kù pe' tε ki càn', ne ti cère' buñerbu nnò paan' ku'bo. <sup>16</sup> Ti jójoh ki tí likn' lidekl liba, bi yih lè Koda, ne ki ñikn' ki yuure' ti'ñercienbu diéh buñerwawaabu bùa nnò <sup>17</sup> ki kpïen' buciεnbu ni. Ne biñerkurb taa' iñmi ki lòle' ki pònphàn' ki cuo' buciεnbu nnò ya tingi. Bi là fenge nba la, buñerbu nnò li tí yèke litengbil là bi yih lè Sirt\* nnò ne. Nen bo ne bi taa' nà co buñercienbu bù la joh tontonm nnò ki jòn' bu'bo ki cùun' miñunm ni, ki cère' bù paan' kutafaaku bo. <sup>18</sup> Kutaaku tí faa' ki laa' kutafaaku biε ki joh ki faa, ki jèngèh buñercienbu, ne bi ñen' ituk iba ki wie' miñunm ni. <sup>19</sup> Wienta daali ne biñerkurb ñen' buñercienbu bugben ya went tuba mọ ki wie' miñunm ni. <sup>20</sup> Ti tien' iden yà yebe ka laa' wien, ka laa' ñmaabii mọ. Kutafaaku nnò lí biε ki faa ne. Ta ji daan ki ye ti li ñmère.

<sup>21</sup> Tò, ní wuàke' binib bà te buñercienbu ni nnò ña jin' niba. Nen saan ne Pól fii' ki sere' bi'nun bó ki tàke' be ki ye: «N'jòtiebε, ni bi là tuo' n'ñòbu bó, ka siere' Kret ya dekl ni la, kinunbànk kie ña bi li tu tε, tibont mọ ña bi li ñende. <sup>22</sup> Fεnfennò wuò n gbáanh ne ne, cuo men ni'ba kime ni'ni uba ña ní kpo, buñerbu baba ne li saa. <sup>23</sup> N yé Uwien ya nil ne, ne ki pukeh wò. Kuñonku kuu nò u sòn' u'tond uba n'saan, <sup>24</sup> u lá tàke' nni ki ye: «Pól, la sen jεwaanbu. A lí li sere ubercien Sesa ya nun bó ne. Uwien li juoke ñε kí cère binib bà ke te nin ñε buñercienbu ni nnò ní ñmère.» <sup>25</sup> Nen bo, n'jòtiebε, cuo men ni'ba. N teke' Uwien ki jin' ki du ki ye u li tien u tàke' nni nà nnò. <sup>26</sup> Ama kutafaaku li tuke tε kí tí gbèn lidekl liba.»

<sup>27</sup> Tò, piik nin ñonkunan sò, kutafaaku tuke tε ti te Adriyatik ya ñuncienm bo. Ní tí tuo kuyòku ne biñerkurb maale' ki ye ti nekn' liwel liba ne. <sup>28</sup> Bi yíe be ní bikn' kí liike miñunm nnò ñò ki kpε ma bo, ne ki taa' uñmi ki lòle' likuluənl liba ki wie' miñunm ni ki bikn' ki laa' ní kpε mεta pita nin ulole ne. Ti jende' ki pukn', ne bi tí bikn' ki laa' mεta pile nin uniin. <sup>29</sup> Bi fenge nba la, buñercienbu nnò la tí yèke iten ne. Nen bo ne bi lòle' ikuluənl inan ki jòn' buñerbu nnò ya puoli ki cuo' bù ki sien', ki tureh kutaaku ní faa kí tu be. <sup>30</sup> Biñerkurb nnò nuunh be ní ləkre kí ñε buñercienbu nnò ni ma nnò ne ki jiin' buñerwawaabu nnò ki pùkn' miñunm bo, ki nen' ki ye bi joh be ní tí lòle' ikuluənl ne kí jòn' buñercienbu nnò ya nun bó. <sup>31</sup> Ne Pól tàke' sojambε nin bi'ciεn ki ye: «Binib biε ñen' buñerbu buu ni la, na ní ñmère» <sup>32</sup> Nen saan ne sojambε cere' iñmi yà lùo buñerwawaabu nnò, ki cère' bù bure'.

<sup>33</sup> Ní wendeh pipi ne Pól gbáan' bi'ke be ní ñikn' kí ji tijier, ne ki ye: «Dinnò wuò nò ní tien' iwien piik nin inan sò, ni te iyenben ni ka jinh niba. <sup>34</sup> Nen bo ñikn' mən kí ji tijier, kime ní li tore ne ní ñmère. Ni'ni uba mánòn ya yul ña ní gàare» <sup>35</sup> Pól len' ki gben', ne ki taa' kpənò, ki faare' Uwien bi'ke ya nun bó, ki kuò' ki cin' ki ñmən. <sup>36</sup> Nen saan ne bi'ke cuo' bi'ba ki mọ jin' tijier. <sup>37</sup> Ti là te binib kobiile nin pilole nin biluob ne buñercienbu nnò ni. <sup>38</sup> Bi'ke jin' ki gbo', ne ki ñen' tijier tà te buñerbu ni nnò ki wie' miñunm ni ñò bù ní yuàke.

\* **27:17** Litengbil là bi yih lè Sirt nnò te Libi ya ñuncienm ni ne, ka fəke nin ñungbaal.

<sup>39</sup> Uwien puo' uyo wà nnò, biñerkurb ña bende' bi te nà saan, ama bi laa' lijaal liba miñuncienm ya gbaal. Ne bi ye nĩ tuo' la, bi li cère buñercienbu nnò rí tĩ ñe nen saan ne. <sup>40</sup> Ne ki cere' ikuluon nnò ya ñmi, ki cère' i juore' miñunm ni. Ne ki lore' tiñekurlenbent ya ñmi, ki taa' kukpelcieku kuba ki jòn' buñerbu ya nun bó paaki, ki cère' kutafaaku tureh be ki cuube miñunm nnò ya gbaal. <sup>41</sup> Bi tĩ leke' litengbil liba bo miñunm linde' lè. Buñerbu don' li'bo, ne liñeryul bubn', bua ji li fre kí jo. Ne iñungbegbel fih ki yèkreh ufaa bo ki wieleh buñerbu nnò ya juul bó.

<sup>42</sup> Sojambe nnò maale' ki ye bi li ku lipekl ya nib nnò ne ño uba la wo kí ñe kí sen kí ñmere. <sup>43</sup> Ama sojambe ya cien nnò yíe wò rí ñmien Pòl, ne ka tuo' be rí tien bi maale' nà nnò, ne ki ye bà freh ki woh nnò rí kpié kí maabe kí lu miñunm ni, kí wo kí puore. <sup>44</sup> Bà s'ien' nnò mò rí cuo idoyek bii iñeryoyól kí puore. Bi tien' nnò ne bi'ke puore' caabu.

## 28

### *Pòl te Malt ya dekl bo*

<sup>1</sup> Ti ñen' miñunm nnò ni ma nnò ne bi tóke' te ki ye bi yih lidekl nnò Malt ne. <sup>2</sup> Lidekl nnò ya nib tien' te tinimònt cèen. Utaa cin' ki niñh, tiwòr te ma nnò, ne bi sère' umu ki cère' ti'ke jebe' wù. <sup>3</sup> Pòl wore' tidòbikuont, ki lá kpien' umu ni. Umu nnò ya wòl cère' uwe ñen' tidòbri nnò ni, ki kère' Pòl ya nuò ki juore' ki juon. <sup>4</sup> Lidekl nnò ya nib laa' uwe juon Pòl ya nuò bo ma nnò, ne ki tókeh tób ki teh: «Uje wuò lí yé unikul ne. U ñmere' ka kpo' miñuncienm ni, ama ti'bul wà cuube nnò ña rí cère wò rí li fuobe.» <sup>5</sup> Nen saan ne Pòl gbe' uwe nnò, u lu' umu ni ka cii' u'luol bó. <sup>6</sup> Bi maaleh ki teh nĩ li duun ne, bii Pòl li kpo i ya tàan bo ne. Bi lilikeh nĩ tĩ wuòke', bi laa' bonn ña tien' wò, ne bi liebe' ki maale' ki ye u yé ubul ne.

<sup>7</sup> Tò, lidekl nnò ya cien uba là te bi yih wò Publiyus. U'kpàabu ña fòke nin ti te nà saan nnò. Ne u teke' te iwien ita, ki cènde' te ten ti yé u'jotieb ne. <sup>8</sup> Publiyus ya baa dò ki bun, u'gbenent ton, u juh misèm. Pòl jon' u dò nà saan nnò, ki tĩ taa' u'nuò ki paan' u'bo ki kàare' ki de' wò, ne u faake'. <sup>9</sup> Pòl tien' nnò ma nnò, ne biwientòb bà te lidekl nnò bo nnò baa' u'saan, ne u cère' bi'mò faake'. <sup>10</sup> Binib nnò seln' te cèen. Ti ye tí siere uyo wà nnò, ne bi pun' te nà ke cieke te.

### *Pòl baa' Erom ya du ni*

<sup>11</sup> Ti là tien' ni'saan inmaale ita ne, ki yaan ki kòn' Aleksandri ya ñercienbu buba ki bure' bù ñmòbe ibuleb\* ya nennenkù. Buñercienbu nnò là juore' ni'saan tiwòrcient ya yo ne. <sup>12</sup> Ti tĩ baa' Sirakus ya du ni, ki tien' len iwien ita, <sup>13</sup> ne ki ñen' len' ki nòn' miñuncienm, ki tĩ baa' Lèjiyo ya du ni. Kutaaku faa', kutafaaku kuba fii' ugen bó ní, ne ti taa' iwien ile ki baa' Pusòl ya du ni. <sup>14</sup> Ti laa' binib bà teke' \*Yesu ki jin' nnò ya biba len, ne bi gbáan' te tí tien bi'saan iwien ilole. Ti tentien' nnò ne ki tĩ baa' Erom ya du ni. <sup>15</sup> Binib bà teke' ki jin' ki te Erom ya du ni nnò cii' ti we ní ne ki tuobe' te usen bó. Biba tĩ tuobe' te Apiyus ya daak saan ne, bitòb mò tĩ tuobe' te Ticendur tuta saan. Pòl laa' be ma nnò, ne ki faare' Uwien, ne u'gbenent saake'. <sup>16</sup> Ti tĩ baa' Erom ya du ni ma nnò, ne bi de' Pòl u'duku u'ba, ki cère' soja uba gu wò.

### *Pòl tóke' Erom yaab Uwien ya gber*

<sup>17</sup> Iwien ita gèbre', ne Pòl yin' \*Sufmbe ya cienb, bi taan', ne u tóke' be ki ye: «N'yaabe, ma tien' ti'du ya nib bonn, ka saa' ti'yaajebok liba. Ama bi cuo' nni Yerusalem ni ne, ki taa' nni ki ñukn' Erom yaab. <sup>18</sup> Bi bun' nni tibuur ki laa' ma ñmòbe biil, ne bi yíe be rí taa nni kí wíe, kime ba laa' n tien' nà nĩ kpe be rí ku nni. <sup>19</sup> Ama \*Sufmbe ña tuo' be rí wíe nni ma nnò ne cère' n len' ki ye ubercien Sesa ne li bu n'buur. Na yé n yíe rí biin n'bol ya nib

\* **28:11** Ibuleb nnò yé Grèkmbé ya bule ya yel ne. Bi là maaleh ki teh yin ne gu biñerkurb miñuncienm bo. Bi yih ibuleb nnò ya liba Kastòr, ki yih lí'tò mò Polus.

nε. <sup>20</sup> N yin' nε ní lá wuɔn nε tu ya gber nε. Tinbi Israyel yaab là ηmɔbe lidendɛnl là nnɔ bo nε bi lòle' nni tikudɔkr.»

<sup>21</sup> Nε bi tɔke' wɔ ki ye: «Sude ya tinfɛnm ya nib ηa kele' a'gber gbɔnku ni ki de' tε. Ti'yo uba mɔ ηa ñɛn' ni'bó ní, ki lá tɔke' tε a'gber bii ki len' tigbɛbiert tuba a'bo. <sup>22</sup> Ama ti yíe tí cii a'ñɔbu ni nε sin bugbɛn maaleh ki teh bà, kimε ti bɛn ki ye idu kε ni, binib ηa tuonh a'cɛkl ya gber.»

<sup>23</sup> Nε bi sien' lidaali là bi li liεbe ní Pɔl saan. Ni'daali, nε bi baa' u te nà saan nnɔ, ki yebe cɛɛn. Pɔl cin' kutɛnɲaaku nε ki tɔkeh Uwien ya bel ya gber ki tĩ baa' kutaajuɔku. U ñiikeh Moyis nin \*Uwien ya ñɔbonsɔknb là kele' nà \*Uwien ya gbɔnku ni nnɔ bo nε, ki tɔkeh bε \*Yesu ya gber ki ñikndeh bε ní tuo tù. <sup>24</sup> Bi'ni biba tuo' tù, nε bitɔb yíe' ka teke' tù ki jin'.

<sup>25</sup> Bi tĩ siereh ka cii' tɔb bó ma nnɔ, nε Pɔl len' liñɔbonl liba ki ye: «\*Mifuoñaanm là cère' \*Uwien ya ñɔbonsɔknl Esayi tɔke' ni'yaajeb tigber tà nnɔ yé tigbɛmònt nε. <sup>26</sup> Mĩ là ye: «Li joh ki tĩ tɔke Israyel yaab kí ye:

Ni li tùɔre kí cenge ama na ní cii ni'tingi,

ni li tùɔre kí liike ama na ní ε,

<sup>27</sup> kimε binib nnɔ ya yul faa nε,

bi kpε' bi'tub nε,

ki pi' bi'nun,

ka yíe bi'nun ní ε,

ka yíe bi'tub ní cii,

ka yíe bε ní bɛnde ni'tingi bi'yɛnm ni,

ka yíe bε ní lèbre bi'tetem ηɔ ní buu bε.» »

<sup>28</sup> Nε Pɔl tí tɔke' bε ki ye: «Bɛnde mɛn kí ye Uwien sɔn' nni bà ηa yé \*Sufmbɛ saan nε ní tĩ tɔke bε miñmienm ya gber. Bɛn li cengeh tù.»

<sup>29</sup> [Pɔl len' nnɔ ma nnɔ, nε \*Sufmbɛ nnɔ siere' ki findeh nin tɔb ki gbiekeh.]†

<sup>30</sup> Pɔl tien' ibinɲmɛn ile nε ki te kuduku kùà u paanh ku'bo nnɔ ni, ki teknh bà kε bàareh u'saan nnɔ. <sup>31</sup> U tɔkeh binib Uwien ya bel ya gber nin Yonbdaan \*Yesu Kristo ya gber, ki ηmɔbe lifɛl ki lienh, nε uba ηa piendeh wɔ.

† 28:29 Bi kpíe' ki kele' tigbont tà nnɔ ya tuba ni migbiirm 29 ηa te tu'ni.

## Kugbɔnku kùà Pɔl kele' ki de'

### Erom yaab nnɔ

## Nà wɔngɛh kugbɔnku kuu te ma bo

Yesu ya tond Pɔl nɛ kele' kugbɔnku kuu nɔ. U yé Suf nɛ, ki maa' Tars ya du ni. U là bɛn Kujɔtiɛkpaaku ya gbɔnku ya gbɛr mɔnmɔnm nɛ, ki yé Farisiɛn, ka sè yiko ya gbɛr bo. U là jèndeh Kristo yaab cɛɛn nɛ. Nɛ ki tí lá joh Damas bó wɔ rí tí jènde ni'mɔ bó yaab. Kristo jiɛ' wɔ usɛn, ki tien' wɔ u'yɔ, nɛ u ji tɔkeh binib wɔn Kristo ya gbɛr.

Pɔl ya sɛn ya jom nta bo nɛ u kele' kugbɔnku kuu ki de' Erom yaab. Bi'ni biba là teke' Kristo ki jin' ka yé Sufmbɛ. Ama Sufmbɛ bà teke' Kristo ki jin' ki juore' ki pɛ yiko bo ya biba lienh ki teh bà ɲa yé sufmbɛ nnɔ mɔ li boh yiko nnɔ nɛ. Nɛn bo nɛ Pɔl kele' kugbɔnku kuu nɔ.

Kí cin liyul 1 kí tí baa iyul 8, Pɔl ye unisaal kɛ yé ubiɛrdaan nɛ. Nɛ yiko ɲa rí fre kí ɲɛn nil biɛre ni. Ama unil kɛ li ɲmɛre kí ɲɛ mitekjim nin Mifuoɲanm ya torm bo nɛ.

Kí cin iyul 9 kí tí baa 11, Pɔl kele' Uwien ya nib Israyɛl yaab nin Kristo yaab ya gbɛr nɛ. Kristo yaab ya tekjim te tɛn busubu nɛ. Bu'ɲaan cin' Sufmbɛ ya bùol nɛ. Ama na yé Sufmbɛ kɛ nɛ teke' Kristo ki jin'. Nin nɛn kɛ ɲɔ Uwien biɛ ki yíe bɛ nɛ ki yih bɛ u'yaab.

Kí cin iyul 12 kí tí baa 15, Pɔl wuɔn' binib li pukeh Uwien ma bo nin bi li ɲmɛ nin tɔb ma bo, ki sure' bà ya tekjim faa bɛ rí li ciɛh ki diɛnh bà ya tekjim ɲa faa nnɔ. U tí fɔre' nin ifuonde nɛ (liyul 16).

### Ifuonde

<sup>1</sup> Min Pɔl nɛ kieh nɛ kugbɔnku kuu. N yé \*Yesu Kristo ya tonsɔnl nɛ. Uwien nɛ yin' nni rí li yé Yesu Kristo ya tond, ki gènde' nni rí li kpaandeh wɔn Uwien ya gbɛmɔnmɔnt. <sup>2</sup> Uwien là pùon' tɛ ti ya gbɛmɔnmɔnt nɛ haali uyoyo, ki cèrɛ' u'ɲɔbonsɔknɔ kele' tù u'gbɔnku ni. <sup>3</sup> Tù lienh u'Bijɛ bo nɛ. U tien' u'ba unisaal nɛ bi maa' wɔ \*Dafid ya lontunku ni. <sup>4</sup> Ama \*Mifuoɲaanm bo nɛ Uwien wuɔn' ki ye u yé u'Bijɛ ki cèrɛ' u ɲmɔbe mituɔm kí ɲɛ u'mɛkrm bitɛnkpiib ni bo. Wɔn nɛ yé \*Yesu Kristo tí Yonbdaan. <sup>5</sup> Wɔn bo nɛ n laa' mijuokm ki yé u'tond, ɲɔ u'yel bo rí li tɔkeh inibol kɛ ki teh bɛ rí teke wɔ kí ji, kí li boh wɔ. <sup>6</sup> Ni'mɔ te inibol nnɔ ni nɛ, kimɛ \*Yesu Kristo yin' ni'mɔ nɛ. <sup>7</sup> N kieh kugbɔnku kuu rí de ninbi bà kɛ te Erom ya du ni Uwien yíe nɛ, ki yin' nɛ ki tien' u'yaab nnɔ nɛ. Tí Baa Uwien nin Yonbdaan \*Yesu Kristo rí juoke nɛ, kí de nɛ uyɛnduɔn.

### Pɔl nuunh wɔ rí jo kí tí fuonde Kristo yaab bà te Erom ni nnɔ

<sup>8</sup> Micincinm n li kpiɛ kí faare n'Wien nɛ. \*Yesu Kristo bo nɛ n li faareh wɔ ni'ke bo, kimɛ bi lienh uɲɛndun ni ni'ke saan ni'tekjim bó. <sup>9</sup> Wɔn Uwien wà n sɔnh nin n'fɛl kɛ ki diɛnh wɔ u'Bijɛ ya gbɛmɔnmɔnt ya tɔkm ni nnɔ nɛ yé n'mɔnkunl ki ye n tuu ki tien ni'bó n'kaare ni. <sup>10</sup> N kàareh ki miɛh wɔ uyo kɛ ki teh u tuo' la, wɔ rí de nni usɛn rí baa ni'saan nɛ. <sup>11</sup> Kimɛ n'nun mɔn rí lɛ nɛ kí cèrɛ ní lɛ \*Mifuoɲaanm ya paabu ɲɔ kí tùɔrɛ kí li faa mitekjim ni nɛ. <sup>12</sup> N len' nà nɔ ya tingi si: n baa' ni'saan la, min nin ninbi, wà kɛ rí saake u'tɔ ya gbɛnɛnt kí ɲɛ ti ɲmɔbe mitekjim ma nnɔ bo nɛ. N ya tekjim rí saake ni'gbɛnɛnt, ni'mɔ yaam rí saake n'yaar.

<sup>13</sup> N'yaabɛ, n yíe ní li bɛn kí ye n tuu ki bobndeh rí baa ni'saan nɛ, ka laan laa' bònl. N yíe n'tuonl rí cuon ni'mɔ saan tɛn lí cuon' ma inibotɔ saan nnɔ nɛ. <sup>14</sup> Ni yé liwɔbl nɛ n'bo rí tɔke binib kɛ tigbɛmɔnmɔnt, bà ya nun wende' nin bà ya nun ɲa wende', bà bɛn niba nin bà ɲa bɛn niba mɔ. <sup>15</sup> Nɛn bo nɛ n'nun mɔn rí tɔke ninbi bà te Erom ni mɔ tigbɛmɔnmɔnt nnɔ.

### Tigbɛmɔnmɔnt yé Uwien ya tuɔm nɛ



<sup>16</sup> Fε ηα ημῶβε nni tigbεmῶnmῶnt ya tῶkm bo. Tù yé Uwien ya tuῶm nε, ki li ηmien binib bà κε teke' tù ki jin': bà yé \*Sufmbε mikpiekm nin bà ηα yé \*Sufmbε mῶ. <sup>17</sup> Kimε tun nε wῶngēh Uwien ṛiikeh nà bo ki bùh binib bigbεmῶndεnb. U ṛiikeh mitekjim baba bo nε ki bùh binib bigbεmῶndεnb tεn nī kele' ma u'gbῶnku ni ki ye: «Ugbεmῶndaan li fuobe u'tekjim bo nε.»

### *Binib κε bre nε*

<sup>18</sup> Uwien wῶngēh haali paaki bó nε ki teh u'mutuol fii' binib bo. Kimε bi sῶnh itῶnbiere nε ka pε u'bo, ki piendeh tigbεmῶnt ya sεn bi'tῶnbiere nnῶ bo. <sup>19</sup> Kimε bi ben unisaal li fre kí bende nà κε Uwien bo. Wῶn Uwien nε wuῶn' bε nε. <sup>20</sup> Imῶn, haali uηendun ya cincinyo kí lá baa fεnfennῶ nῶ, nib ηα kpele ki laa' Wien nin bi'nunbu, ama bi lenh u ṛien' tibont tà nε ki bendeh ki teh u mῶnbe ki yé Uwien, ki ηmῶbe mituῶm mà ηα ηmῶbe gbenm. Nεn bo nε ba ji li fre kí ye ba ben wῶ. <sup>21</sup> Nin bi ben wῶ ma κε nnῶ, ba kpiekreh wῶ ki ye u yé Uwien, ka faareh wῶ mῶ. Ama bi juore' nin bi'yenmaalkuon nε, ka ηmῶbe yenm, ki te libῶnbῶnl ni. <sup>22</sup> Bi yih bi'ba biyεnfodεnb nε, ki nín ji yé ijῶr. <sup>23</sup> Bi dàan' Uwien wà ηα ṛi kpo ya kpiekm, nε ki lèbe' ki kpiekreh unisaal wà li kpo ya nennεnku nin inuῶn nin itāan inan ya went nin tiwεnbεlnkaar ya nennεnt.

<sup>24</sup> Nεn bo nε Uwien sεln' bε, bi pε bi'yεnm yíe nà bo, ki sῶnh tijῶknt ya tῶon, ki jindeh bi'ba ifε. <sup>25</sup> Bi taa' kutonnεnku nε ki lèbe' Uwien ya gbεmῶnt, ki pukeh tibont tà Uwien ṛien' tù, ki sῶnh itῶon ki dienh tù, ki dàan' wῶn Uwien wà ṛien' tibont nnῶ κε ki kpe kupεpεku uyo wà ηα ηmῶbe gbenm nnῶ. Ami.

<sup>26</sup> Nεn bo nε Uwien sεln' bε, bε ṛi li sῶnh ifε ya tῶon bi'yεnm yíe ma bo. Nε bi'puob teh nà ηα kpe tienm, ki dàan' miduῶnm nin bijεb, ki duῶndeh nin bi'piitῶb. <sup>27</sup> Bijεb mῶ dàan' miduῶnm nin bipiib, bi'mεnku kῶh bijεtῶb ni ki gbiekeh, nε bi teh nà ηα kpe tienm, ki yé ifε nin bi'jetῶb. Nεn bo nε bi lenh bi'yul bo ya tudεre wà kpe bi'tῶnbiere nnῶ.

<sup>28</sup> Ba tῶnge' Uwien ma nnῶ, nε u sεln' bε, bε ṛi li ηmῶbe yenmaalfεnm, kí li teh nà ηα kpe tienm. <sup>29</sup> Bi cεre' mitetem mà κε ηα mῶn ya bol nin mibiεrm nin ununfῶke nin iponponbe nin linikul nin ikῶnkῶn nin milerkjim nin iyεnmaalbiere nε yεbre' nin bε. Bi yé bitonnεndεnb nε, <sup>30</sup> ki yé bitεnfuonb, ki yé Uwien ya nennεndb, ki yé bikεlnbaandεnb, ki yíe tigbengt nin tinacenkpekuont, ki yé idukond, ka boh bi'naambe nin bi'baambe, <sup>31</sup> ki yé ijῶr, ki yé binib bà ba du bi'bo, ki yé binunkuondεnb, ka muῶh nil cεcεkm. <sup>32</sup> Bi ben Uwien sien' ki ye binib teh nnῶ la, bi kpe mikuom nε. Nin nεn κε bi tuu ki teh nnῶ nε, ka juore' nεn baba bo, ki liebe' ki saakreh binitῶb bà mῶ teh nnῶ ya gbεnεnt.

## 2

### *Uwien li bu unil κε tibuur*

<sup>1</sup> Tῶ, sin unil wà biindeh a'tῶ nnῶ, a yíe la, á li yé wà κε, a'mῶ te libiil ni nε Uwien saan. A biindeh a'tῶ ma nnῶ a biindeh a'ba nε. Kimε a biindeh wῶ nà bo nnῶ, a'mῶ teh nεn nε. <sup>2</sup> Ti ben ki ye Uwien dieh binib bà teh tu ya bont ya tub la, u ηmῶbe imῶn nε. <sup>3</sup> Sin unil wà biindeh binitῶb bà teh tu ya bont, ki mῶ teh tù nnῶ, a maaleh ki teh a li ṛie tibuur ni Uwien saan nε-εε? <sup>4</sup> Uwien tien' ηε tinimῶnt ki gbien', ki ηmῶbe a'bo lifεsῶngl nin kuminku, nε a yin' nεn κε fεnm-ii? Nε ben ki ye Uwien tien' ηε tinimῶnt ηῶ á lèbre a'tetem nε-εε? <sup>5</sup> A'yul faa, ηα yíe á lèbre a'tetem ma nnῶ, a bondeh a'ba bo Uwien ya benpiebcien nε, ki gu lidaali là u'mutuol li fii binib bo wῶ ṛi bu bε tibuur ni'donbῶ nnῶ. <sup>6</sup> Nεn daali nε u li jiin unil κε u'tῶon kpe ma bo. <sup>7</sup> Binib bà mīndeh ki sῶnh itῶon yà mῶn, ki nuunh ukpieke nin lisel nin limiel là ηα ηmῶbe gbenm Uwien saan nnῶ, Uwien li cεre ben nε ṛi li tuu ki fuobe nin wῶ. <sup>8</sup> Ama binib bà pε bi'yεnm yíe nà bo, ki wiε' tigbεmῶnt ya sεn, ki pε tibonbiert ya sεn bo nnῶ, Uwien ya mutuol li fii, u'benku ni ṛi piebe bi'bo kí gbien. <sup>9</sup> Binib bà κε teh nà bre nnῶ, ijend nin micεcεkm li lu bi'bo. Nī li lu bà yé \*Sufmbε nin bà ηα yé \*Sufmbε κε bo nε. <sup>10</sup> Ama bà κε teh nà mῶn li lε ukpieke nin lisel nin uyenduῶn. Bà yé \*Sufmbε nin bà ηα yé \*Sufmbε κε li lε nε, <sup>11</sup> kimε Uwien ηα ηmῶbe gεngεnde.

<sup>12</sup> Binib bà kɛ ɲa bɛn \*yiko ki teh nà bre la, bi li kpo, ama Uwien ɲa ní ñi \*yiko bo kí bu bɛ buur. Ama binib bà kɛ bɛn \*yiko ki teh nà bre nnɔ Uwien li ñi \*yiko nnɔ bo nɛ kí bu bɛ tibuur. <sup>13</sup> Kimɛ na yé bà bɛn \*yiko nɛ yé bigbɛm̀ndɛnb Uwien saan, ama Uwien bùh bà teh \*yiko nnɔ ye ma bo nɛ bigbɛm̀ndɛnb. <sup>14</sup> Bà ɲa yé \*Sufmbɛ, ka bɛn \*yiko ɲɔ ki teh \*yiko nnɔ ye ma nnɔ, ba bɛn ma ki teh nnɔ, bi'yɛnmaale nɛ yé bi'yiko. <sup>15</sup> Bi teh nnɔ ma nnɔ, nɛn nɛ wɔngɛh ki teh yiko ye nà nnɔ te bi'yɛnm ni nɛ. Bi'yɛnm ni bi bɛn nà mɔn nin nà bre. Nɛn bo nɛ bi'yɛnmaale biindeh bɛ uyo uba, ki teknh bɛ uyotɔ mɔ. <sup>16</sup> N tɔkeh binib tigbɛm̀nɔm̀nt tà nnɔ wɔngɛh ki teh ní lá li te nnɔ nɛ lidaali là Uwien li cɛrɛ \*Yesu Kristo ní bu binib tibuur, kí cɛrɛ bɛ ní ñɛn nà kɛ buɔ bi'fɛl ni upaan bo nnɔ.

### *Sufmbɛ nin yiko ya gbɛr*

<sup>17</sup> Tɔ, sin Suf wà lienh ki teh a yé Suf, ki du \*yiko bo baba, ki jɛbnh a'ba ki teh a bɛn Uwien, <sup>18</sup> ki bɛn u yíe nà, ki bɛn nà mɔn nin nà ɲa mɔn, kí ñɛ \*yiko bo, <sup>19</sup> ki maaleh ki teh a yé ununyaan nɛ ki diɛh ijùɔn, ki yé bà te licinñunl ni ya wenwenku, <sup>20</sup> ki wɔknh ijɔr mibɛnm, ki wɔknh mubumu, kimɛ a bɛn \*Uwien ya yiko ma nnɔ, a maaleh ki teh a bɛn tibont kɛ nɛ, ki maaleh ki teh a lienh nà kɛ nnɔ yé tigbɛm̀nt nɛ. <sup>21</sup> Tɔ, sin wà wɔknh bitɔb nɔ nnɔ, bɛ tien' ɲa wɔknh a'ba? Sin wà tɔkeh binib ki teh bi la suh nnɔ, bɛ tien' a suh? <sup>22</sup> Sin wà lienh ki teh nib la teh naɲmaal nnɔ, bɛ tien' a teh lè? Sin wà ɲa yíe á cii bule ya nu nnɔ, bɛ tien' a suh tibudur ya bont-i? <sup>23</sup> A jɛbnh a'ba \*yiko bo, ki liɛbe' ki saah wɔ ma nnɔ, a yuɔndɛh Uwien nɛ. <sup>24</sup> Kimɛ ní kele' \*Uwien ya gbɔnku ni ki ye: «Ninbi nɛ cɛrɛh inibotɔ sukreh Uwien.»

<sup>25</sup> Tɔ, a jìe' a'punl ki boh yiko la, upunjìe ɲm̀ɔbe kpɛle nɛ. Ama a jìe' a'punl ki saah yiko la, ní te tɛn ɲa jìe' nɛ. <sup>26</sup> Wà ɲa jìe' punl, boh \*yiko la, Uwien ya bùol ní te tɛn u jìe' u'punl nɛ. <sup>27</sup> Sin wà yé Suf ki ɲm̀ɔbe yiko, u kele' kugbɔnku ni, ki liɛbe' ki jìe' a'punl mɔ nnɔ, ɲa boh \*yiko nnɔ ma nnɔ, wà ɲa jìe' punl, ki boh wɔ nnɔ nɛ li bu ɲɛ tibuur. <sup>28</sup> Na yé unil wà yé Suf upaan bo baba nɛ yé Sufm̀n. Na yé wà jìe' u'punl bi'kɛ laa' u jìe' nɛ yé upunjìem̀n. <sup>29</sup> Suf ya yɛnm nɛ wɔngɛh ki teh u yé Sufm̀n. Upunjìem̀n ñɛ lifɛl ni nɛ. U ya punjìe ñɛn' \*Mifuoñaanm saan nɛ, wa ñɛn' \*yiko wà bi kele' wɔ kugbɔnku ni nnɔ. Na yé binib nɛ li pɛke wà yé Sufm̀n, Uwien nɛ li pɛke wɔ.

## 3

### *Uba ɲa te ki yé gbɛm̀ndaan Uwien saan*

<sup>1</sup> \*Sufmbɛ ya kpɛle nín si ba? Bii bi'punjìe ɲm̀ɔbe kpɛle-ee? <sup>2</sup> Ni'kɛ ɲm̀ɔbe kpɛle wà yɛbe nɛ isɛn kɛ ni, kimɛ Uwien kpìe' ki taa' u'gbɛr ki ɲukn' bɛn nɛ. <sup>3</sup> Ní ye nè ní wuɔn kí ye ba? Ní ye nè ní wuɔn kí ye bi'ni biba ɲa paan' Uwien ye ma bo la, ní li pien Uwien u la tien u ye ma bo nɛ-ɛɛ? <sup>4</sup> Na ní tien nnɔ fiebu. Binib kɛ yé bitonnɛndɛnb m̀nɔn la, Uwien wɔn tuu ki yé ugbɛm̀ndaan nɛ tɛn ní kele' ma u'gbɔnku ni ki ye:

«A'lenm ni nɛ bi li bɛnde kí ye  
a yé ugbɛm̀ndaan.

Bi bun' nin ɲɛ tibuur la,  
a li faake nin bɛ.»

<sup>5</sup> Tɔ, ní yé ti teh nà ɲa cuube ní wɔngɛh ki teh Uwien yé ugbɛm̀ndaan la, ti nín ji li len kí ye ba? Ti li ye Uwien diɛh ti'tub la, u teh nà ɲa cuube nɛ-ɛɛ? (N lienh binib lienh ma bo nɛ.) <sup>6</sup> Na te nnɔ fiebu. U teh nà ɲa cuube la, u li tien mila kí bu uɲɛndun ya nib tibuur-i?

<sup>7</sup> Tɔ, ní yé n'tonnɛnku wɔngɛh Uwien ya gbɛm̀nt ki cɛrɛh binib kpìekreh wɔ la, bɛ tien' u diɛh n'tub ki teh n yé ubiɛrdaan-i? <sup>8</sup> Tí li teh nà bre ɲɔ nè ní kpɛnde nà m̀n-ii? Binib biba sukreh tɛ ki teh ti lienh ki teh nnɔ nɛ. Bidɛnb li lɛ utudɛrɛ wà bi kpɛ wù nɛ.

<sup>9</sup> Ní ye nè ní wuɔn kí ye ba? Ní ye nè ní wuɔn kí ye tinbi Sufmbɛ, ti cɛn' binitɔb nɛ-ɛɛ? Na te nnɔ fiebu. N là wɔkn' nɛ ki ye \*Sufmbɛ nin bà ɲa yé \*Sufmbɛ kɛ te ibiɛrɛ ya yonbt ni nɛ. <sup>10</sup> Nɛn nɛ kele' \*Uwien ya gbɔnku ni. Ní kele' ki ye:

«Uba m̀nɔn ɲa te ki yé gbɛm̀ndaan,

11 uba ɲa te ki ɲmɔbe yɛnfuom,  
 uba ɲa te ki nuunh Uwien,  
 12 bi'ke dāan' u'sɛn nɛ,  
 ki taan' ki juore' fɛnm.  
 Uba mɔnɔn ɲa te ki teh nà mɔn.  
 13 Bi'niɛke yɛ tɛn itɛnkpiifɛle nɛ,  
 bi'lɛn ya tɔn si milɛrm baba nɛ,  
 Bi'ɲuɔn ɲmɔbe tilɔbr tɛn iwaalɛb nɛ.  
 14 Inɔbonbil nin miɲuɔm baba nɛ gbe bi'ɲuɔn ni.  
 15 Bi'taan ton linikul bo nɛ.  
 16 Bi'ɲɛn' nà kɛ saan la, bi saah nɛ,  
 ki kuɔndeh binitɔb micɛcɛkm ni.  
 17 Ba bɛn yɛnduɔn ya sɛn.  
 18 Ba fɛnge Wien.»

19 Tɔ, ti bɛn ki ye \*yiko len' nà kɛ nnɔ, u len' ki de' binib bà li boh wɔ nnɔ nɛ, ɲɔ uba la dule niba bo kí ye wa bi'. Nnɔ nɛ uɲɛndun ya nib kɛ li bɛnde kí ye bi ɲmɔbe libiil Uwien saan. 20 Nɛn bo nɛ unil teh \*yiko ye ma bo la, na rí cɛre Uwien rí bù wɔ gbɛmɔndaan. Yiko cɛreh binib bɛndeh nà yé ibiɛre baba nɛ.

#### *Uwien bùh binib bigbɛmɔndɛnb mitekjim bo nɛ*

21 Fɛnfɛnnɔ wuɔ Uwien ji wuɔn' u ɲɛh usɛn wà ki bùh binib bigbɛmɔndɛnb, na yé u tukndeh \*yiko ye ma bo nɛ. Yiko nin Uwien ya ɲɔbonsɔknb là juɔ' ki len' nɛn nɛ u'gbɔnku ni. 22 U bùh binib bigbɛmɔndɛnb bi'tekm \*Yesu Kristo kí ji bo nɛ. Bà kɛ teke' \*Yesu Kristo ki jin' la, u bùh bɛ bigbɛmɔndɛnb nɛ. Kimɛ bi'ke te miba nɛ. 23 Bi'ke tien' ibiɛre nɛ ki luɔ' Uwien ya kpiɛke. 24 Ama Uwien ya juokm bo nɛ u bù' bɛ bigbɛmɔndɛnb \*Yesu Kristo ya tuɔrl là dɛ' bɛ ki wiɛ' nnɔ bo. Na yé bi'nimɔnt bo nɛ. 25 Uwien taa' wɔn nɛ ki tien' lituɔrl u'sɛm bo, ki dɛ' bà kɛ teke' wɔ ki jin' ki wiɛ', ki wuɔn' wɔn Uwien ya gbɛmɔnt, ka dɛre' binib ya tub bi'biɛre bo uyo bo, 26 u là duɔn' u'yɛnm uyo wà nnɔ. Fɛnfɛnnɔ wuɔ u wuɔn' u'gbɛmɔnt ki ye wà kɛ teke' \*Yesu ki jin' nɛ yé ugbɛmɔndaan. U tien' nnɔ ɲɔ binib rí bɛnde kí ye wɔn Uwien nɛ yé ugbɛmɔndaan.

27 Ní te nnɔ la, uba biɛ ki ɲmɔbe u li jɛbn u'ba nà bo-oo? Ní yé fɛnm. Na yé binib ya tɔn bo nɛ Uwien bùh bɛ bigbɛmɔndɛnb, u bùh bɛ bigbɛmɔndɛnb bi'tekjim bo nɛ. 28 Kimɛ ti bɛn ki ye Uwien bùh unil ugbɛmɔndaan u'tekjim bo nɛ, na yé u teh \*yiko ye ma bo nɛ u bùh wɔ ugbɛmɔndaan. 29 Uwien yé \*Sufmbɛ baba ya Wien nɛ, ka yé bà ɲa yé \*Sufmbɛ ya Wien-ii? U yé bi'mɔ ya Wien nɛ. 30 Kimɛ Uwien te uba nɛ. Wɔn nɛ bùh bà yé \*Sufmbɛ nin bà ɲa yé \*Sufmbɛ bigbɛmɔndɛnb mitekjibaabm bo. 31 Ti lienh nà nnɔ, ní ye nɛ rí ye mitekjim bo \*yiko ɲa ji yé bonn nɛ-ɛɛ? Nnɔ ɲa ní! Ti wɔngeh \*yiko cinbe kí te ma bo nɛ.

## 4

#### *Uwien bù' Abraham ugbɛmɔndaan u'tekjim bo nɛ*

1 Tɔ, ti li ye ba kí taa kí jo ti'yaajɛ \*Abraham ya gɛr bo? Wɔn nin u'yul là laa' ba? 2 Ní bi yé u'tɔnmɔnmɔn nɛ cɛre' Uwien bù' wɔ ugbɛmɔndaan la, u bi ɲmɔbe u li jɛbn u'ba nà bo. Ama Uwien ya bùol na te nnɔ. 3 Kimɛ ní kele' \*Uwien ya gbɔnku ni ki ye: «\*Abraham teke' Uwien ki jin', nɛn bo nɛ Uwien bù' wɔ ugbɛmɔndaan.» 4 Unil sɔn' lituonl ki teke' nibonn la, na yé paabu, ní ye u'paaku nɛ. 5 Unil wà ɲa nuunh Uwien rí juoke wɔ u'tɔn bo, ama ki teke' wɔn Uwien wà juokeh bibiɛrdɛnb nnɔ ki jin' la, u'tekjim bo nɛ Uwien li bù wɔ ugbɛmɔndaan. 6 Nnɔ nɛ \*Dafid mɔ là pokn' binib bà Uwien bù' bɛ bigbɛmɔndɛnb, ka tukn' bi'tɔn nnɔ ya mɔnm bo. \*Dafid là ye:

7 «Binib bà Uwien fɛre' bɛ bi'biil, ki subn' bi'biɛre bo nnɔ,  
 u'mɔnm te bi'bo.

8 Unil wà Yonbdaan ɲa rí tɔnge u'biɛre nnɔ u'mɔnm te udaan bo.»

<sup>9</sup> Mimənm nno te ki de' bà jie' ipun baba ne bii mĩ te ki de' bà mə ɲa jie' ne? Tĩ liebe ní \*Abraham ya gber bo. Tĩ ye u teke' Uwien ki jin' ma nno ne cère' Uwien bù' wə ugbeməndaan. <sup>10</sup> U le yo ba ne u bù' wə ugbeməndaan-i? Uyo wà u jie' u'punl nno bii uyo wà wa laan là jie' ne? Uyo wà wa laan là jie' nno ne. <sup>11</sup> Ni ya puoli bó ne Uwien cère' \*Abraham jie' u'punl. Upunjie nno ne yé kudieku kua wəngheh ki teh \*Abraham ya tekjim bo ne Uwien bù' wə ugbeməndaan ki laa' wa laan jie' punl. Nen ne cère' \*Abraham yé binib bà ke teke' Uwien ki jin' ka jie' pun ya yaaje ɲə Uwien ní bù' bi'mə bigbeməndənb. <sup>12</sup> Binib bà jie' ipun, ka pe upunjie baba bo, ama ki tekn' \*Abraham ya taal ni, ki teke' Uwien ki jin' ten' \*Abraham là teke' Uwien ki jin' ma, ki laa' wà laan jie' punl nno, u yé bi'mə ya yaaje ne.

### *Uwien pùon' binib bà teke' wə ki jin' nno mimənm*

<sup>13</sup> Na yé \*Abraham là bon' \*yiko ne Uwien pùon' ki ye uɲəndun li yé wən nin u'yaabii ya faal, kime mitekjim bo ne Uwien bù' wə ugbeməndaan. <sup>14</sup> Nĩ yé Uwien bi pùon' ki ye uɲəndun li yé bà boh \*yiko nno ya faal ne la, mitekjim ɲa ji bi li ɲməbe kpele, lipuonl nno mə bi li juore fənm ne. <sup>15</sup> Kime \*yiko ya saam ne cèreh Uwien ya mutuol fih binib bo. Yiko ɲa te la, unil li saa wə-əə?

<sup>16</sup> Nen bo ne Uwien pùon' lipuonl mitekjim bo, ɲə lè ní li yé bupaabu, kí li kpe \*Abraham ya yaabii ke bo. Na yé li li te kí de bà pe \*yiko bo baba ne, li li te ki de' bà mə teke' Uwien ki jin' ten' \*Abraham nno ne. Kime \*Abraham yé tinbi bà ke teke' Uwien ki jin' nno ya yaaje ne. <sup>17</sup> Ten nĩ kele' ma \*Uwien ya gbənkú ni ki ye: «N tien' ɲe inibol ligol ya yaaje.» \*Abraham ne yé ti'ke ya yaaje Uwien ya nun bó. Wən Uwien ne məkreh bitenkpiib, ne ki naanh tibont nin u'ñəbon. <sup>18</sup> Nĩ là naan lipuonl nno ɲa ní tien ne. Nin nen ke \*Abraham tuu ki daan ne. U teke' Uwien ki jin' ne Uwien tien' wə inibol ligol ya yaaje. Ten nĩ kele' ma \*Uwien ya gbənkú ni ki ye: «A'yaabii li yebe ka ɲməbe fuul.» <sup>19</sup> Nĩ là sien' waamu ne wə ní le ibin kobk, ki bende' ki ye u neke mikuum, ne u'po Sara mə tonde' ki yé uɲə. Ama nin nen ke \*Abraham ya dum ɲa kùore' waamu mənən. <sup>20</sup> \*Abraham ɲa maale' milele lipuonl nno bo, u'dum mə ɲa kùore', ama u tùəreh ki faakreh mitekjim ni ne, ki kpiekreh Uwien, <sup>21</sup> ki cinbe ki ben ki ye Uwien pùon' nà nno, u ɲməbe mituəm mà u li fre kí tien nè. <sup>22</sup> Nen bo ne Uwien bù' wə ugbeməndaan. <sup>23</sup> Nĩ kele' \*Uwien ya gbənkú ni ki ye: «Uwien bù' \*Abraham ugbeməndaan.» Na yé \*Abraham baba bo ne nĩ kele' nno. <sup>24</sup> Nĩ kele' ti'mə bo ne. Ti teke' Uwien wà cère' Yonbdaan \*Yesu məkreh bitenkpiib ni nno ki jin', ne wən Uwien bù' ti'mə bigbeməndənb. <sup>25</sup> Uwien cère' wən \*Yesu ne kpo' ti'biere bo, ki cère' u məkreh bitenkpiib ni, ɲə wən bo wə ní bù' te bigbeməndənb.

## 5

### *Uwien cère' binib nin wən taan' buñəbu*

<sup>1</sup> Tə, ti'tekjim bo ne Uwien bù' te bigbeməndənb, ki cère' ti'Yonbdaan \*Yesu Kristo bo, tinbi nin wən taan' buñəbu. <sup>2</sup> Wən \*Yesu Kristo ne cère' ti laa' mijuokm Uwien saan, kime ti teke' wə ki jin'. Ti fuobe mi ya juokm ni ne ki ɲməbe lidəndənl ki jəbnh ti'ba ki teh ti li le ukpieke Uwien saan. <sup>3</sup> Na yé nen baba bo ne ti jəbnh, ti jəbnh ijend mə ni ne. Kime ti ben ti ye ijend ni ne ti lenh lifəl, <sup>4</sup> ne lifəl cèreh ti ɲməbe kuminku, kuminku mə dienh te lidəndənl. <sup>5</sup> Lidəndənl nno ɲa ní yuən te. Kime Uwien de' te \*Mifuoñaanm ma nno, men ne cèreh ti bəndeh ti'fəl ni u yie te ki gbien' ma bo.

<sup>6</sup> Imən, uyo wà ta là ɲməbe tuəm nno, ne \*Kristo teke' tinbi bibierdənb ya kuum ki kpo'. Uwien ne sien' u ya yo. <sup>7</sup> Nĩ faa nin unil ní teke ugbeməndaan ya kuum kí kpo. Nba la, uba li kaabe kí kpo unimən bo. <sup>8</sup> Ama Uwien wuən' ki ye u yie te, ki cère' \*Kristo teke' ti'kuum ki kpo' uyo wà ti laan là bie ki yé bibierdənb nno. <sup>9</sup> Fənfənnə, \*Kristo ya sèm bo ne Uwien bù' te bigbeməndənb ma nno, be li tien ɲə wa ji li ñen te Uwien ya benpiebe wà we ní nno ni? <sup>10</sup> Uyo wà ti là yé Uwien ya nennəndənb nno ne u cère' tinbi nin wən taan'

buñɔbu kí ñε u'Bijε ya kuum bo. Tinbi nin wɔn taan' buñɔbu ma nnɔ, bε li tien ηɔ ta ji li ηmεre u'Bijε ya fuobm bo? <sup>11</sup> Na yé nεn baba bo nε ti jεbnh ti'ba, ti jεbnh Uwien bo mɔ nε. Yonbdaan \*Yesu Kristo taan' tinbi nin Uwien buñɔbu fεnfennɔ ma nnɔ, nε cère' ti jεbnh.

### *Adam nin Kristo ya gber*

<sup>12</sup> Unibaab bo nε ibiere cin' unɛndun ni. Ibiere nnɔ nε tuke' mikuum ki baa', nε binib kε kpuokeh kimε bi'kε teh ibiere nε. <sup>13</sup> Kí yaan Uwien ní de Moyis \*yiko nnɔ ki laa' ibiere te nε unɛndun ni. Yiko ηa laan là te ma nnɔ, ba là tɔngɛh binib ya biere. <sup>14</sup> Ama kí ñε Adam ya yo kí tí baa Moyis ya yo mikuum jinh binib nε. Nin ba tien' biere tɛn Adam là kende' Uwien ya ñɔbu bó ki bii' ma kε nnɔ mikuum jinh bε nε. Adam là yé unil wà we ní nnɔ ya nennenkɔ nε.

<sup>15</sup> Ama Uwien ya paabu nin Adam ya biil ηa tε, ka kpe mɔ. Unibaab ya biil bo nε mikuum jin' binib bi yεbe ma nnɔ, bε li tien ηɔ unibaab \*Yesu Kristo mɔ bo Uwien ηa ní juoke binib bi yεbe, kí de bε bupaabu bù ní li yεbe ka ηmɔbe bù kpe nin bà ni? <sup>16</sup> Uwien ya paabu tien' nà nin unibaab nnɔ ya biere tien' nà ηa tε. Wɔn unibaab ya biere bo nε Uwien ye binib kε kpe utudεre. Ama Uwien ya juokm bo nε u bùh binib bigbεmɔndɛnb nin bi'biere yεbe ma kε nnɔ. <sup>17</sup> Unibaab ya biil bo nε mikuum ηmɔbe mituɔm binib kε bo kí ñε wɔn unibaab nnɔ. Ní te nnɔ la, bε li tien ηɔ binib bà laa' Uwien ya nimɔnciɛnt tà cère' Uwien bù' bε bigbεmɔndɛnb nnɔ ηa ji li lε Uwien ya fuobm, kí ji libel unibaab \*Yesu Kristo bo? <sup>18</sup> Unibaab ya biil nε tuke' utudεre ki baa' binib kε bo. Nnɔ nε unibaab ya tuonmɔnmɔnl mɔ bo, Uwien bùh binib kε bigbεmɔndɛnb ki cèreh bi fuobe. <sup>19</sup> Unibaab ηa bon' Uwien ma nnɔ nε cère' binib kε yé bibiɛrdɛnb Uwien saan. Nnɔ nε unibaab mɔ bon' Uwien ma nnɔ cère' binib kε yé bigbεmɔndɛnb Uwien saan.

<sup>20</sup> Uwien lá taa' \*yiko ki baa' nε binib ya biil yεbre' ki gbien'. Ama ibiere yεbe nà saan la, Uwien ya nimɔnt mɔ yεbe ní saan cεen nε. <sup>21</sup> Ibiere là ηmɔbe mituɔm nε ki tukeh mikuum ki bàareh. Nnɔ nε Uwien ya nimɔnt mɔ ηmɔbe mituɔm ki cèreh binib yé bigbεmɔndɛnb u'saan, ki li lε limiel là ηa ηmɔbe gbenm kí ñε Yonbdaan \*Yesu Kristo bo.

## 6

### *Ti kpo' nin Kristo ma nnɔ, ti li fuobe nin wɔ mɔ nε*

<sup>1</sup> Tɔ, ní te nnɔ ma nnɔ, ní ye nè ní ye ba? Ní ye nè ní ye tí li tuu ki teh ibiere ηɔ Uwien ya nimɔnt ní li yεbreh nε-εε? <sup>2</sup> Na te nnɔ fiebu. Ti ñεn' ibiere ya wɔbl ni ηɔ, ti li tien mila kí liεbe kí li fuobe ibiere ni? <sup>3</sup> Bii na bεn ki ye bi sli' tinbi bà kε Uwien ya ñunm ti taan' nin \*Yesu Kristo nnɔ ti taan' u'kuum mɔ nε-εε? <sup>4</sup> Bi sli' tε Uwien ya ñunm ti taan' Kristo ya kuum ma nnɔ, bi taan' ki sube' tinbi nin wɔn nε. Nε u'Baa Uwien ya kpiεke bo, u cère' u mεkre' bitenkpiib ni ηɔ tí mɔ ní li te mifuobfɛnm ni.

<sup>5</sup> Nε tinbi nin wɔn taan' u'kuum ma nnɔ, ti li taan u'mεkrm mɔ nε. <sup>6</sup> Tùɔre mɛn kí li bεn kí ye bi kpe' wɔ udɔpɔnpɔn bo ma nnɔ, bi kpe' tí tetekpaam mɔ nin wɔ nε. Mitetekpaam nnɔ la ji ní li ηmɔbe tuɔm ηɔ ti la ji ní li yé ibiere ya yonbe. <sup>7</sup> Imɔn, unil kpo' la, u ñεn' ibiere ya yonbt ni nε. <sup>8</sup> Ti kpo' nin Kristo ma nnɔ, ti teke' ki jin' ki ye ti li fuobe nin wɔ mɔ nε. <sup>9</sup> Ti bεn ki ye u mεkre' bitenkpiib ni ma nnɔ, wa ji li kpo, kuum ηa ji ηmɔbe tuɔm u'bo. <sup>10</sup> U kpo' bolm miba kpein nε ki gben' ibiere ya tuɔm. Fεnfennɔ u fuobe, nε u'fuobm nnɔ yé Uwien yaam nε. <sup>11</sup> Nnɔ nε ní mɔ li bùh ní ba tɛn ní mɔ kpo' ki ñεn' ibiere ya tuɔm ni, nε ki fuobe ki de' Uwien \*Yesu Kristo bo.

<sup>12</sup> Nεn bo, ni la ji ní cère ibiere ní li ηmɔbe tuɔm ní gbenɛnt tà li kpo nnɔ bo, ki la ji ní li teh tù yíe nà. <sup>13</sup> Ni la taah ní gbenɛnbɛl ki teh ibiere tɛn í yé itùonbiere ya jεwɛnt nε. Ama ni te tɛn binib bà mεkre' ki liεbe' ki fuobe ma nnɔ, taa mɛn ní ba kí de Uwien, kí taa ní gbenɛnbɛl kí de wɔ tɛn í yé itùonmɔnmɔn ya jεwɛnt nε. <sup>14</sup> Na ji li te biere ya yonbt ni, kimε yiko ηa ji ηuuke nε, Uwien ya nimɔnt nε ji ηuuke nε.

### *Ti ñε ibiere ni kí li teh nà mɔn Uwien ya nun bó*

<sup>15</sup> Ní tingi si ba? Tí li teh ibiere kí ye \*yiko ña ji ñuuke te, Uwien ya nimònt ne ji ñuuke te-εε? Na te nnò fiebu! <sup>16</sup> Na ben ki ye a taa' a'ba ki de' unil, ki boh wò ten a yé u'yonb la, a mánbe ki yé udaan ya yonb ne-εε? A taa' a'ba ki de' ibiere la, a yé ibiere ya yonb ne, ne ibiere bàareh nin mikuum ne. Ní yé a tí taa' a'ba ki de' Uwien, ki boh wò la, u li bù ñe ugbemòndaan ne. <sup>17</sup> Tí faare men Uwien. Ninbi bà là yé ibiere ya yonbe uyo uba nnò, fenfennò ni ji boh bi wòkn' ne miwòknm mà Uwien ya sen bo nnò nin ní'fèl ke ne. <sup>18</sup> Uwien ñen' ne ibiere ya yonbt ni, ne ki tien' ne tigbemònt ya yonbe. <sup>19</sup> Ní'jiint bo ne n taa' minisaaltetem ki tien' kunennenu ñò ní fre kí cii. Uyo uba ni là taa' ní'ba ki tien' tijònk't nin fenfenm ya yonbe ne, ki teh ná ña kpe sen Uwien ya nun bó ma nnò, fenfennò ní ji ní taa' ní'ba kí tien' tigbemònt ya yonbe, kí li yé Uwien ya nib imònmòn.

<sup>20</sup> Ni là yé ibiere ya yonbe ma nnò, niba ña là wòbndeh ne ní li teh ná cuube Uwien ya nun bó. <sup>21</sup> Ni là teh tibont tà uyo uba nnò, tù ji coh ne ife ne fenfennò, ne tu'fòrm là bàareh nin mikuum ne. <sup>22</sup> Ama fenfennò Uwien ñen' ne ibiere ya yonbt ni, ki tien' ne u ya yonbe, ne ni ji teh tibont tà mán u'nun bó. Ne mifòrm, ni li le limiel là ña ñmòbe gbenm. <sup>23</sup> Ibiere ya paaku si mikuum ne, ne Uwien ya paabu si limiel là ña ñmòbe gbenm, Yonbdaan \*Yesu Kristo bo.

## 7

### *Yiko nin Kristo yaab ya gber*

<sup>1</sup> N'yaabe, n lienh nin ninbi bà nnò, ni yé binib bà ben \*yiko mánmònm ne. Ni ben ki ye unil te \*yiko ya wòbl ni uyo wà u laan fuobe ne. <sup>2</sup> Nnò ne \*yiko bo uje laan fuobe la, u'po ña ñmòbe sen wò ní fii u'saan, ama u'ce kpo' la, u ñmòbe usen wò ní liebe kí kun ticε. <sup>3</sup> Upii nebre' ki kun' ticε uyo wà u'ce laan fuobe la, bi li yin wò upiinañmaa ne. Ama u'ce kpo' la, wa ji te yiko ya wòbl ni. U liebe' ki kun' ujetò la, ba ní yin wò piinañmaa.

<sup>4</sup> N'yaabe, ní' mò yaam te nnò ne. Kristo là kpo' ma nnò, ní' mò là kpo' nin wò ne, ka te yiko ya wòbl ni, ni ji yé uba yaab ne. Ní'tingi si: ni ji yé Kristo wà mekre' bitenkpiib ni nnò yaab ne, ñò tí li sònh itùon yà mán ki dienh Uwien. <sup>5</sup> Imòn, uyo wà ti là pε minisaaltetem bo nnò, \*yiko ne là cèreh ti lenh iyenmaalbiere, ki teh tibont tà bàareh nin mikuum. <sup>6</sup> Fenfennò ti te ten ti kpo' ne ki ñen' ná là co te nnò ni, ka ji te yiko ya wòbl ni. Ti ji pε Mifuoñaanm wòngeh te usenfaan wà nnò bo ne, ki sònh Uwien ya tuonl; ta ji pε Moyis kele' yiko wà nnò là wòngeh te usenkpaan wà nnò bo.

### *Yiko ne cèreh unil bendeh ibiere*

<sup>7</sup> Tò, ní ye nè ní ye ba? Ní ye nè ní ye yiko yé ibiere ya bonn ne-εε? Na te nnò fiebu! Kimε \*yiko ña bi te la, ma bi li bende ná yé ibiere ya bonn. Nà bi kele' \*yiko ya gbònk'u ni ki ye: «La ñmòbe nunfòke la,» ma bi li bende kí ye ununfòke yé biere. <sup>8</sup> Yiko ya wòbl bo ne ibiere laa' usen ki cèreh' n ñmòbe ununfòke ke ya bol. Yiko ña bi te la, biere ña bi ñmòbe tuòm. <sup>9</sup> Uyo wà ma là ben yiko nnò, n là fuobe ne. Ama n tí bende' \*yiko nnò ya wòbl ma nnò, ne ibiere laa' mituòm n'bo, <sup>10</sup> ne n kpo'. Yiko ya wòbl là bi li de nni limiel nnò, baa' nin mikuum ne min bo. <sup>11</sup> Kimε \*yiko ya wòbl bo ne, ibiere laa' usen, ki lere' nni, ki cèreh' n kpo'. <sup>12</sup> Imòn, \*yiko nin u'wòbl ñen' Uwien saan ne ki mán, ki cuube.

<sup>13</sup> Tò, ná yé nibonmònmònn ne kpènde' n'bo mikuum-ii? Na te nnò fiebu! Ibiere ne cèreh' n kpo'. Nibonmònmònn nnò bo ne ibiere laa' usen ki ku' nni, ñò yí ní tùare kí wuòn í yé bà. Yiko nnò ya wòbl ne wuòn' te ibiere bre ki gbien' ma bo.

### *Ibiere coh binib tiyonbt ma bo*

<sup>14</sup> Imòn, ti ben ki ye \*yiko ñen' Uwien saan ne. Min wòn, n yé unisaal ne, ne ibiere cuo' nni tiyonbt. <sup>15</sup> Ma ben n teh ná, kimε n yíe ní tien ná la, ma teh nen. Ama n nen ná nnò n teh nen ne. <sup>16</sup> N teh ma yíe ní tien ná la, nen ne wuòn' ki ye n tuo' ki ye \*yiko yé nibonmònmònn ne. <sup>17</sup> Ní te nnò la, na yé min ne teh nnò, ibiere yà te nni nnò ne teh nnò. <sup>18</sup> N ben ki ye bonmònmònn ña te nni, n niireh n yé unisaal ma nnò ne. N yíe ní tien ná mán, ama ma ní

fre kí tien nè. <sup>19</sup> Kimε n yíe ní tien mimənm mà nnə, ma teh mè. Nà bre, ma yíe ní tien nè nnə, n teh nən nε. <sup>20</sup> N teh ma yíe nà la, na yé min nε teh, ibiere yà te nni nnə nε teh.

<sup>21</sup> Nən bo, n laa' n te mitetem mà ni sɔ: min wà yíe ní tien nà mən nnə, n lenh n freh ki teh nà bre baba nε. <sup>22</sup> N fε \*Uwien ya yiko n'yenm ni cεen nε, <sup>23</sup> ama n laa' mituəm miba mɔ te nni, ki mɔh nin n'yenmaalmənmən, ki cère' ibiere yà te nni nnə cuo' nni tiyonbt, n te i'wəbl ni. <sup>24</sup> Min wuɔ ya cεekdaan! Njme li fie nni ibiere yà te nni, ki li baa nin nni mikuum nnə saan-i? <sup>25</sup> N faareh Uwien, kimε wən nε li fie nni kí ñε ti'Yonbdaan \*Yesu Kristo bo.

Min wən n'yenmaale ni, n te \*Uwien ya yiko ya yonbt ni nε, ama minisaaltetem ya sən ni wən, n yé ibiere ya yonb nε ki te i'yiko ni.

## 8

### *Mifuoñaanm nε dienh limiel*

<sup>1</sup> Fɛnfənnə Uwien ɲa ji li dεre bà yé \*Yesu Kristo yaab ya tub. <sup>2</sup> Kimε unil yé \*Yesu Kristo yɔ la, \*Mifuoñaanm ya tuəm mà dienh limiel nnə, nε ñen' udaan ibiere nin mikuum ya tuəm ni. <sup>3</sup> Uwien tien' \*yiko ɲa ní fre kí tien nà. Kí ñε unisaal ya jiiint bo nε \*yiko ɲa là ɲmɔbe tuəm. Nən bo nε ibiere bo, Uwien sən' ní u'tiema Bijε uɲɛndun wuu ni nin tigbenent, tù naan tinbi bibierdenb jaar. Uwien taa' wən nε ki tien' lituərl ki gben' ibiere ya gber. <sup>4</sup> U tien' nnə ɲɔ tinbi bà daan' minisaaltetem ki pε \*Mifuoñaanm yíe nà bo nε ní fre kí tien \*yiko ye nà kε mənəmən. <sup>5</sup> Binib bà pε minisaaltetem bo nnə teh unisaal yíe nà nε. Ama bà pε \*Mifuoñaanm bo nnə, bən teh mɔ yíe nà nε. <sup>6</sup> Unisaal yíe nà nnə bàareh nin mikuum nε. Ama \*Mifuoñaanm yíe nà nnə nən dienh limiel nin uyenduən nε. <sup>7</sup> Kimε binib bà teh unisaal yíe nà nnə yé Uwien ya nennendb nε. Ba boh \*Uwien ya yiko, ka li li fre kí bo wɔ mɔ. <sup>8</sup> Bà pε minisaaltetem bo nnə ɲa ní fre kí sɔnge Uwien ya yenm. <sup>9</sup> Ninbi bən wən, na pε nisaaltetem bo, ni pε \*Uwien ya Fuoñaanm bo nε, kimε Uwien ya Fuoñaanm te ni'ni. Kristo ya Fuoñaanm ɲa te unil wà ni la, udaan ɲa yé u'yɔ. <sup>10</sup> Kristo te ninbi ni ma nnə, ibiere cère' ni'gbenent li kpo mənən la, \*Mifuoñaanm nε yé ni'miel kí ñε Uwien bù' nε bigbeməndənb ma nnə bo. <sup>11</sup> Uwien wà cère' \*Yesu mεkre' bitenkpiib ni nnə ya Fuoñaanm te ni'ni ma nnə, wən wà cère' Kristo mεkre' bitenkpiib ni nnə li de ni'gbenent tà lá li kpo nnə mifuobm kí ñε \*u'Fuoñaanm mà te ni'ni nnə bo.

<sup>12</sup> N'yaabe, nən bo nε ti ɲmɔbe lifənl. Ama ta ɲmɔbe fənl nin unisaal ya tetem ɲɔ tí li teh unisaal yíe nà. <sup>13</sup> Kimε ni pε minisaaltetem bo la, ni li kpo nε, ama kí ñε \*Uwien ya Fuoñaanm bo, ni wiε' unisaal yíe nà la, ni li fuobe nε. <sup>14</sup> \*Uwien ya Fuoñaanm pekreh binib bà kε nnə nε yé Uwien ya bumu. <sup>15</sup> Uwien de' nε \*u'Fuoñaanm mà nnə ɲa co nε yonbt ɲɔ ní liεbe kí sən bujəwaanbu, ama \*u'Fuoñaanm nε tien' nε u'bumu, nε ki cère' ti yih wɔ ti'Baa.\* <sup>16</sup> \*Uwien ya Fuoñaanm nin mi'yul nε kundeh imən ti'yenm ni ki teh ti yé Uwien ya bumu. <sup>17</sup> Ti yé Uwien ya bumu ma nnə, ti yé u'faajib mɔ nε. Ti yé Uwien ya faajib nε tinbi nin Kristo kε. Ti taan' ki jəndeh nin Kristo ma nnə, tinbi nin wən li taan kí lε ukpiεke mɔ nε.

### *Uwien lá li kpiεke u'nib*

<sup>18</sup> N bən ki ye fɛnfənnə ya jend ɲa ɲmɔbe bε ní taa yè kí kpaan nin ukpiεke wà Uwien lá li ñen wù upaan bo kí de tε nnə. <sup>19</sup> Kimε Uwien ñen' tibont tà kε nnə gu nin inunmɔn nε lidaali là Uwien li wuən bà yé u'bumu. <sup>20</sup> Uwien ñen' tibont tà kε nnə juore' fənm. Na yé tù yíe nε ki juore' fənm, wən Uwien nε cère' tù juore' fənm. Ama tù ɲmɔbe lidəndənl ki ye <sup>21</sup> lidaali liba tu'mɔ li ñε mituəm mà kuuleh tù, ki cèreh tù te tiyonbt ni nnə ni, ki mɔ ní lε Uwien ya bumu ya kpiεke, ki li te liwiél ni. <sup>22</sup> Ti bən ki ye haali nin fɛnfənnə Uwien ñen' tibont tà kε nnə jəndeh nε ki kpiəndeh tən upii nε bən nin imerwien. <sup>23</sup> Na yé tibont nnə baba, tinbi bà Uwien de' tε \*u'Fuoñaanm, mɔ yé u'paacindkaabu nnə, ti'mɔ kpiəndeh

\* **8:15** Grεkmbε ya lenm ni bi kele' ki ye: Aba nε. Liñəbonl nnə ñen' \*Sufmbε ya lenm ni nε, nε li'tingi si: Baa.

ti'fèl ni nε, ki gu lidaali là Uwien li wuɔn kí ye ti mɔnbe ki yé u'bumu, u de' tε ki wiε' nnɔ. <sup>24</sup> Ti ηmεre' ama nǐ laan yé lidɛndɛnl nε. Unil ηmɔbe lidɛndɛnl nibonn bo la, wa laan laa' nè nε. U laa' nè la, na ji yé dɛndɛnl u'bo. <sup>25</sup> Ti ηmɔbe lidɛndɛnl nibonn bo, ka laan laa' nè la, ti li mǐnde nε kí li gu.

<sup>26</sup> Nnɔ nε \*Uwien ya Fuoñaanm toreh tε ti'jiint ni, kimε ta bɛn u yíe tí li kàareh wɔ ma bo. Nε \*u'Fuoñaanm kàareh wɔ ki dienh tε, ki dunh haali nil ηa rí fre kí lε u li taa iñɔbon yà kí tɛkn mǐ lienh nà nnɔ. <sup>27</sup> Uwien, wà bɛn binib ya fèl ni te ma bo, bɛn \*u'Fuoñaanm ya yɛnmaale. Mɛn nε kàareh wɔ u yíe ma bo ki dienh u'yaab.

<sup>28</sup> Ti bɛn ki ye Uwien teh tibont tà kε nnɔ u teh tù binib bà yíe wɔ ya mɔnm bo nε. Bi yé binib bà u yin' bε u là bobn' ma bo nε. <sup>29</sup> Kimε u là bɛn bε ki laa' ba laan maa' bε, nε ki sien' ki ye bε rí li naan u'Bijε, ηɔ u'Bijε rí li yé kibukpiεk libugol ni. <sup>30</sup> Uwien yin' bà nnɔ, u là juɔ' ki gènde' bɛn nε. U yin' bà nnɔ, u cère' bɛn nε yé bigbɛmɔndɛnb. U cère' bɛn bà yé bigbɛmɔndɛnb nnɔ, u de' bɛn nε ukpiεke.

### *Niba ηa rí fre kí bore tinbi nin Uwien ya yíem*

<sup>31</sup> Ti li len tu lε ba kí pukn-i? Uwien se ti'ciεk bó la, ηmε ji li fre kí tien tε niba? <sup>32</sup> Wa yíe' u'tiεma Bijε mɔnɔn bo, ama u taa' wɔ ki cèbe' wɔ rí tǐ kpo tí'kε ya biere bo nε. U de' tε u'Bijε ma nnɔ, bε li tien u la juoke tε kí de tε tibont kε? <sup>33</sup> Nηmε li fre kí biin Uwien gènde' binib bà? Uwien mɔnɔn ye bi yé bigbɛmɔndɛnb nε. <sup>34</sup> Nɛn bo, ηmε li fre kí ye bi kpe utudere? Yesu Kristo kpo'. Na yé u kpo' baba, u mεkre' bitenkpiib ni mɔ nε, ki te Uwien ya jie bó, ki kàareh wɔ ki dienh tε. <sup>35</sup> Bε li fre kí bore tinbi nin Kristo u la li yíe tε? Ijend bii uyɛnsaa bii bi jèndeh tε ma nnɔ bii mikònm bii micεcεkm bii kinunbɔnk bii mikuum-i? <sup>36</sup> Nǐ te tɛn nǐ kele' ma \*Uwien ya gbɔnku ni nε. Nǐ kele' ki ye:

«Sin bo nε bi kuuleh tε idaan kε,  
ki likeh tε tɛn ti yé ipe nε bi tuke ki joh bε rí tǐ kòre.»

<sup>37</sup> Ama \*Yesu Kristo wà yíe tε nnɔ ya tuɔm bo nε, ti faa ki cɛn' wà kε mɔn' ki faake'. <sup>38</sup> Imɔn, n bɛn ki ye niba ηa te kí fre kí bore tinbi nin Uwien u la yíe tε. Mikuum, limiεl, Uwien ya tondb, paaki bó ya tuɔm kε ya bol, fɛnfɛnnɔ ya gber, uyo wà we ní ya gber, mituɔm mà kε te ya bol, <sup>39</sup> nà kε te paaki bó, nà kε te dɛntingi, Uwien nɛn' nà kε nnɔ, niba ηa te kí fre kí bore tinbi nin Uwien u la yíe tε. U wuɔn' tε u'yíem nnɔ kí nε Yonbdaan \*Yesu Kristo bo nε.

## 9

### *Uwien nin u'nib Israyel yaab ya gber*

<sup>1</sup> Tɔ, n yé Kristo yɔ nε ki tɔkeh tigbɛmɔnt, ma nɛndeh. N'yɛnm nin \*Mifuoñaanm nε yé bimɔnkunb ki ye <sup>2</sup> n te uyɛnsaaciɛn ni, nε nǐ wi n'fèl ni ki gbiekeh uyo kε. <sup>3</sup> Imɔn, n bi yíe Uwien rí wiε nni miñùum kí bore min nin Kristo, n'yaab bà yé n'bol ya nib nnɔ bo. <sup>4</sup> Bɛn nε yé Israyel yaab. Uwien tien' bɛn nε u'bumu, ki de' bε u'kpiεke, ki cuo' nin bε kujɔtiεku mibolm mà yεbe, ki de' bε \*yiko, ki wuɔn' bε bi li pukeh wɔ ma bo, nε ki pùon' bε ipuon. <sup>5</sup> Israyel ya bol cin' nin bi ya yaajεb nε. Uwien ya Nigɛndkε Kristo tien' u'ba unisaal kí nɛn' bi ya bol ni nε. Wɔn nε yé Uwien ki ηmɔbe mituɔm tibont kε bo. Wɔn si kupɛnpɛku uyo wà ηa ηmɔbe gbenm. Ami.

<sup>6</sup> Na yé Uwien ηa fre' ki tien' u là pùon' lipuonl là nnɔ nε. Ama Israyel ya yaabii kε ηa cinbe ki yé Israyel ya bol ya nib. <sup>7</sup> \*Abraham ya yaabii mɔ kε ηa cinbe ki yé Uwien ya puonl ya bumu. Kimε Uwien là pùon' \*Abraham ki ye u'bijε \*Isaak ya bumu baba nε li yé u'yaabiimɔn. <sup>8</sup> Nǐ'tingi si: na yé unisaal maa' mubumu mùa nε yé Uwien ya bumu. Uwien ya puonl ya bumu baba nε yé u'bumu, ki yé \*Abraham ya yaabii. <sup>9</sup> Uwien là pùon' \*Abraham ki ye ma sɔ: «Nǐ lá ηmɛn nɔ la, n li liebe ní kí lε a'po Sara ηuuke kibujεbuk nε.»

<sup>10</sup> Na yé nɛn baba: tiere mɛn Lebeka mɔ ya gber. Wɔn nin ti'yaajε \*Isaak là maa' ileb nε, mù yé mujεmu. <sup>11-12</sup> Ama ba laan la maa' mubumu nnɔ, ki niireh nin mù rí tien nà mɔn



bii nà bre, nε Uwien juɔ' ki tɔke' Lebeka ki ye ucien lá li tien uwaal ya yonb nε. Uwien len' nnɔ ɲɔ wɔ́ rí wuɔ́n kí ye wa tukndeh nil ya tuonl bo ki gèndeh wɔ́, ama u'yíem bo nε u gèndeh unil, nε miyíem nnɔ ɲa ɲmɔbe lèbrm. <sup>13</sup> Nĩ te tɛn nĩ kele' ma \*Uwien ya gbɔ́nku ni nε. Nĩ kele' ki ye: «N yíe Sakɔ́b, nε ki nɛn Esawu.»

<sup>14</sup> Nĩ te nnɔ la, ti nín li len kí ye ba? Ti li ye Uwien teh nà ɲa cuube nε-εε? Na te nnɔ fiebu! <sup>15</sup> Uwien là tɔke' Moyis ki ye: «N yíe rí muɔ́ unil wà micεεckm la, n muɔ́h wɔ́n nε. N tí yíe rí tien wà tinimònt la, n teh wɔ́n nε.» <sup>16</sup> Nɛn bo, na yé unil ya yíem bo, ka yé u'ńiknm bo nε Uwien muɔ́h wɔ́ micεεckm. Uwien ya nimònt bo nε u muɔ́h unil micεεckm. <sup>17</sup> Nĩ kele' \*Uwien ya gbɔ́nku ni ki ye Uwien tɔke' Farahɔ́n ki ye: «N kàan' ɲε ubɛr ɲɔ́ sin bo rí wuɔ́n binib n ɲmɔbe mituɔ́m ma bo nε, ɲɔ́ binib kε rí cii n'yel bó utingben kε bo.» <sup>18</sup> Nnɔ nε Uwien yíe wɔ́ rí muɔ́ wà micεεckm la, u muɔ́h wɔ́n nε, nε u yíe wà ya yul rí li faa la, u cèreh li faa nε.

### *Uwien ya benpiebe nin u muɔ́h binib micεεckm ma bo*

<sup>19</sup> Nɛn bo, uba li niire nni kí ye: nĩ te nnɔ la, bε bo nε Uwien kɔ́nh nin binib ki teh ba teh ni'donbɔ́? Bii u li fre kí ye: ɲmε li fre kí pien Uwien u la tien u yíe ma? <sup>20</sup> Tɔ́, sin unisaalɔ́, a tɛn ki yé ɲmε nε ki niɛh nin Uwien-i? Timaar li fre kí niire, wà mɛn' tù kí ye «Bε tien' a mɛn' tε nɔ́ nnɔ-ɔɔ?» <sup>21</sup> Umaar ɲa ɲmɔbe sɛn wɔ́ rí tien u'yɔ́kr u yíe ma-aa? U li fre kí bore tuba kí mε lisenl là ɲmɔbe kuńuɔ́rku, kí taa tutɔ́r kí mε là ɲa ɲmɔbe ŋuɔ́rku.

<sup>22</sup> Uwien là yíe wɔ́ rí wuɔ́n biba kí ye u'mutuol fii' bi'bo, ki yíe bε rí bende kí ye u ɲmɔbe mituɔ́m nε. Nin nɛn kε bà fin' u'mutuol ki bi kpe mikuuum nnɔ, u taa' lifèsɔ́ngl cɛɛn nε ki ɲmɔbe bε. <sup>23</sup> U là yíe wɔ́ rí wuɔ́n bitɔ́b mɔ́ kí ye u muɔ́' bε micεεckm nε, ki yíe bε rí bende u'kpíeke yebe ki kpe ma bo nε. U là bonde' bɛn nε wɔ́ rí de bε ukpíeke nnɔ. <sup>24</sup> Tinbi nε yé u bonde' bà nnɔ. Na yé u yin' tε \*Sufmbε ya bol ni baba nε, bà ɲa yé \*Sufmbε mɔ́ te len nε. <sup>25</sup> Nĩ te tɛn nĩ kele' ma Ose ya gbɔ́nku ni nnɔ nε. Nĩ kele' ki ye:

«Linibol là ya nib ɲa là yé n'yaab nnɔ,  
n li yin bε n'yaab,  
linibol là ma là yíe lè nnɔ,  
n li yíe lè.

<sup>26</sup> Bi là tɔke' bε nà saan ki ye ba yé n'nib la,  
bi li yin bε ni'saan min Uwien wà fuobe ya bumu.»

<sup>27</sup> Israyel yaab bɛn wɔ́n, \*Uwien ya ŋɔ́bonsɔ́knl Esayi mɔ́ là len' bi'gbɛr ki ye: «Israyel yaab yebe tɛn likpentɛngbil mɔ́nɔ́n la, bi'ni binikàankaab nε li ɲmɛre. <sup>28</sup> Kimε Yonbdaan li sɔ́n u'tuonl kitink bo u là len' ma bo nnɔ kí tí gben ka rí taande.» <sup>29</sup> Nĩ liebe' ki te tɛn Esayi tí là len' ma ki ye:

«Yonbdaan mituɔ́m kε ya daan  
ɲa bi cère' ti'bol s'ien' waamu la,  
ti bi kunde' tɛn Sodɔ́m nin Gomɔ́r yaab nε.»

### *Israyel yaab nin mitekjim ya gbɛr*

<sup>30</sup> Ti len nà nnɔ ya tingi si ba? Nĩ'tingi si: bà ɲa yé \*Sufmbε ka là nuunh Uwien rí bù bε bigbɛmòndɛnb nnɔ, fɛnfɛnnɔ Uwien bù' bε bigbɛmòndɛnb bi'tekjim bo nε. <sup>31</sup> Ama Israyel yaab bɛn là nuunh Uwien rí bù bε bigbɛmòndɛnb \*yiko ya bom bo nε ka laa'. <sup>32</sup> Bε bo nε ba laa'? Kimε ba teke' Uwien ki jin', ki maaleh ki teh bi'tuon bo nε Uwien li bù bε bigbɛmòndɛnb. Nnɔ nε bi gbíere' milum ya tɛnl, <sup>33</sup> tɛn nĩ kele' ma \*Uwien ya gbɔ́nku ni ki ye: «Liike mɛn, n taa' milum ya tɛnl ki ble' Siyɔ́n ya du ni. Lì yé litɛnl là binib lɛkeh li'bo ki luh nε. Ama wà du li'bo la, fε ɲa rí ji wɔ́.»

## 10

<sup>1</sup> N'yaabε, n'nun mɔ́n nà bo n kàareh Uwien si: Israyel yaab rí ɲmɛre nε. <sup>2</sup> N li fre kí kun bi'bo imàn kí ye bi'nun mɔ́n Uwien ya tuonl bo, ama ba bɛn bi li sɔ́n ma bo nε.

<sup>3</sup> Ba ben Uwien büh binib bigbemàndenb isen yà ni, nε ki nuunh bi'tiema sen, be rí li yé bigbemàndenb, ki yíe' ka paan' isen yà bo Uwien büh binib bigbemàndenb nnò bo. <sup>4</sup> Kimε Kristo baa' ma yiko ña ji ñmòbe tuonl. Wà ke teke' wò ki jin' la, Uwien li bù udaan ugbemàndaan nε.

*Wà ke teke' Kristo ki jin' li ñmere*

<sup>5</sup> Bà nuunh be rí li yé bigbemàndenb \*yiko bo nnò, Moyis là kele' bi'gber ki ye: «Unil wà teh \*yiko ye ma la, \*yiko nnò bo nε u li fuobe.» <sup>6</sup> Ama bà nuunh be rí li yé bigbemàndenb mitekjim bo nnò ya gber wòn, ñi kele' \*Uwien ya gbònkú ni ki ye bi la li maaleh bi'yenm ni ki teh: «Ñme li dùò paaki bó?» Ni'tingi si: ñme li jiiin Kristo ní? <sup>7</sup> Ki la li maaleh mò ki teh: «Ñme li jiiire dentingi?» Ni'tingi si: ñme li mεkre Kristo ní? <sup>8</sup> Ñi kele' \*Uwien ya gbònkú ni ki ye ba? Ñi kele' ki ye:

«Uwien ya gber nεke a'saan,  
ki te a'ñòbu nin a'fèl ni.»

Tigber nnò yé mitekjim ya gber tà ti tókeh tù binib nnò nε.

<sup>9</sup> A yàare' ki len' binib ke ya nun bó ki ye \*Yesu nε yé Yonbdaan, ki ñmòbe midum a'fèl ni ki ye Uwien mεkre' wò bitenkpiib ni la, Uwien li ñmien ñe. <sup>10</sup> Kimε a ñmòbe midum a'fèl ni la, Uwien bù' ñe ugbemàndaan nε. Nε a yàare' ki len' binib ke ya nun bó ki ye \*Yesu yé a'Yonbdaan la, Uwien li ñmien ñe. <sup>11</sup> Imòn, ñi kele' \*Uwien ya gbònkú ni ki ye: «Wà ke du u'bo la, fε ña rí ji udaan.» <sup>12</sup> Nεn bo, \*Sufmbε nin bà ña yé \*Sufmbε ke te miba nε. Bi'ke ya Yonbdaan te uba nε ki teh bà ke muòh ki yih wò mimòm. <sup>13</sup> Imòn: «Wà ke li muò kí yin Yonbdaan ya yel nnò, wòn nε li ñmere.»

<sup>14</sup> Tò, binib ña teke' wò ki jin' la, bi li tien mila kí muò kí yin wò? Ba cii' u'gber la, bi li tien mila kí teke wò kí ji? Unil ña kpaande' tù la, bi li tien mila kí cii' tù? <sup>15</sup> Ba sòn' nil wò rí tí kpaande' tù la, ñme li kpaande' tù? Ñi te ten ñi kele' ma \*Uwien ya gbònkú ni ki ye: «Binib bà tuke tiggemòmòmònt ki we ní nnò ya cènl mòn cεen nε.» <sup>16</sup> Nin nεn ke na yé binib ke nε tuo' tiggemòmòmònt nnò. Nεn bo nε Esayi là len' ki ye: «Yonbdaan, ñme tuo' ki teke' ti len' nà nnò ki jin'-i?» <sup>17</sup> Nεn bo, mitekjim ñeh tigber ya ciim ni nε, nε tigber nnò yé Kristo ya gber nε.

<sup>18</sup> Tò, n niireh nε-a, Israyel yaab ña là cii' nε-εε? Ben nε là cii'-a!  
Ñi te ten ñi kele' ma \*Uwien ya gbònkú ni ki ye:

«Bi cii' bi'ñòfaam bó utingben ke bo,  
bi'ñòbon jon' utingben bo ni'ke saan.»

<sup>19</sup> Tò, n tí niireh nε-a, Israyel yaab ña là cii' ni'tingi nε-εε? Ben nε là cii' ni'tingi-a! Moyis là len' ñò ki ye Uwien ye:

«N li cère ní li ponbe linibol là ña yé niba nnò,  
kí cère bà ña ben niba ya bol rí fin ni'mutuol.»

<sup>20</sup> Esayi mò là mεnge' lifèl ki len' ki ye Uwien ye:  
«Binib bà ña nuunh nni nnò, n cère' ben nε laa' nni.

Binib bà ña là niireh n'bo nnò, n taa' n'ba ki wuòn' ben nε.»

<sup>21</sup> Israyel yaab ben wòn, u len' bi'gber ki ye: «N tun' liwentunñmenl, nε ki kenbeh ki yih linibol là ña boh nni ka ciih n'ñòbu bó nnò.»

## 11

*Uwien ña wiε' Israyel yaab*

<sup>1</sup> Nεn bo, n niireh nε-a, Uwien wiε' u'nib Israyel yaab nε-εε? Wa wiε' be fiebu. Kimε min Pól mòmòn yé Israyel yò nε, ki yé \*Abraham ya yaabil, ki yé Bensamen ya lontunku yò. <sup>2</sup> Uwien ña wiε' u'nib bà uyo bo u là juò' ki gènde' be nnò. Na ben nà kele' \*Uwien ya gbònkú ni Eli bo nε-εε? Ñi kele' ki ye Eli biin' Israyel yaab Uwien saan ki ye: <sup>3</sup> «Yonbdaan, bi kuku' a'ñòbonsòknb, ki wewe' a'ponpob. Min baba nε sien', nε bi nuunh be rí ku n'mò.»

<sup>4</sup> Ama Uwien jiin' wɔ ki ye: «N sien' n'ba bijeb bà ɲa gbaan' ki pèke' ubul Baal nnɔ itur ilole nɛ.» <sup>5</sup> Nĩ te nnɔ nɛ haali nin dinnɔ, Israyel yaab ni nĩ sien' binikàankaab bà Uwien gènde' bɛ u'nimànt bo nnɔ nɛ. <sup>6</sup> U là gènde' bɛ u'nimànt bo nɛ na yé bi'tùon bo. Nĩ bi yé bi'tùon bo nɛ la, Uwien ya nimànt ɲa ji bi li yé nimànt.

<sup>7</sup> Nnɔ la, ti nín li ye ba? Israyel yaab nuun' nà nnɔ, ba laa' nè, Uwien gènde' bà nnɔ nɛ laa' nè. Bitɔb nnɔ wɔn, Uwien cère' bi'yul faa nɛ. <sup>8</sup> Nĩ te tɛn nĩ kɛle' ma \*Uwien ya gbɔnku ni nɛ. Nĩ kɛle' ki ye:

«Uwien fùɔre' bi'yɛnm,  
nɛ ki cère' bi'nun ɲa lɛnh,  
bi'tub ɲa ciuh kí lá baa fɛnfɛnnɔ wuɔ.»

<sup>9</sup> \*Dafid mɔ là len' bi'bo ki ye:

«Bi'jier rí li yé bi'bo kudiɛku,  
kí li yé bi'bo ticuɔr,  
kí li yé bi li lɛke nà bo kí lu,  
kí li yé bi'bo utudɛre wà bi kpɛ wù.

<sup>10</sup> Cère bi'nun rí bɔnde bi ji la lɛnh,  
kí cère bɛ rí li tuu ki niibeh ibuɔn.»

<sup>11</sup> Nɛn bo, n niireh nɛ-a, Israyel yaab lu' ɲɔ bi la ji rí fii kpɛlkpɛl nɛ-ɛɛ? Na te nnɔ fiebu! Bi'lum nnɔ bo nɛ bà ɲa yé Israyel yaab mɔ li ɲmɛre. Nɛn nɛ li fin bi'ponponbe. <sup>12</sup> Nĩ yé \*Sufmbɛ ya biil cère' uɲɛndun laa' mimɔnm Uwien saan, nɛ bi'lum cère' bà ɲa yé \*Sufmbɛ mɔ laa' lifaal Uwien saan la, bi lá li lɛ miɲmɛrm kí tĩ gben ma nnɔ, nĩ ji li te mila bo?

### *Bà ɲa yé Sufmbɛ ya ɲmɛrm ya gber*

<sup>13</sup> Tɔ, n ji cinbe ki lienh ninbi bà ɲa yé \*Sufmbɛ nnɔ nɛ. \*Yesu sɔn' nni rí tɔke nɛ u'gber ma nnɔ, n poknh n'tuonl bugben bo nɛ, <sup>14</sup> kí daan ki ye nĩ tuo' la, rí fin n'bol ya nib ya mutuol ɲɔ kí ɲmiɛn bi'ni bi'ba nɛ. <sup>15</sup> Nĩ yé Uwien wiɛ' \*Sufmbɛ ki cère' wɔn nin inibotɔ yà te uɲɛndun ni taan' buñɔbu la, u lá li liɛbe kí teke bɛ ma nnɔ, nĩ ji li te mila bo? Na li yé bitɛnkpiib ya mɛkrm-ii?

<sup>16</sup> Tɔ, Uwien si kpɔnɔ ya niba bó la, nĩ wuɔn' ki ye wɔn si kpɔnɔ nnɔ kɛkɛ nɛ. Uwien si busubu ya ñaan la, nĩ wuɔn' ki yé wɔn si bu'sigben mɔ nɛ. <sup>17</sup> Israyel yaab te tɛn olifi ya sucaankaabu bùa bi cɔre' bu'sigben iba nɛ, kí taa' bà ɲa yé Israyel yaab kí te tɛn olifi ya subu bùa pɛn' kumuɔku ni nnɔ ya sigben kí nɛbn' kí kpɔbn' yà sien' nnɔ bo nɛ. Fɛnfɛnnɔ sin nin yà sien' nnɔ kɛ ji jondeh busubu nnɔ ya ñaan yà jindeh bù nnɔ bo nɛ. <sup>18</sup> Nɛn bo, la jɛbnh a'ba bi cɔre' isigben yà nnɔ bo. A li tien mila kí jɛbn a'ba, kimɛ na yé sin nɛ tuke isiñaan, isiñaan nɛ tuke ɲɛ.

<sup>19</sup> Nba la, a li ye: «Bi cɔre' isigben nnɔ ɲɔ bɛ rí taa min nɛ kí nɛbn i'bùol.» <sup>20</sup> Imɔn, isigben nnɔ ɲa teke' Uwien kí jin', nɛ bi cɔre' yĩ, sin teke' Uwien kí jin' nɛ bi taa' ɲɛ kí nɛbn i'bùol. Ama a la nín li jɛbnh a'ba, á li fɛnge. <sup>21</sup> Kimɛ Uwien cɔre' busubu ya sigbenmɔn la, a bɛn kí ye u li dàan sin wà yé usigbennɛbnkɛ nnɔ nɛ-ɛɛ? <sup>22</sup> Sekn kí bɛnde Uwien ya nimànt nin u'biɛrm. U bre binib bà ɲa ji pɛ u'bo nnɔ bo, nɛ kí teh sin wà pɛ u'bo nnɔ tinimànt. A tuu kí pɛ u'bo la, u li tuu kí teh ɲɛ tinimànt nɛ. Nnɔ ɲa ñí la, u li wiɛ a'mɔ nɛ. <sup>23</sup> Nĩ te nnɔ nɛ Israyel yaab mɔ bo: bi wiɛ' bi'yufaa la, Uwien li jiin bɛ kí nɛbn bi là cɔre' bɛ nà saan nnɔ nɛ. U ɲmɔbe mituɔm wɔ rí jiin bɛ kí nɛbn. <sup>24</sup> Sin wà yé olifi ya subu bùa pɛn' kumuɔku ni ya sigben bi taa' ɲɛ kí nɛbn' olifi ya sucaankaabu bo nnɔ, a yé usigbencaan nɛ, ɲa yé busubu nnɔ ya sigbenmɔn. Nnɔ nɛ Uwien ye wɔ rí jiin kí nɛbn busucaankaabu nnɔ ya sigbenmɔn bu'bo la, na rí li faa.

### *Israyel kɛ li ɲmɛre nɛ*

<sup>25</sup> N'yaabɛ, n yíe rí tɔke nɛ tigbɛbɔlkaar tuba nɛ, ɲɔ ni la li maaleh kí teh ni yé biyɛnfodɛnb. Israyel yaab biba lí li ɲmɔbe uyufaa nɛ haali nin uyo wà bà ɲa yé Israyel

yaab ke li paan Uwien ya sen bo. <sup>26</sup> Nnɔ ne Israyel yaab ke li ηmare, ten ni kele' ma \*Uwien ya gbɔnku ni. Ni kele' ki ye:

«Uηmienl li ŋe Siyɔn ya du ni ne,  
kí gben Sakɔb ya yaabii ya biil.

<sup>27</sup> N li gben bi'biere,  
n li cuo nin be kujɔtieku kùà nnɔ nínnɔ.»

<sup>28</sup> Tɔ, bi yíe' tigbɛmɔnmɔnt ma nnɔ, ne ki kpende' Uwien ya nennɛndb ηɔ ninbi ne ní jonde. Ama Uwien biɛ ki yíe be ne kí ŋe bi'yaajeb bo, kimɛ wɔn ne là gènde' be ki tien' u'yaab. <sup>29</sup> Kimɛ Uwien pun' unil bupaabu bùa la, wa liebeh ki teknh bù, u tí yin' unil la, u yin' wɔ ne, wa lèbreh u'yennaale. <sup>30</sup> Imɔn, uyo bo ni'mɔ ηa là boh Wien. Ama fɛnfɛnnɔ \*Sufmbɛ ηa bon' Uwien ma nnɔ ne u muɔ' ne micɛɛckm. <sup>31</sup> Fɛnfɛnnɔ ba bon' Uwien ma nnɔ ne Uwien muɔ' ne micɛɛckm. Nɛn ne li cère Uwien ní muɔ bi'mɔ micɛɛckm. <sup>32</sup> Kimɛ Uwien kuɔn' binib ke uyufaa ni, ηɔ wɔ ní muɔ bi'ke micɛɛckm ne.

### *Uwien ya yeɓn ηa ηmɔbe kpaanm*

<sup>33</sup> Bo! Uwien ya faal mɔ laan yebe-a!  
U'yɛnfuom nin u'benm yebe cɛɛn ne!

Nil ηa ní fre kí bɛnde u'yennaale,  
ka ní fre kí bɛnde u teh ma bo mɔ.

<sup>34</sup> «ŋmɛ ben Yonbdaan ya yennaale?  
ŋmɛ li fre kí gbiere wɔ?

<sup>35</sup> Bii ŋmɛ kpíe' ki de' wɔ nibonn,  
ηɔ wɔ ní jiiin kí pè wɔ?»

<sup>36</sup> Nibonn ke ŋɛn' wɔn saan ne. Wɔn ne cère' ni'ke te, ne wɔn si ni'ke mɔ. Wɔn si ukpiɛke uyo wà ηa ηmɔbe gbenm. Ami.

## 12

### *Kristo ya li ηmɔbe mitetem mɔ*

<sup>1</sup> Nɛn bo, n'yaabe, Uwien ya nimɔnt bo ne n gbierɛh ne ní taa ni'ba kí de Uwien ten kitɔtuɔrwɛnk kà fuobe, ki mɔn, ki sɔnge Uwien ya yɛnm. Nɛn ne yé mipum ma sɔnge Uwien ya yɛnm. <sup>2</sup> Ni la li te ten uηɛndun wuu ya nib. Ama cère mɛn Uwien ní lèbre ni'yennaale kí de ne iyennaalfaan ηɔ ní li sekndeh kí bɛnde Uwien yíe nà: nà mɔn, ka pɔre' niba, ki sɔnge u'yɛnm.

<sup>3</sup> Tɔ, Uwien de' nni bupaabu bùa nnɔ bo, ne n tɔkeh ni'ke ki teh ni la li bùh ni'ba ki gèbreh ni kpe ma bo. Unil ke ní tùɔre kí bɛnde u yé wà, ki li bùh u'ba ki kpàandeh Uwien cère' u teke' Kristo ki jin' ma bo. <sup>4</sup> Unisaal ya gbɛnɛnt te tuba ne, ki ηmɔbe igbɛnɛnbɛl í yebe. Ama i'ke ηa te tùon. <sup>5</sup> Ti'mɔ yaam te nnɔ ne. Nin ti yebe ma ke nnɔ ti taan' nin Kristo ma nnɔ, ti ji te tigbɛnɛnt tuba ne, ne wà ke yé tigbɛnɛnt nnɔ ya gbɛnɛnbɛl ki tuuke i'tɔ bo. <sup>6</sup> Uwien ya juokm bo ne u de' ti'ke bupaabu jeje. Nɛn bo, Uwien de' wà uñɔbonsɔkn ya paabu la, udaan ní li sɔkndeh ki kpàandeh Uwien de' wɔ mitekjim ma bo. <sup>7</sup> Uwien de' wà bupaabu wɔ ní li toreh binib la, wɔ ní li toreh. Uwien de' wà bupaabu wɔ ní li wɔknh la, wɔ ní li wɔknh. <sup>8</sup> Uwien de' wà bupaabu wɔ ní li saakreh binib ya gbɛnɛnt la, wɔ ní li saakreh binib ya gbɛnɛnt. Uwien de' wà bupaabu wɔ ní li punh binib tibont la, wɔ ní li punh ki la cuɔleh. Uwien de' wà ticiɛnt wɔ ní li likeh binib la, wɔ ní li sɔnh u'tuonl mɔnmɔnm. Uwien de' wà bupaabu wɔ ní li muɔh binib micɛɛckm la, wɔ ní li muɔh be nin lifɛsɔngl.

<sup>9</sup> Ní li yíe binib imɔnmɔn. Cère mɛn ni'nun ní li mɔn nà mɔn ya tienm bo, kí li nɛn nà bre. <sup>10</sup> Ní li yíe tɔb ten ninjieɓ yíe tɔb ma bo. Ní li ŋikndeh ki boh tɔb, ama ní cère mibom ní li kpíereh ki ŋɛh ninbi. <sup>11</sup> Li yíe mɛn lituonl ki la tiinh gbɛnɛnbien. Cère mɛn ni'nun ní li mɔn Yonbdaan ya tuonl bo. <sup>12</sup> Ni ηmɔbe lidɛndɛnl là u'saan nnɔ cère mɛn ni'yɛnm ní li sɔnge li'bo. Ní li ηmɔbe kuminku ijɛnd ni, kí li kàareh uyo ke. <sup>13</sup> Ní li toreh Uwien ya nib bà ní pɔre' be, kí cère ni'nun ní li mɔn bicɛnb ya tek m bo. <sup>14</sup> Ní li kàareh Uwien wɔ ní

tien binib bà jèndeh nε nnɔ u'mɔnm. Ní li teh wɔ́ rí tien bε u'mɔnm, ni la teh wɔ́ rí wiε bε ὴùum. <sup>15</sup> Li poknh mɛn nin bà poknh, kí li muɔh nin bà muɔh. <sup>16</sup> Li lienh mɛn ki ciuh tɔb bó. La li wɔ́ngɛh mɛn ni'ba, li jiindeh mɛn ni'ba tingi binib ya nun bó, ki la maaleh ki teh ni yé biyɛnfodɛnb.

<sup>17</sup> Unil tien' ηε nà bre la, la jiin wɔ́ nà bre. Li nuunh mɛn ní li teh nà mɔn binib kε ya nun bó. <sup>18</sup> Ní yé ni li fre, nε ní li ñε ninbi nε la, li ñikndeh mɛn kí li ηmε nin unil kε. <sup>19</sup> N'jɔtiebε, unil tien' nε nà bre la, ninbi nin ni'yul la nuunh ní tu wɔ́ fɛnl, ama cère mɛn Uwien ya mutuol rí fii wɔ́ rí tien u li tien ma. Kimε ní kεle' \*Uwien ya gbɔnku ni ki ye Yonbdaan ye: «Min nε li tu lifɛnl, min nε li jiin unil kε u'tuonl kpe ma bo.» <sup>20</sup> Ní liebe' ki kεle' ki ye: «Mikònm ηmɔbe a'ñennɛnd la, de wɔ́ wɔ́ rí ji, uñuñun ηmɔbe wɔ́ la, de wɔ́ miñunm. A teh nnɔ la, ni naan tɛn a wɔreh imukuɔn nε ki cokndeh u'yul bo.» <sup>21</sup> La cère mibiεrm rí faake nin ηε. Li faa nin mibiεrm a'mɔnm bo.

## 13

### *Li boh mɛn udu ya ciɛnb*

<sup>1</sup> Unil kε rí li boh biciɛnb bà likeh udu nnɔ. Kimε nil ηa yé ciɛn ηɔ Uwien ηa tien' wɔ́ ciɛn. Bà kε yé udu ya ciɛnb nnɔ, Uwien nε tien' bε biciɛnb. <sup>2</sup> Nɛn bo, wà kε yíe' udu ya ciɛn ya ñɔbu bó la, u yíe' Uwien sien' ki ye nɛn li te ma bo nε. Unil teh nnɔ la, u nuunh u'ba bo utudɛre nε. <sup>3</sup> Nnɔ nε binib bà teh nà mɔn ηa fɛnge udu ya ciɛnb, bà teh nà bre nε fɛnge bε. Nɛn bo, ηa yíe á li fɛnge bε la, li teh nà mɔn, ηɔ bε rí li pèkeh ηε. <sup>4</sup> Kimε udu ya ciɛnb sɔnh Uwien ya tuonl là li pukn ηε a li te mɔnmɔnm nε. Ama a teh nà bre la, li fɛnge. Kimε na yé fɛnm nε udu ya ciɛnb ηmɔbe usɛn bε rí dɛre a'tub. Bi diɛh binib ya tub la, bi sɔnh Uwien ya tuonl nε bε rí wuɔn kí ye Uwien ya mutuol fih bà teh nà bre bo. <sup>5</sup> Nɛn bo, na yé ni boh udu ya ciɛnb ki fɛnge utudɛre baba nε. Ama ni boh bε kimε ni'yɛnm ni, ni bɛn ki ye nɛn nε mɔn.

<sup>6</sup> Nɛn bo nε ni pèh lɛnpo. Kimε lɛnpotekb nnɔ, Uwien nε sien' bi'mɔ bε rí li sɔnh li ya tuonl nin inunmón. <sup>7</sup> Li teh mɛn unil kε u kpe ní li teh wɔ́ nà. Li pèh mɛn lɛnpo ki diɛnh bilɛnpotekb, kí li pèh tikre ki diɛnh tikrtekb, kí li boh bà kpe ní li boh bε, kí li selndeh bà kpe ní li selndeh bε.

### *Li yíe mɛn tɔb*

<sup>8</sup> La ηmɔbe mɛn uba fɛnl. Lifɛnbaabl là ni li ηmɔbe lè si: ní li yíe tɔb nε, kimε unil wà yíe u'tɔ la, udaan bon' \*yiko ye nà kε nnɔ nε. <sup>9</sup> Imòn, \*yiko wà ye: «La teh nanmaal, ki la ku nil, ki la suh, ki la ηmɔbe nunfɔke utɔ ya bonn bo» nin wà kε sien' nnɔ taan' ki te yikobaab wà ye: «Li yíe a'tɔ tɛn a yíe a'ba ma bo» nnɔ ni nε. <sup>10</sup> Unil wà ηmɔbe miyíem ηa teh u'tɔ nà bre. Nɛn si unil ηmɔbe miyíem la, u boh \*yiko ye nà kε nnɔ nε.

### *Bonde mɛn kí li gu Kristo ya baam*

<sup>11</sup> Tɔ, n lienh nnɔ kimε ni bɛn ti te uyo wà. Ní yé uyo wà ni li finde migùɔnm bo nε. Kimε lidaali là ti li ηmɛre nnɔ ηa ji fɔke tɛn lidaali là ti teke' Kristo ki jin' nnɔ. <sup>12</sup> Kuyɔku gèbre'-a! Kutaaku ya wendm ηa ji fɔke. Nɛn bo, cère mɛn tí dàan licinñunl ya tuonl, kí bèle kuwenwenku ni ya jɛwɛnt. <sup>13</sup> Cère mɛn tí li te mɔnmɔnm tɛn binib te ma uwien ni. Cère mɛn ti la li yíe uninɛnjɛn, ki la ñuh ki yibeh, ki la teh sɔnsɔndl, ki la teh fɛnfɛnm, ki la kɔnh jɛr, ki la ηmɔbe nɛnk. <sup>14</sup> Taa mɛn Yonbdaan \*Yesu Kristo kí tien ni'liεrl, ki la ji rí de ni'gbɛnɛnt sɛn tù rí tien tù yíe nà.

## 14

### *La biindeh mɛn tɔb jier ya jim bo*

<sup>1</sup> Tɔ, teke mɛn wà ηa faa tekjim ni, ki la niɛh nin wɔ́ u maaleh ma bo. <sup>2</sup> Nba la, uba li fre kí maale kí ye tijier tuba ηa kùɔ u'tekjim bo, kí lε wà ηa faa tekjim ni nnɔ kùɔ tinɔnt, nε ki jinh tikpinɛr baba. <sup>3</sup> Wà jinh ni'kε nnɔ, la li séreh wà jinh tijier tubambε nnɔ. Wà mɔ

ɲa jinh tijier tubambɛ nnɔ, la biindeh wà jinh ni'kɛ nnɔ. Kimɛ Uwien teke' u'mɔ nɛ. <sup>4</sup>A yé ɲmɛ ki biindeh u'tɔ ya tonsɔnl-i? U teh nɪ mɔn bii u teh na mɔn la, nɪ likeh u'cɛnbaa nɛ. Nɛ u li tien nè rɪ li mɔn nɛ, kimɛ Yonbdaan li fre kí sere u'ciɛk bó.

<sup>5</sup>Nɪ te nnɔ nɛ iwentun mɔ bo. Uba maaleh ki teh iwentun iba cɛn' i'tɔ nɛ, utɔ mɔ maaleh ki teh i'kɛ te miba nɛ. Unil kɛ rɪ li teh u maaleh ma bo. <sup>6</sup>Unil wà boh liwentunl liba ki cɛn' i'tɔ la, u boh lè ki selndeh Yonbdaan nɛ. Unil wà jinh ni'kɛ la, u jinh ki selndeh Yonbdaan nɛ, kimɛ u faareh Uwien nɛ kí yaan kí ji. Wà mɔ ɲa jinh tijier tubambɛ nnɔ, wa jinh tù ki selndeh Yonbdaan nɛ, kimɛ u'mɔ ɲa jinh tù ki faareh Uwien nɛ. <sup>7</sup>Ti'ni uba ɲa fuobe ki de' u'ba. Uba mɔ ɲa kpuokeh ki dienh u'ba. <sup>8</sup>Ti fuobe la, ti fuobe ki de' Yonbdaan nɛ. Ti tí kpo' la, ti kpo' ki de' Yonbdaan nɛ. Nɛn bo nɛ ti fuobe bii ti kpo' la, ti yé Yonbdaan yaab nɛ. <sup>9</sup>Kimɛ Kristo kpo' ki mɛkre' bitɛnkpiib ni, ɲɔ wɔ rɪ li yé bitɛnkpiib nin binifuob kɛ ya Yonbdaan nɛ. <sup>10</sup>Nɛ sin, nɪ te nnɔ la, bɛ tien' a biindeh a'tɔ? A'mɔ, bɛ tien' a séreh a'ninje? Ti'kɛ li jo kí sere Uwien ya nun bó, nɛ wɔ rɪ bu tɛ tibuur. <sup>11</sup>Kimɛ nɪ kele' \*Uwien ya gbɔnku ni ki ye:

«Min Yonbdaan wà fuobe nɛ len' ki ye:  
nisaal kɛ nisaal li gbaan n'nintuɔli,  
kí yàare u'ñɔbu kí ye min nɛ yé Uwien.»

<sup>12</sup>Nɛn saan nɛ unil kɛ li tɔke [Uwien] u tien' ma bo.

### *Uba la cère u'tɔ rɪ tùre Uwien ya sɛn ni*

<sup>13</sup>Nɛn bo, cère mɛn ti dàan' tɔb ya biinm. Ni li cɛ nà bo si: ni la tien' niba nè rɪ tuln ni'yɔ Uwien ya sɛn ni, kí cère wɔ rɪ kɔ libiil ni. <sup>14</sup>Yonbdaan \*Yesu bo, n mɔnbe ki bɛn ki ye jier tuba ɲa yé jɔknt. Unil ye tijier tuba yé tijɔknt la, tù yé tijɔknt wɔn baba bo nɛ. <sup>15</sup>A jinh tijier ki bɛn ki ye nɪ li saa a'tɔ ya yɛnm la, ɲa ji kpe yíem ya sɛn. La cère Kristo kpo' unil wà bo nnɔ rɪ juore fɛnm a jinh tijier tà nnɔ bo. <sup>16</sup>La cère mɛn nibonn nà mɔn ki de' nɛ nnɔ rɪ li yé nibonn nà bi'tɔb li suke nɛ ni'bo. <sup>17</sup>Kimɛ Uwien ya bɛl ɲa yé jim nin ñunm ya gbɛr. Li yé tibont tà \*Mifuoñaanm dienh tɛ tù nnɔ ya gbɛr nɛ. Tun si: tigbɛmɔnt nin uyɛnduɔn nin uyɛnsɔnge. <sup>18</sup>Unil ɲmɔbe mi ya tetem, ki sɔnh ki dienh Kristo la, Uwien ya yɛnm sɔnge u'bo nɛ, nɛ binib pèkeh wɔ.

<sup>19</sup>Nɛn bo, cère mɛn tí li nuunh nà li cère tí li kpɛ buñɔbu, ki li cère ti'ni wà kɛ rɪ li faakreh mitekjim ni. <sup>20</sup>La saah Uwien ya tuonl tijier bo. Imɔn, jier tuba ɲa yé jɔknt, ama nà bre si: unil li ji tijier tà nè rɪ tuln u'tɔ Uwien ya sɛn ni nɛ. <sup>21</sup>Nà mɔn si: á dàan tinɔnt nin midaam nin tijier tà kɛ li tuln a'yɔ Uwien ya sɛn ni nɛ. <sup>22</sup>A'tekjim bo a ɲmɔbe iyɛnmaale kɛ tu ya bont bo la, cère nè rɪ li te a'fɛl ni Uwien ya nun bó. Unil wà jɛke' wɔ rɪ tien nibonn u'yɛnmaale ɲa biindeh wɔ la, Uwien ya mɔnm te u'bo nɛ. <sup>23</sup>Ama unil jinh tijier ki jieh la, u biindeh u'ba nɛ Uwien ya nun bó. Udaan jieh ma nnɔ, wa teh mitekjim ye ma bo, kimɛ nà kɛ ɲa yé tekjim yaann yé ibiɛre nɛ.

## 15

### *Li toreh mɛn tɔb bɛ rɪ faake mitekjim ni*

<sup>1</sup>Tinbi bà faa mitekjim ni nnɔ, nɪ mɔn tí li toreh bà ɲa faa tekjim ni nnɔ nɛ bi'jiint ni, ki la li nuunh tí li teh ti'yɛnm yíe ma. <sup>2</sup>Cère mɛn ti'ni wà kɛ rɪ li teh nà sɔnge u'tɔ ya yɛnm, ki mɔn ki de' wɔ, kí li toreh wɔ wɔ rɪ faake mitekjim ni. <sup>3</sup>Kimɛ Kristo ɲa là nuunh wɔ rɪ li teh u'yɛnm yíe ma. Tɛn nɪ kele' ma \*Uwien ya gbɔnku ni ki ye: «Bà sukreh ɲɛ nnɔ, ya suk juore' min bo nɛ.» <sup>4</sup>Nà kɛ là kele' \*Uwien ya gbɔnku ni uyo bo nnɔ, nɪ là kele' nè rɪ wɔkn tɛ nɛ. Nɪ là kele' nè rɪ de tɛ kuminku nin uyɛnduɔn ɲɔ tí li ɲmɔbe lidɛndɛnl nɛ. <sup>5</sup>Uwien wà yé kuminku nin uyɛnduɔn ya daan nnɔ, rɪ cère ní li lienh ki ciuh tɔb bó \*Yesu Kristo yíe ma bo, <sup>6</sup>ɲɔ ni'kɛ rɪ taa iyɛnmaale iba kí kpaan buñɔbu, kí pèke Uwien, ti'Yonbdaan \*Yesu Kristo ya Baa.

*Kristo baa' unil kɛ bo nɛ*

<sup>7</sup> Nɛn bo, li teknh mɛn tɔb tɛn Kristo teke' nɛ ma ɲɔ nɛ́ rí de Uwien ukpíeke. <sup>8</sup> N tɔkeh nɛ nɛ, Kristo là tien' \*Sufmbɛ ya tonsɔnl, ɲɔ Uwien là pùon' bi'yaajɛb nà nnɔ nɛ́ rí tien nɛ. Nɛn nɛ wɔngɛh ki teh Uwien yé umɛmɔndaan. <sup>9</sup> Kristo baa' ɲɔ bà ɲa yé \*Sufmbɛ mɔ́ rí kpíeke Uwien kí ñɛ u muɔh binib micɛɛkm ma nnɔ bo nɛ tɛn nǐ kele' ma \*Uwien ya gbɔnku ni ki ye:

«Nɛn bo nɛ n li pèke ɲɛ inibol kɛ ni,  
kí gè iyuon kí donde ɲɛ.»

<sup>10</sup> Nǐ tí kele' ki ye:

«Ninbi inibotɔ nnɔ,  
li poknh mɛn nin Uwien ya nib.» <sup>11</sup> Nǐ tí liebe' ki kele' ki ye:

«Ninbi inibotɔ kɛ,  
li pèkeh mɛn Yonbdaan,  
inibol kɛ rí li dondeh wɔ.»

<sup>12</sup> Esayi mɔ́ là len' ki ye:

«Unil uba li ñɛ Yɛse ya bol ni,  
wɔn nɛ li fii kí li ɲmɔbe mituɔm inibol kɛ bo,  
inibol kɛ li ɲmɔbe lidɛndɛnl wɔn bo nɛ.»

<sup>13</sup> Uwien wà yé lidɛndɛnl ya daan, rí de nɛ uyɛnsɔnge nin uyɛnduɔn kí gbien isɛn kɛ ni, kí ñɛ ni'tekjim bo, ɲɔ \*Mifuoñaanm ya tuɔm rí cère ni'dɛndɛnl nnɔ rí li yɛbreh ki gbiekeh.

### *Pɔl lienh u'tuonl bo*

<sup>14</sup> N'yaabɛ, ninbi ya bùol wɔn, min nin n'yul bɛn n'yɛnm ni ki ye ni'nimɔnt yɛbe ki gbien', ni ɲmɔbe mibɛnm isɛn kɛ ni, ki li fre kí li gbiereh tɔb. <sup>15</sup> Nin nɛn kɛ n mɛnge' lifɛl kí kele' kugbɔnku kuu ni nibɛmbɛ saan, ɲɔ rí tiere nɛ tigbɛr tà ni kpíe' ki cii' tù ɲɔ nɛ. N kele' nnɔ kí ñɛ Uwien là de' nni bupaabu bùa <sup>16</sup> kí tien' nni \*Yesu Kristo ya tonsɔnl bà ɲa yé \*Sufmbɛ saan nnɔ nɛ. N sɔnh lituonl nnɔ tɛn utɔtuɔrke nɛ, kí tɔkeh bà ɲa yé \*Sufmbɛ nnɔ Uwien ya gbɛmɔnmɔnt, ɲɔ bɛ rí li yé lituɔrl là \*Mifuoñaanm cère' lí yé Uwien yaal, u'yɛnm sɔnge lí'bo. <sup>17</sup> \*Yesu Kristo bo nɛ n li fre kí jɛbn n'ba n sɔnh lituonl là ki dienh Uwien nnɔ bo. <sup>18</sup> Kimɛ ma rí fre kí mɛnge fɛl kí len niba bo, kí kɛnde Kristo taa' nni n sɔn' lituonl là ki cère' bà ɲa yé \*Sufmbɛ boh Uwien nnɔ bo. N'lenm nin n'tuon ni nɛ u tien' nɛ, <sup>19</sup> kí ñɛ miyɔkm ya bont nin Uwien ya Fuoñaanm ya tuɔm bo. Nnɔ nɛ n fre' kí tɔke' Kristo ya gbɛmɔnmɔnt ni'ke saan, kí ñɛn' Yerusalem kí tǐ baa' Iliri ya tinfɛnm ni. <sup>20</sup> N'nun là mɔn rí tɔke tigbɛmɔnmɔnt nnɔ nib ɲa laan là cii' Kristo ya yel nà saan nnɔ nɛ, kimɛ ma là yíe rí ɲuɔn uba ya tɛnpuul bo. <sup>21</sup> N là yíe rí tien tɛn nǐ kele' ma \*Uwien ya gbɔnku ni nnɔ nɛ. Nǐ kele' ki ye:

«Ba là tɔke' binib bà u'gbɛr nnɔ li lɛ wɔ,  
ba ɲa là cii' u'gbɛr nnɔ li cii' tù.»

### *Pɔl yíe wɔ́ rí jo Erom bó*

<sup>22</sup> Nɛn nɛ là tuu ki piendeh nni kí cère' ma fre' kí baa' ni'saan. <sup>23</sup> Fɛnfɛnnɔ ma ji ɲmɔbe tuonl iten nnɔ ni. N ñɛn' ibin ibin kí nuunh rí baa ni'saan, nɛ ka laa' bɔnl. <sup>24</sup> Ama n yíe rí jo España. N daan n joh nɛ la, rí ñɛ kí lɛ nɛ, kí jonde ni'tɔntɔkn bo waamu ɲɔ ní tore nni rí baa ni'bó.

<sup>25</sup> Ama fɛnfɛnnɔ, n laan joh Yerusalem nɛ Uwien ya nib ya torm bo. <sup>26</sup> Kimɛ Kristo yaab bà te Maseduɔnn nin Akayi ya tinfɛnm ni nnɔ cèkre' bi'yɛnm bɛ rí tore Kristo yaab bà yé bijiinb ki te Yerusalem ni nnɔ. <sup>27</sup> Imɔn, bi là cèkre' bi'yɛnm nɛ, nɛ nǐ li bi kpɛ bɛ rí tore bɛ nɛ. Kimɛ \*Sufmbɛ laa' Uwien ya mɔnm mà nnɔ, bi gbiire' mɛ́ nin bà ɲa yé \*Sufmbɛ nɛ. Nɛn bo nɛ nǐ kpɛ bà ɲa yé \*Sufmbɛ mɔ́ rí gbiire bi'bont nin Sufmbɛ. <sup>28</sup> N taan' mipum nnɔ kí gben', kí taa' kí jon' Yerusalem kí tǐ de' bɛ la, n li ñɛ ni'saan nɛ kí yaan kí jo España ya du bó. <sup>29</sup> Nɛ n bɛn ki ye n we ní ni'saan la, n li baa nin Kristo ya mɔnm mà yɛbe nɛ.

<sup>30</sup> N'yaabɛ, ti'Yonbdaan \*Yesu Kristo bo nin \*Mifuoñaanm ya yíem bo, nɛ n gbáanh nɛ, ní tore nni kí li kàareh Uwien kí dienh nni, <sup>31</sup> ɲɔ wɔ́ rí ñɛn nni Sude ya tugbɛndɛn

ya nuɔ ni, kí li kàareh wɔ mɔ ki teh wɔ rí cèrè mipum mà n tuke mè ki joh Yerusalem bó nnɔ, Uwien ya nib rí tí teke mè mɔnmɔnm. <sup>32</sup> Nnɔ nɛ Uwien tuo' la, n li baa ni'saan nin uyensange, kí fuore waamu. <sup>33</sup> Uwien wà yé uyenduɔn ya daan rí li te nin ni'kɛ. Ami.

## 16

### *Ifuonde*

<sup>1</sup> Tɔ, n yíe ní teke ti'ninsɛ Febe nɛ. U yé wà sɔnh Kristo ya taanl là te Sankre ya du ni nnɔ ni nɛ. <sup>2</sup> Yonbdaan ya yel bo, teke mɛn wɔ tɛn nì kpɛ bɛ rí li teknh Uwien ya nib ma bo. Uyo wà kɛ u lá ciɛke ní tore wɔ la, ní tore wɔ. Kime wɔn mɔnɔn là tore' binib bi yɛbe. U là tore' min mɔnɔn.

<sup>3</sup> Ní fuonde Prisil nin Akilas kí de nni. Bi yé n'tonsɔnlieb nɛ \*Yesu Kristo ya tuonl ni. <sup>4</sup> Bi là nuunh bɛ rí n̄mɛn min nɛ ki tí benh bɛ rí kpo. Nɛn bo nɛ n faareh bɛ. Na yé min baba nɛ faareh bɛ, Kristo ya táan yaab bà n̄a yé \*Sufmbɛ nnɔ mɔ kɛ faareh bɛ nɛ. <sup>5</sup> Ní fuonde Kristo yaab bà taakeh bi'den ki kàareh nnɔ mɔ kí de nni. Ní fuonde n'jɔ Epayinɛt kí de nni. Wɔn nɛ kpɛ' ki teke' Kristo ki jin' Asi ya tinfɛnm ni. <sup>6</sup> Ní fuonde Mari kí de nni. U'gbɛnɛnt ben' ni'bo cɛɛn nɛ. <sup>7</sup> Ní fuonde n'ninjiɛb Andronikus nin Yuniyas. Min nin bɛn nɛ là te lipɛkl ni. Bi n̄mɔbe liyel \*Yesu ya tondb saan. Bi kpɛ' ki teke' Kristo ki jin' nin nni mɔnɔn.

<sup>8</sup> Ní fuonde n'jɔ Ampliyatus kí de nni. N yíe wɔ ki gbien' Yonbdaan bo nɛ. <sup>9</sup> Ní fuonde n'jɔ Urbɛn. U yé ti'tonsɔnlie nɛ Kristo ya tuonl ni. Ní fuonde n'jɔ Stakis mɔ kí de nni. <sup>10</sup> Ní fuonde Apɛlɛs wà wuɔn' ki ye u mɔnbe ki yé Kristo yɔ nnɔ kí de nni. Ní fuonde Aristobul nin u'den yaab. <sup>11</sup> Ní fuonde n'den yɔ Herodiyɔn, kí fuonde Narsis nin u'den yaab bà pɛ Yonbdaan bo nnɔ. <sup>12</sup> Ní fuonde Trifenn nin Trifos bà ya gbɛnɛnt ben' Yonbdaan ya tuonl ni nnɔ, kí fuonde ti'jɔ Pɛrsid wà mɔ ya gbɛnɛnt ben' Yonbdaan ya tuonl ni nnɔ. <sup>13</sup> Ní fuonde Yonbdaan ya tonsɔnmɔn Lufus nin u'naa wà yé n'mɔ ya naa nnɔ. <sup>14</sup> Ní fuonde Asɛnkirt nin Flegon nin Hɛrmɛs, kí fuonde Patrobas nin Hɛrmas nin ti'ninjiɛb bà te bi'saan nnɔ. <sup>15</sup> Ní fuonde Filolɔg nin Yuli, kí fuonde Nere nin u'ninsɛ nin Olimpás nin Uwien ya nib bà kɛ te bi'saan nnɔ. <sup>16</sup> Ní fuonde ni'tɔb mɔnmɔnm. Kristo ya táan yaab kɛ fuondɛh nɛ.

### *Igbierfɔrkɛ*

<sup>17</sup> N'yaabɛ, n gbáanh nɛ nɛ, liike mɛn ni'yul bo nin binib bà boreh nɛ ki cèrɛh ni tùrɛh nnɔ. Bɛn nɛ niɛh nin bi là tɔkɛ' nɛ Uwien ya gbɛr tà nnɔ. Ni la nɛkndɛh bi ya nib, <sup>18</sup> kime ba yé ti'Yonbdaan Kristo ya tonsɔnb. Bi sɔnh bi'pɔr bo nɛ, nɛ ki n̄mɔbe uñɔnmaa, ki lɛrɛh binib bà ya bɛnm n̄a yɛbe. <sup>19</sup> Ninbi bɛn wɔn, unil kɛ bɛn ni n̄mɔbe mibom ma bo. Nɛn nɛ cèrɛ' n'yɛnm sɔngɛ ni'bo. N yíe ní li n̄mɔbe miyɛnfuom kí gbien, kí li teh nà mɔn nɛ, kí li ceke ki lɔkɛh nà bre. <sup>20</sup> Na rí wuɔkɛ Uwien, uyenduɔn ya daan, li cèrɛ ni tɛ kí mɛrɛ \*Satan. Ti'Yonbdaan \*Yesu rí juokɛ nɛ.

<sup>21</sup> N'tonsɔnlie Timote fuondɛh nɛ. N'den yaab Lusiyus nin Sasɔn nin Sosipatɛr mɔ fuondɛh nɛ.

<sup>22</sup> Min Tɛtiyus wà Pɔl cèrɛ' n kɛlɛ' kugbɔnku kuu nnɔ mɔ fuondɛh nɛ Yonbdaan ya yel bo.\*

<sup>23</sup> Gayus wà teke' min Pɔl nin Kristo ya taanl yaab kɛ ya cɛnku nnɔ mɔ fuondɛh nɛ. Erat wà n̄uuke udu wuu ya like nnɔ mɔ fuondɛh nɛ. Ti'ninje Katus mɔ fuondɛh nɛ.

[<sup>24</sup> Yonbdaan \*Yesu Kristo rí juokɛ nɛ. Ami.]†

<sup>25</sup> Cèrɛ mɛn tí kpɛiɛkɛ Uwien. U n̄mɔbe mituɔm mà li cèrɛ tí li faa mitekjim ni. N tɔkɛh \*Yesu Kristo ya gbɛmɔnmɔnt tà nnɔ nɛ ye nnɔ. Tù là buɔ nɛ haali uyo bo nɛ Uwien kpɛiɛr' tù, <sup>26</sup> kí cèrɛ' fɛnfɛnnɔ tù te upaan bo. \*Uwien ya n̄ɔbonsɔknɔ là kɛlɛ' tù bi'gbɔnt ni ma nnɔ nɛ cèrɛ' tù ji te kuwenwenku ni. Uwien wà tuu ki te nnɔ, nɛ là sien' ki ye inibol kɛ rí

\* **16:22** Pɔl nin u'yul n̄a cinbe ki kɛlɛ' kugbɔnku bugbɛn. U lienh nɛ uje uba cengeh ki kíɛh bi yih wɔ Tɛtiyus. † **16:24** Bi kpɛi' ki kɛlɛ' tigbɔnt tà nnɔ ya tuba ni migbiirm 24 n̄a te tu'ni.



cii t̀̀, ̀̀ k̀̀ li ̀̀ m̀̀ be mib̀̀ ǹ̀ m̀̀ k̀̀ teke ẁ̀ k̀̀ ji k̀̀ li boh ẁ̀. <sup>27</sup>Uwien baba ǹ̀ ỳ̀ uỳ̀ nfodaan, ki k̀̀ p̀̀ uk̀̀ r̀̀ ike uyo ẁ̀ ̀̀ ̀̀ m̀̀ be gbenm \*Yesu Kristo bo. Ami.

## Kugbɔnkpiɛku kùà Pɔl kɛle' ki de' Korɛnt yaab nnɔ Nà wɔngɛh kugbɔnku kuu te ma bo

Pɔl ya sɛn ya jom nle bo nɛ u caan' Kristo ya taanl là te Korɛnt ni nnɔ. Korɛnt yé Grɛkmbɛ ya ducɛnciɛn ya uba nɛ. Udu nnɔ ya ñɛrsienbùon bo nɛ cère' u là ñmɔbe lifaal ki gbien'. Binib bà yɛbe là fuobe fɛnfɛnm nɛ udu nnɔ ni, ki pɛ ibule bo.

Pɔl cii' bi ye Kristo yaab ni biba mɔ fuobe fɛnfɛnm nɛ (1:11; 7:11). Udu nnɔ ya nib ya tetem bo nin bi là lienh Kristo yaab bo tigbɛr tà nnɔ, nɛ cère' bi kɛle' kugbɔnku ki niire' Pɔl bi li te ma bo. Nɛ Pɔl kɛle' kugbɔnku kuu ki jiin' bɛ bi'niire nnɔ.

Kí cin liyul 1 kí tí baa iyul 4, Pɔl ye binib bà kɛ tɔkeh Kristo ya gbɛmɔnmɔnt nnɔ, kɛ sɔnh lituonbaabl nɛ. Nɛn bo nɛ nà kpɛ bɛ ní li findeh nin tɔb.

Kí cin iyul 5 kí tí baa iyul 11:16, Pɔl ye Kristo yaab ña ji yé yonbe. U ye unil yé Kristo yɔ ki biɛ ki teh fɛnfɛnm la, bɛ ní pien wɔ (iyul 5–6). U wuɔn' bɛ bi li te ma bo upiikuɔn ya sɛn ni (iyul 7) nin bi li fuobe ma bo nin bà ña yé Kristo yaab (iyul 8–10). U sureh bɛ bɛ ní li nuunh tɔb ya mɔnm, kí li boh tɔb nɛ, kí li yíe tɔb, ki la ñmɔbe pàpàare (iyul 13).

Iyul 15 ni, Pɔl ye Uwien mɛkre' Kristo ma nnɔ, u li mɛkre bitɛnkpiib mɔ. Pɔl sureh Korɛnt yaab bɛ ní taan mipum kí tí tore Kristo yaab bà yé bijiinb Yerusalɛm bó. U tí fɔre' nin ifuonde nɛ (16).

### *Ifuonde*

<sup>1</sup> Uwien ya yíem bo nɛ u yin' min Pɔl, ní li yé \*Yesu Kristo ya tond. Min nin tí'ninjɛ Sɔstɛnn nɛ kíɛh kugbɔnku kuu <sup>2</sup> tí de Uwien ya taanl yaab bà te Korɛnt ya du ni nnɔ. U gɛnde' bɛ kí ñɛ \*Yesu Kristo bo nɛ ki tien' u'yaab. U gɛnde' bɛ bɛ ní li ñmɔbe mitetem mà dɛkre' u'bo nin binib bà kɛ muɔh ki yih Yonbdaan \*Yesu Kristo ya yel ní kɛ saan nnɔ nɛ. U yé tinbi nin bɛn kɛ ya Yonbdaan nɛ. <sup>3</sup> Tí' Baa Uwien nin Yonbdaan \*Yesu Kristo ní juoke nɛ, kí de nɛ uyenduɔn.

### *Pɔl faareh Uwien u tien' Korɛnt yaab mimɔnm mà nnɔ bo*

<sup>4</sup> N tuu ki faareh n'Wien ni'bo kí ñɛ u tien' nɛ mimɔnm ni yé \*Yesu Kristo yaab ma nnɔ bo nɛ. <sup>5</sup> Kimɛ ni yé u'yaab ma nnɔ nɛ Uwien tien' nɛ mimɔnm ki gbien' isɛn kɛ ni, milɛnm nin mibɛnm kɛ ni, <sup>6</sup> kí ñɛ bi tɔke' nɛ tigbɛr tà Kristo bo, ni teke' tù, ki cère' tù kpɛ' iñaan ní'ni nnɔ bo. <sup>7</sup> Nɛn bo, ninbi bà gu nin inunmɔn lidaali là tí'Yonbdaan \*Yesu Kristo li ñɛn u'ba upaan bo nnɔ Uwien ya paabu buba mɔnɔn ña ji pɔre' nɛ. <sup>8</sup> Wɔn nɛ li cère ní li faa kí tí fɔre ñɔ lidaali là tí'Yonbdaan \*Yesu [Kristo] li baa ní nnɔ bi la lɛ bi li biin nɛ nà bo. <sup>9</sup> Uwien yé umɛmɔndaan nɛ. Wɔn nɛ yin' nɛ ní taan nin u'Bijɛ tí'Yonbdaan \*Yesu Kristo.

### *Miborm mà te Kristo ya taanl yaab ni*

<sup>10</sup> N'yaabɛ, tí'Yonbdaan \*Yesu Kristo ya yel bo nɛ n sureh nɛ ní li lienh ki ciuh tɔb bó, ki la cère borm ní li te ní'ni. Ama ní li kpɛ buñɔbu mɔnmɔnm, kí li ñmɔbe iyɛnmaale iba, kí li kpɛ usɛn uba. <sup>11</sup> Tɔ, n'yaabɛ, Kolowe\* den yaab tɔke' nni ki ye ifinfinde te ní'ni. <sup>12</sup> N ye ní len nà si: ní'ni biba lienh ki teh bɛn pɛ Pɔl bo nɛ, bitɔb teh bɛn pɛ Apolos bo nɛ, bitɔb teh bɛn pɛ Píɛr† bo nɛ, bitɔb mɔ teh bɛn pɛ Kristo bo nɛ. <sup>13</sup> Kristo bobore' nɛ-ɛɛ? Bi kpɛ' Pɔl nɛ udɔpɔnpɔn bo ní'bo-oo? Pɔl ya yel bo nɛ bi sɛi' nɛ Uwien ya ñunm-ii? <sup>14</sup> N faareh Uwien, Kripus nin Gayus baba ña ní la, ma sɛi' uba ní'ni Wien ya ñunm. <sup>15</sup> Nɛn bo, uba ña ní fre kí ye bi sɛi' nɛ Uwien ya ñunm n ya yel bo nɛ. <sup>16</sup> Oo! N sɛi' Sitefanás nin u'den yaab mɔ.

\* **1:11** Kolowe yé upii nɛ. † **1:12** Ní kɛle' migbiirm miɛ ni ki yé Kefasi nɛ. Bi líɛbe' ki yih wɔn nɛ Píɛr. Liike San 1:42.

Ma teke' ki jin' ki ye n liebe' ki s̄i' uba Uwien ya ñunm ki pukn'. <sup>17</sup> Kimɛ Kristo ɲa s̄on' nni ñ li siih binib Uwien ya ñunm. U s̄on' nni ñ li t̄akeh binib u'gbɛm̄onm̄ont nɛ, ki la tuuke unisaal ya yɛnfogbɛr ɲɔ \*Yesu ya kuum ud̄ɔp̄ɔnp̄ɔn bo la juore fɛnm.

*Yesu Kristo nɛ yé Uwien ya tuóm nin u'yɛnfuom*

<sup>18</sup> Im̄on, Kristo ya kuum ud̄ɔp̄ɔnp̄ɔn bo yé tiwaargbɛr nɛ bà pɛ fɛnm ya sɛn bo, ama tinbi bà Uwien ɲmiɛndeh tɛ nn̄ɔ, tinbi bo ñi yé Uwien ya tuóm nɛ. <sup>19</sup> Kimɛ ñi kɛle' \*Uwien ya gb̄onku ni ki ye Uwien ye:

«N li gben biyɛnfodɛnb ya yɛnfuom,  
kí c̄ɛrɛ bibɛnbɛnb ya bɛnm ñ juore fɛnm.»

<sup>20</sup> Tɔ, uyɛnfodaan ji te la? Yiko ya w̄onw̄oknl ji te la? Miniɛm ya nil ji te la uyo wuu n̄ɔ? Uwien wuon' ki ye uɲɛndun ya yɛnfuom yé liwaarl nɛ. <sup>21</sup> Kimɛ uɲɛndun wuu ya nib nin bi'yɛnfuom kɛ ba fre' ki bɛnde' Uwien u'yɛnfuom ni. Nɛn bo nɛ Uwien c̄ɛkre' u'yɛnm w̄ɔ ñi c̄ɛrɛ binib bà teke' Kristo ki jin' nn̄ɔ ñi ɲmɛrɛ kí ñi tiwaargbɛr tà ti kpaandeh tù ki t̄akeh binib nn̄ɔ bo. <sup>22</sup> \*Sufmbɛ nuunh bɛ ñi lɛ miȳokm ya bont nɛ, nɛ Grɛkmbɛ nuunh miyɛnfuom. <sup>23</sup> Ama tinbi t̄akeh binib bi kpɛ' Kristo ud̄ɔp̄ɔnp̄ɔn bo ma nn̄ɔ ya gbɛr nɛ. Tù yé tigbɛr tà c̄okreh \*Sufmbɛ nɛ, ki yé tiwaargbɛr bà ɲa yé \*Sufmbɛ bo. <sup>24</sup> Ama Kristo yé Uwien ya tuóm nin u'yɛnfuom nɛ binib bà Uwien yin' bɛ nn̄ɔ bo; \*Sufmbɛ nin bà ɲa yé \*Sufmbɛ kɛ. <sup>25</sup> Kimɛ binib yih Uwien ya tuonl là liwaartuonl nn̄ɔ cɛn' unisaal ya yɛnfotuonl, nɛ u'jiint m̄ɔ ɲm̄ɔbɛ mituóm ki cɛn' unisaal ya tuóm.

<sup>26</sup> N'yaabɛ, tiɛrɛ mɛn Uwien yin' nɛ ki laa' ni yé bidɛnb bà. Unisaal bo ni'ni biyɛnfodɛnb nin inigbengbeng ɲa yɛbɛ, nɛ ba yé idɛn yà ɲm̄ɔbɛ mituóm yaab m̄ɔ ɲa yɛbɛ. <sup>27</sup> Ama binib likeh bà ki teh ba bɛn niba nn̄ɔ, Uwien gɛnde' bɛn nɛ w̄ɔ ñi jin bi yih bà biyɛnfodɛnb nn̄ɔ ifɛ, ki gɛnde' bi yih bà ijiin nn̄ɔ w̄ɔ ñi jin bi yih bà bifɛfaab nn̄ɔ ifɛ. <sup>28</sup> Binib likeh bà ki teh ba ɲm̄ɔbɛ pukm uɲɛndun ni ki yindɛh bɛ, ki yih bɛ fɛnm nn̄ɔ, Uwien gɛnde' bɛn nɛ, ki tien' binib likeh bà ki teh bi ɲm̄ɔbɛ mipukm nn̄ɔ fɛnm. <sup>29</sup> U tien' nn̄ɔ ɲɔ uba la li jɛbnh u'ba w̄on Uwien ya nun bó nɛ. <sup>30</sup> W̄on nɛ taan' ninbi nin \*Yesu Kristo, ki c̄ɛrɛ' Kristo yé ti'bo miyɛnfuom. W̄on Kristo bo nɛ u bù' tɛ bigbɛm̄ɔndɛnb, ki gɛnde' tɛ tí li yé u'yaab, ki dɛ' tɛ ki wiɛ'. <sup>31</sup> Nɛn bo, ñi te tɛn nà kɛle' \*Uwien ya gb̄onku ni nn̄ɔ nɛ. Ñi kɛle' ki ye: «Unil ye w̄ɔ ñi wuon u'ba la, w̄ɔ ñi wuon u'ba Yonbdaan bo.»

## 2

*P̄al t̄akeh binib bi kpɛ' Kristo ud̄ɔp̄ɔnp̄ɔn bo ma nn̄ɔ ya gbɛr*

<sup>1</sup> N'yaabɛ, min m̄on̄on là baa' ni'saan ma nn̄ɔ, ma baa' nin in̄ɔbon yà ya ciim faa, ka baa' nin binib ya yɛnfuom ñi là t̄ake nɛ Uwien ya bonb̄alkaar ya gbɛr, <sup>2</sup> kimɛ ma là jɛke' ñi t̄ake nɛ gbɛr tuba ki kɛnde' \*Yesu Kristo ya gbɛr, w̄on wà bi kpɛ' w̄ɔ ud̄ɔp̄ɔnp̄ɔn bo nn̄ɔ ya gbɛr. <sup>3</sup> N là te ni'saan ma nn̄ɔ n là yé ujiin nɛ, ki fɛngɛ, nɛ n'gbɛnɛnt ɲoh pepebu. <sup>4</sup> N là te ni'saan ma nn̄ɔ, na yé n là bɛn milɛnm nɛ bii n là taa' miyɛnfuom nɛ ki w̄okn' nɛ bii ki t̄ake' nɛ tigbɛm̄onm̄ont nn̄ɔ. Ama \*Mifuoñaanm nɛ w̄ongɛh mi'tuóm n teh nà kɛ nn̄ɔ ni, <sup>5</sup> ɲɔ ni'tekjim la li pɛ binib ya yɛnfuom bo ama mè ñi li pɛ Uwien ya tuóm bo.

*Uwien ya yɛnfuom*

<sup>6</sup> Tɔ, ti n̄in w̄oknh Kristo yaab bà tien' binicekrkaab mitekjim ni nn̄ɔ miyɛnfuom nɛ. Na yé uɲɛndun wuu ya yɛnfuom, ka yé bà ɲm̄ɔbɛ mituóm uɲɛndun bo ya yɛnfuom m̄ɔ, kimɛ bi gben' bi'gbɛr. <sup>7</sup> Tinbi t̄akeh Uwien ya yɛnfuom ya gbɛr nɛ. Tù yé tigbɛb̄alkaar tà là juore' ki buɔ nɛ. Kí yaan Uwien ñi ñɛn uɲɛndun wuu nn̄ɔ u là juɔ' ki bonde' miyɛnfuom bugbɛn w̄ɔ ñi de tɛ ukpiɛke nɛ. <sup>8</sup> Bà ɲm̄ɔbɛ mituóm uɲɛndun wuu bo ya uba m̄on̄on ɲa bɛnde' miyɛnfuom nn̄ɔ. Kimɛ bi bi bɛnde' mè la, ba bi kpɛ' Yonbdaan ukpiɛke ya daan ud̄ɔp̄ɔnp̄ɔn bo. <sup>9</sup> Ama ñi te tɛn nà kɛle' \*Uwien ya gb̄onku ni nɛ. Ñi kɛle' ki ye:

«Uwien bonde' nà ki ble' bà yíe w̄ɔ nn̄ɔ,  
nil ya nunbu ɲa tuun' ni'bo,

u'tubl ŋa cii' ni'bó,

wa li maale' ni'bó mənən.»

<sup>10</sup> U cère Mifuoŋaanm kpiire' nən nε ki wuən' tinbi. Kimε mǐ likeh ki lenh nibonn kε nε, haali tigber tà te Uwien ya fɛl bo mənən. <sup>11</sup> Na yé unisaal baba ŋa nǐ la, ŋmε li fre kí bende nà te u'fɛl bo? Nnɔ nε \*Uwien ya Fuoŋaanm baba ŋa nǐ la, uba ŋa bən nà te Uwien ya fɛl bo. <sup>12</sup> Tinbi wən, ta maaleh tən unɛndun ya nib maaleh ma bo, ama Uwien nε de' tε \*u'Fuoŋaanm ŋɔ tí fre kí bende u punh tε bupaabu bùa nnɔ. <sup>13</sup> Ti lienh nibonn nà bo nɔ, ta taah nisaal ya yɛnfuom ya nǎbon ki lienh. Ama ti lienh \*Uwien ya Fuoŋaanm ye tí len inǎbon yà nε. Ti teh nnɔ ma nnɔ ti taah inǎbon yà nǐh nǐ \*Uwien ya Fuoŋaanm saan nε ki wɔknh binib bà \*Uwien ya Fuoŋaanm te bi'ni\*. <sup>14</sup> Unil wà ŋmɔbe inisaalyɛnmaale baba ŋa nǐ fre kí teke \*Uwien ya Fuoŋaanm ya gber. Wən bo tù yé tiwaargber nε, nε wa nǐ fre kí cii tu'tingi, kimε \*Uwien ya Fuoŋaanm nε cèreh binib bende h tù. <sup>15</sup> Ama wà ŋmɔbe \*Uwien ya Fuoŋaanm wən li fre kí bende tibont kε ya tingi, nε uba ŋa nǐ fre kí bende udaan ya yɛnmaale. <sup>16</sup> Nǐ te tən nà kele' \*Uwien ya gbɔnku ni nε. Nǐ kele' ki ye:

«ŋmε bən Yonbdaan ya yɛnmaale?

ŋmε li fre kí gbiere wɔ?»

Ama tinbi wən, ti ŋmɔbe Kristo ya yɛnmaale nε.

### 3

#### *Uwien ya tonsɔnl ya tuonl*

<sup>1</sup> N'yaabε, ma fre' ki len'\* nin nε tən n bi li len ma nin bà ŋmɔbe \*Mifuoŋaanm nnɔ. Ama n len' nin nε tən ni yé binib bà pε minisaaltetem bo nε, ki yé mucɛnfɛndmu Kristo ya sɛn ni. <sup>2</sup> N là de' nε mibiim nε, ma là de' nε jier tà kpiεke, kimε na là li fre kí ji tù. Fɛnfɛnnɔ mənən na li li biε kí fre kí ji tù, <sup>3</sup> kimε ni laan li biε ki pε minisaaltetem bo nε. Iponponbe nin ikɔnkɔn yà te ni'ni nnɔ nε wɔngɛh ki teh ni biε ki ŋmɔbe minisaaltetem nε, ki ŋaake ki teh unisaal teh nà baba. <sup>4</sup> Ni'ni biba lienh ki teh bən pε Pɔl bo nε, bitɔb lienh ki teh bən pε Apolos bo ma nnɔ, na pε nisaaltetem bo nǐnɔ-ɔɔ? <sup>5</sup> Apolos yé bε nε? Bii min Pɔl yé bε nε? Ti yé Uwien ya tonsɔnb nε. Nε kí nǐ tinbi bo Uwien cère' ni teke' \*Yesu Kristo ki jin'. Ti'ni wà kε sɔn' Yonbdaan de' wɔ lituonl là nε. <sup>6</sup> Min Pɔl caan' busubu nε, nε Apolos jɔke' bù miñunm, ama Uwien nε cèreh bù kpiɛnh. <sup>7</sup> Nən bo, wà caakeh nin wà jɔknh miñunm kε ŋa yé niba, ama Uwien wà cèreh nǐ kpiɛnh nnɔ nε yé niba. <sup>8</sup> Wà caakeh nin wà jɔknh kε te miba nε, nε wà kε li lε u'suul u'tiɛma tuonl bo nε. <sup>9</sup> Kimε ti tε ki sɔnh Uwien ya tuonl nε†. Ni te tən Uwien ya kpàabu nε, ki te tən Uwien ya duku mɔ.

<sup>10</sup> Uwien nε de' nni bupaabu ki cère' n yé udumɛciɛn wà ŋmɔbe miyɛnfuom, ki pu' kuduku ya tɛnpuul, nε uba ji ŋuɔndeh. Ama unil kε nǐ liike u'yul bo nin u ŋuɔndeh ma bo. <sup>11</sup> Kimε uba ŋa ji li fre kí pu tɛnputɔl ki kɛnde' là te nnɔ bo; lɛn si: \*Yesu Kristo. <sup>12</sup> Uba li fre kí taa miñɔkm bii ilike ya kur bii iten yà mən ki ŋmɔbe kudaaku kí ŋuɔn litɛnpuul nnɔ bo. Utɔ mɔ li fre kí taa idɔ bii timuɔr bii ikεk kí caan litɛnpuul nnɔ bo. <sup>13</sup> Unil kε ya tuonl lá li nǐ upaan bo Uwien li bu binib tibuur lidaali là nnɔ nε. Kimε ni'daali li baa nin umu nε. Umu nnɔ nε li bikn wà kε ya tuonl kí wuən li yé là ba. <sup>14</sup> Wà kε mu ŋa wɛn' u ŋuɔn' nà litɛnpuul nnɔ bo la, u li lε u'tuonl ya suul. <sup>15</sup> Wà kε umu wɛn' u ŋuɔn' nà la, u'tuonl juore' fɛnm nε. Wən bugbɛn nǐn li ŋmɛre ama u li te tən unil wà càare' umu ni nε ki ŋmɛre'.

<sup>16</sup> Na bən ki ye ni yé Uwien ya duku nε, nε \*u'Fuoŋaanm te ni'ni-ii? <sup>17</sup> Unil bere' Uwien ya duku la, Uwien li gbɛn udaan ya gber nε, kimε kù yé wən Uwien ya tiɛma duku nε‡, nε ninbi nε yé kuduku bugbɛn.

\* **2:13** Migbiirm miε ya fɔrm ya ciim te bolm mile bo nε: ki wɔknh binib bà Uwien ya Fuoŋaanm te bi'ni bii ki tɔkeh binib Mifuoŋaanm ya gber. \* **3:1** Liike Itùon 18:1-17. † **3:9** Bi li fre lɛbre ti te ki sɔnh Uwien ya tuonl kí ye tinbi nin Uwien tε ki sɔnh u'tuonl mɔ. ‡ **3:17** Bi li fre kí lɛbre kù yé wən Uwien ya tiɛma duku nε kí ye kù yé kuñaanku mɔ.

<sup>18</sup> Uba la lɛreh u'ba. Unil te ni'ni ki yih u'ba uyɛnfodaan tɛn uɲɛndun wuu ni ya nib maaleh ma bo la, wɔ́ n' kpiɛ k'í tien u'ba uwaar ɲɔ́ k'í mɔ́nbe k'í li yé uyɛnfodaan. <sup>19</sup> Kime uɲɛndun wuu ya yɛnfuom yé liwaarl nɛ Uwien bo.

N'í te tɛn nà kɛle' \*Uwien ya gbɔ́nku ni nɛ. N'í kɛle' ki ye:

«U taah biyɛnfodɛnb ya cekn nɛ ki coh bɛ.»

<sup>20</sup> N'í tí liebe' ki kɛle' ki ye:

«Yonbdaan bɛn biyɛnfodɛnb ya yɛnmaale.

U bɛn ki ye ya yé bonn.»

<sup>21</sup> Nɛn bo, uba ji la ɲmɔ́be gbengt k'í ye wɔ́n pɛ wuɔ́ bo bii wuɔ́ bo, kime nibonn kɛ yé u'yaann nɛ. <sup>22</sup> Min Pɔ́l bii Apolos bii P'ierŒ bii uɲɛndun wuu bii limiɛl bii mikuum nin tibont tà te fɛnfɛnnɔ́ nɔ́, haali nin tà we ní nnɔ́, ninbi si ni'kɛ. <sup>23</sup> Ama ni'mɔ́ yé Kristo yaab nɛ, nɛ Kristo mɔ́ yé Uwien yɔ́.

## 4

### *Pɔ́l nin Korɛnt yaab ya gber*

<sup>1</sup> Nɛn bo, unil kɛ́ n' li bɛn k'í ye ti yé Kristo ya tonsɔ́nb nɛ, ki yé binib bà Uwien taa' u'gbɛbɔ́lkaar kɛ ya bol ki ɲukn' tɛ tí taa tú k'í tɔ́ke binib. <sup>2</sup> Tɔ́, ni bɛn ki ye bi de' unil lituonl la, n'í kpe wɔ́ n' sɔ́n lè n' donbó nɛ. <sup>3</sup> Min wɔ́n, ninbi nɛ li biin nni bii tibuur ya nib mɔ́nɔ́n nɛ li biin nni la, n'baka ɲa kpe len. Min nin n'yul ɲa biindeh n'ba. <sup>4</sup> Imɔ́n, n'yɛnmaale ɲa jɛndeh nni niba bo, ama na yé nɛn nɛ wɔ́ngɛh ki teh n cuube Uwien ya nun bó. Yonbdaan nɛ yé wà buh nni tibuur. <sup>5</sup> Nɛn bo, la ci mɛn k'í bu buur tu'daali ɲa laan baa. Guure mɛn Yonbdaan n' baa k'í bu tibuur. Wɔ́n nɛ li n'ɛn tibont tà buɔ́ licin'ɲunl ni upaan bo, k'í kpiire iyɛnmaale yà te unil kɛ ya fɛl bo k'í wuɔ́n. Nɛn saan nɛ unil kɛ li lɛ u kpe kupɛnpekɛ k'í k'í Uwien saan.

<sup>6</sup> N'yaabɛ, n len' nà nɔ́, n taa' min nin Apolos ya gber nɛ kunɛnnɛnku n' gbiere nɛ, ní tekɛn ti ya taal ni ɲɔ́ ki la teh niba ki tí gɛbreh nà kɛle'. Ni la li ɲmɔ́be gbengt ki teh ni pɛ uba bo nɛ, ki nɛn utɔ́. <sup>7</sup> Bɛ wuɔ́n' ki ye a cɛn' bitɔ́b-i? A ɲmɔ́be ba ɲɔ́ Uwien ɲa de' ɲɛ nɛ? Uwien nɛ de' ɲɛ nɛ la, bɛ tien' a ji ɲmɔ́be tigbengt tɛn uba ɲa de' ɲɛ nɛ?

<sup>8</sup> Ni laa' ni yíe nà kɛ ɲɔ́-a! Ni ji yé bifáadɛnb nɛ-a, ki kpende' bi'berb nɛ tinbi juore' fɛnm-a! Imɔ́n, n bi yíe ní mɔ́nbe k'í li yé biberb nɛ, ɲɔ́ ti'mɔ́ n' tɛbn nɛ k'í li yé biberb. <sup>9</sup> Kime, min bo, n'í naan Uwien tien' tinbi Yesu ya tondb, binigbaarkaab nɛ. Ti te tɛn binib bà bi bun' bɛ tibuur ki ye bi kpe mikuum nɛ. Imɔ́n, ti yé tilaar ya bonn nɛ uɲɛndun wuu ni. Uwien ya tondb nin binib kɛ leh tɛ nɛ. <sup>10</sup> Kristo bo, tinbi te tɛn iwaar nɛ, nɛ ninbi yé biyɛnfodɛnb k'í n'ɛ ni yé Kristo yaab ma nnɔ́ bo-a! Tinbi yé ijiin nɛ, nɛ ninbi yé bifɛfaab. Bi kpiɛkreh ninbi nɛ ki yuɔ́ndeh tinbi. <sup>11</sup> Mikɔ́nm nin uɲuɲun ɲmɔ́be tɛ, haali nin fɛnfɛnnɔ́ wuɔ́. Ta ɲmɔ́be wɛngolkaar. Binib n'ih tɛ, ta ɲmɔ́be ti kɔ́ nà. <sup>12</sup> Ti jɛndeh ki sɔ́nh itùon nɛ ki jinh tí'nojɛ bo. Bi sukreh tɛ, nɛ ti teh «Uwien n'í tien bɛ u'mɔ́nm.» Bi jɛndeh tɛ, nɛ ti tuonh ijɛnd nnɔ́. <sup>13</sup> Bi lienh ki saah tɛ, nɛ ti duɔ́ndeh bi'yɛnm. Bi likeh tɛ tɛn ti yé tinagbokmuɔ́r nɛ uɲɛndun wuu ni, ki likeh tɛ tɛn ti yé tijɔ́knt ya bonn nɛ unil kɛ bo haali nin fɛnfɛnnɔ́.

<sup>14</sup> Ma kɛle' tigber bugbɛn n' jin nɛ ifɛ, ama n nuunh n' pekɛr nɛ ní kpiɛn usɛn nɛ, kime ni te tɛn n'tiɛma bumu nɛ, nɛ n yíe nɛ. <sup>15</sup> Kime ni ɲmɔ́be biwɔ́nwɔ́knɛn itur piik mɔ́nɔ́n Kristo ya sɛn ni la, ni'baa te uba nɛ. Min nɛ yé ni'baa, kime min nɛ tɔ́ke' nɛ tigbɛmɔ́nmɔ́nt nɛ ni teke' \*Yesu Kristo ki jin'. <sup>16</sup> Nɛn bo nɛ n gbáanh nɛ, ní tekɛn n'taal ni Kristo ya sɛn ni. <sup>17</sup> Nɛn bo nɛ n sɔ́n' Timote ni'saan. U sɔ́nh Yonbdaan ya tuonl ni' donbó nɛ. N yíe wɔ́ tɛn n'tiɛma buk nɛ. U li tiere nɛ n fuobe ma bo Kristo ya sɛn ni. N wɔ́knɛn nɛn nɛ ni'kɛ saan Kristo ya táan kɛ ni.

<sup>18</sup> Ni'ni biba là maaleh ki teh ma ji li baa ni'saan nɛ. Nɛn nɛ cɛre' bi gbɛngreh bi'ba. <sup>19</sup> Ama Yonbdaan tuo' la, n li baa ni'saan na n' taande. Binib bà gbɛngreh bi'ba nnɔ́ n lá baa' la, na yé n li tukn bi'lenm baba bo nɛ, n li tukn k'í liike bi'tuɔ́m mɔ́ kpe ma bo nɛ.

20 Kimɛ Uwien ya bɛl ɲa yɛ lenm ya gbɛr, li yɛ mituɔm ya gbɛr nɛ. 21 Tɔ, ni cinbe ki yɛ ba? Ni yɛ rɛ baa ni'saan nin iningbɛn nɛ bii rɛ baa kɪ li ɲmɔbe miyɛm nin uyɛnduɔn nɛ?

## 5

### *Pɔl kɔnh nin Korɛnt yaab lisɔnsɔndl bo*

1 Tɔ, bi lienh ni'kɛ saan ki teh uba te ni'ni ki teh lisɔnsɔndl liba ya bol. Bi lienh ki teh udaan diere' u'baa ya po nɛ. Haali binib bɔ ɲa pɛ Uwien ya sɛn bo mɔnɔn ɲa teh li ya sɔnsɔndl. 2 Nin nɛn kɛ nɛ ni biɛ ki ɲmɔbe tigbengt-a! Ni bi li te tɛn ni kɛ mikuum nɛ, kɪ ɲɛn udaan wɔ tien' ni ya bonn ni'ni. 3 Min ɲa te nin nɛ. Nin nɛ kɛ n likeh ki lenh nɔ kɛ teh ni'ni. Nɛn bo, n bun' udaan wɔ tien' ni ya bonn tibuur n bi te nin nɛ la, n li bu wɔ ma bo ɲɔ. 4 Nɪ taan litaanl Yonbdaan \*Yesu ya yel bo. Ni taan' la, n'yɛnmaale li te nin nɛ, Yonbdaan \*Yesu ya tuɔm mɔ te nin nɛ, 5 nɪ taa udaan kɪ cɛbe \*Satan\* wɔ rɛ ji ijɛnd u'gbɛn ni ɲɔ u'naank rɛ ɲmɛre lidaali lɔ Yonbdaan li bu binib tibuur nnɔ.

6 Ni gbɛngreh ni'ba nɔ bo nnɔ ɲa mɔn. Na bɛn ki ye bi bun' kpɔnɔyom, ki taa' kpɔnɔ ya ɲɔke waamu ki tien' len la, kpɔnɔ nnɔ kɛ nuuleh nɛ-ɛɛ? 7 Nɛn mɛn ibiɛre yɔ te ni'ni kɪ wiɛ tɛn bi wiɛnh ma kpɔnɔ ya ɲɔke wɔ saa', ki la li ɲmɔbe jɔknt, kɪ li te tɛn kpɔnɔyom mɔ bi bun' mɛ mifɛnfɛnm ka tien' ɲɔke mi'ni. Ni mɔnbe ki te tɛn kpɔnɔ wɔ ɲa ɲmɔbe ɲɔke nɛ. Kimɛ Kristo wɔ yɛ ti'Pak ya Pebuk nnɔ lɔ taa' u'ba ki tien' lituɔrl ki de' Uwien, ti'tuɔnbiɛrɛ bo nɛ. 8 Nɛn bo, ti'tetɛm kɛ ni, cɛre mɛn tɪ li jɛleh kunacɛnku, kɪ la li ɲmɔbe biɛre iba nin itɔ. Lisɔnsɔndl nin ibiɛre kɛ ya bol te tɛn kpɔnɔ ya ɲɔke nɛ. Ama tɪ li jɛleh nin iyɛnmaalmɔnmɔn nin tigbɛmɔnt. Nɛn nɛ te tɛn kpɔnɔ wɔ ɲa ɲmɔbe ɲɔke.

9 Tɔ, n lɔ kɛle' n'gbɔnku ni ki ye ni la li ɲmɔbe kɔnkɔan nin isɔnsɔnd. 10 Ma niireh kutataaku ni uyɛndun ya nib bɔ yɛ isɔnsɔnd nin binunfɔkdɛnb nin binasub nin bɔ pɛ ibule bo nnɔ. Nɪ bi yɛ bɛn la, ni bi li ɲɛ uyɛndun wuu ni nɛ. 11 N lɔ kɛle' nɔ nnɔ ya tingi si: ni la ɲmɔbe kɔnkɔan nin wɔ yih u'ba Kristo yɔ, ki biɛ ki yɛ usɔnsɔnd bii ununfɔkdaan bii wɔ pɛ ubul bo bii utɛnfuɔn bii uɔɛyibɪ bii unasɔ nɛ. Ni la taan nin ni ya nitunbu kɪ ji tijɛr mɔnɔn. 12-13 Na yɛ min nɛ li bu kɪ biin bɔ ɲa yɛ Kristo yaab, Uwien nɛ li bu kɪ biin bɛ. Bɔ yɛ Kristo yaab bɛn wɔn, ninbi nɛ li bu kɪ biin bɛn, kimɛ nɪ kɛle' \*Uwien ya gbɔnku ni ki ye: «Nɛn mɛn unibiɛrɔ ni'ni.»

## 6

### *La taah mɛn tɔb ki joh buur*

1 U lɛ sɛn bo nɛ, ni'ni wɔ kɛ nin u'tɔ laa' tigbɛr la, u taah tɔ ki joh tibuur ya dɛnb bɔ ɲa cuube Uwien saan, bɛ rɛ tɪ bu tɔ, ka rɛ cɛre Uwien ya nib rɛ tɔrɛ tɔ? 2 Na bɛn ki ye Uwien ya nib nɛ li bu uyɛndun yaab tibuur-ii? Nɪ yɛ ninbi nɛ li bu uyɛndun yaab tibuur la, bɛ tien' na ji li fre kɪ tɔrɛ ni'gbɛwawaar-i? 3 Na bɛn ki ye ti li bu Uwien ya tondb tibuur, kɪ ji niireh nin fɛnfɛnnɔ wuɔ ya gbɛr-ii? 4 Ni laa' tu ya gbɛr ya bol ni'ni la, ni taah binib bɔ Kristo ya taanl ɲa yɛ bi'gbɛr nɛ ki teh ni'buur ya nib. 5 N len' nɔ yɛ ni'fɛ nɛ. Yɛnfodaan uba mɔnɔn ɲa te ninbi Kristo yaab ni kɪ li frɛh ki tɔrɛh tigbɛr ni'ni-ii? 6 Bɛ tien' ni'ni wɔ nin u'tɔ laa' tigbɛr la, u taah tɔ ki joh tibuur ya dɛnb bɔ ɲa teke' Kristo ki jin' saan ki tɪ buh tɔ?

7 Imɔn, ni taah tɔb ki joh tibuur ma nnɔ, nɪ wuɔn' ki ye na kpɛn' sɛn nɛ. Na bi kpɛ unil tien' nɛ nɔ bre la, nɪ tuo-oo? Bii u jin' ni'bonn la, nɪ dɔan wɔ-ɔɔ? 8 Ama ninbi nɛ teh binitɔb nɔ bre, ki jinh ki pendɛh bɛ, nɛ bi yɛ ni'yaab nɛ. 9 Na bɛn ki ye binib bɔ ya tetɛm ɲa cuube ɲa rɛ kɔ Uwien ya bɛl ni-ii? La lɛrɛh mɛn ni'ba. Isɔnsɔnd nin bɔ pɛ ibule bo nin binanɲa maab nin bijɛb bɔ taah bi'tɔb ki teh bipiib ki duɔndɛh nin bɛ 10 nin binasub nin binunfɔkdɛnb nin bidɛyib nin bitɛnfuɔnb nin bɔ fiɛnh bi'tɔb ya bont nnɔ ɲa rɛ kɔ Uwien ya bɛl ni. 11 Ni lɔ te nnɔ nɛ, ni'kɛ ɲa ɲɪ mɔnɔn la, ama Uwien sii' ki lɔrɛ' nɛ ki bore' nɛ ki tien' u'yaab ki

\* 5:5 Pɔl ye bɛ rɛ taa udaan kɪ cɛbe Satan ma nnɔ u ye wɔ rɛ ye bɛ rɛ tɔrɛ udaan bi'cɛkl ni nɛ.

bù' nẽ bigbemòndenb, Yonbdaan \*Yesu Kristo ya yel bo nin wòn ti'Wien ya Fuoñaanm bo.

### *Li teh men nà li kpiẽkreh Uwien*

<sup>12</sup> «Niba ña yé n'bo kuɔl\*.» Nĩ yé imòn nẽ, ama na yé ni'kẽ nẽ yé n'bo nibonmòn mòn. «Niba ña yé n'bo kuɔl.» Nĩ yé imòn nẽ, ama min ña ní taa n'ba kí tien niba ya yonb. <sup>13</sup> «Tijier bo nẽ kupuoku te, kupuoku bo nẽ tijier mɔ te.» Tɔ, Uwien li cèrẽ ni'kẽ nile ní gben. Ama tigbenent tun ña te ki de' sònsòndl, tù te ki de' Yonbdaan nẽ, nẽ Yonbdaan mɔ te ki de' tigbenent. <sup>14</sup> Nẽ Uwien wà cèrẽ' Yonbdaan mekre' bitenkpiib ni nno li cèrẽ u'tuam bo ti'mɔ ní mekre.

<sup>15</sup> Na ben ki ye ni'gbenent yé Kristo ya gbenenbel nẽ-ẽẽ? N taa n'gbenent tà yé Kristo ya gbenenbel nno kí tien ujenkpend ya gbenenbel-ii? Ma ní tien nno fiebu. <sup>16</sup> Na ben ki ye wà kẽ mɔkn' ujenkpend la, wòn nin ujenkpend nno taan' ki tien' tigbenent tuba nẽ-ẽẽ? Kimẽ ní ke'le' \*Uwien ya gbònkun ni ki ye uje nin upii taan' la, «ben bile nno taan' ki tien' unibaab nẽ.» <sup>17</sup> Ama wà kẽ taan' nin Yonbdaan la, wòn nin Yonbdaan ya yenm taan' ki tien' miyem miba nẽ.

<sup>18</sup> Wiẽ men lisònsòndl. Unil teh ibiẽrtɔ la, na likeh u'gbenent. Ama u teh lisònsòndl la, u teh u'tiema gbenent nẽ ibiẽrẽ. <sup>19</sup> Na ben ki ye ni'gbenent yé \*Mifuoñaanm ya duku nẽ-ẽẽ? Uwien nẽ de' nẽ mè, nẽ mì te ni'ni. Nẽn bo na ji si niba. <sup>20</sup> Kimẽ Uwien nẽ pèn' ki ñen' nẽ ti'yont ni. Nẽn bo, ní li taah ni'gbenent ki sòn itùon yà kpiẽkreh wòn Uwien.

## 7

### *Upii nin yiko ya gber*

<sup>1</sup> Tɔ, tí ji ní liiẽ men ni ke'le' nni kugbònkun tigber tà bo nno. Nĩ mòn uje ní li coh u'ba upii bo nẽ\*. <sup>2</sup> Ama linañmaal ya pñenm bo, jẽ kẽ jẽ ní li ñmàbe u'po, pii kẽ pii mɔ ní li ñmàbe u'ce. <sup>3</sup> Uje ya menku kòn' u'po ni la, na kpe u'po ní yie. Upii mɔ ya menku kòn' u'ce ni la, na kpe u'ce mɔ ní yie. <sup>4</sup> Upii ña si u'tiema gbenent, u'ce nẽ si tù. Uje mɔ ña si u'tiema gbenent, u'po nẽ si tù. <sup>5</sup> Uba la yie kí ye wa ní duòn nin u'ɔ. Nĩ yé ni lá yie ní lẽ libònl kí kàare nẽ la, ní kpiẽ kí len kí cii tɔb bó, kí laan dàan waamu. Ama ní liẽbe kí tũkre kí li fuobe upii nin u'ce fuobe nin tɔb ma bo. Nno ña ní la, \*Satan li biike nẽ, kí ñe na ní fre kí cuo ni'ba ma nno bo. <sup>6</sup> N len' nà nɔ ña yé wɔbl. N de' nẽ usen ni yie la, ní li teh nno nẽ. <sup>7</sup> N bi yie unil kẽ ní li te ten min nẽ†, ama Uwien de' unil kẽ u'tiema paabu nẽ. U de' uba buu ya paabu nẽ, ki de' uɔ mɔ buu ya paabu.

<sup>8</sup> N tɔkeh ijekpòk nin ipiikpòk nin bikropiib nẽ ki teh ní mòn be ní juore kí li te ten min nẽ. <sup>9</sup> Ama ba ní fre kí cuo bi'ba la, bijeb ní kuòn bipiib, bipiib mɔ ní kun ticer. Kimẽ bijeb kuòn' bipiib, bipiib mɔ kun' ticer la, nẽn tu nin upii ya menku ní li ñmàbe uje u wòlnh bii uje ya menku ní li ñmàbe upii u' mɔ wòlnh.

<sup>10</sup> Piicieb nin bipiib bà ñmàbe ciebe, n li tɔke nẽ nà nɔ yé ni'bo liwɔbl nẽ. Nà ñen' min saan, Yonbdaan nẽ ye nno: Upii la fii u'ce saan. <sup>11</sup> Upii fii' u'ce saan la, u la liẽbe kí kun cer bii wò ní liẽbe kí taan u'ce buñabu. Uje mɔ la ñore u'po.

<sup>12</sup> Bà sien' nno, na yé Yonbdaan nẽ tɔkeh be, min nin n'yul nẽ tɔkeh be. Nĩ yé uje yé Kristo yɔ ña u'po ña yé Kristo yɔ ki tuo' ki ye u li te nin wò la, u la ñore upii nno. <sup>13</sup> Upii mɔ yé Kristo yɔ ña u'ce ña yé Kristo yɔ ki tuo' ki ye u li te nin wò la, u la fii u'ce nno saan. <sup>14</sup> Kimẽ uje ña yé Kristo yɔ ña u'po yé Kristo yɔ la, u'po nno bo Uwien li tien wò ten u yé u'yɔ nẽ. Upii mɔ ña yé Kristo yɔ ña u'ce yé Kristo yɔ la, u'ce nno bo Uwien li tien wò ten u yé u'yɔ nẽ. Na bi te nno la, bi'bumu bi li yé bà yé tijòknt Uwien ya nun bó ya bumu nẽ, ama mù ji yé bà ña yé jòknt Uwien ya nun bó yaamu nẽ.

---

\* **6:12** Niba ña yé n'bo kuɔl yé mikpenjenm nẽ Korẽnt yaab là pòh mè. \* **7:1** Nĩ mòn uje ní li coh u'ba upii bo nẽ. Biba maaleh ki teh Korẽnt yaab nẽ len' i ya ñàbon. † **7:7** Pòl ye u bi yie unil kẽ ní li te ten wòn ma nno u ye wò ní ye u bi yie unil kẽ ní juore kí li yé lijekpòkl ten wòn nẽ.

15 Ama uje wà ña yé Kristo yó yíe wó rí wiε u'po bii upii wà ña yé Kristo yó yíe wó rí fii u'ce saan la, u li fre kí tien u yíe ma. U ya yo wà yé Kristo yó nin wà ña yé Kristo yó nnó ña ji tε gber. Uwien ña yin' nε ní li ñmábe uyenduon nε-εε? 16 Upii, sin bo a'ce bi li ñmεre la, a ben-ii? Uje, sin bo a'po bi li ñmεre la, a ben-ii?

*Uba la nuunh wó rí lèbre Uwien sien' wó ma bo*

17 Nεn ñen' len la, Yonbdaan sien' unil kε ma bo la, wó rí li fuobe nnó. Uwien yin' unil kε ki laa' u se usensien wà la, wó rí juore kí li se wun ni. N tókeh nεn nε Kristo ya táan kε ni. 18 Uwien yin' unil ki laa' u jiε' u'punl ñó la, u la li buoh binib la bende kí ye u jiε'. U yin' wà mó ki laa' wa jiε' u'punl la, u la ji rí jiε. 19 Unil jiε' u'punl bii wa jiε' la, ná yé nεn nε yé nibonmónn. Ama Uwien ya wób ya bom nε yé nibonmónn. 20 Uwien yin' unil kε ki laa' u se usensien wà la, wó rí juore kí li se wun ni. 21 Uwien yin' ñε ki laa' a yé uyonb la, la cère nε rí li wi ñε. Ama a laa' usen á fre kí ñε tiyonbt nnó ni la, la cère nè rí ñmεre ñε. 22 Kime Yonbdaan yin' unil ki laa' u te tiyonbt ni la, u ñen' udaan ibiere ya yonbt ni nε, u ji yé u'yó nε. Nnó nε Yonbdaan tí yin' wà mó ki laa' wa te yonbt ni la, u ji yé Kristo ya yonb nε. 23 Uwien nε pèn' ki ñen' ni'kε tí yonbt ni. Nεn bo, la ji rí li yé mεn nib ya yonbe. 24 Tó, n'yaabε, Uwien yin' wà kε ki laa' u se usensien wà la, wó rí juore kí li se wun wón Uwien ya nun bó.

*Bà ña kuon' piib nin bà ña kun' cer ya gber*

25 Bà ña kuon' piib nin bà ña kun' cer ben wón, ma ñmábe Yonbdaan ya mεsen rí wuon bε. Ama n li tóke bε n maaleh ma bo nε, kime n yé unil wà Yonbdaan muó' nni ki cère' n kpe bε rí li du n'bo nε.

26 Ti jinh ijend yà fεnfennó nó bo, n maale' ki ye ní món wà kε rí juore kí li te ten u te ma bo nε. 27 A ñmábe upii la, la li nuunh sin nin wón rí gbiire. Ña laan ñmábe pii la, ji la li nuunh á kuon. 28 Ama a ye á kuon upii la, na yé biere. Kijεfεnbuk mó ye kè rí kun ticer la, na yé biere. Bà kuon' bipiib nin bà kun' ticer li lε ijend bí'fuobm ni. Ma yíe ijend nnó rí tu bε nε cère n len' nnó.

29 N'yaabε, n yíe rí len ná sò: uyo wà sien' nnó ña ji yebe. Nεn bo, kí ñε fεnfennó kí li joh wà ñmábe upii la, wó rí tien ten wa ñmábe, 30 wà muoh la, wó rí tien ten wa muoh, wà poknh la, wó rí tien ten wa poknh, wà daanh tibont la, wó rí tien ten wón ña si tibont nnó, 31 wà jondeh uñendun ni ya bont bo la, wó rí tien ten wa cinbe ki jondeh tu'bo, kime uñendun wuu nó ji te ma bo nnó wa ji li wuóke.

32 Ma yíe niba rí li wiεbe nε. Wà ña ñmábe pii ya nun món Yonbdaan ya tòn bo nε. U'nun món u li tien ma bo ñó Yonbdaan ya yenm rí li sange u'bo nε. 33 Ama wà ñmábe upii ya nun món u li fuobe ma bo uñendun wuu ni nε. U'nun món u li tien ma bo ñó u'po ya yenm rí li sange u'bo nε, 34 nε u'yenmaale gbiire' mile. Upii wà ña ñmábe ce nin kijεfεnbuk ya nun món Yonbdaan ya tòn bo nε, kí nuunh bí'yenmaale nin bí'fèl kε rí li te ki de' Yonbdaan. Ama upii wà ñmábe ce ya nun món u li fuobe uñendun wuu ni ma bo nε, nε u'nun món u li tien ma bo ñó u'ce ya yenm rí li sange u'bo.

35 N len' nnó ki nuunh ní'tiema móm nε, ma nuunh rí de nε wóbl. Ama n nuunh ní li teh ná món ki dèkre' nε, kí taa ní'ba kí de Yonbdaan kí li te ki de' wón baba.

36 † Ní yé unil ñmábe kijεkpeng u'menku te kí'ni ní tí kende', wà yíe wó rí saa kè kí jin kè fε, ki yíe nibonn kε rí li te ní'donbó la, wó rí tien ná món u'bo. Bε rí kuon tób. Na yé biere.

37 Ama unil cèkre' u'yenm, uba ña wóbn' wó, ki yíe nε kí gènde' ki ye wón nin u'jekpeng rí li te, wa rí mε kè fiebu la, u tien' ní món nε. 38 Tó, wà kuon' u'jekpeng la, u tien' ní món nε, ama wa juore' lijekpəkl la, u tien' ní món ki cen' u bi kuon' la.

39 Uyo wà upii ya ce laan fuobe la, u yé u'ce nε. Uje nnó tí kpo' la, u li fre kí kun u yíe uje wà, ama ní kpe uje nnó rí li yé Kristo yó nε. 40 N ya bùol, min maale' ki ye u juore' ka liebe'

† 7:36 Migbiirm 36 kí tí baa 38 ya gber ya ciim te bolm mile bo nε. Biba maaleh ki teh migbiirm bugben lienh wà ñmábe kijεkpeng ya gber nε. Bitób maaleh ki teh mí lienh bibaa wà ñmábe bise ka yíe wó rí gèbre cer ya kunm bo nε.



ki kun' jɛ la, u li ɲmɔbe uyɛnsɔnge ki gbien'. Na yɛ \*Uwien ya Fuoɲaanm nɛ pekreh n'mɔ bi?

## 8

### *Titɔtuɔrnɔnt ya gber*

<sup>1</sup>Tɔ, tɔ ji n' liike mɛn titɔtuɔrnɔnt ya gber. Tun bo wɔn la, ti bɛn ki ye «ti'ke ɲmɔbe mibɛnm nɛ.» Ama mibɛnm cɛreh unil gbengreh u'ba nɛ, nɛ miyiem cɛreh unil kpienh mitekjim ya sɛn ni. <sup>2</sup>Unil maaleh ki teh u bɛn niba la, wa laan bɛnde' ki kpaan' u bi li bɛnde ma bo. <sup>3</sup>Ama wà yíe Uwien la, Uwien bɛn udaan nɛ.

<sup>4</sup>Tɔ, titɔtuɔrnɔnt ya ɲmɔnm wɔn la, ti bɛn ki ye ibule yà kɛ te uɲɛndun wuu ni nɔ ɲa yɛ bonn, ki bɛn ki ye niba ɲa te ki kɛnde' Uwien bo. <sup>5</sup>Imɔn, tibont te kutaaku nin kitink bo binib taah tù ki teh bi'wien. Imɔn, bɛn bo iwien te ligol nɛ, nɛ yonbɛnb mɔ ligol.

<sup>6</sup>Ama tinbi bo Uwien te uba nɛ ki yɛ ti'Baa. Wɔn nɛ ɲɛn' tibont kɛ, nɛ wɔn bo nɛ ti fuobe. Yonbɛn mɔ te uba nɛ. Wɔn si \*Yesu Kristo. Kí ɲɛ wɔn bo nɛ tibont kɛ te, nɛ ti'mɔ te kí ɲɛ wɔn bo nɛ.

<sup>7</sup>Ama na yɛ binib kɛ nɛ ɲmɔbe mi ya bɛnm. Biba paan' ibule bo ki mɛn' nɛ ki dɔan' yí na laan wuɔke'. Nɛn bo nɛ bi biɛ ki ɲmɔnh titɔtuɔrnɔnt la, bi maaleh ki teh tù yɛ titɔtuɔrnɔnt nɛ. Bi'fɛl ɲa co ma nɔnɔ nɛ bi'yɛnmaale jɛndeh bɛ, nɛ bi maaleh ki teh tù kuɔndeh bɛ tijɔkt.

<sup>8</sup>Na yɛ tijier nɛ li cɛre tí li yɛ binib bà cuube Uwien ya nun bó. Ti jin' la, na n' pukn tɛ niba, ta tí jin' mɔ la, na n' kùore tɛ niba.

<sup>9</sup>Ama ní liike ni'yul bo, ki la cɛre wà ya tekjim ɲa faa n' lu Uwien ya sɛn ni, kí ɲɛ ni ɲmɔbe usɛn ní li teh tibont tà nɔ bo. <sup>10</sup>Kimɛ unil wà ya tekjim ɲa faa laa', sin wà ɲmɔbe mibɛnm, jinh tijier ibule ya duku ni la, u'mɔ ya fɛl li cúun nɛ wɔ n' li ɲmɔnh titɔtuɔrnɔnt ki ciibe. <sup>11</sup>Nnɔ nɛ a'bɛnm nnɔ bo a'tɔ wà ya tekjim ɲa faa li bole. Nɛ Kristo kpo' u'mɔ bo nɛ. <sup>12</sup>Ni teh u'yaab i ya biere ya bol, ki saah bi'yɛnm bi'fɛl ɲa co ma nɔnɔ bo la, ni teh Kristo nɛ ibiere. <sup>13</sup>Nɛn bo, n jinh nà li cɛre n'tɔ n' lu Uwien ya sɛn ni la, ma ji li ji nè fiebu ɲɔ ki la cɛre n'tɔ n' lu Uwien ya sɛn ni.

## 9

### *Yesu ya tondɔ ɲmɔbe usɛn wà*

<sup>1</sup>Ma si n'ba bi? Ma yɛ \*Yesu ya tond bi? Ma laa' Yonbɛn \*Yesu bi? Na yɛ n sɔn' Yonbɛn ya tòn ma nɔnɔ nɛ cɛre' ni yɛ u'yaab-ii? <sup>2</sup>Ma yɛ \*Yesu ya tond binitɔb bo mɔnɔn la, ninbi bo wɔn n yɛ wɔ nɛ. Kimɛ ni yɛ Yonbɛn yaab ma nɔnɔ nɛ yɛ kudiekku kù wuɔn' ki ye n yɛ u'tond.

<sup>3</sup>Binib bà biindeh nni nɔn n li jiin bɛ nà sɔ: <sup>4</sup>Ta ɲmɔbe sɛn tí ji kí ɲu ti'tòn bo bi? <sup>5</sup>Ta ɲmɔbe sɛn wà kɛ n' li ɲmɔbe upii wà yɛ Kristo yɔ, kí li tɔke nin wɔ bi? Yonbɛn ya tondtɔb nin u'ninjieb nin Pier\* ɲa teh nɔn nɛ-ɛɛ? <sup>6</sup>Bii min nin Banabas baba nɛ ɲa sɔn' tuontɔl la, ta n' ji? <sup>7</sup>U lɛ soja ba nɛ sɔnh sojatunl ka teknh paaku fiebu? Bii ɲmɛ nɛ li caan busubu ka n' mɔ bu'bii? Bii ɲmɛ nɛ kpaah tiwɛnt ka n' ɲu tu'biim-i?

<sup>8</sup>N len' nà nɔ yɛ unisaal ya yɛnmaale baba nɛ-ɛɛ? Yiko ya gbɔnt ni mɔnɔn nà te nɔn-ɔɔ? <sup>9</sup>Kimɛ Moyis kele' yiko ya gbɔnt nɔn ni ki ye: «A taa unɛ u taanh iji la, ɲa n' lòle u'ɲɔbu†.» Uwien tuukeh inɛ ya gber nɛ-ɛɛ? <sup>10</sup>Na yɛ tinbi bo nɛ Uwien cinbe ki len' nɔn-ɔɔ? Imɔn, tinbi bo nɛ n' kele' nɔn. Ní kpe wà kòn' bukpaabu nin wa gun' bu'ji kɛ n' li daan ki ye wà kɛ li lɛ u ya bó nɛ. <sup>11</sup>Ti cɛre' ni laa' \*Mifuoɲaanm ya mɔnm ma nɔn, ni de' tɛ ni'faal ya niba bó la, n' bre nɛ-ɛɛ? <sup>12</sup>Binitɔb ɲmɔbe usɛn bɛ n' teke tibont ni'saan la, ta ɲmɔbe usɛn ki cɛn' bɛ-ɛɛ?

Ama tinbi ɲa tɔnge' nɛn kɛ, kimɛ ta yíe niba n' pien Kristo ya gbɛmɔnmɔnt ma nɔn nɛ cɛre' ta yíe ti li yɛ uba bo tukl, nɛ ki ɲmɔbe sukla nibonn kɛ bo. <sup>13</sup>Na bɛn ki ye binib bà

\* 9:5 Liike 1:12. † 9:9 Israyel yaab là yɛ bɛ n' gu tibont la, bi taah inɛ nɛ i taanh ki ɲɛndeh tibont nɔn ya bim.

sɔnh itùon Uwien ya duku ya luo bo nnɔ bi'jier ñeh kuduku nnɔ ya luo bo nɛ-ɛɛ? Nɛ bà mɔ sɔnh itùon Uwien ya ponpuol saan nnɔ, mɔ ñmɔbe bi ya bó nɛ binib tukeh tibont tà ki lá dienh Uwien u'ponpuol bo nnɔ ni. <sup>14</sup> Nnɔ nɛ Yonbdaan là de' usen ki ye binib bà kpaandeh tigbɛmɔnmɔnt nnɔ, ní li fuobe tun bo.

<sup>15</sup> Ama min ña tange' i ya sɛn kɛ. Nɛ n kieh kugbɔnku kuu ma nɔ, na yé n nuunh ní de nni n kpɛ ní de nni nà nnɔ nɛ. N kpo' la, ní tu nin uba ní cère ní lúo n jɛbnh n'ba nà bo nnɔ.

<sup>16</sup> Kí tɔke binib tigbɛmɔnmɔnt tun wɔn la, na yé ní li jɛbnh n'ba, kimɛ ní yé n'bo liwɔbl nɛ. Ma tɔke' tù la, ní bre n'bo nɛ. <sup>17</sup> Min nin n'yul nɛ bi cèkre' n'yɛnm ki sɔnh lituonl bugbɛn la, n bi li nuunh lisuul nɛ. Na yé n yíe nɛ ki sɔnh lè. Bi niin' nni nɛ n sɔnh lè, n bi li sɔnh lè ma bo. <sup>18</sup> Nɛn bo, n'suul si ba? N'suul si ní li tɔkeh binib tigbɛmɔnmɔnt tuu ki la nuunh niba nɛ, ki la tuuke n tɔke' binib tigbɛmɔnmɔnt bugbɛn la, n kpɛ bɛ ní de nni tibont tà nnɔ.

<sup>19</sup> Ma yé uba ya yonb, ama n taa' n'ba ki tien' binib kɛ ya yonb ñɔ ní lɛ binib bà yebe kí de Kristo nɛ. <sup>20</sup> \*Sufmbɛ saan, n teh bi teh ma bo nɛ ñɔ ní lɛ bɛ kí de Kristo. Imɔn, ma ji te Moyis ya yiko ya wɔbl ni, ama n lá te nin bɛ la, n pɛ bi teh ma bo nɛ ñɔ ní lɛ bɛ kí de Kristo.

<sup>21</sup> Bà ña bɛn Moyis ya yiko nnɔ saan mɔ n teh tɛn bɛn nɛ ñɔ ní lɛ bi'mɔ kí de Kristo. Na yé n kɛnde' \*Uwien ya yiko bo nɛ, kimɛ n boh Kristo ya yiko nɛ. <sup>22</sup> Bà ya tekjim ña faa' mɔ saan la, n te tɛn bɛn nɛ ñɔ ní lɛ bi'mɔ kí de Kristo. Nɛn bo, binib kɛ saan n te tɛn bɛn nɛ ñɔ ní ñikn kí cère bi'ni biba ní ñmɛre. <sup>23</sup> Tigbɛmɔnmɔnt bo nɛ n teh nɛn kɛ, ñɔ n'mɔ ní lɛ n ya bó tu'mɔnm ni.

<sup>24</sup> Na bɛn ki ye binib te minɔnsɛnniɛm bo la, bi'kɛ tiinh nɛ, ama unibaab wà li sɛn kí faake nnɔ nɛ li lɛ lisuul-ii? Nɛn bo, ni'kɛ ní li tiinh ki nuunh ní lɛ lisuul. <sup>25</sup> Wà kɛ nuunh wɔ ní niɛ kí sɛn la, u coh u'ba tibont tà yebe ni nɛ. U teh nnɔ ñɔ wɔ ní lɛ lisuul là nnɔ ña wuɔkreh. Tinbi wɔn, ti mɔh ki nuunh lisuul là li tuu ki te nɛ. <sup>26</sup> Nɛn bo, min tiinh la, ma ñaake ki tiinh ka bɛn n joh nà bó, ka te tɛn unɔkuñil wà ñih ka ñmɔbe u ñih wà. <sup>27</sup> N biendeh n'gbɛnɛnt ki gbiekeh, ki teh n'ba tɛn uyonb ñɔ min wà tɔkeh bitɔb tigbɛmɔnmɔnt tuu nnɔ, min bugbɛn la lá lúo n ya bó nɛ.

## 10

### *La li ñmɔbe mɛn Israyɛl yaab là ñmɔbe mitetem mà kupenpelku ni nnɔ*

<sup>1</sup> N'yaabɛ, n yíe ní li bɛn nà là tu' ti'yaajɛb nɛ. Kutɛwɔlgbɔnku kuba nɛ là jiiɛre' ní ki wɔngɛh bi'kɛ usen, nɛ bi'kɛ puore' miñunciɛnm. <sup>2</sup> Kutɛwɔlgbɔnku nin miñunciɛnm nnɔ yé bi'kɛ bo Uwien ya ñunsii nɛ ki tien' bɛ Moyis ya panpaankaab. <sup>3</sup> Bi'kɛ là taan' ki jin' tijiebaabt tà ñɛn' Uwien saan nɛ, <sup>4</sup> ki taan' ki ñun' miñunbaabm mà ñɛn' Uwien saan. Imɔn, bi'kɛ là ñuh miñunm mà nnɔ Uwien nɛ là cère' mĩ tɔh ki ñeh kujɔtɛnku kuba ni. Kutɛnku nnɔ yé Uwien yaaku nɛ, nɛ bi là te nà kɛ saan la, kù te nɛ. Kutɛnku nnɔ là yé Kristo nɛ. <sup>5</sup> Nin nɛn kɛ Uwien ya yɛnm ña sɔnge' bi'ni bà yebe bo. Nɛn bo nɛ bi là kpokpo' kupenpelku ni.

<sup>6</sup> Tibont tuu là tu' ti'yaajɛb ñɔ nè ní de tɛ ucekn ñɔ ti la tien nà bre tɛn bɛn nɛ. <sup>7</sup> Ni'mɔ la li pɛ ibule bo tɛn bi'ni biba là tien' ma. Ni kɛle' \*Uwien ya gbɔnku ni ki ye: «Binib nnɔ là kɛle' ki jin' ki ñun', nɛ ki fii' ki caan' kujelku.» <sup>8</sup> Ti la li teh mɛn sɔnsɔndl tɛn bi'ni biba là tien' ma, ki cère' binib itur pile nin ita kpo' uwien uba nnɔ. <sup>9</sup> Ti la biike mɛn Yonbdaan\* tɛn bi'ni biba là tien' ma ki cère' iwɛ kèkèrɛ' ki ku' bɛ nnɔ. <sup>10</sup> La li ñulnh mɛn tɛn bi'ni biba là ñulnh ma ki cère' Uwien ya tond wà kuuleh baa' ki kuku' bɛ nnɔ.

<sup>11</sup> Tibont tuu nnɔ kɛ là tu' ti'yaajɛb ñɔ nè ní de binitɔb ucekn nɛ. Bi kɛle' tù ñɔ tù ní gbiere tinbi bà ña ji fɔke nin ugbɛngbenyo nnɔ nɛ. <sup>12</sup> Nɛn bo, wà maale' ki ye u se mɔnmɔnm mitekjim ya sɛn ni la, wɔ ní li bɛn ki la lu. <sup>13</sup> Mibiikm mà tu' nɛ nɔ, yé mibiikm mà li fre kí tu unisaal kɛ nɛ. Uwien yé umɛmɔndaan ma nnɔ, wa ní cère mibiikm mà li faake nin nɛ

\* **10:9** Bi kpie' ki kɛle' tigbɔnt tà nnɔ ya tuba ni ní kɛle' ki ye Kristo nɛ.

ń tu nε. Ama mibiikm lá tu nε la, u li de nε mituəm ní juun kí teke, kí wuən nε ni li kp̄ien isen yà kí ñε len.

*La li tuuke m̄en ibule nin ituw̄ε ya gber*

<sup>14</sup> N̄en bo, n'j̄otiebε, wiε m̄en ibule nin ituw̄ε ya gber. <sup>15</sup> N lienh nin ninbi bà nn̄o, ni yé biȳenfodenb nε. Ninbi m̄on̄n ń maale kí liike n len' nà n̄o ya tingi. <sup>16</sup> Ti jinh Yonbdaan ya jier la, ti ñuh midaam mà, ki faareh Uwien mi'bo nn̄o ña taakeh tε nin Kristo ya s̄em-ii? Ti k̄h̄ kp̄on̄o wà ki gbiinh ki ñm̄onh nn̄o ña taakeh tε nin Kristo ya gb̄enent-ii? <sup>17</sup> Kp̄on̄o nn̄o te kp̄on̄o uba ma nn̄o, nin tí yεbe ma ke nn̄o ti taan' ki tien' tigbenent tuba nε. Kimε ti'ke taakeh ki gbiinh u ya kp̄on̄obaab nε.

<sup>18</sup> Liike m̄en Israyel yaab teh ma bo. Binib bà jinh bi taah tiw̄ent tà ki teh ituw̄ε liponpuol bo ki dienh Uwien nn̄o, ben nin w̄on taakeh nε kí ñε liponpuol nn̄o bo. <sup>19</sup> N len' nà n̄o ya tingi si ba? N ye ń ye ibule yé niba nε-εε? Bii n ye ń ye bi taah tiw̄ent tà ki punh ȳi nn̄o ya n̄ont nε yé niba? <sup>20</sup> Na te nn̄o. N ye ń ye bi t̄w̄reh ituw̄ε yà nn̄o, ba t̄w̄reh ki dienh Wien, bi t̄w̄reh ki dienh isenpol nε. Nε ma ȳie ninbi nin isenpol ń li tε gber. <sup>21</sup> Na ń fre kí ñu Yonbdaan ya d̄eyiek, kí liεbe kí ñu isenpol yaak m̄o. Na ń fre kí ji Yonbdaan ya jier, kí liεbe kí ji isenpol yaar m̄o. <sup>22</sup> Bii ti ȳie tí fin Yonbdaan ya mutuol nε? Ti ñm̄obe mituəm ki cen' w̄o-oo?

*C̄ere m̄en ni teh nà ke ń li kpiεkreh Uwien*

<sup>23</sup> T̄o, «Niba ña yé kuol†» ama na yé ni'ke nε yé nibonm̄onm̄onn. «Niba ña yé kuol.» Ama na yé ni'ke nε li tore unil w̄o ń kp̄ere mitekjim ya sen ni. <sup>24</sup> Uba la nuunh u'tiema m̄onm, ama w̄o ń li nuunh bit̄ab yaam. <sup>25</sup> Ni lεke' tin̄ont tà ke bo kidaak ni la, de m̄en kí ñm̄on, ki la c̄ere' ni'ȳenmaale ń li j̄endeh nε, ní li niireh t̄u yé bà yaar, <sup>26</sup> kimε «Yonbdaan si kitink nin tibont tà ke te ki'bo.»

<sup>27</sup> Wà ña yé Kristo ȳo yin' nε tijier ya jim, ni tuo' ki jon' la, u de' nε nà ke la, ji m̄en, ki la c̄ere' ni'ȳenmaale ń li j̄endeh nε, ní li niireh t̄u yé bà yaar. <sup>28</sup> Ama unil t̄ake' nε ki ye ñi yé tit̄at̄urn̄ont la, ni la ji. Wà t̄ake' nε ki ye ñi yé tit̄at̄urn̄ont nn̄o bo nε na ń ji ño udaan ya ȳenmaale la j̄endeh w̄o. <sup>29</sup> N niireh u ya daan ya ȳenmaale nε la j̄endeh w̄o, ma niireh ninbi yi.

T̄o, nba la, uba li fre kí maale u'ȳenm ni kí ye: «Bε bo nε wa ń fre kí tien u bi ñm̄obe usen w̄o ń tien nà kí ñε ut̄o ya ȳenmaale bo? <sup>30</sup> N faareh Uwien ki jinh tijier la, bε bo nε bi li liεbe kí biin nni n faareh Uwien tijier tà bo nn̄o bo?»

<sup>31</sup> N̄en bo, ni jinh bii ni ñuh bii ni teh nà ke la, ní li teh ni'ke ki kpiεkreh Uwien. <sup>32</sup> N̄i yé Suf bii wà ña Suf bii Uwien ya taanl ȳo nε la, ni la c̄ere ni'tentiem ń tuln bi'ni uba m̄on̄n. <sup>33</sup> Ní li teh ten n teh ma bo. N songreh binib ke ya ȳenm tibont ke ni nε, ka nuunh n'yul bo ya m̄onm, ki nuunh linigol ya m̄onm ño bε ń ñm̄ere nε.

## 11

<sup>1</sup> Tekn m̄en n'taal ni ten n tek̄n' Kristo ya taal ni ma.

*Ujε nin upii li te ma bo ikaare ni*

<sup>2</sup> N p̄εkeh nε nin ni tien n'bó tibont ke ni ma, ki pε Kristo ya nikpiεb ya w̄aknm mà n là w̄akn' nε m̄ε nn̄o bo m̄onm̄onm̄onn. <sup>3</sup> Ama n ȳie ní bende kí ye jε ke jε ya cien si Kristo nε. Pii ke pii m̄o ya cien si ujε nε, nε Kristo m̄o ya cien si Uwien. <sup>4</sup> Ujε wà ke k̄aareh bii u s̄akndeh Uwien ya ñ̄abon ki c̄ube nibonn la, u jindeh u'cien nε ifε. <sup>5</sup> Ama upii wà m̄o ke k̄aareh bii u s̄akndeh Uwien ya ñ̄abon, bonn ña ñaake u'yul bo la, u m̄o jindeh u'cien nε ifε, kimε ñi te ten u kuo' u'yur\* nε. <sup>6</sup> Upii laa' wa ń taa niba kí ñεkn u'yul bo la, w̄o ń tu kí ce u'yur-a! Ama upii cen' u'yur bii u kuo' t̄u la, ñi yé u'bo ifε nε. N̄en bo, w̄o ń li taah niba ki ñεkndeh u'yul bo. <sup>7</sup> Ujε k̄aareh la, wa kpε w̄o ń li c̄ube bonn, kimε u yé Uwien ya

† 10:23 Liike 6:12. \* 11:5 Pol ya yo upii là kuo' u'yur bii u cen' t̄u la, ní yé u'bo ifε nε.

nɛnnɛnku nɛ, ki wɔngɛh Uwien ya kpɛkɛ. Ama upii wɔn wɔngɛh uɟɛ ya kpɛkɛ nɛ. <sup>8</sup> Na yɛ Uwien lɔ taa' upii ya gbɛnɛnt bo nɛ ki tien' uɟɛ, u lɔ taa' uɟɛ ya gbɛnɛnt bo nɛ ki tien' upii, <sup>9</sup> nɛ na yɛ upii bo nɛ Uwien lɔ nɛn' uɟɛ ama uɟɛ bo nɛ Uwien lɔ nɛn' upii. <sup>10</sup> Nɛn bo nɛ Uwien ya tondɔ bo, nɛ kpɛ upii n̄ taa niba kɛ n̄kɛn u'yul bo kɛ wuɔn kɛ ye u n̄mɔbe usɛn wɔ n̄ tien u teh nɔ. <sup>11</sup> Tɔ, nin nɛn kɛ Yonbdaan ya sɛn ni wɔn, pii n̄a te la, jɛ n̄a te. Jɛ mɔ n̄a te la, pii n̄a te. <sup>12</sup> Kimɛ n̄i yɛ imɔn nɛ, Uwien lɔ taa' uɟɛ ya gbɛnɛnt bo nɛ ki tien' upii, nɛ upii mɔ nɛ maah uɟɛ. Nɛ nɛn kɛ nɛn' Uwien saan nɛ.

<sup>13</sup> Ninbi mɔnɔn maale mɛn kɛ liike, upii kɔareh niba n̄a n̄aake u'yul bo la, n̄i cuube-ee? <sup>14</sup> Uwien nɛn' tibont ma bo mɔnɔn wuɔn' ki ye uɟɛ tuke tiyufɔfɔkrt la, n̄i yɛ ifɛ nɛ. <sup>15</sup> Upii wɔn bo, tiyufɔfɔkrt yɛ ukpɛkɛ nɛ. Kimɛ Uwien de' wɔ tiyufɔfɔkrt tɔ n̄ li piiɛbe u'yul bo nɛ. <sup>16</sup> Unil nuunh wɔ n̄ li niɛh isɛn kɛ ni la, udaan n̄ li bɛn ki ye tinbi n̄a n̄mɔbe mi ya tetem, Uwien ya tɔan yaab mɔ n̄a n̄mɔbe mɛ.

### *Yonbdaan ya jier*

*(Matie 26:26-29; Mark 14:22-25; Luk 22:14-20)*

<sup>17</sup> Tɔ, n gbierɛh nɛ ma n̄o n̄ li tɔkɛ nɛ usɛn wɔ bo ma n̄ pɛkɛ nɛ, kimɛ ni taakeh ni'tɔan la, na teh nɔ li tore nɛ, ni teh nɔ li saa nɛ nɛ. <sup>18</sup> Mikpɛkɛm n̄ cii' bi ye ni taakeh itɔan la, ni n̄mɔbe ipɔpɔare nɛ. Nɛ n teke' ki jin' ki ye bi tɔkɛ' nni tigber tɔ n̄nɔ, tuba yɛ tigbɛmɔnt nɛ. <sup>19</sup> Imɔn, uyo uba la, n̄i kpɛ miborm n̄ li te ni'ni n̄a bɛ n̄ bɛnde bɔ cinbe ki yɛ bigbɛmɔndɛnb nɛ. <sup>20</sup> Ni lɔ taan' la, na yɛ ni cinbe ki jinh Yonbdaan ya jier nɛ, <sup>21</sup> kimɛ wɔ kɛ kpɛleh wɔ n̄ ji u'tiɛma jier nɛ. Mikɔnm̄ n̄mɔbe uba, utɔ mɔ n̄un' ki yibe' n̄a. <sup>22</sup> Na n̄mɔbe den n̄i ji kɛ n̄u nɛn bɔ-oo? Bii ni yindeh Uwien ya taanl yaab nɛ, ki jindeh bijiinb ifɛ? N li len kɛ ye ba? N li pɛkɛ nɛ nɛ-ɛɛ? Ma n̄ pɛkɛ nɛ u ya sɛn bo.

<sup>23</sup> Tɔ, min cii' miwɔkn̄m̄ mɔ sɔ Yonbdaan saan nɛ ki taa' mɛ ki wɔkn̄' nɛ. Kuñɔnku kɔa bi lɔ li kuɔre Yonbdaan \*Yesu n̄nɔ, nɛ u taa' kpɔnɔ <sup>24</sup> ki faare' Uwien, ki kɔkuɔ', nɛ ki ye: «Nɔ sɔ yɛ n̄'gbɛnɛnt n̄ taa' ki de' nɛ. Li teh mɛn n̄nɔ kɛ li tien n̄'bɔ.» <sup>25</sup> Bi jin' ki tɛ gbɛn', nɛ u taa' midaam mɔ, ki faare' Uwien, nɛ ki ye: «Midaam miɛ yɛ n̄'sɛm nɛ, ki wɔngɛh ki teh Uwien cuo' nin binib kujɔtiefɛnku. Uyo wɔ kɛ ni n̄uh mɛ la, n̄i li teh n̄nɔ ki tien n̄'bɔ.» <sup>26</sup> Kimɛ uyo wɔ kɛ ni n̄mɔnh kpɔnɔ wuɔ, ki n̄uh midaam miɛ la, ni tɔkɛh binib Yonbdaan ya kuum ya gber nɛ, kɛ tɛ baa lidaali lɔ u li baa n̄i.

<sup>27</sup> Nɛn bo nɛ wɔ kɛ n̄mɔnh Yonbdaan ya kpɔnɔ, ki n̄uh u'daam, ka boh tijier bugbɛn la, u biindeh u'ba nɛ Yonbdaan ya gbɛnɛnt nin u'sɛm bo. <sup>28</sup> Nɛn bo, unil kɛ n̄ tɔɔre kɛ maale kɛ liike u'tetɛm te ma bo kɛ yaan kɛ n̄mɔn kpɔnɔ n̄nɔ, kɛ n̄u midaam n̄nɔ. <sup>29</sup> Kimɛ unil n̄mɔn' kpɔnɔ n̄nɔ, ki n̄un' midaam n̄nɔ, ka bɔh ki teh n̄i yɛ Yonbdaan ya gbɛnɛnt la, u n̄mɔnh, ki n̄uh ma n̄nɔ, u nuunh u'tiɛma yul bo ya tudɛre nɛ. <sup>30</sup> Nɛn nɛ cɛrɛ' ni'ni bɔ yebe yɛ biwiɛnb, bitɔb yɛ ijiin, bɔ yebe mɔ kpɔ'. <sup>31</sup> Ti tɔɔrɛ' ki maale' ki liike' ti'tetɛm te ma bo la, Yonbdaan n̄a n̄ dɛrɛ ti'tub n̄nɔ. <sup>32</sup> Ama u diɛh ti'tub la, u cekndɛh tɛ n̄a u lɔ lɔ bu kɛ biin un̄ɛndun ya nib kɛ yekn tɛ nɛ.

<sup>33</sup> N'yaabɛ, nɛn bo, ni tɛ taan' n̄i ji la, n̄i li guureh tɔb. <sup>34</sup> Mikɔnm̄ n̄mɔbe wɔ la, wɔ n̄i ji u'den, n̄a ni lɔ lɔ taan kɛ li nuunh ni'tiɛma tudɛre.

Tigber tɔ sɛn' n̄nɔ, n lɔ baa' la, n li tɔɔrɛ tu'mɔ.

## 12

### *Mifuoñaanm ya paabu*

<sup>1</sup> Tɔ, tɛ ji n̄ liike mɛn \*Mifuoñaanm ya paabu ya gber. N'yaabɛ, ma yɛ n̄i li te ka bɛn Mifuoñaanm diɛnh bupaabu bɔa kɛ ya bol n̄nɔ ya gber. <sup>2</sup> Ni bɛn ki ye na laan lɔ pɛ Uwien ya sɛn bo ma n̄nɔ, ibule nɛ lɔ co nɛ ticuɔr nɛ na n̄i frɛ kɛ n̄mɛrɛ i'saan, ki bɛn mɔ ki ye ibule n̄nɔ n̄a lienh. <sup>3</sup> Nɛn bo nɛ n̄i yɛ n̄i tɔɔrɛ kɛ bɛnde kɛ ye \*Uwien ya Fuoñaanm cɛrɛh unil tɔkɛh tigber la, wa n̄i frɛ kɛ len kɛ ye: \*Yesu n̄ juore fɛnm. \*Mifuoñaanm n̄a n̄i la, nil mɔ n̄a n̄i frɛ kɛ len kɛ ye: \*Yesu yɛ Yonbdaan.

4 \*Mifuoñaanm ya paabu te ibol ibol nɛ, ama mi ya Fuoñaanbaabm nɛ dienh ni'ke. 5 Itùon te ibol ibol nɛ, ama wà ke sɔnh ki dienh Yonbdaan uba nɛ. 6 Itùon ya sɔnm te ibol ibol nɛ, ama Uwien uba nɛ cèreh unil ke sɔnh itùon. 7 \*Mifuoñaanm dienh wà ke bupaabu nɛ ní li toreh unil ke nɛ. 8 \*Mifuoñaanm nɛ dienh uba miyɛnfofenm. Mi ya Fuoñaanbaabm nɛ dienh utɔ mɔ mibɛnm. 9 Mɛn nɛ dienh uba mitekjim mà yɛbe, ki dienh utɔ mɔ bupaabu bùa cèreh u buuh biwiɛnb. 10 Mí dienh uba mituɔm wɔ ní li teh miyɔkm ya bont, ki cèreh utɔ mɔ sɔkndeh Uwien ya ñɔbon, ki cèreh utɔ mɔ sekndeh ki bɛndeh nà yé \*Mifuoñaanm yaann nin nà ña yé Fuoñaanm yaann, ki cèreh uba lienh milɛncɛnm ibol ibol, ki cèreh utɔ mɔ sɔkndeh milɛncɛnm nnɔ. 11 Mi ya Fuoñaanbaabm nɛ cèreh tibont nnɔ ke teh. Mí dienh unil ke bupaabu jeje mǐ yíe ma bo nɛ.

### *Tigbɛnɛnt te tuba nɛ, ama tu'gbɛnɛnbɛl te ligol nɛ*

12 Tɔ, liike mɛn unisaal ya gbɛnɛnt te ma bo. Tù ñmɔbe igbɛnɛnbɛl ligol nɛ. Nin ì te ligol ma ke nnɔ, ì taan' ki tien' tigbɛnɛnbaabt nɛ. Kristo yaam mɔ te nnɔ nɛ. 13 Kimɛ ti'ni bà yé \*Sufmbɛ nin bà ña yé Sufmbɛ, bà yé iyonbe nin bà ña yé yonbe, Mifuoñaanbaabm nɛ jiiɛ' ní ti'ke bo ki yé ti'bo Uwien ya ñunsii, ki tien' tɛ unibaab. Ti'ke ñun' mi ya Fuoñaanbaabm nɛ tɛn miñunm.

14 Tɔ, tigbɛnɛnt ya gbɛnɛnbɛl ña te liba, ì te ligol nɛ. 15 Litaal tɔke' ki ye: «Ma yé nuɔ ma nnɔ, ma yé gbɛnɛnt ya gbɛnɛnbɛl» la, li li fre kí bore li'ba ki la tuuke gbɛnɛnt bo-oo? 16 Litubl mɔ tɔke' ki ye: «Ma yé nunbu ma nnɔ, ma yé gbɛnɛnt ya gbɛnɛnbɛl» la, li li fre kí bore li'ba ki la tuuke gbɛnɛnt bo-oo? 17 Tigbɛnɛnt ke bi yé bununbu nɛ la, unil bi li teh mila ki ciih? Tù tí bi yé litubl nɛ la, u bi li teh mila ki ciih unu? 18 Ama Uwien tien' tigbɛnɛnt ya gbɛnɛnbɛl ke gbɛnɛnbɛl li'bùol u yíe ma bo nɛ. 19 Tigbɛnɛnt ke bi yé ligbɛnɛnbɛl liba la, nǐ bi li yé tigbɛnɛnt-ii? 20 Nɛn bo, igbɛnɛnbɛl te ligol nɛ ki taan' ki tien' tigbɛnɛnbaabt.

21 Nɛn nɛ cèrɛ' bununbu ña ní fre kí tɔke unuɔ kí ye: «Ma ciɛke ñɛ.» Liyul mɔ ña ní fre kí tɔke itàan kí ye: «Ma ciɛke nɛ.» 22 Na te nnɔ. Tigbɛnɛnt ya gbɛnɛnbɛl yà bi likeh yɛ tɛn ya yé bonn nnɔ mɔnɔn ñmɔbe lituonl nɛ. 23 Igbɛnɛnbɛl yà ña ñmɔbe sel nnɔ, ti dienh yɛn nɛ lisel ki cɛn' i'tɔ. Nɛ tigbɛnɛnt ya na'saan yé ifɛ ya bonn nnɔ, ti tùrɛh nɛn saan nɛ mɔnmɔnm. 24 Ama tigbɛnɛnt ya nà saan ña yé fɛ ya bonn nnɔ ña nuunh mi ya tùɔrm ke. Uwien nɛ tien' tigbɛnɛnt nɛ ki de' tigbɛnɛnt ya nà saan ña ñmɔbe sel nnɔ, lisel ki gbien', 25 ñɔ tigbɛnɛnt ya gbɛnɛnbɛl la boreh i'tɔ, ama yè ní li kpe buñɔbu kí li toreh i'tɔ. 26 Tigbɛnɛnt ya niba saan wi la, ni'ke saan wi nɛ. Niba saan laa' lisel la, ni'ke saan li ñmɔbe uyɛnsɔnge nɛ.

27 Ninbi nɛ yé Kristo ya gbɛnɛnt, nɛ unil ke yé tigbɛnɛnt nnɔ ya gbɛnɛnbɛl. 28 Uwien cèrɛ' binib bà sɔnh u'taanl ni si: mikpiɛkm, \*Yesu ya tondb, nle bo \*Uwien ya ñɔbonsɔknb, nta bo biwɔnwɔknb. Ni ya puoli bó nɛ u de' bà bupaabu bɛ ní li teh miyɔkm ya bont nin u de' bà bupaabu bɛ ní li buuh biwiɛnb nin u de' bà bupaabu bɛ ní li muɔh binib nin u de' bà bupaabu bɛ ní li likeh binitɔb nin u de' bà bupaabu bɛ ní li lienh milɛncɛnm ibol ibol nnɔ. 29 Bi'ke yé \*Yesu ya tondb nɛ-ɛɛ? Bi'ke yé \*Uwien ya ñɔbonsɔknb nɛ-ɛɛ? Bi'ke yé biwɔnwɔknb nɛ-ɛɛ? Bi'ke teh miyɔkm ya bont nɛ-ɛɛ? 30 Bi'ke ñmɔbe bupaabu bɛ ní li buuh biwiɛnb nɛ-ɛɛ? Bi'ke lienh milɛncɛnm ibol ibol nɛ-ɛɛ? Bi'ke sɔkndeh milɛncɛnm ibol ibol nnɔ nɛ-ɛɛ? 31 Tɔ, cèrɛ mɛn ni'nun ní li mɔn bupaabu bùa mɔn ki cɛn' bupaabu ke ya bol bo.

Ama fɛnfennɔ n li wuɔn nɛ usɛn wà mɔn ki cɛn' isɛntɔ.

## 13

### *Miyɛm nɛ cɛn' nibonn ke*

1 N lienh binib ya lenm nin Uwien ya tondb ya lenm ke, ka nín ji yíe nib la, n te tɛn lisɛnbuɔl bii ligangaal là muɔh ki ñmɔbe kuwaaku nɛ. 2 Ní yé n ñmɔbe bupaabu ki sɔkndeh Uwien ya ñɔbon, ki bɛn tigbɛr tà ke buɔ, ki ñmɔbe mibɛnm ke ya bol, ki ñmɔbe mitekjim ki tí gben', mǐ li fre kí cèrɛ ijuɔn ní nɛbre i'bùol ñɔ ka yíe nib la, ma yé bonn. 3 Ní

yé n taa' n'faal ké ki gbigbiire' binib, ki tuo' bi wɪn' nni ɲɔ ka yíe nib la, ma ɲmɔbe kpɛle uba nin uto.

<sup>4</sup> Unil ɲmɔbe miyíem la, u ɲmɔbe lifèsangl nɛ, ki ɲmɔbe tinimànt, ka ɲmɔbe nunfòke, ka wɔngɛh u'ba, ka ɲmɔbe gbengt, <sup>5</sup> ka teh fɛ ya bonn, ka nuunh u'tiɛma mɔnm, ka yé benpiebdaan, ka ɲuuh nib bo. <sup>6</sup> U'yɛnm ɲa sɔnge nà ɲa cuube bo, ama u'yɛnm pɛ tigbɛmànt bo nɛ. <sup>7</sup> Unil ɲmɔbe miyíem la, u ɲmɔbe sukɛle tibont ké ni nɛ, ki du Uwien bo isɛn ké ni, ki ɲmɔbe lidɛndɛnl isɛn ké ni, ki ɲmɔbe kuminku nà ké li tu wɔ bo.

<sup>8</sup> Miyíem ɲa ɲ gben fiebu. Uwien ya ɲɔbon ya sɔknm mɛn li gben nɛ. Milɛncɛnm mà binib lienh mɛ nnɔ mà li gben. Mibɛnm mà li gben. <sup>9</sup> Fɛnfɛnnɔ wuɔ ti bɛn jɛnjɛnku nɛ, nɛ ki sɔkndɛh Uwien ya ɲɔbon mà jɛnjɛnku. <sup>10</sup> Ama nà mɔn ki tɪ gben' lá baa' uyo wà la, ti bɛn nà nin ti teh nà jɛnjɛnku nnɔ ké li gben nɛ.

<sup>11</sup> N là yé kibuk ma nnɔ, n là lienh mibuwaalenm nɛ, ki bɛn tibont ya tingi kibuk bɛn ma bo, ki maaleh kibuk maaleh ma bo. N tɪ tien' uciɛn, nɛ ki dàan' ibuwaatùon. <sup>12</sup> Fɛnfɛnnɔ, ti lɛnh tibont dɔmudɔmu nɛ, nɪ tɛ tɛn ti likɛh kinunliik kà ɲa lɛnh mɔnmɔnm ni nɛ, nɛ ki lɛnh tijinjint. Ama uyo we ní tɪ lɛ tù nin ti'nunbu. Fɛnfɛnnɔ ma laan bɛn tibont ki tɪ gben'. Ama uyo we ní ɲ bɛndɛ tù kí tɪ gben tɛn Uwien bɛn nni ma bo.

<sup>13</sup> Tɔ, mitekjim nin lidɛndɛnl nin miyíem tuu ki tɛ nɛ, ama tibont tuta nnɔ ni miyíem nɛ cɛn' tu'kɛ.

## 14

### *Mifuoñaanm ya paabu li toreh Kristo ya taanl yaab ké nɛ*

<sup>1</sup> Li nuunh mɛn ní li yíe binib, kí cɛrɛ ni'nun ɲ li mɔn \*Mifuoñaanm ya paabu bo; ni'kɛ tu nin bupaabu bùa li cɛrɛ ní li sɔkndɛh Uwien ya ɲɔbon. <sup>2</sup> Kimɛ unil lienh milɛncɛnm la, wa lienh nin nib, u lienh nin Uwien nɛ. Uba ɲa ciuh u lienh ki teh bà. \*Mifuoñaanm nɛ cɛrɛh u lienh tigbɛr tà buɔ. <sup>3</sup> Ama unil sɔkndɛh Uwien ya ɲɔbon la, u lienh nin binib nɛ, ki toreh bɛ bi kpiɛnh mitekjim ya sɛn ni, ki saakrɛh bi'gbɛnɛnt, ki sɔngɛrɛh bi'yɛnm. <sup>4</sup> Wà lienh milɛncɛnm la, u kpiɛndɛh u'ba nɛ mitekjim ya sɛn ni. Ama wà sɔkndɛh Uwien ya ɲɔbon toreh Kristo ya taanl yaab nɛ bɛ ɲ kpɛrɛ mitekjim ya sɛn ni. <sup>5</sup> N yíe ni'kɛ ɲ li lienh milɛncɛnm, ama n tùɔrɛ' ki fɛ ní li sɔkndɛh Uwien ya ɲɔbon nɛ. Wà sɔkndɛh Uwien ya ɲɔbon cɛn' wà lienh milɛncɛnm. Ama nɪ yé unil tɛ kí sɔkn milɛncɛnm nnɔ la, ni'mɔ li frɛ kí toreh Kristo ya taanl yaab bɛ ɲ kpɛrɛ mitekjim ya sɛn ni.

<sup>6</sup> N'yaabɛ, nɪ yé n baa' ni'saan ki lá lienh milɛncɛnm baba, ka cɛrɛh ni bɛndɛh Uwien ya gbɛbɔlkaar, ka cɛrɛh ni bɛndɛh gbɛmànt, ka sɔkndɛh nɛ Uwien ya ɲɔbon, ka wɔknh nɛ wɔknm miba nin mitɔm la, n toreh nɛ ɲɲɔ-ɔɔ? <sup>7</sup> Tɔ, maale mɛn kí liike bi taah tibont tà ki jɛlɛh kujɛlku nnɔ tɛ ma bo. Nɪ yé liwol bii kubɛkɛku nɛ tu'muɔ ɲa bore' la, bi li tien mila kí bɛndɛ nà ké muɔh ma bo? <sup>8</sup> Unil piebe' butɔbu ya natunl ka piebe' mɔnmɔnm la, ɲmɛ li bonde butɔbu? <sup>9</sup> Ni'mɔ yaam tɛ nnɔ nɛ. Ni lienh iɲɔbon ɲɛh ni'ɲuɔn ni nib ɲa ciuh i'tingi la, bi li tien mila kí bɛndɛ ni ye ní ye bà? Ni lienh ki wiɛnh fɛnm nɛ. <sup>10</sup> Ma bɛn ilɛnbol ya ɲɔbu uɲɛndun wuu ni, ama lenm miba ɲa tɛ ka ɲmɔbe mi'tingi. <sup>11</sup> Ma ciuh nil ya lenm la, u yé ucaan nɛ n'bo, nɛ n'mɔ yé ucaan u'bo. <sup>12</sup> Ni'mɔ yaam tɛ nnɔ nɛ. Ni'nun mɔn \*Mifuoñaanm ya paabu bo ma nɔ, tùɔrɛ mɛn kí li nuunh bù, ama ní li nuunh bupaabu bùa li toreh Kristo ya taanl yaab bɛ ɲ kpɛrɛ mitekjim ya sɛn ni.

<sup>13</sup> Nɛn bo, unil lienh milɛncɛnm la, wɔ ɲ li kàareh, Uwien ɲ de wɔ bupaabu bùa li cɛrɛ wɔ ɲ frɛ kí sɔkn milɛncɛnm nnɔ. <sup>14</sup> Kimɛ n kàareh milɛncɛnm ni la, \*Mifuoñaanm nɛ cɛrɛ' n kàareh, n'bugbɛn ɲa bɛn n teh bà. <sup>15</sup> Nɛn bo, n li tien mila? \*Mifuoñaanm cɛrɛh n kàareh milɛncɛnm ni la, n li kàareh n bɛn milɛnm mà mɔ ni nɛ. Mɪ cɛrɛh n gɛh iyuon milɛncɛnm ni la, n li gɛh n bɛn milɛnm mà mɔ ni nɛ. <sup>16</sup> Kimɛ \*Mifuoñaanm cɛrɛh a faareh Uwien milɛncɛnm ni baba ɲɔ unil tɛ ni'ni, ka bɛn niba Uwien ya sɛn ni la, u li tien mila kí ye «Ami»? Kimɛ wa ciuh a lienh ki teh bà. <sup>17</sup> Imàñ, a faareh Uwien nɪ mɔn cɛɛn nɛ, ama na toreh bitɔb bɛ ɲ kpɛrɛ mitekjim ya sɛn ni.

18 N faareh Uwien nin n lienh milencenm ki cen' ni'ke ma nno. 19 Ama n te Kristo ya taanl yaab ni, ki tu ki len' iñobon injun i wien ki wəkn' be la, ni tu nin n len iñobon itur piik milencenm ni.

20 N'yaabe, la te men ten mubumu ni'yennaale ni. Na bre ya tienm wən, li te men ten mucenfendmu, ama iyennaale ni wən, li maaleh men bicienb maaleh ma bo. 21 Ni kele' \*Uwien ya gbənkū ni ki ye Yonbdaan ye:

«N li cère linibotəl ya nib ne n len nin n' nib bie milencenm, nin nen ke ŋə, ba n cenge n' bō.»

22 Nen bo, milencenm ŋa yé dīeku binib bā teke' Uwien ki jin' nno bo, ama mī yé kudīeku bā ŋa teke' wə ki jin' nno bo ne. Uwien ya ñobon ya səknm men yé kudīeku bā teke' wə ki jin' nno bo ne, ma yé dīeku bā ŋa teke' wə ki jin' nno bo.

23 Ni yé Kristo ya taanl yaab ke taan' ŋə bi'ke lienh milencenm la, binib bā ŋa ben niba Uwien ya sen ni bii binib bā ŋa teke' wə ki jin', kən' ní la, ba n ye ni yé iwaar-ii? 24 Ama unil ke səkndeh Uwien ya ñobon, wā ŋa teke' wə ki jin', bii wā ŋa ben niba u'sen ni kən' ní la, binib ke lienh nā nno ne li cère wə n bende kí ye u yé ubierdaan, ne u'yenm n saa u'biere bo. 25 U'fəl bo ya gber ke li ñe upaan bo. Nno ne u li gbaan, kí puke Uwien, kí ye nī yé imən ne, Uwien mənbe ki te ni'ni.

### *Kristo yaab taan' la, bi la teh tibont ŋmerkŋmerki*

26 N'yaabe, ti li tien mila? Ni lá taan' la, wā ŋmabe iyuon la, wə n gè. Wā mō ŋmabe miwəknm la, wə n wəkn. Uwien cère' wā bende' u'gbəbəlkaar la, wə n tōke tū bitəb. Wā mō ŋmabe bupaabu wə n len milencenm la, wə n len bii wə n sək n mē. Wā teh nā ke la, wə n cère nē n li toreh Kristo yaab be n kpére mitekjim ya sen ni. 27 Binib ye be n len milencenm la, nē li yé bile bii bita. Ni la gēbre' binib bita. Be n li lienh uba uba. Uba mō n li səkndeh bi lienh ki teh bā. 28 Nil ŋa te litaanl nno ni kí sək n la, be n li ŋmin, kí li lienh bi'yenm ni nin Uwien. 29 Ni yé Uwien ya ñobon ya səknm mō la, bile bii bita n sək n, bitəb n fiin kí liike bi səkndeh nā nno ya tingi. 30 Uwien cère' unitə bende' u'gbəbəlkaar litaanl nno ni, ki ye wə n sək n tū la, wā bi lienh nno n ŋmile. 31 Imən, ni'ke li fre kí li səkndeh Uwien ya ñobon ama ní li səkndeh uba uba. Ni teh nno la, unil ke li bende Uwien ya gber, ne n li saake unil ke ya gbenent. 32 Unil səkndeh Uwien ya ñobon la, u li fre kí li coh u'ba. 33 Kimē Uwien ŋa yíe fenfenm, u yíe nibonn ke n li te ni'donbō ne.

Ni te ma Kristo yaab ya táan ke ni si: 34 Bipiib li ŋmin ne itáan ni. Ba ŋmabe sen be n len, be n li blinh bi'yul, kimē nī kele' nno ne Moyis ya gbənt ni. 35 Bi yíe be n tūre kí cii niba ya tingi la, be n tī niire bi'ciēb idonbō; kimē na kpe pii n li lienh Kristo ya taanl ni.

36 Bii Uwien ya gber ñen' ninbi saan ne-εε? Ninbi baba ne cii' tū-uu? 37 Unil maaleh ki teh u yé \*Uwien ya ñobonsəknl bii u maaleh ki teh \*Mifuoñaanm te u'ni la, wə n bende kí ye n kele' nā nno yé Yonbdaan ya wəbl ne. 38 Unil wā ŋa tənge' nē la, Uwien mō ŋa n tənge wə.

39 N'yaabe, nen bo, cère men ni'nun n li mōn ní li səkndeh Uwien ya ñobon, ki la pien nil u la len lencenm. 40 Ama ní li teh nibonn ke ni'donbō, ki la teh ŋmerkŋmerki.

## 15

### *Kristo ya mekrm bitenkpiib ni*

1 N'yaabe, n yíe n tiere ne n là tōke' ne tigbemənmənt tā, ni teke' tū, ki ŋuuke tū mən mən nno ne. 2 Ni ŋuuke tū n là tōke' ne tū ma bo la, tun bo ne ni li ŋmere. Nno ŋa nī la, ni teke' ki jin' fenm ne.

3 N là cii' nā nno n cinde' ki tōke' ne nen ne. Nen si: Ti'biere bo ne Kristo kpo'. Ni là kele' \*Uwien ya gbənkū ni ki ye nī lá li tien nno ne. 4 Bi sube' wə, ne wienta daali u mekre' bitenkpiib ni. Ni là kele' \*Uwien ya gbənkū ni ki ye nī lá li tien nno ne. 5 U cère' Pier\* laa'

\* 15:5 Liike 1:12.

wɔ, ni ya puoli bó nɛ u cɛrɛ' bitondb piik nin bile nnɔ kɛ laa' wɔ. <sup>6</sup> Nɛ ki liɛbe' ki cɛrɛ' u'panpaankaab mɔ taan' ki laa' wɔ ki gɛbrɛ' binib kobiinjun. Bi'ni bà yɛbe biɛ ki fuobe, nɛ biba mɔ kpo'-a! <sup>7</sup> U liɛbe' ki cɛrɛ' Saak laa' wɔ, nɛ ki cɛrɛ' bitondb kɛ mɔ laa' wɔ.

<sup>8</sup> Bi'kɛ yaam ti gɛbrɛ', nɛ u cɛrɛ' min wà te tɛn kibuk kà bi lɔrɛ' kɛ nnɔ mɔ fɔrɛ' ki laa' wɔ. <sup>9</sup> Imòn, min nɛ yé \*Yesu ya tondb kɛ ya gbaarkɛ. Ma kpɛ bɛ ní yin nni \*Yesu ya tond mɔnɔn, kimɛ n là jɛndeh Uwien ya taanl yaab nɛ. <sup>10</sup> Ama Uwien ya juokm bo nɛ n ji te tɛn n te ma fɛnfɛnnɔ wuɔ nɔ. U juoke' nni mijuokm ma nnɔ ɲa juore' fɛnm. Ma juore' fɛnm, kimɛ n'gbɛnɛnt ben' lituonl ni ki cɛn' bi'kɛ. Na yé n taa' n'tiɛma tuɔm nɛ ki sɔn' lituonl nnɔ, n laa' Uwien ya juokm mà nnɔ nɛ cɛrɛ' n sɔn'. <sup>11</sup> Tɔ, nɛ yé min nɛ bii ben nɛ tɔkɛ' nɛ tigbɛmɔnmɔnt la, ti'kɛ tɔkɛ' nɛ tigbɛbaabt nɛ, nɛ ni teke' tun nɛ ki jin'.

### *Uwien li mɛkre bitɛnkpiib*

<sup>12</sup> Tɔ, ti tɔkeh ki teh Kristo mɛkre' bitɛnkpiib ni nɛ. Nɛ tien' mila ni'ni biba lienh ki teh bitɛnkpiib ɲa ní mɛkre? <sup>13</sup> Nɛ yé bitɛnkpiib ɲa ní mɛkre la, Kristo mɔ ɲa mɛkre' nɛ-a! <sup>14</sup> Kristo ɲa mɛkre' la, ti tɔkeh tigbɛmɔnmɔnt tà nnɔ yé fɛnm nɛ, nɛ ni'tekjim mɔ yé fɛnm nɛ. <sup>15</sup> Bitɛnkpiib ɲa ní mɔnbe kí mɛkre la, nɛ wɔngɛh ki teh ti nɛndeh Uwien bo nɛ-a! Kimɛ ti lienh ki teh u mɛkre' Kristo nɛ, nɛ wa mɛkre' wɔ-a! <sup>16</sup> Tɔ, bitɛnkpiib ɲa ní mɛkre la, Kristo mɔ ɲa mɛkre' nɛ-a! <sup>17</sup> Nɛ Kristo ɲa mɛkre' la, ni'tekjim yé fɛnm nɛ, nɛ ni juore' ki te ni'biere ni nɛ. <sup>18</sup> Nnɔ la, Kristo yaab bà kpo' nnɔ mɔ juore' fɛnm nɛ. <sup>19</sup> Nɛ yé ti ɲmɔbe lidɛndɛnl Kristo bo uɲɛndun wuu ni ya fuobm baba bo nɛ la, ti yé bicɛɛkɛndɛn ki cɛn' binib kɛ.

<sup>20</sup> Ama imòn nɛ, Uwien mɔnbe ki mɛkre' Kristo. Wɔn nɛ yé unil wà kpɛ' ki mɛkre' bitɛnkpiib ni, ki wuɔn' ki ye bitɛnkpiib mɔ lá li mɛkre. <sup>21</sup> Kimɛ unibaab bo nɛ mikuum baa', nɛ unibaab mɔ bo nɛ bitɛnkpiib li mɛkre. <sup>22</sup> Adam bo nɛ binib kɛ kpuokeh, nɛ Kristo mɔ bo nɛ binib kɛ li mɛkre. <sup>23</sup> Ama wà kɛ nin u'sensien nɛ. Kristo nɛ yé unil wà kpɛ' ki mɛkre'. U lá baa' la, binib bà yé u'yaab nnɔ mɔ li mɛkre. <sup>24</sup> Ni ya puoli bó nɛ Kristo li gben nà ɲmɔbe ufaa kɛ ya bol nin nà ɲmɔbe mituɔm kɛ ya bol, kí taa libɛl kí jiin kí de u'Baa Uwien. Ugbɛngbenyo nínɔ. <sup>25</sup> Kimɛ u li yé ubɛr nɛ kí tí baa uyo wà Uwien li cɛrɛ wɔ ní tɛ u'nɛnnɛndb kɛ bo litaal. <sup>26</sup> Mikuum nɛ yé unɛnnɛndfɔrke wà u li gben u'gber. <sup>27</sup> Imòn, Uwien cɛrɛ' u tɛ' nibonn kɛ bo litaal ɲa. Ama bi ye: «U tɛ' nibonn kɛ bo litaal la», nà yé u tɛ' Uwien mɔ bo nɛ, kimɛ Uwien nɛ cɛrɛ' u tɛ' nibonn kɛ bo litaal. <sup>28</sup> Uyo wà Kristo li yé uciɛn nibonn kɛ bo nnɔ, u ya yo nɛ wɔn Kristo wà yé Uwien ya Bijɛ nnɔ mɔ li jiin ticiɛnt kí de Uwien wà de' wɔ ticiɛnt nibonn kɛ bo nnɔ. Nnɔ nɛ Uwien li tɔrɛ kí li yé ubɛr nibonn kɛ bo.

<sup>29</sup> Tɔ, maale mɛn kí liike binib bà cɛrɛh bi siih bɛ Uwien ya ɲunm bitɛnkpiib ya taal ni nnɔ ya gber. Nɛ yé bitɛnkpiib ɲa ní mɛkre la, nɛ li tore bɛ ba? Bitɛnkpiib ɲa ní mɛkre la, bɛ bo nɛ bi cɛrɛh bi siih bɛ Uwien ya ɲunm bi'taal ni? <sup>30</sup> Nɛ yé bitɛnkpiib ɲa ní mɛkre la, bɛ bo nɛ tinbi sɔnh ituon yà cɛrɛh kinunbɔnk tuu ki bàareh tɛ? <sup>31</sup> N'yaabɛ, nɛ yé imòn nɛ, idaan kɛ mikuum kpàakeh nni nɛ. Nɛ liɛbe' ki ye imòn mɔ nɛ ki ye ninbi nɛ yé n'bo ijenjɛbn Yonbdaan \*Yesu Kristo ya sɛn ni. <sup>32</sup> Nɛ yé n mɔn' nin muwɛnbiimu Efɛs ya du bó inisaalyɛnmaale baba bo nɛ la, n kpɛle si ba? Nɛ yé bitɛnkpiib ɲa ní mɛkre la, cɛrɛ mɛn tí li jinh kí ɲuh-a, kimɛ wenli ti li wun kpo-a!

<sup>33</sup> La cɛrɛ mɛn uba ní lɛrɛ nɛ. «A tɔkeh nin unibiɛrɔ la, a'mɔ li tí gben kí saa nɛ.» <sup>34</sup> Cuo mɛn ni'ba ki la teh mɛn biɛrɛ, kimɛ ni'ni biba ɲa bɛn Wien. N len' nà nɔ yé ni'fɛ nɛ.

### *Bà li mɛkre ya gbɛnɛnt li te ma bo*

<sup>35</sup> Ama uba li fre kí niire kí ye: «Bitɛnkpiib li mɛkre mila bo? Bi mɛkre' la, bi'gbɛnɛnt li te mila bo?» <sup>36</sup> Ujɔr sin, a bule' nibonbuonn nà kpo' la, na ní pɛ. <sup>37</sup> Nibonbuonn nà a bule' nè nnɔ ɲa yé nɛ pɛn' nà nnɔ, nɛ yé nɛ lá li lùon nà nnɔ nɛ. Nba la, a bule' iji nɛ, mitɔm la, tibontɔr. <sup>38</sup> Nɛ Uwien cɛrɛh mibim kɛ pɛh mipiɛm u yíe ma bo. Nɛ bim kɛ bim nin mipiɛm nɛ.



<sup>39</sup> Bonn ke bonn nin ni'gbenent ne. Binib ya gbenent te tu'ba ne, tiwent mo yaar tu'ba, inuon mo yaar tu'ba, ijen mo yaar tu'ba. <sup>40</sup> Kutaaku bo ya bont te tu'ba, ne kitink bo yaar mo te tu'ba. Kutaaku bo yaar ya manbe nin kitink bo yaar ya manbe na te. <sup>41</sup> Uwien ya wien te u'ba ne, unmaal mo yu u'ba, inmaabii mo yu u'ba. Inmaabii monon ke ya wien na kpe.

<sup>42</sup> Bitenkpiib la mekre' la, ni li te non ne. Bi sube' be nin tigbenent ta non li bure ne, ama bi li mekre nin ta non tun na ri bure. <sup>43</sup> Bi subeh nin tigbenent ta non na nmobe sel, bi li mekre nin ta non, tun nmobe ukpieke ne. Bi subeh nin tigbenent ta non na nmobe tuom, bi li mekre nin ta non, tun nmobe mituom ne. <sup>44</sup> Bi subeh nin tigbenent ta non, tu ye tinisaalgbenent ne. Bi li mekre nin ta non ye \*Mifuoñaanm li de ta ne. Tinisaalgbenent te la, \*Mifuoñaanm dienh ta mo te ne. <sup>45</sup> Nen bo ne ni kele' \*Uwien ya gbanku ni ki ye: «Adamkpiek la ye unisaal ne,» ama Adamfórke† won ye \*Mifuoñaanm ya daan ne ki dienh limiel. <sup>46</sup> Na ye ti li kpie ki li nmobe \*Mifuoñaanm dienh tigbenent ta non ne. Ti li nmobe tinisaalgbenent ne ki yaan ki la le \*Mifuoñaanm dienh ta non. <sup>47</sup> Uwien la taa' titent ne ki tien' unikpiek. U ye titent ne. Unilie won, won ñen' paaki bo ne ki jire' ni. <sup>48</sup> Bi taa' titent ki tien' unikpiek wa non te ma bo non, ba ye kitink bo yaab mo te non ne. Wa ñen' paaki bo ki jire' ni te ma bo non, ba li ye paaki bo yaab non mo li te non ne. <sup>49</sup> Ti naan unil wa bi taa' titent ki tien' wo ma non, non ne ti la li naan wa ñen' paaki bo ki jire' ni non mo.

<sup>50</sup> N'yaabe, n ye ri toke na so: na nmobe tigbenent nin misem na ri fre ki ko Uwien ya bel ni. Na li bure nin na ri bure na ri fre ki taan.

<sup>51</sup> Cenge men ri toke ne tigbebalkaar tuba. Ti'ke na ri kpo ki gben ama ti'ke ya gbenent li lebre ne. <sup>52</sup> Tigbenent ya lebrm non na ri taande ni li tien ten bununbu ya kenbm ne uyo wa bi li piebe linatunfarkaarl non. Bi piebe' linatunfarkaarl non uyo wa la, bitenkpiib li mekre ki li nmobe tigbenent ta na ri bure, ne Uwien ri lebre ti'mo ya gbenent. <sup>53</sup> Kime ni kpe tigbenent ta li bure non ri kpende ta na ji li bure ne, ne ta li kpo non mo ri kpende ta na ji li kpo. <sup>54</sup> Tigbenent ta li bure non la kpende' ta na ri bure na tigbenent ta li kpo mo kpende' ta na ji kpo la, nen daali ne na kele' \*Uwien ya gbanku ni non li tien. Ni kele' ki ye:

«Uwien faake' nin mikuum, ki gben' mi'gber.

<sup>55</sup> Mikuumε, a'faa ji te la?

Mikuumε, a'lobpien ji te la?» <sup>56</sup> Ibiere ne ye mikuum ya lobpien, ne yiko bo ne ibiere nmobe ti'bo mituom.

<sup>57</sup> Nin nen ke ti faare men Uwien, kime won ne dienh te ufaa ki ñe Yonbdaan \*Yesu Kristo bo.

<sup>58</sup> Nen bo, n'yaab ba n ye be, tuore men ki cuo kenken, ki cere ni'nun ri li mon Yonbdaan ya tuonl bo, ni li tuu ki sonh le ki joh inun bo, ki li ben ki ye ni sonh ki dienh ti'Yonbdaan la, ni'tontonku na ri juore fem.

## 16

### *Bi li taan ilike ma bo ki tore Kristo yaab ba te Yerusalem bo*

<sup>1</sup> To, mipum ma ni li taan me ki tore Uwien ya nib non ya gber won, tien men ten n la toke' Kristo ya taan yaab ba te Galasi ki ye be ri tien ma bo non. <sup>2</sup> Nawucu ke nawucu ya wenkpieke ya daali\*, ni'ni wa ke ri li boreh u laa' na bo ki blinh u'den niba saan u'tuom kpe ma bo. Ni la li gu ri baa na ki yaan ni taan mipum non. <sup>3</sup> Ni gende ni'ni biba, n la baa' la, ri de be tigbont, ki son be, be ri taa ni taan' mipum ma non ki ti de Kristo yaab ba te Yerusalem ni non. <sup>4</sup> Ni kpe n'mo ri jo ni'bo la, n li toke nin be.

### *Pal bondeh isen ya jom*

† 15:45 Bi ye Adamfórke la, bi niireh Kristo. \* 16:2 Nawucu ya wenkpieke ne ji ye Kristo yaab ya fofuordaali.

<sup>5</sup> N maaleh ń ñε Maseduɔnn nε kί baa ni'saan, kimε n li cuon kί càare mi ya tinfɛnm nε. <sup>6</sup> Nba la, n li tien ni'saan iwenkàankε bii n li tien ni'saan kί tī gben tiwɔrciɛnt ya yo nε, ηɔ ní tore nni n fre kί baa n joh nà bó. <sup>7</sup> Ma yíe miε bo n baa' ni'saan la, ń sere itàan bo kί gèbre', kimε Yonbdaan tuo' la, n yíe ń tien ni'saan iwien ile nε.

<sup>8</sup> Ama n li juore Efɛs ya du ni, kί tī baa Pantekot ya nacenku ya yo nε, <sup>9</sup> kimε Uwien pɛkre' usɛn ki de' nni ń sɔn lituonciɛnl udu nnɔ ni nin binɛnnɛndb yɛbe ma kε nnɔ.

<sup>10</sup> Timote baa' ni'saan la, ní ñikn kί teke wɔ mɔnmɔnm, kί cère u'yɛnm ń li dɔ, kimε u'mɔ sɔnh Yonbdaan ya tuonl tɛn min nε. <sup>11</sup> Nɛn bo, uba la liike wɔ fɛnm. Ní tore wɔ, ηɔ wɔ ń liεbe ní n'saan nin uyɛnduɔn, kimε n gu wɔn nin ti'ninjieɓ bitɔɓ ya liεbm ní nε.

<sup>12</sup> Ti'ninjε Apolos wɔn, n tũɔre' kί sure' wɔ wɔ ń p̄ɛre ti'ninjieɓ ni'saan, ama wa yíe wɔ ń baa ni'saan fɛnfɛnnɔ wuɔ fiebu. U lá laa' usɛn la, u li baa ní.

### *Igbierfɔrke nin ifuonde*

<sup>13</sup> La gɔh mɛn, kί li faa mitekjim ni, kί li ηmɔbe lifɛl, kί li faa. <sup>14</sup> Li teh mɛn tibont kε nin miyíem.

<sup>15</sup> N'yaabε, n li liεbe kί gbierε nε usɛn uba mɔ ni. Ni bɛn ki ye Sitefanas nin u'den yaab nε kpiε' ki teke' Kristo ki jin' nin Akayi ya tinfɛnm ya nib kε, nε ki taa' bi'ba ki de' Uwien ya nib ya torm. <sup>16</sup> Nɛn bo, li boh mɛn bi ya nib nin bà kε taakeh nin bε ki sɔnh ituon nin inunmɔn nnɔ.

<sup>17</sup> Sitefanas nin Fotunatus nin Akayikus ya baam là sɔnge' n'yɛnm. Na là te n'saan ma nnɔ, bɛn nε la lère' ni'lɛn. <sup>18</sup> Kimε bi là duɔn' n'yɛnm ki duɔn' ni'mɔ yaam. Li p̄ɛkeh mɛn bi ya nib. <sup>19</sup> Kristo ya táan yaab bà te niε saan Asi ya tinfɛnm ni nnɔ fuondeh nε. Akilas nin Prisil nin Kristo ya taanl ya nib bà taakeh bi'den nnɔ mɔ fuondeh nε mɔnmɔnm Yonbdaan ya yel bo. <sup>20</sup> Ti'yaab kε fuondeh nε. Ni'mɔ ń li fuondeh tɔɓ mɔnmɔnm. <sup>21</sup> Min Pɔl nin n'yul nε keke' ifuonde yii nɔ.† <sup>22</sup> Unil wà ηa yíe Yonbdaan la, Uwien ń wiε wɔ miηuɔm. Maranata! Ni'tingi si: Yonbdaan, dɛn! <sup>23</sup> Yonbdaan \*Yesu ń juoke nε. <sup>24</sup> \*Yesu Kristo bo nε n yíe ni'kε.

† 16:21 Kí ñε Kugbɔnku kuu ya cinm kί lá baa 16:20 Pɔl lienh nε uba kieh, ama wɔn nin u'yul nε keke' migbiirm 21 kί tī baa' 24.

## Kugbɔnlieku kùà Pɔl kɛle' ki de'

### Korɛnt yaab nnɔ

## Nà wɔngeh kugbɔnku kuu te ma bo

Pɔl kɛle' kugbɔnkpiɛku kùà ki de' Korɛnt yaab nnɔ ya puoli bó nɛ wɔn nin u'yul jon' ni'bó. U tɪ baa' nɛ bi'yɛnm ɲa ɲmaake' u'bo. Bi'ni biba mɔnɔn yɛ ki ye wa yé Yesu ya tond. Pɔl mɔ ya yɛnm ɲa ɲmaake' bi'bo. Nɛn bo nɛ wa wuɔke' bi'saan, ki liɛbe' Efɛs ya du bó. U tɪ baa' nɛ ki kɛle' kugbɔntɔku nin tinunsiir ki de' Tit wɔ rɪ tɪ de bɛ. Ku ya gbɔnku bole' nɛ, nil ɲa bɛn nɪ tien' ma. Tit tuke kugbɔnku nnɔ uyo wà ki joh Korɛnt nnɔ, Pɔl ya yɛnm ɲa dɔ. Tit liɛbe' nɪ ki lá cende' Pɔl Maseduɔnn ya du ni nɛ, ki tɔke' wɔ ki ye Korɛnt yaab tuo' u'gbɛr ki lèbre' bi'tetem, nɛ u'yɛnm ji duɔn' nɛ u kɛle' kugbɔnku kuu kí de bɛ.

Kí cin liyul 1 kí tɪ baa iyul 7 Pɔl len' ki fie' u'ba, ki ye u yé Kristo ya tond nɛ, nɛ nɪ yé u'bo lituonl nɛ. Ijɛnd nin kinunbɔnk tu' wɔ u'tuonl ni ki yebe, ama u juun' ki teke' nɛn kɛ.

Kí cin iyul 8 kí tɪ baa 9 Pɔl sureh Kristo yaab bà te Korɛnt ya du ni nnɔ bɛ rɪ pu Kristo yaab bà te Yerusalem ni, ka ɲmɔbe niba nnɔ mipum nin tinimɔnt.

Kí cin iyul 10 kí tɪ baa 13 Pɔl wuɔn' unil li ɲmɔbe mitetem mà, kí li yé Kristo ya tond nɛ. U ya bùol Kristo ya tond yé unil wà jiindeh u'ba tingi ki kpiindeh bitɔb nɛ.

### Ifuonde

<sup>1</sup> Min Pɔl, n yé \*Yesu Kristo ya tond nɛ Uwien ya yíem bo. Min nin ti'ninje Timote nɛ kieh kugbɔnku kuu tí de Uwien ya taanl yaab bà te Korɛnt ya du ni nnɔ nin bà mɔ kɛ yé u'yaab ki te Akayi ya tinfɛnm kɛ ni nnɔ. <sup>2</sup> Ti'Baa Uwien nin Yonbdaan \*Yesu Kristo rɪ juoke nɛ, kí de nɛ uyɛnduɔn.

### Ni'mɔ rɪ li duɔndeh ni'tɔb ya yɛnm

<sup>3</sup> Tɪ pèke mɛn Uwien ti'Yonbdaan \*Yesu Kristo ya Baa. U yé ti'Baa wà muɔh binib micɛcɛkm ki gbiekeh nɛ, ki yé Uwien wà duɔndeh binib ya yɛnm isɛn kɛ ni. <sup>4</sup> U duɔndeh ti'yɛnm ijɛnd kɛ ni ɲɔ ti'mɔ rɪ li freh ki duɔndeh binib bà lenh ijɛnd kɛ ya bol ya yɛnm kí ñɛ tinbi mɔnɔn lenh uyɛnduɔn wà u'saan nnɔ bo nɛ. <sup>5</sup> Nnɔ nɛ Kristo bo, ti lenh ijɛnd ki gbiekeh ma nnɔ wɔn Kristo bo nɛ Uwien duɔndeh ti'yɛnm mɔ ki gbiekeh. <sup>6</sup> Ti te uyɛnsaa ni la, ti nuunh ninbi ya yɛnduɔn nin ni'ɲmɛrm nɛ. Uwien duɔn' ti'yɛnm ɲɔ ti'mɔ rɪ duɔn ni'yaam nɪ juun kí tuo ti jinh ijɛnd yà nnɔ nɛ. <sup>7</sup> Nɛn bo, ti cinbe ki du ni'bo ki gbien', kime ti bɛn ki ye tinbi nin ninbi taakeh ki jinh ijɛnd ma nnɔ, ti li taan kí li ɲmɔbe uyɛnduɔn mɔ nɛ.

<sup>8</sup> Ti'yaabɛ, ta yíe nɪ li te ka bɛn ki ye ijɛnd là tu' tɛ Asi ya tinfɛnm ni. Ijɛnd nnɔ ɲa là ɲmɔbe fuul. I là faake' nin tɛ cɛɛn nɛ, nɛ ta ji là daan ki ye ti li lɛ limiel mɔnɔn. <sup>9</sup> Imɔn, tinbi mɔnɔn là maale' ki ye ti'kuum ya yo baa' nɛ. Nɪ là tien' nnɔ ɲɔ ti la ji rɪ li du ti'ba bo, ama tí li du Uwien wà mɛkreh bitɛnkpiib nnɔ bo nɛ. <sup>10</sup> Wɔn nɛ ñɛn' tɛ mi ya kubierm ni, ki tí li ñɛn tɛ mi'ni mɔ. Imɔn, ti du wɔn bo nɛ ki ye u li ñɛn tɛ len. <sup>11</sup> Ni'mɔ toreh tɛ len nɛ nin ni'kaare. Nnɔ nɛ Uwien dienh tɛ mimɔnm kí ñɛ linigol ya kaare bo. Nɛ tinbi bo binib bà yebe mɔ li faare Uwien.

### Nà cère' Pɔl pien' u'sɛn ya jom

<sup>12</sup> Ti jɛbnh ti'ba nà bo si: ti bɛn ti'yɛnm ni, ki ye ti ɲmɔbe mitetem mà nnɔ ñɛn' Uwien saan nɛ. Mɪ wien nɛ, ki cuube uɲɛndun wuu ni, ni'kɛ tu nin ninbi bo. Uwien ya juokm nɛ cère' ti te nnɔ, na yé nisaalyɛnfuom. <sup>13</sup> Ti kɛle' nɛ tigbɛr tà ti'gbɔnt ni nnɔ, gbɛr tuba ɲa te len ɲɔ nɪ kàan ka rɪ fre kí bɛnde tu'tingi. Nɛ n teke' ki jin' ki ye ni li fre kí bɛnde tu'kɛ ya tingi <sup>14</sup> tɛn ni cin' ki bɛndeh ma ki teh tinbi nɛ yé ni'jenjɛbn, nɛ ni'mɔ li yé ti'yɛ lidaali là Yonbdaan \*Yesu li baa nɪ nnɔ.

<sup>15</sup> N là ηmɔbe mi ya dum ya bol nɛ ki cɛkre' n'yɛnm rí kpiɛ kí baa ni'saan ηɔ ní tí rí lɛ mimɔnm kí pukn. <sup>16</sup> N ñɛn' ni'saan la, n li jo Maseduɔnn ya tinfɛnm bó nɛ, kí tí rí liebe ní ni'saan ηɔ ní de nni ná kɛ ciɛke nni rí fre kí jo Sude ya tinfɛnm bó. <sup>17</sup> N cɛkre' n'yɛnm rí tien nnɔ ma nnɔ, ma tũɔre' ki maale' nɛ-ɛɛ? Bii n cɛkre' n'yɛnm rí tien ná nnɔ yé unisaal ya yɛnmaale nɛ, ηɔ rí ye nɛn nɛ, kí liebe kí ye nɛn ηa ñí? <sup>18</sup> Uwien yé umɛmɔndaan nɛ. U bɛn ki ye ta tɔkeh nɛ ki teh nɛn nɛ, ki liebeh ki teh nɛn ηa ñí. <sup>19</sup> Kime \*Yesu Kristo Uwien ya Bijɛ wà min nin Silfɛn\* nin Timote là tɔke' nɛ u'gɛɛr nnɔ ηa teh nɛn nɛ, kí liebe kí ye nɛn ηa ñí. Ama u tuu ki cɛ ki teh nɛn nɛ. <sup>20</sup> Wɔn bo nɛ Uwien là pũɔn' ki ye u li tien ná kɛ nnɔ tien'. Wɔn bo mɔ nɛ ti teh «Ami» ki kpiɛkreh Uwien. <sup>21</sup> Wɔn Uwien nɛ cɛre' tinbi nin ninbi faa mitekjim ni kí ñɛ Kristo bo. Wɔn nɛ gɛnde' tɛ ki tien' u'yaab, <sup>22</sup> ki tien' u'diɛku ti'bo, ki cɛre' \*Mifuoñaanm te ti'fɛl bo. Nɛn nɛ wuɔn' ki ye ta rí lúo mimɔnm mà u bonde' mɛ ki ble' tɛ nnɔ.

<sup>23</sup> Min wɔn, n taa' Uwien nɛ ki tien' n'mɔnkunl, n nɛn la, u la daan nni. Ma là yíe rí len tuba, tù rí saa ni'yɛnm nɛ. Nɛn nɛ cɛre' ma liebe' ní Korɛnt ni. <sup>24</sup> Na yé ti nuunh tí wɔbn nɛ kí wuɔn nɛ ni li teke Uwien kí ji ma bo nɛ, kime ni co mitekjim kenken nɛ. Ama ti nuunh tinbi nin ninbi rí taan kí sɔn ηɔ ní li ηmɔbe uyɛnsɔnge nɛ.

## 2

<sup>1</sup> Min cɛkre' ná sɔ n'yɛnm ni: nǐ yé n li liebe ní ni'saan, ni'yɛnm rí saa la, ma we ní. <sup>2</sup> Kime min nin yul saa' ni'yɛnm la, rí ji li lɛ ηmɛ wɔ rí de nni uyɛnsɔnge? Na yé n saa' ninbi bà ya yɛnm nnɔ-ɔɔ? <sup>3</sup> Nɛn bo nɛ n tí là kele' nɛ kugbɔnku kuba, kime ma là yíe rí baa n'yɛnm rí saa ninbi bà bi li de nni uyɛnsɔnge nnɔ bo. N bɛn ni'kɛ ya tetem. Ná li sɔnge n'yɛnm nnɔ li sɔnge ni'kɛ mɔ yaam nɛ. <sup>4</sup> N là kieh nɛ kugbɔnku nnɔ ma nnɔ, n'yɛnm ηa là ηmɛ fimmu nɔ, nǐ wi nni ki tí kɛnde' nɛ n muɔh bríbrí. Nin nɛn kɛ ηɔ ma là kele' kugbɔnku bugbɛn rí saa ni'yɛnm, n la yíe ní bɛnde n yíe nɛ ki tí kɛ ma bo nɛ.

### *Wà bii' nnɔ, ní fère wɔ*

<sup>5</sup> Unil tien' uyɛnsaa ya bonn la, na yé u saa' min baba ya yɛnm nɛ, u saa' ni'kɛ yaam nɛ. Ma yíe rí len kí tí kɛnde. Na li yé ni'kɛ mɔnɔn la, u saa' ni'ni biba yaam. <sup>6</sup> U ya daan wɔn, ni'ni bà yɛbe kɔn' nin wɔ ma, nǐ dɛkre nɛ. <sup>7</sup> Nɛn bo, ni ji bi li fère wɔ u'biil nɛ, kí duɔn u'yɛnm. Nnɔ ηa ñí la, u'yɛnm ji li saa kí tí kɛnde nɛ. <sup>8</sup> Nɛn bo nɛ n sureh nɛ ní wuɔn wɔ kí ye ni yíe wɔ. <sup>9</sup> Kime n kieh nɛ kugbɔnku kuu ma nɔ, n yíe rí diire kí liike ni boh tibont isɛn kɛ ni bii na boh nɛ. <sup>10</sup> Ni fère' unil wà u'biil la, n'mɔ fère wɔ nínɔ. N fère' wɔ u'biil ma nnɔ, na bi ciɛke min rí fère wɔ, ninbi bo nɛ n fère' udaan Kristo ya nun bó, <sup>11</sup> ηɔ ki la de \*Satan usɛn wɔ rí lɛre kí tuln tɛ, kime ti bɛn u maaleh ti'bo yà.

### *Pɔl ya yɛnm saa' Trowas ya du ni*

<sup>12</sup> N là jon' Trowas ya du bó rí tí tɔke Kristo ya gbɛmɔnmɔnt nɛ. Nin Yonbdaan de' nni usɛn rí sɔn lituonl bugbɛn ma kɛ nnɔ, <sup>13</sup> n'yɛnm ηa là dɔ, kime ma là laa' n'ninje Tit. Nɛn bo nɛ n là cɛbe' udu nnɔ yaab ki bure' Maseduɔnn ya tinfɛnm bó.

### *Yesu Kristo nɛ mɔn' ki faake'*

<sup>14</sup> Tɔ, tí faare mɛn Uwien. Uyo kɛ u cɛreh ti te binib bà wɔngɛh ki teh u mɔn' ki faake' ya cɛkl ni nɛ kí ñɛ Kristo bo. Kí ñɛ tinbi bo nɛ u cɛreh binib bɛndɛh Kristo ya gɛɛr ni'kɛ saan. U'gɛɛr ya bɛndm nnɔ te tɛn lɛfina wà ya nu ηmɛ ki joh ni'kɛ saan nɛ. <sup>15</sup> Imɔn, Uwien bo, ti yé Kristo ya lɛfina nɛ ki nu ki ηmɛ. Bà pɛ miηmɛrm ya sɛn bo nin bà pɛ usɛn wà li cɛre bɛ rí juore fɛnm kɛ ciɛh lɛfina nnɔ ya nu nɛ. <sup>16</sup> Lɛfina nnɔ yé biba bo mikuum ya nu nɛ, ki tukeh mikuum ki bàareh bɛ, ki yé bitɔb bo limiɛl ya nu, ki cɛreh bi lɛnh limiɛl. Nɛm li fre kí sɔn li ya tuonl-i? <sup>17</sup> Tinbi ηa taah Uwien ya gɛɛr ya tɔkm ki teh ukpenkpende tɛn binib bà yɛbe teh ma bo. Uwien nɛ sɔn' tɛ. Kristo bo nɛ ti tɔkeh wɔn Uwien ya gɛɛr u'nun bó, jɔknt ηa te ti'fɛl bo.

\* **1:19** Bi liebe' ki yih Silfɛn nɛ Silas. Liike Itũon 15:22, 40.

## 3

*Kujɔtiefɛnku ya tuonl*

<sup>1</sup> Ni maaleh tɪ biɛ kɪ taa ti'ba kɪ wuɔn nɛ nɛ? Bii ni maaleh tɪ de nɛ tigbɔnt kɪ wuɔn kɪ ye ti yɛ \*Yesu ya tondb nɛ? Bii ni maaleh ninbi nɛ rɪ de tɛ tigbɔnt kɪ wuɔn kɪ ye ti yɛ bɛ, tɛn binib biba teh ma bo? <sup>2</sup> Ninbi nin ni'yul nɛ yɛ ti'bo kugbɔnku. Kugbɔnku nnɔ kɛle' ti'fɛl ni nɛ, nɛ unil kɛ bɛn kù, kɪ kaan' kù mɔ. <sup>3</sup> Imɔn, ni mɔnbe kɪ yɛ Kristo bo kugbɔnku nɛ kɪ nɛ ti'tuonl bo. Kua kɛle' nin sɛm, kù kɛle' nin Uwien wà fuobe ya Fuoñaanm nɛ. Kua kɛle' tɛnpɛnpɛn bo, kù kɛle' binib ya fɛl ni nɛ.

<sup>4</sup> Kristo bo, ti n̄mɔbe mi ya dum nɛ Uwien ya nun bó. <sup>5</sup> Ta maale' kɪ ye ti li fre kɪ tien niba ti'tiɛma tuɔm bo, ama Uwien nɛ cɛreh ti freh kɪ teh, ti teh nà. <sup>6</sup> Wɔn nɛ de' tɛ mituɔm kɪ cɛre' ti yɛ kujɔtiefɛnku ya tonsɔnb. Kujɔtieku nnɔ n̄a n̄ɛn' Moyis kɛle' \*yiko wà nnɔ, kù n̄ɛn' \*Mifuoñaanm nɛ. Kimɛ \*yiko bàareh nin mikuum nɛ, nɛ \*Mifuoñaanm dienh limiel.

<sup>7</sup> Yiko nnɔ là kɛle' itɛnpɛnpɛn bo nɛ, kɪ n̄mɔbe Uwien ya kpiɛke, kɪ cɛre' Moyis ya nun bó windeh. Israyɛl yaab n̄a là li fre kɪ liike u'nun bó kɪ n̄ɛ ukpiɛke nnɔ bo. Ama ukpiɛke nnɔ n̄a wuɔkreh. N̄i yɛ \*yiko wà bàareh nin mikuum ya tuonl là n̄mɔbe u ya kpiɛke la, <sup>8</sup> bɛ li tien \*Mifuoñaanm ya tuonl ya kpiɛke n̄a rɪ cɛn nnɔ? <sup>9</sup> Lituonl là bo Uwien li bu kɪ biin binib n̄mɔbe ukpiɛke la, bɛ li tien lituonl là li cɛre wɔ rɪ bù binib bigbɛmɔndɛnb n̄a rɪ li n̄mɔbe kɪ cɛn nnɔ? <sup>10</sup> Nɛn bo nɛ ukpiɛke wà là windeh uyo bo nnɔ n̄a yɛ bonn fɛnfɛnnɔ ya kpiɛke wà n̄a n̄mɔbe u ya tɔ nɔ bo. <sup>11</sup> N̄i yɛ nà n̄a wuɔkreh n̄mɔbe ukpiɛke la, bɛ li tien nà tuu kɪ te n̄a rɪ li n̄mɔbe ukpiɛke kɪ cɛn nɛn-i?

<sup>12</sup> Ti du li ya dɛndɛnl bo nɛ kɪ n̄mɔbe lifɛl. <sup>13</sup> Ta teh tɛn Moyis là teh ma bo. U là pibndeh u'nun bó n̄a Israyɛl yaab la lɛ ukpiɛke wà windeh ka rɪ wuɔke nnɔ ya gbenm nɛ. <sup>14</sup> Ama bi'yɛnm juore' kɪ liibe nɛ. Haali nin dinnɔ bi kàanh Kujɔtiekaaku ya gbɔnku la, nà là lieke bi'nun bó nnɔ biɛ kɪ te nɛ, na lèkre'. Kristo n̄a rɪ la, uba n̄a rɪ fre kɪ lèkre nɛ. <sup>15</sup> Imɔn, haali nin dinnɔ bi kàanh Moyis ya gbɔnt la, n̄i te tɛn niba nɛ cùube bi'yɛnm bo. <sup>16</sup> Ama unil pekre' kɪ paan' Yonbdaan bo nɛ la, u'yɛnm li cɪbre. <sup>17</sup> Kimɛ Yonbdaan yɛ \*Mifuoñaanm nɛ. Nɛ Yonbdaan ya Fuoñaanm te nà saan la, liwiɛl nɛ te ni'saan. <sup>18</sup> Tinbi bà kɛ niba n̄a ji lieke ti'nun bó nnɔ, ti te tɛn kinunliik nɛ bi likeh kɪ lɛnh Yonbdaan ya kpiɛke windeh ma bo. Nɛ wɔn wà yɛ \*Mifuoñaanm nnɔ lèbreh tɛ kɪ cɛreh ti nɛngreh wɔ, kɪ lɛnh ukpiɛke u yɛbreh kɪ joh.

## 4

*Uwien taa' u'faal kɪ n̄ukn' tinbi bà yɛ isɛnceb nnɔ nɛ*

<sup>1</sup> Uwien ya nimɔnt bo nɛ u taa' u'tuonl kɪ n̄ukn' tɛ. Nɛn bo nɛ ti'gbɛnɛnt n̄a n̄ɛndeh. <sup>2</sup> Ama ti wiɛ' itùon yà yɛ libɔnbɔnl ni ya tùon kɪ n̄mɔbe ifɛ nnɔ. Ta taah cekn kɪ lɛreh nib, ka lèbreh Uwien ya gber ye ma. Ama tinbi tɔkeh tigbɛmɔnt baba nɛ n̄i wien. Nnɔ nɛ unil kɛ li du ti'bo Uwien ya nun bó. <sup>3</sup> Nɛ n̄i yɛ ti tɔkeh tigbɛmɔnmɔnt tà nnɔ ya tingi biɛ kɪ buɔ la, tu'tingi buɔ bà juonh fɛnm nnɔ bo nɛ. <sup>4</sup> Bi yɛ binib bà n̄a teke' Kristo kɪ jin' nɛ. \*Satan wà yɛ uɛndun wuu ya wien nnɔ nɛ libe' bi'yɛnm kɪ cɛre' ba lɛnh tigbɛmɔnmɔnt ya wenwenku. Kuwenwenku nnɔ wɔngɛh Kristo wà yɛ Uwien ya nɛnnɛnku nnɔ ya kpiɛke nɛ.

<sup>5</sup> Tɔ, ti tɔkeh nɛ tigbɛr tà nnɔ n̄a lienh tinbi bo, tù lienh \*Yesu Kristo bo nɛ kɪ teh wɔn nɛ yɛ Yonbdaan. Tinbi bɛn wɔn, ti tɔkeh nɛ kɪ teh ti yɛ ni'tonsɔnb nɛ wɔn \*Yesu bo. <sup>6</sup> Kimɛ Uwien wà là ye: «Kuwenwenku rɪ wende licinɛunl ni nnɔ», wɔn nɛ wende' ti'fɛl ni n̄a tɪ bɛnde u'kpiɛke wà windeh [Yesu] Kristo ya nun bó nnɔ.

<sup>7</sup> Tinbi bà yɛ isɛnceb nnɔ, Uwien taa' u'gbɛmɔnmɔnt tà yɛ lifaaciɛnl nnɔ kɪ n̄ukn' tinbi nɛ. Nɛn nɛ wuɔn' kɪ ye mituɔm mà n̄a n̄mɔbe m̄i kɛ nin bà nnɔ n̄ɛn' Uwien saan nɛ, ma n̄ɛn' tinbi saan. <sup>8</sup> Bi pɛbeh tɛ isɛn kɛ ni nɛ, ama ba freh kɪ mɛreh tɛ. Ti te iyɛnbɛn ni, ama ti tuu kɪ n̄mɔbe lidɛndɛnl nɛ. <sup>9</sup> Bi bùuh tɛ, ama ba nɛndeh tɛ. Bi gbɔbreh tɛ, ama ba freh kɪ

gbendeh ti'gbɛr. <sup>10</sup> Uyo kɛ ti jinh \*Yesu là jin' ijɛnd yà u'kuum ni nnɔ nɛ ti'gbɛn ni, ɲɔ nɛ̀ rí wuɔn kí ye u'fuobm mɔ te ti'ni. <sup>11</sup> Imɔ̀n, \*Yesu bo, mikuum tuu ki kpàakeh tɛ nɛ ti'fuobm ni uyo kɛ ɲɔ nɛ̀ rí wuɔn kí ye u'fuobm te ti'gbɛnɛnt tà li kpo nnɔ ni. <sup>12</sup> Nnɔ nɛ mikuum benh nin tinbi, nɛ ninbi lɛnh mifuobm.

<sup>13</sup> Tɔ̀, nà kele' \*Uwien ya gbɔ̀nku ni nnɔ ti'mɔ teke' nɛn nɛ ki jin'. Ní kele' ki ye: «N teke' ki jin' ma nnɔ, nɛ ki len'.» Ti'mɔ teke' ki jin' ma nnɔ, nɛ ki lienh. <sup>14</sup> Imɔ̀n, ti bɛn ki ye Uwien wà mɛkre' Yonbdaan \*Yesu nnɔ li mɛkre ti'mɔ tí li te nin \*Yesu wɔ rí taa tinbi nin ninbi kí jo u'ba saan. <sup>15</sup> Ninbi bo nɛ i ya jɛnd kɛ tu' tɛ, ɲɔ Uwien ya mɔnm rí li yɛbreh ki joh, kí cère binib bà yɛbe rí li tùrɛh ki faareh wɔ, ki kpiɛkreh wɔ.

### *Ki li fuobe mitekjim bo*

<sup>16</sup> Nɛn bo nɛ ti'gbɛnɛnt ɲa ɲɛndeh. Ti'gbɛnɛnt jinh ki joh mɔnɔn la, ti'yɛnm ni wɔn, ti fɛndeh nɛ daan kɛ daan. <sup>17</sup> Kimɛ fɛnfɛnnɔ ya jɛnd ɲa yé bonn nà kpiɛke ti'bo, ka wuɔkreh mɔ. Ama í bondeh tɛ tí lɛ ukpiɛke wà yɛbe ka tí ɲmɔbe u kɛ nin bà, ki li tuu ki te mɔ nɛ. <sup>18</sup> Tinbi ɲa tɔnge bi lɛnh tibont tà, ama ti tɔnge ba lɛnh tà nɛ. Kimɛ bi lɛnh tà nnɔ ɲa wuɔkreh, nɛ ba lɛnh tà nnɔ, tun tuu ki te nɛ.

## 5

<sup>1</sup> Tɔ̀, ti bɛn ki ye ti fuobe nin tigbɛnɛnt tà kitink kɛ bo nɔ te tɛn lininbonl nɛ. Lininbonl nnɔ lá bere' la, ti ɲmɔbe iden yà li tuu ki te Uwien bonde' yí ki ble' tɛ paaki bó. Wɔn Uwien nɛ mɛn' iden bugbɛn, na yé nil nɛ mɛn' yí. <sup>2</sup> Ti laan te kitink kɛ bo ma nɔ, ti jɛndeh nɛ ki dunh, ti'nun mɔn tí lɛ iden yà te paaki bó nnɔ kí kɔ. Iden nnɔ te tɛn liliɛrl nɛ tí taa kí gole. <sup>3</sup> Ti gole' liliɛrl nnɔ la, ta ji li te ñil. <sup>4</sup> Ti'gbɛnɛnt laan te tɛn lininbonl kitink kɛ bo ma nɔ, ti dunh tɛn ti tuke litukl nɛ lí kpiɛke nin tɛ. Na yé ti yíe tí dàan ti ɲmɔbe tigbɛnɛnt tà kitink kɛ bo nɔ nɛ, ama ti nuunh tí li lɛ tigbɛnɛnt tà paaki bó nnɔ nɛ rí pibn tu'bo ɲɔ mifuobm rí fuobe kí ñɛn nà li kpo tu'ni nnɔ. <sup>5</sup> Uwien nin u'yul nɛ bonde' tɛ nɛn kɛ. U de' tɛ \*Mifuoñaanm ma nnɔ nɛ wuɔn' ki ye ta rí lúo mimɔnm mà u bonde' mɛ ki ble' tɛ nnɔ.

<sup>6</sup> Nɛn bo nɛ ti ɲmɔbe lifɛl uyo kɛ. Ama ti bɛn ki ye ti laan ɲmɔbe ti'gbɛnɛnt tà kitink kɛ bo nɔ, ti te kucɛnku nɛ, ka nɛke Yonbdaan den. <sup>7</sup> Kimɛ mitekjim nɛ pekreh tɛ, nà yé ti lɛnh nà nɛ pekreh tɛ. <sup>8</sup> Imɔ̀n, ti ɲmɔbe lifɛl, ki bi yíe tí dàan tuu ya gbɛnɛnt nɛ kí jo kí li te Yonbdaan saan. <sup>9</sup> Ama ti juore' ki ɲmɔbe tigbɛnɛnt tuu nɔ bii ti dàan' tù la, ti'nun mɔn nà bo si: tí sɔnge Yonbdaan ya yɛnm nɛ. <sup>10</sup> Kimɛ ní kɛ rí sere Kristo ya nun bó nɛ, wɔ rí bu tɛ tibuur kí cère unil kɛ rí lɛ u kɛ nà kí ñɛ u tien' nà kitink kɛ bo. Ní yé nà mɔn bii nà bre nɛ la.

### *Kristo nɛ taan' binib nin Uwien buñɔbu*

<sup>11</sup> Ti bɛn Yonbdaan ya bom yé nibonn nà. Nɛn bo nɛ ti sureh binib bɛ rí tuo u'ñɔbu bó. Uwien bɛn tɛ mɔnmɔnm; n du ki ye ni'mɔ bɛn tɛ mɔnmɔnm ni'fɛl ni. <sup>12</sup> Ta nuunh tí liɛbe kí taa ti'ba kí wuɔn nɛ, ama ti yíe ní lɛ ni li ñi nà bo, kí li jɛbnh ni'ba kí ñɛ tinbi bo nɛ. Nɛn bo, ni li fre kí jiin binib bà jɛbnh bi'ba upaan bo ya bont bo, ki dàandeh nà te lifɛl ni nnɔ bo. <sup>13</sup> Ní yé ti sɔnh liwaartuonl nɛ la, ti sɔnh ki dienh Uwien nɛ. Ti tí sɔnh liyenfotuonl nɛ la, ti sɔnh ki dienh ninbi nɛ. <sup>14</sup> Kristo ya yíem nɛ sureh tɛ ki cère' ti ɲmɔbe yii ya yɛnmaale. Yin si: unibaab nɛ teke' binib kɛ ya kuum ki kpo'. Nɛn bo, unil kɛ taan' ki kpo' nin wɔ nɛ. <sup>15</sup> U teke' bi'kɛ ya kuum ki kpo' ɲɔ nɛ̀ rí wuɔn kí ye bà fuobe ɲa ji fuobe ki de' bi'ba, ama bi fuobe ki de' wɔn wà teke' bi'kɛ ya kuum ki kpo', ki mɛkre' bitɛnkpiib ni nnɔ nɛ.

<sup>16</sup> Nnɔ nɛ, ñɛ fɛnfɛnnɔ kí li joh ta ji li bùh nib unisaal bùh binib ma bo. Ní yé uyo uba ti là bùh Kristo unisaal bùh binib ma bo mɔnɔn la, ta ji bùh wɔ nnɔ. <sup>17</sup> Nɛn bo nɛ unil yé Kristo yɔ la, udaan ji yé unifaan nɛ. Nibonkpaann gbɛn'-a! Nibonfɛnn nɛ ji te. <sup>18</sup> Nɛn kɛ ñɛn' Uwien saan nɛ. Wɔn nɛ cère' tinbi nin wɔn taan' buñɔbu kí ñɛ Kristo bo, ki de' tɛ lituonl ki ye tí tɔke binitɔb bi'mɔ rí taan wɔ buñɔbu. <sup>19</sup> Imɔ̀n, Kristo bo Uwien cère' uɲɛndun ya nib nin wɔn taan' buñɔbu. Wa ji tuuke binib ya biil. U de' tɛ lituonl ki ye tí tɔke binitɔb bi'mɔ rí taan wɔ buñɔbu nɛ.

<sup>20</sup> Ti se Kristo ya taal ni ne ki tókeh ne tigber tuu, ne kí ñe tinbi bo Uwien nin u'yul ne lienh ne. Ti gbáanh ne ne, Kristo ya yel bo, taan men nin Uwien buñabu. <sup>21</sup> Kristo ña là tien' biere iba nin ito. Uwien là tun' wó ti ya biere ne, ño kí ñe wón bo, Uwien ní bù te bigbemòndenb.

## 6

<sup>1</sup> Ti te ki sònh Uwien ya tuonl ma nnó bo ne ti sureh ne, ni la cère ni laa' bupaabu bùa u'saan nnó ní juore fεnm. <sup>2</sup> Kimε ní kele' \*Uwien ya gbónku ni ki ye:

«Uyo wà ní kpe nnó  
ne n teke' a'kaare.  
Miñmerm ya daali,  
ne n tore' ηε.»

Tó, ní ji kpaan' uyo sò, miñmerm ya daali sò.

<sup>3</sup> Ta yíe ti teh nà ní tuln uba Uwien ya sεn ni ño uba ní len ti'tuonl bo fεnfεnm ne. <sup>4</sup> Ama tibont ke ni, ti wóngeh ki teh ti yé Uwien ya tonsónb ne, ki ηmòbe kuminku ki gbien' ijend nin liwòbl nin iyenben ni. <sup>5</sup> Ti tuo' tipuor nin lipεkl nin binib kpreh ti'bo ma nin kujiinku ke ya bol, ki père' migùnm, ki wòln' mikònm. <sup>6</sup> Nin nen ke ño ti'tetem wien ne. Ti ηmòbe mibenm Uwien ya sεn bo, ki ηmòbe liyenguol, ki teh tinimònt. \*Mifuoñaanm te nin te, ti yíe binib imònmònt, <sup>7</sup> ki kpaandeh tigber tà yé tigbemònt, Uwien ya tuóm te nin te. Ti taah tigbemònt ne ki teh tijekónwent, ki ñih ki guónh. <sup>8</sup> Biba kpiεkreh te, ne bitòb yuòndeh te. Biba sukreh te, ne bitòb pèkeh te. Bi yih te bitonnendεnb ama ti yé bigbemòndenb ne. <sup>9</sup> Bi teh ten ba ben te ne, ama kí nín ben te kein. Bi likeh te ten ti kpo' ño, ama ti nín fuobe ne. Bi ñih te, ama ba kuuleh te. <sup>10</sup> Bi saah ti'yεnm, ama ti'yεnm tuu ki sange ne. Bi maaleh ki teh ti yé bijiinb ne, ama tinbi ne cèreh bà yebe lenh lifaal. Bi maaleh ki teh ta ηmòbe niba ne, ama ti nín ηmòbe ní'ke.

<sup>11</sup> Ninbi Korént yaabe, ta ηmìere' ne gber tuba, ti yíe ne nin ti'fèl ke ne. <sup>12</sup> Ti ya yεnm pe ni'bo cεen ne, ni ya yεnm ne ña pe ti'bo. <sup>13</sup> Ni'mò ní tien nnó kí jiin te. Ni'mò ní cère ni'yεnm ní li pe ti'bo. Ni te ten n'tiema bumu ma nnó ne cère' n len' ne nnó.

### *La teh men ten bà ña pe Wien bo*

<sup>14</sup> La taa men ni'yul kí kpele bà ña teke' Uwien ki jin', kimε ninbi nin ben ña ní fre kí li te gber. Nà cuube nin nà ña cuube li fre kí taan-ii? Kuwenwenku nin licinñunl li fre kí taan-ii? <sup>15</sup> Kristo nin \*Satan li fre kí kpaan buñabu-uu? Wà teke' Kristo ki jin' nin wà ña teke' wó ki jin' te tigber-ii? <sup>16</sup> Uwien ya duku nin ibule te-εε? Ne tinbi ne yé Uwien wà fuobe ya duku. Wón Uwien ne len' ki ye:

«N li te bi'siik ni ne ki cuonh nin be,  
ki li yé bi'Wien,  
ne be ní li yé n'nib.»

<sup>17</sup> Nen bo ne Yonbdaan liebe' ki len' ki ye:

«Ñε men bi'ni kí jende be.  
La me men jòknt ya bont,  
ño ní teke ne.»

<sup>18</sup> Wón Yonbdaan mituóm ke ya daan tí len' ki ye:

«N li yé ni'Baa,  
ne ní li yé n'bijieb nin n'bisieb.»

## 7

<sup>1</sup> N'jotiebe, Uwien là pùon' tinbi ne tu ya bont ke. Nen bo cère men tí ñen nà ke yé tijòknt ti'gbenent nin ti'fèl ni, kí cère Uwien ní tien te u'yaab kí tí ghen, tí li boh wó.

*Pól ya yεnm sange Kristo yaab bà te Korént ni nnó bo*

<sup>2</sup> Li ñikndeh men ni'yenm ní li pe ti'bo. Ta bii' uba, ka tuln' uba, ka lere' ki jin' uba ya bonn. <sup>3</sup> Na yé n nuunh ní biin ne, ne ki lienh nɔ. Kimɛ n kpie' ki len' ɲɔ ki ye ti fuobe-ee, ti kpo'-oo; ti'yenm pe ni'bo ne. <sup>4</sup> N du ni'bo ki gbien'. Ninbi ne yé n'bo ijenjebn. N'yenm dɔ cɛen ne. Ti'jend ke ni n'yenm sɔnge cɛen ne.

<sup>5</sup> Tɔ, ti tí baa' Maseduɔnn ya tinfenm ni ma, ta laa' fuorl, ama ti jin' ijend ke ya bol ne len. Ikànkàn là jebe' te ni'ke saan ne, ne bujɛwaanbu mɔ coh te. <sup>6</sup> Ama Uwien wà dienh binib bà ya yenm saa' uyenduɔn nɔ cère' Tit baa', ne ti'yenm duɔn'. <sup>7</sup> Na yé Tit ya baam baba ne duɔn' ti'yenm. U tɔke' te ki ye u laa' uyenduɔn wà ni'saan nɔ mɔ duɔn' ti'yenm ne. U tɔke' te ki ye ni'nun mɔn ní tí ní le nni, ne ni ke tinunsiir bo, ki ye ni'nun mɔn ní sere n'ciék bó. Nen ke ne cère' n'yenm tùɔre' ki sɔnge' ki gbien'.

<sup>8</sup> Ni yé n là kele' ne kugbɔnku kùa nɔ saa' ni'yenm mɔnɔn la, ma là gbiende' ku'kelm bo. Ama n là gbiende' kù saa' ni'yenm ma nɔ bo ne. Imɔn, n là gbiende', kimɛ n là laa' kù saa' ni'yenm ama ni'yensaa nɔ ɲa wuɔke'. <sup>9</sup> Ama fenfenɔ n'yenm sɔnge'. Na yé n'yenm sɔnge' kù cère' ni'yenm saa' ma nɔ bo ne. Ama n'yenm sɔnge' ni'yensaa nɔ cère' ni lèbre' mitetem ma nɔ bo ne. Uwien ne cère' ni'yenm saa'. Nen ne wuɔn' ki ye ta tien' ne nà bre. <sup>10</sup> Kimɛ uyensaa wà sɔnge Uwien ya yenm cèreh unil lèbreh mitetem ne ki lenh limiel. U ya yensaa ɲa kpe wù ní li wi nil. Ama uyensaa wà ɲa cèreh nil lèbreh mitetem bàareh nin mikuum ne. <sup>11</sup> Ni'yensaa nɔ sɔnge' Uwien ya yenm ma nɔ, na laa' ní tí fɔre' ma bo-oo! Na laa' ni ji teh ni bi li tien nà tonm-ii! Na laa' ni'yenm ji saah ni'tuonbiere bo, ni gbiendeh-ee! Na laa' ni ji fenge ibiere ya tienm-ii? Na laa' ni'nun mɔn ní tí ní le nni-ii? Na laa' ni'nun mɔn ní sere n'ciék bó-oo? Na laa' ni ji nuunh unil sɔn' ituonbiere la, ní dɛre u'tub-ii? Ni teh nɔ ma nɔ, ní wuɔn' ki ye na te tigber nɔ ni ne.

<sup>12</sup> N là kele' ne kugbɔnku ma nɔ, na yé wà bii nɔ bo, ka yé u bii' wà nɔ mɔ bo ne n kele' kù. Ama n là yíe ní wuɔn ninbi bugben Uwien ya nun bó, kí ye ni'nun mɔn ní li se ti'ciék bó ne. <sup>13</sup> Nen ne duɔn' ti'yenm.

Na yé nen baba ne duɔn' ti'yenm. Ni là cère' Tit ya yenm dɔ, u ɲmɔbe uyensɔnge ma nɔ ne cère' ti'yenm ti liebe' ki sɔnge' ki pukn'. <sup>14</sup> Ni yé ninbi bo n jebn' n'ba u'saan waamu la, na cuo' nni fe. Ti tuu ki tɔkeh ne tigbemɔnt ma nɔ, nen ne wuɔn' ki ye ninbi bo, ti jebn' ti'ba Tit saan ma nɔ ti ɲmɔbe imɔn ne. <sup>15</sup> U lá tiere' ni'ke là boh wɔ ma bo, ki teke' wɔ kucɛnku mɔnmɔnm, ki seln' wɔ ma bo la, u tùɔreh ki yíe ne ki pukndeh ne. <sup>16</sup> N'yenm sɔnge' ki gbien', kimɛ n du ni'bo isen ke ni ne.

## 8

### *Pɔl sureh Kristo ya táan yaab be ní tore bi'tɔb bà te Yerusalem bó nɔ*

<sup>1</sup> Ti'yaabe, ti yíe ní bende Uwien tien' Kristo ya táan yaab bà te Maseduɔnn ya tinfenm ni mimɔnm mà nɔ ne. <sup>2</sup> Ijend tu' be na ɲmɔbe fuul ama bi juore' ki te uyensɔngciɛn ni ne. Nin bi'jiint yebe ma ke nɔ, bi de' mipum nin tinimɔnt ní yebe. <sup>3</sup> Bi de' bi'tuɔm kpe ma bo ne. N li fre kí kun imɔn kí ye bi de' ki gèbre' bi'tuɔm ya bien mɔnɔn. Bi cèkre' bi'yenm ne ki de', <sup>4</sup> ki tuu ki ce ki teh tí cère bi'mɔ ya pum ní li te mipum mà li tore Uwien ya nib bà te Yerusalem bó nɔ ni. <sup>5</sup> Bi tien' ní tí gèbre' ti là daan be ma bo mɔnɔn. Bi kpie' ki taa' bi'ba ki de' Yonbdaan ne, ki yaan ki taa' bi'ba ki de' ti'mɔ Uwien yíe ma bo. <sup>6</sup> Nen bo ne ti gbáan' Tit wɔ ní tükre u là cin' mipum ya tuonl là ni'saan nɔ kí tí gben lè. <sup>7</sup> Niba ɲa pɔre' ne isen ke ni, kimɛ ni ɲmɔbe mitekjim, ki ben ki lienh, ki ɲmɔbe mibenm, ki teh ni bi li tien nà ke ya bol tonm, ki ɲmɔbe miyíem mà ti là wɔkn' ne mɛ nɔ. Mipum ya sen ni mɔ, wuɔn men kí ye ni ɲmɔbe tinimɔnt.

<sup>8</sup> N lienh ma nɔ, na yé n wɔbndeh ne ne, ama n yíe ní bende Uwien ya nitɔb ya nun mɔn be ní de mipum ma bo ne. N tien' nɔ ɲɔ ní liike ni'mɔ ɲmɔbe miyíem imɔnmɔn bii na ɲmɔbe ne. <sup>9</sup> Kimɛ ni ben ti'Yonbdaan \*Yesu Kristo ya nimɔnt kpe ma bo. U là yé ufáadaan ne. Ninbi bo ne u tien' u'ba ujiin, ɲɔ u'jiint nɔ ní cère ní tien bifáadenb. <sup>10</sup> N ɲmɔbe iyenmaale yà sɔ tigber tuu bo. Iyenmaale nɔ yé ni ya kpele ne. Yin si: na yé ni là kpie' ki



de' mipum baba nɛ, ninbi nɛ là kpiɛ' ki caan' mipum nnɔ ya gɛr libinl là gèbre' nɔ. <sup>11</sup> Tɔ, fɛnfɛnnɔ, ñikn mɛn kí sɔn lituonl nnɔ kí tí gben lè ni'tuɔm kpɛ ma bo. Ni là caan' uyo wà ki ye ni li sɔn lè nnɔ, ni là cèkre' ni'yɛnm nɛ. Nɛn bo, li ηmɔbe mɛn i ya yɛnmaalbaabe kí sɔn lè kí tí gben. <sup>12</sup> Kimɛ unil ηmɔbe iyɛnmaalmɔnmɔn wɔ rí pu la, Uwien li teke u'pum nnɔ u'yɛnmaalmɔnmɔn nnɔ bo nɛ, wa rí tɔnge mǐ yebe bii ma yebe. <sup>13</sup> Na yé ní pipre ni'bonn kɛ kí de bitɔb ηɔ kí li cɛknh nɛ. Ní mɔn ni'kɛ yaam rí li kpɛ nɛ. <sup>14</sup> Kimɛ fɛnfɛnnɔ ni ηmɔbe ki gbien' ma nnɔ, ní mɔn ní tore bà ηa ηmɔbe nɛ. Ni'mɔ lá luɔ' la, bi'mɔ ηmɔbe ki gbien' la, bɛ rí tore nɛ. Nnɔ nɛ ni'kɛ yaam li kpɛ. <sup>15</sup> Tɛn ní kele' ma \*Uwien ya gbɔnku ni ki ye:  
«Wà là laa' ní yebe  
ηa là jin' ki gɛle'.  
Wà mɔ là laa' waamu  
mɔ ηa là jin' ní pɔre' wɔ.»

### *Bi sɔn' Tit nin u'tɔntɔknlieb Korɛnt ya du bó*

<sup>16</sup> Tɔ, tí faare mɛn Uwien nin u cère' Tit mɔ ya nun mɔn ni'gɛr bo ma nnɔ bo. <sup>17</sup> Ti tɔke' Tit wɔ rí jo ni'saan nɛ u tuo'. Na yé u tuo' baba nɛ, u'nun là mɔn wɔ rí jo ni'saan nɛ, nɛ u cèkre' u'yɛnm wɔ rí jo. <sup>18</sup> Ti li cère ti'ninjɛ uba mɔ rí tɔke nin wɔ kí jo ni'saan. Kristo ya táan yaab kɛ pèkeh ti'ninjɛ nnɔ nɛ kí ñɛ u sɔn' lituonl là tigbɛmɔnmɔnt ya tɔkm bo nnɔ. <sup>19</sup> Na yé nɛn baba bo, Kristo ya táan yaab mɔnɔn gènde' wɔn nɛ wɔ rí tɔke nin tɛ tí taa bi taan' mipum mà nnɔ kí jon Yerusalem. Ti li sɔn lituonl bugben kí kpiɛke Yonbdaan nɛ, kí wuɔn kí ye ti ηmɔbe miyíem tí tore binib. <sup>20</sup> Bi taan' mipum mà ki ηukn' tɛ nnɔ yé ilikcɛncien nɛ. Ta yíe uba rí lá suke tɛ ilike nnɔ ya sɛn ni. <sup>21</sup> Kimɛ na yé ti nuunh tí li teh nà mɔn Yonbdaan ya nun bó baba nɛ, ti nuunh tí li teh nà mɔn binib ya nun bó mɔ nɛ. <sup>22</sup> Ti sɔn' ti'ninjɛ utɔ mɔ wɔ rí tɔke nin bà joh ni'saan nnɔ. Isɛn kɛ ni nin itùon kɛ ni, ti laa' u'nun mɔn binib ya torm bo. Fɛnfɛnnɔ u du ni'bo ki gbien' ma nnɔ nɛ u'nun ji tùɔre' ki mɔn wɔ rí jo ni'saan. <sup>23</sup> Tit wɔn yé n'tɔntɔknlie nɛ, ki yé n'tonsɔntɔ ni'saan. Tí'ninjɛb bɛn yé Kristo ya táan ya tondb nɛ. Bi sɔnh bɛ rí kpiɛke Kristo nɛ. <sup>24</sup> Nɛn bo, wuɔn bɛ mɛn kí ye ni yíe bɛ, ηɔ Kristo ya táan yaab kɛ rí bɛndɛ kí ye ti jɛbnh ni'bo usɛn wà bo nnɔ yé imɔn nɛ.

## 9

### *Uwien yíe unil wà punh nin iyɛnmaalmɔnmɔn nɛ*

<sup>1</sup> Mitorm mà ni li tore Uwien ya nib nnɔ wɔn, na ji ciɛke rí kele nɛ gbɔnku. <sup>2</sup> Kimɛ n bɛn ni'nun mɔn binib ya torm bo. N là jɛbn' n'ba ni'bo Maseduɔnn ya tinfɛnm yaab saan u ya sɛn ni nɛ, ki tɔke' bɛ ki ye Kristo yaab bà te Akayi ya tinfɛnm ni nnɔ là bonde' ηɔ bɛ rí de mipum haali libinl là gèbre' nɔ. Ni'nun là mɔn binib ya torm bo ma nnɔ nɛ saake' bà yebe ya gbɛnɛnt. <sup>3</sup> Nɛn bo nɛ n sɔn' ti'ninjɛb biɛ ni'saan ηɔ n jɛbn' ni'bo usɛn wà bo nnɔ la juore' fɛnm. Li yé mɛn binib bà mɔnbe ki bonde' ki gben' tɛn n là len' ma bo. <sup>4</sup> Na tien' nnɔ, ki cère' Maseduɔnn ya tinfɛnm yaab tɔke nin nni ki baa' ni'saan ki laa' na bonde' ki gben' la, ti du ni'bo usɛn wà bo nnɔ li yé ti'bo ifɛ nɛ, ma yíe rí ye i li yé ni'yi nɛ. <sup>5</sup> Nɛn bo nɛ n maale' ki ye ní kpɛ rí cèbe ti'ninjɛb bɛ rí liere tɛ kí baa' ni'saan kí tore nɛ, ní taan mipum mà ninbi nin ni'yul là pùon' ki ye ni li de mè nin tinimɔnt nnɔ. Nnɔ nɛ bi li bɛndɛ kí ye ni cèkre' ni'yɛnm nɛ ki de', na yé fiem.

<sup>6</sup> Bɛndɛ mɛn kí ye: wà bule' waamu la, u lá li ce waamu nɛ. Wà bule' ní yebe la, u lá li ce ní yebe nɛ. <sup>7</sup> Wà kɛ rí de u cèkre' u'yɛnm wɔ rí de ma bo. U la de nin uyɛnsaa, ki la cère nè rí li yé u'bo liwɔbl mɔ. Kimɛ Uwien yíe wà dienh nin lifɛsɔngl nɛ. <sup>8</sup> Nɛ u ηmɔbe mituɔm wɔ rí de nɛ mimɔnm kɛ ya bol kí gbien, ηɔ ní tien nà kɛ ciɛke nɛ uyo kɛ isɛn kɛ ni, kí li biɛ ki ηmɔbe ki gbien', kí fre kí tien tinimɔnt kɛ ya bol. <sup>9</sup> Tɛn ní kele' ma \*Uwien ya gbɔnku ni ki ye:

«U punh bijiinb nin tinimɔnt nɛ,  
nɛ u'nimɔnt ηa ηmɔbe gbenm».

<sup>10</sup>Uwien wà dienh ukpaal tibonbuor, ki dienh wə tijier nnə, wən nε li de ni'mə tibonbuor kí cère tù ní pəre, kí cère ni'niməntuon ní yεbre kí gbien. <sup>11</sup>Uwien li cère ní li ηməbe ki gbien' isen kε ni, kí li teh tinimənt kε ya bol. Nnə nε ti taah ni'pum ki tí dienh binib bà nnə li faare Uwien. <sup>12</sup>Kimε ni sənə mitorm ya tuonl là nnə ηa cərəh Uwien ya nib lənh nà pəre' bε baba, li cərəh binib faareh Uwien mə ki yεbe nε. <sup>13</sup>Ni'tuonl nnə wuən' ki ye ni boh Kristo ya gbəmənəmənt tà ni təkəh tù binib kε ya nun bó nnə, ki taakeh ni ηməbe tibont tà nin tinimənt ki toreh bən nin binitəb kε. Nən bo nε bi bende' ki ye ni sənə lituonl là nnə ηməbe kpεle nε ki kpiəkreh Uwien. <sup>14</sup>Bi kəareh ki dienh nε, ki wəngəh ki teh bi yíe nε ki gbien' kí nε Uwien juoke' nε ki gbien' ma nnə bo. <sup>15</sup>Tí faare mən Uwien u'paabu búa ηa ηməbe bù kpε nin bà nnə bo.

## 10

### *Pəl kənh u'ba bo*

<sup>1</sup>Min Pəl, n ye ní niire nε nε: ni'ni biba lienh ki teh n te ni'saan uyo wà la, ma kaabe, nε ma lá nεke nε la, n ji yé ukaajε-a! Kristo ya yenguol nin u'nimənt bo nε n təkəh nε ki teh: <sup>2</sup>N faare' nε nε, la cère mən n lá baa ni'saan la, ní wuən nε kí ye n yé ukaajε. Ama binib bà maaleh ki teh ti ηməbe minisaaltetem nε ki sənə nnə, n li wuən bən kí ye n yé ukaajε. <sup>3</sup>Imən, ti yé binib nε ama ta məh nin nisaaltuəm. <sup>4</sup>Kimε ti ηməbe tijəkənwənt tà nnə ηa nən' nisaal saan, tù nən' Uwien saan nε ki ηməbe mituəm. Ti taah tu ya tuəm nε ki gbendeh nà kε ηməbe mituəm ya gber, ki cərəh bitonnendənb ya yənmaale juonh fənm, <sup>5</sup>ki gbendeh nà kε yé tigbengt ya bonn ki piendeh binib bi la bende Uwien nnə ya gber, ki lèbreh unil kε ya yənmaale wə ní li boh Kristo. <sup>6</sup>Ni tí laa' uyo wà ni boh Kristo ki tí gben' la, ti li dεre wà kε ηa boh wə ya tub.

<sup>7</sup>Li likeh mən tibont tu'donbó. Unil du u'ba bo ki ye u yé Kristo yə la, wə ní taa kí ble u'yul ni kí ye u yé Kristo yə la, ti'mə yé Kristo yaab nε. <sup>8</sup>Yonbdaan de' tε ticiənt tí cère ni'cəkl ní kpére nε, wa ye tí bere lè. Ní yé n pəkəh n'ba ticiənt nnə bo ní tí kənde' waamu mənən la, na coh nni fε. <sup>9</sup>Ma yíe nε ní li naan tən n nuunh ní fənde nε nε kí nε tigbənt tà n kieh nε tù nnə bo. <sup>10</sup>Kimε biba lienh ki teh n kieh mimaam mə tigbənt ni nnə faa nε ki cəkreh binib, ama n ji lá te bi'ni la, n yé ujiin nε, ki lienh gbefənm. <sup>11</sup>Wà kε lienh nnə ní li bən kí ye ta nεke ni'saan ki kele' tigbənt ni ki ye ma la, ti tí lá baa' mə la, ti li tien nnə nε.

<sup>12</sup>Ta tuo' tí taa ti'ba kí nenge binib bà wəngəh bi'ba nnə, ki niireh nin tí gəkn nin bε. Ba ηməbe yənm. Bi taah bi'ba nε ki teh kunənnəku, ki liebe' ki taah bi'ba ki kpàandeh kù. <sup>13</sup>Tinbi bən wən, ta ní li jəbnh ti'ba kí tí kənde. Ti li jəbn ti'ba ki tí kpaan' Uwien sien' tε tí sən kí kpaan nà saan nnə nε. Wən nε cère' ti baa' ni'mə saan. <sup>14</sup>Ti là baa' ni'saan ma nnə ta gəbre' ti'biən. Ti là kpaan' Uwien sien' tε nà saan nε. Tinbi nε cinbe ki kpiε' ki baa' ni'saan ki təkə' nε Kristo ya gbəmənəmənt. <sup>15</sup>Ta ní gəbre ti'tuonl ya biən kí tí ní li jəbnh ti'ba bitəb yaal bo. Ama ti daan ki ye ni li kpére mitekjim ni. Nnə nε ti li sən ituon ni'ni yé ní li yεbe. Ama ta ní gəbre Uwien sien' ki ye tí sən kí kpaan nà saan. <sup>16</sup>Ti li joh idu yà tə ni'yu bo ni, ki təkəh binib tigbəmənəmənt, ta ní jo bitəb sən' nà saan, kí li jəbnh ti'ba bi'tuon bo. <sup>17</sup>Ní kele' \*Uwien ya gbənkū ni ki ye: «Unil ye wə ní wuən u'ba la, wə ní wuən u'ba Yonbdaan bo.» <sup>18</sup>Na yé Yonbdaan ya yənm sənge unil wà pəkəh u'ba bo nε, wən Yonbdaan pəkəh wà la, u'yənm sənge wən bo nε.

## 11

### *Pəl nin bà taah bi'ba ki teh Yesu ya tondb nnə ya gber*

<sup>1</sup>Tə, ni bi tuo' la, ní cəbe nni ní len nin nε mijərlənm waamu. Nikn mən kí tuo. <sup>2</sup>N yíe nε cəen nε, ka sè ni'bo tən Uwien ηa sè ni'bo ma. Kimε ni te tən ujefaan nε ní taa nε kí pun uje uba kpein, wən si Kristo. Wə ní teke nε tən ujefaan wà ηa bən je fiebu. <sup>3</sup>Ama n fenge nibonn niba nε. Nən si: uwε là taa' ucekn ki lere' Efa ma nnə, bi la lá taa gbefənfənm uba kí lèbre ni'yənməale kí saa ni'tetem mə cuube ni la ji ní li pε Kristo bo ni'donbó nε. <sup>4</sup>Bε

tien' unitɔ baa' ki lá tɔke' nɛ \*Yesu uba ya gber wa yé ti lá tɔke' nɛ wà ya gber bii u tí wuɔn' nɛ nà ɲa tɛ nin ni là laa' \*Mifuoñaanm ma nnɔ bii u tí tɔke' nɛ tigbɛmɔnmɔnt tà ɲa tɛ nin ti là tɔke' nɛ tà nnɔ la, ni tuonh-i? <sup>5</sup> Ma laa' bà yih bi'ba \*Yesu ya tondmɔnb nnɔ cɛn' nni nà. <sup>6</sup> Nba la, milenm ni nɛ ma freh ki lienh mɔnmɔnm ama mibɛnm mɛn ni, na te nnɔ. Ti wuɔn' nɛ isɛn kɛ ni nin ti teh nà kɛ ni, ki ye ti bɛn.

<sup>7</sup> N là jiiin' n'ba tingi, ki kprien' nɛ, ki tɔke' nɛ Uwien ya gbɛmɔnmɔnt ka teke' ni'saan bonn ma nnɔ, n bii' nɛ-ɛɛ? <sup>8</sup> N là pende' Kristo ya táantɔ yaab nɛ ki fre' ki sɔn' ki tore' nɛ, kimɛ bɛn nɛ là pɛh nni kupaaku. <sup>9</sup> Uyo wà n là te ni'saan nnɔ, n là ciɛke tibont ama ma là miɛh uba niba. Kimɛ ti'ninjieb bà ñɛn' ní Maseduɔnn ya tinɛnm bó ní nnɔ de' nni nà kɛ là ciɛke nni. Ma là yíe ní li yé ni'ni uba bo tukl isɛn kɛ ni, ka lí li tien uba bo tukl mɔ. <sup>10</sup> Kí ñɛ Kristo ya gbɛmɔnt tà n ɲmɔbe tù nnɔ bo nil ɲa te Akayi ya tinɛnm ni kí pien nni n la jɛbn n'ba ni ya bonn bo. <sup>11</sup> Bɛ bo nɛ n len' nnɔ? Ma yíe nɛ nɛ-ɛɛ? Uwien wɔn bɛn ki ye n yíe nɛ.

<sup>12</sup> N teh nà nɔ, n lí li teh nɛn nɛ, ɲɔ binib bà nuunh bi li dule nà bo kí wuɔn bi'ba kí ye tinbi nin bɛn kpɛ nnɔ, la lɛ bi li dule nà bo. <sup>13</sup> Bi ya nib nɛndeh nɛ ki teh bi yé Kristo ya tondb. Bi yé bitonsɔnb bà lɛreh binib nɛ, ki bɔndeh bi'nun bó ki teh bi yé Kristo ya tondb. <sup>14</sup> Bi teh nà nnɔ ɲa yé bonn nà coh yɔkm, kimɛ \*Satan mɔnɔn bɔndeh binib ya nun bó nɛ ki teh u yé Uwien ya tond wà yé kuwenwenku. <sup>15</sup> Nɛ u'tonsɔnb mɔ bɔndeh binib ya nun bó ki teh bi teh nà cuube la, ni'mɔ ɲa yé bonn nà coh yɔkm. Bi tí li fɔre kí lɛ utudɛre wà bi'tuon kpɛ wù nɛ.

### *Pɔl jènde' Yesu Kristo bo*

<sup>16</sup> N tí ye ní len nɛ kí lere nɛ. Ni la maaleh ki teh n yé ujɔr nɛ. Bii ni tí maale' ki ye n yé ujɔr nɛ la, ní tien sukla n'bo ɲɔ n'mɔ ní fre kí jɛbn n'ba waamu. <sup>17</sup> N lienh nà nɔ ɲa yé Yonbdaan yíe ní len ma bo. N lienh tɛn ujɔr nɛ, kimɛ n ɲmɔbe n li ñi nà bo kí jɛbn n'ba. <sup>18</sup> Binib bà yɛbe jɛbnh bi'ba minisaaltetem bo ma nnɔ, n'mɔ li fre kí jɛbn n'ba-a! <sup>19</sup> Ni yih ni'ba biyenɔfɔdɛnb nɛ. Bɛ tien' ni toh ki cengeh ijɔr ya gber ki tuonh i'ñuɔn bó? <sup>20</sup> Kimɛ ni tuonh bi teh nɛ iyonbe, ki jinh ki pendeh nɛ, ki fienh ni ɲmɔbe nà kɛ, ki yindeh nɛ, ki kpɔbreh nɛ. <sup>21</sup> N len' nà nɔ, ní yé ifɛ nɛ. Ti gbɛle' ti'ba cɛɛn nɛ ki te nnɔ.

Unil mɛnge' lifɛl ki jɛbn' u'ba nibonn bo la, n'mɔ li mɛnge lifɛl kí jɛbn n'ba nɛ, haali n lí lienh mijɔrlenm mɔnɔn la. <sup>22</sup> Binib bugbɛn yé Ebrembe nɛ-ɛɛ? N'mɔ yé wɔn nɛ. Bi yé Israyɛl yaab nɛ-ɛɛ? N'mɔ yé wɔn nɛ. Bi yé \*Abraham ya yaabii nɛ-ɛɛ? N'mɔ yé len nɛ. <sup>23</sup> N ji ye ní tɔɔre kí len mijɔrm sɔ. Bi yé Kristo ya tonsɔnb nɛ-ɛɛ? N yé Kristo ya tonsɔnl ki cɛn' bɛ, ki sɔn' ki cɛn' bɛ, bi pekɔn' nni ki cɛn' bɛ, ki ñi' nni ki cɛn' bɛ. N tuu ki lenh kinunbɔnk kà li fre kí baa nin nni mikuum. <sup>24</sup> Bolm miɲun, \*Sufmbe ñi' nni inalɛbe ñinm pita nin miwɛ. <sup>25</sup> Bolm mita, Erom yaab mɔ ñi' nni ilɛnbɛn. Miba, bi yèke' nni itɛn. Bolm mita, buñɛrbu lin' nin nni. Miba mɔ n tien' miñunciɛnm bo liwentunɲmɛnl nin kuñɔnɲmɛnku. <sup>26</sup> Uyo wà kɛ n joh isɛn la, n lenh kinunbɔnk kɛ ya bol nɛ. N laa' kinunbɔnk ikpen bo, ki laa' kinunbɔnk idukond saan, ki laa' kinunbɔnk n'yaab \*Sufmbe saan, ki laa' kinunbɔnk bà ɲa yé \*Sufmbe saan, ki laa' kinunbɔnk iducɛnciɛn ni, ki laa' kinunbɔnk nib ɲa kɔ nà saan, ki laa' kinunbɔnk miñunciɛnm bo, ki laa' kinunbɔnk bà nɛndeh ki teh bi yé Kristo yaab nnɔ saan. <sup>27</sup> N'gbɛnɛnt ben' ituon ni, kujiinku kɔn' nni. N sɔbe ki pèreh migùɔnm. Mikònm nin uñuñun kɛ cuo' nni, n gɔh ki tɛkreh ka jinh. N ñuh tiwɔr ka ɲmɔbe niba ní ɲɛkn n'ba bo. <sup>28</sup> Ma kaan' ki gben' nà kɛ tu' nni. Ama n'nun mɔn nà bo si: Kristo ya táan kɛ yaab ya gber nɛ ciɛke nni daan kɛ daan. <sup>29</sup> Nɲmɛ yé ujiiin ɲɔ ma tien' n'ba tɛn ujiiin-i? Nɲmɛ tùre' Uwien ya sɛn ɲɔ na wire' nni ki gbien'-i?

<sup>30</sup> Ní kpɛ ní jɛbn n'ba la, n li jɛbn n'ba n'jiint bo nɛ. <sup>31</sup> Yonbdaan \*Yesu ya Baa Uwien wà si kupɛnpɛku uyo wà ɲa ɲmɔbe gbenm nnɔ bɛn ki ye ma nɛndeh. <sup>32</sup> N là te Damas ya du ni ubɛr Aletas ya yo nɛ. Udu nnɔ ya ciɛn là nuunh wɔ ní cuo nni, nɛ ki cèrɛ' u'sojambɛ se

udu nnɔ ya guon ya nañɔbu saan ki gu. <sup>33</sup> Ama bi ñɛn' nni likɛndɛncɛnciɛnl ni nɛ udu nnɔ ya guonl là guɔn' wù nnɔ ya dubonl liba, nɛ n ɲmɛrɛ' u'nuɔ ni.

## 12

### *Uwien kpiire' tibont tà ki wuɔn' Pɔl*

<sup>1</sup> Nì kpɛ rí li jɛbnh n'ba-aa? Na ɲmɔbe kpɛle. Ama n li len tibont tà kɛ Yonbdaan kpiire' tù ki wuɔn' nni nnɔ bo. <sup>2</sup> N bɛn uje uba u yé Kristo ya.\* Ibin piik nin inan sɔ, Uwien taa' wɔ ki don' paaki ya paaki ya paaki bó. U don' nin u'gbɛnɛnt nɛ-ɛɛ! Ma bɛn. Wa tí don' nin u'gbɛnɛnt-ii! Ma bɛn. Uwien nɛ bɛn. <sup>3</sup> Udaan don' nin u'gbɛnɛnt bii wa don' nin u'gbɛnɛnt-ii! Ma bɛn. Uwien nɛ bɛn. Ama n bɛn <sup>4</sup> ki ye Uwien taa' wɔ ki don' paaki ki tí baa' wɔn Uwien den. Nɛn saan nɛ u cii' tigbɛr tà nisaal ɲa rí lɛ u li taa iñɔbon yà kí len kí tɛkn tù, ka ɲmɔbe sɛn wɔ rí len tù mɔ. <sup>5</sup> U ya daan bo n li jɛbn n'ba. Ama min bugbɛn bo wɔn n li jɛbn n'ba n'jiint bo nɛ. <sup>6</sup> N bi yíe rí jɛbn n'ba la, n bi li fre kí jɛbn, nɛ na bi yé n'bo jòrm, kímɛ n bi li lienh tigbɛmɔnt baba nɛ. Ama ma jɛbnh n'ba, kímɛ ma yíe uba rí li ɲmɔbe n'bo iyɛnmaale yà cɛn' u lenh n teh nà nin u ciih n lienh nà. <sup>7</sup> Kímɛ Uwien kpiire' tibonmɔnmɔnt ki wuɔn' nni. Uwien ɲa yíe rí li jɛbnh n'ba tibont bugbɛn bo ma nnɔ, nɛ ki cère' \*Satan sɔn' nibonn niba, nì lá kɔn' n'gbɛnɛnt ni, ki cɔkreh nni tɛn ukonkon nè rí pien nni n la li jɛbnh n'ba. <sup>8</sup> N gbáan' Yonbdaan bol mita nɛ ki ye wɔ rí ñɛn nè n'gbɛnɛnt ni, <sup>9</sup> ama u tɔke' nni ki ye: «N'juokm li dɛkre ɲɛ. Kímɛ a yé ujin uyo wà la, u ya yo nɛ n wɔngɛh n'tuɔm.» Nɛn bo, n li tuo kí li jɛbnh n'ba n'jiin bo. Nnɔ nɛ Kristo ya tuɔm li te nni. <sup>10</sup> Nɛn bo, n lá te tijiint ni bii tisukr ni bii micɛɛkm ni bii liwɔbl ni bii iyɛnbɛn ni Kristo bo la, n'yɛnm sɔngɛ nɛ. Kímɛ uyo wà mituɔm lá pɔrɛ' nni la, u ya yo nɛ n tùɔreh ki lenh mituɔm.

### *Pɔl jieh Kristo yaab bà te Korɛnt ni nnɔ*

<sup>11</sup> Nì laa'-aa! Ninbi nɛ cère' n lienh mijòrm. Ninbi nɛ bi li wuɔn binib n yé udaan wà. Nin ma yé niba ma kɛ nnɔ, bà yih bi'ba \*Yesu ya tondmɔnb nnɔ ɲa cɛn' nni niba. <sup>12</sup> N là te ni'saan ma nnɔ n là ɲmɔbe kuminku ki gbien', ki teh miyɔkm ya bont kɛ ya bol. Nɛn nɛ wɔngɛh ki teh n yé \*Yesu ya tond. <sup>13</sup> Kristo ya táantɔ yaab laa' bà ki cɛn' ninbi? Ma là yé ni'bo tukl ma nnɔ nɛ tien' n'biil-ii? Nì yé nɛn bo la, fère nni mɛn. <sup>14</sup> N bonde' ki gben' rí baa ni'saan bolmta sɔ. N baa' la, ma tí lli li yé ni'bo tukl, kímɛ n bàareh ninbi bo nɛ, ma bàareh ni'faal bo. Na yé mubumu nɛ nuunh lifaal ki blinh mu'baambe, bibaambe nɛ nuunh lifaal ki blinh bi'bumu. <sup>15</sup> Min li tuo kí taa n ɲmɔbe nà kɛ, kí sɔn lituonl kí tore nɛ, ki li tuo kí taa min bugbɛn mɔnɔn kí cèbe nɛ. N yíe nɛ ki gbien' la, ninbi yíe nni ma bo nnɔ li kùore nɛ-ɛɛ?

<sup>16</sup> Imɔn, ma là yé ni'bo tukl. Ama biba maaleh ki teh n là ɲmɔbe ununwien nɛ, ki taah ucekn ki lɛreh ki jinh nɛ. <sup>17</sup> Liike mɛn binib bà kɛ n sɔn' bɛ ni'saan nnɔ, n ñi' uba bo ki lɛrɛ' ki jin' nɛ-ɛɛ? <sup>18</sup> N là sɔn' Tit ni'saan ma ki cère' ti'ninjɛ uba tɔke nin wɔ nnɔ, u la lɛrɛ' ki jin' nɛ-ɛɛ? Min nin wɔn kɛ ɲa là ɲmɔbe iyɛnmaale iba nɛ ki kpe usɛn uba-aa?

<sup>19</sup> Nì ñɛn' uyo ki maaleh ki teh ti lienh ki nuunh tí lɛ imɔn nɛ ni'saan-a! Na te nnɔ. Ti yé Kristo yaab nɛ, ki te Uwien ya nun bó ki lienh. Ti'jɔtiebɛ, ti teh nɛn kɛ ki nuunh ni'tekjim nɛ rí kpɛrɛ Uwien ya sɛn ni. <sup>20</sup> Kímɛ n fɛngɛ n la lá baa' ni'saan kí lɛ ni te ma bi yíe ní li te ma bo, ni'mɔ rí lɛ n te na bi yíe n li te ma bo nɛ. N fɛngɛ n la lá baa' kí lɛ ifinfinde nin iponponbe nin ubenpiebe nin kunaniɛrku nin itɛnfuon nin kuñɔkpɔbku nin tigbengt nin fɛnfɛnm nɛ te ni'ni nɛ. <sup>21</sup> N liɛbe' ki fɛngɛ n la lá baa' ni'saan Uwien cère' rí ji ifɛ ni'bo, kí muɔ binib bà yɛbe, ki tien' ibiɛrɛ ka lèbre' bi'tetem, ki juore' ki teh tijɔknt ya bont, ki pɛ lisɔnsɔndl bo, ki teh fɛnfɛnm kɛ ya bol nnɔ bo nɛ.

\* **12:2** Pɔl ye uje uba ma nnɔ, u niireh wɔn bugbɛn nɛ.

## 13

### *Igbierfərke nin micèbm*

<sup>1</sup> N ji we ní ni'saan bolmta sɔ. Ní kele' \*Uwien ya gbɔnku ni ki ye: «Bi ye be ní gben tigber tà ke la, bi li cenge bimɔnkunb bile bii bita bó ne kí yaan kí gben tù.» <sup>2</sup> N là baa' ni'saan miliem ma nnɔ n là tɔke' binib bà ke là tien' ibiere nnɔ nin bitɔb ke ɲɔ. Fɛnfennɔ ma te ni'saan, n tí juɔ' ki tɔkeh ben ne ki teh n lá baa' la, ma ní daan bi'ni uba kpein mɔnɔn. <sup>3</sup> Tɔ, ni nuunh kudieku kùà wɔngeh ki teh Kristo ne cèreh n lienh-a! Wɔn ɲa yé jiin ni'bo, u yé utodaan ne ni'ni. <sup>4</sup> Imɔn, u là tien' u'ba ujiin ne bi kpe' wɔ udɔpɔnpɔn bo, ama fɛnfennɔ Uwien ya tuɔm bo ne u fuobe. Tinbi bà yé u'yaab nnɔ mɔ yé bijiinb ne. Ama ninbi bo ne ti'mɔ li fuobe nin wɔ kí ñe Uwien ya tuɔm bo.

<sup>5</sup> Liike mɛn ni'tetem te ma bo, kí fiin ni'ba kí liike ni'fuobm kpe mitekjim ya sen-ii? Na ben ki ye \*Yesu Kristo te ni'ni-ii? Nba la, ní fiin ni'ba kí le na te nnɔ ɲa ní la. <sup>6</sup> N ɲmɔbe lidɛndɛnl ki ye ni fiin' la, ni li bende kí ye ti ya tuonl ɲa juore' fɛnm. <sup>7</sup> Ti mieh Uwien wɔ ní cère ni la li teh nà bre ne. Na yé ti nuunh tí wuɔn ne kí ye ti ɲmɔbe imɔn ne; ti nuunh ní li teh nà mɔn ne. Ní ye nè ní wuɔn kí ye ta ɲmɔbe mɔn mɔnɔn la, na bre. <sup>8</sup> Kimɛ ta ɲmɔbe tuɔm tí pien tigbemɔnt ama ti ɲmɔbe mituɔm tí sɔn ɲɔ tù ní li joh inun bó ne. <sup>9</sup> Ninbi faa ɲɔ tinbi yé bijiinb la, ti'yɛnm sɔnge ne. Ti mieh nà ti'kaare ni si: ní tien binicekrkaab mitekjim ni ne. <sup>10</sup> Nɛn ne cère' ma laan baa' ni'saan ma nnɔ n kele' kugbɔnku kuu ki de' ne. Ma yíe n lá baa' la, ní le ní kpe ní wuɔn ne kí ye n bre kí ñe Yonbdaan de' nni ticiɛnt tà nnɔ bo. U de' nni tù ki ye ní cère ni'cɛkl ní kpère ne, wa ye ní bere lè.

<sup>11</sup> Tɔ, n'yaabe, li te mɛn uyɛnsɔnge ni, kí li nuunh ní li yé binicekrkaab mitekjim ni. Li duɔndeh mɛn tɔb ya yɛnm, kí li te iyɛnmaale, kí li ɲmɛ nin tɔb ɲɔ Uwien miyíem nin uyɛnduɔn ya daan ní li te nin ne. <sup>12</sup> Li fuondeh mɛn tɔb mɔnmɔnm. Uwien ya nib ke fuondeh ne. <sup>13</sup> Yonbdaan \*Yesu Kristo ya juokm nin Uwien ya yíem nin Mifuoñaanm ya taanm ní li te nin ni'ke.

## Kugbɔnku kùà Pɔl kɛle' ki de'

### Galasi yaab nnɔ

## Nà wɔngeh kugbɔnku kuu te ma bo

Pɔl kɛle' kugbɔnku kuu ki de' Kristo ya tɔan yà te Galasi ya tinfenm ni nnɔ nɛ. Udu nnɔ ya nib bà yé Sufmbɛ nin bà ɲa yé Sufmbɛ kɛ teke' Kristo ki jin' nɛ.

Sufmbɛ biba wɔkn' Kristo ya tɔan nnɔ ni, ki caan' ki ye bà ɲa yé Sufmbɛ ki teke' Kristo ki jin' nnɔ ní paan yiko bo, kí li teh Sufmbɛ teh ma bo.

Nɛn bo nɛ Pɔl kɛle' ki ye na yé yiko bo nɛ Uwien bùh binib bigbɛmɔ̀ndɛnb, u bùh bɛ bigbɛmɔ̀ndɛnb mitekjim bo nɛ.

Kí cin liyul 1 kí tí baa iyul 2, Pɔl lienh wɔn bugbɛn ya gbɛr nɛ. U ye u yé Suf nɛ, ki yé Yesu Kristo ya tond bà ɲa yé Sufmbɛ saan (2:11-21).

Kí cin iyul 3 kí tí baa iyul 4, Pɔl ñiikɛh Kujɔ̀tiɛkpaaku ya gbɔnku bo nɛ ki wɔngeh ki teh Kristo nɛ sɔn' Uwien ya puonl ya tuonl. U liɛbe' ki ye binib yé Kristo yaab la, bɛn nin Uwien taan' buñɔbu nɛ (3:28). Kí ye Kristo yaab ɲa ji ɲmɔbe wuɔ yé Suf, wuɔ ɲa yé Suf, wuɔ yé uyɔnb, wuɔ ɲa yé yɔnb, wuɔ yé ujɛ, wuɔ yé upii.

Kí cin iyul 5 kí tí baa iyul 6, Pɔl ye Kristo yaab ɲa ji yé yonbe.

### *Ifuonde*

<sup>1</sup> Min Pɔl, n yé \*Yesu Kristo ya tond nɛ. Na yé nib nɛ gɛ̀nde' nni, ka yé nisaal nɛ cèrɛ' n yé u'tond. Tí'Baa Uwien wà mɛkre' wɔ bitɛnkpiib ni nin \*Yesu Kristo bugbɛn nɛ cèrɛ' n yé u'tond. <sup>2</sup> Min nɛ kieh kugbɔnku kuu ní de Kristo ya tɔan yà te Galasi ya tinfenm ni nnɔ. Min nin n'yaab bà kɛ te n'saan nnɔ fuondeh nɛ.

<sup>3</sup> Tí'Baa Uwien nin Yonbdaan \*Yesu Kristo ní juoke nɛ, kí de nɛ uyɛnduɔn. <sup>4</sup> Tí'Baa Uwien ya yíem bo nɛ \*Yesu Kristo tuo' ki kpo' tí'biɛrɛ bo ɲɔ wɔ ní ñɛn tɛ idɛn yà bre tí te í'ni nɔ ni. <sup>5</sup> Wɔn Uwien nɛ si ukpiɛke uyo wà ɲa ɲmɔbe gbenm. Ami.

### *Galasi yaab wiɛ' tigbɛmɔ̀nmɔ̀nt*

<sup>6</sup> Ní jin' nni nɛ nin ni wiɛnh Uwien wà yin' nɛ Kristo ya juokm bo ya gbɛr tontonm ma ki sikreh ki paakeh tigbɛtɔr bo nnɔ. <sup>7</sup> Na yé gbɛmɔ̀nmɔ̀ntɔr te nɛ. Binib biba nɛ te, ki saah ní'yɛnm, ki nuunh bɛ ní lèbre Kristo ya gbɛmɔ̀nmɔ̀nt. <sup>8</sup> Ama, ní yé tinbi bii Uwien ya tond mɔ̀nɔn nɛ ñɛn' paaki bó ní ki lá tɔke' nɛ tigbɛr tà bore' nin tí lá tɔke' nɛ tigbɛmɔ̀nmɔ̀nt tà nnɔ la, Uwien ní wiɛ wɔ minjùm. <sup>9</sup> Tí lá tɔke' nɛ ɲɔ, nɛ n tí liɛbe' kí tɔkeh nɛ fɛnfɛnnɔ wuɔ kí teh: unil tɔke' nɛ tigbɛr, tú bore' nin ní lá cii' tigbɛmɔ̀nmɔ̀nt tà tí'saan nnɔ la, Uwien ní wiɛ wɔ minjùm.

<sup>10</sup> Fɛnfɛnnɔ n nuunh binib nɛ ní li pèkeh nni bii Uwien-i? N nuunh binib ya yɛnm nɛ ní li sɔnge n'bo-oo? N bi biɛ ki nuunh binib ya yɛnm nɛ ní li sɔnge n'bo la, ma bi lí yé Kristo ya tonsɔnl.

### *Ní tien' ma Pɔl tí yé Yesu Kristo ya tonsɔnl*

<sup>11</sup> N'yaabɛ, n yíe ní bɛnde kí ye n lá tɔke' nɛ tigbɛmɔ̀nmɔ̀nt tà nnɔ ɲa ñɛn' nil saan nɛ. <sup>12</sup> Kimɛ ma lá cii' tú nil saan, nil ɲa wɔkn' nni tú, ama \*Yesu Kristo nɛ kpiire' tú, kí cèrɛ' n bɛnde' tú.

<sup>13</sup> Ninbi mɔ̀nɔn cii' n'tetem lá te ma uyo wà n lá pɛ Uwien bo \*Sufmbɛ yaam nnɔ. N lá jèndeh Uwien ya taanl yaab ní tí kɛnde', nɛ n'nun mɔ̀n ní gben bɛ. <sup>14</sup> Tinbi \*Sufmbɛ pɛ Uwien bo ma bo wɔn la, n lá cɛn' n'gbɔnku yaab bi yɛbe, nɛ n'nun mɔ̀n lá mɔ̀n tí'yaajɛbok bo kí cɛn' bɛ. <sup>15</sup> Ama Uwien gɛ̀nde' nni kí laa' ba laan maa' nni. U'nimɔ̀nt bo nɛ u yin' nni. U'yíem bo nɛ <sup>16</sup> u cèrɛ' n bɛnde' u'Bijɛ yé udaan wà ɲɔ ní jo kí tí tɔke bà ɲa yé \*Sufmbɛ nnɔ

u'gber. I ya taan bo ma gbien' uba bo, <sup>17</sup> ka don' Yerusalem bó rí tĩ lɛ bà kpiɛ' ki yé nin nni \*Yesu ya tondb nnɔ. Ama n bure' Arabi ya tinfɛnm bó nɛ, ki ñɛn' ni' bó ki liɛbe' ní Damas ya du ni.

<sup>18</sup> Tɔ, ibin ita gèbre', nɛ n don' Yerusalem bó rí tĩ lɛ Pier\*, ki tien' u'saan iwien piik nin iɲun. <sup>19</sup> Saak wà yé Yonbdaan ya ninjɛ nnɔ baba ɲa ní la, ma là laa' \*Yesu ya tond uba ki pukn'.

<sup>20</sup> N kieh nà rí de nɛ nɔ, Uwien bɛn ki ye ma nɛndeh.

<sup>21</sup> Tɔ, n ñɛn' nɛn bó ma nnɔ n jon' Siri nin Silisi ya tinfɛnm bó nɛ.

<sup>22</sup> U ya yo ki laa' Kristo ya táan yaab bà te Sude ya tinfɛnm ni nnɔ ɲa laan bɛn nni.

<sup>23</sup> Ama bi là cii' nà baba si: «Ujɛ wà là jèndeh tɛ nnɔ, ji cuonh ki tɔkeh binib mitekjim ya gbɛmɔnmɔnt tà u'nun là mɔn wɔ rí gben tù nnɔ nɛ.» <sup>24</sup> Nɛn bo nɛ bi pɛkeh Uwien n'bo.

## 2

### *Pɔl nin Yesu ya tondb taan' ki kɛlɛ'*

<sup>1</sup> Ibin piik nin inan gèbre', nɛ n liɛbe' ki don' Yerusalem bó nin Banabas. N là tɔke nin Tit mɔ nɛ. <sup>2</sup> Uwien nɛ là ye rí liɛbe ni' bó, nɛ n jon'. Min nin Kristo yaab ya ciɛnb taan' ki kɛlɛ' ti'ba, nɛ n tũrɛ' ki tɔke' bɛ tigbɛmɔnmɔnt tà n kpaandeh tù bà ɲa yé \*Sufmbɛ saan nnɔ. Kimɛ ma là yíe n sɔn' nà bii n sɔnh nà nnɔ rí juore fɛnm nɛ.

<sup>3</sup> Tɔ, Tit wà n là tɔke nin wɔ nnɔ là yé Grɛk nɛ. Ama Kristo yaab ya ciɛnb nnɔ ɲa là wɔbn' wɔ wɔ rí jɛ u'punl. <sup>4</sup> Ama binib bà yih bi'ba \*Kristo yaab, ka yé bɛ nnɔ nɛ là yíe wɔ rí jɛ. Bi taa' miyɛnfuom nɛ ki kɔn' ti'cɛkl ni bɛ rí pingɛ kí liike \*Yesu Kristo cɛrɛ' ti teke' ti'yul ma nnɔ, ti biɛ ki pɛ yiko bo bii ta pɛ. Bi là maaleh bɛ rí liɛbe kí tien tɛ yiko ya yonbe nɛ. <sup>5</sup> Ama ta tuo' bi'ñɔbu bó fiebu, ɲɔ tigbɛmɔnmɔnt ya gbɛmɔnt rí juore kí li te tù te ma bo ni' bũol nɛ.

<sup>6</sup> Kristo yaab ya ciɛnb bɛn wɔn, bi yé biciɛnb bii ba yé la, na teh nni bonn, kimɛ Uwien ɲa ɲmɔbe gɛngɛnde. Biciɛnb nnɔ mɔnɔn ɲa là wɔbn' nni rí tien bontɔnn kí pukn. <sup>7</sup> Ama bi bɛnde' ki ye Uwien gɛnde' min nɛ rí li tɔkeh bà ɲa yé \*Sufmbɛ \*Yesu ya gbɛmɔnmɔnt tɛn u gɛnde' Pier mɔ ma wɔ rí li tɔkeh tù Sufmbɛ. <sup>8</sup> Kimɛ wà de' Pier mituɔm wɔ rí li tɔkeh \*Sufmbɛ tigbɛmɔnmɔnt nnɔ, wɔn nɛ de' n'mɔ mituɔm rí li tɔkeh tù bà ɲa yé Sufmbɛ nnɔ. <sup>9</sup> Nɛ Saak nin Pier\* nin San, bà bi bɛn ki ye bi yé Kristo ya táan yaab ya sɛnlierb nnɔ bɛnde' ki ye Uwien de' nni bupaabu, nɛ ki yoke' min nin Banabas ya nuɔ ki wuɔn' ki ye ti kpaan' buñɔbu, tinbi rí jo bà ɲa yé \*Sufmbɛ bó, bi'mɔ rí jo \*Sufmbɛ bó. <sup>10</sup> Bi ye tí li tien bijiinb bó baba nɛ. N'mɔ ya nun là mɔn nɛn bo nɛ.

### *Pɔl nin Pier finde' nin tɔb Antiyɔk ya du ni*

<sup>11</sup> Ama Pier là baa' Antiyɔk ya du ni uyo wà nnɔ, nɛ n kòlɛ' ki len' nin wɔ, kimɛ wa là kpɛn' sɛn nɛ. <sup>12</sup> Kí yaan binib rí ñɛ Saak saan kí baa ní nnɔ, ki laa' u taakeh ki jinh nin bà ɲa yé \*Sufmbɛ nɛ. Ama binib nnɔ lá baa' uyo wà nnɔ, nɛ u dekɛrɛ' ki tĩ sere u'ba, kimɛ u là fɛnge' bà cɛ upunjɛ bo nnɔ nɛ† <sup>13</sup> Nɛ Suftɔb mɔ kpɛn' iñuɔn ilele ya sɛn tɛn Pier, ki cɛrɛ' Banabas mɔ tũrɛ' ki paan' bi'bo. <sup>14</sup> Ama n laa' ba pɛ tigbɛmɔnmɔnt ya gbɛmɔnt bo ni'donbɔ ma nnɔ, nɛ n tɔke' Pier bi'kɛ ya nun bó ki ye: «Sin a yé Suf nɛ, ki teh tɛn wà ɲa yé Suf, ɲa teh tɛn Suf. Bɛ tien' a ji wɔbndeh bà ɲa yé \*Sufmbɛ bɛ rí li teh tɛn Sufmbɛ?»

### *Mitekjim nɛ li cɛrɛ Uwien rí bù binib bigbɛmɔndɛnb*

<sup>15</sup> Bi maa' tinbi ti yé \*Sufmbɛ nɛ. Ta te tɛn bà ɲa yé Sufmbɛ, <sup>16</sup> nɛ ti bɛn ki ye na yé unil teh yiko ye ma bo nɛ la, Uwien li bù wɔ ugbɛmɔndaan, ama wà teke' \*Yesu Kristo ki jin' la, Uwien bùh wɔn nɛ ugbɛmɔndaan. Ti'mɔ teke' \*Yesu Kristo ki jin' ɲɔ Uwien rí bù tɛ bigbɛmɔndɛnb nɛ. Ti teke' \*Yesu Kristo ki jin' ma nnɔ nɛ cɛrɛ' Uwien bù' tɛ bigbɛmɔndɛnb.

\* 1:18 Liike Itũon 9:26. \* 2:9 Liike 1:18. † 2:12 Pɔl ye bà cɛ upunjɛ bo ma nnɔ u niireh Sufmbɛ bà teke' Yesu Kristo ki jin' ɲɔ ki cɛ ki ye bà kɛ teke' Yesu Kristo ki jin' nnɔ n li jeh ipun ki li pɛ bɛn Sufmbɛ ya yaajɛbok bo nnɔ nɛ.

Na yé ti teh yiko ye ma bo ne la, Uwien li bù te bigbemàndɛnb, kimɛ Uwien ɲa bù nil gbemàndaan kí ye u teh yiko ye ma bo.

<sup>17</sup> Ní yé ti nuunh Kristo bo, Uwien ní bù te bigbemàndɛnb, ne bi ye tí'mò yé bibiɛrdɛnb la, ní ye nè ní ye Kristo sɔnh ki dienh ibiɛre ne-ɛɛ? Na te nnò fiebu! <sup>18</sup> Kimɛ n là wiɛ' yiko wà nnò n liebe' ki paan' u'bo la, n wuɔn' ki ye min nin n'yul ɲa teh ní'donbó ne. <sup>19</sup> Min wɔn \*yiko bo, n te ten utenkpii ne. Wɔn ne cère' n te ten utenkpii; wa ji ɲmabe tuɔm n'bo. Ní te nnò ɲa ní fre kí li fuobe Uwien yíe ma bo ne. Bi taan' ki kpɛ' min nin Kristo udɔpɔnpɔn bo ne. <sup>20</sup> Nɛn bo, n fuobe la, na ji yé min ne fuobe, Kristo ne fuobe nni. Kimɛ n fuobe fɛnfɛnnò wuɔ ma nò, Uwien ya Bijɛ wà yíe nni ki teke' n'kuum ki kpo' nnò, n teke' wɔn ne ki jin', ki fuobe. <sup>21</sup> Nà yé n ye ní tien Uwien ya paabu fɛnm ne, kimɛ ní yé kí ɲɛ \*yiko bo ne Uwien bùh binib bigbemàndɛnb la, Kristo kpo' fɛnm ne.

### 3

#### *Yiko nin mitekjim ya gber*

<sup>1</sup> Galasi yaabɛ, ní jòre' ne-ɛɛ? Bɛ ne fùɔre' ní'yɛnm-i? N tùɔre' ki tɔke' ne bi kpɛ' \*Yesu Kristo udɔpɔnpɔn bo ma bo ɲa! <sup>2</sup> N yíe ní jiin nni iniire yà sò baba. Ni teh yiko ye ma bo ne cère' Uwien de' ne Mifuoɲaam bii ni cenge' tiggemɔnmɔnt ki teke' tù ki jin' ma nnò bo ne? <sup>3</sup> Ní tien' mila ní'yɛnm gben' ki tí kpɛ nò! Ni là cin' nin \*Mifuoɲaam ya tuɔm ne, bɛ tien' ní ji nuunh ní tí fɔre nin minisaaltuɔm-i? <sup>4</sup> Ni laa' nà kɛ ní'fuobm ni nnò juore' fɛnm ne-ɛɛ? Na ní tuo kí juore fɛnm. <sup>5</sup> Uwien dienh ne \*Mifuoɲaam ki teh miyɔkm ya bont ní'siik ní ma nnò, ní teh yiko ye ma bo ne cère' u teh nnò bii ni cenge' tiggemɔnmɔnt ki teke' tù ki jin' ma nnò bo ne?

#### *Uwien bù' Abraham ugbemàndaan u'tekjim bo ne*

<sup>6</sup> Kimɛ ní kele' \*Uwien ya gbɔnku ní ki ye: «\*Abraham teke' Uwien ki jin', nɛn bo ne Uwien bù' wɔ ugbemàndaan.» <sup>7</sup> Nɛn bo, bɛnde mɛn kí ye binib bà teke' Uwien ki jin' nnò, bɛn ne yé \*Abraham ya yaabii. <sup>8</sup> Uwien là juɔ' ki len' u'gbɔnku ní ki ye u li bù bà ɲa yé \*Sufmbɛ nnò bigbemàndɛnb bí'tekjim bo ne. Nɛn bo ne u là juɔ' ki tɔke' \*Abraham tiggemɔnmɔnt tuu ki ye: «Sin bo ne n lí tien inibol kɛ mimɔnm.» <sup>9</sup> \*Abraham là teke' Uwien ki jin' ne u tien' wɔ mimɔnm. Nnò ne bà mɔ teke' Uwien ki jin' nnò, u tien' bí'mò mimɔnm tɛn \*Abraham.

<sup>10</sup> Tò, binib bà kɛ teh yiko ye ma bo, ki du nɛn bo nnò, bi te Uwien ya ɲùum ní ne. Kimɛ ní kele' \*Uwien ya gbɔnku ní ki ye: «Wà kɛ ɲa boh nà kɛ kele' \*yiko ya gbɔnku ní nnò la, u te Uwien ya ɲùum ní ne.» <sup>11</sup> Ní yé imàndɛn ne, Uwien ɲa ní bù nil gbemàndaan wɔn Uwien ya nun bó kí ɲɛ u teh yiko ye ma nnò bo. Kimɛ ní kele' \*Uwien ya gbɔnku ní ki ye: «Ugbemàndaan lí fuobe mitekjim bo ne.» <sup>12</sup> Ama \*yiko ya bom nin mitekjim ɲa tɛ. Ní yé unil teh \*yiko ye ma la, yiko nnò bo ne u lí fuobe. <sup>13</sup> Kristo dɛ' tɛ kí wiɛ', kí ɲɛn' tɛ \*yiko ya ɲùum ní, kí teke' tí'sensien kí cère' mí lu' wɔn bo ne. Kimɛ ní kele' \*Uwien ya gbɔnku ní kí ye: «Bí ku' wà kɛ kí lɛkn' udɔ bo la, ní yé miɲùum ne u'bo.» <sup>14</sup> Ní tien' nnò ɲa kí ɲɛ \*Yesu Kristo bo, bà ɲa yé \*Sufmbɛ mɔ ní lɛ Uwien là tien' \*Abraham u'mɔnm mà nnò ne. Nnò ne mitekjim bo, tí'mò lí lɛ Uwien là pùon' kí ye u lí sɔn ní \*Mifuoɲaam mà nnò.

#### *Yiko ɲa ní pien Uwien ya puonl*

<sup>15</sup> N'yaabɛ, cère mɛn ní taa kunɛnɛnku kuba binib ya fuobm ní kí wuɔn ne. Unil pole' kí kele' u'ɲɔbonfɔrkaal la, uba ɲa ní fre kí lèbre lè, ka ní fre kí pukn niba mɔ lí'bo. <sup>16</sup> Tò, Uwien là pùon' lipuonl kí de' \*Abraham nin u'yaabil ne. Na kele' kí ye u'yaabil tɛn u niireh ligol ne, ní kele' kí ye u'yaabil ne. Lí te liba ne, lɛn sí: Kristo. <sup>17</sup> N ye ní ye nà sò: Uwien là cuo' nin \*Abraham kujɔtieku ne kí pùon' kí ye kua ní saa. Ní tien' ibin kobiinan nin ibin pita ne kí yaan u de' Moyis \*yiko. Yiko nnò ɲa ní gben kujɔtieku nnò kí cère Uwien ya puonl ní juore fɛnm. <sup>18</sup> Kimɛ ní yé yiko bo ne binib lí lɛ mimɔnm Uwien saan la, na ji yé puonl bo ne bí lí lɛ mè. Ama lipuonl bo nín ne Uwien là juoke' \*Abraham.



19 Ni te nnɔ la, be bo ne Uwien de' \*yiko bugben-i? U la de' wɔ ki pukn' nɔ binib rí li bende bi'tuonbiere ne, kí tĩ baa uyo wà \*Abraham ya yaabil là u là pùon' lipuonl ki de' lè nnɔ rí baa ní. Uwien là cère' u'tondb ne taa' \*yiko nnɔ ki de' ucendenduol\*, ne u taa' ki de' binib. 20 Binib bile ya siik ni ne ucendenduol te. Ama Uwien bugben ne là pùon' lipuonl nnɔ ki de' \*Abraham, nil nja là te bi'siik ni.

21 Ni te nnɔ la, yiko nieh nin Uwien là pùon' ipuon yà nnɔ ne-εε? Na te nnɔ fiebu! Yiko nnɔ bi li fre kí cère unisaal rí le limiel la, Uwien bi li nĩ wɔn bo ne kí bù binib bigbemòndenb. 22 Ama \*Uwien ya gbɔnku ye ibiere ya tuɔm co uɛndun ya nib ke tiyonbt ne. Nen bo, Uwien li tien u pùon' ki ye ma nnɔ kí de binib bà teke' \*Yesu Kristo ki jin' nnɔ bi'tekjim bo ne.

23 Kí yaan Kristo rí baa binib rí teke wɔ kí ji nnɔ, yiko là co te tiyonbt ne, ki gu uyo wà Uwien li wɔn te mitekjim ya sen. 24 Nnɔ ne \*yiko nnɔ là likeh te ki tĩ baa' uyo wà Kristo baa' ní, nɔ Uwien bù' te bigbemòndenb ti'tekjim bo nnɔ. 25 Ama Kristo tĩ baa' ma, ti teke' wɔ ki jin' nnɔ yiko nja ji likeh te.

26 Ninbi bà ke teke' \*Yesu Kristo ki jin' nnɔ, ni yé Uwien ya bumu ne kí ñe ni'tekjim bo. 27 Ninbi bà ke bi sii' ne Uwien ya ñunm Kristo ya yel bo nnɔ, ni teke' Kristo ya tetem ne. 28 Ni yé \*Yesu Kristo yaab ma nnɔ, borm nja ji te ni'ni. Ninbi \*Sufmbe nin bà nja yé Sufmbe, ninbi iyonbe nin bà nja yé yonbe, ninbi bijeb nin bipiib, ni'ke yé unibaab ne. 29 Ni yé Kristo yaab ma nnɔ, ni yé \*Abraham ya yaabii ne, ki li le mimɔnm mà Uwien là pùon' mè \*Abraham nnɔ.

## 4

### *Kristo yaab nja ji yé yonbe*

1 Tɔ, n ye rí ye nà si: kibuk kà li ji lifaal laan yé kibuwawaak uyo wà la, ka cen' yonb nin ken si lifaal ma ke nnɔ. 2 Ama kí laan yé kibuk ma nnɔ, kí li boh binib bà likeh kè nin bà likeh kí faal nnɔ ne, kí tĩ baa uyo wà kí baa sien' ki ye kí ji yé ucién nnɔ. 3 Ti'mɔ yaam te nnɔ ne. Uyo wà ta laan là teke' Kristo ki jin' nnɔ, ti là yé iyaajebok yà te uɛndun ni ya yonbe ne.\* 4 Ama ní lá kpaan' uyo wà Uwien sien' nnɔ, ne u sɔn' ní u'Bije, ki cère' upii maa' wɔ, yiko njuuke wɔ, 5 nɔ wɔ rí de binib bà yiko njuuke be nnɔ kí wiε. Nnɔ ne u tien' te Uwien ya bumu. 6 Ni mɔnbe ki yé u'bumu ne. Nen bo ne u sɔn' ní u'Bije ya Fuoñaanm ti'fɛl ni, mĩ cèreh ti yih Uwien ti'Baa. 7 Nen bo, nja ji yé yonb, a ji yé u'buk ne. A yé u'buk ma nnɔ, a'mɔ li le u'mɔnm ne. Uwien ne cère' nĩ te nnɔ.

### *Pɔl ya yɛnm saa' Galasi yaab bo*

8 Na laan là ben Uwien ma nnɔ, ni là pε ibule bo ne i co ne tiyonbt. Ibule nnɔ nja yé Wien. 9 Ama fɛnfennɔ, ni bende' Uwien, wɔn Uwien ne cère' ni bende wɔ. Be tien' ni nuunh ní liebe kí paan iyaajebok bo? Ya nɔmbe tuɔm, ka yé niba mɔ? Be tien' ni yé ní liebe kí li yé i'yonbe? 10 Ni nɔmbe ibok ne ki tũreh ki boh yè ibin iba ni nin inmaale iba ni nin iwien iba nin uyo uba. 11 N'yɛnm saa' ni'bo, kimε n likeh n sɔn' lituonl là nin inunmɔn ki de' ne nnɔ la juore fɛnm ne.

12 N'yaabe, n gbáanh ne ne, li te men ten min, kimε n tien' n'ba ten ninbi bà yé \*Sufmbe ne. Na bii' nni niba. 13 Ni ben ki ye iwien yà là nɔmbe nni nnɔ bo ne n laa' usen ki tɔke' ne tigbemɔnmɔnt mikpiεkm. 14 Nin iwien nnɔ là cère' n'gbenent nja nɔmbe liikm ma ke nnɔ, na là senge' nni, ka liike' nni fɛnm. Ama ni là teke' nni ten n yé Uwien ya tond bii n yé \*Yesu Kristo nin u'yul ne. 15 Ni là nɔmbe uyensonge wà nnɔ ji te la? Kimε n li fre kí kun ne imɔn kí ye ni bi là li fre kí lòkre ni'nunbii mɔnɔn kí de nni la, ni bi là lòkre' yè ki de' nni ne. 16 Fɛnfennɔ, n tɔkeh ne tigbemɔnt ma nnɔ ne cère' n kpende' ni'nennend-ii?

\* 3:19 Bi ye ucendenduol wà nnɔ, bi niireh Moyis ne. \* 4:3 Bi lebre' inɔbon yà ki ye: ta laan là teke' Kristo ki jin' uyo wà nnɔ; i kele' Grekme ya lenm ni ki ye: «Ti laan là yé mubumu uyo wà nnɔ ne.»

<sup>17</sup> Binib biba te bi'nun mɔ́n bɛ́ rí li yíe ni'gber ama bi ηmɔ́be iyenmaale yà nnɔ́ ηa mɔ́n. Bi nuunh bɛ́ rí bore min nin ninbi nɛ́ kí taa nɛ́ kí mɔ́kn bi'ba. <sup>18</sup> Ní mɔ́n, ni'nun rí li mɔ́n ní li tuu ki teh nà mɔ́n uyo kɛ́ nɛ́, na yé n lá te ni'saan uyo wà baba nɛ́ la. <sup>19</sup> N'bumu, ní liɛbe' ki wi nni ni'bo tɛ́n imerwiɛ́n nɛ́. Ní lí li wi nni nnɔ́ nɛ́ kí tí baa uyo wà ni li ηmɔ́be Kristo ya tetem. <sup>20</sup> N bi yíe rí li te ni'saan fɛ́nfɛ́nnɔ́ wuɔ́ nɛ́, kí bɛ́nde n li len nɛ́ ma bo, kimé n'yɛnm nɛ́ ñɛ́n' ni'ni.

### *Sara nin Agaar ya gber*

<sup>21</sup> Tɔ́ke nni mɛ́n, ninbi bà yíe yiko rí li ηuuke nɛ́ nnɔ́, na ciuh u teh bà nɛ́-ɛɛ́? <sup>22</sup> Ní kele' \*Uwien ya gbɔ́nku ni ki ye: «\*Abraham là ηmɔ́be bijiéb bile nɛ́. Upiiyonb là maa' uba, nɛ́ u'po umɔ́n mɔ́ maa' utɔ́. <sup>23</sup> Upiiyonb nnɔ́ maa' wà nnɔ́ u maa' wɔ́ unisaal yíe ma bo nɛ́. Ama u'po umɔ́n maa' wà nnɔ́, Uwien nɛ́ là pùon' ki ye u li maa wɔ́. <sup>24</sup> Tigber tuu ya tingi ηmɔ́be imɛ́sɛ́n ile nɛ́; kimé bipiib bile biɛ́ te tɛ́n Uwien là cuo' nin binib kujɔ́tiekú kùà bolm mile nnɔ́ ya nɛ́nnɛ́nku nɛ́. Kuba si: Uwien là cuo' kùà nin u'nib Sinayi ya juɔ́l bo nnɔ́ nɛ́. Agaar nɛ́ yé ku ya jɔ́tiekú ya nɛ́nnɛ́nku, nɛ́ u maa' mubumu mùà kɛ́ nnɔ́ yé iyonbe. <sup>25</sup> Bi ye Agaar la, bi niireh Sinayi ya juɔ́l là te Arabi ya du ni nnɔ́ nɛ́. Fɛ́nfɛ́nnɔ́ ya Yerusalem te tɛ́n upiyyonb nnɔ́ nɛ́, kimé u'nib yé iyonbe nɛ́. <sup>26</sup> Ama Yerusalem wà te paaki nnɔ́, wun ηa te tɛ́n piyyonb. Wun nɛ́ yé tí'du ki te tɛ́n tí'naa. <sup>27</sup> Kimé ní kele' \*Uwien ya gbɔ́nku ni ki ye: «Upiihɔ́b, li poknh, sin wà ηa bɛ́n mɛ́rwiɛ́n nnɔ́, li yiknh nin uyɛ́nsɔ́nge, kimé upii wà bi wiɛ́' wɔ́ ya bumu li yebe, ki cɛ́n' wà ηmɔ́be cɛ́ yaamu.»

<sup>28</sup> N'yaabe, ninbi bɛ́n wɔ́n, Uwien là pùon' lipuonl là nnɔ́ bo nɛ́ ni yé u'bumu tɛ́n \*Isaak. <sup>29</sup> Bi là maa' kibuk kà unisaal yíe ma bo nnɔ́ là jènde' uyo bo bi là maa' kà \*Mifuoñaanm ya tuɔ́m bo nnɔ́. Fɛ́nfɛ́nnɔ́ mɔ́ ní biɛ́ ki te nnɔ́ nɛ́. <sup>30</sup> Tɔ́, ní kele' \*Uwien ya gbɔ́nku ki ye ba? Ní kele' ki ye: «Ñɔ́re upiyyonb nnɔ́ nin u'bijɛ́, kimé upiyyonb nnɔ́ ya buk ηa ηmɔ́be sɛ́n kɛ́n nin upiimɔ́n ya buk rí taan kí ji bi'baa ya faal» <sup>31</sup> Nɛ́n bo, n'yaabe, ta yé piyyonb ya bumu ama tí yé upiimɔ́n yaamu nɛ́.

## 5

### *La liɛbe mɛ́n kí kɔ́yonbt ní*

<sup>1</sup> \*Kristo teke' tɛ́ ki wiɛ́', ηɔ́ tí la jí rí li te yonbt ní nɛ́. Nɛ́n bo, gore mɛ́n kí la cère niba rí liɛbe kí cuo nɛ́ yonbt.

<sup>2</sup> Cenge mɛ́n, min Pɔ́l nɛ́ tɔ́keh nɛ́ ki teh: «Ní tuo' bi jie' ní'pun la, Kristo ηa jí yé niba ní'bo.» <sup>3</sup> N liɛbe' kí tɔ́keh unil wà kɛ́ tuo' bi jie' u'punl nɛ́ ki teh ní yé liwɔ́bl nɛ́ kí de' udaan, wɔ́ rí li boh yiko nnɔ́ kɛ́ kí tí gben. <sup>4</sup> Ninbi bà nuunh Uwien rí bù nɛ́ bigbɛ́mɔ́ndɛ́nb yiko bo nnɔ́, ní bore' ní'ba Kristo saan ηɔ́, nɛ́ ki mun' ní'ba Uwien ya paabu. <sup>5</sup> Tinbi bɛ́n wɔ́n, tí'dɛ́ndɛ́nl si: Uwien lí bù tɛ́ bigbɛ́mɔ́ndɛ́nb tí'tekjim bo nɛ́. \*Mifuoñaanm nɛ́ cère' tí gu lidɛ́ndɛ́nl nnɔ́ rí tien. <sup>6</sup> Kimé a yé \*Yesu Kristo yɔ́ la, a jie' a'punl bíi ηa jie' la, na cieke. Nà cieke si: á teke Kristo kí jí ηɔ́ a'tekjim rí cère á lí yíe binitɔ́b nɛ́.

<sup>7</sup> Ní là cin' mɔ́nmɔ́nm nɛ́, ηmɛ́ nɛ́ pien' nɛ́, ní la jí rí li boh gbɛ́mɔ́nt-i? <sup>8</sup> Mí ya piɛ́nm ηa ñɛ́n' Uwien wà yih nɛ́ saan. <sup>9</sup> Kpɔ́nɔ́ ya ñɔ́ke waamu mɔ́nɔ́n cèreh kpɔ́nɔ́ kɛ́ nuuleh nɛ́. <sup>10</sup> Min wɔ́n, Yonbdaan cère' n ηmɔ́be midum ní'bo kí ye ní'yɛnmaale ηa bore' nin n'yi. Ama wà taah fɛ́nfɛ́nm kí bàareh ní'ni nnɔ́ yíe la, wɔ́ rí lí yé udaan wà kɛ́, u lí lɛ́ utudɛ́re nɛ́.

<sup>11</sup> N'yaabe, n bi biɛ́ kí tɔ́keh binib kí teh bɛ́ rí lí jɛ́h ipun la, ba jí bi jèndeh nni. Kristo ya dɔ́pɔ́npɔ́n ya gber ηa jí bi lí cère uba ya yɛ́nm rí saa. <sup>12</sup> Cère mɛ́n binib bà taah fɛ́nfɛ́nm kí bàareh ní'ni nnɔ́ rí lí jɛ́h bí'pun haali kí tí fàare bí'ba mɔ́nɔ́n!

*Li toreh mɛ́n tɔ́b, kí cère Mifuoñaanm rí lí pekreh nɛ́*

<sup>13</sup> N'yaabe, ninbi wɔn, Uwien ne yin' ne ki de' ne ki wie'. Ni la dule nen bo kɪ li teh ni'yenm yie nà. Ama ní li yie tɔb, kɪ li toreh tɔb. <sup>14</sup> Kimε yiko ke taan' ki te yiko uba ni ne, wɔn si: «Li yie a'tɔ ten a yie a'ba ma bo.» <sup>15</sup> Liike men ni'yul bo! Ni te ten muwenbiimu, kɪ coh tɔb la, ni joh migbenm ne.

<sup>16</sup> N tɔkeh ne ne, cère men Mifuoñaanm ní li pekreh ne. Nnɔ ne na ji li teh ni'yenm yie nà. <sup>17</sup> Kimε unisaal yie nà bore' nin \*Mifuoñaanm yie nà, ne \*Mifuoñaanm yie nà mɔ bore' nin unisaal yie nà. Unisaal yie nà ɲa cendeh nin \*Mifuoñaanm yie nà. Nen bo ne na ní fre kɪ li teh ni'yenm yie nà. <sup>18</sup> \*Mifuoñaanm pekreh ne la, yiko ɲa ji ɲmɔbe tuɔm ni'bo.

<sup>19</sup> Tɔ, unisaal ya yiem cèreh u sɔnh itùonbiere ya nnɔ, ti ben ye. Yen si: tijɔknt ya tòn nin linaɲmaal nin lisɔnsɔndl, <sup>20</sup> nin ibule bo ya paanm nin liɲɔkjil nin kinenk nin likɔnkɔnl nin iponponbe nin ubenpiebe nin kunanierku nin ifinfinde nin umaapàare <sup>21</sup> nin ununfɔke nin tideyibr nin unifenjin nin itùontɔ ya bre ten yie. N là tɔke' ne itùonbiere nnɔ bó ɲɔ, kɪ liebe' kɪ tɔkeh ne, binib bà ke teh tuu ya bont ɲa ní kɔ Uwien ya bel ni.

<sup>22</sup> Ama \*Mifuoñaanm cère' binib yie tɔb, kɪ ɲmɔbe uyensange nin uyenduɔn nin kuminku, kɪ ɲmɔbe tinimɔnt, kɪ muɔh binib micεεkm, kɪ ɲmɔbe midum, <sup>23</sup> kɪ ɲme nin tɔb, kɪ coh bi'ba. Yiko ɲa te kɪ biin binib bà teh tuu ya bont. <sup>24</sup> Binib bà ye Kristo yaab nnɔ, wie' bi'nisaaltetem ten bi kpe' mè Kristo ya dɔpɔnpɔn bo ne.

<sup>25</sup> \*Mifuoñaanm ne cère' ti fuobe ma nnɔ, cère men mè ní li pekreh te. <sup>26</sup> Cère men ti la li ɲmɔbe nacenkpekuont, kɪ la li dɛlkeh tɔb, kɪ la li ɲmɔbe ponponbe tɔb bo.

## 6

### *Li toreh men tɔb*

<sup>1</sup> N'yaabe, ní ye bi pɪln' unil u teh nà bre la, ninbi bà \*Mifuoñaanm pekreh ne nnɔ, ní tien suoo, kɪ tore wɔ wɔ ní liebe kɪ kpɪen usen wà mɔn. Ni'ni wà ke ní liike u'yul bo kɪ mɔ la kɔ biikm ni. <sup>2</sup> Li toreh men tɔb ijend ni. Nnɔ ne ni li boh Kristo ya yiko. <sup>3</sup> Unil maaleh kɪ teh u ye niba ne, ka ye la, u lereh u'ba ne. <sup>4</sup> Wà ke ní fin kɪ liike u'tuonl. U laa' lí mɔn la, wɔ ní li pèkeh u'ba u'tuonl nnɔ bo kɪ la taa' lè kɪ kpàandeh bi'tɔb ye. <sup>5</sup> Kimε wà ke teh nà la, ní likeh wɔn ne.

<sup>6</sup> Bi wɔknh wà Uwien ya gber ní li ñendeh u ɲmɔbe tibont tà ke nnɔ ya niba bó kɪ dienh wà wɔknh wɔ.

<sup>7</sup> La lereh men ni'ba, ba leh Wien. Kimε unil bule' nà la, u li ce nen ne. <sup>8</sup> Unil teh u'yenm yie nà la, u li lε u'yenm yie nà ya suul ne. Ni'tingi si: mikuum. Ama unil teh \*Mifuoñaanm yie nà la, u li lε \*Mifuoñaanm ya suul ne. Ni'tingi si: limiel là ɲa ɲmɔbe gbenm. <sup>9</sup> Cère men tí li teh mimɔnm kɪ la ye ti jii'. Kimε ti tuu kɪ teh mimɔnm la, uyo we ní tí lε lisuul. <sup>10</sup> Nen bo, ti ɲmɔbe libɔnl ma nɔ, cère men tí li sɔnh kɪ nuunh binib ke ya mɔnm, ni'ke tu nin ti'yaab bà mɔ teke' Kristo kɪ jin' nnɔ.

### *Tigbɛfərkaar*

<sup>11</sup> Liike men, min nin n'yul ne kele' ní gbenge kɪ de' ne. <sup>12</sup> Binib bà wɔbndeh ne ní li jeh ipun nnɔ nuunh be ní li teh tibont binib ní li lenh bi'yenm ní li sɔnge bi'bo, ɲɔ bi la jènde be Kristo ya dɔpɔnpɔn ya gber bo baba ne. <sup>13</sup> Kimε ben bà jeh ipun nnɔ bugben ɲa boh yiko. Bi yie ni li jeh ipun ɲɔ be ní li jebnh bi'ba kɪ teh ben ne wɔbn' ne ni jie' ipun ne. <sup>14</sup> Min wɔn, ma lí li jebn n'ba niba bo kɪ kende' ti'Yonbdaan \*Yesu Kristo ya dɔpɔnpɔn bo. Udɔpɔnpɔn nnɔ bo ne uɲendun wuu ya bont te ten tikpir n'bo, ne n'yenm ɲa ji pe tu'bo. <sup>15</sup> Kimε unil jie' lipunl bii wa jie' la, na ciεke. Nà ciεke si: Uwien ní tien te binifɛnb ne. <sup>16</sup> Uwien ní de binib bà ke kpe u ya sen uyenduɔn, kɪ muɔ be micεεkm. Wɔ ní tien nnɔ u'nib ke\*.

\* **6:16** Migbiirm miε ni bi lɛbre' liɲɔbonl là kɪ ye u'nib ke nnɔ ní kele' Grεkmbε ya lenm ni kɪ ye: Uwien ya nib Israyel yaab ne.

<sup>17</sup> Tɔ, kɪ n̄ɛ dinnɔ kɪ li joh uba la ji n̄mɔbe nni yɛn̄n̄aabe, kimɛ n̄ jɛnde' \*Yesu bo ma n̄nɔ ya gb̄ɛn juore' ki te n'bo nɛ.

<sup>18</sup> N'yaabɛ, ti'Yonbdaan \*Yesu Kristo n̄ juoke nɛ. Ami.

## Kugbɔnku kua Pɔl kele' ki de' Efes yaab nnɔ Nà wɔngeh Kugbɔnku kuu te ma bo

Pɔl kele' kugbɔnku kuu ki de' Kristo ya táan yà te Efes ya du ni nin i'tɔ yà te Asi ya tinfenm ni nnɔ nɛ. U là te lipɛkl ni nɛ ki kele' kugbɔnku nnɔ (3:1; 4:1). Pɔl taan' u wɔkn' itáan nnɔ miwɔknm mà kɛ nnɔ mijenjenm bo nɛ ki kele' kugbɔnku kuu ni. U kele' kù ki de' Kristo yaab bà ɲa yé Sufmbɛ nnɔ nɛ. Kugbɔnku kuu ya mɛsɛnkpiɛke si: Efes yaab ɲ bɛnde Uwien bonde' wɔ ɲ sɔn itùon yà nɛ. Ní yé tibont tà là buɔ, Yesu cère' binib bɛnde' tù nɛ. Uwien bonde' haali uyoyo ɲ wɔ ɲ taan nà kɛ te kitink bo nin kutaaku bo nɛ kí taa kí ɲukn Yesu Kristo.

Kí cin liyul 1 kí tí baa 3, Pɔl tɔke' bɛ ki ye: Yesu Kristo nɛ baa' ki kpo' udɔpɔnpɔn bo kí cère' bɛn nin Uwien taan' buñɔbu, kí gben' kinɛnk kà là te bà yé Sufmbɛ nin bà ɲa yé Sufmbɛ nnɔ ya sɛsiɛke. Nɛn bo, borm ɲa ji te bi'siik ni.

Kí cin iyul 4 kí tí baa 6, Pɔl tɔkeh Kristo yaab ki teh bɛ ɲ li ɲmɔbe mitekjim nin uyenduɔn wà Uwien de' bɛ wù nnɔ, kí li fuobe mifuobfɛnm. Wà kele' kugbɔnku kuu nnɔ tɔkeh piiciɛb ki teh bɛ ɲ bɛ ɲ li yíe bi'puob tɛn Kristo yíe u'táan yaab ma bo, kí kpo' bi'biere bo nnɔ nɛ.

### *Ifuonde*

<sup>1</sup> Min Pɔl, n yé \*Yesu Kristo ya tond nɛ Uwien ya yíem bo. N kíeh kugbɔnku kuu ɲ de bà yé Uwien yaab kí ñɛ \*Yesu Kristo bo, kí du u'bo kí te [Efes ya du ni] nnɔ nɛ. <sup>2</sup> Ti'Baa Uwien nin Yonbdaan \*Yesu Kristo ɲ juoke nɛ, kí de nɛ uyenduɔn.

### *Uwien tien' tɛ mimɔnm mà Yesu Kristo bo*

<sup>3</sup> Tí pèke mɛn Uwien ti'Yonbdaan \*Yesu Kristo ya Baa. Ti yé wɔn Kristo yaab ma nnɔ nɛ Uwien tien' tɛ u'mɔnm kɛ ya bol. Mimɔnm nnɔ yé paaki bó yaam nɛ, kí yé \*Mifuoñaanm yaam. <sup>4</sup> Tɔ, u là cère' ti yé Kristo yaab nɛ kí gènde' tɛ kí laa' wa laan ñɛn' uɲɛndun ɲ tɛ li yé u'yaab, kí la li ɲmɔbe biil u'nun bó. U yíe tɛ nɛ, <sup>5</sup> kí juɔ' kí gènde' tɛ kí tien' tɛ u'bumu \*Yesu Kristo bo. U yíe nɛ kí cèkre' u'yɛnm kí tien' nnɔ, <sup>6</sup> ɲ tɛ li pèkeh wɔ u ɲmɔbe ukpiɛke wà nnɔ bo nin u tien' tɛ tinimɔnt tà kí ñɛ u'Bije wà u yíe wɔ nnɔ bo.

<sup>7</sup> Wɔn u'Bije ya sɛm bo nɛ u dɛ' tɛ kí wiɛ', kí fère' tɛ ti'biere, kí wuɔn' tɛ u ɲmɔbe tinimɔnt tù yɛbe kí tí kpɛ ma bo. <sup>8</sup> U tien' tɛ tinimɔnt nnɔ kí gbien', kí de' tɛ miyɛnfuom nin mibɛnm isɛn kɛ ni. <sup>9</sup> U cère' ti bɛnde' tibonbɔlkaar tà u'yíem bo, u là cèkre u'yɛnm wɔ ɲ tien tù Kristo bo nnɔ. <sup>10</sup> Ní lá kpaan' uyo la, u li tien tibonbɔlkaar tà nnɔ si: u li taan nà kɛ te kutaaku bo nin nà kɛ te kitink bo nnɔ Kristo ɲ li yé ni'kɛ ya bɛr.

<sup>11</sup> Uwien cère' ti yé wɔn Kristo yaab ma nnɔ nɛ kí là juɔ' kí gènde' tɛ tí li yé u'yaab. Uwien teh tibont kɛ u jɛke' ma bo nin u yíe ma bo, <sup>12</sup> ɲ tinbi bà kpíe' kí ɲmɔbe lidɛndɛnl Kristo bo nnɔ tí li pèkeh wɔn Uwien, u ɲmɔbe ukpiɛke wà nnɔ bo nɛ.

<sup>13</sup> Wɔn Kristo bo nɛ ni'mɔ là cii' Uwien ya gbɛr. Tù yé tigbɛmɔnt nɛ, kí yé tigbɛmɔnmɔnt tà cère' ni ɲmɛrɛ'. Ní teke' wɔ kí jin', nɛ Uwien dieke' nɛ. \*Mifuoñaanm mà u là pùon' kí ye u li de nɛ mè nnɔ nɛ yé kudíeku nnɔ. <sup>14</sup> \*Mifuoñaanm nnɔ bo, ti bɛn kɛin kí ye ti li lɛ Uwien bonde' lifaal là kí ble' u dɛ' bà kí wiɛ' bi yé yaab nnɔ. Nɛn bo, cère mɛn tí li pèkeh wɔ u ɲmɔbe ukpiɛke wà nnɔ bo.

### *Pɔl kàareh kí dienh Efes yaab*

<sup>15</sup> Nɛn bo nɛ n cii' ni tùɔrɛ' kí teke' Yonbdaan \*Yesu kí jin', kí tùɔrɛ' kí yíe Uwien ya nib kɛ ma nnɔ, <sup>16</sup> nɛ n tuu kí faareh Uwien ni'bo, kí tien ni'bó n'kaare ni, <sup>17</sup> kí miɛh ti'Yonbdaan \*Yesu Kristo ya Wien wà yé ti'Baa kí ɲmɔbe ukpiɛke nnɔ wɔ ɲ cère \*Mifuoñaanm ɲ de nɛ

miyɛnfuom kí wuɔn nɛ wɔ, ní tũɔre kí bɛnde wɔ. <sup>18</sup> N miɛh wɔ wɔ ní wende ní'nun bó, ní bɛnde lidɛndɛnl là bo u yih nɛ nnɔ; kí bɛnde u'faal là mɔn ki ɲmɔbe lisel, u li taa lè kí de binib bà yé u'yaab nnɔ; <sup>19</sup> kí bɛnde kí ye u'tuɔm yɛbe ka tí ɲmɔbe mĩ kpɛ nin bà. U taah mè ki toreh tinbi bà teke' wɔ ki jin' nnɔ. U wuɔn' mituɔm bugbɛn yɛbe ki kpɛ ma bo, <sup>20</sup> uyo wà u taa' mè ki mɛkre' Kristo bitɛnkpiib ni, ki taa' wɔ ki kàan' u'ɲɔjie bó paaki bó nnɔ nɛ. <sup>21</sup> Kristo te nɛn saan nɛ ki ɲmɔbe mituɔm ki cɛn' nà kɛ te kutaaku bo ki ɲmɔbe mituɔm kɛ ya bol nin nà kɛ ɲmɔbe ticiɛnt kɛ ya bol. U'yel cɛn' iyel yà kɛ te. Na yé fɛnfɛnnɔ ya yel baba, li cɛn' uyo wà we ní nnɔ mɔ yɛ nɛ. <sup>22</sup> Uwien cère' Kristo nɛ tɛ' tibont kɛ bo litaal, ki tien' wɔ tibont kɛ ya ciɛn. Wɔn nɛ yé u'taanl ya yul, <sup>23</sup> nɛ u'taanl yé u'gbɛnɛnt. U te li'ni ki tí gben', nɛ Uwien mɔ te u'ni ki tí gben'.

## 2

### *Mifuɔbfɛnm nin Kristo*

<sup>1</sup> Uyo uba ni là teh ibiere nɛ ki biih Uwien, ki te tɛn bitɛnkpiib u'nun bó; <sup>2</sup> ki teh tɛn uɲɛndun yaab, ki boh wà yé isɛnpol ya ciɛn ki te kutaaku nin kitink ya sɛsiɛke nnɔ. Fɛnfɛnnɔ u ya ciɛn nɛ ɲuuke uɲɛndun ya nib bà ɲa tuo' Uwien ya ɲɔbu bó nnɔ; ki cèreh bi teh u yíe nà. <sup>3</sup> Uyo uba tí'kɛ mɔ là te tɛn bi ya nib nɛ, ki pɛ minisaaltetem bo, ki teh tí'yɛnm yíe nà. Tí'nisaaltetem nnɔ bo, tí là kpɛ Uwien ní dɛre tí'tub tɛn binitɔb nɛ.

<sup>4</sup> Ama Uwien nín muɔh binib micɛcɛkm ní tí kɛnde', ki yíe tɛ ki gbien'. Nɛn bo, <sup>5</sup> tinbi bà là te tɛn bitɛnkpiib Uwien ya nun bó, ka boh wɔ nnɔ, u cère' tí liɛbe' ki fuobe nin Kristo. U'juokm bo nɛ ni ɲmɛrɛ'. <sup>6</sup> Tí yé \*Yesu Kristo yaab ma nnɔ nɛ Uwien taan' ki mɛkre' tinbi nin wɔn, ki cère' tí kèlɛ' wɔn Kristo saan paaki bó. <sup>7</sup> Uwien tien' tɛ nnɔ u'juokm bo nɛ kí ɲɛ \*Yesu Kristo bo, ɲɔ kí ɲɛ dinnɔ kí li joh wɔ ní wuɔn kí ye u'nimɔnt yɛbe ka tí ɲmɔbe tũ kpɛ nin bà nɛ. <sup>8</sup> Ni teke' \*Yesu ki jin' ma nnɔ, nɛ cère' ni ɲmɛrɛ' Uwien ya juokm bo. Na yé ní'tuɔm bo nɛ ni ɲmɛrɛ', Uwien ya paabu bo nɛ ni ɲmɛrɛ'. <sup>9</sup> Na yé ní'tuon bo nɛ ni ɲmɛrɛ'. Nɛn bo, uba la li jɛbnh u'ba. <sup>10</sup> Kimɛ Uwien nɛ cère' tí ji yé tí yé bidɛnb bà nɔ. Tí yé \*Yesu Kristo yaab ma nnɔ nɛ Uwien tien' tɛ binifɛnb ɲɔ tí li sɔnh ituonmɔnmɔn yà u là juɔ' ki bonde' yè ki ble' tɛ nnɔ.

### *Yesu Kristo bo nɛ tí'kɛ taan' ki tien' unibaab*

<sup>11</sup> Nɛn bo, tiere mɛn kí ye bi maa' nɛ ma na yé Sufmbɛ. U yo uba \*Sufmbɛ là yih nɛ bà ɲa jìɛ' pun nɛ, ki yih bi'ba bà jìɛ' ipun. Unisaal nɛ jìɛ' bi'pun nɛ upunjìɛ ya dīɛku te bi'bo. <sup>12</sup> Tière mɛn kí ye uyo nnɔ, na là bɛn Kristo, ka là ɲmɔbe sɛn ní li yé Israyel yaab, ka là te kujɔtieku kùà Uwien cuo' kù nin u'nib mibolm mà yɛbe, ki pùon' lipuonl ki de' bɛ nnɔ ni. Na là ɲmɔbe dɛndɛnl, ka bɛn Wien ni'fuobm ni kitink kɛ bo. <sup>13</sup> Ama ninbi bà là jɛnde' Uwien nnɔ, fɛnfɛnnɔ ni yé \*Yesu Kristo yaab ma nnɔ, Uwien cère' ni nɛkn' wɔ kí ɲɛ wɔn Kristo ya sɛm bo nɛ.

<sup>14</sup> Kimɛ wɔn Kristo nɛ cère' tí ɲmɔbe uɲɔkpaan. U taan' \*Sufmbɛ nin bà ɲa yé \*Sufmbɛ ki tien' linibol liba. U kpo' udɔpɔnpɔn bo, ki gben' kinɛnk kà là te tɛn liguonl ki bore' bɛ nnɔ. <sup>15</sup> U cère' \*Sufmbɛ ya yiko nin u'wɔb nin u'tɛntiɛnm ɲa ji ɲmɔbe tuɔm. U taan' \*Sufmbɛ nin bà ɲa yé \*Sufmbɛ ki tien' linibofɛnl bi tɛ nin wɔ. U tien' nnɔ nɛ ki cère' bi ɲmɔbe uɲɔkpaan. <sup>16</sup> U kpo' udɔpɔnpɔn bo nɛ ki taan' bà yé Sufmbɛ nin bà ɲa yé Sufmbɛ ki tien' unibaab ki cère' bɛn nin Uwien taan' buɲɔbu. U tien' nnɔ nɛ ki gben' kinɛnk kà là bore' bɛ nnɔ. <sup>17</sup> Kristo baa' ki lá tɔke' ninbi bà là jɛnde' Uwien nin bà là nɛke wɔ nnɔ uyɛnduɔn ya gbɛr nɛ. <sup>18</sup> Kristo bo nɛ Mifuoɲaanbaabm cère' tí'kɛ laa' usɛn tí nɛkn Baa Uwien.

<sup>19</sup> Nɛn bo, ninbi bà ɲa yé \*Sufmbɛ nnɔ, na ji yé cɛnb bii binib bà ɲɛn' niba bó ní, ama ni ji yé Uwien ya nib ya biba nɛ, ki yé u'den yaab mɔ. <sup>20</sup> Ni te tɛn kuduku kùà bi mɛh kù ya bont nɛ. \*Yesu ya tondb nin \*Uwien ya ɲɔbonsɔknɛ nɛ yé kuduku nnɔ ya tɛnpuul, nɛ \*Yesu Kristo bugbɛn yé litɛnl là co litɛnpuul nnɔ. <sup>21</sup> Wɔn bo nɛ kuduku nnɔ ya bont kɛ tɔ tu'tɔr bo ki kpɛnh, ki tí tien' kuduku kùà yé Yonbdaan yaaku. <sup>22</sup> Ni yé wɔn Kristo yaab

ma nnɔ, ni'mɔ yé kuduku nnɔ ya bont ya tuba nɛ, ki taan' ki tien' libùol là Uwien te kí ñɛ \*Mifuoñaanm bo.

### 3

#### *Pɔl tɔke' bà ña yé Sufmbɛ tigbɛmɔnmɔnt*

<sup>1</sup> \*Yesu Kristo ya tuonl bo nɛ min Pɔl te lipɛkl ni ninbi bà ña yé \*Sufmbɛ nnɔ bo. <sup>2</sup> Ni cii' Uwien ya nimɔnt bo, u de' nni lituonl là ní sɔn kí de nɛ nnɔ bó. <sup>3</sup> U là cǐbre' n'nun bó ki cère' n bende' u'gbɛbɔlkaar nɛ ki kɛle' tù mikpiɛkm kugbɔnku kuu ni waamu. <sup>4</sup> Ni kaan' tù la, ni li fre kí bende kí ye n ñmɔbe miɛnm tigbɛbɔlkaar nnɔ bo. Tù wɔngɛh Uwien lá li tien nà kí ñɛ Kristo bo nɛ. <sup>5</sup> Uwien ña là cère' uyo bo yaab bende' tigbɛbɔlkaar nnɔ, ama fɛnfɛnnɔ wuɔ Mifuoñaanm cère' u'yaab \*Yesu ya tondb nin u'ñɔbonsɔknɔ bende' tù. <sup>6</sup> Tigbɛbɔlkaar nnɔ si: kí ñɛ u'gbɛmɔnmɔnt bo, bà ña yé \*Sufmbɛ li taan nin \*Sufmbɛ kí ji Uwien ya faal, kí taan kí tien unibaab, kí taan kí li te Uwien là pùon' lipuonl là nnɔ ni, kimɛ bi'kɛ yé \*Yesu Kristo yaab nɛ.

<sup>7</sup> Uwien ya nimɔnt nin u'paabu bo nɛ u cère' n yé u'tonsɔnl, ki tɔkeh binib u'gbɛmɔnmɔnt nnɔ. <sup>8</sup> Min wà yé Uwien ya nib ya gbaarkɛ nnɔ, Uwien tien' nni tinimɔnt ki ye ní tɔke bà ña yé \*Sufmbɛ nnɔ kí ye Kristo yé lifaal là mɔn ki tǐ kɛnde' nɛ; <sup>9</sup> kí wuɔn binib kɛ bɛ ní tùɔre kí bende Uwien teh ma bo nibonn nà u là bobn' nè lididikl bo nnɔ. Wɔn Uwien wà ñɛn' tibont kɛ nnɔ nɛ là bɔle' nɛ u'ba saan haali uyo bo. <sup>10</sup> U tien' nnɔ ñɔ kí ñɛ u'taanl bo, nà ñmɔbe mituɔm kɛ ya bol nin nà ñmɔbe ticiɛnt kɛ ya bol ki te paaki bó nnɔ ní bende Uwien ñmɔbe miyɛnfuom isɛn kɛ ni ma bo nɛ. <sup>11</sup> Nnɔ nɛ Uwien là bobn' wɔ ní tien nà haali uyo bo nnɔ, u ji tien' nɛn nɛ ti'Yonbdaan \*Yesu Kristo bo. <sup>12</sup> Ti teke' Kristo ki jin' ma ki yé u'yaab nnɔ bo nɛ ti ñmɔbe usɛn tí nɛkn Uwien nin midum. <sup>13</sup> Nɛn bo nɛ n gbáanh nɛ, ni la cère ni'gbɛnɛnt ní yɔre n jinh ijɛnd yà ni'bo nnɔ bo. Ama cère mɛn n'jɛnd nnɔ ní li yé ni'bo ukpiɛke.

#### *Kristo yíe tɛ*

<sup>14</sup> Nɛn bo nɛ n gbaandɛh Baa Uwien ya nun bó. <sup>15</sup> Wɔn nɛ yé kutaaku bo yaab nin kitink bo yaab kɛ ya Baa. <sup>16</sup> N miɛh wɔ u'kpiɛke yɛbe ki tǐ kɛnde' ma nnɔ bo wɔ ní cère \*u'Fuoñaanm ní de nɛ mituɔm, ní li yé binib bà ya fɛl co nɛ. <sup>17</sup> N liɛbe' ki miɛh wɔ, wɔ ní cère Kristo ní li te ni'fɛl ni kí tǐ gbɛn nɛ. Ni teke' wɔ ki jin' ma nnɔ bo, n miɛh wɔ wɔ ní cère ní li faa miyíem ni, kí li se mɔnmɔnm, <sup>18</sup> ñɔ ninbi nin u'nitɔb kɛ ní fre kí bende Kristo ya yíem yɛbe ka ñmɔbe biɛn isɛn kɛ ni ma bo; <sup>19</sup> kí bende kí ye u'yíem yɛbe ki tǐ gɛbre' unisaal ya bɛnm; kí li ñmɔbe Uwien ya tetem kɛ ki tǐ gbɛn'. <sup>20</sup> Uwien nɛ li fre kí tien tɛ nɛ ní li yɛbe kí cɛn ti maaleh nà nin ti miɛh wɔ nà, kí ñɛ u'tuɔm mà te ti'ni ki sɔnh itùon nnɔ bo. <sup>21</sup> Wɔn si ukpiɛke u'taanl yaab ni \*Yesu Kristo bo yo kɛ yo haali nin uyo wà ñmɔbe gbɛnm. Ami.

### 4

#### *Uwien cère' Kristo yaab kɛ taan' kí tien unibaab*

<sup>1</sup> Tɔ, min Pɔl wà te lipɛkl ni Yonbdaan bo nnɔ sureh nɛ; ní cère ni'tetɛm ní li selndɛh Uwien wà yin' nɛ nnɔ; <sup>2</sup> kí li jiiɛndɛh ni'ba tingi isɛn kɛ ni, kí li ñmɛ nin unil kɛ, kí li ñmɔbe liyɛnguol, kí li yíe tɔb, kí li ñmɔbe sukɛ tɔb bo. <sup>3</sup> \*Mifuoñaanm taan' nɛ ki tien' unibaab ma nnɔ, ñikn mɛn kí li tɛ kí ñɛ u'ñɔkpaan bo. <sup>4</sup> Uwien cère' ti'kɛ taan' ki tien' tigbɛnɛnt tuba nɛ. \*Mifuoñaanm mɔ te miba nɛ. Nɛ Uwien yin' tɛ lidɛndɛnl là bo nnɔ mɔ te liba nɛ. <sup>5</sup> Yonbdaan te uba nɛ. Mitekjim mɔ te miba nɛ. Uwien ya ñunsii mɔ te uba nɛ. <sup>6</sup> Uwien te uba nɛ, ki yé unil kɛ ya Baa. Wɔn nɛ cɛn' nà kɛ te, ki te unil kɛ ya fɛl ni, ki taah unil kɛ u sɔnh u'tùon.

<sup>7</sup> Ama ti'ni wà kɛ laa' bupaabu Kristo de' wɔ ki kpaan' ma bo nɛ. <sup>8</sup> Nɛn bo nɛ ní kɛle' \*Uwien ya gbɔnku ni ki ye:  
«U doh paaki uyo wà nnɔ,  
u tuke u cuo' bà tiyonbt nnɔ nɛ,

ki de' binib bupaabu.»

<sup>9</sup> Tə, u don' paaki ya tingi si ba? Ni yé nè rí wuən kí ye u kpié' ki jiire' dɛntingi nɛ.  
<sup>10</sup> Wà jiire' dɛntingi nnə, wən nɛ don' paaki mə ki gɛbre' kutaaku ɲə wə rí li te ni'kɛ saan.  
<sup>11</sup> Wən nɛ de' unil kɛ bupaabu. U cère' biba yé bitondb, bitəb yé u'ñəbonsəknb, bitəb mə kpaandeh tigbɛmənɔnt, bitəb yé bə likeh u'taan yaab\*, bitəb mə yé Uwien ya gber ya wənwəknb. <sup>12</sup> U de' bupaabu nnə ɲə wə rí bonde Uwien ya nib bɛ rí li sənɪ u'tuonl, kí cère u'taanl là yé u'gbɛnɛnt nnə rí kpére mitekjim ya sɛn ni nɛ. <sup>13</sup> Nnə nɛ ti'kɛ li ɲməɲməbe kí tɪ tien unibaab mitekjim ya sɛn ni, kí bɛnde wən Uwien ya Bijɛ mənɔnm, kí li yé binib bə kpére' mitekjim ya sɛn ni, kí li te tɛn Kristo kí tɪ gben. <sup>14</sup> Nnə nɛ ta ji li te tɛn bumu. Ta ji li te tɛn buñɛrbu bùa iñungbegbel tureh bù ki joh ikele kɛ. Binib ya wəknm mà tulndeh binib ɲa ji ɲməbe tɛ ki pekreh tɛn kutafaaku nɛ tuke tɛ. Nib ɲa ji li lɛrɛ kí tuln tɛ nin bi'tonnɛnku. <sup>15</sup> Ama tí li yíe təb, kí li təkɛh təb tigbɛmɔnt. Nnə nɛ ti li kpére isɛn kɛ ni, kí li te tɛn Kristo. Wən nɛ yé u'taanl ya yul. <sup>16</sup> Wən nɛ taan' u'nib kɛ ki cère' bi tien' unibaab tɛn tigbɛnɛnt ya gbɛnɛnbɛl tutuuke i'tə bo ki tùrɛ' ki co ma bo. Tigbɛnɛnt ya gbɛnɛnbɛl kɛ sənɪ i'tuon mənɔnm la, tigbɛnɛnt nnə kɛ kpɛnh nɛ. Kristo ya taanl yaab mə yaam te nnə nɛ. Bi yíe təb la, litaanl nnə kpɛnh mənɔnm nɛ mitekjim ya sɛn ni.

### *Mitetekpaam nin mitetefɛnm ya gber*

<sup>17</sup> Nɛn bo nɛ n ñiikɛh ki təkɛh nɛ tigbɛr tuu nə Yonbdaan ya yel bo ki teh: Ni la ji rí li fuobe tɛn binib bə ɲa pɛ Wien bo. Bi'yɛnmaale kɛ pɛ bonfɛnm bo nɛ. <sup>18</sup> Bi'nun ɲa wien. Bi'yufaa nɛ cère' ba bɛn niba. Nɛn bo nɛ ba rí lɛ Uwien de' u'nib mifuobfɛnm mà nnə. <sup>19</sup> Ba ji bɛn nà mən, ka bɛn nà bre, nɛ ki taa' bi'ba ki de' lisənsəndl, ki ɲaake ki teh tijəknt ya bonn kɛ ya bol.

<sup>20</sup> Ninbi wən, na yé ni bɛngɛ' nɛn nɛ Kristo bo. <sup>21</sup> Ni là cii' Kristo ya gber nɛ, nɛ bi là wəkɪn' nɛ tun nɛ kí ñɛ wən \*Yesu Kristo ɲməbe tigbɛmɔnt tà nnə bo, bii ba? <sup>22</sup> Nɛn bo, dāan mɛn ni'tetekpaam, mɪ yé minisaaltetɛm mà là saah nɛ ki cèreh ni'nun fəke tibont tà lɛrɛh binib nnə bo nɛ. <sup>23</sup> Cère mɛn Uwien rí lèbre ni'tetɛm nin ni'yɛnm, <sup>24</sup> ɲə ní li ɲməbe mitetefɛnm mà Uwien tien' mɛ u yíe ma bo nnə. Tigbɛmɔnt nɛ cère' mitetɛm nnə mən, ki cuube.

<sup>25</sup> Nɛn bo, dāan mɛn kutonnɛnku. Wà kɛ rí li təkɛh u'tə tigbɛmɔnt, kime ti taan' ki tien' tigbɛnɛnt tuba nɛ. <sup>26</sup> Ni'benku ni ben' la, ní cuo ni'ba ki la tien biɛrɛ, ki la cère ni'benpiebe nnə rí lu uwien. <sup>27</sup> La de mɛn sɛnpol sɛn uba nin utə. <sup>28</sup> Wà suh la, wə rí dāan bunasubu, kí li yé unimən, kí li sənɪ ituon nin inunmɔn, kí lɛ u yíe nà u'nojɛ bo, ɲə kí pu bijiinb mə. <sup>29</sup> Ni la cère iñəbonbil rí li ñɛh ni'ñuən ni. Ama ni ye ní li len la, ní cère nè rí li yé iñəbon yà mən, kí fre kí tore binib ñi wiɛbe bɛ ma bo bɛ rí kpére mitekjim ya sɛn ni, kí cère bə cenge ni'bó nnə rí lɛ mimɔnm. <sup>30</sup> La cère mɛn \*Uwien ya Fuoñaanm ya yɛnm rí saa, kime Uwien taa' mɛn nɛ ki dieke' nɛ, ki gu lidaali là u li dɛ nɛ kí wiɛ. <sup>31</sup> Ni la cère ni'benku ni rí li to təb bo, ki la ɲuuh təb bo, ki la li ɲməbe benpiebe, ki la kənɪ nin təb jɛr, ki la sukreh təb, ki la cère biɛrm miba nin mitəm rí ji rí li te ni'ni. <sup>32</sup> Li yé mɛn binimənb, kí li muəh təb micɛɛkm, kí li fèrɛh təb tɛn Uwien fère' nɛ Kristo bo ma bo.

## 5

<sup>1</sup> Ni yé Uwien ya bumu u yíe nɛ ma nnə, li te mɛn tɛn wən. <sup>2</sup> Li ɲməbe mɛn miyíem ni'fuobm ni, tɛn Kristo yíe tɛ ma ki taa' u'ba ki tien' bupaabu nin kitətuərwɛnk nnə. Lituərl nnə te tɛn lɛfina nɛ ki nu ki ɲmɛ, ki sənɛ Uwien ya yɛnm.

<sup>3</sup> Ni yé Uwien ya nib ma nnə, na ji kpɛ bɛ rí li tàakeh lisənsəndl nin tijəknt ya tūon kɛ ya bol nin ununfəke ya yel ni'ni mənən. <sup>4</sup> Na ji kpɛ ni li lienɪ ñəbonbil nin jərɛnm, ki la lienɪ tibont tà ɲməbe tijəknt bo. Nà kpɛ ní li teh nè si: ní li faareh Uwien nɛ. <sup>5</sup> Tùrɛ mɛn kí bɛnde kí ye wà kɛ teh lisənsəndl nin wà kɛ sənɪ tijəknt ya tūon nin wà kɛ ɲməbe

\* **4:11** Bi lèbre' iñəbon yà ki ye bitəb yé bə likeh u'taan yaab nnə; i kele' Grɛkmbɛ ya lenm ni ki ye biwɛnkpaab nɛ.



ununfòke lifaaciɛnl ɲa ɲmɔbe gbiin Kristo nin Uwien ya bel ni. Wà ke ɲmɔbe ununfòke lifaaciɛnl bo la, lifaaciɛnl yé u'bo ibule nɛ.

<sup>6</sup> La cère mɛn uba ní taa gbɛfɛnm uba kí lɛre nɛ. Uwien ya benku ni beh bi ya nib bo nɛ, kime ba ciɛh u'ñɔbu bó. <sup>7</sup> Ni la cère ninbi nin ni ya nibol ní li tɛ gbɛr.

<sup>8</sup> Uyo uba ni'mɔ là te licinñunl ni nɛ. Fɛnfɛnnɔ, ni yé Yonbdaan yaab ma nnɔ, ni ji te kuwenwenku ni nɛ. Nɛn bo, li fuobe mɛn tɛn kuwenwenku ni yaab. <sup>9</sup> Kime kuwenwenku cèreh ti teh tinimònt ke ya bol nɛ, ki teh nà cuube, ki pɛ tigbɛmònt ya sɛn bo. <sup>10</sup> Sekn mɛn kí bɛnde nà sɔnge Yonbdaan ya yɛnm. <sup>11</sup> La taa mɛn ni'ba kí kuɔn binib bà te licinñunl ni ya tùonfɛnfɛnm ni. Ama li ñɛndeh mɛn bi'gbɛr upaan bo. <sup>12</sup> A ye á tɔke bi buɔh ki sɔnh itùon yà nnɔ ya gbɛr mɔnɔn la, ní ɲmɔbe ifɛ nɛ. <sup>13</sup> Ama bi buɔh ki teh nà ke nnɔ ñɛn' upaan bo la, na ji buɔ, ní ji te kuwenwenku ni nɛ. <sup>14</sup> Kime nà ke ñɛn' upaan bo la, ní ji yé kuwenwenku ni yaann nɛ. Nɛn bo nɛ bi ye:

«Sin wà gɔh la, á finde,  
fii kí ñɛ bitɛnkpiib ni,  
Kristo li wende ɲɛ.»

<sup>15</sup> Nɛn bo, li bɛn mɛn, ni li fuobe ma bo, ki la ji ní li te tɛn ijɔr, ama wuɔn mɛn kí ye ni ɲmɔbe miyɛnfuom. <sup>16</sup> Uyo wà ni laa' libònl ní tien nà mɔn la, tien nè mɛn, kime ti te idɛn yà nɔ bre nɛ. <sup>17</sup> Nɛn bo, ji la yé mɛn jɔr, ama bɛnde mɛn Yonbdaan yíe nà. <sup>18</sup> La ñuh mɛn daam ki yibeh, kime tidɛyibr cèreh binib teh fɛnfɛnm nɛ. Ama cère mɛn \*Mifuoñaanm ní li te ni'ni kí tí gben. <sup>19</sup> Li dondeh mɛn Yonbdaan, kí li gɛh iyuon ke ya bol kí ñɛngɛh wɔ nin ni'fɛl ke, kí li saakreh tɔb ya gbɛnɛnt, <sup>20</sup> kí li faareh Baa Uwien uyo ke nibonn ke bo ti'Yonbdaan \*Yesu Kristo ya yel bo.

### *Upii nin u'cɛ li fuobe ma bi'dencɛnl ni*

<sup>21</sup> Ni boh Kristo ma nnɔ, li blinh mɛn ni'yul ni'tɔb ya nun bó. <sup>22</sup> Bipiibɛ, li blinh mɛn ni'yul ni'ciɛb ya nun bó tɛn ni blinh ma ni'yul Yonbdaan ya nun bó nnɔ; <sup>23</sup> kime uje yé u'po ya ciɛn tɛn Kristo yé u'taanl yaab ya ciɛn ma nɛ. Kristo ya taanl yé u'gbɛnɛnt nɛ, nɛ u yé u'taanl nnɔ ya ɲmɛnl. <sup>24</sup> Nɛn bo, bipiib ní li blinh bi'yul bi'ciɛb ya nun bó isɛn ke ni tɛn Kristo ya taanl yaab blinh bi'yul u'nun bó ma bo. <sup>25</sup> Bijɛbɛ, wà ke ní li yíe u'po tɛn Kristo yíe u'taanl ma, ki teke' li'kuum ki kpo' nnɔ. <sup>26</sup> U tien' nnɔ ɲɔ lè ní li yé Uwien yaal nɛ, nɛ ki taa' miñunm nin u'gbɛr ki lùore' li'nib. <sup>27</sup> U yíe bɛ ní baa u'saan, kí li mɔn ki windeh, ki la ɲmɔbe jɔknt, ki la ɲmɔbe miin, ki la gbè niba saan, ama bɛ ní li yé biñaanb, ki la ɲmɔbe biil nɛ. <sup>28</sup> Nnɔ nɛ ní kpɛ uje ní li yíe u'po tɛn u yíe u'ba ma bo. Uje wà ke yíe u'po la, u yíe u'ba nɛ. <sup>29</sup> Kime nil ɲa kpele ki senge' u'ba. U jinh nɛ, ki likeh u'ba mɔnmɔnm tɛn Kristo jindeh u'taanl yaab ma, ki likeh bɛ mɔnmɔnm nnɔ. <sup>30</sup> Tinbi Kristo yaab yé u'gbɛnɛnt nɛ. <sup>31</sup> Ní keke' \*Uwien ya gbɔnku ni ki ye: «Nɛn nɛ cère' uje kuɔn' upii la, u li dàan u'naa nin u'baa, wɔn nin u'po ní taan, nɛ bɛn bile nnɔ ní taan kí tien unibaab.» <sup>32</sup> Nibonbɔlkaann nnɔ yé nibonciɛnn nɛ. Min bo, ní likeh Kristo nin u'taanl nɛ. <sup>33</sup> Ama tigbɛr bugbɛn likeh ni'mɔ nɛ. Uje ke ní li yíe u'po tɛn u yíe u'ba ma bo. Upii ke mɔ ní li boh u'cɛ.

## 6

### *Mubumu li fuobe ma bo lidencɛnl ni*

<sup>1</sup> Mubumu, ni yé Yonbdaan yaamu nɛ, li boh mɛn ni'naambe nin ni'baambe, kime ní kpɛ ní li teh nɛn nɛ. <sup>2</sup> «Li boh a'naa nin a'baa» yé liwɔbkpiɛkl là Uwien de' lè ki pole' lipol kí kpɔbn' lè nɛ. <sup>3</sup> A pɛ li'bo la, «A li te liwiɛl ni nɛ, kí li ɲmɔbe limɛfɔkl uɲɛndun wuu ni.»

<sup>4</sup> Bibaambe, la cère mɛn ni'bumu ya yɛnm ní li ñɛh ni'ni. Ama ní li wubeh mù, kí li pekreh mù, kí li gbierɛh mù Yonbdaan yíe ma bo.

### *Iyonbe nin i'cɛnbaambe li te ma bo*

<sup>5</sup> Iyonbe, li boh mɛn ni'cɛnbaambe uɲɛndun wuu ni, kí li fɛnge bɛ imònmòn, kí li sɔnh bi'tùon nin ni'fɛl ke tɛn ni te ma bo nin Kristo. <sup>6</sup> Ni la li boh bɛ bi'nun ni baba tɛn ni nuunh

binib ne ní li pèkeh ne, ama ní li teh ten ni yé Kristo ya yonbe ne, ki nuunh ní li teh Uwien yíe ná nin ní'fèl ke. <sup>7</sup> Li sòn̄h mèn itùon nin uyenn̄maa, ten ni sòn̄h ki dienh Yonbdaan ne, na sòn̄h ki dienh nib. <sup>8</sup> Ní li ben kí ye wà ke teh ná m̄on, yé uyonb bii wa yé yonb la, mim̄onm̄ nn̄o bo ne Yonbdaan li suu w̄o. <sup>9</sup> Iyonbe ya cenbaambe, ní'm̄o ní li teh ní'yonbe m̄onm̄onm̄, kí dàan liw̄obl, kí li ben kí ye ninbi nin ben ke te Cenbaa uba ne paaki bó. W̄on ña yíe uba ki cen' ut̄o.

### *Uwien de' Kristo yaab tijek̄onwent tà*

<sup>10</sup> N li len ná kí f̄ore si: li nuunh mèn ní'tuom̄ Yonbdaan saan ño u'tocienm̄ ní cère ní li faa. <sup>11</sup> Taa mèn Uwien dienh tijek̄onwent tà ke nn̄o ño kí li faa kí fre kí tuobe usenpol nin u'cekn̄ ya sen ke. <sup>12</sup> Na yé ti li t̄o nin unisaal ne lituol. Ama ti li t̄o lituol nin ná ñm̄obe ufaa ke ya bol nin ná ñm̄obe ticien̄t ke ya bol nin ná ñm̄obe mituom̄ ke ya bol ki ñuuke licin̄ñunl ya ñendun wuu n̄o nin isenpol yà te paaki bó nn̄o ne. <sup>13</sup> Nèn bo, taa mèn Uwien dienh tijek̄onwent tà ke nn̄o, ño uwenbiere ya daali ní fre kí t̄o m̄onm̄onm̄ kí ñe len, kí juore kí li se ki faa. <sup>14</sup> Nèn bo, bonde mèn kí sere, kí li p̄e tigbem̄ont bo. Tù yé ní'bo liningbenl ne ki co ní'ciek̄ ni, kí li p̄e im̄on bo. I yé ní'bo tijek̄onwent tà lèk̄ndeh ní'fèl bo ne. <sup>15</sup> Taa mèn tigbem̄onm̄ont ya t̄okm̄ kí tien ten ní'tacaan, kí cère ní'gben̄ent ní li ñaanh tu'tokm̄ bo. Tun ne cèreh unil ya yem̄ d̄o. <sup>16</sup> Li taah mèn mitek̄jim ki teh ten lipikl uyo ke. Ni li taa len ne kí fre kí kpiin usenpol ubier̄o ya pien yà teknh umu nn̄o, <sup>17</sup> kí cère ní'ñm̄erm̄ ní li yé ní'bo tikur ya kenpinl, kí li ñuuke \*Mifuoñaanm̄ ya jusiek, ní'tingi si: Uwien ya gber. <sup>18</sup> Li k̄aareh mèn uyo ke, kí cère \*Mifuoñaanm̄ ní li toreh ne ní'kaare nin ní'miebu ni isen ke ni. Nèn bo, la ḡoh mèn, kí li tuu ki k̄aareh ki dienh Uwien ya nib ke. <sup>19</sup> Li k̄aareh w̄o mèn ki dienh ní'm̄o, ño w̄o ní cère ní lá yàare ní'ñ̄obu la, ní bende n li len ma bo, kí de nni lifèl ní t̄oke binib tigbem̄onm̄ont tuu ya bonb̄olkaar ki la b̄ole t̄u. <sup>20</sup> N t̄okeh tun ne ki te lipèkl ni. Nèn bo, ní li k̄aareh, Uwien ní de nni lifèl, ní t̄oke binib tigbem̄onm̄ont nn̄o ya bonb̄olkaar, n bi li t̄oke be t̄u ma bo ki la b̄ole t̄u.

### *Ifuondf̄orke*

<sup>21</sup> N yíe ní'm̄o ní bende n te ma bo nin n teh ná ne. Ti'nin̄je Ticik wà n yíe w̄o u sòn̄h Yonbdaan ya tuonl m̄onm̄onm̄ nn̄o li t̄oke ne n'gber ke. <sup>22</sup> N sòn̄h w̄o ní'saan ná bo si: w̄o ní lá t̄oke ne ti'gber, kí saake ní'gben̄ent ne.

<sup>23</sup> Baa Uwien nin Yonbdaan \*Yesu Kristo ní de ninbi tí'yaab uyenduon, kí cère ní li yíe t̄ob, kí li ñm̄obe mitek̄jim. <sup>24</sup> Uwien ní juoke binib bà ke yíe tí'Yonbdaan \*Yesu Kristo miyiem̄ mà ña ñm̄obe bien̄ nn̄o.

## Kugbɔnku kùà Pɔl kɛle' ki de' Filip yaab nnɔ Nà wɔngeh kugbɔnku kuu te ma bo

Filip yé Maseduɔnn ya tinfɛnm ya du nɛ. Pɔl joh u'sɛn nle bo nɛ ki tɔke' Filip yaab tigbɛmɔnmɔnt.

Pɔl kɛle' kugbɔnku kuu ki wuɔn' ki wɔn nin Filip yaab yíe tɔb ki gbien'. Ní tete nɛ bi lá cuo' Pɔl ki pɛkn' Yonbdaan ya tuonl bo. U te lipɛkl ni ka rí fre kí tore Filip yaab ma nnɔ nɛ ní wi wɔ cɛɛn, kime u cii' binib biba nuunh bɛ rí tuln bɛ nɛ (1:15-17; 2:21; 3:2, 18). Pɔl sɔn' uba ni' bó wɔ rí tí tore bɛ kí cenge tigber nnɔ (2:19-30).

Pɔl faare' Filip yaab bi'pum bo, ki sure' bɛ, bɛ rí li ηuuke tigbɛmɔnmɔnt nnɔ tinɔjer tule, ki la cère uba rí tuln bɛ.

Yesu dɔan' u là ηmɔbe nà kɛ, nɛ Uwien taa' tibont kɛ ki ηukn' wɔ. Nnɔ nɛ Pɔl mɔ dɔan' nà kɛ là yé u'bo lifaal nnɔ (3:3-10), ki tuo' ki jèndeh Yesu Kristo bo, nɛ ki tɔke' bɛ ki ye bi'mɔ rí tɛkn u'taal ni (3:17; 4:9), kí li ηmɔbe uyensɔnge uyo kɛ, kí li kpɛ buñɔbu.

### *Ifuonde*

<sup>1</sup> Min Pɔl nin Timote yé \*Yesu Kristo ya tonsɔnb nɛ. Ti kieh kugbɔnku kuu tí de bà kɛ yé Uwien ya nib kí ñɛ \*Yesu Kristo bo, ki te Filip ya du ni nnɔ nin bà likeh Kristo ya taanl nin bi'totorb nɛ. <sup>2</sup> Ti'Baa Uwien nin Yonbdaan \*Yesu Kristo rí juoke nɛ, kí de nɛ uyenduɔn.

### *Pɔl kàareh ki dienh Filip yaab*

<sup>3</sup> Uyo wà kɛ n tiere' ni' bó la, n faareh n'Wien ni'bo nɛ. <sup>4</sup> N kàareh ki dienh ni'kɛ uyo wà kɛ la, n kàareh nin uyensɔnge nɛ. <sup>5</sup> Kime kí ñɛ lidaali là n baa' ni'saan kí lá tu dinnɔ, ni toreh nni nɛ n tɔkeh binib tigbɛmɔnmɔnt. <sup>6</sup> N du ki ye Uwien cin' lituonmɔnmɔnl là ni'ni nnɔ u li sɔn kí tí gben lè lidaali là \*Yesu Kristo li baa ní nnɔ nɛ.

<sup>7</sup> Ní kpɛ rí li ηmɔbe i ya yɛnmaale ni'kɛ bo, kime n'yɛnm pɛ ni'bo nɛ. Uwien juoke' min nin ninbi kɛ ma nnɔ nɛ cère' ni tore' nni fɛnfɛnnɔ wà n te lipɛkl ni nɔ nin uyo wà n là mɔh tigbɛmɔnmɔnt bo, ki nuunh binib rí tɔre kí teke tù kí jí nnɔ. <sup>8</sup> Imɔn, Uwien nɛ yé umɔnkunl ki ye n yíe ni'kɛ nin n'fèl kɛ. Kime n yíe nɛ tɛn \*Yesu Kristo yíe nɛ ma bo nɛ.

<sup>9</sup> N kàareh nà bo si: Uwien rí cère ni'yíem rí li yɛbreh ki joh ηɔ ni'nun bó rí li wendeh ní li bɛndeh tibont kɛ ya tingi mɔnmɔnm, <sup>10</sup> ηɔ kí sekn kí gènde nà mɔn. Nnɔ nɛ na rí li ηmɔbe jɔknt, ka rí li ηmɔbe biil mɔ lidaali là Kristo li baa ní nnɔ. <sup>11</sup> \*Yesu Kristo li cère ní li tuu ki teh nà cuube ηɔ Uwien rí li ηmɔbe ukpɛke nin kupɛnɛku.

### *Pɔl mɔh tigbɛmɔnmɔnt bo*

<sup>12</sup> N'yaabɛ, n yíe ní bɛnde kí ye nà tu' nni nɔ bo binib cii' tigbɛmɔnmɔnt ki yɛbe nɛ. <sup>13</sup> Nɛn bo, sojambɛ bà gu ubɛrcien den nin binitɔb kɛ bɛn ki ye Kristo bo nɛ n te lipɛkl ni. <sup>14</sup> N te lipɛkl ni ma nnɔ cère' Kristo yaab bà yɛbe du Yonbdaan bo ki gbien', ki laa' lifèl cɛɛn, ki tɔkeh binib Uwien ya gber ka fɛnge.

<sup>15</sup> Imɔn, bi'ni biba ηmɔbe n'bo iponponbe nɛ ki tɔkeh Kristo ya gber, ki nuunh bɛ rí li nieh nin nni. Ama bitɔb mɔ tɔkeh Kristo ya gber nin iyɛnmaalmɔnmɔn nɛ. <sup>16</sup> Bɛn wɔn, bi ηmɔbe miyíem nɛ ki teh nnɔ, kime bi bɛn ki ye n te lipɛkl ni rí mɔh tigbɛmɔnmɔnt bo nɛ. <sup>17</sup> Bitɔb nnɔ bɛn wɔn, bi nuunh bɛ rí wuɔn kí ye bi cɛn' nni nɛ ki tɔkeh Kristo ya gber. Bi'yɛnmaale ηa mɔn. Bi teh nnɔ ki nuunh n'jɛnd nɛ rí yɛbre lipɛkl ni. <sup>18</sup> Bi tɔkeh Kristo ya gber nin iyɛnmaalbiere bii bi tɔkeh tù nin iyɛnmaalmɔnmɔn nɛ la, n'baka ηa kpɛ len. Nin nɛn kɛ ηɔ bi'kɛ tɔkeh Kristo ya gber nɛ. Nɛn nɛ cère' n poknh, ki li tuu ki poknh. <sup>19</sup> Kime n bɛn ki ye nɛn nɛ li cère rí ñɛ len kí ñɛ ni kàareh ki dienh nni ma nnɔ nin \*Yesu Kristo

ya Fuoñaanm bo. <sup>20</sup> N gu nɛn nɛ nin inunmón, ki daan nè ní lí ní tien. N li tien nà kpɛ ní tien nè nɛ, kí li ñmábe lifɛl uyo wuu nɔ tɛn n là ñmábe lè ma bo uyo kɛ, kí cèrɛ n li kpo bii n li fuobe la, binib ní li kpiɛkreh Kristo n'bo. <sup>21</sup> Kimɛ min wɔn, n fuobe la, Kristo nɛ yé nibonmànn, n tí kpo' la, ní yé kpele nɛ n'bo. <sup>22</sup> Ama n li biɛ ki fuobe nɛ kí sɔn Uwien ya tuonl lè ní tore binib la, ma ji bɛn n li gènde nà. <sup>23</sup> Ní fike' nni nɛ. N bi yíe ní kpo kí li te nin Kristo nɛ. Nɛn nɛ tu. <sup>24</sup> Ama ninbi bo, n juore' ki fuobe nɛ la, ní mɔn. <sup>25</sup> Nɛn bo, n bɛn ki ye ma ní kpo, ní yé imànn nɛ. N li juore' kí li te nin ní'kɛ nɛ, kí li toreh nɛ ní'tekjim ní li joh inun bó, ní li ñmábe uyensɔnge, <sup>26</sup> ñɔ n tí liɛbe' ní ní'saan la, ní li jɛbnh ní'ba kí ñɛ \*Yesu Kristo cèrɛ' n sɔn' itùon yà ki de' nɛ nnɔ bo.

### *Li tuu ki cɛ mɛn limuɔl Kristo ya gbɛmɔnmɔnt bo*

<sup>27</sup> Ní te ma kɛ la, li fuobe mɛn binib ni Kristo ya gbɛmɔnmɔnt wɔkn' nɛ ma bo. Ní yé n fre' la, n li baa ní'saan. Ma tí baa la, ní cii ní'gbɛr kí ye ni pɛ mitekjim ya sɛn bo mɔnmɔnm, ki kpɛ buñɔbu, ki ñmábe iyɛnmaale iba, ki mɔh limuɔl liba mitekjim mà kpɛ tigbɛmɔnmɔnt ya sɛn nnɔ bo. <sup>28</sup> La sɛn mɛn ní'nɛnnɛndb jɛwaanbu. Nɛn nɛ li wuɔn bɛ kí ye bi joh mibolm nɛ, kí wuɔn ní'mɔ kí ye ni li ñmɛrɛ. Ní yé Uwien yaam nɛ. <sup>29</sup> Kimɛ Uwien ña juoke' nɛ ní teke Kristo kí ji baba nɛ, ama u juoke' nɛ ní jènde u'bo mɔ nɛ, <sup>30</sup> kí li mɔh limuɔl là ni là laa' n mɔn' lè u'bo, ki cii' n biɛ ki mɔh lè fɛnfɛnnɔ nnɔ.

## 2

### *Li jiiindeh mɛn ní'ba tingi tɛn Kristo*

<sup>1</sup> Kristo bo, ni ñmábe ugbenɛnsaake, u'yíem cèrɛh ni faakreh, \*u'Fuoñaanm cèrɛh ni kpɛ buñɔbu, ki ñmábe tinimànt, ki muɔh tɔb micɛɛckm ma nnɔ, <sup>2</sup> ní li kpɛ buñɔbu, kí li yíe tɔb, kí li tɛ iyɛnmaale, kí li pɛ usɛn uba bo ñɔ ní li ñmábe uyensɔnge kí tí gben. <sup>3</sup> La li ñmábe mɛn naniɛrku tɔb bo, ki la li wɔngɛh ní'ba. Na ñmábe kpele. Ama ní li jiiindeh ní'ba tingi, kí li bùh binitɔb tɛn bɛn nɛ cɛn' nɛ. <sup>4</sup> Uba la li nuunh u'tiɛma mɔnm, ama wɔ ní li nuunh bitɔb yaam. <sup>5</sup> Li ñmábe mɛn mi ya tetem nin ní'tɔb tɛn \*Yesu Kristo.

<sup>6</sup> Wɔn wà nin Uwien kɛ te miba nnɔ, wa cɛ ki ye wɔn nin Uwien ní li kpɛ.

<sup>7</sup> Ama u'yɛnm ni nɛ u dàan' tibont kɛ, ki ñmábe utonsɔnl ya tetem, ki tien' u'ba unisaal, unil kɛ laa' u yé unisaal.

<sup>8</sup> U jiiin' u'ba tingi, ki tuo' Uwien ya ñɔbu bó, haali ki tí kpo'.

U kpo' udɔpɔnpɔn bo nɛ.

<sup>9</sup> Nɛn bo nɛ Uwien kpian' wɔ ki tí gbien', ki de' wɔ liyel là cɛn' iyel kɛ,

<sup>10</sup> ñɔ bà te paaki bó nin bà te kitink bo nin bà te dɛntingi nnɔ kɛ cii' \*Yesu ya yel la, bɛ ní gbaan kí kpiɛke wɔ,

<sup>11</sup> ñɔ inibol kɛ ní len kí ye \*Yesu Kristo nɛ yé tibont kɛ ya Yonbdaan, kí kpiɛke tí'Baa Uwien.

### *Li yé mɛn kuwenwenku uñɛndun wuu ni*

<sup>12</sup> Nɛn bo, n'jɔtiebɛ, ni yé binib bà tuu ki ñmábe mibom nɛ. Ni la ñmábe bom uyo wà n te ní'saan baba, ama fɛnfɛnnɔ ma te ní'saan ma nɔ, li ñmábe mɛn mibom ki cɛn' uyo wà n te ní'saan. Tùɔrɛ mɛn kí li boh Uwien, kí li sɔnh itùon yà wɔngɛh ki teh ni ñmɛrɛ' nnɔ kí tí gben. <sup>13</sup> Kimɛ wɔn Uwien nɛ sɔnh ní'ni, ki cèrɛh ni yíe u yíe nà, ki liɛbe' ki cèrɛh ni teh nè mɔ.

<sup>14</sup> Li teh men tibont ke ki la ηulnh, ki la findeh nin tɔb mɔ, <sup>15</sup> ηɔ kɪ li yé binib bà ηa ηmɔbe biil, ka ηmɔbe jɔknt, kɪ li yé Uwien ya bumu mùa mɔn ki tɪ gben' binib bà ηa cuube, ka kpe sen ya siik ni, ki li te ten kuwenwenku kɪ wendeh unɛndun, <sup>16</sup> kɪ li tɔkeh be tigber tɔ dienh limiel. Nnɔ ne ninbi bo n li jebn n'ba lidaali là Kristo li baa ní nnɔ, kime n sɔn' lituonl là nin inunmɔn nnɔ ηa juore' fɛnm.

<sup>17</sup> Ni'tekjim yé lituɔrl ne ki de' Uwien. Nba la, bi li ku nni. Bi ku' nni la, n'sèm mɔ li tien lituɔrl ne kɪ pukn ni'yaal bó. Ni te nnɔ la, n ηmɔbe uyensɔnge ne ki poknh nin ni'ke. <sup>18</sup> Nen bo, ni'mɔ ní li ηmɔbe uyensɔnge kɪ li poknh nin nni.

### *Pɔlye wɔ ní sɔn Timote nin Epafrodit*

<sup>19</sup> N daan ki ye Yonbdaan \*Yesu de' usen la, n li sɔn Timote ni'saan itaan yiɛ bo, wɔ ní tɪ cenge ni'gber, kɪ lá tɔke nni ηɔ n'yɛnm ní duɔn. <sup>20</sup> Kime wɔn ηa ní la, ma ηmɔbe min nin wà maaleh ni'bó. Nil ηa te ki cinbe ki tɔnge ni'gber. <sup>21</sup> Bitɔb ke nuunh bi'tiema mɔnm ne, ba tɔnge \*Yesu Kristo ya tuonl. <sup>22</sup> Ama Timote wɔn, ni ben wɔ, ki laa' u sɔn' ma bo. U sɔnh nin nni tigbemɔnmɔnt ya sen ni ten kibuk sɔnh nin ki'baa ma bo ne. <sup>23</sup> Nen bo, n tɪ laa' n'gber ya donbó la, n daan ní pɔk kɪ sɔn wɔn ne ni'saan. <sup>24</sup> N du Yonbdaan bo ki ye min nin n'yul li baa ni'saan na ní taande. <sup>25</sup> Ama n maale' ki ye ní kpe ní cère ti'ninje Epafrodit ní liebe ni'saan ne. U yé min nin wà te ki sɔnh, ki te ki mɔh limuɔl liba ne, ki yé unil wà ni sɔn' wɔ, wɔ ní lá de nni nà pɔre' nni. <sup>26</sup> U'nun mɔn wɔ ní tɪ ní le ni'ke ama u'yɛnm saa' ní tɪ kende', kime ni cii' u'wɛn bó. <sup>27</sup> Imɔn, u bunge' ki tɪ benh wɔ ní kpo ne, ama Uwien muɔ' wɔ micɛɛkm. Na yé u muɔ' wɔn baba ne micɛɛkm, u muɔ' n'mɔ ne ηɔ n'yensaa la yebre kɪ pukn. <sup>28</sup> Nen bo ne n teh tontonm ní cère wɔ ní liebe ni'saan, ní tɪ ní tɪ le wɔ ni'yɛnm ní sɔnge ηɔ n'bugben ya yɛnm ní duɔn waamu. <sup>29</sup> Nen bo, teke wɔ men nin uyensɔngcien, kime u yé Yonbdaan yɔ ne. Li selndeh men binib bà ke te ten wɔn. <sup>30</sup> Kime Kristo ya tuonl bo ne u là sien' waamu wɔ ní kpo. Wa là jie u'miel, ne ki sɔn' nni lituonl là ninbi nin ni'yul ηa bi li fre kɪ sɔn nni lè nnɔ.

## 3

### *Nà li cère unil ní li cuube Uwien ya nun bó*

<sup>1</sup> Tɔ, n'yaabe, li poknh men Yonbdaan bo. Ni yé ní liebe kɪ kele ne n là kpiɛ' kɪ kele' ne nà nnɔ ne la, na ηaابه n'yɛnm, kime nen ne li cère ní ñe kinunbɔnk ni. <sup>2</sup> Liike men ni'yul bo nin bitonsɔnbierb; i ya sengbele jeh ki bungreh i'ba ne ki yih nè upunje. <sup>3</sup> Tinbi ya punje ne yé upunjemɔn, kime \*Uwien ya Fuoñaanm ne cèreh ti pukeh wɔ, ki jebnh ti'ba \*Yesu Kristo bo, ka du ti'tiema tuɔm bo. <sup>4</sup> Nin nen ke ηɔ min ηmɔbe usen ní li du n'tiema tuɔm bo. Unil ye u ηmɔbe usen wɔ ní li du u'tiema tuɔm bo la, n ηmɔbe usen ki cɛn' wɔ. <sup>5</sup> Bi maa' nni, wienniin daali ne bi jie' n'punl. N yé Israyel ya bol ya nil ne, ki yé Bensamen ya yaabil. N'baambe ke yé Ebrembe ne. Yiko ya sen ni wɔn, n yé \*Farisienmbe ya cekl yɔ ne ki pe u'bo mɔnmɔnm. <sup>6</sup> N'tuon ya sɔnm ni, n'nun là mɔn ní jènde Kristo ya taanl yaab ne. Yiko ya sen ni mɔ la, ma là ηmɔbe biil yiko uba bo.

<sup>7</sup> N là maaleh ki teh nen ke yé n'bo kpele ne. Ama Kristo bo n laa' ní yé fɛnm ne. <sup>8</sup> Imɔn ne, n yin' nibonn ke fɛnm kime n bende' \*Yesu Kristo n'Yonbdaan ma nnɔ, nen ne cɛn' nibonn ke. Wɔn bo ne n daan' nibonn ke, ki ye ni'ke yé tibint ηɔ ní li yé wɔn Kristo yɔ ne, <sup>9</sup> kɪ li te nin wɔ kɪ tɪ gben. Na yé n pe \*yiko bo ma nnɔ ne ki yé ugbemɔndaan. N teke' Kristo ki jin' ma nnɔ, ne ki yé ugbemɔndaan. Uwien bùh binib bigbemɔndenb kɪ ñe mitekjim bo ne. <sup>10</sup> N yie nibonbaabn nà si: ní li ben Kristo ne, kɪ li ben u mekrm ya tuɔm, kɪ taan nin wɔ u'jend ni, kɪ tɪ kpo ten wɔn, <sup>11</sup> ηɔ kɪ li daan ki ye n'mɔ li mekre bitenkpiib ni.

### *Pɔl tiinh kɪ cuube lisuul ya bùol*

<sup>12</sup> Na yé n ye n baa' lisuul nnɔ ya bùol ηɔ ne, ka yé n ye n yé wà niba ηa ji pɔre' wɔ ne. Ama n mɔndeh ki tiinh ní nènde lè ne, kime \*Yesu Kristo ne cuo' nni ki tien' u'yɔ. <sup>13</sup> N'yaabe, ma ye min nènde' lisuul nnɔ ηɔ ne. N'nun mɔn nibonn nà bo si: ní sunde nà tien' n'puoli bó

ne, kí li bə minənm bo ki joh inun bó. <sup>14</sup>N tiinh ki cuube lisuul ya bùol ne, ɲə \*Yesu Kristo bo ní le Uwien yin' te wə ní de te lisuul là paaki bó nnə. <sup>15</sup>Tinbi bà ke tien' binicekrkaab mitekjim ya sen ni nnə, cère men tí li maaleh nnə. Ni tí ɲməbe iyennaale i'ba i bore' nin yii la, Uwien li wuən ne i'tingi. <sup>16</sup>Ni te ma ke la, cère men tí li tuu ki kpe usen wà ti li là kpe wù ki lá baa' fənfənnə nə.

<sup>17</sup>N'yaabe, ni'ke ní tekni n'taal ni, kí li tùreɲeh ki sekndeh binib bà teh ti là wuən' ne ki ye ní li teh ma bo nnə. <sup>18</sup>Kimε n là kpiε' ki təkε' ne ɲə, ki tí təkεh ne fənfənnə wuə nin tinunsiir ki teh binib bà yebe ne ɲməbe mitetem mà cère' bi yih Kristo ya kuum udəpənpən bo fənm. <sup>19</sup>Bi li tí fəre kí juore fənm ne. Bi' bent ne yé bi' Wien. Bi jəbni bi'ba bi'fε ya tūon bo ne. Bi'yennaale ke pε uɲendun ya bont bo ne. <sup>20</sup>Tinbi wən, ti yé paaki bó yaab ne. Nən bo ne ti gu nin inunmón lidaali là Yonbdaan \*Yesu Kristo ti'Nmiɛnl li ɲε ni' bó kí baa ní, <sup>21</sup>kí ləbre ti'gbenent tà ɲa ɲməbe sel nnə kí nenge u'yaar tà ɲməbe ukpiεke nnə, kimε u ɲməbe mituəm wə ní cère tibont ke ní tuo u'ɲəbu bó.

## 4

<sup>1</sup>Nən bo, n'yaabe, n yíe ne ne, ki dəkni' ne cəen. Ninbi ne yé n'bo n'yensonge, ki yé n'bo lisuul là bi dienɲ lè wà mən' ki faake'. Tùre men kí li pε Yonbdaan ya sen bo nnə.

### *Igbiere*

<sup>2</sup>Efodi nin Səntik, n sureh ne nibonn nà bo si: Yonbdaan bo ní li lienɲ ki ciɲ təb bó. <sup>3</sup>Sin n'tonsəntə, uməməndaan, n gbáanh ɲε ne, á tore be kimε bi yé bipiib bà nin Kleman nin n'tonsəntəb là mənɲde' ki tore' nni tigbəmənəmənɲ ya təkni ni ne. Uwien kele' bi'yel limiɛl ya gbənkni ni ɲə.

<sup>4</sup>Yonbdaan bo, li pokni men uyo ke. N liεbe' ki təkεh ne ne, li pokni men. <sup>5</sup>Li ɲme men nin binib ke. Yonbdaan ya babaadaali nekn' ní ɲə. <sup>6</sup>La cère men iyennaale ní li wiεbe ne niba bo, ama ní li kàareh isen ke ni, kí li gbáanh Uwien, kí li faareh wə, kí li miεh wə nà pəre' ne. <sup>7</sup>Nnə ne Uwien ya yenduən wà cən' unisaal ya bənm ke nnə, li de ne lifəsəngl, kí cère ni'yenn ní li də kí ɲε \*Yesu Kristo bo.

<sup>8</sup>Tə, n'yaabe, cère men ni'nun ní li mən nà ke yé nibonmən nin nà ke kpe be ní li boh ne nin nà ke cuube nin nà ke ɲa ɲməbe jəknt nin nà ke kpe be ní li yíe nɛ nin nà ke ɲməbe lisel nin nà mən ki tí gben' ki ɲməbe kupənpəku bo. <sup>9</sup>Li teh men ni benge' nà n'saan, ki ci' nɛ, ki teke' nɛ, ki laa' n teh nɛ nnə, ɲə Uwien uyenduən ya daan ní li te nin ne.

### *Pəl faareh Filip yaab bi'pum bo*

<sup>10</sup>N ɲməbe uyensonge Yonbdaan bo ki gbien', kimε ni ji fre' ki wuən' ki ye ni tien n' bó. Ni li là tien n' bó ne, ama na là laa' sen ne ní wuən kí ye ni tien n' bó. <sup>11</sup>Nà yé n te tijiint ni ne cère' n lienɲ nnə, kimε n benge' n li fuobe ma bo isen ke ni. <sup>12</sup>N bən n li fuobe ma bo tijiint ni bii ligbəl ni. N benge' uyo ke, n li fuobe ma bo isen ke ni. N jinh ki gbuokeh bii n te mikənm la, n ɲməbe ki gbien' bii n ɲməbe waamu la, n bən ní li tien ma. <sup>13</sup>Kí ɲε Kristo wà dienɲ nni mituəm nnə bo ne n li fre kí tien ni'ke.

<sup>14</sup>Nin nən ke, ni tore' nni n'jend ni ma nnə, ni tien' ni mən ne. <sup>15</sup>Ninbi Filip yaab mənən bən ki ye uyo wà n là siereh Maseduənn ya tinfənm ni nnə, ninbi baba ɲa ní la, Kristo ya taanl liba mənən ɲa là ɲen' ni'ba ki tore' nni. N là cin' u ya yo ne ki təkεh binib Kristo ya gbəmənəmənɲ mitinfənm nnə ni. <sup>16</sup>N là te Tesalonik ya du ni uyo wà nnə, ni là nɛkn' nni nà pəre' nni ni gəbre' bolm miba. <sup>17</sup>Na yé n nuunh mipum baba ne; ama n nuunh ni'pum nnə bo, Uwien ní cère ní le mimənm kí gbien ne.

<sup>18</sup>Ni de' nni nà nnə, ni'ke kən' n'nuə ni. Ní yebe ki cən' n là ciεke nà mənən. Ni sən' Epafrodit wə ní lá de nni nà nnə, n laa' nɛ, ne ki ji ɲməbe ki gbien'. Ni'pum nnə te ten lituərl là mən li'nu ɲme, Uwien teke' lè, u'yenn sange li'bo ne. <sup>19</sup>N'Wien ɲməbe ukpiεke, ki ɲməbe lifaal ki gbien' ma nnə, \*Yesu Kristo bo, u li de ne nà ke pəre' ne. <sup>20</sup>Cère men tí piεke ti'Baa Uwien uyo wà ɲa ɲməbe gbenm. Ami.

*Ifuondfərke*

<sup>21</sup> Ní fuonde binib bà ke yé Uwien yaab kí ñε \*Yesu Kristo bo nnə jεjε kí de nni. Kristo yaab bà te n'saan nnə mə fuondeh nε.

<sup>22</sup> Uwien ya nib ke fuondeh nε. Uɛrcien Sesa ya tonsənb bà yé Uwien ya nib nnə tūəreh ki fuondeh nε. <sup>23</sup> Yonbdaan \*Yesu Kristo ní juoke nε.

## Kugbɔnku kùà Pɔl kɛle' ki de'

### Kolɔs yaab nnɔ

## Nà wɔngeh kugbɔnku kuu te ma bo

Kolɔs yé Asi ya tinfɛnm ya duciɛn uba nɛ. Ní naan Pɔl nin u'yul ɲa jon' ni'ból. U'tonsɔntɔ Epafas nɛ cin' ki tɔke' ni'ból Yesu ya gɛɛr (1:7; 4:12).

Pɔl cii' bitonnɛndɛnb biba wɔknh Kolɔs yaab miwɔknm mà ɲa kpe sɛn ki tɔkeh bɛ ki teh bi li paan iyaajɛbok bo nɛ kí ɲmɛrɛ. U te lipɛkl ni ka ń fre kí jo ni'ból ma nnɔ nɛ ki kɛle' kugbɔnku kuu nɔ ki de' bɛ.

Kí cin liyul 1:1 kí tí baa 2:5 Pɔl wuɔn' ki ye Yesu Kristo nɛ ɲmɔbe mituɔm tibont kɛ bo, ki yé u'taanl ya yul. Wɔn nɛ kpe bɛ ń li pukeh wɔ.

Kí cin iyul 2:6 kí tí baa iyul 2:23 Pɔl tɔkeh Kolɔs yaab ki teh bɛ ń liike bi'yul bo, ki la li cengeh binib bà wɔknh miwɔknm mà ɲa kpe sɛn nnɔ ya gɛɛr, ama bɛ ń li co bi ɲmɔbe mitekjim mà nnɔ kenken.

Kí cin iyul 3 kí tí baa 4:6 Pɔl tɔkeh bɛ bi li fuobe ma bo itáan ni nin idencɛn ni nin binitɔb nɛ. U tí fɔrɛ' kugbɔnku kuu nɔ nin ifuonde nɛ (4:7-18).

### *Ifuonde*

<sup>1</sup> Min Pɔl, n yé \*Yesu Kristo ya tond nɛ Uwien ya yíem bo. Min nin ti'ninje Timote nɛ kieh kugbɔnku kuu tí de <sup>2</sup> ninbi ti'yaab bà te Kolɔs ya du ni ki yé Uwien yaab ki du Kristo bo nnɔ. Ti'Baa Uwien ń juoke nɛ, kí de nɛ uyɛnduɔn.

### *Pɔl faareh Uwien Kolɔs yaab bo*

<sup>3</sup> Uyo wà kɛ ti kàareh ti'Yonbdaan \*Yesu Kristo ya Baa Uwien ki dienh nɛ la, ti tuu ki faareh wɔ ni'bo nɛ; <sup>4</sup> kimɛ ti cii' ni tùɔrɛ' ki teke' \*Yesu Kristo ki jin', ki tùɔrɛ' ki yíe Uwien ya nib kɛ <sup>5</sup> kí ńɛ lidɛndɛnl là Uwien ble' lè paaki bó ki gu nɛ nnɔ bo. Ni cii' lidɛndɛnl nnɔ bó lidaali là bi cinde' ki tɔke' nɛ tigbɛmɔnmɔnt tà yé tigbɛmɔnt nnɔ nɛ. <sup>6</sup> Bi tɔke' nɛ tigbɛmɔnmɔnt nnɔ ma bo nnɔ, bi tɔke' tù nnɔ nɛ uɲɛndun ni ni'ke saan, tù cèreh binib teknh \*Yesu ki jinh ki yɛbreh ki joh, ki teh nà mɔn. Tù là tien' ni'mɔ nnɔ nɛ, lidaali là ni cinde' ki cii' Uwien ya juokm ya gɛɛr ki bɛnde' tù mɔnmɔnm nnɔ. <sup>7</sup> Ti'jɔ nin ti'tonsɔntɔ Epafa nɛ wɔkn' nɛ. U yé ni'bo Kristo ya tonsɔnl wà ti du u'bo nɛ. <sup>8</sup> U tɔke' tɛ \*Mifuoñaanm cèreh ni yíe tɔb ma bo.

<sup>9</sup> Nɛn bo nɛ haali nin lidaali là ti tí cii' ni'gɛɛr nnɔ, ti kàareh ki dienh nɛ ka pieh, ki gbáanh Uwien wɔ ń cère u'Fuoñaanm ń de nɛ miyɛnfuom nin mibɛnm isɛn kɛ ni, ɲɔ ní bɛnde u yíe nà kí tí ghen. <sup>10</sup> Nnɔ nɛ ni li ɲmɔbe mitetem mà selndeh Yonbdaan, ki li teh nà kɛ sɔnge u'yɛnm, ki li sɔnh itùonmɔnmɔn kɛ ya bol, ki li tùɔrɛh ki bɛndeh Uwien mɔ ki pukndeh. <sup>11</sup> Ti gbáanh wɔ ki teh u'tuɔm mà ɲmɔbe ukpieke nnɔ ń cère ni'mɔ ń lɛ mituɔm kí li faa isɛn kɛ ni, kí li ńikndeh, kí li ɲmɔbe kuminku mibiikm mà kɛ li tu nɛ ni. <sup>12</sup> Li faareh mɛn Baa Uwien nin uyɛnsɔnge, kimɛ u tien' nɛ binib bà kpe bɛ ń lɛ bi ya bó u bonde' mimɔnm mà u'bɛl là yé kuwenwenku ni ki ble' bà yé u'yaab nnɔ. <sup>13</sup> Wɔn nɛ fie' tɛ licinñunl ya tuɔm saan, ki nɛbre' tɛ ki jon' u'Bije wà u yíe wɔ ya bɛl ni. <sup>14</sup> U'Bije nnɔ nɛ de' tɛ ki wie', ki cère' u fère' tɛ ti'biere.

### *Iyuoŋ yà dondeh Kristo*

<sup>15</sup> U yé Uwien wà ba lenh wɔ ya nɛnnɛnku nɛ, ki te ki laa' uɲɛndun ɲa laan te,

<sup>16</sup> Uwien cère' wɔn nɛ ńɛn' tibont kɛ, kutaaku bo yaar nin kitink bo yaar,



bi lenh tà nin ba lenh tà,  
Tibont tà ke te kutaaku bo ki ηmɔbe mituɔm ke ya bol,  
nin tà ke ηmɔbe ticiɛnt ke ya bol,  
Uwien cère' wɔn nɛ ñɛn' tu'ke,  
nɛ tu'ke mɔ yé u'yaar nɛ.

<sup>17</sup> U te ki laa' tibont ke ηa laan te,  
wɔn nɛ cère' tibont ke te tu'bùol.

<sup>18</sup> Wɔn nɛ yé u'taanl ya yul,  
nɛ u'taanl yé u'gbɛnɛnt,  
Wɔn nɛ yé micincinm,  
ki yé wà kpiɛ' ki mɛkre' bitɛnkpiib ni,  
ηɔ wɔ ñ li yé usɛnlier isɛn ke ni.

<sup>19</sup> Kimɛ Uwien ya yíem bo nɛ wɔn nin u'yul te u'Bijɛ ni ki tĩ gben',

<sup>20</sup> ki cère' u'Bijɛ bugbɛn bo,  
wɔn nin uηɛndun taan' buñɔbu,  
ηɔ ni'ke ñ li yé u'Bijɛ yann,  
u'Bijɛ ya sɛm mà ñɛn' ki wule' udɔpɔnɔn bo nnɔ bo nɛ,  
u cère' uñɔkpaan te kitink nin kutaaku bo.

<sup>21</sup> Uyo uba ni'mɔ là yé binib bà jɛnde' Uwien nɛ, ki yé u'nɛnnɛndb kí ñɛ ni là ηmɔbe iyɛnmaale yà ì cèreh ni teh nà bre nnɔ bo. <sup>22</sup> Ama fɛnfɛnnɔ Uwien cère' ninbi nin wɔn taan' buñɔbu kí ñɛ u'Bijɛ tien' u'ba unisaal ma ki tuo' ki kpo' nnɔ bo. Uwien tien' nnɔ ηɔ ní fre kí sere u'nun bó, kí li yé u'yaab, ki la ηmɔbe jɔknt, ki la li ηmɔbe biil mɔ nɛ. <sup>23</sup> Ama ní li faa mitekjim ni, kí li co kenken. Ni là cii' tigbɛmɔnmɔnt ma nnɔ, tù cère' ni ηmɔbe lidɛndɛnl nɛ. Ni la wiɛ lidɛndɛnl nnɔ. Bi kpaande' tù utingbɛn bo ya nib ke saan nɛ. Nɛ min Pɔl ya tuonl si: ñ kpaande tu ya gbɛmɔnmɔnt nɛ.

### *Pɔl mɔh ki toreh Kristo ya taanl*

<sup>24</sup> Fɛnfɛnnɔ n jinh ijɛnd yà ni'bo nɔ n'yɛnm sɔnge nɛ; kimɛ Kristo là jin' ijɛnd yà nnɔ, n'mɔ tùkre' i ya jɛnd nɛ ki jɛndeh u'taanl là yé u'gbɛnɛnt nnɔ bo. <sup>25</sup> N yé litaanl nnɔ ya tonsɔnl ηɔ ninbi bo, Uwien de' nni lituonl là nnɔ ñ sɔn lè nɛ. Lɛn si: ñ tɔke nɛ Uwien ya gber kí tĩ fɔre. <sup>26</sup> Tù yé tigbɛbɔlkaar tà Uwien là bɔle' tù uyo bo yaab nɛ. Nɛ fɛnfɛnnɔ u kpiire' tù ki tɔke' u'yaab. <sup>27</sup> U yíe bɛ ñ bɛnde tigbɛbɔlkaar nnɔ yé lifaal ki tĩ kpe ma bo nɛ, ki ηmɔbe ukpiɛke bà ηa yé \*Sufmbɛ ni. Ni'tingi si: Kristo te ni'siik ni ma nnɔ, ni ηmɔbe lidɛndɛnl ki ye ni li lɛ Uwien ya kpiɛke. <sup>28</sup> Ti tɔkeh wɔn Kristo ya gber nɛ, ki gbierɛh unil ke, ki taah miyɛnfuom ke ya bol ki wɔknh unil ke ηɔ unil ke ñ li mɔn Kristo ya sɛn ni kí tĩ gben. <sup>29</sup> Nɛn bo nɛ n sɔnh lituonl. Kristo ya tuɔm mà te n'gbɛn ni ki ñaanh nnɔ nɛ cèreh n mɔh lituonl bugbɛn bo nin inunmɔn.

## 2

<sup>1</sup> Imɔn, n yíe ní bɛnde n mɔh limuɔl là ya tunbu nin inunmɔn ninbi nin Lawodise yaab nin binitɔb bà ke ηa laan laa' nni nin bi'nunbu bo nɛ. <sup>2</sup> N teh nnɔ ηɔ bi'fèl ñ li co, bɛ ñ li kpe buñɔbu, kí li yíe tɔb, kí li ηmɔbe mibɛnm kí tĩ gben nɛ. Mibɛnm nnɔ nɛ li cère bɛ ñ bɛnde Uwien ya bonbɔlkaann. Nɛn si: Kristo bugbɛn. <sup>3</sup> Miyɛnfuom nin mibɛnm ηmɔbe lifaal là ke nnɔ buɔ wɔn saan nɛ.

<sup>4</sup> N tɔkeh nɛ nɛn ηɔ uba là taa ñɔηmaagber tuba kí lɛre nɛ nɛ. <sup>5</sup> Kimɛ nin ma te ni'ni ma ke nnɔ, n tuu ki maaleh ni'bó nɛ. N'yɛnm sɔnge ni'bo, kimɛ n laa' tibont ke te tu'donbó nɛ ni'bùol, ki laa' ni du Kristo bo nin ni'fèl ke.

### *Kristo nɛ dienh limiɛl*

<sup>6</sup> Ni teke' ki ye \*Yesu Kristo nɛ yé Yonbdaan ma nnɔ, li pɛ mɛn u'sɛn bo. <sup>7</sup> Tùɔre mɛn kí tɛbn wɔ, kí cère ni'miɛl ñ li juɔn u'bo. Li faa mɛn mitekjim ni tɛn bi là wɔkn' nɛ ma bo, kí li faareh Uwien yo ke yo. <sup>8</sup> Li bɛn mɛn, ki la cère uba ñ dɛle kí cuo nɛ nin tinisaalyɛnfogber.

Tù yé gbefɛnm nɛ, ki yé kutonnɛnku mɔ, ki ñɛn' unisaal ya yaajɛbok nin isɛnpol yà ŋuuke unɛndun wuu nɔ saan, ta ñɛn' Kristo saan. <sup>9</sup> Kimɛ Uwien nin u'yul te wɔn Kristo ni nɛ ki tɪ gben'. <sup>10</sup> Ninbi nin wɔn Kristo taan' ki tien' unibaab ma nnɔ nɛ ni laa' mimɔnm kɛ ki tɪ gben'. Wɔn nɛ cɛn' nà kɛ ŋmɔbe mituɔm nin ticiɛnt kɛ ya bol.

<sup>11</sup> Ninbi nin wɔn taan' ki tien' unibaab ma nnɔ, nɪ te tɛn ni jɪɛ' ni'pun nɛ. Upunjiɛ nnɔ ŋa yé nisaal jɛh ipun ma bo, ama u ñɛn' Kristo saan nɛ ki gbendeh minisaaltetem mà cèreh unil teh ibiere nnɔ ya gbɛr. <sup>12</sup> Bi sɪi' nɛ Uwien ya ñunm ma nnɔ nɪ wuɔn' ki ye bi taan' ki sube' ninbi nin Kristo nɛ, nɛ ninbi nin wɔn taan' ki mɛkre' mɔ, kimɛ ni teke' Uwien ya tuɔm mà cère' u mɛkre' bitɛnkpiib ni nnɔ ki jin'. <sup>13</sup> Ni là te tɛn bitɛnkpiib nɛ Uwien ya nun bó, kimɛ ni là teh ibiere nɛ, ka yé u'nib\* mɔ. Ama u cère' ni liɛbe' ki fuobe nin Kristo, ki fère' tɛ ti'biere kɛ. <sup>14</sup> U ŋmire' tigbɛr tà bi là kɛle' tù kugbɔnku ni tù biindeh tɛ, ka cendeh nin ti'fuobm kí ñɛ tù ble' iwɔb yà nnɔ bo; ki gben' kugbɔnku nnɔ ya gbɛr Kristo ya dɔpɔnpɔn bo.

<sup>15</sup> Kristo fie' nà kɛ ŋmɔbe mituɔm nin ticiɛnt kɛ ya bol ya jɛkɔnwɛnt, ki jin' nè ifɛ binib kɛ ya nun bó, ki tuke ni'kɛ ki lindeh wɔ ní wuɔn kí ye udɔpɔnpɔn nɛ cère' u mɔn' ki faake'.

<sup>16</sup> Nɛn bo, la cère mɛn uba ní kùɔn nɛ kí ye ni la ji niɛ, ki la ñu niɛ, ki la cère uba ní wɔbn nɛ libinl ya nacent nin unmaafaan ya nacenku nin \*Saba ya daali ya gbɛr bo. <sup>17</sup> Tu ya bont yé nà li baa ní ya jinjinku nɛ, ama Kristo bugbɛn nɛ yé nibonmɔnn. <sup>18</sup> La cère mɛn bà bɔndeh binib ya nun bó ki teh bi yé binib bà dinge, ki pukeh Uwien ya tondb nnɔ ní juon nɛ puoli. Bi lienh ki teh bi lenh tibont tidɛknt yaam, nɛ ki ŋmɔbe inisaalyɛnmaale, ki teh tinacenkenkuont. <sup>19</sup> Ba tuuke Kristo bo. Ama u'mɔ nɛ yé liyul. Liyul nɛ jindeh tigbɛnɛnt kɛ, ki cèreh tigbɛnɛnt ya bont tuuke tu'tar bo ijire coco tù, nɛ Uwien cèreh tù kpɪɛnh u yíe ma bo.

<sup>20</sup> Ni taan' ki kpo' nin Kristo nɛ ki ñɛn' isɛnpol yà ŋuuke unɛndun wuu ya nuɔ ni. Nɛn bo, bɛ tien' ni biɛ ki cèreh bi wɔbndeh ki diɛnh nɛ i ya kùɔn tɛn unɛndun nɛ cère' ni fuobe? <sup>21</sup> Bɛ tien' ni cèreh bi kùɔndeh nɛ ki teh: la taa mɛn niɛ, ki la lèn niɛ, ki la mɛ niɛ. <sup>22</sup> Nɛn kɛ yé iwɔb yà te ki de' tibont tà binib jin' tù ki tɪ gben' la, ta ji ŋmɔbe kpɛle nɛ. Unisaal nɛ ñɛn' i ya wɔb ki wɔknh yè binib. <sup>23</sup> Iwɔb bugbɛn ya gbɛr te tɛn miyɛnfuom nɛ ka ji yé yɛnfuom. I tɔkeh unil ya yɛnm yíe wɔ ní li pukeh nà ya gbɛr nɛ, ki cèreh binib teh tɛn bi jindeh bi'ba tingi, ki jèndeh bi'ba. Iwɔb nnɔ ŋa yé bonn, ì toreh unisaal wɔ ní li teh u'yɛnm yíe nà baba nɛ.

### 3

#### *Li nuunh mɛn tibont tà yé Uwien jaar*

<sup>1</sup> Ni taan' ki mɛkre' nin Kristo ma nnɔ, li nuunh mɛn paaki bó ya bont Kristo kɛ nà saan Uwien ya jie bó nnɔ. <sup>2</sup> Cère mɛn ni'yɛnmaale ní li pɛ tibont tà te paaki bó bo, ki la tɔnge tingi ni jaar. <sup>3</sup> Kimɛ ni kpo' nɛ ni'miel buɔ Kristo saan, nɛ Kristo mɔ buɔ Uwien saan. <sup>4</sup> Kristo nɛ yé ni'miel. U lá li ñɛn u'ba upaan bo uyo wà nnɔ ni'mɔ li taan nin wɔ kí ñɛ upaan bo, kí lɛ u'kpɪɛke.

#### *Mitetekpaam nin mitetefɛnm ya gbɛr*

<sup>5</sup> Sii ki subn mɛn tibont tà te ni'fuobm ni ki yé kitink bo jaar nnɔ. Tun si: lisɔnsɔndl nin linaŋmaal nin ujɛnniɛke nin iyɛnmaalbiere nin ununfɔke lifaaciɛnl bo. Lifaaciɛnl yé unil bo ibule nɛ. <sup>6</sup> Nɛn nɛ cèreh Uwien ya benku ni beh bà ŋa ciɪh u'ñɔbu bó nnɔ bo. <sup>7</sup> Uyo wà ni là teh i ya biere nnɔ, ni'mɔ là ŋmɔbe mi ya tetem nɛ. <sup>8</sup> Ama fɛnfɛnnɔ, ni'mɔ ní wiɛ tibont tuu kɛ. Tun si: ubɛnpiɛbe nin tijɛr nin mibiɛrm nin isuk nin iñɔbonbil yà ñɛh ni'ñuɔn ni nnɔ. <sup>9</sup> La tɔkeh mɛn tɔb tonnɛngbɛr. Ni gben' ni'tetekpaam nin mɪ là cèreh ni teh tibont tà kɛ nnɔ ya gbɛr, <sup>10</sup> nɛ ki taa' mitetefɛnm, ki ji yé binifɛnb. Uwien nɛ cèreh ni tuu ki fɛndeh ki joh, ki nɛngreh wɔn wà ñɛn' nɛ nnɔ. Nnɔ nɛ ni li tùɔre kí bɛnde wɔ. <sup>11</sup> Nɛn bo, na ji

\* **2:13** Bi lebre' liñɔbonl là ki ye ka yé u'nib nnɔ; li kɛle' Grɛkmbɛ ya lenm ni ki ye: Ni là yé binib bà ŋa jie' pun nɛ.

ημῶβε wuɔ yé Suf nε wuɔ ηα yé Suf, ka ji ημῶβε wuɔ yé wà jiε' u'punl nε wuɔ yé wà ηα jiε' u'punl, ka ji ημῶβε wuɔ yé ucaan nε wuɔ yé wà ya nun ηα wien, ka ji ημῶβε wuɔ yé uyonb nε wuɔ ηα yé yonb. Ama Kristo nε yé ni'bo nibonn κε ki te unil κε ni.

<sup>12</sup> Uwien nε gènde' nε ki tien' nε u'yaab, ki yíe nε. Nεn bo, cère mεn ni'nun rí li mόν tinimònt bo, kí li muɔh tɔb micεεεkm, kí li jiindeh ni'ba tingi, kí li ημε nin tɔb, kí li ημῶβε liyenguol, <sup>13</sup> kí li ημῶβε sukle tɔb bo. Uba kɔnh nin u'tɔ nibonn niba bo la, bε rí li fèreh tɔb. Yonbdaan fère' nε ma nnɔ ni'mɔ rí li fèreh tɔb. <sup>14</sup> Ni li tùɔreh ki teh nà si: ní li yíe tɔb nε, kimε miyíem nε cèreh binib tùɔreh ki te uñɔkpaan ni. <sup>15</sup> Kristo ya yenduɔn rí li te ni'fèl ni ki pekreh nε. U ya yenduɔn bo nε Uwien yin' nε ní taan kí li yé unibaab. Nεn bo, li tuu ki faareh wɔ mεn.

<sup>16</sup> Cère mεn Kristo ya gber rí tùɔre kí kpe iñaan ni'fèl ni. Li wɔknh mεn tɔb, kí li taah miyɛnfuom κε ya bol ki gbierɛh tɔb. Li dondeh mεn Uwien, kí li geh iyuon κε ya bol nin ni'fèl κε ki faareh wɔ. <sup>17</sup> Ni lienh nà κε bii ni teh nà κε la, cère mεn ni'ke rí li yé Yonbdaan \*Yesu ya yel bo, kí li faareh Baa Uwien wɔn bo.

### *Kristo yaab li fuobe ma bo bi'dencɛn ni*

<sup>18</sup> Bipiibe, li blinh mεn ni'yul ni'ciεb ya nun bó. Ní kpe bipiib bà pε Yonbdaan bo rí li teh nnɔ nε. <sup>19</sup> Bijεbε, wà κε rí li yíe u'po, ki la cère u'benku ni rí li pendeh u'bo. <sup>20</sup> Mubumu, li boh mεn ni'naambe nin ni'baambe isen κε ni, kimε nεn nε sɔnge Yonbdaan ya yεnm. <sup>21</sup> Bibaambe, la cèreh mεn ni'bumu ya yεnm rí li ñeh ni'ni. Ni teh nnɔ la, mu'yεnm li saa nε.

<sup>22</sup> Iyonbe, li boh mεn ni'cɛnbaambe uñɛndun wuu ni isen κε ni. Ni la li boh bε bi'nun ni baba tɛn ni nuunh binib nε rí li pèkeh nε, ama ní li boh bε nin ni'fèl κε kí ñε ni boh Yonbdaan ma nnɔ bo. <sup>23</sup> Ni teh nà κε la, ní li teh nè nin ni'fèl κε tɛn ni teh ki dienh Yonbdaan nε, na teh ki dienh nib, <sup>24</sup> kí li bεn ki ye Yonbdaan Uwien li su nε nin u bonde' mimɔnm mà ki ble' bà yé u'yaab nnɔ. Ni teh ki dienh Kristo nε, wɔn nε cinbe ki yé ni'cɛnbaa. <sup>25</sup> Wà teh nà bre la, Uwien li dεre udaan ya tub u teh nà nnɔ bo nε, kimε Uwien ηα ημῶβε gèngènde.

## 4

<sup>1</sup> Iyonbe ya cɛnbaambe, li teh mεn ni'yonbe nà cuube, ki la li yíe uba ki cɛn' u'tɔ; kí li bεn kí ye ni'mɔ ημῶβε Cɛnbaa paaki bó.

### *Igbiere*

<sup>2</sup> Li kàareh mεn ki la pieh. Ni'kaare rí cère ní la gɔh kí li faareh Uwien. <sup>3</sup> Ní yekn kí li kàareh ki dienh ti'mɔ ηɔ Uwien rí de tε usen tí wɔkn binib u'gber, kí tɔke bε Kristo ya gbεbɔlkaar tà bo n te lipεkl ni nɔ. <sup>4</sup> Ní kàare wɔ ηɔ rí tùɔre kí ñεn tigbεbɔlkaar nnɔ upaan bo kí tɔke tù, n bi li tɔke tù ma bo.

<sup>5</sup> Li ημῶβε mεn miyɛnfuom, kí li te mɔnmɔnm nin bà ηα yé Kristo yaab. Uyo wà ni laa' libònl ní tien nà mɔn la, tien nè mεn. <sup>6</sup> Cère mεn ni'gber rí li tuu ki ημε kí suɔke, ní li jiindeh wà κε ní kpe ní jiin wɔ ma bo.

### *Ifuondfɔrke*

<sup>7</sup> Ti'ninjε Ticik wà n yíe wɔ, u yé n'tonsɔntɔ Yonbdaan ya tuonl ni, ki sɔnh lè mɔnmɔnm nnɔ, li tɔke nε n'gber κε. <sup>8</sup> N sɔnh wɔ ni'saan nà bo si: wɔ rí tí tɔke nε ti'gber, kí saake ni'gbɛnɛnt nε. <sup>9</sup> N li cère wɔn nin Onesim nε rí tɔke. Onesim yé ti'ninjε wà kpe ti li du u'bo nε, nε n yíe wɔ. U yé ni'yɔ nε. Bi baa' ni'saan la, bi li tɔke nε tigber tà κε te ti'bùol.

<sup>10</sup> Min nin Aristak wà te lipεkl ni nnɔ fuondeh nε. Banabas ya ninjε Mark mɔ fuondeh nε. N là tɔke' nε u'bó ηɔ, u lá baa ni'saan la, ní teke wɔ tinɔjɛr tule. <sup>11</sup> \*Yesu wà bi baan' wɔ Yustus nnɔ mɔ fuondeh nε. \*Sufmbε bà yé Kristo yaab nnɔ ni, bεn baba nε sɔnh nin nni Uwien ya bεl ya tuonl. Bi yé binib bà saake' n'gbɛnɛnt nε. <sup>12</sup> Ni'yɔ Epefa mɔ fuondeh nε. U yé [Yesu] Kristo ya tonsɔnl nε, ki kàareh uyo κε nin inunmón ki dienh nε ηɔ ní li ηuuke mitekjim mɔnmɔnm, kí kpére mi'ni kí tí gben, kí li yé binib bà bonde' bε rí li teh

Uwien yíe nà ke. <sup>13</sup> Im̀̀n, n yé u'm̀̀nkunl ki ye u'nun m̀̀n ninbi nin Lawodise yaab nin Herapolis yaab bo cεen nε. <sup>14</sup> Ti'jɔ Luk wà yé d̀̀ktiε nnɔ nin Demas m̀̀ fuondeh nε.

<sup>15</sup> Ní fuonde Kristo yaab bà te Lawodise ya du ni nnɔ, kí fuonde Ninfa nin Kristo yaab bà taakeh u'den nnɔ m̀̀. <sup>16</sup> Ni kaan' kugb̀̀nku kuu la, ní c̀̀ere bε ní k̀̀an k̀̀ Kristo ya taanl là te Lawodise ya du ni nnɔ m̀̀ ni. Ni'm̀̀ ní k̀̀an k̀̀a li n̄ε Lawodise ya du ni kí baa ni'saan nnɔ. <sup>17</sup> Ní t̀̀ke Akip kí ye ẁ̀ ní t̀̀re kí liike Yonbdaan de' ẁ̀ lituonl là nnɔ, kí li s̀̀nh l̀̀ m̀̀nm̀̀nm̀̀. <sup>18</sup> In̄ɔbonf̀̀rke yíe nɔ, min P̀̀l nin n'yul nε ji k̄eh ỳ̀ ki fuondeh nε\*. La sunde m̄en n j̀̀ndeh ijend yà lipεkl ni nnɔ bó.

Uwien ní juoke nε.

---

\* **4:18** Kí n̄ε kugb̀̀nku kuu ya cinm kí lá baa 4:17 P̀̀l lienh nε uba k̄eh, ama ẁ̀n nin u'yul nε ke'le' migbiirm 18.

## Kugbɔnkpiεku kùà Pɔl kεle' ki de'

### Tesalonik yaab nnɔ

## Nà wɔngeh kugbɔnku kuu te ma bo

Tesalonik yé Maseduɔnn ya tinfɛnm ya ducɛnciɛn nɛ. Pɔl là joh usɛn nle bo ma nnɔ nɛ ki tɔke' ni'ból yaab Kristo ya gber. Wɔn nin Silfɛn nin Timote nɛ là tɔke. Tesalonik yaab bà yɛbe ɲa là yé Sufmbɛ.

Sufmbɛ bà là te udu nnɔ ni nnɔ ya biba ɲa tuo' Pɔl ya gber, ki sure' bɛ bi kpre' ni'kɛ saan Pɔl nin u'tɔb bo.

Kí cin liyul 1 kí tí baa iyul 3, Pɔl tɔkeh ki teh wɔn nin Tesalonik yaab ya yɛnm sɔnge tɔb bo. Bi du Kristo bo, ki yíe tɔb ma nnɔ nɛ u faare' Uwien bi'bo, ki tiere' bɛ wɔn nin u'tɔb là te bi'saan uyo wà nnɔ bi là ɲmɔbe mitetem mà.

Kí cin iyul 4 kí tí baa iyul 5, Pɔl laa' Tesalonik yaab biba ɲa bɛn Yesu ya baam ya gber mɔnmɔnm; nɛ u tùɔre' ki tɔke' bɛ tù ni'donból. Biba laa' bi'yaab biba kpuokeh Kristo ɲa laan biε ki baa'. Bi maaleh bà kpuokeh nnɔ li fɔre ma bo ma nnɔ, nɛ Pɔl tɔke' bɛ ki ye bà kpo' nin bà fuobe kɛ tɛ nin Yesu Kristo nɛ, ki lá li mɛkre lidaali liba.

### Ifuonde

<sup>1</sup> Min Pɔl nin Silfɛn\* nin Timote nɛ kieh kugbɔnku kuu tí de Kristo ya taanl là te Tesalonik ya du ni, ki yé Baa Uwien nin Yonbdaan \*Yesu Kristo yaal nnɔ. Uwien ní juoke nɛ, kí de nɛ uyenduɔn.

### Pɔl faareh Uwien Tesalonik yaab ya tekjim bo

<sup>2</sup> Ti tuu ki faareh Uwien ni'kɛ bo nɛ, ki tien ni'ból ti'kaare ni. <sup>3</sup> Ti tuu ki tien ni'ból ti'Baa Uwien ya nun ból kí ɲɛ ni'tekjim cèreh ni sɔnh itùon yà nin ni ɲmɔbe miyíem ki sɔnh yà nnɔ nin ni ɲmɔbe lidɛndɛnl ti'Yonbdaan \*Yesu Kristo bo ní tí kɛnde' ma nnɔ bo nɛ.

<sup>4</sup> Ti'yaab bà Uwien yíe bɛ, ti bɛn ki ye Uwien nɛ gɛnde' nɛ ní li yé u'yaab. <sup>5</sup> Kimɛ ti là tɔke' nɛ tigbɛmɔnmɔnt tà nnɔ ɲa là yé ɲɔbon baba, \*Mifuoɲaanm nɛ là cèrɛ' tù ɲmɔbe mituɔm, ki cèrɛ' ti du ki ye tù yé tigbɛmɔnt. Nɛ ni bɛn ti là te ni'saan uyo wà nnɔ, ti'tetem là te ma bo. Ti là te nnɔ ɲɔ nè ní li mɔn ni'bo nɛ.

<sup>6</sup> Ninbi tɛkn' tinbi nin Yonbdaan ya taal ni nɛ. Nin ni teke' u'gber ijɛndciɛn ni ma kɛ nnɔ, ni ɲmɔbe uyɛnsɔnge wà \*Mifuoɲaanm dienh wù nnɔ. <sup>7</sup> Nnɔ nɛ Maseduɔnn ya tinfɛnm ya dutɔ yaab nin Akayi yaab bà kɛ teke' \*Yesu ki jin' nnɔ mɔ li tɛkn ni ya taal ni. <sup>8</sup> Kimɛ Yonbdaan ya gber ɲɛn' ni ya bùol nɛ ki yere' Maseduɔnn ya tinfɛnm ya dutɔ nin Akayi ya tinfɛnm ya du kɛ ni. Na yé i ya du ni baba, binib cii' ni'kɛ saan ni teke' Uwien ki jin' ma bo. Nɛn bo, ta ji ɲmɔbe tuba tí tɔke. <sup>9</sup> Kimɛ ni'ból ya nib lienh ti là baa' ni'bùol ni teke' tɛ ma bo ya gber nin ni wie' ibule, ki pekre' ki paan' Uwien limiɛl ya daan, wà tuu ki te nnɔ bo ma bo, <sup>10</sup> ki gu u'Bije \*Yesu ní ɲɛ paaki ból kí baa ní. U là cèrɛ' wɔn nɛ mɛkre' bitɛnkpiib ni. Wɔn nɛ ɲmiɛndeh tɛ Uwien ya benpiebe ni, ki li ɲmien tɛ lidaali là Uwien li bu binib tibuur nnɔ.

## 2

### Pɔl lienh u sɔn' itùon Tesalonik ya du ni ma bo

<sup>1</sup> Ti'yaabɛ, ninbi mɔnɔn bɛn ki ye ti là baa' ni'bùol ni teke' tɛ ma nnɔ ɲa juore' fɛnm. <sup>2</sup> Ni bɛn ki ye bi là jɛnde' tɛ, ki suke' tɛ Filip ya du ni. Ama nin binib là ɲɛn' ti'bo kinunbɔnk ma kɛ nnɔ, ti'Wien de' tɛ lifɛl ti tɔke' nɛ u'gbɛmɔnmɔnt. <sup>3</sup> Ti là sureh nɛ ní cenge Uwien ya gber ma nnɔ ta là nuunh tí tuln nil, ka ɲmɔbe yɛnmaalbiere, ka nuunh tí lere kí ji mɔ.

\* 1:1 Liike Itùon 17:4, 5.

<sup>4</sup> Ama Uwien bikn' tɛ ki laa' ti kpe tɪ tɔke binib u'gbɛmɔnmɔnt nɛ ki taa' tɪ ki ŋukn' tɛ. Nɛn bo nɛ ta nuunh ti tɔkeh tɪ la, binib ya yɛnm ɾ li sɔnge ti'bo, ti nuunh Uwien wɔ bɛn ti'fɛl ni te ma bo nnɔ ya yɛnm nɛ ɾ li sɔnge ti'bo.

<sup>5</sup> Ni bɛn ki ye ta kpele ki len' ŋɔŋmaagbɛr tɪ lɛre nil, ka kpele ki nuun' tɪ ŋi nil bo kɪ lɛ like. Uwien nɛ yɛ ti'mɔnkunl. <sup>6</sup> Ta kpele ki nuun' ninbi bii nitɔb ɾ pɛke tɛ, kimɛ ta nuunh pɛnpɛku nisaal saan. <sup>7</sup> Ti yɛ \*Kristo ya tondb ma nnɔ, ti bi li fre kɪ wuɔn nɛ kɪ ye ti ŋmɔbe ukpɛke, ama ta tien' nnɔ. Ti lɔ te ni'saan ma nnɔ, ti lɔ duɔn' ti'yɛnm ni'bo tɛn upii ŋaandeh ma u'bumu, u'yɛnm sɔnge mu'bo u likeh mɪ nɛ. <sup>8</sup> Ti yɛ nɛ nɪ tɪ kɛndɛ' ma nnɔ, na yɛ ti'nun mɔn tɪ tɔke nɛ Uwien ya gbɛmɔnmɔnt baba nɛ. Ninbi bo, ti li tuo kɪ kpo mɔnɔn, kimɛ ni yɛ binib bɔ ta gɔh ni'bo nɛ.

<sup>9</sup> Ti'yaabɛ, ni tien' ti'tuon nin ti'jiinku bɔ. Ti lɔ tɔkeh nɛ Uwien ya gbɛmɔnmɔnt ma nnɔ, ti lɔ sɔnh ituon nin inunmɔn nɛ ŋɔnkɪ nin wien ni ŋɔ ti la li yɛ uba bo tukl. <sup>10</sup> Ninbi bɔ teke' \*Yesu ki jin' nnɔ nin Uwien nɛ yɛ bimɔnkunb ki ye ti lɔ te ni'saan ma nnɔ ti'tetem lɔ cuube nɛ ka ŋmɔbe jɔknt. Ta lɔ ŋmɔbe bi li biin tɛ nɔ bo. <sup>11</sup> Ni bɛn kɛin ki ye ti lɔ teh ni'ni wɔ kɛ tɛn bibaa teh u'bumu ma bo nɛ, <sup>12</sup> ki sureh nɛ, ki saakreh ni'gbɛnɛnt, ki ŋiikeh ki tɔkeh nɛ ki teh nɪ li ŋmɔbe mitetem mɔ selndeh Uwien. Wɔn nɛ yin' nɛ nɪ kɔ u'bel ni kɪ lɛ u'kpɛke.

### *Pɔl pɛkeh Tesalonik yaab bi'tekjim bo*

<sup>13</sup> Ti tuu ki faareh Uwien ni'bo uyo kɛ nibonn nɔ bo nnɔ si: ti lɔ tɔke' nɛ Uwien ya gbɛr, nɛ ni teke' tɪ, ki tuo' ki ye ta yɛ nib yaar tɪ mɔnbe ki yɛ Uwien yaar nɛ, ki cɛreh ninbi bɔ teke' Uwien ki jin' nnɔ teh Uwien yɛ nɔ. <sup>14</sup> Ti'yaabɛ, ni tɛkn' Uwien ya tɔan yaab bɔ te Sude ya tinfɛnm ni, ki liɛbe' ki yɛ \*Yesu Kristo yaab nnɔ ya taal ni nɛ. Kimɛ ni'du yaab jɛndɛ' nɛ ijɛnd yɔ nnɔ \*Sufmbɛ mɔ lɔ jɛndɛ' bɛ i ya jɛnd nɛ. <sup>15</sup> Bɛn \*Sufmbɛ nnɔ nɛ lɔ ku' \*Uwien ya ŋɔbonsɔknb, ki ku' Yonbdaan Yesu, ki jɛndɛ' ti'mɔ cɛɛn. Uwien ya yɛnm ŋa sɔnge bi'bo. Bi yɛ binib kɛ ya nɛnnɛndb nɛ. <sup>16</sup> Bi piendeh tɛ ti la tɔke bɔ ŋa yɛ \*Sufmbɛ tigbɛr tɔ li cɛre bɛ ɾ ŋmɛre nɛ. Bi teh nnɔ nɛ bi'biere yɛbreh ki joh, nɛ Uwien ya benku ni tɪ gben' ki ben' bi'bo.

### *Pɔl yɛ wɔ ɾ tɪ ɾ lɛ Tesalonik yaab*

<sup>17</sup> Ti'yaabɛ, tinbi nin ninbi dɔan' tɔb nɪ tien' idɛn ile ma nnɔ, ti dɔkn' nɛ cɛɛn nɛ. Ti jɛndɛ' tɔb nɛ, ama ti tien' ni'bɔ ti'yɛnmaale ni. Nɛn nɛ cɛre' ti ŋikn' tɪ tɪ ɾ lɛ nɛ. <sup>18</sup> Nɛn bo nɛ ti yɛ tɪ liɛbe kɪ baa ni'saan. Min Pɔl mɔnɔn bikn' nlen, ki bikn' nle, nɛ \*Satan pien' tɛ. <sup>19</sup> Imɔn, ninbi bo nɛ ti ŋmɔbe lidɛndɛnl nin uyɛnsɔnge. Yonbdaan \*Yesu li baa lidaali lɔ nnɔ, ninbi nɛ li yɛ ti'bo lisuul, nɛ ti'yɛnm li sɔnge ni'bo u'nun bɔ. <sup>20</sup> Imɔn, ninbi nɛ yɛ ti'kpɛke nin ti'yɛnsɔnge.

## 3

<sup>1</sup> Nɛn bo ta ɾ fre kɪ cuo ti'ba. Nɛn nɛ cɛre' ti bobn' ki ye tinbi baba ɾ juore Atɛnn ya du ni, <sup>2</sup> nɛ ki sɔn' ti'ninɛ Timote ni'saan. Timote yɛ ti'tonsɔnlie nɛ Uwien ya tuonl ni, ki tɔkeh binib \*Kristo ya gbɛmɔnmɔnt. Ti sɔn' wɔ ni'saan wɔ ɾ saake ni'gbɛnɛnt nɛ, kɪ cɛre ni'tekjim ɾ faake <sup>3</sup> ŋɔ, idɛn yɛ ya jɛnd la cɛre uba ɾ lu mitekjim ya sɛn ni. Kimɛ ninbi mɔnɔn bɛn ki ye Uwien sien' tɛ nnɔ nɛ. <sup>4</sup> Ti lɔ te ni'saan uyo wɔ nnɔ, ti lɔ juɔ' ki tɔke' nɛ ki ye ti li ji ijɛnd. Nɛn nɛ tien' nɔ, ninbi mɔnɔn bɛn. <sup>5</sup> Ma lɔ li fre kɪ cuo n'ba ma nnɔ, nɛn bo nɛ n sɔn' Timote ni'saan, wɔ ɾ liike ni biɛ ki pɛ mitekjim ya sɛn bo bii na ji pɛ, kimɛ n lɔ fɛnge nba la \*usenpol unibiikl la tuln' nɛ ki cɛre' ti'tuonl juore' fɛnm nɛ.

<sup>6</sup> Fɛnfɛnnɔ nɛ Timote ŋɛn' ni'donbɔ ki liɛbe' nɪ ki lɔ tɔke' tɛ tigbɛmɔnmɔnt, ki ye ni biɛ ki pɛ mitekjim ya sɛn bo, ki ŋmɔbe miyɛm. U tɔke' tɛ ki ye ni'yɛnm tuu ki pɛ ti'bo nɛ, nɛ ni ciɛke nɪ lɛ tɛ tɛn ti'mɔ ciɛke tɪ lɛ nɛ ma. <sup>7</sup> Ti'yaabɛ, nnɔ nɛ ni'tekjim cɛre' ti ŋmɔbe ugbenɛnsaake ti'yɛnsaaciɛn nin ti'jɛnd ni. <sup>8</sup> Fɛnfɛnnɔ, ti ji fuore' ki jiin', kimɛ ni pɛ Yonbdaan bo mɔnmɔnm. <sup>9</sup> Nɛn bo, ta bɛn ti li faare Uwien ni'bo kɪ tɪ kpaan ma bo. Kɪ

ñe ninbi bo ne ti ñmabe uyensangciën ki poknh ti'Wien ya nun bó. <sup>10</sup> Ti mieh wə ñonku nin wien ni nin inunmón ki teh wə rí cère tí tí rí le ne, kí wəkn ne kí tonde ná pəre' ne ni'tekjim ni.

<sup>11</sup> Ti'Baa Uwien nin u'yul nin Yonbdaan \*Yesu rí ñère te usen tí fre kí baa ni'saan. <sup>12</sup> Yonbdaan rí cère ni ñmabe miyiem mà nnə rí yebre kí gbien; ní li yíe təb nin binib ke ten ti yíe ne ma bo. <sup>13</sup> Nnə ne u li de ne mituəm, ní li yé u'yaab, ki la li ñmabe biil ti'Baa Uwien ya nun bó, lidaali là ti'Yonbdaan \*Yesu li baa ní nin u'nib ke nnə.

## 4

### *Mitetem mà sange Uwien ya yənm*

<sup>1</sup> Tə, ti'yaabe, ti là wəkn' ne ni li fuobe ma bo ñə Uwien ya yənm rí li sange ni'bo. Ne ni fuobe nnə ne. Ti gbierreh ne, ki sureh ne Yonbdaan \*Yesu bo, ní li tūəreh ki teh nnə ki joh inun bó. <sup>2</sup> Kimə ni ben ti là wəkn' ne Yonbdaan \*Yesu ya wəknm ma nnə. <sup>3</sup> Uwien yíe ná si: ní li ñmabe mitetem mà mən ne, ki la li teh sənsəndl. <sup>4</sup> Ni'ni wə ke rí bende u li tien ma kí li coh u'ba, ki la li kuəndeh u'ba jəkn, kí li yé unil wə bi boh wə, <sup>5</sup> ki la li ñmabe sənsəndyənmaale ten binib bà ña ben Wien. <sup>6</sup> Uba la li rí bii u'tə, ki la lere wə tu ya gber bo, kimə Yonbdaan diēh binib ya tub i ya biere ke bo ne. Ti là təke' ne ñə, ki liēbe' ki lere'. <sup>7</sup> Kimə Uwien ña yin' te, tí li teh ná kuəndeh te jəkn, u yin' te tí li ñmabe mitetem mà mən ne. <sup>8</sup> Nən bo, wə ke yíe' tigber tuu la, na yé u yíe' binib ya gber ne, u yíe' Uwien wə diēh ne \*Mifuoñaanm nnə ya gber ne.

<sup>9</sup> Ni li yíe təb Kristo bo ma bo wən, na ji ciēke nil rí kele kugbənku kí təke ne ni li teh ma bo, kimə Uwien cère' ninbi nin ni'yul bende' ni li yíe təb ma bo ñə. <sup>10</sup> Ti'yaabe, ni teh nnə ne nin ti'yaab bà ke te Maseduənn ya tinfenm ni nnə. Ti'yaabe, ti sureh ne ní li tūəreh ki teh nnə ki joh inun bó ne. <sup>11</sup> Cère mən ni'nun rí li mən ní li te suo. Ni'ke rí li likeh ni'yul bo ya gber, kí li jinh ni'nəje bo ten ti là təke' ne ma bo, <sup>12</sup> ñə bà ña yé Kristo yaab rí li boh ne; ne na ji li jinh itənuə bo.

### *Yonbdaan ya baam ya gber*

<sup>13</sup> Ti'yaabe, ti yíe ní bende binib bà kpo' ya gber ñə ki la li te uyensaa ni ten binitəb ne, kimə ben ña ñmabe dəndənl. <sup>14</sup> Ti teke' ki jin' ki ye \*Yesu kpo', ki mekre' bitenkpiib ni ma nnə, nnə ne bà teke' wə ki jin' ki yaan ki kpo' nnə, Uwien li mekre' bi'mə kí taan ben nin wən Yesu. <sup>15</sup> Imən, ti təkeh ne tigber tà nə yé Yonbdaan ya ñəbon iba ne. Yən si: Yonbdaan li baa lidaali là nnə, tinbi bà li biē ki fuobe nnə ña li li liere bà kpo' usen. <sup>16</sup> Kimə Uwien lá de usen la, ti li cii Uwien ya tondb ya ciën ya niēke bó nin Uwien ya natunl ya muə bó. U ya yo ne Yonbdaan nin u'yul li ñe paaki bó kí li jiinh ní. Nən saan ne Kristo yaab bà kpo' nnə li kpiē kí mekre. <sup>17</sup> Ni ya puoli bó ne Uwien li yuure tinbi bà biē ki fuobe nnə nin ben tí tuobe Yonbdaan titəwəlgbənt ni paaki bó. Nnə ne ti li tuu ki te nin Yonbdaan uyo ke. <sup>18</sup> Nən bo, li taah mən tigber tuu ki saakreh təb ya gbenent.

## 5

### *La gəh mən ki li gu Yonbdaan ya baam*

<sup>1</sup> Ti'yaabe, Yonbdaan li baa uyo wə ya gber wən, na ciēke nil rí kele gbənku kí təke ne, <sup>2</sup> kimə ninbi mənən ben kein ki ye Yonbdaan ya babaadaali li te ten unasu bəareh kuñonku ma bo ne. <sup>3</sup> Uyo wə binib li lienh ki teh bi te uyənduən ni, niba ña rí tien be nnə, u ya yo ne ijəndciën li ci be. Ni li te ten imerwien ciikeh utənpunb ma bo ne, ne ba rí fre kí ñe len.

<sup>4</sup> Ti'yaabe, ninbi ña te cinñunl ni ma nnə Yonbdaan ya babaadaali ña rí ci ne ten unasu ciikeh binib ma bo. <sup>5</sup> Kimə ni'ke yé kuwenwenku yaab ne, ki yé uwien ni yaab. Ta yé ñonku yaab, ka yé cinñunl yaab mə. <sup>6</sup> Nən bo, la cère mən ti li gəh ten binitəb. Cère mən tí li like, kí li co ti'ba. <sup>7</sup> Kimə bà gəh nnə, bi gəh kuñonku ne, bà ñuh ki yibeh nnə, bi yibeh

kuñonku nε. <sup>8</sup> Ama tinbi ben wɔn, ti yé uwien ni yaab nε. Nεn bo, cère mεn tí li co ti'ba. Cère mεn ti'tekjim nin ti'yíem ní li yé ti'bo tijeκɔnwεnt tà lèkndeh ti'fèl bo; ti'ηmεrm ya dεndεnl mɔ ní li te ti'bo tεn tikur ya κεnpinl\*.

<sup>9</sup> Uwien ηa gènde' tε wɔ ní ηuu ti'bo, ama u gènde' tε tí ηmεre ti'Yonbdaan \*Yesu Kristo bo nε. <sup>10</sup> Tinbi bo nε u kpo', ηɔ ti fuobe bii ti kpo' la, tinbi nin wɔn ní li tε ki te. <sup>11</sup> Nεn bo, li saakreh mεn tɔb ya gbεnεnt, kí li toreh tɔb, ní'tekjim ní li faakreh tεn ni teh ma fεnfεnnɔ nɔ.

### *Igbierfɔrke nin ifuonde*

<sup>12</sup> Ti'yaabε, ti tɔkeh nε ki teh ní li bùh binib bà sɔnh Uwien ya tuonl ni'ni nin inunmɔn, ki likeh nε Yonbdaan ya sεn ni, ki gbierεh nε nnɔ. <sup>13</sup> Ní li boh bε ki gbiekeh, kí li yíe bε bi'tuonl bo. Cère mεn ní'ke ya yεnm ní li dɔ tɔb bo.

<sup>14</sup> Ti'yaabε, ti gbierεh nε ní li tɔkeh bà yé ikpaayuon† nnɔ ki teh bε ní liike bi'yul bo, kí li biendeh bijεwaandεnb ya fèl, kí li toreh bà yé bijiinb, kí li ηmɔbe kuminku binib κε bo.

<sup>15</sup> Liike mεn ni'yul bo, ki la cère unil tien' u'tɔ ibiere la, wɔ ní tu wɔ fènl. Ama li nuunh mεn uyo κε ní li teh ní'tɔb nin binitɔb κε nà mɔn.

<sup>16</sup> Cère mεn ni'yεnm ní li sɔnge uyo κε, <sup>17</sup> ní li tuu ki kàareh, <sup>18</sup> kí li faareh Uwien isεn κε ni, kimε Uwien yíe \*Yesu Kristo bo ní li teh nnɔ nε.

<sup>19</sup> La piendeh mεn \*Fuoñaanm ya tuonl, <sup>20</sup> ki la yih bi sɔkndeh Uwien ya gber tà nnɔ fεnm. <sup>21</sup> Li tùɔreh mεn ki fiinh tibont κε, tà mɔn la, ní li ηuuke tun. <sup>22</sup> Wiε mεn ibiere κε ya bol.

<sup>23</sup> Uwien, uyenduɔn ya daan nin u'yul ní cère ní li yé u'yaab kí tí gben. Wɔ ní guure ní'ke mɔnmɔnm‡ ηɔ ti'Yonbdaan \*Yesu Kristo ya babaadaali ni la li ηmɔbe biil. <sup>24</sup> Wà yin' nε nnɔ yé umεmɔndaan nε, u li tien nεn κε.

<sup>25</sup> Ti'yaabε, li kàareh mεn ki dienh tε. <sup>26</sup> Ní fuonde ti'yaab κε mɔnmɔnm. <sup>27</sup> N tɔkeh nε Yonbdaan ya yel bo nε ki teh ní kàan kugbɔnku kuu nɔ ti'yaab κε ya nun bó.

<sup>28</sup> Ti'Yonbdaan \*Yesu Kristo ní juoke nε.

\* 5:8 Pɔl ya bùol unisaal ya yεnmaale te u'yul ni nε. Nε miηmienm te tεn tikur ya κεnpinl ki liike iyεnmaale bo ηɔ usenpol la fre yl. † 5:14 Bi li fre kí lεbre bà yé ikpaayuonkí ye bà fuobe fεnfεnm mɔ. ‡ 5:23 Bi lεbre' iñɔbon ya ki ye ní'ke mɔnmɔnm nnɔ; † kele' Grεkmbε ya lenm ni ki ye: Wɔ ní guure ní'yεnm nin ní'naank nin ní'gbεnεnt nε.



## Kugbɔnlieku kùà Pɔl kɛle' ki de' Tesalonik yaab nnɔ Nà wɔngeh kugbɔnku kuu te ma bo

Kugbɔnku kuu ya cincinm bi tɔke' ki ye binib bita nɛ kɛle' kù, ama Pɔl nɛ yé kugbɔnku bugbɛn ya kɛlm ya sɛnlɛr. Bi kɛle' kugbɔnkpiɛku ki de' Tesalonik yaab ma nnɔ, ni ya puoli bó nɛ Pɔl cii' ni' bó ya nib biba lienh ki teh Yonbdaan Yesu liɛbe' ní ɲɔ. Tigber nnɔ saa' Tesalonik yaab ya yɛnm cɛɛn. Nɛ ba ji bɛn bi li tien ma. Biba dɔan' ka ji sɔnh tɔon. Nɛn nɛ cɛre' Pɔl kɛle' kugbɔnku kuu wɔ rí saake bi'gbɛnɛnt bɛ rí li co bi ɲmɔbe mitekjim mà nnɔ kenken, ki li sɔnh itɔon mɔ.

Liyul 1 ni, Pɔl cin' ki faareh Uwien Tesalonik yaab ya yíem nin bi'tekjim bo nɛ, ki tɔke' ki ye Uwien li dɛre bà jɛndeh bɛ nnɔ ya tub kí tu lifɛnl, kí jɛnde bà ɲa boh Yesu Kristo ya gbɛmɔnmɔnt nnɔ lidaali là u li baa ní nnɔ.

Iyul 2 ni, Pɔl tɔkeh nà li liere Yonbdaan ya baam usɛn ya gber nɛ. U ye wà li yíe Uwien ya ɲɔbu bó li ɲɛn u'ba upaan bo, kí tuln binib pelpel nɛ kí yaan Yonbdaan rí baa ní. U tɔke' bɛ ki ye bɛ rí li se mitekjim ni nĩ faa.

Iyul 3 ni, Pɔl tɔkeh bà yé ikpaayuon nnɔ ki teh bɛ rí liike bi'yul bo, kí li sɔnh ki jinh bi'ɲɔjɛ bo.

Pɔl tí fɔre' kugbɔnku kuu nɔ nin micɛbm nɛ.

### *Ifuonde*

<sup>1</sup> Min Pɔl nin Silfɛn\* nin Timote nɛ kieh kugbɔnku kuu tí de Kristo ya taanl là te Tesalonik ya du ni ki yé ti'Baa Uwien nin Yonbdaan \*Yesu Kristo yaal nnɔ. <sup>2</sup>Ti'Baa Uwien nin Yonbdaan \*Yesu Kristo rí juoke nɛ, kí de nɛ uyɛnduɔn.

### *Yonbdaan li baa ní ki bu binib tibuur*

<sup>3</sup> Ti'yaabɛ, nĩ kpe tí li faareh Uwien ni'bo uyo kɛ nɛ, nĩ yé nibonn nà cuube nɛ, kime ni tɔɔreh ki teknh \*Yesu ki jinh mɔnmɔnm, nɛ ki tɔɔreh ki yíe tɔb mɔ mɔnmɔnm. <sup>4</sup> Nɛn bo nɛ ti tɔkeh Uwien ya táantɔ ni, ti'yɛnm sɔnge ni'bo ki tí kpe ma bo, kime nin bi teh nɛ nà bre, ki jɛndeh nɛ ma kɛ nnɔ ni tɔɔreh ki mɔh mitekjim ni ki joh inun bó nɛ.

<sup>5</sup> Nɛn nɛ wɔngeh ki teh Uwien buh tibuur tu'donbó, kime ijɛnd nnɔ nɛ li cɛre Uwien rí ye ni kpe ní kɔ u'bɛl là ni jɛndeh li'bo nnɔ ni. <sup>6</sup> Imɔn, Uwien li tien nà cuube nɛ. Binib bà jɛndeh nɛ nnɔ, u'mɔ li jɛnde bɛ nɛ kí tu ni'fɛnl, <sup>7</sup> kí de ninbi bà jɛndeh nnɔ nin tinbi lifuorl lidaali là Yonbdaan Yesu li puɔ paaki bó ní nnɔ. U li puɔ ni'bo ní nin Uwien ya tondtɔɛnb nɛ, <sup>8</sup> kí li te umupien ni ki we ní. U li dɛre bà ɲa yíe Uwien ya gber nnɔ nin bà ɲa boh ti'Yonbdaan Yesu ya gbɛmɔnmɔnt nnɔ ya tub. <sup>9</sup> Bi'tudɛre nnɔ si: u li cɛre bɛ rí kɔ ijɛndciɛn ni kí li tuu ki te len. U li ɲɔre bɛ kí jɛnde u'nun bó, ba ji li lɛ u'tuɔm nin u'kpɛke. <sup>10</sup> Nĩ li tien nnɔ lidaali là Yonbdaan li baa ní ɲɔ bɛ rí pɛke wɔ, kí ɲuɔre wɔ kí ɲɛ bà kɛ teke' wɔ ki jin', ki yé u'yaab nnɔ bo nɛ. Ni'mɔ te len, kime ti tɔke' nɛ u'gber ma nnɔ ni teke' tɔ ki jin'.

<sup>11</sup> Nɛn bo nɛ ti kàareh ki dienh nɛ uyo kɛ ɲɔ ti'Wien rí ye ni kpe u'yin, kí li toreh nɛ nin u'tuɔm ní li teh ni nuunh ní tien mimɔnm mà kɛ nnɔ, kí cɛre ní li sɔnh itɔon yà wɔngeh ki teh ni ɲmɔbe mitekjim. <sup>12</sup> Ni teh nnɔ la, ninbi bo nɛ bi li kpɛke Yonbdaan Yesu, nɛ u'mɔ rí kpɛke nɛ, kí ɲɛ ti'Wien nin wɔn Yonbdaan \*Yesu Kristo ya juokm bo.

## 2

### *Nà li liere Yonbdaan ya baam usɛn*

\* 1:1 Liike 1 Tesalonik 1:1.

<sup>1</sup> Ti'yaabe, Yonbdaan \*Yesu Kristo ya baam nin ti'taanm u'saan ya gber bo ne ti takeh ne ki teh: <sup>2</sup> bi take' ne ki ye Yonbdaan ya babaadaali baa' la, ni la cere ne ri pak ki qaabe ni'yenm, ki la cere ne ri sen ni'fel. Nba la, bi li take ki ye \*Mifuoŋaanm ne cere' bi len' tigber nno, mitom la, bi li ye tu nen' tinbi saan ne bii tinbi ne kele' kugbonku ki ye nno.

<sup>3</sup> La li ri cere men uba ri ne isen iba ki lere ne. Ki yaan Yonbdaan ya babaadaali ri baa nno binib li ye Uwien ya nabu bo ki yebe, ne wa li ye Uwien ya nabu bo, ki juore fennm Uwien li dere u'tub nno mo li nen u'ba upaan bo. <sup>4</sup> U li ye unennend ne, ki ye u cen' Uwien nin binib pukeh tibont ta ke nno. U li kele Uwien ya duku ni monon ki yin u'ba Uwien. <sup>5</sup> Na tien ki ye n laan la te ni'saan ma nno, n la take' ne tigber tuu no-oo? <sup>6</sup> Ni ben na co wo fenfennno. U'yo la baa' la, u li nen u'ba upaan bo. <sup>7</sup> Kime wa li ye Uwien ya nabu bo nno ya tuom ma buo nno ya ton cin'-a! Ni ji sien' wa piendeh me nno ne ri daan me. <sup>8</sup> U ya yo ne u li ne upaan bo, ne Yonbdaan ri piebe u'bo, wo ri kpo. Yonbdaan li baa ki li windeh ma nno ne li cere ubiero bugben ya gber ri gben. <sup>9</sup> Wa li ye Uwien ya nabu bo nno la baa' la, u li nmabe \*Satan ya tuom ne, ki li teh micincilm nin miyokm ya bont ke ya bol ki lereh binib. <sup>10</sup> U li tien mibierm ke ya bol, ki tuln binib ba buoh, kime ba tuo' be ri li ye tigbemant ta li cere be ri nmere ma nno ne cere' bi buoh. <sup>11</sup> Nen bo ne Uwien dienb be mituom ma tulndeh be, ki cereh bi teknh kutonnenku ki jinh. <sup>12</sup> Nno ne Uwien li biin ba qa teke' gbemant ki jin', ki fe na bre ya tienm nno.

### *Uwien ne gende' ne, cere men ni'tekjim ri li faa*

<sup>13</sup> Ti'yaab ba Yonbdaan ye be, tinbi ben won, ni kpe ti li faareh Uwien ni'bo uyo ke ne, kime Uwien la gende' ne haali ucincinyo ni nmere ne, ki ne \*Mifuoŋaanm ma teh ne u'yaab nno nin ni teke' tigbemant ki jin' ma nno bo. <sup>14</sup> Nen bo ne u yin' ne ri ka ti'Yonbdaan \*Yesu Kristo ya kpieke ni, ki ne ti take' ne tigbemant ta nno bo. <sup>15</sup> Nen bo, ti'yaabe, gore men ki li se mitekjim ya sen ni monmonm, ki li nuuke ti la wkn' ne miwknm ma, buabu ni bii ti kele' na kugbonku ni ki de' ne nno. <sup>16</sup> Ti'Yonbdaan \*Yesu Kristo nin u'yul nin ti'Baa Uwien wa ye te, ki tuu ki saakreh ti'gbenent, ki cere' ti nmabe lidendenl la mon, ki ne u'juokm bo nno <sup>17</sup> ri saake ni'gbenent, ki de ne ufaa ri li tuu ki teh na mon ni'ton ni nin ni'lenm ni ke.

## 3

### *Li kaareh men ki dienb te*

<sup>1</sup> To, ti'yaabe, li kaareh men ki dienb te no Yonbdaan ya gber ri li yereh ni'ke saan tontonm, ki li nmabe ukpieke ten tu nmabe ukpieke ni'du ni ma bo. <sup>2</sup> Li kaareh men, Uwien ri nen te binib ba bre ni ti kende' nno ya nuo ni, kime na ye binib ke ne teke' ki jin'. <sup>3</sup> Yonbdaan ye umemandaan ma nno u li de ne ufaa, ki lekni ni'bo, usenpol ubiero la fre ne. <sup>4</sup> Ki ne Yonbdaan bo ne ti du ni'bo ki ye ti take' ne na nno, ni teh nen ne, ki li tuu ki teh ne. <sup>5</sup> Yonbdaan ri pekere ni'yenm ni bende Uwien ya yiem, ki li nmabe Kristo ya minku.

### *Unil ke ya nun ri li mon iton bo*

<sup>6</sup> Ti'yaabe, ti takeh ne Yonbdaan \*Yesu Kristo ya yel bo ne ki teh: ni'yo wa ke qa ye tuonl ya gber\*, ka pe ti la wkn' ne miwknm ma nno bo la, ni wie u'gber. <sup>7</sup> Kime ninbi nin ni'yul ben ki ye ni kpe ri tekni ti'taal ni ne. Ti la te ni'saan uyo wa nno, ta la ye kpaayuon† <sup>8</sup> ka mieh uba jier ki jinh. Ti la sonh iton nin inunmon ne nonku nin wien ni no ti la li ye uba bo tukl. <sup>9</sup> Na ye ta la nmabe sen ti ji ni'nuo ni ne, ti la ye tinbi nin ti'yul ri wun ne miseknm no ri tekni ti'taal ni ne. <sup>10</sup> Kime ti la te ni'saan uyo wa nno, ti la take' ne ki ye wa ke qa ye tuonl ya gber la, u la ji mo. <sup>11</sup> Nin nen ke ti cii' bi ye ni'ni biba ye ikpaayuon ne, ka sonh niba nin nitonn, ki cuonh ki koh bitab ya gber ni. <sup>12</sup> Ti takeh bi ya nib ne Yonbdaan \*Yesu Kristo ya yel bo, ki teh be ri liike bi'yul bo, ki li te suo, ki li sonh ki jinh bi'noje bo. <sup>13</sup> Ti'yaabe, ninbi ben won, la nende men ni'gbenent mimonm ya tienm ni.

\* 3:6 Liike 1 Tesalonik 5:14. † 3:7 Liike 1 Tesalonik 5:14.

<sup>14</sup> Ni'ni wà ña boh ti kele' tigber tà kugbɔnku kuu ni la, ní sekn udaan, kí wiε u'gber ñɔ ifε ní cuo wɔ. <sup>15</sup> Ni la taa' wɔ kí tien ten u yé ni'nennend ne ama ní li sureh wɔ, kimε u'mɔ yé ni'yo ne.

*Ifuondfɔrke*

<sup>16</sup> Yonbdaan uyenduɔn ya daan nin u'yul ní li dienh ne uyenduɔn uyo ke isen ke ni. Yonbdaan ní li te nin ni'ke.

<sup>17</sup> Min Pɔl nin n'yul ne kele' ifuonde yii nɔ. N'gbɔnt ke ni n kieh n'yel ma sɔ‡.

<sup>18</sup> Ti'Yonbdaan \*Yesu Kristo ní juoke ni'ke.

---

‡ **3:17** Kí ñε Kugbɔnku kuu ya cinm kí lá baa 3:16 Pɔl lienh ne uba kieh, ama wɔn nin u'yul ne kele' migbiirm 17.

## **Kugbɔ̀nkpiɛku kùà Pɔ̀l kɛle' ki de'** **Timote** **nnɔ̀** **Nà wɔ̀ngɛh kugbɔ̀nku kuu te ma bo**

Pɔ̀l kɛle' Timote tigbɔ̀nt tule nɛ. U kɛle' tù ki laa' u caan' Kristo ya táan nɔ̀ nǎ ji sɛn' bi li liike yè ma bo nɔ̀ Kristo yaab ní faake mitekjim ni nɛ. Timote ya naa yé Suf nɛ ki pɛ Kristo ya sɛn bo, nɛ u'baa yé grɛk ka pɛ Kristo ya sɛn bo. Timote là tɛ ki sɔ̀nh nin Pɔ̀l nɛ ki pɛ̀rɛ' wɔ̀ isɛn yà yɛbe ya jom.

Kugbɔ̀nkpiɛku kuu ni, Pɔ̀l tɔ̀keh Timote u li tien ma kí liike Kristo ya táan nnɔ̀ nɛ. U tɔ̀ke' wɔ̀ ki ye binib biba te itáan nnɔ̀ ni ki wɔ̀knɛ miwɔ̀knɛ mà nɔ̀ kpe sɛn (1:3-7; 4:1-4; 6:3-5), ki teh tibont tà te uɛ̀ndun wuu ni nnɔ̀ ya tuba nɔ̀ mɔ̀n, ki teh binib ní dàan upiikuɔ̀n, ki la jinh tijier tubamɛ. Nɛn bo nɛ Pɔ̀l tɔ̀ke' Timote ki ye wɔ̀ ní tiɛrɛ Kristo yaab kí ye: Uwien nɛn' nà kɛ nnɔ̀ mɔ̀n nɛ.

U wuɔ̀n' wɔ̀ u li tien ma kí gènde itáan nnɔ̀ ya ciɛnb, ki gbierɛ' binib bɛ ní li pukeh Uwien, kí li kàareh wɔ̀ (iyul 2), ki tɔ̀ke' itáan nnɔ̀ ya ciɛnb li fuobe ma bo (iyul 3).

Pɔ̀l tɔ̀ke' Timote ki ye wɔ̀ ní li likeh itáan nnɔ̀ kɛ mɔ̀nmɔ̀nm (iyul 4-6).

### *Ifuonde*

<sup>1</sup> Min Pɔ̀l, n yé \*Yesu Kristo ya tond nɛ. Uwien ti'Nmiɛnl nin Yonbdaan \*Yesu Kristo wà yé ti'dɛndɛnl nnɔ̀ nɛ ye ní li yé u'tond. <sup>2</sup> Timote, n kieh kugbɔ̀nku kuu ní de sin nɛ. A yé n'bumɔ̀nk kí nɛ ti nɔ̀mɔ̀be mitekjim mà nnɔ̀ bo nɛ. Baa Uwien nin Yonbdaan \*Yesu Kristo ní juoke nɛ, kí muɔ̀ nɛ micɛɛkm, kí de nɛ uyɛnduɔ̀n.

### *Liike a'yul bo nin biwɔ̀nwɔ̀knɛ bà tulndɛh binib nnɔ̀*

<sup>3</sup> N là joh Maseduɔ̀nn ya tinɛnm bó ma nnɔ̀, n là sure' nɛ á juore Efɛs ya du ni, kí pien binib bà te len ki wɔ̀knɛ miwɔ̀knɛ mà nɔ̀ kpe sɛn nnɔ̀ nɛ. <sup>4</sup> Bi la ji ní li tuuke gbɛyiɛnkaar nin bi'yaajɛb ya yel yà bi findeh i'bo ka gbendɛh nnɔ̀ bo. Nɛn nɛ cèrɛh miniɛm bàareh. Na cèrɛh binib bɛndɛh Uwien bonde' ma bo wɔ̀ ní nɔ̀miɛn binib kí nɛ mitekjim bo. <sup>5</sup> N là sure' nɛ á pien bɛ nɔ̀ bɛ ní li yé binib bà ya fɛ̀l bo nɔ̀ nɔ̀mɔ̀be jɔ̀knt, kí li yíe tɔ̀b, kí li nɔ̀mɔ̀be iyɛnmaalmɔ̀nmɔ̀n, kí li nɔ̀mɔ̀be mitekjimɔ̀nm. <sup>6</sup> Binib biba te, ka ji pɛ u ya sɛn bo, bi tùrɛ' nɛ, ki lienɛh gbɛfɛnfɛnm, <sup>7</sup> ki yih bi'ba \*Yiko ya wɔ̀nwɔ̀knɛ, ka bɛn bi lienɛh nà nnɔ̀ ya tingi, ki niirɛh nin bi cɛ nà bo nnɔ̀.

<sup>8</sup> Ti bɛn ki ye \*yiko mɔ̀n nɛ, nǎ yé unil taah wɔ̀ ki sɔ̀nh itùon ni'donbó la. <sup>9</sup> Tùɔ̀rɛ mɛn kí cii kí ye yiko nɔ̀ te ki de' nimɔ̀n, ama u te ki de' bà nɔ̀ boh wɔ̀ nin bà yíe' Uwien ya nɔ̀bu bó nin bà nɔ̀ pɛ Uwien bo nin bibierɛnb nin bà yindeh Uwien nin u'bont kɛ nin bà kuuleh bi'naamɛ nin bi'baamɛ nin bà kɛ yé binikub nin <sup>10</sup> isɔ̀nsɔ̀nd nin bà dàan' bipiib ki duɔ̀ndɛh nin bi'jɛtɔ̀b nin bà kuɔ̀rɛh iyonbe nin bitonnɛndɛnb nin bà poleh itonnɛnpɔ̀l nin bà kɛ yíe' miwɔ̀knɛ mà kpe usɛn nnɔ̀ nɛ. <sup>11</sup> Mi ya wɔ̀knɛ nɛ pɛ tigbɛmɔ̀nmɔ̀nt tà wɔ̀ngɛh Uwien ya kpiɛke nnɔ̀ bo. Uwien uyɛnduɔ̀nciɛn ya daan nɛ taa' tù ki nɔ̀kn' nni.

### *Pɔ̀l faareh Yesu Kristo*

<sup>12</sup> Yonbdaan \*Yesu Kristo nɛ de' nni mituɔ̀m. Nɛn bo nɛ n faareh wɔ̀. U du n'bo nɛ ki gènde' nni ní sɔ̀n u'tuonl. <sup>13</sup> Uyo uba n là lienɛh u'bo fɛnfɛnm nɛ, ki jèndɛh u'nib, ki bre ka muɔ̀h bɛ cɛɛkm, ama u muɔ̀ nni micɛɛkm, kime ma là bɛn n teh bà, ka laan là teke' wɔ̀ ki jin' mɔ̀. <sup>14</sup> Yonbdaan \*Yesu Kristo ya juokm yɛbe ki gbien' ma nnɔ̀ nɛ u cèrɛ' n teke' wɔ̀ ki jin', ki yíe wɔ̀n nin u'nib kɛ. <sup>15</sup> Tigbɛr tuu te nɛ, ki kpe binib ní tuo tu'kɛ. Tun si: \*Yesu Kristo baa' uɛ̀ndun wuu ni, wɔ̀ ní lá nɔ̀miɛn bibierɛnb nɛ, nɛ min nɛ yé ubierɛn ki cɛn' bi'kɛ. <sup>16</sup> \*Yesu Kristo muɔ̀ nni micɛɛkm, nɔ̀ min wà yé ubierɛn ki cɛn' binib kɛ nnɔ̀ bo wɔ̀ ní wuɔ̀n u nɔ̀mɔ̀be sukɛ ki gbien' ma bo nɛ. Nɛn nɛ li yé kudɛku binib bà li teke wɔ̀, kí ji

kí le limiel là ña ñmabe gbenm nnò bo. <sup>17</sup> Binib ke ní li pèkeh Uwien, kí li kpièkreh wò uyo ke. Wòn ne yé Uwenbaabe, nil ña lenh wò, u yé Ubercien wà tuu ki te uyo ke ne. Ami.

<sup>18</sup> N'buk Timote, n ye ní tòke ñe tigber tà sò kí ñe bi là sòkn' Uwien ya ñòbon yà a'bo nnò. Ní yen bo kí mò limuòl là mòn, <sup>19</sup> kí li ñmabe mitekjim nin iyenmaalmòn mòn. Binib biba dàan' i ya yenmaale ne ka ji ñmabe tekjim. <sup>20</sup> Bi'ni bile si: Himene nin Aleksand. Ne n taa' be ki ñukn' Satan, ñò be ní bende kí ye na mòn be ní ji ní suke Uwien.

## 2

### *Li kàareh men ki dienh binib ke*

<sup>1</sup> Nèn bo, tigber tà yé tigbekpièkt n li tòke ne si: ní li kàareh ki mièh Uwien, ki gbáanh wò, ki faareh wò ki dienh binib ke <sup>2</sup> nin biberb nin udu ya cienb ke ñò tí li te uyenduon ni, niba la ñaabe ti'yenm, kí li pe Uwien ya sen bo, kí li yé binib bà ya tetem kpe be ní li boh be. <sup>3</sup> Nèn ne mòn Uwien ti'Ñmienl ya nun bó ki sònge u'yenm. <sup>4</sup> U yíe binib ke ní ñmère ne, kí bende kí ye u'gber yé tigbemònt. <sup>5</sup> Kime Uwien te uba ne. Ucendenduol mò te uba ne binib nin Uwien ya siik ni. Wòn si: \*Yesu Kristo wà tien' u'ba unisaal, <sup>6</sup> ki tuo' ki teke' binib ke ya kuum ki kpo', ñò wò ní de be kí wiè nnò. Nèn ne wuon' ki ye Uwien yíe wò ní ñmien binib u ya yo ne. <sup>7</sup> Nèn bo ne Uwien gènde' nni ní li yé \*Yesu Kristo ya tond, kí li kpaandeh u'gber, kí li wòknh tù bà ña yé Sufmbè ñò be ní teke wò kí ji, kí bende kí ye tù yé tigbemònt ne. Ma nendeh n tòkeh tigbemònt ne. <sup>8</sup> Tò, n yíe Kristo yaab te nà saan ke la, bijeb ní li kàareh, ki findeh inuò, ki la cère yí ní li yé binib bà ya fèl bo ñmabe tijòknt ya nuò, ki la li ñmabe benpiebe, ki la li findeh nin tób.

### *Bipiib li ñmabe mitetem mà*

<sup>9</sup> Bipiib ben wòn, n yíe be ní li guoh ní kpe upii ní li guoh ma bo ne, ki la cère bi guo la, be ní li lenh bi'fè, ki la wòngèh bi'ba, ki la li lùoh yulòle wà faa, ki la tungeh ñòkm ya kenjonga wà ya daaku faa, ki la bèleh ilaan yà ya daaku faa, ki la guoh wengolkaar tà ya daaku faa. <sup>10</sup> Ama be ní li sònèh itùonmòn mòn. Nèn ne mòn ki de' bipiib bà ke lienh ki teh bi pe Uwien ya sen bo. <sup>11</sup> Bi wòknh be uyo wà la, be ní li te suoo, kí li cengeh nin mibom. <sup>12</sup> Ma ní de be sen be ní wòkn jeb, ka ní de be cient jeb bo. Be ní li te suoo. <sup>13</sup> Kime Uwien là kpiè' ki ñen' Adam ne, ki tuon' Efa. <sup>14</sup> Na yé uwe\* là lere' Adam ne, u là lere' Efa ne u saa' likuòl ki bii' Uwien. <sup>15</sup> Ama upii juore' ki ñmabe mitekjim nin miyiem, ki pe Uwien ya sen bo mòn mòn m, ka wòngèh u'ba la, timer ña ní cère Uwien la ñmien wò.

## 3

### *Kristo ya táan yaab ya senlierl li te ma bo*

<sup>1</sup> N ye ní tòke tigber tà nò tù te ne. Unil yíe wò ní li likeh Kristo ya taanl la, u gènde' lituonmòn mòn l ne. <sup>2</sup> Ní kpe Kristo ya taanl yaab ya senlierl ní li yé unil wà ña ñmabe biil ne, kí li ñmabe upii uba, kí li coh u'ba tibont ke ni, kí li ñmabe miyenm, kí li yé unil wà bi boh wò, kí li teknh bicenb, kí li yé unil wà li fre kí wòkn binib Uwien ya gber mòn mòn m, <sup>3</sup> kí la taa' u'ba kí de daam, ki la ñmabe jèr. Wò ní li ñme nin binib ke, ki la findeh nin nib, ki la cère u'nun ní li mòn ilike bo, <sup>4</sup> kí li likeh u'dencenl mòn mòn m, kí cère u'bumu ní li ciìh litubl, ki ñmabe mibom ní kpe kibuk ní li ñmabe mibom ma bo. <sup>5</sup> Kime unil ña ní fre kí liike u'dencenl mòn mòn m la, u li tien mila kí liike Uwien ya taanl yaab-i? <sup>6</sup> U la li yé wà ña wuòke' Uwien ya sen ni. U yé unil wà ña wuòke' Uwien ya sen ni la, nba la, u li ñmabe tigbengt, ne kí le utudere ten usenpol. <sup>7</sup> Ní kpe bà ña yé Kristo yaab ní li pèkeh wò ne. U te nnò la, nil ña ní len u'bo fènfènm, ne senpol ya dièku mò ña ní cuo wò.

### *Kristo ya taanl ya totorb li te ma bo*

\* **2:14** Bi ye uwe la, bi niireh Satan ne. Liike 2 Korènt 11:3.

<sup>8</sup> Kristo ya taanl ya totorb mə li yé binib bà bi boh bε nε, ki la li yé iñuən ilele ya nib, ki la taa bi'ba kí de daam, ki la jinh pònt. <sup>9</sup> Kí cère jòknt la li te bi'fèl bo ηə bε ní li pε tigbεmònt tà Uwien kpiire' tù nnə bo. <sup>10</sup> Bε ní kpiε kí fiin bε kí liike bi'tetem te ma bo kí yaan. Bi laa' ba ηməbe biil la, bi li fre kí li sənə bitotorb ya tùon. <sup>11</sup> Bipiib bà yé bitotorb mə li yé binib bà bi boh bε nε, ki la lienə təb bo fεnfεnm, kí li coh bi'ba tibont kε ni, kí li yé bipiib bà bi du bi'bo isen kε ni. <sup>12</sup> Kristo ya taanl ya totorb li ηməbe upii uba uba nε, kí li likeh bi'bumu nin bi'dencen mənəmnm. <sup>13</sup> Kimε binib bà sənə bitotorb ya tùon mənəmnm nnə ya yel li kpιenə nε. Bi ηməbe midum ki gbien' bi teke' \*Yesu Kristo ki jin' ma nnə bo.

*Nà cère' Pəl kεle' kugbənku kuu nə*

<sup>14</sup> N kieh ηε kugbənku kuu nə ki daan n li baa a'saan na ní wuəke nε. <sup>15</sup> Ma li baa' tonm mənən la, kugbənku kuu li cère á bende a li ηməbe mitetem mà Uwien ya nib ni. Binib nnə yé Uwien limiel ya daan ya taanl nε. Li te ten likpənkpən l nε ki co tigbεmònt ki dienə tù mituəm.

*Uwien kpiire' tigbεbalkaar ki wuən' binib*

<sup>16</sup> Imən, Uwien bo ya paanm ya gber tà buə u kpiire' tù nnə yé tigbεcient nε. Kristo nε yé tigber tà buə nnə, ki tien' u'ba unisaal, ki ñen' u'ba upaan bo \*Mifuoñaanm nε wuən' ki ye u yé ugbεmòndaan, u cère' Uwien ya tondb laa' wə, bi kpaande' u'gber bà ηa yé \*Sufmbε ni, nε binib teke' wə uηendun ni ki jin', Uwien taa' wə u'kpiεke ni ki don' paaki bó.\*

## 4

*Miwəknm mà ηa kpe sən ya gber*

<sup>1</sup> \*Mifuoñaanm len' ní wien ki ye ufəfəryo binib biba li wiε mitekjim ya gber, kí paan isenpol tulndeh binib ki cèreh bi wəknə miwəknm mà nnə bo. <sup>2</sup> Bi li cère binib bà yé iñuən ilele ya nib, ki yé bitonnendənb, ibiere tebe' bi'yenm ten kudíεku kua ηa ηməbe ηmirm nnə, ní tuln bε. <sup>3</sup> Binib bugben kùəndeh upiikuən nin tijier tubambε ya jim nε. Uwien nε ñen' tijier nnə ηə binib bà teke' wə ki jin' ki ben tigbεmònt nnə ní li jinh tù, ki faareh wə tu'bo. <sup>4</sup> Uwien ñen' tibont tà kε nnə, tù mən nε. Ti la səngeh tuba, ti jinh tà kε la, tí li faareh wə tu'bo. <sup>5</sup> Kimε Uwien ya gber nin ikaare nε mənəreh nibonn kε.

*Pəl təke' Timote u li te ma bo u'tuonl ni*

<sup>6</sup> A wəknə Kristo yaab tigber tuu nə la, a li yé wən \*Yesu Kristo ya tonsənl wə mən, kí cère Uwien ya gber tà a teke' tù ki jin' nnə nin miwəknmənəmnm mà a tūəre' ki paan' mi'bo nnə ní li yé a'bo tijier. <sup>7</sup> La tuuke gbeyienkaar, kimε ta kpe Wien ya sən. Nikn kí li pε Uwien ya sən bo mənəmnm. <sup>8</sup> Unil ñikndeh ki tiinh u'gbenent ní jaare la, ní mən nε ama ní li tore wə waamu nε. Unil ñikndeh ki pε Uwien ya sən bo mənəmnm la, nən nε li tore wə isen kε ni, kimε Uwien ye nən nε li cère binib ní li fuobe fεnfεnnə wuə nin uyo wə we ní nnə. <sup>9</sup> Tigber tuu te nε, ki kpe binib ní tuo tu'kε. <sup>10</sup> Ti sənə itùon nin inunmón, ki mənə limuəl, kimε ti ηməbe lidendənl Uwien limiel ya daan bo nε. Wən nε yé binib kε ya Nmiənl. U cinbe ki yé bà teke' wə ki jin' ya Nmiənl nε. <sup>11</sup> Wəkn binib tigber tuu, kí təke bε kí ye bε ní li teh nnə. <sup>12</sup> La cère uba ní yinde ηε a yé kinacenfənbuk ma nnə bo. Ama li yé wə cuube u'lenm ni, ki ηməbe mitekjim nin mitetemənəmnm, ki yé binib, ka ηməbe biil ηə bà teke' Uwien ki jin' nnə ní tēkn a'taal ni. <sup>13</sup> Taa a'ba kí de \*Uwien ya gbənku ya kəanm Kristo yaab ni, kí li sureh bε, kí li wəknə bε haali nin n'baam. <sup>14</sup> La dāan \*Mifuoñaanm

\* 3:16 Bi li fre kí lεbre Uwien taa' wə u'kpiεke ni ki don' paaki bó ki ye Uwien cère' u'kpiεke yebe mə.

ya paabu bùa te a'ni nnò. A laa' bù kí ñe bi là sòkn' Uwien ya ñàbon yà a'bo nin Kristo ya taanl ya ciénb là taa' bi'nuò ki paan' a'bo ma nnò bo ne. <sup>15</sup>Taa a'ba kí de nen ke, kí sòn lituonl nnò tinòjer tule. Nnò ne binib ke li le a'tùon cuonh ma bo. <sup>16</sup>Liike a'tetem, kí li ben a wòknh binib ma bo, kí li ñikndeh isen ke ni. A teh nnò la, sin bugben li ñmere, ne bà cengeh a'bó nnò mọ li ñmere.

## 5

### *A li te ma bo nin Kristo yaab*

<sup>1</sup> La gbiereh jecien nin jer, ama li gbiereh wò ten a'baa, kí li gbiereh binacenfènb ten a'ningjeb, <sup>2</sup> kí li gbiereh ipiicien ten a'naambe, kí li gbiereh bijefènb ten a'ninsieb, kí la kuon a'ba jòknt nin be. <sup>3</sup> Li toreh bikpopiib bà ña ñmòbe bà likeh be. <sup>4</sup> Ukpoppii ñmòbe mubumu bii iyaabii la, ñi mòn ben ne ní kpié kí li toreh bi'den yaab, kí wuon kí ye bi boh be. Bi teh nnò la, bi jiindeh bi'naambe nin bi'baambe bi là wube' be ma nnò bo ne, kime Uwien ya yenm sange nen bo ne. <sup>5</sup> Ukpoppii wà ña ñmòbe wà li likeh wò, ki juore' ki te u'ba kpein la, u du Uwien bo ne, ki tuu ki kàareh ki mieh wò ñonku nin wien ni. <sup>6</sup> Ama ukpoppii pè lisònsòndl bo, ki teh u'yenm yíe nà la, nin u fuobe ma ke nnò, Uwien ya sen bo wòn, u kpo' ñò. <sup>7</sup> Tòke bikpopiib tigber tuu nò ñò nib la le bi li dule nà bo kí biin be. <sup>8</sup> Wà ña toreh u'yaab, ni'ke tu nin wa toreh u'tiema dencenl ni yaab la, u wie' mitekjim ya sen ne, ki bre ki cen' wà ña teke' Kristo ki jin'.

<sup>9</sup> A li kele ukpoppii wà ya yel bikpopiib ya yel ya gbònkú si: wà tí fii' ma, u kun' ticer miba kpein ne, ki ñmòbe ibin piluob. <sup>10</sup> U li yé upii wà sòn itùonmòmòm binib ke pèkeh wò i'bo ne. Yen si: u wube' u'bumu mòmòmòm, ki teke' bicenb, ki sòkre' Uwien ya nib ya tãan, ki tore' bijiinb, u'nun mòn wò ní li sòn itùonmòmòm.

<sup>11</sup> Bikpopiib bà fàan ben wòn, dàan be, kime bijeb ya mènku lá cuo' be la, bi li wie Kristo ya gber ne, kí li nuunh be ní liebe kí kun ticer, <sup>12</sup> ka ní sòn bi là len' ki ye bi li sòn Kristo ya tuonl là nnò. Nen bo ne bi li ñmòbe libiil. <sup>13</sup> Ba ñmòbe tòn ma nnò, bi li cuonh ki lindeh inien ne. Na yé ba ñmòbe tòn baba ne, bi li yé biñòkòbdenb ne, kí li kòh binib ya gber ni, kí li lienh gbefenfenm. <sup>14</sup> N yíe bikpopiib bà fàan nnò ní liebe kí kun ticer ne, kí maa mubumu, kí li likeh bi'den mòmòmòm, ki la cère' unennend ní le u li dule nà bo kí len tí'bo fenfenm, <sup>15</sup> kime bikpopiib biba wie' Kristo ya sen ne ki paan' \*Satan bo.

<sup>16</sup> Upii wà teke' Kristo ki jin' ki ñmòbe bikpopiib u'den la, wò ní li toreh be, ki la cère be ní li yé Kristo ya taanl bo tukl, ñò lè ní fre kí li toreh bikpopiib bà ña ñmòbe bà likeh be nnò.

<sup>17</sup> Kristo ya taanl ya ciénb likeh Kristo yaab mòmòmòm la, bi kpe be ní li boh be, kí li pèh be mòmòmòm ne. Ni'ke tu nin bà kpaandeh Uwien ya gber, ki wòknh tù nin inunmòn nnò; <sup>18</sup> kime ní kele' \*Uwien ya gbònkú ni ki ye: «A taa' uné u taanh iji la, ña ní lóle u'ñòbu», kí liebe' ki ye: «Wà sòn lituonl la, u kpe be ní pè wò u'paaku ne.»

<sup>19</sup> Bi biin' Kristo yaab ya cién la, na yé mòmòmòm bile bii bita ne biin' wò la, la cenge tù. <sup>20</sup> Kristo yaab ya ciénb ya uba tien' ibiere la, kòn nín wò binib ke ya nun bó ñò bà sien' nnò ní fenge.

<sup>21</sup> N sureh ñe Uwien nin \*Yesu Kristo nin Uwien ya tondb bà cii' u'ñòbu bó nnò ya nun bó ne, li pè n wuon' ñe isen yà nò bo, ki la ñmòbe a'ñòbu gbè nà bó, ki la ñmòbe gèngènde mọ. <sup>22</sup> A ye á de unil lituonl Kristo ya taanl ni la, la yíe tonm kí pòk kí yuon a'nuò u'bo kí kàare kí de wò. La kò tób ya biere ni. Cère sin bugben ya tetem ní li wien.

<sup>23</sup> A tuu ki bungreh ma nnò, la li ñuh ñunm baba, li lengeh midaam mọ waamu, ñò nè ní li toreh a'benku. <sup>24</sup> Bi lenh binib biba ya biere upaan bo ne kí yaan kí bu be tibuur. Bitòb mọ yi ña kpiireh tonm. <sup>25</sup> Itùonmòmòm mọ te upaan bo ne. Iba lí buò mòmòm la, ya ní juore kí li buò.

## 6

### *Iyonbe nin i'cenbaambe ya gber*

<sup>1</sup> Binib bà kɛ yé iyonbe nnɔ bɛ ɾ li boh bi'cɛnbaambɛ mɔnmɔnm, nɪ kpe bɛ ɾ li boh bɛ ma bo, ɲɔ uba la lɛ u li dule nà bo kí len Uwien nin ti'wɔknm bo fɛnfɛnm. <sup>2</sup> Iyonbe yà ya cɛnbaambɛ teke' Kristo ki jin' nnɔ, ɪ la likeh i'cɛnbaambɛ nnɔ fɛnm, kí ye bi yé i'ninjɛb ma nnɔ bo. Ama yɪ ɾ li tùɔreh ki sɔnh lituonl ki dienh bɛ, kime bɛn bà jondeh i'tùon bo nnɔ yé bà teke' Kristo ki jin' Uwien yíe bɛ nɛ.

### *Miwɔknm mà ɲa kpe sɛn ya gbɛr*

A li wɔknh binib nà sɔ, ki sureh bɛ bɛ ɾ li teh nnɔ. <sup>3</sup> Unil wɔknh miwɔknm mà bore' miba, ka pɛ ti'Yonbdaan \*Yesu Kristo ya gbɛmɔnmɔnt bo, ka pɛ miwɔknm mà kpe Uwien ya sɛn bo la, <sup>4</sup> tigbengt nɛ yɛbre' nin udaan nɛ wa bɛn niba, ki fɛ miniɛm, ki findɛh iɲɔbon bo. Nɛn nɛ cɛrɛ' ibinbinbe nin ikɔnkɔn nin isuk nin itɛnfuonbiɛrɛ tɛ, <sup>5</sup> ki cɛrɛh binib niɛh miniɛm ka gbɛndɛh, kime bi'yɛnmaale ɲa kpe sɛn, nɛ ba bɛn gbɛmɔnt. Bi maaleh ki teh bi paan' Uwien ya sɛn bo la, bi li lɛ lifaal nɛ. <sup>6</sup> Imɔn, unil ya yɛnm sɔngɛ u ɲmɔbe nà bo, ki pɛ Uwien ya sɛn bo la, nɛn nɛ yé lifaaciɛnl ki de' udaan. <sup>7</sup> Kime ta tuke' niba ki baa' uɲɛndun wuu ni, ka ɾ tuke niba kí ɲɛ u'ni mɔ. <sup>8</sup> Nɛn bo, ti ɲmɔbe tijier nin tiwɛngolkaar la, cɛrɛ mɛn ti'yɛnm ɾ li sɔngɛ tu'bo. <sup>9</sup> Ama binib bà ya nun mɔn lifaal bo nnɔ luh mibiikm ni nɛ. Tijɔrbont tà yɛbe, ki bre ya mɛnku li cuo bɛ tɛn kudiɛku, kí cɛrɛ bɛ ɾ kɔ mikuum ni kí juore fɛnm. <sup>10</sup> Kime ilike ya yíem yé ibiɛrɛ kɛ ya ɲaan ya uba nɛ. Binib biba taa' bi'ba ki de' ilike ma nnɔ nɛ ki tùrɛ', ka ji pɛ tekjim ya sɛn bo, nɛ ki nuun' bi'ba bo ijɛndciɛn.

<sup>11</sup> Sin Uwien ya nilɔ, la paan nɛn kɛ bo, kí li yé unil wà cuube, kí li pɛ Uwien ya sɛn bo, kí li ɲmɔbe mitekjim, kí li ɲmɔbe miyíem nin kuminku, kí li ɲmɛ nin unil kɛ. <sup>12</sup> Mɔ mitekjim ya muɔl mɔnmɔnm, kí li nuunh limiɛl là ɲa ɲmɔbe gbɛnm. Uwien yin' ɲɛ li ya miɛl bo nɛ, kí ɲɛ lidaali là a len' mɔnmɔnm bimɔnkunb bà yɛbe ya nun bó ki ye a teke' wɔ ki jin' nnɔ. <sup>13</sup> N sureh ɲɛ Uwien wà dienh tibont kɛ limiɛl nin \*Yesu Kristo wà là kun' imɔn mɔnmɔnm Pɔns Pilat saan nnɔ ya nun bó nɛ. <sup>14</sup> Li boh n tɔke' ɲɛ nà kɛ nnɔ, kí li wien, kí la li ɲmɔbe biil kí tɪ baa uyo wà Yonbdaan \*Yesu Kristo li baa ní nnɔ. <sup>15</sup> Uwien sien' uyo wà nnɔ lá baa' la, u li cɛrɛ wɔ ɾ baa ní. Uwien nɛ yé uyɛnduɔn ya daan. Wɔn baba nɛ yé tibont kɛ ya Cɛnbaa, ki yé bibɛrb kɛ ya bɛr, ki yé yonbɛnb kɛ ya Yonbdaan. <sup>16</sup> Wɔn baba nɛ ɲa ɾ kpo, ki tɛ kuwenwenku kùà ni uba ɲa ɾ frɛ kí kɔ ku'ni. Uba ɲa kpele ki laa' wɔ, ka li li frɛ kí lɛ wɔ mɔ. Wɔn si kupɛnpɛku nin mituɔm uyo kɛ. Ami.

<sup>17</sup> Tɔke binib bà yé bifàadɛnb uɲɛndun wuu ni nnɔ kí ye bi la li ɲmɔbe gbɛngt, ki la li du lifaal nnɔ bo, kime li yé mitafaam nɛ. Ama bɛ ɾ li du Uwien bo, kime wɔn nɛ dienh tɛ tibont kɛ ki gbɛkeh ɲɔ tí li jondeh tu'bo. <sup>18</sup> Tɔke bifàadɛnb nnɔ kí ye bɛ ɾ li teh mimɔnm, kí li sɔnh itùon yà mɔn ki gbɛn', kí li punh ki la cuɔleh, kí li gbiinh bi'bont nin binitɔb. <sup>19</sup> Bi teh nnɔ la, bi taakeh lifaal là mɔn ka ɾ saa nɛ ki blinh bi'ba wenli bo bɛ ɾ wun lɛ limɛmɔnl.

### *Tigbɛfɔrkaar*

<sup>20</sup> N'ɲɔ Timote, li likeh Uwien guun' ɲɛ nà nnɔ mɔnmɔnm. La paan gbɛfɛnfɛnm bo, kime tà kpe Wien ya sɛn, ki la paan bi niɛh miniɛm mà ki maaleh ki teh bi ɲmɔbe mibɛnm nnɔ mɔ bo. <sup>21</sup> Binib biba lienh ki teh bi ɲmɔbe mi ya bɛnm nɛ ki tùrɛ', ka ji pɛ tekjim ya sɛn bo. Uwien ɾ juoke nɛ.



## Kugbɔnlieku kùà Pɔl kɛle' ki de' Timote nnɔ Nà wɔngeh kugbɔnku kuu te ma bo

Pɔl kɛle' kugbɔnlieku kuu ki de' Timote igbierfɔrke nɛ. U kɛle' kugbɔnku kuu uyo wà u te lipɛkl ni nnɔ nɛ (2:9). Binib bà yɛbe là wiɛ' wɔ nɛ (1:15; 4:10-16). U là bɛn ki ye u'kuum ya yo baa'-a (4:6), nɛ u cɛbreh u'tonsɔnlie Timote wà u yíe wɔ tɛn u'buk nnɔ.

Kugbɔnku kuu tiɛreh Pɔl ya fuobm bó nɛ. U là sɔn' Yesu ya tond ya tòn ki wɔkn' binib, ki jin' ijɛnd tigbɛmɔnmɔnt ya tɔkm bo. Pɔl gbierɛ' Timote ki tɔke' wɔ ki ye wɔ n̄ tuo kí ji ijɛnd Kristo ya tòn bo (2:1-13), ki tɔke' wɔ ki ye wɔ n̄ li wɔknh Uwien ya gbɛr mɔnmɔnm (2:14-4:15). Nɛn bo, wɔ n̄ dɔan iñɔbon bo ya finfinde, kí búle bà teh tibont tà ña kpe sɛn nnɔ ibuɔn, kí tɛkn wɔn Pɔl ya taal ni, kí tùɛre kí li pɛ Pɔl nin biwɔnwɔkntɔb wɔkn' nà nnɔ bo.

### *Ifuonde*

<sup>1</sup> Min Pɔl, n yé \*Yesu Kristo ya tond nɛ Uwien ya yíem bo, ki tɔkeh binib Uwien pùon' lipuonl ki ye u li de bɛ limiɛl là \*Yesu Kristo bo nnɔ ya gbɛr. <sup>2</sup> Timote, n kiɛh kugbɔnku kuu n̄ de sin nɛ. A yé n'buk kà n yíe kè nɛ. Baa Uwien nin ti'Yonbdaan \*Yesu Kristo n̄ juoke ñɛ, kí muɔ ñɛ micɛɛkm, kí de ñɛ uyɛnduɔn.

### *Pɔl saakreh Timote ya gbenɛnt*

<sup>3</sup> N faareh Uwien wà n pukeh wɔ nin lifɛl là ña ñmɔbe jɔknt tɛn n'yaajɛb là teh ma bo nɛ. N tuu ki tien a'bó n'kaare ni ñɔnku nin wien ni nɛ. <sup>4</sup> N tiɛre' a'muɔ bó la, n̄ naan n̄ pɔk kí lɛ ñɛ nɛ, ñɔ n'yɛnm n̄ sɔnge kí gbien. <sup>5</sup> Ma sunde' a ñmɔbe mitekjimɔnm mà nnɔ bó. A'yɛ Loyis nin a'naa Enis nɛ kpiɛ' ki laa' mitekjim nnɔ. Nɛ n du ki ye a'mɔ ñmɔbe mi ya tekjim nɛ.

<sup>6</sup> Nɛn bo nɛ n tiɛreh ñɛ, á fikre Uwien là de' ñɛ \*u'Fuoñaanm ya paabu bùa nnɔ ya tuɔm uyo wà n là yuon' n'nuɔ a'bo, ki kàare' ki de' ñɛ nnɔ. <sup>7</sup> Kimɛ Uwien de' tɛ \*Mifuoñaanm mà nnɔ ña cɛreh ti tiinh jɛwaanbu, ama m̄ dienh tɛ mituɔm nɛ, ki cɛreh ti yíe binib, ki coh ti'ba. <sup>8</sup> Nɛn bo, li kundeh Yonbdaan bo imɔn ki la tiinh fɛ, ki la cɛre fɛ n̄ li ñmɔbe ñɛ min wà te lipɛkl ni u'bo nnɔ bo. Ama Uwien ya tuɔm bo, cɛre min nin sin n̄ li jɛndeh tigbɛmɔnmɔnt bo. <sup>9</sup> Wɔn nɛ ñmien' tɛ, ki yin' tɛ, ki tien' tɛ u'yaab. Na yé ti'tuon bo nɛ u tien' nnɔ, ama u cɛkre' u'yɛnm nɛ ki tien' nnɔ. \*Yesu Kristo bo nɛ u tien' tɛ tinimɔnt ki laa' wa laan ñɛn' uɛndun. <sup>10</sup> Fɛnfɛnnɔ wuɔ, ti'Ñmienl \*Yesu Kristo baa' ki wuɔn' tɛ tinimɔnt nnɔ. Wɔn nɛ gben' mikuum ya tuɔm, ki ñɛn' limiɛl là ña ñmɔbe gbenm upaan bo kí ñɛ u'gbɛmɔnmɔnt bo. <sup>11</sup> Tigbɛmɔnmɔnt nnɔ bo nɛ Uwien gɛnde' nni n̄ li yé \*Yesu ya tond, kí li tɔkeh tù binib, kí li wɔknh bɛ tù. <sup>12</sup> Nɛn bo nɛ n jɛndeh yíe ya jɛnd. Ama na ñmɔbe nni fɛ, kimɛ n bɛn n teke' udaan wà ki jin', ki du ki ye u li fre kí guure u ñukn' nni nà nnɔ kí t̄ baa lidaali là Uwien li bu binib tibuur nnɔ.

<sup>13</sup> Li ñuuke n là tɔke' ñɛ tigbɛmɔnt tà nnɔ nin mitekjim nin miyíem mà ñɛn' \*Yesu Kristo saan nnɔ. Cɛre tigbɛr nnɔ n̄ li pekreh ñɛ. <sup>14</sup> \*Mifuoñaanm mà te ti'ni nnɔ ya tuɔm bo, li ñuuke a cii' miwɔknm mà nnɔ mɔnmɔnm.

<sup>15</sup> A bɛn ki ye bà kɛ yé Asi ya tinfɛnm ya nib nnɔ kɛ wiɛ' n'gbɛr ñɔ. Bi'ni biba si: Fijɛl nin Hemojɛnn. <sup>16</sup> Yonbdaan n̄ muɔ Onesifɔr nin u'den yaab micɛɛkm, kimɛ u sɔbe ki saakreh n'gbɛnɛnt nɛ. Nin n te lipɛkl ni ma kɛ nnɔ, fɛ ña cuo' wɔ n'bo. <sup>17</sup> U baa' Erom ya du ni ma nnɔ, u cuon' ki nuun' nni nin inunmɔn nɛ ki t̄ laa' nni. <sup>18</sup> A bɛn u là tore' nni Efɛs ya du ni ma bo ki cɛn' unil kɛ. Yonbdaan \*Yesu n̄ muɔ wɔ micɛɛkm lidaali là Yonbdaan Uwien li bu binib tibuur nnɔ.

## 2

*Tuo kí li jèndeh Yesu Kristo bo*

<sup>1</sup> Sin n'bukε, cère \*Yesu Kristo ya juokm ní li dienh ηε mituom Uwien ya sen ni. <sup>2</sup> A là cii' tigber tà n'saan bimònkunb ligol ya nun bó nnò, á taa tù kí tòke binib bà bi du bi'bo, bi'mò li fre kí wòkn tù binitòb. <sup>3</sup> A yé \*Yesu Kristo ya sojamòn nε, a'mò ní li jèndeh u'bo. <sup>4</sup> Soja sòn h sojatuonl ki yíe wà gènde' wò ya yεnm ní li sange u'bo la, wa ji li pε bà ηa yé sojambe ya tùon bo. <sup>5</sup> Unil jon' minònsenniεm ka paan' minònm ya kùon bo la, wa ní lε minònm nnò ya suul. <sup>6</sup> Ukpaal wà sòn h bukpàabu ni nin inunmón la, wòn nε li kpiε kí ji bukpàabu nnò ya jier. <sup>7</sup> Cii n tòke' ηε nà nò ya tingi Yonbdaan nε li cère á cii ni'kε. <sup>8</sup> Tiεre \*Yesu Kristo ya gber, u yé \*Dafid ya yaabil nε. U kpo', nε ki mεkre' bitenkpiib ni. N tókeh binib tigbemònmònt tà nnò nínò. <sup>9</sup> Tun bo nε bi jèndeh nni haali ki tí lóle' nni tikudòkr ten n yé udukond nε. Ama Uwien ya gber tun ηa lùo. <sup>10</sup> Nεn bo nε n ηmòbe kuminku ijend kε ni, ηò Uwien gènde' binib bà nnò bo, \*Yesu Kristo bo, bi'mò ní ηmεre, kí lε ukpíεke wà ηa ηmòbe gbenm nε.

<sup>11</sup> Tigber tuu te nε:

«Ti kpo' nin Kristo la,

ti li fuobe nin wò mò nε,

<sup>12</sup> Ti mìn de' kí pε u'bo la,

ti li ji libel mò u'saan nε,

ti ye ta ben wò la,

u'mò li ye wa ben te nε.

<sup>13</sup> Ta yé gbemòndεnb la,

wòn tuu ki yé ugbemòndaan nε,

kimε wa ní fre kí yíe u'tiεma tetem.»

*Li pε tigbemònt ya sen bo*

<sup>14</sup> Tiεre binib tigber tuu nò, kí tòke bε Uwien ya nun bó, kí ye bi la li findeh ñòbon bo, kimε ifinfinde nnò ηa pukndeh niba, ì tulndeh bà cengeh yí nnò nε. <sup>15</sup> Nikn kí li yé unil wà ya tùon mòn Uwien ya nun bó. Li yé u'tonsònl wà fε ηa ηmòbe wò u'tuonl bo; kí li tókeh binib tigbemònt mòmòmnm. <sup>16</sup> La paan gbεfenfεnm bo, ta kpe Wien ya sen, kimε bà pε tu'bo nnò tùreh Uwien ya sen ki joh nε. <sup>17</sup> Bi wòkn h miwòknm mà nnò bre ten linatuònel nε ki bukeh ki joh. Bi ya biba si: Himene nin Filetòs. <sup>18</sup> Bi tùre' nε ka ji pε gbemònt ya sen bo, ki lienh ki teh Uwien mεkre' bitenkpiib ηò. Bi lienh nnò ma nnò nε cèreh binib biba wienh bi'tekjim. <sup>19</sup> Nin nεn kε ηò, Uwien pu' litenpuul là nnò faa nε. Bi kele' tigber tà sò li'bo: «Uwien ben binib bà yé u'yaab», ki liebe' ki kele' ki ye: «Wà kε yé Uwien yò la, wò ní dàan nà bre ya tienm.» <sup>20</sup> Na yé ñòkm nin likkur ya jietienwεnt baba nε te idencenciεn ni, idò nin tiyòkr yaar mò te nε. Bi taah tuba ki sòn h itùonmòmòm nε, ki taah tutòr ki sòn h tibr ya tùon. <sup>21</sup> Unil dàan' miwòknm mà ηa kpe sen la, u li naan itùonmòmòm ya jietienwεnku nε. U li yé Yonbdaan yò nε, kí li ηmòbe u'bo lituonl, kí li yé wà bonde' wò ní li tuu ki teh nà mòn.

<sup>22</sup> La paan bifεnb fε tibonbiert tà nnò bo. Li nuunh á li teh nà cuube, kí li ηmòbe mitekjim nin miyíem, kí li kpe uyenduon ya sen. Li te nnò nin bà muòh ki yih Yonbdaan bi'fèl bo ηa ηmòbe jòknt nnò. <sup>23</sup> Dàan mijòrniεm, kimε ma ηmòbe kpεle. A ben ki ye mεn nε bàareh nin ikònkòn, <sup>24</sup> nε na kpe Yonbdaan ya tonsònl ní li kòn h jεr. U li yé unimòn nε unil kε bo, kí li freh ki wòkn h binib Uwien ya gber, kí li ηmòbe kuminku isen kε ni, <sup>25</sup> kí li pekreh binib bà niεh nin wò nin lifēsàngl. Nba la, Uwien li cère bε ní lèbre bi'tetem kí bende nà yé tigbemònt, <sup>26</sup> kí liebe kí li maaleh mòmòmnm, kí ñε usenpol wà dεle' ki cuo' bε bε ní li teh u'yíem nnò ya nuò ni.

## 3

*Idenførke ya gber*

<sup>1</sup> Li ben kí ye idenførke li yé uyo wà faa ne. <sup>2</sup> Kimε binib li yé ifonfuob ne, bi'nun ní li món ilike baba bo, kí li teh tinacenkpekuont, kí li yíe tigbengt, kí li sukreh Uwien, ka ní li boh bi'naambe nin bi'baambe, ka ní li faareh bà toreh be, ka ní li boh tibont tà yé Uwien yaar; <sup>3</sup> kí li yé binibierb, ka ní li muoh nib cεcεkm, kí li lienh tób bo fenfenm, kí li teh fenfenm, kí li bre ki gbien', kí li nen nà mən, <sup>4</sup> kí li yé binikuorb, kí li ηmabe lifètənl. Tigbengt li cère be ní li te ten ijùn, kí li fe unendun wuu ni ya bont ki cen' Uwien. <sup>5</sup> Bi li teh ten bi pe Uwien ya sen bo ne, ama ka ji tuuke nà yé mitekjim ya tuəm. A la nekn bi ya nib ya bol. <sup>6</sup> Kimε bi'ni biba teh miyenuom ne ki kəh idencen ni, ki lereh ki coh mupiilinmu. Ibiere ne gbe mu'fəl bo, ne mu'yenmaale cère' mù pe mù fe unendun ya bont tà ke nnə bo. <sup>7</sup> Mù tuu ki bengeh ne, ama mua ní fre kí bende nà yé gbemənt fiebu. <sup>8</sup> Yanεs nin Yanberε là yíe' Moyis ya nɔbu bó ma bo nnə, binib nnə mə yienh tigbemənt nnə ne. Bi ηmabe iyenmaalbiere, ne bi'tekjim juore' fenm. <sup>9</sup> Ama bi teh nà nnə ηa ní wuəke, kime binib ke li bende kí ye bi yé ijər ne ten bi là bende' ma ki ye Yanεs nin Yanberε yé ijər nnə.

*Pəlgbiereh Timote*

<sup>10</sup> Ama sin wən, a paan' n'bo ki ben n wəknh ma bo, ki ben n'tetem te ma bo, ki ben n yíe ní sən yà, ki ben n teke' \*Yesu ki jin' ma bo, ki ben n ηmabe kuminku nin miyiem nin miñiknm ma bo, <sup>11</sup> ki ben binib jènde' nni ma bo nin n jin' ijend yà Antiyək ya du ni nin Ikoniyəm ya du ni nin Lista ya du ni nnə. I lɛ jend ba ne ma jin' yè! Ama Yonbdaan n'en' nni i'ke ni. <sup>12</sup> Imən, binib bà ke yíe be ní li pe Uwien ya sen bo mənəmnm \*Yesu Kristo bo nnə, bi li jènde be ne. <sup>13</sup> Binibierb nin bitonnendənb ben wən, bi li tūəreh ki sən itūonbiere ne, kí li tulndeh binib, kí tī tonde kí tuln bi'ba mə. <sup>14</sup> Sin wən, taa a'ba kí de bi wəkn' ηe nà ke a teke' nè ki jin' nnə. A ben bà wəkn' ηe nnə yé bidənb bà.

<sup>15</sup> A ben \*Uwien ya gbənkɔ ya gber haali a'buwaam ni ne. Tigber nnə li fre kí de ηe miyenuom mà li cère á teke \*Yesu Kristo kí ji ηə kí ηmεre. <sup>16</sup> Tigber tà ke te \*Uwien ya gbənkɔ ni nnə, Uwien ne cère' bi kele' tū. Tū mən ne, ki wəngəh binib Uwien ya sen, ki pekreh be, ki tūəreh bi'tetem, ki wəknh be mifuobm mà cuube, <sup>17</sup> ηə Uwien ya nil ní li yé unil wà bonde' ki tī gben', ki ηmabe nà li cère wə ní li sən itūon yà ke mən.

## 4

<sup>1</sup> N təkəh ηe Uwien nin \*Yesu Kristo wà li baa ní kí li yé ubεr, kí bu binifuob nin bitenkpiib tibuur nnə ya nun bó ne ki teh: <sup>2</sup> li kpaandeh Uwien ya gber, nī ton bii nī səngə la, li nūikeh, la tuo, li kənh nin binib ki pekreh be, kí li ηmabe kuminku ki wəknh be. <sup>3</sup> Kimε uyo uba we ní, binib ηa ji li yíe miwəknm mà kpe usen ya gber, bi li pe bi'yenm yíe nà bo ne, ki taakeh biwənwəknb bi'ba saan be ní li təkəh be, bi yíe be ní li cengeh tigber tà. <sup>4</sup> Bi li yíe ka ji li cengeh gbemənt, kí pekre kí li cengeh tigbeyienkaar. <sup>5</sup> Ama sin wən, li coh a'ba tibont ke ni, kí li ηmabe kuminku ijend ni, kí li sən a'tuonl. Lɛn si: Kristo ya gbemənmənt ya təkə. Sən a'tuonl nnə kí tī gben.

<sup>6</sup> Min wən, bi taa' nni ki tien' lituərl ηə, n'daali baa' ki gben' ne. <sup>7</sup> N mən' limuəl là mən, ki sen' ki baa' n cuube nà saan, ki juore' ki ηmabe mitekjim. <sup>8</sup> Fenfenno n'nəm ya suul ji də ne ki gu nni. Li yé binib bà cuube ya suul ne. Yonbdaan wà buh binib tibuur tu'donbó nnə li de nni lè lidaali là u li bu binib tibuur nnə ne. Na yé u li de min baba ne, u li de binib bà ke yíe wə ki gu u'baam nnə mə ne.

*Pəlyə nɔbonfərke*

<sup>9</sup> Nikn kí baa n'saan tonm; <sup>10</sup> kime Demas fe unendun ya bont ma nnə u wiε' n'gber ηə ki bure' Tesalonik bó. Krenskenεs mə bure' Galasi bó, ne Tit mə bure' Dalmas bó. <sup>11</sup> Luk baba ne te n'saan. A we ní la, sin nin Mark ní li təkə ní, kime u li tore nni Uwien ya tuonl ni.

<sup>12</sup> N sɔn' Ticik Efɛs bó ɲɔ. <sup>13</sup> A we ní la, á li tuke n'lierku kùà n là dàan' kù Trowas ni, Karpos den nnɔ, kí li tuke tigbɔnt mɔ ní. A cinbe kí li tiɛn bi taa' tiwɛnt ya gbɔnt ki tien' tà nnɔ bó. <sup>14</sup> Aleksand unmaan tien' nni nà bre cɛɛn. Yonbdaan nɛ li tu wɔ lifɛnl.

<sup>15</sup> A'mɔ ní li bɛn u'bó, kimɛ u yɛ' ti'wɔknm pelpel nɛ. <sup>16</sup> N là nuunh ní len' kí fie n'ba bà buh nni tibuur ya nun bó mikpiɛkm ma nnɔ, uba ɲa là sere' n'ciɛk bó, bi'kɛ là wiɛ' n'gbɛr nɛ. Uwien la tɔnge bi'biil bugbɛn. <sup>17</sup> Ama Yonbdaan wɔn là sere' n'ciɛk bó, ki de' nni mituɔm ní wɔkn u'gbɛr kí tɪ gben, ɲɔ bà kɛ ɲa yé \*Sufmbɛ nnɔ ní cii tù. Yonbdaan ɲmien' nni, kí cɛrɛ' tibuur ya dɛnb ɲa taa' nni kí wiɛ' icind. <sup>18</sup> Yonbdaan li ɲɛn nni nà kɛ bre ni, kí ɲmien' nni kí cɛrɛ' ní kɔ u'bɛl ni paaki bó. Wɔn nɛ si ukpiɛke uyo kɛ. Ami.

### *Micɛbm*

<sup>19</sup> A fuonde Prisil nin Akilas nin Onesifɔr den yaab kí de nni. <sup>20</sup> Erat biɛ ki te Korɛnt ni. Trofim bun nɛ. Nɛn bo nɛ n cɛrɛ' u juore' Milɛ ni. <sup>21</sup> Nikn kí baa n'saan kí yaan tiwɔrciɛnt ya yo ní baa. Ebule nin Pudɛns nin Linus nin Klodiya nin Kristo yaab kɛ fuondeh ɲɛ. <sup>22</sup> Yonbdaan ní li te nin ɲɛ. Wɔ ní juoke nɛ.

## Kugbɔnku kua Pɔl kele' ki de'

### Tit nnɔ

## Nà wɔngeh kugbɔnku kuu te ma bo

Tit yé Pɔl ya tonsɔnlie nɛ. Tit ɲa yé Suf. U teke' Yesu ki jin' nɛ ki paan' Pɔl bo. U yé unil wà freh ki tùɔreh mimaam nɛ. Nɛn bo nɛ Pɔl cèrè' Tit te Kret ya du ni ɲɔ wɔ́ rí gènde Kristo ya taanl là te len nnɔ ya ciɛnb bɛ rí li likeh litaanl nnɔ ya nib.

U kele' Kristo ya taanl ya ciɛnb li fuobe ma bo (1:5-16) nin bi li likeh litaanl nnɔ ma bo nin bi li wɔknh bijeb nin bipiib nin binacenfɛnb nin ijɛciɛn nin iyonbe bi li fuobe ma bo (2:1-15).

Ni ya puoli bó nɛ u tɔke' Kristo yɔ li fuobe ma bo nin u li tien ma kí lɔke bà wɔknh miwɔknm mà ɲa kpe sɛn nnɔ. Yesu Kristo kpo' ɲɔ wɔ́ rí ñɛn nisaal kɛ nisaal ibiɛre ni nɛ (2:14).

### *Ifuonde*

<sup>1</sup> Min Pɔl, n yé Uwien ya tonsɔnl nɛ, ki yé \*Yesu Kristo ya tond. Uwien nɛ ye rí tore u gènde' binib bà nnɔ bɛ rí tùɔre kí teke wɔ́ kí ji, kí cèrè bɛ rí bende tigbɛmɔnt tà te Uwien ya sɛn ni, <sup>2</sup> kí li ɲmɔbe lidɛndɛnl kí ye bi li lɛ limiɛl là ɲa ɲmɔbe gbenm. Uwien wà ɲa nɛndeh nɛ là pùon' haali uyo bo ki ye u li tien nnɔ. <sup>3</sup> Ti'Nmiɛnl Uwien là sien' uyo wà nnɔ nɛ ki cèrè' binib bende' u'gber kí ñɛ n tɔkeh tigbɛr tà nnɔ bo. Wɔn nɛ de' nni usɛn n tɔkeh tigbɛr nnɔ. <sup>4</sup> Tit, n kieh kugbɔnku kuu nɔ́ rí de sin nɛ. A yé n'bumɔnk kí ñɛ ti ɲmɔbe mitekjibaabm mà nnɔ bo nɛ. Baa Uwien nin ti'Nmiɛnl \*Yesu Kristo rí juoke ɲɛ, kí de ɲɛ uyɛnduɔn.

### *Pɔl ye Tit rí gènde Kristo ya táan ya ciɛnb*

<sup>5</sup> N dɔan' ɲɛ Kret ya dekl bo ɲɔ á sɔn kí tonde lituonl là sien' nɛ, kí gènde binib bà li yé Kristo ya táan ya ciɛnb idu yà kɛ te lidekl nnɔ bo ni tɛn n là tɔke' ɲɛ ma bo nnɔ. <sup>6</sup> Kristo ya taanl ya ciɛn li yé unil wà ɲa ɲmɔbe biil nɛ, kí li ɲmɔbe upii uba, u'bumu rí li yé mubumu mùa ɲmɔbe mitekjim, ka yé sɔnsɔnd, ka yé yufaadɛnb ɲɔ nil la lɛ u li dule nà bo kí biin bɛ. <sup>7</sup> Kristo ya taanl yaab ya sɛnlierl sɔnh Uwien ya tuonl ma nnɔ ní kpe u la li ɲmɔbe biil nɛ, kí la li ɲmɔbe gbengt, kí la li yé benpiebdaan, kí la taa' u'ba kí de' daam, kí la li ɲmɔbe jɛr, kí la jinh pònt. <sup>8</sup> Ama wɔ́ rí li yé wà teknh bicɛnb, kí li yíe mimɔnm ya tienm, kí li ɲmɔbe miyɛnm, kí li cuube, kí li teh nà sɔngreh Uwien ya yɛnm, kí li coh u'ba, <sup>9</sup> kí li pɛ tigbɛr tà kpe bɛ rí teke tù kí ji nnɔ bo mɔnmɔnm tɛn bi wɔknh wɔ́ tù ma bo. Nnɔ nɛ u li freh kí li sureh binib kí ñɛ miwɔknm mà cuube nnɔ bo, kí fre kí wuɔn bà niɛh nin wɔ́ nnɔ bi tùrè' ma bo. <sup>10</sup> Binib bà yebe nɛ yé biyufaadɛnb, kí lienh gbɛfɛnfɛnm, kí lɛreh binib. Binib bà teh nnɔ sɔbe kí yé Sufmbɛ nɛ. <sup>11</sup> A pien binib bugbɛn, kimɛ bi wɔknh miwɔknm mà ɲa kpe bɛ rí li wɔknh mè nɛ, kí tulndeh idencɛn iba ya nib kɛ. Tipònt ya jim bo nɛ bi teh nnɔ. <sup>12</sup> Bi'du ya yɛnfodaan uba mɔnɔn là len' bi'bo kí ye:

«Kret yaab tuu kí nɛndeh nɛ,  
kí bre tɛn muwɛnbiimu,  
kí yé ikpaayuon,  
kí maaleh ujin baba bo.»

<sup>13</sup> U là len' nà nnɔ yé imɔn nɛ. Nɛn bo, mɔnde bi'bo inun ɲɔ bɛ rí li ɲmɔbe mitekjimɔnm, <sup>14</sup> kí la tuuke \*Sufmbɛ ya gbeyiɛnkaar bo, kí la tuuke binib bà wie' tigbɛmɔnt ya sɛn blinh iwɔb yà nnɔ bo. <sup>15</sup> Jier tuba ɲa yé kuɔl binib bà ya fɛl bo ɲa ɲmɔbe jɔknt bo. Ama binib bà ya fɛl bo ɲmɔbe tijɔknt, ba teke' Uwien kí jin' nnɔ, tijier tubambɛ yé bi'bo likuɔl nɛ. Bi'yɛnmaale ɲa mɔn nɛ ba rí fre kí bende nà mɔn mɔ. <sup>16</sup> Bi lienh kí teh bi bɛn Uwien nɛ, ama bi teh nà nnɔ wɔngeh kí teh ba bɛn wɔ. Bi ɲmɔbe isensɛn nɛ, ka tuo' Wien ya ñɔbu bó, ka rí fre kí tien nà mɔn.

## 2

### *Ijēcien nin ipiicien nin bifēnb nin iyonbe bi li te ma bo*

<sup>1</sup> Sin wən, li wəknh miwəknhm mà cuube ten bi wəknh' ηε ma bo. <sup>2</sup> Təke ijēcien kí ye yè rí li coh i'ba tibont ke ni, kí li yé binib bà bi boh be, kí li ηməbe miyēnm, kí li ηməbe mitekjimənm nin miyiem nin kuminku. <sup>3</sup> Təke ipiicien mə kí ye yè rí li ηməbe binib bà pε Uwien ya sən bo ya tetem, ki la li lienh təb bo fēnfēnm, ki la taa' bi'ba ki de' daam, kí li ηməbe igbiermənəm. <sup>4</sup> Nnə nε i li freh ki gbierēh bipiijefēnb be rí li yie bi'ciēb, kí li yie bi'bumu, <sup>5</sup> kí li ηməbe miyēnm, ki la teh sənsəndl, kí li likeh uluo bo ya tūon mənəmnm, kí li yé bipiinimənb, kí li boh bi'ciēb, ηə uba la ε u li dule nà bo kí len Uwien ya gber bo fēnfēnm. <sup>6</sup> Li gbierēh binacēnfēnb mə be rí li ηməbe miyēnfuom <sup>7</sup> tibont ke ni. Sin bugben rí li teh nà mən ηə bitəb mə rí paan a teh ma bo. Li wəknh binib Uwien ya gber ni'donbó ηə binib ke rí li boh miwəknhm nnə. <sup>8</sup> Li lienh milenm mà cuube ηə bi la niēh nin ηε, ηə ife rí cuo bà ηa yie ti'gber, kimε ba rí ε bi li dule nà bo kí len ti'bo fēnfēnm. <sup>9</sup> Təke iyonbe kí ye yí rí li tuonh i'cēnbaambe ya ŋuən bó tibont ke ni, kí cère i'cēnbaambe ya yēnm rí li sange i'bo, ki la yiēnh bi ye bà, <sup>10</sup> ki la suh bi'bont, kí li yé binimənb uyo ke ηə kí li selndeh ti wəknh miwəknhm mà Uwien ti'Ŋmienl ya sən bo nnə.

### *Uwien ya juokm bo nε u ηmiēndeh binib*

<sup>11</sup> Uwien cère' ti laa' u'juokm mà bo u ηmiēndeh binib ke nnə. <sup>12</sup> Mijuokm nnə nε cèreh ti wiēnh nà ke piēndeh tε Uwien bo ya paanm, ki cèreh ti'menku ηa kəh uηēndun ya nib fε tibont tà nnə ni, ki cèreh ti coh ti'ba uηēndun wuu ni, ki teh nà cuube, ki pε Uwien bo mənəmnm, <sup>13</sup> ki gu lidēndēnl là li de tε uyēnsange nnə ya daali. Nēn daali nε ti'Wencien, \*Yesu Kristo, ti'Ŋmienl li ŋēn u'kpieke upaan bo. <sup>14</sup> Tinbi bo nε u kpo' ηə wə rí ŋēn tε itūonbiere ke ni, kí tien tε linibol là ηa ηməbe jəknt, ki yé u'yaal, li'nun mən lè rí li tuu ki teh nà mən. <sup>15</sup> Kí ŋε a'ciēnt bo, a li len nnə nε, kí sure binib, kí gbierē be, ki la cère uba rí yinde ηε.

## 3

### *Kristo yə li te ma bo*

<sup>1</sup> Tiere Kristo yaab kí ye be rí li tuonh gobina nin tibuur ya ciēnb ya ŋuən bó, kí li boh be, kí li yé binib bà bonde' be rí li teh nà mən, <sup>2</sup> ki la lienh nib bo fēnfēnm, ki la kənh jεr, kí li teh tinimənt, kí li ηmε nin binib ke. <sup>3</sup> Kimε uyo uba tinbi mənən là yé ijər nε, ka boh Wien, ki yé binib bà tūre', ki taa' ti'ba ki de' tibont tà ti fε tū, ti'menku kəh tu'ni nnə. Ti là teh mibiērm nε, ki ponbeh təb, ki yé binib bà ba yie ti'nu, nε ti'mə ηa yie təb ya nu. <sup>4</sup> Ama Uwien ti'Ŋmienl wuən' tε u'nimənt nin u'yiem uyo wà nnə <sup>5</sup> nε ki ηmien' tε. Na yé ti'tūonmənəm bo nε u ηmien' tε, u muə' tε micεcεkm nε ki ηmien' tε, kí ŋε u'ŋunsii wà lèbre' tε nnə nin \*Mifuoŋaanm tien' tε binifēnb ma nnə bo. <sup>6</sup> Ti'Ŋmienl \*Yesu Kristo bo nε Uwien de' tε \*Mifuoŋaanm ki ti gben', <sup>7</sup> ηə u'juokm bo u bù' tε bigbēməndēnb ma nnə, ti daan ki ye ti li ε limiel là ηa ηməbe gbenm. <sup>8</sup> Tigber tuu te nε, nēn bo nε n yie á li tūəreh ki təkēh tū binib, ηə bà teke' Uwien ki jin' nnə ya nun rí li mən be rí li teh nà mən. Nēn nε mən, ki toreh binib. <sup>9</sup> Ama a la niēh jərniēm, ki la niēh nin nib iyaajeyel bo, ki la kənh jεr, ki la findeh \*yiko bo. Nēn ke yé fēnm nε, ka ηməbe torm. <sup>10</sup> Unil cèreh Kristo yaab boreh təb la, á gbierē wə nba. U yie la, á gbierē wə nle. U tí yie la, á wie u'gber, <sup>11</sup> kí li ben kí ye ni ya nitunbu tūre' nε, ki teh ibiere, ki nuunh u'ba bo utudere.

### *Tigbēfərkaar*

<sup>12</sup> N lá sən Atemas bii Ticik a'saan la, á ŋikn kí cende nni Nikopolis ya du ni, kimε n maale' ki ye n li te nēn saan nε tiwərcient ya yo. <sup>13</sup> ŋikn kí tore Senas wà ben \*yiko mənəmnm nnə nin Apolos bi'sen ya jom ni, ki la cère niba rí pəre be. <sup>14</sup> Nī mən ti'təb Kristo yaab rí bēnde kí ye nī kpε bi'nun rí li mən be rí li teh nà mən nε, kí li toreh uyo wà

nǐ kpe be ní tore, ɲɔ ki la li te fɛnm. <sup>15</sup> Binib bà ke te n'saan nnɔ fuondeh ɲɛ. A fuonde tinbi nin bà ke ɲmɔbe mitekjibaabm bi yíe te nnɔ.  
Uwien ní juoke ni'ke.

## Kugbånku kùà Pål kele' ki de' Filemån nnò Nà wångeh kugbånku kuu te ma bo

Filemån yé Pål ya jò nè. Pål tåke' wå tigbæmånment nè u kpènde' Kristo yå. Nĩ naan u là yé ufåadaan nè ki ñmåbe iyonbe. Uba ya yel si Onesim. Onesim Siere' Filemån saan nè ki tí cende' Pål lipèkl ni ki må kpènde' Kristo yå. Pål jiin' Onesim u'cænbaa Filemån saan, ki de' wå kugbånku.

Pål kele' kugbånku kùà ki de' Filemån nnò te ki de' binib bà taakeh u'den nnò må nè (migbiirm 2).

Uyo nnò, iyonbe nè là cèreh Erom yaab lenh lifaal là yèbe. Bi gbiire' Erom yaab bolm mile la, miba li yé iyonbe nè. Bæn nè sònñ itùon kè, nè bi'cænbaambe ñmåbe mituòm bi'bo. Uyo nnò uyonb siere' u'cænbaa saan ki lá liebe' ní la, u'cænbaa li fre kí tien wå nà bre bii kí ku wå månñ.

Næn nè cèrè' Pål kele' kugbånku kuu ki de' Onesim wå ní tí de u'cænbaa Filemån ki ye u la ji ní liike Onesim tèn u yé uyonb, ama wå ní teke wå tèn Kristo yaab teknh tåb ma bo. Ama Pål ña de' Filemån wåbl, u yíe wån nin u'yul ní cèkre u'yenm kí liike u li tien ma bo nè. Kristo yaab bikpièkb nnò ña là li fre kí ci kí lèbre binib fuobe ma bo. Ama unil teke' Yesu Kristo ki jin' la, mitekjim nnò lèbreh u li fuobe ma bo binib ni nè.

### *Ifuonde*

<sup>1</sup> Min Pål, wå te lipèkl ni \*Yesu Kristo bo nnò nin ti'ninjè Timote nè kièh kugbånku kuu tí de sin Filemån wå yé tí'jå, ki liebe' ki yé tí'tonsantò nnò, <sup>2</sup> kí de tí'ninsè Afiya nin Akip wå tinbi nin wån mån limåbaabl nnò nin Kristo yaab bà taakeh sin Filemån den nnò. <sup>3</sup> Tí'Baa Uwien nin Yonbdaan \*Yesu Kristo ní juoke nè, kí de nè uyenduån.

### *Pål faareh Uwien Filemån bo*

<sup>4</sup> Uyo wå kè n kàareh la, n tien a'bó nè, ki tuu ki faareh Uwien a'bo. <sup>5</sup> Kimè n cii' bi lienh ki teh a du Yonbdaan \*Yesu bo ki yíe u'ñib kè. <sup>6</sup> Tinbi nin sin kpè buñåbu mitekjibaabm bo nè. Næn bo nè n kàareh ñå Uwien ní cèrè a'tekjim nnò ní li faa ñå á tore binib bè ní bende Kristo bo, ti li teh mimånmm mà kè nnò. <sup>7</sup> N'ninjè, a ñmåbe miyíem ma nnò cèrè' n ñmåbe uyensånge ki gbien' nè n'gbenent saake, kimè a cèrè' Uwien ya nib ya yenm då.

### *Pål gbáanh Filemån ki dienh Onesim*

<sup>8</sup> Tå, nin Kristo bo n ñmåbe usen ní tåke ñè nà kpè á li teh nè ma kè nnò, <sup>9</sup> kí ñè miyíem bo nè n yíe n gbáan ñè nibonn niba bo. Imån, min Pål n yé ujeçien nè, nè ki liebe' ki te lipèkl ni fènfennå \*Yesu Kristo bo. <sup>10</sup> N gbáanh ñè ki dienh n'buk Onesim nè. U yé n'buk, kimè n te lipèkl lie ni nè ki cèrè' u paan' Kristo ya sen bo. <sup>11</sup> Wån wå ña là ñmåbe pukm uyo uba a'saan nnò, fènfennå u ji li ñmåbe mipukm a'bo tèn u ñmåbe mipukm n'bo ma nè. <sup>12</sup> N li cèrè wån wå yé n'yenm ni ya nil nnò ní liebe a'saan. <sup>13</sup> Min bi yíe ní cèrè wå ní juore n'buol nè kí sere a'taal ni, kí li toreh nni n te lipèkl ni tigbæmånment bo ma nnò. <sup>14</sup> Ama ma yíe ní tien niba ñå ña bæn. Ma yíe ní wåbn ñè á tien mimånmm. N yíe á cèkre a'yenm nè kí tien. <sup>15</sup> Nba la, Onesim siere' a'saan wå ní tien iden ile ñå kí liebe ní kí ji li tuu ki te a'saan nè. <sup>16</sup> Ama wa ji li te tèn yonb, fènfennå u tu nin u'yonb. U yé tí'ninjè wå ti yíe wå nè. Min yíe wå cæn nè ama sin li yíe wå ki cæn' nnò, kimè u yé a'yonb nè, ki yé a'ninjè må Yonbdaan ya sen ni.

<sup>17</sup> Næn bo, a tuo' ki ye min nin sin kpè buñåbu mitekjim bo la, teke wå tèn a bi li teke nni ma bo. <sup>18</sup> Nĩ yé u bii' ñè bii u tí ñmåbe a'fènl nè la, cèrè lè ní li yé n'yaal. <sup>19</sup> Min Pål nin n'yul nè kele' ki ye n li pè ñè. Ama ma nín yíe ní tåke ñè kí ye a'må ñmåbe n'fènl wån! Læn si: a



laa' limiel là min bo nnə bii ba? <sup>20</sup> Nən bo, n'ninjε, Yonbdaan bo, tien nnə kí de nni. Wən Kristo bo, cère n'yεnm ní li də. <sup>21</sup> N du ki ye a li tuo n'nəbu bó nε cère' n kieh ηε kugbənku kuu nə. N bən ki ye a li tien kí cən n ye ma bo. <sup>22</sup> A yekn kí bonde nni gəgəbùol mə, kimε n daan ki ye kí n̄ε ni'kaare bo Uwien li cère be ní wiε nni ní liεbe ní ni'saan.

*Ifuondfərke*

<sup>23</sup> Min nin Epefa wà te lipεkl ni \*Yesu Kristo bo nnə fuondeh ηε. <sup>24</sup> N'tonsəntəb Mark nin Aristak nin Demas nin Luk mə fuondeh ηε. <sup>25</sup> Yonbdaan \*Yesu Kristo ní juoke nε.

## Kugbɔnku kua bi kele' ki de' Ebrembe nnɔ Nà wɔngeh kugbɔnku kuu te ma bo

Wà kele' kugbɔnku kuu nnɔ ɲa kele' u'yel ku'ni niba saan, nɛ nil mɔ ɲa cinbe ki bɛn u kele' kù ki de' bidɛnb bà. Ama wà kele' kù nnɔ bɛn Kujɔtiekaaku ya gbɔnku ya gber mɔnmɔnm.

U kele' ki de' bà nnɔ lii yé Sufmbɛ nɛ, ki pɛ Kristo ya sɛn bo. Bi'gbɛnɛnt cin' ki ɲɛndeh, ba ji se usɛn nnɔ ni mɔnmɔnm. Nɛn nɛ cɛrɛ' wà kele' kù nnɔ tùɔrɛ' ki tɔke' bɛ bi kpɛ' ki cii' miwɔknm mà nnɔ.

Kristo bo nɛ Uwien nin binib liebe' ki taan' buɲɔbu (1:1-2:18). Wɔn bo nɛ bà teke' ki jin' li fre kí nɛkn Uwien kí lɛ limiel (3:1-5:10).

Bitɔtuɔrciɛnb ya ciɛn baba nɛ là ɲmɔbe usɛn wɔ ɲ kɔ Uwien ya ninbonl ya dubenku bó, kí tien lituɔrl binib ya biɛrɛ bo. Kristo baba nɛ yé bitɔtuɔciɛnb ya ciɛn wà ɲa ɲmɔbe tɔ, ki kɔn' ki càarɛ' Uwien ya ninbonl là te paaki nnɔ.

Bitɔtuɔrkaab là te ligol nɛ, ki tuu ki taah tiwɛnt ki tùɔrɛh ki lɛrɛh. Kristo wɔn taa' u'ba nɛ ki tien' lituɔrl miba kpein ki de' unil kɛ ki wiɛ', ki pɛkre' usɛnfaan ki de' u'yaab.

Wà kele' kugbɔnku kuu nnɔ saakrɛh u kele' ki de' bà nnɔ ya gbɛnɛnt nɛ, ki sureh bɛ, bɛ ɲ tɛkn bà là te uyo bo, ki teke' Uwien ki jin' nnɔ ya taal ni (11:1-12:13). U liebe' ki wɔngeh Kristo yaab li fuobe ma bo Uwien ya nun bó nɛ (12:14-13:1-25).

### *Uwien cɛrɛ' u'Bijɛ nɛ len' nin tɛ*

<sup>1</sup> Uyo bo Uwien là ɲɛn' isɛn yà yɛbe nɛ ki cɛrɛ' u'ɲɔbonsɔknb len' nin ti'yaajɛb nà luo' bolm miɲɛ. <sup>2</sup> Ama idɛnfɔrke yie nɔ, u ji cɛrɛ' u'Bijɛ nɛ len' nin tɛ. U cɛrɛ' wɔn nɛ ɲɛn' nà kɛ te, ki gɛndɛ' wɔ ki tien' tibont kɛ ya daan. <sup>3</sup> U'Bijɛ bugbɛn nɛ yé u'kpɛikɛ ya wenwenku, ki naan nin wɔ ki tɪ gben', ki cɛrɛ' u'gber ya tuɔm co tibont kɛ tù se tu'bùol, ki sɔkrɛ' ki ɲɛn' binib ya biɛrɛ ki gben', nɛ ki don' paaki bó ki tɪ kele' Uwien uyɛbm kɛ ya daan ya jie bó.

### *Uwien ya Bijɛ cɛn' Uwien ya tondb*

<sup>4</sup> Uwien ya Bijɛ cɛn' Uwien ya tondb. Nɛn bo nɛ Uwien yin' wɔ liyel là ɲmɔbe lisel ki cɛn' bi'yɛ. <sup>5</sup> Uwien kpele ki tɔke' u lɛ tond ba ki ye:

«Sin nɛ yé n'Bijɛ,  
dinnɔ nɛ n wuɔn' ki ye n yé a'Baa?»

Bii u tí kpele ki tɔke' u lɛ ba ki ye:

«Min li yé u'Baa,  
nɛ wɔ ɲ li yé n'Bijɛ?»

<sup>6</sup> Ama uyo wà Uwien yie u'Bijɛ wà yé kibukpiɛk nnɔ ɲ baa uɲɛndun ni nnɔ, u len' ki ye:  
«U'tondb kɛ ɲ gbaan kí puke u'Bijɛ.»

<sup>7</sup> Uwien len' u'tondb bɛn bo ki ye:  
«U cɛrɛh bi te tɛn mitafaam nɛ,  
ki liebe' ki cɛrɛh bi te tɛn umupien.»

<sup>8</sup> Ama u len' u'Bijɛ wɔn bo ki ye:  
«Uwien, a yé ubɛr nɛ ki kɛ a'berbiɛk bo,  
nɛ a'bɛl ɲa ɲmɔbe gbenm.  
A likeh a'nib nin mitetɛm mà cuube nɛ.

<sup>9</sup> A yie nà cuube nɛ ki nɛn nà bre.  
Nɛn bo nɛ sin wà yé Uwien nnɔ,  
a'Wien wule' a'yul bo mikpɔm,  
ki wuɔn' ki ye u gɛndɛ' ɲɛ,

ki cèrè' a'yenm sange,  
ki de' ηε lisel ki cen' a'tob κε.»

<sup>10</sup> Uwien tí len' ki ye:

«Micincinm, sin Yonbdaan ne ñen' kitink,  
ne kutaaku mɔ yé a'nuɔ ya tuonl ne.

<sup>11</sup> Nen κε li gben,

ama sin li tuu ki te ne,  
nen κε li cere ten tikpɛlcer ne.

<sup>12</sup> A li gongonde nen κε ten lilierl ne.

Imɔn, a li lèbre tù ten bi lèbreh lilierl ma bo ne,  
ama sin ηa ní lèbre, a li tuu ki fuobe ne.»

<sup>13</sup> Uwien kpele ki tɔke' u le tond ba ki ye:

«Kèle n'nojie bó,

kí tí baa uyo wà n li cèrè á te a'nenndb bo litaal-i?»

<sup>14</sup> Uwien ya tondb ben wɔn, bi'ke yé u'tonsɔnb ne, nisaal ηa ní fre kí le be nin nunbu. U  
sɔnh ben ne bi lá toreh binib bà u li ηmien be nno.

## 2

### *Liike men ni'yul bo nin ni ciuh minmienm ya gber tà nɔ*

<sup>1</sup> Nen bo, ní kpe tí tùre kí liike ti'yul bo ne nin ti ciuh tigber tà nɔ, nno ηa ní la, ti li tùre  
usen. <sup>2</sup> Uwien ya tondb là tɔke' tigber tà uyo bo nno kpe be ní li du tu'bo ne. Ne wà ηa là tuo'  
tù, ka bon' wɔ, laa' utudere wà u kpe wù la, <sup>3</sup> ti'mɔ ηa tange' minmienm ya gber tà mɔn ten  
niba nno la, tinbi ben li tien mila kí ñe utudere ni? Yonbdaan nin u'yul ne là kpie' ki tɔke'  
binib tigber bugben, ne binib bà ci' tù nno mɔ tɔke' tinbi ki ye tù kpe be ní li du tu'bo ne.  
<sup>4</sup> Ne Uwien wuɔn' ki ye bi tɔkeh tigber tà nno kpe be ní li du tu'bo ne, ki cèrè' bi teh miyɔkm  
ya bont κε ya bol, ki teh nisaal ηa ní fre kí tien nà, ki cèrè' Mifuoñaanm de' bi'ke bupaabu  
jeje u yie ma bo.

### *Yesu tien' u'ba unisaal ki tien' te Uwien yaab*

<sup>5</sup> Tɔ, ti tɔkeh uɔndun wà we ní nno ya gber ne. Uwien ηa cèrè' u'tondb ηmɔbe u'bo  
tuɔm. <sup>6</sup> Ní kele' \*Uwien ya gbɔnku ni niba saan ki ye:

«Unil yé ba a tien u'bó?

Bii unisaal yé ba a tange wɔ?

<sup>7</sup> A jii' wɔ tingi,

ki cèrè' a'tondb cen' wɔ na wuɔke'.

Ne ki ji kpieke' wɔ, ki seln' wɔ,

<sup>8</sup> ki de' wɔ mituɔm tibont κε bo.»

Uwien de' wɔ mituɔm tibont κε bo ma nno, niba ηa sien' ηɔ wa ηmɔbe tuɔm ni'bo.  
Fenfennɔ tinbi ne ηa laan lenh u ηmɔbe mituɔm tibont κε bo ma bo. <sup>9</sup> Ama ti lenh \*Yesu  
wà Uwien jii' wɔ tingi, ki cèrè' u'tondb cen' wɔ na wuɔke' nno laa' ukpieke nin lisel kí ñe  
bi jènde' wɔ ma u tí kpo' nno bo. Uwien ya nimɔnt bo ne u teke' binib κε ya kuum ki kpo'.

<sup>10</sup> Imɔn, Uwien ne ñen' tibont κε, ne wɔn bo tu'ke te. U yie u'bumu mùa yebe ní li ηmɔbe  
ukpieke wà u ηmɔbe wù nno ne. Nen bo ne ni mɔn wɔ ní cèrè \*Yesu ní ji ijend ηɔ kí li yé  
wà kpe wɔ ní sɔn u'tuonl kí tí gben. Wɔn \*Yesu ne pɛkre' minmienm ya sen ki de' Uwien  
ya bumu. <sup>11</sup> Wɔn ne teh binib Uwien yaab. Wɔn wà teh binib Uwien yaab nin u teh bà  
Uwien yaab nno κε ya baa si Uwien ne. Nen bo ne u yin' be u'ninjieb nin u'ninsieb la, na  
coh wɔ fe. <sup>12</sup> Ki liebe' ki ye:

«N li cèrè n'ninjieb nin n'ninsieb ní bende a yé udaan wà,

kí li gɛh iyuon ki pèkeh ηe bi'táan ni.»

<sup>13</sup> Kí tí ye:

«Min li du u'bo kí tí gben ne.»

Nε ki tí ye:

«Min nin Uwien de' nni u'bumu mùa nnò sò.»

<sup>14</sup>Mubumu nnò yé binib ma nnò nε u'mò tien' uba unisaal ηò kí ñε u'kuum bo wò rí gben usenpol wà ηmòbe mikuum ya tuòm nnò ya gber, <sup>15</sup>kí ñεn binib bà fenge mikuum ki te ten iyonbe bi'fuobm ke ni nnò tiyonbt ni. <sup>16</sup>Ni yé imòn nε, wa baa' wò rí tore Uwien ya tondb, u baa' wò rí tore \*Abraham ya yaabii nε. <sup>17</sup>Nεn bo nε ní kpe wò rí li naan u'ninjieβ nin u'ninsieβ kí tí gben, kí li yé bitàtuərciεnb ya ciεn wà muòh micεcεkm, ki sònɥ Uwien ya tùon ni'donbó ηò kí ñε wòn bo Uwien rí fère binib bi'biere. <sup>18</sup>\*Yesu mònɥnin nin u'yul jènde' mibiikm ni ma nnò, nεn bo nε u li fre kí juən binib bà te mibiikm ni.

### 3

#### *Yesu cεn' Moyis*

<sup>1</sup>Tò, n'ninjieβ nin n'ninsieβε, ninbi bà Uwien yin' nε ni taan' ki yé u'yaab nnò, cère mεn ni'nun rí li cε \*Yesu bo. Uwien sòn' wòn nε u yé bitàtuərciεnb ya ciεn. Ti teke' nεn nε ki jin' ki tàkeh nè binib ya nun bó. <sup>2</sup>U gènde' wòn nε wò rí sòn lituonl, nε u sòn' lè ni'donbó ten Moyis là sòn' ni'donbó ma bo Uwien den ni ni'ke saan nnò. <sup>3</sup>Ama \*Yesu kpe wò rí li ηmòbe ukpieke ki cεn' Moyis, kimε bi pèkeh wà mεn' iden nε ki cεn' iden bugben. <sup>4</sup>Imòn, iden ke ηmòbe wà mεn' yí nε, ama Uwien nε naan' tibont ke. <sup>5</sup>Moyis là yé utonsònl wà sòn' itùon Uwien den ni ni'ke saan ni'donbó nε, ki yé Uwien li tàke u'nib tigber tà nnò ya mònkunl. <sup>6</sup>Ama Kristo wòn yé Uwien ya Bijε nε, ki sòn' Uwien den ni'donbó. Wòn nε ηmòbe ticiεnt Uwien den. Ti co mitekjim kenken, ti'yεnm sange ti ηmòbe lidεndεnl là nnò bo la, ti yé iden nnò yaab nε.

#### *Binib bà teke' Uwien ki jin' nε li lε lifuorl u'saan*

<sup>7</sup>Nεn bo nε \*Mifuoñaanm ye:

«Dinnò ni cii' Uwien ya nieke bó la,

<sup>8</sup>ni la ñεle ni'tub,

ten ni'yaajεb là tien' ma,

uyo wà bi là yíe' Uwien ya ñòbu bó

ki dεle' wò kupenpelku ni nnò.

<sup>9</sup>Uwien ye:

«Ni'yaajεb là dεle' nni kupenpelku ni

bε rí liike n li tien ma,

nin bi laa' n tien' nà,

<sup>10</sup>ki tí dukn' ibin pinan ma ke nnò.

Nεn bo nε n'benku ni piebe' bi'bo,

nε n len' ki ye: bi tuu ki tùreh usen nε,

ka toh bε rí kpíen n yíe bε rí kpíen usen wà.»

<sup>11</sup>Nε n'benpiebe ni n pole' ki ye:

«ba rí baa n bonde' bε nà saan bε rí fuore nnò fiebu.» »

<sup>12</sup>N'yaabε, liike mεn ni'yul bo, ni'ni uba la li ηmòbe iyεnmaalbiere u'fεl bo yí rí pien wò u la teke kí ji ηò kí wiε Uwien limiel ya daan ya sεn. <sup>13</sup>Ama li saakreh mεn tób ya gbenent daan ke daan, ηò ni'ni uba la cère ibiere rí lere wò, wò rí tien uyufaa kí yíe Uwien ya ñòbu bó. Kimε ní kele' \*Uwien ya gbònkú ni ki ye dinnò la, ní yé dinnò nε ti'mò bo. <sup>14</sup>Imòn, ti juore' ki co kenken ti là co ma bo mitekjim ki tí fòre' la, ti yé Kristo ya tontàknlieb nε imònmòn.

<sup>15</sup>Ni kele' \*Uwien ya gbònkú ni ki ye:

«Dinnò ni cii' Uwien ya nieke bó la,

ni la ñεle ni'tub,

ten ni'yaajεb là tien' ma,

uyo wà bi là yíe' Uwien ya ñòbu bó nnò.»

16 Tɔ, bi ɛ ba nɛ là cii' Uwien ya niɛke bó, ki yíe' u'ńɔbu bó? Na yé binib bà kɛ Moyis là ńɛn' bɛ Esipt ni nnɔ-ɔɔ? 17 Uwien ya benku ni là piebe' bi ɛ bo ki tĩ dukn' ibin pinan-i? Na yé binib bà là tien' ibiere ki kpokpo' kupenpelku ni nnɔ-ɔɔ? 18 U là pole' ki ye bi ɛ ba ɲa ń kɔ u bonde' bɛ lifuorl udu wà ni nnɔ fiebu? Bà là yíe' u'ńɔbu bó nnɔ ɲa ńí-ii? 19 Imɔn, ti laa' ba kɔn' udu wà ni Uwien bonde' bɛ lifuorl nnɔ ni, kime ba teke' wɔ ki jin'.

## 4

1 Uwien bonde' lifuorl niba saan, ki pùon' ki ye u'nib li baa ni'saan kí fuore. Lipuonl nnɔ biɛ ki te nɛ. Nɛn bo, liike mɛn ni'yul bo, ni'ni uba la taandeh ɲɔ ki la lúo lifuorl nnɔ. 2 Kime ti cii' tigbɛɲmɛɲmaakt tɛn ti'yaajɛb là cii' tù ma kupenpelku ni nnɔ nɛ. Ama tigber nnɔ ɲa là tore' bɛ. Kime bi cii' tù ma nnɔ ba tuo' ki teke' tù ki jin'\*. 3 Ama tinbi teke' tù ki jin'. Nɛn bo nɛ ti li ɛ lifuorl Uwien saan. U là len' lifuorl nnɔ bo ki ye:

«N'benpiebe ni n pole' ki ye:

«Ba ń kɔ n bonde' bɛ lifuorl udu wà ni nnɔ ni fiebu.» »

Ama Uwien nín sɔn' ki gben' u'tuonl haali uɲɛndun ya cinm nɛ. 4 Kime ńi kele' \*Uwien ya gbɔnku ni niba saan wienlole bo ki ye: «Uwien sɔn' ki gben' u'tuonl kɛ ma nnɔ u taa' wienlole daali nɛ ki fuore'.» 5 Ní liebe' ki kele' ni'saan ki ye: «Ba ń kɔ n bonde' bɛ lifuorl udu wà ni nnɔ ni fiebu.»

6 Bà kpiɛ' ki cii' tigbɛɲmɛɲmaakt nnɔ ɲa bon' tù, nɛ ka kɔn' Uwien bonde' bɛ lifuorl udu wà ni nnɔ ni mɔnɔn la, binitɔb li biɛ kí fre kí kɔ len. 7 Nɛn bo nɛ Uwien liebe' ki sien' lidaali liba ki yin' ni'daali «dinnɔ». Ní là tete ki tĩ wuɔke' nɛ u lá cère' \*Dafid len' ni'daali ya gber tɛn ńi kpiɛ' ki kele' ma kugbɔnku kuu ni ki ye:

«Dinnɔ ni cii' Uwien ya niɛke bó la, ni la ńɛle ni'tub.»

8 Tɔ, ńi yé Sosuwe bi là cère' bi laa' lifuorl la, Uwien ɲa bi li liebe kí len lidɛtɔl liba ya gber.

9 Nɛn nɛ wuɔn' ki ye Uwien ya nib biɛ ki ɲmɔbe lifuorl tɛn Uwien là fuore' ma wienlole daali nnɔ. 10 Kime wà kɛ laa' lifuorl Uwien saan la, u sɔn' u'tuonl ki gben' nɛ ki fuoreh tɛn Uwien là sɔn' u'tuonl ki gben' ki fuore' ma nnɔ. 11 Nɛn bo, cère mɛn tí li benh ki nuunh tí ɛ lifuorl nnɔ ɲɔ uba la tekn ti'yaajɛb ya taanl ni kí yíe Uwien ya ńɔbu bó kí tùre.

12 Tɔ, Uwien ya gber ɲmɔbe limiel nɛ, ki ɲmɔbe mituɔm mɔ, ki ɲmɛ ki cɛn' jusiek kɛ jusiek kà ɲmɛ ikɛle kɛ ile. Tù kɔh unil ni nɛ haali ki tĩ bàareh u'fɛl nin u'naank ni, haali ki tĩ bàareh u'kpɔtutuk nin u'suɔrm ni, ki fiinh ki bɛndeh nà kɛ buɔ u'fɛl ni.

13 Uwien ńɛn' tibont tà kɛ nnɔ, bonn niba ɲa buɔ u'nun bó, u likeh ki lenh tu'kɛ nɛ, nɛ ki bɛn nà kɛ te ma bo. Ti li tɔke wɔn nɛ ti sɔnsɔn' ma bo.

### *Yesu nɛ yé bitɔtuɔrciɛnb ya ciɛn*

14 Ti ɲmɔbe bitɔtuɔrciɛnb ya ciɛn uba nɛ. U ya tɔ ɲa te. Wɔn si Yesu, Uwien ya Bijɛ. Wɔn nɛ don' ki tĩ baa' Uwien saan paaki bó. Nɛn bo, cère mɛn tí tùɔre kí li ɲuuke ti teke' nà ki jin' nnɔ kenken. 15 Ti ɲmɔbe bitɔtuɔrciɛnb ya ciɛn wà nnɔ ɲa yé wà ɲa ń fre kí muɔ tɛ ti'jiint ni ka. Mibiikm tu' u'mɔ isɛn kɛ ni tɛn tinbi, ama wɔn ɲa tien' biere kɛ biere. 16 Nɛn bo, cère mɛn tí nɛkn Uwien, mijuokm ya daan, ya bɛrbiek saan nin midum. Nnɔ nɛ Uwien li muɔ tɛ micɛɛkm, kí juoke tɛ, kí tore tɛ uyo wà ńi ciɛke tɛ.

## 5

1 Bi gɛndeh tɔtuɔrciɛn kɛ tɔtuɔrciɛn binib ni nɛ ki kaandeh wɔ wɔ ń li se bi'taal ni ki sɔnh Uwien ya tòn, ki taah mipum ki dienh Uwien, ki teh ituɔre ibiere bo. 2 U li freh ki duɔndeh u'yɛnm bà ɲa bɛn niba, ki tùreh nnɔ bo, kime wɔn nin u'yul yé unisaal nɛ ki ɲmɔbe ibiere. 3 Nɛn bo nɛ ńi kpɛ wɔ ń tien lituɔrl ibiere bo. Na yé u li tien binitɔb ya biere baba bo nɛ, u li tien u'tiɛma biere mɔ bo nɛ. 4 Nil ɲa ń fre kí ńi u'fɛl kí ye u yé bitɔtuɔrciɛnb ya ciɛn. Ama Uwien nɛ yih unil ki teh wɔ bitɔtuɔrciɛnb ya ciɛn tɛn u là tien' Arɔn ma bo.

\* 4:2 Bi kpiɛ' ki kele' tigbɔnt tà nnɔ ya tuba ni ńi kele' ki ye: «Kime ba tuo' ki paan' bà teke' tù ki jin' nnɔ bo nɛ.»

<sup>5</sup> Nnɔ nɛ Kristo mɔ ɲa ɲi' u'fɛl ki ye u yɛ bitɔtuɔrciɛnb ya ciɛn. Uwien nɛ tien' wɔ bitɔtuɔrciɛnb ya ciɛn ki tɔke' wɔ ki ye:

«Sin nɛ yɛ n'Bijɛ,  
dinnɔ nɛ n wuɔn' ki ye n yɛ a'Baa.»

<sup>6</sup> U tɪ len' ki ye:

«A yɛ utɔtuɔrke nɛ uyo wɔ ɲa ɲmɔbe gbenm  
tɛn Uwien lɔ ɲɛn' isɛn yɔ ki tien' Mɛlkisedɛk utɔtuɔrke nnɔ.»

<sup>7</sup> Uyo wɔ \*Yesu lɔ te kitink kiɛ bo nnɔ u lɔ kɔare' Uwien ki muɔ' cɛɛn, ki gbɔan' wɔ nin tinunsiir, kimɛ wɔn nɛ li fre kɪ ɲɛn wɔ mikuum ni. U lɔ jiin' u'ba tingi Uwien ya nun bɔ ma nnɔ nɛ u cenge' u'kaare bɔ. <sup>8</sup> Nin u yɛ Uwien ya Bijɛ ma ke nnɔ u'jɛnd ni nɛ u bɛnde' mibom. <sup>9</sup> Uwien cɛre' u sɔn' u'tuonl ni'donbɔ ki tɪ gben'. Nɛn bo nɛ kɪ ɲɛ wɔn bo, binib bɔ ke boh wɔ nnɔ li lɛ limiɛl lɔ ɲa ɲmɔbe gbenm. <sup>10</sup> Kimɛ Uwien nɛ tien' wɔ bitɔtuɔrciɛnb ya ciɛn tɛn u lɔ ɲɛn' isɛn yɔ ki tien' Mɛlkisedɛk bitɔtuɔrciɛnb ya ciɛn nnɔ.

### *La biɛ ki te mɛn tɛn mubumu mitekjim ya sɛn ni*

<sup>11</sup> I ya sɛn ni, ti ɲmɔbe tigber tɔ yɛbe tɪ len ama na ciɪh tontonm ma nnɔ, tu'tingi ya tɔkm faa nɛ. <sup>12</sup> Ni ji bi kpe nɪ li yɛ biwɔnwɔknɛ nɛ, ama ni biɛ ki nuunh bɛ nɪ li wɔknɛ nɛ bi cinh ki wɔknɛ binib Uwien ya gber tɔ, tu'ciim ɲa faa nnɔ nɛ. Ni ji bi kpe tijier tɔ kpiɛke nɛ, ama ni biɛ ki ciɛke mibiim nɛ. <sup>13</sup> Wɔ ke biɛ ki ɲaanh la, u yɛ kicɛnfɛndk nɛ, ka nɪ fre kɪ bɛnde nɔ mɔn nin nɔ bre. <sup>14</sup> Binicekrkaab bɛn wɔn, bi jinh tijier tɔ kpiɛke nɛ. Bi lɛnh miyɛnfuom nɛ daan ke daan ya tɔon ni, ki bɛn nɔ mɔn nin nɔ bre.

## 6

<sup>1</sup> Nɛn bo, la cɛre mɛn tɪ juore bi cinh ki wɔknɛ binib Kristo ya gber tɔ, tu'ciim ɲa faa nnɔ bo. Ama cɛre mɛn tɪ li teh binicekrkaab mitekjim ya sɛn ni ki joh inun bɔ, ki la liɛbe nɪ tiboncindkaar bo. Tun si: kɪ wiɛ mitetem mɔ bɔareh nin mikuum nin kɪ teke Uwien kɪ ji ya gber, <sup>2</sup> nin tigbɛnɛnt ya sɔkrm kɪ paan iyaaɛbok ye ma bo ya gber nin kɪ taa inuɔ kɪ paan unil bo kɪ kɔare kɪ de wɔ ya gber nin bitɛnkpiib ya mɛkrm ya gber nin Uwien lɔ li bu binib tibuur ufɔfɔryo ma bo ya gber. <sup>3</sup> Uwien tuo' la, ti li joh inun bɔ nɛ nin binicekrkaab ya wɔknm.

<sup>4</sup> Tɔ, binib laa' Uwien ya wenwenku, ki laa' u'paabu, ki laa' \*Mifuoɲaanm, <sup>5</sup> ki ciɪ' Uwien ya gber ya ɲmaa, ki bɛnde' uɲɛndun wɔ we nɪ nnɔ ya tuɔm ɲɔ <sup>6</sup> ki wiɛ' Uwien ya sɛn la, nɪ faa nin unil nɪ fre kɪ liɛbe kɪ lɛbre bi ya nib ya tetem, kimɛ bɛn nin bi'yul liɛbe' ki kpaakeh Uwien ya Bijɛ nɛ udɔpɔnɔn bo, ki diɛnh binitɔb usɛn bɛ nɪ suke wɔ.

<sup>7</sup> Tɔ, utaa tuu ki niɪh, kitink ɲa luoreh sɔngl la, kɪ lɔonh tibonmɔnmɔnt nɛ ki diɛnh bɔ koh kɛ, nɛ Uwien teh kɛ u'mɔnm. <sup>8</sup> Ama kɪ pɛh ikonkon nin ipɔn la, kɪ li juore fɛnm nɛ, Uwien nɪ tɪ gben kɪ wiɛ kɛ miɲuɔm, nɛ bɛ nɪ fɔre kɪ wɪn kɛ.

<sup>9</sup> Ti'jɔtieɛ, ti lienh nnɔ mɔnɔn la, ti bɛn ki ye ninbi kpe usɛn wɔ mɔn nɛ, wun nɛ yɛ miɲmiɛnm ya sɛn. <sup>10</sup> Kimɛ Uwien pɛ tigbɛmɔnt bo nɛ. Wa nɪ sunde ni'tɔon bɔ, ka nɪ sunde ni yɛ wɔ ma, ki tore' u'nib, ki biɛ ki toreh bɛ ma nnɔ bɔ. <sup>11</sup> Ti yɛ ni'ni wɔ ke ya nun nɪ li mɔn wɔ nɪ li teh nnɔ kɪ tɪ fɔre nɛ, ɲɔ kɪ lɛ ni daan nɔ nnɔ kɪ tɪ gben. <sup>12</sup> Ta yɛ kpaayuonl nɪ cuo nɛ ama ti yɛ nɪ tekn binib bɔ kɪ ɲɛ bi'minku nin bi'tekjim bo, bi lɛnh mimɔnm mɔ Uwien lɔ pɔon' bɛ mɛ nnɔ ya taal ni nɛ.

### *Uwien ya puonl ɲa nɪ lɛbre*

<sup>13</sup> Uwien lɔ pɔon' \*Abraham lipuonl ma nnɔ u lɔ pole' wɔn bugbɛn nɛ, kimɛ uba ɲa te ki cɛn' wɔ ɲɔ wɔ nɪ pole udaan. <sup>14</sup> U lɔ pɔon' wɔ ki ye:

«Imɔn, n li tien ɲɛ mimɔnm kɪ gbien,  
kɪ cɛre á pɔre kɪ gbien.»

<sup>15</sup> \*Abraham mɪnde' ki guure' nɛ ki laa' Uwien lɔ pɔon' wɔ nɔ nnɔ. <sup>16</sup> Binib tɪ nɪ pole nɛ kɪ wuɔn kɪ ye bi len' tigber tɔ nnɔ te nɛ. Bi poleh wɔ cɛn' bɛ ɲɔ lipol nnɔ bo uba la ji nɪ fre kɪ niɛ

tu'bo ne. <sup>17</sup> Nno ne Uwien la yie wa ri tuore ki wuon ba li le u'puonl ya monm nno ki ye u jèke' wa ri tien na nno na nmabe lebrm ne. Nen bo ne u la puon' ki liebe' ki pole' ki kpobn'. <sup>18</sup> Uwien ya puonl nin u'pòl ye tibont tule ne, ka nmabe lebrm, ne wa ri nen tibont nno ni fiebu. Nen ne saakreh tinbi ba sen' ki bale' u'saan nno ya gbenent ki gbiekeh, ki cereh ti tuoreh ki coh lidendenl la ti nmabe le u'saan nno kenken. <sup>19</sup> Lidendenl nno ne cereh ti se ni faa ten bi wienh likuluonl miñunm ni, li coh buñercienbu bua nmiekeh ma bo. Ti daan wa nno ne kon' Uwien ya duku ni paaki bó, ki ti caare' kukpelciaku kua bore' ku bolm mile nno, ki kon' haali dubenku bó Uwien ya buol. <sup>20</sup> Tinbi bo ne \*Yesu liere' ki kon' ku'ni, ne Uwien tien' wa bitatuarcienb ya cien uyo wa na nmabe gbenm ten u la nen' isen ya ki tien' Melkisedek bitatuarcienb ya cien nno.

## 7

### *Melkisedek ye uer ne, ki liebe' ki ye utaturke mo*

<sup>1</sup> To, Melkisedek bugben ye Salem ya ber ne ki liebe' ki ye Uwien wa na nmabe Nacento ya taturke. \*Abraham la ton' nin bibertab litual ki faake' nin be ki liebe' ki kunh ni ma nno won Melkisedek ne la tuobe' wa, ki tien' wa Uwien ya monm. <sup>2</sup> \*Abraham la de' won ne u ton' litual ki faake' ki fie' tibont ta ke nno ya gbiirm piik ya miba. Mikpiekm liyel Melkisedek ya tingi si: Ubergemondaan ne. Nle bo u ye Salem ya ber ne. Salem ya tingi si: Uyenduon ya ber ne. <sup>3</sup> Ba ben u'naa, ka ben u'baa, ka ben u'yaajeb mo. Wa nmabe u'fuobm cin' uyo wa, ka nmabe mi li ti gben uyo wa mo, u te ten Uwien ya Bijε ne, ki tuu ki ye utaturke.

<sup>4</sup> Ni laa' Melkisedek ye unikpekpiek ma bo-a! Ti'yaaje \*Abraham monon la taa' u ton' litual ki faake' ki fie' tibont ta nno ya gbiirm piik ya miba ki de' won ne. <sup>5</sup> To, ki ne Moyis ya yiko bo, Lefi ya yaabii ya ye bitaturkaab nno ne nmabe usen be ri li teknh Israyel yaab ya bont ya gbiirm piik ya miba nin bi ye bi'ninjieb, ki ye \*Abraham ya yaabii ma ke nno. <sup>6</sup> Melkisedek won na ye bi'lontunku ya nil, nin nen ke u teke' \*Abraham ton' litual ki fie' tibont ta nno ya gbiirm piik ya miba, ne ki tien' won \*Abraham wa Uwien puon' wa lipuonl nno Uwien ya monm. <sup>7</sup> Na nmabe niem, wa ye ucien ne teh uwaal Uwien ya monm. <sup>8</sup> Lefi ya yaabii ya teknh Israyel yaab saan tibont ya gbiirm piik ya miba nno ye binib ne, ki li kpo lidaali liba. Ama Melkisedek wa teke' \*Abraham saan tibont ya gbiirm piik ya miba nno \*Uwien ya gbanku ye won tuu ki fuobe ne. <sup>9</sup> Lefi ya yaabii ne teknh tibont ya gbiirm piik ya miba Israyel yaab saan. \*Abraham la gbiire' tibont bolm piik ki taa' miba ki de' Melkisedek ma nno ti li fre ki ye Lefi mo la de' ne ki ne u'yaaje \*Abraham bo. <sup>10</sup> Kimε Melkisedek la tuobe' \*Abraham uyo wa nno, ki laa' Lefi laan te u'yaaje \*Abraham ya sem ni ne, wa laan la maa' wa.

<sup>11</sup> Uwien la de' Israyel yaab yiko ne. Ne u ya yiko ne wangeh ki teh Lefi ya yaabii ne li ye bitaturkaab. Ni ye bitaturkaab nno ya tuon bi cere' binib mon Uwien ya nun bó ki ti gben' la, taturke ke taturke bi li te ten Aron ne. Ba ji bi li nuunh utaturketo ten Melkisedek. Bi'tuon na ri fre ki cere binib ri li mon Uwien ya nun bó ki ti gben. Nen ne cere' ni kpe utaturketo ri baa ki li te ten Melkisedek. <sup>12</sup> Kimε bi lebre' bi teh binib bitaturkaab ma bo la, ni kpe be ri lebre yiko mo ne. <sup>13</sup> Tigber tuu lienh unil wa bo nno ye udensento ya nil ne. Udensen nno ya nil uba monon na kpele ki son' Uwien ya ponpuol bo tuonl. <sup>14</sup> Unil ke ben ki ye ti'Yonbdaan ye Suda ya densen ya nil ne. Ne Moyis ya gbont ni na saan ke u len' bitaturkaab ya gber nno wa len' niba udensen nno bo.

### *Yesu ye utaturke ten Melkisedek*

<sup>15</sup> Liike men; na tuore' ki wende' ti'nun bó tigber nno bo si: utaturke uba mo nen' ki te ten Melkisedek. <sup>16</sup> Wa ye taturke, ki ne u ye udensen uba ya nil \*yiko ye ma nno bo, u ye utaturke ki ne u'miel la na nmabe gbenm ya tuom bo ne. <sup>17</sup> Kimε ni kele' u'bo \*Uwien ya gbanku ni ki ye:

«A yé utótuárke ne uyo wà ña ñmábe gbenm  
ten Uwien là ñen' isen' yà ki tien' Mèlkisedek utótuárke nnó.»

<sup>18</sup> Ñen bo ne bi gben' yikokpiék nnó, kime wa ñmábe tuóm, ka toreh má. <sup>19</sup> Kime Moyis ya yiko ña fre' ki cèrè' bonn mán ki tí gben' Uwien ya nun bó. Ama Uwien yùón' ki de' te lidèndènl là mán ki cèn' ní'ké. Len ne li cèrè tí nekñ Uwien.

<sup>20</sup> Nà pukn' si: Uwien liébe' ki pole' ki pùon' má ne. Bitótuárketáb nnó Uwien ña pole' ki pùon' ben bo. <sup>21</sup> Ama \*Yesu wón, Uwien pole' ki pùon' ne ki tóke' wó ki ye:

«Min Yonbdaan ne pole' ki pùon',  
ma ní jiin n'ñábon:

«A yé utótuárke ne uyo wà ña ñmábe gbenm.» »

<sup>22</sup> Ñen bo, \*Yesu ne sere' ki cèrè' Uwien cuo' nin te kujótiéku kùà mán ki cèn' ní'ké.

<sup>23</sup> Nibontánn má si: bitótuárketáb nnó là te ligol ne, kime mikuum bo ba ní fre kí li tuu kí te ki sánh bi'tuonl. <sup>24</sup> Ama \*Yesu wón tuu ki fuobe ma nnó u li yé utótuárke ne yo ké yo.

<sup>25</sup> Ñen bo ne u li fre kí ñmien binib bà nekndeh Uwien kí ñe wón bo uyo wà ké te, kime u tuu ki fuobe ne ki kàareh ki miéh Uwien ki dienh bé.

<sup>26</sup> \*Yesu ne yé bitótuárcienb ya cien wà kpe tí li ñmábe wó. U yé uñaan ne, ka te iba ni, ka ñmábe biil, Uwien bore' wó nin bibièrdènb, ki duon' wó paaki ya paaki ki de' wó ukánkàan. <sup>27</sup> Wón ña ciéke wó ní li teh idaan ké ituáre u'tiema biere bo ñó kí yaan kí tien ituáre udu ya nib yi bo ten bitótuárcienb ya ciéntáb teh ma bo. U taa' u'bugben ne ki tien' lituárl bolm miba kpein. <sup>28</sup> Moyis ya yiko là cèrè' bi teh binib bà bitótuárcienb nnó má la teh ibiere ten binitáb ne. Yiko nnó ya puoli bó ne Uwien pole' ki pùon', ki tien' u'Bijé bitótuárcienb ké ya cien. Wón ne ña tien' biere fiebu ki li fre kí sán lituonl ní'donbó.

## 8

### *Yesu ne yé bitótuárcienb ya cien imànmàn*

<sup>1</sup> Umésen wà só yé umésenje ti tókeh tigber tà ná ni: ti ñmábe u ya tótuárcienb ké ya cien ya bol ne, u ké Uwien uyébm ké ya daan, ya jie bó paaki bó, <sup>2</sup> ki sánh u'tuonl Uwien te lininbonl là ni nnó. Ñen saan ne yé Uwien ya ninbonmàn. Na yé nisaal ne tien' lè, Uwien nin u'yul ne tien' lè.

<sup>3</sup> Bi teh unil ké bitótuárcienb ya cien wó ní li taah tibont ne ki dienh Uwien, kí li teh ituáre má ki dienh wó. Nnó ne ní kpe tí má ya tótuárcienb ya cien má ní li ñmábe u li taa ná kí de Uwien. <sup>4</sup> U bi te kitink bo la, wa bi li yé tótuárke mánán, kime bitótuárkaab te ki taah tibont ki dienh Uwien, Moyis ya yiko ye ma bo ne. <sup>5</sup> Bi sánh itúon yà nnó yé tibonmànt tà te paaki bó nnó ya ñennénku nin tu'jinjint ne. Nnó ne Moyis là ye wó ní tien Uwien ya ninbonl uyo wà nnó, Uwien tóke' wó ki ye: «Tùore kí cenge, á tien lè, lè ní tùore kí li naan n wuón' ñe lininbonl là ya ñennénku lijuál bo nnó.» <sup>6</sup> Ama fènfènnó, Uwien de' \*Yesu utótuárke ya tuonl là nnó cèn' tótuárke ké tótuárke yaal. Wón ne se Uwien cuo' nin binib kujótiéku kùà nnó ni, ne kujótiéku nnó mán ki cèn' mikpiékm yaaku, kime Uwien pùon' lipuonl là nnó mán ki cèn' mikpiékm yaal.

### *Kujótiéfénku ya gber*

<sup>7</sup> Tó, ní yé kujótiépiéku kùà là te nnó ña bi ñmábe gber tuba la, Uwien ña bi li liébe kí cuo nin nib jótietóku. <sup>8</sup> Imàn, Uwien laa' u'nib ya biil ne ki len' ki ye:

«Min Yonbdaan ne lienh,  
uyo uba we ní

ní liébe kí cuo nin Israyel yaab  
nin Suda yaab ké kujótiéfénku.

<sup>9</sup> Kujótiéku nnó ña ní li naan nin  
n là kpié' ki cuo' kùà nin bi'yaajeb,  
uyo wà n dère',  
ki ñen' bé Esipt ni nnó.



Ba paan' kujotieku nnɔ bo ma nnɔ,  
 nɛ n'mɔ sɛln' ki dɔan' bɛ.  
 Min Yonbdaan nɛ len' nnɔ.  
 10 Yonbdaan liɛbe' ki ye:  
 ‹Idɛn yiɛ gɛbre' la,  
 n li cuo nin Israyɛl yaab kujotieku kɔa sɔ.  
 N li kuɔn n'yikombɛ bi'yɛnm ni,  
 kɪ kele bɛ bi'fɛl bo.  
 N li yɛ bi'Wien,  
 nɛ bɛ rɪ li yɛ n'nib.›

11 Bi'ni uba ŋa ji li wɔkn u'tɔ,  
 uba ŋa ji li wɔkn u'ninɛ kɪ tɔke wɔ kɪ ye:  
 ‹wɔ rɪ bɛnde Yonbdaan.›  
 Kimɛ bi'kɛ li bɛnde nni nɛ.  
 Kɪ cin ibaan kɪ tɪ baa binikpɛkpiɛkb.

12 N li fɛrɛ bɛ bi'biil,  
 ma ji li tiɛrɛ bi'biɛrɛ bɔ fiɛbu.»

13 Uwien lienh kujotiefɛnku bɔ la, nɪ wuɔn' ki ye kukpiɛku nnɔ kpaare' nɪnɔ. Kimɛ nibonkpaann kɛ tɪ pore' la, nɪ joh nɛ rɪ gben nɛ.

## 9

### *Kujotiekiɛku ya tuɔrɛ*

1 Uwien lɔ kpiɛ' ki cuo' nin binib kujotieku kɔa nnɔ u lɔ wuɔn' bɛ bi li paan isɛn yɔ bo kɪ li pukeh wɔ nɛ, nɛ ki cɛrɛ' bi ŋmɔbe bi li pukeh wɔ nɔ saan kitink bo. 2 Imɔn, bi lɔ tien' lininbonl liba nɛ li ŋmɔbe tidubent tule. Lininbonl nnɔ ya puke ni frɛŋɔknbɔl lɔ te nin litebl lɔ bi paakeh li'bo kɔnɔ wɔ bi taah ki punh Uwien nnɔ. Bi yih nɛn saan nɛ libɔŋaanl. 3 Kukpɛlɛɛɛncienku kuba nɛ lɔ bore' upuke nin kudubenku nnɔ. Kukpɛlɛɛku nnɔ ya puoli bɔ nɛ yɛ kudubenku. Bi yih nɛn bɔ nɛ libɔl lɔ ŋaan ki tɪ gbien'. 4 Bi taa' miŋɔkm ki duore' liponpuol lɔ ki sienh li'bo liŋubl nnɔ te nɛn bɔ nɛ. Kujotieku ya lɛkl lɔ bi taa' miŋɔkm ki duore' li'gbɛnɛnt kɛ bo nnɔ mɔ te nɛn bɔ nɛ. Tijier tɔ bi yih tɔ \*mann nnɔ te miŋɔkm ya sɛnl liba ni ki taake lilekl nnɔ ni. Arɔn ya kpɛdɔn wɔ lɔ bunde' ki puun' nin bi lɔ kele' \*yiko itɛnpɛnpɛn yɔ bo nnɔ mɔ te lilekl nnɔ ni nɛ. 5 Uwien ya tondb bɔ bi yih bɛ seribɛn nnɔ bile ya nɛnnɛnt te lilekl nnɔ ya paaki, ki ŋmɔbe ifiɛbe, ki wɔngɛh ki teh Uwien te ni'saan. Bitondb nnɔ ya fiɛbe ya sɔngɛ liɛke lilekl nnɔ bo bi gbienh nɔ saan misɛm ŋɔ Uwien rɪ fɛrɛ binib bi'biɛrɛ nnɔ. Bɔnl ŋa te tɪ len nɛ rɪ li yebe tibont nnɔ kɛ bo fɛnfɛnnɔ wuɔ nɔ.

6 Bi bonde' tibont kɛ ki sensien' nnɔ nɛ. Bitɔtuɔrkaab kɛ kɔh upuke ni nɛ idaan kɛ ki tɪ sɔnh bi'tuonl. 7 Ama kudubenku bɔ wɔn, bitɔtuɔrcienb ya cien baba nɛ kɔh ni'bɔ bolm miba libinl ni. Wa kɔh ni'bɔ ŋɔ ka tuke wɛnt ya sɛm wɔ rɪ tɪ de Uwien wɔn bugbɛn ya biil nin udu ya nib tɔrɛ' ki bii' libiil lɔ nnɔ bo. 8 Nnɔ nɛ \*Mifuoŋaanm wuɔn' ki ye lininbonkpiɛkl laan biɛ ki te ma nnɔ, usɛn wɔ joh lininbonmɔnl lɔ te paaki bɔ nnɔ biɛ ki paake nɛ. 9 Nɪ yɛ kunɛnnɛnku nɛ uyo wuu. Ni'tingi si: bi punh Uwien tibont tɔ nnɔ nin bi teh ituɔrɛ yɔ ki dienh wɔ nnɔ ŋa rɪ fre kɪ cɛrɛ wa teh tu ya bont ya fɛl bo rɪ li wien kɪ tɪ gben. 10 Ni'kɛ yɛ inisaalbok nɛ, ki likeh tijier ya jim nin midaam ya ŋum nin tigbɛnɛnt ya sɔkrm ki paan' iyaajɛbok ye ma bo. Binib li boh i ya bok nɛ kɪ tɪ baa uyo wɔ Uwien li lɛbre nibonfɛnn.

### *Kristo wɔn taa' u'bugbɛn nɛ ki tien' lituɔrl*

11 Kristo wɔn baa' ki yɛ bitɔtuɔrcienb ya cien ŋɔ wɔ rɪ cɛrɛ tɪ lɛ ti laa' mimɔnm mɔ nɔ nɛ\*. U kɔn' lininbonl lɔ ya tɔl ŋa te, ki mɔn ki tɪ gben' ni nɛ. Nisaal ŋa tien' li ya ninbonl,

\* 9:11 Bi kpiɛ' ki kele' tigbont tɔ nnɔ ya tuba ni nɪ kele' ki ye: Wɔ rɪ cɛrɛ tɪ lɛ mimɔnm mɔ wɛ nɪ nnɔ nɛ.

ne la yé kitink kiε bo yaal mǎ. <sup>12</sup> Kristo kǎn' lininbonl nnǎ ni bolm miba kpein ne. Wa tuke iwǎje nin inajefanfaan ya sǐm ne ki kǎn' wǎ rí tǐ tien lituǎrl, u taa' u'tiema sǐm ne ki tien' lituǎrl, ki de' tε ki wie' uyo wǎ ŋa ŋmǎbe gbenm. <sup>13</sup> Nǐ yé bi là taah iwǎje nin inaje ya sǐm ki gbienh binib bà bii' bo, ki wǐndeh unasel ki taah u'fentem ki pukeh bi'bo, kimε bi saa' likuǎl ŋǎ be rí ñen bi'bo tijǎknt la, <sup>14</sup> nǐ li tien mila Kristo ya sǐm ŋa rí li ŋmǎbe tuǎm kí cǎn nen kε. Mifuoñaanm mà ŋa ŋmǎbe gbenm cǐre' Kristo taa' u'ba ki tien' lituǎrl ten kitǎtuǎrwenk kǎ ya niba saan ŋa gbè, ki de' Uwien ŋǎ u'sǐm rí gben itùonbiere yǎ te tǐ'fèl bo ya gber, kí cǐre tǐ'fèl rí li wien kí tǐ gben ŋǎ tǐ li sǎnh ki dienh Uwien wǎ fuobe ne.

<sup>15</sup> Nǐn bo ne Kristo sere' Uwien cuo' nin binib kujǎtiefǎnku kǎa nnǎ ni, ŋǎ wǎn Uwien yin' bà nnǎ rí lε u puǎn' ki ye u li tien be mimǎnm mà, mè rí li tuu ki te nnǎ. Nnǎ ne Kristo kpo' wǎ rí de bà là te kujǎtiekpǐeku ni ki saa' kù nnǎ, bi'biere ni kí wie. <sup>16</sup> Imǎn, unil kele' u lá kpo' la, bi li tien u'faal ma bo ki ble' la, nǐ kpe u'kuum ya puoli bó, be rí wuǎn kí ye u kpo' ne, kí yaan kí tien, u kele' ki ye be rí tien u'faal ma bo. <sup>17</sup> Udaan ŋa laan kpo' la, u kele' nǎ nnǎ ŋa ŋmǎbe tuonl fiebu. U tǐ kpo' ne la, u kele' nǎ nnǎ ji ŋmǎbe lituonl. <sup>18</sup> Nǐn bo, Uwien là cuo' nin binib kujǎtiekpǐeku kǎa nnǎ mǎnǎn ya cinm, bi là kǎre' kiwǎnk ki wule' misǐm ne, ki yaan kù cin'. <sup>19</sup> Tǎ, Moyis là kaan' wǎbl kε wǎbl \*yiko ya gbǎnku ni udu ya nib kε ya nun bó, ne ki taa' inajefanfaan nin iwǎje ya sǐm ki cùuke' miñunm, ki taa' kufaaku kuba bi yih kù isǎp nin kukpǎlcǐeku kuba kù dinge suǎo ki mǎn ki cùun' len ki gbεgbe' \*yiko ya gbǎnku nnǎ nin udu ya nib bo. <sup>20</sup> Ne ki ye: «Misǐm miε wǎngǎh ki teh Uwien cuo' nin ne kujǎtieku ne ki ye ní li ŋuuke kù.» <sup>21</sup> Ne ki taa' misǐm nnǎ ki gbεgbe' Uwien ya ninbonl nin bi taah tiwǎnt tǎ kε ki pukeh Uwien nnǎ mǎ kε bo. <sup>22</sup> Kí ñε \*yiko ye ma bo, misǐm ne ñendeh tibont tǎ yebe ya jǎknt ki cǐreh tù mǎn. Sǐm ŋa ñen' la, Uwien ŋa rí fère nib bi'biere.

### *Yesu taa' u'ba ki tien' lituǎrl bolm miba kpein ne ki gben' ibiere*

<sup>23</sup> Bi teh i ya tuǎre ki ñendeh tibont tǎ yé paaki bó yaar ya nǐnnǎnku ya jǎknt la, nǐ wuǎn' ki ye paaki bó yaar tǎ yé tibonmǎnt nnǎ mǎ kpe be rí tien tù ituǎre yǎ mǎn ki cǎn' yen ne. <sup>24</sup> Kimε Kristo ŋa kǎn' lininbonl là binib tien' lè, li yé paaki bó ya ninbonmǎnl ya nǐnnǎnku nnǎ ni. Ama u kǎn' paaki bó yaal bugben ni ne ki ji se tǐ'ciεk bó fǎnfǎnnǎ Uwien ya nun bó. <sup>25</sup> Nǎ yé u kǎn' len wǎ rí li tuu ki taah u'ba ki teh lituǎrl ten bitǎtuǎrcǐenb ya cǐen tuu ki taah ma tiwǎnt ya sǐm ki kǎh Uwien ya ninbonl ya dubenku ni binl kε binl ma bo. <sup>26</sup> U bi tien' nnǎ la, u bi jin' ijǎnd mibolm mà yebe ŋǎ kí cin haali uñǎndun ya cincinyo. Ama fǎnfǎnnǎ, idǎnfǎrke yǐe nǎ u taa' u'ba ki wuǎn' binib bolm miba kpein ne, ki taa' u'ba ki tien' lituǎrl ki gben' ibiere ya tuǎm. <sup>27</sup> Uwien sien' ki ye unil kε li kpo bolm miba ne, ne ni ya puoli bó wǎ rí bu binib tǐbuur. <sup>28</sup> Nnǎ ne Kristo taa' u'ba ki tien' lituǎrl bolm miba kpein ŋǎ wǎ rí ñen binib bà yebe ibiere ni. U li liεbe kí taa u'ba kí wuǎn nle bo. Na ji yé wǎ rí ñen binib ibiere ni, nǐ ji yé wǎ rí ŋmiεn bà gu u'baam nnǎ ne.

## 10

<sup>1</sup> Moyis ya yiko yé tibonmǎnt tǎ we ní nnǎ ya jinjinku ne. Wa cinbe ki yé tibont bugben ki tǐ gben'. Nǐn bo ne \*yiko nin u cǐreh bi tuu ki teh ituǎrbaab yǎ binl kε binl ka ŋmǎbe biεn nnǎ, ŋa li li fre kí cǐre binib bà ñekndeh Uwien nnǎ rí li mǎn kí tǐ gben. <sup>2</sup> I bi freh ki cǐreh bà teh yé nnǎ mǎn ki tǐ gben' Uwien ya nun bó la, bi bi dǎan' yé ŋǎ, kimε bi bi li tien yé bolm miba kpein ne, ka ji li ŋmǎbe biil ya yenmaale bi'fèl bo. <sup>3</sup> Ama ituǎre nnǎ tuu ki tiereh be bi'biere bó ne binl kε binl. <sup>4</sup> Kimε inaje nin iwǎje ya sǐm ŋa rí fre kí gben biere. <sup>5</sup> Nǐn bo ne Kristo ye wǎ rí baa uñǎndun wuu ni uyo wǎ nnǎ u tǎke' Uwien ki ye:

«ŋa yǐe tuǎre,  
ka yǐe be rí li punh ŋε bont mǎ,  
ama a tien' nni tigbenǎnt.

<sup>6</sup> Bi wǐndeh ituǎre yǎ ya wǎnt iponpob bo ki dienh ŋε nnǎ,  
a'yǎnm ŋa sǎngǎ' i'bo,

bi teh yà ibiere ya fèrm bo nnə,  
a'yenm ɲa sɔnge' i'mə bo.

<sup>7</sup> Nɛn bo nɛ n tɔke' ɲɛ ki ye:

«N'Wien, min sɔ,  
n we ní rí tien a'yíem nɛ,  
tɛn ní kele' n'bo a'gbɔnku ni ma bo.» »

<sup>8</sup> Kristo kpiɛ' ki len' ki ye:

«ɲa yíe tuɔɔɔ,  
ka yíe bɛ rí li punh ɲɛ bont,  
ka yíe bi wíndeh ituɔɔɔ yà ya went iponpob bo ki dienh ɲɛ nnə,  
ka yíe bi teh yà ibiere ya fèrm bo nnə mɔ,

Nɛn kɛ ɲa sɔnge' a'yenm.»

Ama \*yiko nɛ nín ye bɛ rí li teh i ya tuɔɔɔ kɛ. <sup>9</sup> Nɛ ki liɛbe' ki len' ki ye:

Min sɔ, n we ní rí tien a'yíem nɛ.

Nnə nɛ u gben' ituɔɔɔkpiɛk nnə ki taa' u ya tuɔɔɔl ki lèbe'. <sup>10</sup> \*Yesu Kristo tien' Uwien ya yíem, ki taa' u'ba ki tien' lituɔɔɔl bolm miba kpein, ki cèrɛ' ti mɔn ki tɪ gben' Uwien ya nun bó.

<sup>11</sup> Tɔtuɔɔɔkɛ kɛ tɔtuɔɔɔkɛ tuu ki sieh idaan kɛ nɛ ki sɔnh u'tuon, ki tuu ki teh ituɔɔɔbaab, ya li li fre kí ñɛn nib ya biere. <sup>12</sup> Ama Kristo wɔn tien' lituɔɔɔl bolm miba nɛ ibiere bo, nɛ ki kɛ uyo kɛ Uwien ya jie bó, <sup>13</sup> ki gu haali nin uyo wà Uwien li cèrɛ wɔ rí tɛ u'nɛnnɛndb bo litaal. <sup>14</sup> Kimɛ u tien' lituɔɔɔl bolm miba nɛ ki cèrɛ' u ñɛn' bà ibiere ni nnə mɔn Uwien ya nun bó ki tɪ gben' uyo kɛ.

<sup>15</sup> \*Mifuoñaanm mɔ tɔkeh tɛ ki teh nnə nɛ. Mí kpiɛ' ki len' ki ye:

<sup>16</sup> «Yonbdaan ye: «Idɛn yiɛ gɛ̀bre' la,  
n li cuo nin bɛ kujɔtieku kùa sɔ:  
N li kele n'yikombɛ bi'fɛ̀l bo,  
kí kuɔn bɛ bi'yenm ni.» »

<sup>17</sup> Nɛ ki liɛbe' ki ye:

«Ma ji li tiɛrɛ bi'biere nin bi'biil bó.»

<sup>18</sup> Uwien fèrɛ' binib bi'biere la, ba ji li nuunh bɛ rí tien lituɔɔɔl ibiere nnə ya fèrm bo.

### *Yesu bo ti laa' usɛn tí nɛkn Uwien*

<sup>19</sup> N'yaabɛ, nɛn bo, ti du ki ye \*Yesu ya sɛm bo, ti ɲmɔbe usɛn tí kɔ Uwien ya ninbonl ya dubenku ni. <sup>20</sup> \*Yesu pɛkre' usɛnfaan wà dienh limiɛl, kí ñɛ u taa' u'ba ma ki tien' lituɔɔɔl ki cèrɛ' kukpɛlɛɛnciɛnku kùa bore' Uwien ya ninbonl bolm mile nnə kɛrɛ' nɛ ti ji laa' usɛn tí kɔ lininbonl nnə ya dubenku ni. <sup>21</sup> Ti ɲmɔbe bitɔtuɔɔɔrciɛnb ya ciɛn uba, wɔn nɛ ɲmɔbe ticiɛnt Uwien den. <sup>22</sup> Nɛn bo, cèrɛ mɛn tí nɛkn Uwien, kí li ɲmɔbe iyɛnmaale yà cuube, kí li ɲmɔbe mitekjim kí tɪ gben. Yesu bo, ti'fɛ̀l bo wien nɛ, ka ji ɲmɔbe biil liba nin litɔl. Ní te tɛn bi taa' miñunm mà ɲa ɲmɔbe jɔknt nɛ ki sii' tɛ. <sup>23</sup> Cèrɛ mɛn tí li lienh binib ya nun bó ti'dɛndɛnl bó, kí li co lè kenken, ki la li ɲɛndeh ti'gbenɛnt, kimɛ Uwien wà pùon' nnə yé umɛmɔndaan nɛ. <sup>24</sup> Cèrɛ mɛn ti la gɔh tɔb bo, kí li saakreh tɔb ya gbenɛnt ɲɔ kí fre kí li yíe tɔb, kí li sɔnh ituon yà mɔn. <sup>25</sup> La cèrɛ mɛn tí dàan ti'táan ya baam tɛn biba dàan' ma ka ji bàareh, ama tí li cinbe ki saakreh tɔb ya gbenɛnt, kimɛ ninbi mɔnɔn bɛn ki ye Yonbdaan ya wengbiin nɛkn ní ɲɔ. <sup>26</sup> Ti bɛnde' nà yé tigbɛmɔnt ɲɔ ki cèkre' ti'yenm ki liɛbe' ki teh ibiere la, tuɔɔɔl ɲa ji te kí fre kí ñɛn i ya biere. <sup>27</sup> Nà sɛn' si: tí li gu nin bujɛwaanbu nɛ lidaali là Uwien li bu binib tibuur, kí cèrɛ umucɛnciɛn rí wi bà yíe' u'ñɔbu bó nnə. <sup>28</sup> Ní bɛn ki ye unil saa' Moyis ya yiko ɲɔ binib bile bii bita kun' imɔn ki ye u mɔnbe ki saa' wɔ la, ba rí muɔ udaan ɛɛɛkm, bi li ku wɔ nɛ. <sup>29</sup> Ní li tien mila ɲɔ unil wà yin' Uwien ya Bijɛ fɛnm, ki ye misɛm mà bo Uwien liɛbe' ki cuo' nin binib kujɔtieku, ki ñɛn' wɔ ibiere ni ɲa yé bonn, ki suke' \*Mifuoñaanm mà bo Uwien tien' wɔ mimɔnm nnə ya tudɛrɛ ɲa rí li bre kí gbien-i? <sup>30</sup> Imɔn, ti bɛn wà len' ki ye:

«Min ne li tu lifenl,  
min ne li jiin unil ke u'tuon kpe ma bo,»  
ki liebe' ki ye:

«Min Yonbdaan ne li bu n'nib tibuur.»

<sup>31</sup> Unil lu' Uwien, limiel ya daan ya nuo ni la, ni bre udaan bo ceen ne.

<sup>32</sup> Tiere men ni la cin' iden ya ki laa' Uwien ya wenwenku nno ni ya puoli bo na la tien'. Ni la jin' ijend ki gbien', ki juun' ki mon' limuol la faa ceen. <sup>33</sup> Uyo uba bi la suke' ne, ki jende' ne binib ke ya nun bo, ama uyo uba mo ni la sere' bi jendeh binitob ba nno mo ya cik bo. <sup>34</sup> Ni ye imon ne, ni la nmire' binib ba te lipekl ni nno ya nunsiiir. Binib fie' ni'bont ne ni tuo' nin uyensonge, kime ninbi nin ni'yul ben ki ye ni nmobe lifaal la mon ceen, ki li tuu ki te. <sup>35</sup> N'yaabe, nen bo, la jende men ni'gbenent ni nmobe midum ma nno bo, kime mi li cere ni le lisuul la yebe. <sup>36</sup> Ni kpe ni li nmobe kuminku ne ki fre ki tien Uwien ye na jo ki le u puon' na nno. <sup>37</sup> Kime ni kele' \*Uwien ya gbanku ni ki ye:

«Ni sien' waamu ne,  
uyo wa sien' nno ja ji ye bonn,

wa we ni nno  
li baa ni wa ri taande.

<sup>38</sup> Wa ye ugbemondaan n'nun bo,  
li fuobe u'tekjim bo ne,  
ama u liebe' puoli la,  
n'yenm ja ri li songe u'bo.»

<sup>39</sup> Tinbi ben won, ta ye binib ba li liebe puoli ki juore fenm, ama ti ye ba teke' Uwien ki jin' be ri nmere ne.

## 11

### *Mitekjim ya gber*

<sup>1</sup> To, mitekjim ye ki li du ki ye a daan a li le nibonn na nno, a monbe ki laa' ne jo, ki li du ki ye ja lenh tibont ta nin a'nunbu nno monbe ki te ne. <sup>2</sup> Uyo bo yaab ya tekjim bo ne Uwien la len' bi'bo na mon.

<sup>3</sup> Ti teke' Uwien ki jin', ne ki bende' ki ye won ne nen' na ke te no nin u'fomaam. Nno ne Uwien ni' ta lenh tibont ta bo ki tien' ti lenh ta.

<sup>4</sup> Abel la teke' Uwien ki jin', ne ki tien' lituarl la mon ki cen' Kayen yaal, ki de' won Uwien. Nen bo ne Uwien bu' Abel ugbemondaan ki tuo' u'paabu. Nin Abel kpo' ma ke nno, mitekjim nno bo ne u bie ki lienh.

<sup>5</sup> Enok la teke' Uwien ki jin', ne won Uwien taa' wo ki don' paaki bo, kuum ja jin' wo. Uba ja ji laa' wo, kime Uwien taa' wo ki don' u'ba saan jo. Ni kele' \*Uwien ya gbanku ni ki ye: Uwien ya yenm la songe' Enok bo ne ki yaan u taa' wo ki don' paaki bo. <sup>6</sup> Unil ja nmobe tekjim la, wa ri fre ki songe Uwien ya yenm, kime ni kpe wa ke nekndeh Uwien ri teke ki ji ki ye Uwien te ne, ne Uwien li su ba ke nuunh wo.

<sup>7</sup> Nowe la teke' Uwien ki jin', ne ki tien' buñercencienbu ki nmien' won nin u'den yaab. Uwien la juo' ki take' wo tibont ta ba laan lenh tu, tu la li tien nno bo ne u teke' tu tunojer tule. Nno ne Nowe wuon' ki ye unendun ya nib nmobe libiil Uwien saan. U'tekjim bo ne Uwien bu' wo ugbemondaan.

<sup>8</sup> Abraham la teke' Uwien ki jin', ne ki tuo' u'yin, ki bure' Uwien ye u li de wo udu wa wun li ye u'faal nno bo, ki joh ka ben u joh na bo. <sup>9</sup> U la teke' Uwien ki jin', ne ki fii' ki tikon' udu wa Uwien la puon' ki ye u li de wo wu nno ni, ki ye ucaan ni'bo. U la pon' ininbon ne ki koh len. \*Isaak nin Sakob ba ye lipuonl nno mo ya faajib ten won nno mo la koh ininbon ne. <sup>10</sup> \*Abraham tien' nno ki gu wo ri la ko udu wa ya dur ya tenpuun faa ta nmobe lum ni ne. Uwien nin u'yul ne kpankpaan' u li me udu nno ya dur ma bo, ne ki men' tu.

<sup>11</sup> Nin Abraham la pore' ki gèbre' wo ri maa kibuk ma ke, u'po mo tonde' ki ye unol nno, u teke' Uwien ki jin' ma nno ne Uwien cere' u maa' kibuk, kime u ben ki ye won Uwien

wà pùon' lipuonl nnò kpè bέ ní li du u'bo nέ.\* <sup>12</sup> Nέn bo nέ wòn ujέbaab \*Abraham, wà là nέke mikuum nnò laa' iyaabii ì yέbe ka ηmòbe kέnku tέn ìnmaabii nin likpentέngbil.

<sup>13</sup> Binib nnò kέ là ηmòbe mitekjim nέ ki tí baa' bi'kuum daali ka teke' Uwien là pùon' bέ nà nnò. Ama bi'tekjim bo nέ bi juò' ki laa' Uwien pùon' nà nnò ní te fɔ́nfɔ́km, nέ bi'yέnm sɔ́nge' ní'bo, nέ bi len' binib ya nun bó ki ye bi yé bicέnb nέ uηendun wuu ni ki gèbreh.

<sup>14</sup> Binib bà lienh nnò wòngɛ́h ní wien nέ ki teh bi nuunh udu wà yé bi'yu nέ. <sup>15</sup> Bi bi maaleh bi ñέn' udu wà ni bó nέ la, bi bi laa' libònl ki liebe' ní'bó ηò. <sup>16</sup> Ama imòn, bi'nun món bέ ní kò udu wà mòn ki gbien' ni nέ, wun si Uwien den. Nέn bo nέ bi yin' Uwien bi'Wien la, na coh wò fέ, kime u bonde' bέ udu wà bi li kò u'ni.

<sup>17</sup> Abraham là teke' Uwien ki jin', nέ ki tuo' ki taa' u'bijeabaab \*Isaak wò ní tien lituòrl uyo wà Uwien bikn' wò wò ní liike u'tekjim nnò nin Uwien là pùon' wò lipuonl ma kέ <sup>18</sup> ki ye: «\*Isaak bo nέ a'lonlunku li nòbe» nnò. <sup>19</sup> Abraham là bέn u'yέnm ni ki ye unil kpo' mònàn la, Uwien li fre kí mέkre wò. Nέn bo nέ Uwien jiiin' u'bije \*Isaak ki de' wò. Ní yé mimέkrm ya nέnnέnku nέ.

<sup>20</sup> \*Isaak là teke' Uwien ki jin', nέ ki tien' \*Sakòb nin Esawu Uwien ya mònmm ki de' bi'wenl bo.

<sup>21</sup> Sakòb là teke' Uwien ki jin', nέ uyo wà u benh wò ní kpo nnò, u tien' Yosέf ya buk kέ buk Uwien ya mònmm, ki ñi' ukpέndò bo ki puke' Uwien.

<sup>22</sup> Yosέf là teke' Uwien ki jin', nέ u tí nέke mikuum ma nnò u tòke' uyo wà Israyel yaab lá li siere kí ñέ Esipt ni, nέ ki tòke' bέ bi lá li tien ma u'kpòb.

<sup>23</sup> Moyis ya baambέ là teke' Uwien ki jin', nέ ki maa' wò ki bòle' wò ìnmaale ita, kime bi là laa' u mòn, nέ ba fέnge ubέr ble' likuòl là nnò. <sup>24</sup> Moyis là teke' Uwien ki jin', nέ ki tí kpére' ma nnò u yíe' ki ye bi la li yih wò Farahòn ya bisέ ya buk, <sup>25</sup> ki cèkre' u'yέnm ki ye bi jèndeh wòn nin Uwien ya nib la, ní mòn ki cέn' wò ní li te ibiere ni ki jinh uηmaa wà ηa ní wuòke. <sup>26</sup> U là bέn ki ye bi yuòndeh wò Uwien ya Nigέndkέ bo la, ní mòn ki cέn' nin wò ní lέ Esipt ya faal kέ, kime u'nun là cέ, u lá li lέ lisuul là nnò bo nέ. <sup>27</sup> U là teke' Uwien ki jin', nέ ki siere' Esipt ni ka fέnge' ubέr ya benpiebe, u'fèl ηa wòre', kime u te tέn unil wà laa' Uwien wà ba lenh wò nέ. <sup>28</sup> U teke' Uwien ki jin', nέ ki cère' Israyel yaab tien' Pak ya nacenku, nέ ki taa' misèmm ki fanfaan' inañuòn bo, ηò Uwien ya tond wà kuuleh nnò la mέ Israyel yaab ya bujέbukpiέkmu.

<sup>29</sup> Israyel yaab là teke' Uwien ki jin', nέ ki puore' miñuncienmónmm tέn bi cuonh liwél bo nέ. Ama Esipt yaab bέn bikn' nέ ki luo'. <sup>30</sup> Israyel yaab là teke' Uwien ki jin', nέ ki taa' iwien ilole ki cuon' ki linde' Seriko ya du, nέ liguonjel là guòn' wù nnò lu'. <sup>31</sup> Ujέnkpend Lahab là teke' Uwien ki jin', nέ ba ku' ki yekn' wòn nin binib bà yíe' Uwien ya ñòbu bó, kime u là teke' Israyel yaab ya pinpingb kucènkmu mònmm.

<sup>32</sup> N li biέ kí len kí ye ba kí pukn-i? N ye ní tuòre kí len Gedeyòn nin Barak nin Samsòn nin Jέfte nin \*Dafid nin Samiél nin \*Uwien ya ñòbonsòknb ya gber la, uyo li pòre nni. <sup>33</sup> Bi'ni biba là teke' Uwien ki jin', nέ ki faake' nin bibέrb ki fie' bi'du ki tien' bi'yi, bitòb cère' binib kpíen' tigbέmònt ya sέn, bitòb laa' Uwien là pùon' nà nnò, bitòb pi' icind ya ñuòn ya fre' ki tien' bέ niba, <sup>34</sup> bitòb kpiin' umufaa, bitòb ηmέre' ba fre' ki ku' bέ nin jusiek, bitòb ηa là ηmòbe tuòm, ki ji tien' bitòdέnb, ki ηmòbe lifèl butòbu ni, ki sέn' ki gbέle' idutò ya sojambe. <sup>35</sup> Bipiib biba mò là teke' Uwien ki jin', nέ Uwien cère' bi mέkre' bi'yaab bà kpo' nnò ki jiiin' ki de' bέ. Bi jènde' binib biba mò, ki nuunh bέ ní wíε Uwien ya sέn ηò kí ηmέre nέ, nέ ba tuo', kime bi là nuunh bέ ní lá mέkre bitέnkpiib ni ηò kí lέ mifuobm mà mòn ki cέn' fέnfέnnò yaam nέ. <sup>36</sup> Binib biba mò tuo' isuk, bi ñi' bέ inalέbe, ki lòle' bέ tikudòkr ki pέkn' bέ. <sup>37</sup> Bi yéke' bitòb itέn ki ku' bέ, ki jie' ki yέkre' bitòb nin kanpintajuk, ki ku' bitòb

\* **11:11** Migbiirm miέ ya ciim te bolm mile bo nέ: Nin Abraham là pore' ki gèbre' wò ní maa kibuk ma kέ, u'po mò tonde' ki yé uηòl nnò, u teke' Uwien ki jin' ma nnò nέ Uwien cère' u maa' kibuk, kime u ben ki ye wòn Uwien wà pùon' lipuonl nnò kpè bέ ní li du u'bo nέ bii nin Sara là pore' ma kέ ki tonde' ki yé uηòl nnò, u teke' Uwien ki jin' ma nnò nέ Uwien cère' u maa' kibuk, kime u ben ki ye wòn Uwien wà pùon' lipuonl nnò kpè bέ ní li du u'bo nέ.

nin kijusiek, bitəb ɲa ɲməbe bonn, ki cuonh ki lindeh ki guo tipegbənt bii tiwəgbənt, bi jəndeh be cɛɛn, nɛ ki teh be nà bre. <sup>38</sup> Bɛn bo uɲɛndun ɲa kpɛ be ɲ li yé u' nib. Nɛ bi cuonh ki lindeh, ki joh ijuən nin kupenpelku bó, ki kəh tijəlulnt nin ifele ni. <sup>39</sup> Nin Uwien len' binib nnə kɛ bo nà mən bi'tekjim bo ma kɛ nnə, ba laa' u là pùon' ki ye u li de be nà nnə. <sup>40</sup> Kimɛ Uwien là juə' ki bonde' tɛ tibont tà mən ki cɛn' tibont kɛ. Nɛn bo nɛ wa ɲ cère be ɲ kpiɛ kí li yé u sien' be, be ɲ li yé bidɛnd bà kí dàan tɛ.

## 12

### *Ti li ɲməbe kuminku ijɛnd ni*

<sup>1</sup> Tə, bi ya nib kɛ yé bimənkunb nɛ ki guən' ki linde' tɛ ki yebe cɛɛn. Nɛn bo, cère mɛn tí wiɛ nà kɛ yé ti'bo litukl nin ibiɛre yà jebɛh tɛ ikɛle kɛ na faa nnə, kí li ɲməbe kuminku, ki bə minənm bo ki cuube Uwien sien' tɛ tí sɛn kí baa nà saan. <sup>2</sup> Cère mɛn ti'nun ɲ li cɛ \*Yesu bo. Wən nɛ pɛkre' mitekjim ya sɛn, nɛ ki cèreh mɪ kpɛnh ni'donbó ki joh. U tuo' udəpənpən bo ya kuum ka sɛn' fɛ, kimɛ u là bɛn ki ye u lá li lɛ uyɛnsəngɛ. Fɛnfɛnnə u kɛ Uwien ya bɛrbiɛk ya jie bó nɛ. <sup>3</sup> Imən, maale mɛn Yesu bo, kí liike bibiɛrdɛnb là nɛnde' wə ki jənde' wə ma bo u tuo' ni'kɛ, ɲə ki là cère uyɛnsaa ɲ ɲɛnde ni'gbɛnɛnt. <sup>4</sup> Ni məh ni là li teh ibiɛre ma, na laan mən' ki tí baa' nɪ yé mikuum la, ní kpo. <sup>5</sup> La sunde mɛn Uwien təkɛ' nɛ nà ki de' nɛ lifɛl nnə bó tɛn bibaa gbɛreh u'bumu ma bo. U ye:

«N'bukɛ, la yɛ Yonbdaan ya tudɛre.

U kənh nin ɲɛ la,

la cère a'yɛnm ɲ saa.

<sup>6</sup> Kimɛ Yonbdaan yɛ wà la,

u diɛh u ya tub nɛ.

U bɛn wà kɛ yé u'buk nnə

u ɲih wən nɛ.»

<sup>7</sup> Tuo mɛn kí ji ijɛnd, kimɛ i cekndeh nɛ nɛ. Ni yé Uwien ya bumu ma nnə nɛ u diɛh ni'tub. Ki lɛ buk tɛ ɲə ki'baa ɲa diɛh ki'tub-i? <sup>8</sup> Uwien ɲa dɛrɛ' ni'tub tɛn u diɛh u'butəmu ya tub ma bo la, na yé u'bumu, ni yé ikpiɛb nɛ. <sup>9</sup> Nɪ yé ti'baambɛ bà yé binib nnə diɛh ti'tub ki cekndeh tɛ ti boh be la, nɪ li tien mila ɲə ta ji li tuo Baa wà tɛ paaki bó ya tudɛre, kí lɛ limiɛl-i? <sup>10</sup> Imən, ti'baambɛ taa' uyo wà ki diɛh ti'tub be ɲ cɛkn tɛ bi yɛ ma bo nnə ɲa fəke, ama Uwien wən diɛh ti'tub ti'mənm bo nɛ, ɲə ti là ɲməbe jəknt tɛn wən Uwien ɲa ɲməbe jəknt ma bo nɛ. <sup>11</sup> Bi dɛrɛ' unil ya tubl itaan yà bo la, u'yɛnm ɲa səngɛ, nɪ yé uyɛnsaa nɛ u'bo. Ama ni ya puoli bó, nɪ ji yé bà tuo' bi dɛrɛ' bi'tub ki gbɛrɛ' be nnə bo uyɛnduən nɛ, ki cèreh bi teh nibonn nà cuube.

<sup>12</sup> Nɛn bo, tūɛrɛ mɛn kí sɛrɛ, kí li co nɪ faa. <sup>13</sup> Tūɛrɛ mɛn kí cubn ni li kpɛn isɛn yà, ɲə idien la sikrɛ i'tɛngbiɛmu ama yé ɲ faake.

### *Kristo yə li fuobe ma bo*

<sup>14</sup> Li nuunh mɛn ní li ɲmɛ nin unil kɛ, kí li pɛ Uwien ya sɛn bo nin ni'fɛl kɛ. Nnə ɲa ɲí la, uba mənən ɲa ɲ lɛ wə. <sup>15</sup> Li bɛn mɛn, ki là cère uba ɲ lúo Uwien ya juokm, ki là cère ni'ni uba ɲ li tɛ tɛn tisitontont, ki kpɛnh ɲə kí tuke fɛnfɛnm kí baa bà yebe bo kí tuln be. <sup>16</sup> Li bɛn mɛn, ki là li teh sənsondl, ki là li likeh Uwien ya bont fɛnm tɛn Esawu là tien' ma ki kuəre' u ɲməbe kibuciɛnk ya kpɛle wà nnə, ki teke' tijier ki jin' nɛn saan. <sup>17</sup> Ni bɛn ki ye ni ya puoli bó nɛ u ji là lá nuunh u'baa ɲ tien wə Uwien ya mənɛ nɛ wa cenge' u'bó. Nin u muə' ki gbáan' ma kɛ nnə u'baa ɲa lèbre' yɛnmaale\*.

<sup>18</sup> Ni nɛkn' Uwien saan ma nnə, na yé ni laa' bii ni cii' Israyɛl yaab là laa' nà nin bi cii' nà Sinayi ya juəl ya ɲiɛl nnə nɛ. Bi là laa' umufafaa uba teknh li'bo piɛbu piɛbu, ki laa' nɪ biike' cinm, ki laa' kutafaabiiku, <sup>19</sup> ki cii' linatunl liba ya muə bó, ki cii' uniɛke uba bó. Bi

\* **12:17** Migbiirm miɛ ya ciim tɛ bolm mile bo nɛ: Nin u muə' ki gbáan' ma kɛ nnə u'baa ɲa lèbre' yɛnmaale bii nin u muə' ki lèbre' u'tetɛm ma kɛ nnə, wa frɛ' ki lèbre' niba, kimɛ uyo nnə gèbre' ɲə.

cii' uniεke nnɔ bó ma nnɔ nε ki gbáan' ki ye ba ji yíe be ní liebe kí cii ñɔbonl liba kí pukn.  
<sup>20</sup> Kimε uniεke nnɔ ye nà nnɔ faa bi'bo nε. U ye:

«Wà ke mε' lijuɔl nnɔ la,  
 ba nǐ yé kiwɛnk mɔnɔn la,  
 be ní yèke itɛn kí ku.»

<sup>21</sup> Nà là tien' nnɔ là ηmɔbe bujɛwaanbu cɛɛn, nε Moyis len' ki ye: «Bujɛwaanbu ηmɔbe nni haali n'gbɛnɛnt ke tí ηɔh.»

<sup>22</sup> Ama ninbi wɔn, ni nɛkn' lijuɔl là bi yih lè Siyɔn ya juɔl nnɔ, ki nɛkn' Uwien limiel ya daan ya du. Wun si: Yerusalem wà te paaki bó. Uwien ya tondb turbɛnm te wun ni nε ki jeleh kunacenku. <sup>23</sup> Ninbi baa' licekl là ni nnɔ ya nib yé Uwien ya bukpiεkmu mùa ya yel kele' u'saan paaki bó nnɔ nε. Ni baa' Uwien wà buh uηɛndun ya nib ke tibuur nnɔ saan nε. Ni baa' binib bà cuube, u cère' bi yé u yíe be ní li yé bidɛnd bà nnɔ saan nε. <sup>24</sup> Ni baa' \*Yesu saan nε. Wɔn nε sere' Uwien cuo' nin binib kujɔtiefɛnku kùa nnɔ ni. U ya sèm nε puube' ki tien' te binib bà ηa ηmɔbe jɔknt. U'sèm nnɔ ya gber ηmε ki cɛn' Abel yaam ya gber.

<sup>25</sup> Liike mɛn ni'yul bo, ki la yíe ka ní cenge wà lienh nε nnɔ bó. Moyis là tɔke' binib Uwien ya gber kitink bo, ba cenge' u'bó nε ka ñɛn' utudɛre ni. Nǐ li tien mila ηɔ tinbi bà Uwien lienh te haali paaki bó nnɔ ta tɔnge' u'gber la, ti li ñɛ utudɛre ni? <sup>26</sup> Wɔn wà ya niεke là jènge' kitink uyo bo nnɔ, tí len' fɛnfɛnnɔ ki ye: «N li liebe kí cère kitink ní jènge; na yé kitink baba, kutaaku mɔ ji li jènge nε.» <sup>27</sup> U len' nà ki ye: «Kí liebe kí cère nnɔ» ya tingi si: u ñɛn' tibont tà ke nnɔ li jènge nε wɔ ní taa tù kí ble ukele bo, kí dàan tà ηa ní jènge tun ní li tuu ki te. <sup>28</sup> Nɛn bo, tí faare mɛn Uwien kimε u de' te udu wà ηa ní jènge ki yé tí'yu nε. Cère mɛn tí li pukeh wɔ u yíe ma bo, kí li tuonh u'ñɔbu bó, kí li boh wɔ. <sup>29</sup> Imɔn, tí'Wien te tɛn umu nε ki wih ki ηèreh tibont ke.

## 13

### *Kristo yɔ li tien ma kí li sɔnge Uwien ya yɛnm*

<sup>1</sup> Li tuu kí yíe mɛn tɔb tɛn ninjiɛb yíe tɔb ma bo. <sup>2</sup> La sunde mɛn kucɛnku ya tekɛm bó, kimε biba tekɛn binib kucɛnku nε ki tí teke' biba kucɛnku ka bɛn ki ye bi yé Uwien ya tondb nε. <sup>3</sup> Li tien mɛn lipɛkl ya nib bó tɛn ni'mɔ te lipɛkl ni nε, kí li tien bi jèndeh binib bà nnɔ bó tɛn bi jèndeh ninbi nε.

<sup>4</sup> Unil ke ní li boh upiikuɔn. Unil nin u'po la lindeh tɔb ya puoli bó, kimε Uwien li bu binib bà ke teh lisɔnsɔndl nin linaηmaal nnɔ tibuur.

<sup>5</sup> La taa mɛn ni'yul kí kpɛle ilike. Cère mɛn ni'yɛnm ní li sɔnge ni ηmɔbe nà bo. Kimε Uwien mɔnɔn len' ki ye: «Imɔn, ma ní sunde a'bó, ka ní wiε ηɛ mɔ.» <sup>6</sup> Nɛn bo nε tí'ni unil ke li fre kí ñǐ lifɛl kí len kí ye:

«N'Yonbdaan nε se n'ciεk bó,  
 ma fɛnge bonn.

Unisaal li fre kí tien nni ba?»

<sup>7</sup> Li tien mɛn ni'ciɛnb bà wɔkn' nε Uwien ya gber nnɔ bó, kí liike bi'fuobm là tí fɔre' ma bo, kí tɛkn bi'taanl ni mitekjim ya sɛn ni. <sup>8</sup> \*Yesu Kristo ηa lèbreh. U là te ma bo nnɔ u biε ki te nnɔ nε dinnɔ ki li tuu ki te nnɔ nε. <sup>9</sup> La cère mɛn binib ní taa miwɔknm mà ke ya bol ηa kpe sɛn kí lɛre nε. Uwien ya juokm nε dienh te mituɔm la, nǐ mɔn. Nǐ cère' tijier ya kùɔn yɛn wɔn la, ya li toreh binib bà pɛ i'bo fiebu. <sup>10</sup> Ti ηmɔbe liponpuol liba, nε \*Sufmbe bà yé bitɔtuɔrkaab Uwien ya ninbonl ni nnɔ ηa ηmɔbe sɛn be ní ji li'bo ya jier, <sup>11</sup> kimε bitɔtuɔrciɛnb ya ciɛn tukeh tiwɛnt tà ya sèm, ki kɔh Uwien ya ninbonl ya dubenku bó ki teh ibiɛre ya fɛrm ya tuɔrl nnɔ bi ñɛndeh tù udu ya gbe nε ki tí windeh. <sup>12</sup> Nɛn bo nε bi là ñɛn' Yesu udu ya gbe ki tí ku', ηɔ u'sèm ní ñɛn udu ya nib ya biere. <sup>13</sup> Nɛn bo, cère mɛn tí ñɛ kí cende wɔ udu ya gbe ki mɔ ní tuo bi suke wɔ isuk yà nnɔ. <sup>14</sup> Kimε ti kɔh udu wà ni kitink kiε bo nɔ ηa ní li tuu ki te. Ama tí'nun mɔn ti lá li kɔ udu wà ni wenli bo nnɔ bo

ne. <sup>15</sup> Wɔn \*Yesu bo, cɛre mɛn tɪ li pɛkeh Uwien uyo ke, kɪ li gɛh iyuon ki tɔkeh binib ki teh u yɛ Yonbdaan. Nɛn nɛ yɛ lituɔrl lɑ ti teh lɛ ki dienh wɔn Uwien. <sup>16</sup> La sunde mɛn tɔb ya mɔnm ya tienm bɔ, kɪ li gbiinh ni'bont nin tɔb. Nɛn nɛ te tɛn lituɔrl ki sɔnge Uwien ya yɛnm.

<sup>17</sup> Li boh mɛn ni'ciɛnb, kɪ li tuonh bi'ɲuɔn bɔ, kimɛ bɛn nɛ likeh nɛ, ki lɑ li tɔke' Uwien bi liliike' nɛ ma bo. Ni boh bɛ la, bi li sɔn bi'tuon nin uyenduɔn nɛ. Nnɔ ɲa ɲɪ la, bi li sɔnh ki dunh nɛ, nɛ na ɲ tore nɛ.

<sup>18</sup> Li kɑareh mɛn ki dienh tɛ. Ti bɛn ti'yɛnm ni, ki ye ta ɲmɔbe biil, kimɛ ti nuunh tɪ li teh nɑ mɔn nɛ isɛn kɛ ni. <sup>19</sup> N li tɔreh ki gbɑanh nɛ nɛ, ɲɪ li kɑareh ki dienh nni ɲɔ Uwien ɲ de usɛn ɲ liɛbe ɲɪ ni'saan tonm.

### *Ikaarfɔrke*

<sup>20</sup> Uwien nɛ yɛ uyenduɔn ya daan. U cɛre' ti'Yonbdaan \*Yesu wɑ yɛ upekpaaciɛn nnɔ mɛkre' bitɛnkpiib ni. U ya sɛm bo nɛ Uwien cuo' nin binib kujɔtieku kɔa ɲa ɲmɔbe gbenm.

<sup>21</sup> Uwien bugbɛn ɲ cɛre ɲɪ li freh kɪ teh mimɔnm isɛn kɛ ni, kɪ li teh u yɛ nɑ. Wɔ ɲ cɛre \*Yesu Kristo bo, tɪ li teh nɑ sɔnge u'yɛnm. Wɔn \*Yesu Kristo nɛ si ukpiɛke uyo ke. Ami.

### *Tigbɛfɔrkaar*

<sup>22</sup> N'yaabɛ, n gbɑanh nɛ nɛ, ɲikn mɛn kɪ cenge n kɛle' tigbɛr tɑ ɲ saake ni'gbɛnɛnt nɔ; ma li kɛle' ɲɪ fɔke mɔnɔn. <sup>23</sup> ɲɪ li bɛn kɪ ye bi wiɛ' ti'ninje Timote ɲɔ. ɲɪ yɛ u baa' n'saan tonm la, min nin wɔn li tɔke kɪ baa kɪ lɛ nɛ. <sup>24</sup> Fuonde mɛn ni'ciɛnb nin Uwien ya nib kɛ. Itali yaab fuondeh nɛ. <sup>25</sup> Uwien ɲ juoke ni'kɛ.



## Kugbɔnku kùà Saak kɛle' kù nnɔ Nà wɔngeh kugbɔnku kuu te ma bo

Tigber tà te Saak ya gbɔnku ni yé miwɔknm nɛ ki saakreh Kristo ya táan yà te uɛndun ni ni'kɛ saan nnɔ ya nib ya gbɛnɛnt. Saak kele' tù ki de' binib bà nnɔ lii yé Sufmbɛ bà teke' Kristo ki jin' nɛ.

Kugbɔnku kuu wɔngeh Kristo yaab miyɛnfuom mà li tore bɛ, bɛ rí li fuobe mitekjim ye ma bo nɛ. Unil teke' Uwien ki jin' la, u li sɔnh mitekjim ya tòn nɛ. U'tòn nnɔ wɔngeh ki teh u fuobe mɔnmɔnm Uwien ya nun bó (2:14-26).

Kugbɔnku kuu ni Saak tɔkeh bà ya nun mɔn bɛ rí lɛ lifaal nɛ ki teh bi la li likeh bijiinb fɛnm. U tɔkeh bifàadɛnb mɔ ki teh bi taah bi'faal ki teh nà nnɔ nɛ cèreh bi'faal nnɔ ɲa mɔn (5:1-6).

Kugbɔnku kuu ya fɔrm tɔkeh Kristo yaab ki teh bɛ rí li toreh tɔb, kí li kàareh ki dienh tɔb, kí li toreh bà wiɛ' tigbɛmɔnt ya sɛn bɛ rí liebe kí paan usɛn nnɔ bo (5:7-20).

### *Ifuonde*

<sup>1</sup> Min Saak, n yé Uwien nin Yonbdaan \*Yesu Kristo ya tonsɔnl nɛ. N kieh kugbɔnku kuu ki fuondeh ninbi Israyɛl yaab ya baamul piik nin ile ya nib\* bà yɛre' ki te uɛndun kɛ ni nnɔ nɛ.

### *Li ɲmɔbe mɛn kuminku mibiikm ni*

<sup>2</sup> N'yaabɛ, \*mibiikm mà kɛ ya bol lá tu' nɛ la, cère mɛn ni'kɛ rí li yé ni'bo uyɛnɲmaacien. <sup>3</sup> Kimɛ ni bɛn ki ye mibiikm lu' ni'bo ɲɔ na wiɛ' ni'tekjim la, mɪ faakreh nɛ ki dienh nɛ kuminku. <sup>4</sup> Cère mɛn ni'minku nnɔ rí tɪ fɔre ɲɔ ní li yé binib bà mɔn ki tɪ gben' ka pɔre' niba. <sup>5</sup> Ni'ni miyɛnfuom pɔre' wà la, wɔ rí miɛ mè Uwien wà ɲmɔbe tinimɔnt ki dienh binib kɛ faala, ka tiigeh uba nnɔ, nɛ u li de wɔ mè. <sup>6</sup> Ama wɔ rí miɛ nin mitekjim, ki la li ɲmɔbe yɛnmaale ilele, kimɛ unil ɲmɔbe iyɛnmaale ilele la, u naan tɛn inɲungbegbel yà kutafaaku joh ki findeh yè nɛ. <sup>7</sup> Udaan la li maaleh ki teh u li lɛ niba ti'Yonbdaan saan nɛ. <sup>8</sup> U ɲmɔbe iyɛnmaale ilele nɛ, ka bɛn u li cinbe kí tukn yà u'tòn kɛ ni.

### *Tijiint nin lifaal ya gber*

<sup>9</sup> Kristo yɔ wà yé ujiin la, wɔ rí li poknh, kimɛ Uwien kpiekɛ' wɔ ɲɔ. <sup>10</sup> Wà mɔ yé ufàadaan la, u'mɔ rí li poknh, kimɛ Uwien jiin' wɔ tingi ɲɔ. Ufàadaan li gèbre tɛn mimɔpuum sokreh ma bo nɛ. <sup>11</sup> Uwien puɔ' ki bɛn' ki sɛ' timuɔr la, tɪ yuɔnh nɛ, nɛ tu'puum rí sokre, ka ji ɲmɔbe ɲuɔrku. Nnɔ nɛ ufàadaan nin u'tòn kɛ li juore fɛnm.

### *Mibiikm ya gber*

<sup>12</sup> Unil wà \*mibiikm tu' wɔ ɲɔ u ɲikn' ka lu' mi'ni la, Uwien ya mɔnm te u'bo, kimɛ u ɲikn' \*mibiikm ni ki tɪ gben' la, u li lɛ limiɛl. Li ya suul nɛ Uwien pòn' ki ye u li de lè binib bà yíe wɔ nnɔ. <sup>13</sup> \*Mibiikm tu' wà la, u la ye Uwien nɛ biike' wɔ, kimɛ niba ɲa rí fre kí sure Uwien wɔ rí tien nà bre, nɛ u'mɔ ɲa rí sure nil wɔ rí tien nà bre. <sup>14</sup> Ama unil kɛ ya nunfɔke nɛ díɛh wɔ ticuɔr ki coh wɔ. <sup>15</sup> Unil ɲmɔbe ununfɔke ki gbien' la, u cèreh u teh ibiere nɛ. Ibiere nnɔ mɔ tɪ yɛbre' ki gbien' la, í tukeh wɔ ki joh mikuum ni nɛ.

<sup>16</sup> N'yaab bà n yíe bɛ, la li lɛreh mɛn ni'ba tuu ya bont ni: <sup>17</sup> Mipum mà kɛ mɔn ki tɪ gben', ɲɛh paaki bó nɛ. Mɪ ɲɛh Uwien wà ɲɛn' tiwenwent tà te paaki nnɔ saan nɛ. Wɔn nɛ ɲa lèbreh, ka jèngeh, ka ɲmɔbe cinɲunl mɔ. <sup>18</sup> U yíe tɛ, ki cère' ti tien' u'yaab kí ɲɛ u'gber tà yé tigbɛmɔnt nnɔ bo, ɲɔ tɪ li yé u ɲɛn' tibont tà kɛ nnɔ ya sɛnlierb nɛ.

\* **1:1** Israyɛl yaab ya baamul piik nin ile ya nib nnɔ li fre kí li yé Uwien ya nib kɛ mɔ.

### *Li cengeh mɛn kɪ li teh ni ciɪh nà nnɔ*

<sup>19</sup> N'yaab bà n yíe bɛ, bɛnde mɛn kɪ ye nǐ mɔn unil kɛ rí pele itub kɪ li cengeh nɛ, ama wɔ rí cuo u'lenl, kɪ la cère u'benku ni mɔ rí li beh tontonm, <sup>20</sup> kimɛ unil ya benku ni ben' la, wa ji teh nà cuube Uwien ya nun bó. <sup>21</sup> Nɛn bo, wiɛ mɛn nà kɛ li kuɔn nɛ tijɔknt nin mibiɛrciɛnm ya tòn kɛ. Teke mɛn tigbɛr tà Uwien tien' tù ni'ni nnɔ nin lifèsɔngl, tun nɛ li fre kɪ ɲmɛn nɛ.

<sup>22</sup> La cèreh mɛn ni'yɛnm rí li sɔnge Uwien ya gbɛr ya cengm baba bo, li teh mɛn tù ye ma bo nnɔ mɔ. Na teh nnɔ la, ni lɛreh ni'ba nɛ. <sup>23</sup> Unil cenge' Uwien ya gbɛr, ka teh tù ye nà nnɔ la, u te tɛn wà liike' u'ba kinunliik ni nɛ. <sup>24</sup> U liike' kɪ siere' la, i ya tãan bo, u pɔk kɪ sunde u bi laa' u'ba len ma bo nɛ. <sup>25</sup> Ama unil sekn' yiko kɪ bɛnde' u yé yikomɔnmɔn, kɪ yé yiko wà li ñɛn wɔ ibiɛre ya yonbt ni, kɪ pɛ u'bo, ka yé yɛnsundm ya nil, kɪ teh u ye ma bo la, Uwien ya mɔnm li te udaan bo u'tòn kɛ ni nɛ.

<sup>26</sup> Unil ye u pɛ Uwien ya sɛn bo, ka coh u'lenl la, u lɛreh u'ba nɛ. Nɛ u'Wien ya sɛn bo ya paanm nnɔ mɔ yé fɛnm nɛ. <sup>27</sup> Uwien ya sɛn bo ya paanm mà mɔn kɪ ñaan wɔn ti'Baa Uwien ya nun bó si: kɪ li toreh mutɛnkpiibumu nin bikpopiib bi'jènd ni, kɪ li coh a'ba, kɪ la cèreh uɲɛndun ya jɔknt kɔh ɲɛ.

## 2

### *La bùh mɛn uba kɪ cɛn' utɔ*

<sup>1</sup> N'yaabɛ, ninbi bà teke' ti'Yonbdaan \*Yesu Kristo wà ɲmɔbe ukpɛke kɪ jin' nnɔ, ji la ɲmɔbe mɛn gèngènde. <sup>2</sup> Kɪ lɛ uba baa' kɪ lá kɔn' ni'taanl ya duku ni, kɪ pii miñðkm ya gbɛk, kɪ guo tikpɛlcɛmɔnmɔnt; nɛ utɔ mɔ baa' kɪ yé ujiin, kɪ guo ikpɛlcɛyɔyɔl la, <sup>3</sup> ni selndeh wà guo tikpɛlcɛmɔnmɔnt nnɔ cɛen nɛ, kɪ tɔke wɔ kɪ ye: «Sin, kɛle niɛ saan kibɛk kà mɔn bo,» kɪ tɔke ujiin nnɔ mɔ kɪ ye: «Sin, sere niɛ bó» bii «Kɛle tink ni n'taan bó.» <sup>4</sup> Nɛn nɛ wɔngɛh kɪ teh ni ɲmɔbe igèngènde ni'ni, kɪ buh tɔb tibuur nin iyɛnmaalbiɛre.

<sup>5</sup> N'yaab bà n yíe bɛ, cenge mɛn, Uwien gènde' binib bà yé bijiinb uɲɛndun wuu ni ɲɔ bɛ rí li yé bifàadɛnb mitekjim bo, kɪ li yé Uwien ya bel ya faajib. U là pòn' kɪ ye u li de lè binib bà yíe wɔ nnɔ nɛ. <sup>6</sup> Ama ninbi yih bijiinb fɛnm nɛ, kɪ boh bifàadɛnb. Bi lɛ ba wɔbndeh nɛ kɪ taah nɛ kɪ jondɛh tibuur-i? Na yé bɛn bifàadɛnb-ii? <sup>7</sup> Bɛn nɛ ɲa saah \*Yesu ya yel-ii? Li ya yeñaanl nɛ ɲa cère' ni yé Uwien yaab-ii?\*

<sup>8</sup> Tɔ, yiko wà te \*Uwien ya gbɔnku ni kɪ cɛn' u'tɔ nnɔ ye: «Li yíe a'tɔ tɛn a yíe a'ba ma bo.» Ni boh wɔ mɔnmɔnm la, ni teh nà mɔn nɛ. <sup>9</sup> Ama ni ɲmɔbe igèngènde ni'ni la, ni teh ibiɛre nɛ. Nɛ yiko nnɔ li cère bɛ rí biin nɛ, kimɛ na bon' wɔ. <sup>10</sup> Wà kɛ boh yiko ya gbɛr kɛ, ka lá bon' tuba mɔnɔn la, wa bon' yiko kɛ nɛ. <sup>11</sup> Kimɛ wà len' kɪ ye: «La teh nanmaal nnɔ», wɔn nɛ liɛbe' kɪ len' kɪ ye: «La ku nil mɔ.» ɲa tien' nanmaal ama kɪ nín ku' unil la, ɲa bon' yiko nnɔ kɛ nɛ. <sup>12</sup> Li lienh mɛn, kɪ li sɔnh tɛn binib bà Uwien li bu bɛ tibuur yiko wà cèreh binib ñɛh ibiɛre ya yonbt ni nnɔ bo. <sup>13</sup> Kimɛ wà ɲa muɔh cɛcɛkm la, Uwien mɔ li bu wɔ tibuur, ka rí muɔ wɔ cɛcɛkm. Ama wà muɔh micɛcɛkm ɲa jie buur ya daali.

### *Mitekjim mà ɲa ɲmɔbe tòn ya gbɛr*

<sup>14</sup> N'yaabɛ, unil len' kɪ ye u ɲmɔbe mitekjim, ka sɔnh mi'tòn la, u ɲmɔbe kpɛle-ee? U'tekjim nnɔ li fre kɪ ɲmɛn wɔ-ɔɔ? <sup>15</sup> Tɔ, kɪ lɛ ni'ninɛ uba bii ni'ninɛ uba rí li te ka ɲmɔbe wɛngolkaar, ka ɲmɔbe daali kɛ daali ya jier, <sup>16</sup> nɛ ni'ni uba rí ji rí tɔke bɛ kɪ ye: «Ni'yaam rí li ɲmɛ, tɪ gole mɛn, kɪ ji kɪ gbo,» ka de' bɛ nà pɔrɛ' bɛ la, nǐ ɲmɔbe kpɛle-ee? <sup>17</sup> Nnɔ nɛ mitekjim mà mɔ ɲa sɔnh tuonl la, mǐ yé fɛnm nɛ.

<sup>18</sup> Tɔ, uba li ye: «Uba ɲmɔbe mitekjim, nɛ utɔ sɔnh itòn.» N'mɔ li jiin' udaan kɪ ye: «Laan wuɔn nni a'tekjim mà ɲa sɔnh tòn nnɔ, ɲɔ min ya tòn rí wuɔn ɲɛ kɪ ye n ɲmɔbe mitekjim.» <sup>19</sup> A teke' kɪ jin' kɪ ye Uwien te uba nɛ. A tien' nǐ mɔn nɛ. A nín li bɛn kɪ

\* **2:7** Migbiirm miɛ ya ciim te bolm mile bo nɛ: Bɛn nɛ ɲa saah \*Yesu ya yel-ii? Bii bɛn nɛ ɲa saah liyeñaanl là Uwien de' nɛ lè nnɔ-ɔɔ?

ye isenpol mɔ teke' ki jin', nɛ ki te bujɛwaaŋciɛnbu ni. <sup>20</sup> Ujɔr sin, a yie ɾi wuɔn ɲɛ kɪ ye mitekjim mɔ ɲa sɔnh tɔn la, mi ye fɛnm nɛ-ɛɛ? <sup>21</sup> Ti'yaaje \*Abraham ya tɔn bo nɛ Uwien la ye u ye ugbɛmɔndaan ki cuube u'saan, kimɛ u la tuo' Uwien ya ɲɔbu bɔ nɛ ki taa' u'bije \*Isaak wɔ ɾi tien lituɔrl liponpuol bo. <sup>22</sup> A laa'-aa! U la ɲmɔbe mitekjim nɛ ki sɔnh mi'tɔn mɔ. U'tɔn nnɔ nɛ wuɔn' ki ye u teke' Uwien ki jin' imɔn. <sup>23</sup> Ni tien' ten na la kele' \*Uwien ya gbɔnku ni nɛ. Ni kele' ki ye: «\*Abraham teke' Uwien ki jin', nɛn bo nɛ Uwien la bu' wɔ ugbɛmɔndaan,» ki yin' wɔ u'jɔ. <sup>24</sup> Ni laa'-aa! Itɔn bo nɛ Uwien buh unisaal ugbɛmɔndaan, na ye mitekjim baba bo nɛ.

<sup>25</sup> Nnɔ nɛ Lahab wɔ la ye ujenkpend nnɔ teke' Sosuwe ya tondb kucɛnku, ki tɔke' bɛ ki ye bɛ ɾi taa usenpaanke kɪ liebe kɪ kun. Nɛn bo nɛ Uwien bu' wɔ ugbɛmɔndaan.

<sup>26</sup> Tɔ, tigbɛnɛnt ɲa ɲmɔbe fuorku la, tɔ kpo' ma nnɔ, nnɔ nɛ mitekjim mɔ mɔ ɲa ɲmɔbe tɔn la, mi'mɔ kpo' nɛ.

### 3

#### *Li coh mɛn ni'len*

<sup>1</sup> N'yaabe, la li nuunh mɛn ni'ke ɾi li ye biwɔnwɔknɔ, kimɛ ni bɛn ki ye Uwien li bu tinbi bɔ wɔknɔ nnɔ tibuur nɛ ɾi li faa kɪ cɛn binitɔb ke. <sup>2</sup> Kimɛ ti'ke biih isɛn yɔ yebe ni nɛ. Unil lienh ka tureh ki biih la, wɔn nɛ mɔn ki ti gben', ki li fre kɪ cuo u'ba. <sup>3</sup> Ti kuɔndeh itaan ya ɲuɔn ni mugbiemu, yi ɾi li ciuh ti'ɲuɔn bɔ ɲɔ ti li freh ki pekreh yi nɛ. <sup>4</sup> Liike mɛn, iɲɛrciɛn yebe ki kpe ma bo. Ama kutafaabiiku fii' ki tureh yi la, biɲɛrkurb taah tiɲɛkurlɛnbɛnt tɔ ki kureh yi, ki cɛreh i joh bi yie na bɔ nnɔ waa nɛ. <sup>5</sup> Nnɔ nɛ lilɛnl mɔ ye nibonwawaann tigbɛnɛnt bo, ama li nɪn wɔngɛh li'ba ki gbiekeh tibont tɔ yebe ni nɛ. Liike mɛn, kimukuɔnk li fre kɪ cɛre lifuɔciɛnl ɾi teke umu. <sup>6</sup> Tɔ, lilɛnl mɔ te ten umu nɛ, ki ye mibiɛrm ke ɲɛh na saan ki te ti'gbɛnɛnt bo. Li kuɔndeh ti'gbɛnɛnt ke tijɔknt, nɛ ki windeh ti'fuɔbm ke. Lilɛnl ya mu nnɔ naan umu wɔ ɲa ɾi kpiin nnɔ ya mu nɛ. <sup>7</sup> Unisaal freh ki lɛreh ki coh kumuɔku ni ya wɛnt ke ya bol nin inuɔn ke ya bol nin tiwɛnt tɔ fuunh kubɛnku bo ke ya bol nin ijɛn ke ya bol ki dieh. <sup>8</sup> Ama lilɛnl len, uba ɲa ɾi fre kɪ cuo lɛ, li lɛbreh ni'ke bɔ nɛ, ki bre ten tilɔbr, ki kuuleh. <sup>9</sup> Ti taah lilɛnl nɛ ki pɛkeh Baa Yonbdaan, ki liebe' ki taah len nɛ ki wiɛnh binib bɔ wɔn Yonbdaan Uwien ɲɛn' bɛ, bi naan wɔ nnɔ miɲuɔm. <sup>10</sup> Buɲɔbaabu bua pɛkeh wɔn Yonbdaan Uwien nnɔ, bun nɛ liebe' ki wiɛnh binib mɔ miɲuɔm. N'yaabe, na mɔn nɛ ɾi li te nnɔ. <sup>11</sup> Liɲunbunl liba li fre kɪ bunge uɲunbunnnun uba ni miɲunm mɔ ɲmɛ nin mɔ lelke nba bo-oo? <sup>12</sup> N'yaabe, bukɛnkenbu li fre kɪ lɔn isɔan-ii\*? Bii isiin yɔ bi taah i'bii ki ɲɛh fɛn nnɔ li fre kɪ lɔn ikenken-ii? Nnɔ nɛ liɲunbunl liba mɔ ɲa ɾi fre kɪ bunge miɲunm mɔ lelke nin mɔ ɲmɛ nba bo.

#### *Miyɛnfuom mɔ ɲɛn' paaki bɔ*

<sup>13</sup> Unil te ni'ni ki ɲmɔbe miyɛnfuom nin mibɛnm la, wɔ ɾi cɛre u'tetemɔnmɔnm ɾi wuɔn kɪ ye u ɲmɔbe mɛ, kɪ li ɲmɔbe lifɛsɔngl, kɪ li ɲmɔbe miyɛnfuom u'tɔn ke ni. <sup>14</sup> Ama iponponbbiere yebe ni'fɛl ni, nɛ ni ɲmɔbe kunaniɛrku tɔb bo la, la pɛkeh mɛn ni'ba ki nɛndeh ki teh ni ye bigbɛmɔndenb. <sup>15</sup> Mi ya yɛnfuom ya bol ɲa ɲɛn' paaki bɔ, ama mi ye uɲɛndun nin unisaal ya yɛnfuom nɛ, ki tonde' ki ye usenpol yaam. <sup>16</sup> Kimɛ iponponbe nin kunaniɛrku te na saan la, fɛnfɛnm nin itɔnbiɛrɛ ke ya bol mɔ te nɛn nɛ. <sup>17</sup> Ama miyɛnfuom mɔ ɲɛn' paaki bɔ nnɔ, ɲa ɲmɔbe jɔknt, nɛ ki diɛnh uyɛnduɔn, ki cɛreh kuɲɔtaaku te, ki cɛreh unil muɔh u'tɔ micɛɛckm, ki sɔnh itɔnmɔnmɔn. Mi ya yɛnfuom ɲa ɲmɔbe gɛngɛnde, ka cɛreh nil ye ɲuɔn ilele ya nil mɔ. <sup>18</sup> Bɔ nuunh binib ya yɛnm ɾi li dɔ nnɔ, bi sɔnh uyɛnduɔn ya tɔn nɛ, nɛ bi'tɔn nnɔ cɛreh binib teh na cuube Uwien ya nun bɔ.

\* **3:12** Bi lɛbre' liɲɔbonl la ki ye isɔan nnɔ; li kele' Grɛkmbɛ ya lenm ni ki Olifi ya bii nɛ.

## 4

### *Uɲɛndun ya jɔ yé Uwien ya nɛnnɛnd nɛ*

<sup>1</sup> Ifinfinde nin ikònkòn ñɛn' la ni'ni? I ñɛn' iyɛnmaalbiere yà te ni'fèl ni ki jèndeh nɛ nnɔ ni nɛ. <sup>2</sup> Ni'nun mɔn tibont bo, ama na rí fre kí lɛ tù. Ni ɲmɔbe iponponbe ki kuuleh ni'tɔb; nin nɛn kɛ na lɛnh niba. Nɛn nɛ cère' ni findeh, ki kɔnh tijɛr. Na ɲmɔbe niba, kime na miɛh Wien. <sup>3</sup> Ni miɛh mɔnɔn la, na lɛnh, kime ni'yɛnmaale ɲa mɔn. Ni miɛh ki nuunh ní li teh ni'yɛnm yíe nà nɛ. <sup>4</sup> Ni yé binib bà ɲa cuube Uwien saan nɛ. Na bɛn ki ye unil yíe uɲɛndun la, u yé Uwien ya nɛnnɛnd nɛ-ɛɛ? Wà nuunh wɔ rí jɔre nin uɲɛndun la, u kpɛndeh Uwien ya nɛnnɛnd nɛ. <sup>5</sup> Bii ni maaleh ki teh nà kele' \*Uwien ya gbɔnku ni ki ye: «Uwien ɲa sè u'Fuoñaanm mà te ti'ni nnɔ bo nnɔ» yé fɛnm nɛ-ɛɛ? <sup>6</sup> Ama Uwien juoke' tɛ ki tì gbien', kime ní kele' u'gbɔnku ni ki ye: «Uwien nɛn bà ɲmɔbe tigbengt, ama u teh bà jiiindeh bi'ba tingi tinimònt.»

<sup>7</sup> Li boh mɛn Uwien, kí tuobe usɛnpol nin tijɛr ɲɔ wɔ rí sɛn kí jɛnde ni'saan. <sup>8</sup> Nɛkn mɛn Uwien, u'mɔ li nɛkn nɛ. Bibiɛrdɛnbɛ, tùɔre mɛn ni'ba. Ninbi iɲuɔn ilele ya nibɛ, wende mɛn ni'fèl. <sup>9</sup> Bɛnde mɛn kí ye ni te micɛɛkm ni, kí li muɔh ikumuɔ. Cère mɛn ni'laar rí kpɛnde imuɔ, kí cère ni'yɛnsɔnge mɔ rí kpɛnde uyɛnsaa. <sup>10</sup> Jiin mɛn ni'ba tingi Yonbdaan Uwien ya nun bó, ɲɔ wɔ rí kpiɛke nɛ.

### *La buh mɛn tɔb buur*

<sup>11</sup> N'yaabɛ, la lienh mɛn tɔb bo fɛnfɛnm. Unil lienh u'tɔ bo fɛnfɛnm bii u biindeh wɔ la, u lienh yiko bo nɛ fɛnfɛnm ki teh wa mɔn. Unil ye yiko ɲa mɔn la, wa ji boh wɔ, ama u nuunh wɔ rí lèbre wɔ kí tien wɔn yíe ma bo nɛ. <sup>12</sup> Uwien baba nɛ dienh \*yiko, ki yé wà buh tibuur. Wɔn nɛ li fre kí ɲmien unil, kí liebe kí fre kí ku wɔ mɔ. Sin, unilɔ, a yé ɲmɛ nɛ ki biindeh a'tɔ?

### *La ɲmɔbe mɛn gbengt*

<sup>13</sup> Cenge mɛn fɛnfɛnnɔ, ninbi bà lienh ki teh: «Dinnɔ bii wenli, ti li jo wuu ya du ni, kí tì tien libinl liba, kí tien ukpenkpɛnde kí lɛ kpɛle nnɔ,» <sup>14</sup> na bɛn nà li wun tu nɛ? Ni'miel yé ba? Ni naan ligunl nɛ. Lí lu' la, na rí wuɔke nɛ lè rí pɔk kí gben. <sup>15</sup> Ni bi li lienh ki teh: «Yonbdaan Uwien yíe ki cère' ti fuobe la, ti li tien niɛ nin niɛ nɔ nɛ.» <sup>16</sup> Ama fɛnfɛnnɔ ni ɲmɔbe tigbengt nɛ ki wɔngɛh ni'ba. Tu ya gbengt ya bol ɲa mɔn. <sup>17</sup> Nɛn bo, unil bɛn mimɔnm ya tienm, ka teh mè la, u tien' ibiere nɛ.

## 5

### *Ni bre bifàadɛnb bo*

<sup>1</sup> Cenge mɛn fɛnfɛnnɔ, ninbi bifàadɛnbɛ: muɔ mɛn kí kpiɛnde micɛɛkm mà lá li tu nɛ nnɔ bo. <sup>2</sup> Ni'faal yon'-a! Likuotuul mɔ mɔn' ni'kpɛlɛr-a! <sup>3</sup> Ni'ɲòkm nin ni'like ya kur kɔn' itɛnmɔn ɲɔ. I ya tɛnmɔn nɛ li cère bɛ rí biin nɛ. I li ɲmɔn nɛ tɛn umu nɛ. Uɲɛndun bɛnh wù rí gben nɛ, nin nɛn kɛ ni kùleh lifaal ki cokndeh. <sup>4</sup> Liike mɛn, bitonsɔnb bà taan' ni'kpàan ni ya jier, ɲɔ ni yíe' ka pèn' bɛ bi'paaku kɛ nnɔ muɔh ku'bo. Nɛ bi'muɔ nnɔ lu' Yonbdaan Uwien, mituɔm kɛ ya daan ya tubl ni. <sup>5</sup> Ni te liwiɛl ni nɛ uɲɛndun wuu ni, ki teh nà sɔnge ni'yɛnm, ki jinh ki gbengreh tɛn bi jindeh tiwɛnt tà tù rí gbenge bɛ rí kù. <sup>6</sup> Ni biin' binib bà ɲa bii' niba ki ku' bɛ, ba kɔn' bi'ba bo.

### *Kuminku nin ikaare ya gber*

<sup>7</sup> N'yaabɛ, li ɲmɔbe mɛn kuminku kí tì baa Yonbdaan ya baam. Liike mɛn, ukpaal ɲmɔbe kuminku kùa ya bol. U tì rí gu uyo wà u'kpàabu ya jier li tien mɔnmɔnm nɛ kí cin utɛkpiɛk kí tì baa utɛfɔrkɛ. <sup>8</sup> Ni'mɔ rí taa mɛn kuminku, kí li faakreh ni'ba, kime uyo wà Yonbdaan li baa ní nnɔ nɛkn' ní ɲɔ!

<sup>9</sup> N'yaabe, la po mɛn tɔb bo, ηɔ Uwien la lá bu nɛ buur. Liike mɛn, wà li bu tibuur nnɔ baa' ki gben'-a! <sup>10</sup> N'yaabe, li tɔkreh mɛn Uwien ya ñɔbonsɔknɔ bà là len' Yonbdaan ya yel bo nnɔ ya jɛnd nin bi'minku. <sup>11</sup> Ti lienh binib bà ηmɔbe kuminku ijɛnd ni ki tĩ gben' nnɔ bo nɛ ki teh Yonbdaan ya mɔnm te bi'bo. Ni cii' Sɔb là ηmɔbe kuminku kùà ya bol, ki bɛn Yonbdaan là tien' nà ki de' wɔ ijɛnd nnɔ ya gbenm. Kimɛ Yonbdaan ηmɔbe lifɛsɔngl ki gbien', ki muɔh binib micɛɛkm.

<sup>12</sup> N'yaabe, nibonn kɛ ni, la pole mɛn taaku, ki niireh nin tink, ki la pole bonn niba nin nitɔnn. Nɛn bo, ni len' ki ye: «Nì te nnɔ la, nè í li te nnɔ,» ni tí ye: «Na te nnɔ la, nĩ la li te nnɔ», ηɔ ni la lu Uwien ya buur ni.

*Li kàareh mɛn ki dienh biwiɛnb*

<sup>13</sup> Ni'ni uba te ijɛnd ni la, wɔ í li kàareh. Ni'ni uba ηmɔbe uyɛnsɔnge la, wɔ í li gɛh iyuon ki dondeh Uwien. <sup>14</sup> Ni'ni uba bun la, wɔ í yin Kristo ya taanl ya ciɛnb, bɛ í kàare kí de wɔ, kí taa mikpɔm kí fanfaan wɔ Yonbdaan ya yel bo. <sup>15</sup> Bi kàare' nin mitekjim la, Yonbdaan li cère uwien nnɔ í faake, kí cère wɔ í fii. U tien' ibiɛre mɔnɔn la, u li fère wɔ yĩ. <sup>16</sup> Nɛn bo, li tɔkeh mɛn tɔb ni'tuonbiɛɛ, kí li kàareh ki dienh tɔb, ηɔ Uwien í de nɛ laanfɛ, kimɛ ugbɛmɔndaan ya kaare ηmɔbe mituɔm ki gbien'. <sup>17</sup> \*Eli là yé unisaal tɛn tinbi nɛ, ki kàare' nin inunmɔn ki ye taa la nii. Nɛ taa ηa tuore' tink bo haali ibin ita nin inmaale iluob. <sup>18</sup> U tí liɛbe' ki kàare', nɛ Uwien cère utaa nii', kitink sɔnge' nɛ tijier tien'.

<sup>19</sup> N'yaabe, ni'ni uba tùre' tigbɛmɔnt ya sɛn ηɔ utɔ jiiin' wɔ ní la, <sup>20</sup> udaan í li bɛn kí ye: «Unil jiiin' ubiɛrdaan wà tùre' tigbɛmɔnt ya sɛn la, u ηmɛn' udaan nɛ, ki li cère Uwien í fère ibiɛre ì yebe.»

## Kugbɔnkpiεku kua Pier kele' kù nnɔ Nà wɔngeh kugbɔnku kuu te ma bo

Pier yé Yesu Kristo ya tond nε. U kele' kugbɔnku kuu ki de' Kristo yaab bà te Asi ya tinfenm ni nnɔ. Bi jènde' bε ki gbien' kimε bi teke' Kristo ki jin' (1:1; 2:11). Nεn bo nε Pier kele' kugbɔnku kuu wɔ n saake bi'gbenεnt kí tore bε bi'tekjim nin bi'dendεnl ni.

U ye Yesu Kristo ya mεkrm bitenkpiib ni nnɔ nε yé lidendεnl nnɔ. Len nε cèreh binib tuonh isuk nin bi teh bε fenfenm wà nnɔ tεn Yesu. U tɔke' bε ki ye bε n tεkn Yesu Kristo ya taal ni.

Iyonbe yà ya cεnbaambe ηa yé Kristo yaab nin bipiib bà ya cieɓ ηa yé Kristo yaab ben wɔn, bi'tetem nε li cère binitab n bende mitekjim yé nibonn nà. Mi ya tetem nε wɔngeh bà ηa yé Kristo yaab ki teh Kristo yaab ηa ηmɔbe biil.

### *Ifuonde*

<sup>1</sup> Min Pier, n yé \*Yesu Kristo ya tond nε. N kieɓ kugbɔnku kuu n de ninbi bà Uwien gènde' nε ni yere' ki te Pɔnt nin Galasi nin Kapadosi nin Asi nin Bitini ya tinfenm ni, ki yé bicεnb ni'bó nnɔ nε. <sup>2</sup> Baa Uwien là bobn' ki gènde' nε haali uyoyo ní li yé u'yaab \*Mifuoñaanm bo, kí li boh \*Yesu Kristo ηɔ u'sèm n sɔkre kí lùore nε nε. Uwien n juoke nε kí gbien, kí de nε uyenduɔn mɔ kí gbien.

### *Uwien muɔ' tε micεεkm ki ηmien' tε*

<sup>3</sup> Tí pèke mεn Uwien ti'Yonbdaan \*Yesu Kristo ya Baa. U'nimɔncient bo nε u cère' ti maa' ki lere' kí nε \*Yesu Kristo ya mεkrm bitenkpiib ni bo, ηɔ tí li ηmɔbe lidendεnl là ηa ηmɔbe juorm, <sup>4</sup> kí lε lifaal là mɔn, ka n saa, jɔknt mɔ ηa n kɔ lè. U bonde' lifaal nnɔ ki ble' nε paaki bó nε. <sup>5</sup> Nε kí nε mitekjim bo Uwien gu nε nin u'tuɔm, ki gu ufɔfɔryo, uyo wà u li wuɔn upaan bo kí ye ni ηmere'.

<sup>6</sup> Nεn bo nε ni poknh. Ni yé mibiikm ke ya bol saah ni'yεnm fenfennɔ mɔnɔn la, mibiikm nnɔ ηa n wuɔke. <sup>7</sup> Mεn nε wɔngeh ki teh ni ηmɔbe mitekjim mɔnmɔnm bii na ηmɔbe. Miñɔkm yé nibonn nà ηa n li tuu ki te nε. Ama bi dondeh mε kí bende mɔ mɔn bii ma mɔn-i. Ni'tekjim nnɔ cεn' miñɔkm. Ni'tekjim nnɔ bo nε, lidaali là \*Yesu Kristo li nεn u'ba upaan bo nnɔ, ni li ηmɔbe kupεnpekɔ nin ukpieke nin lisel. <sup>8</sup> Wɔn wà na laa' wɔ, ki yíe wɔ, ki teke' wɔ ki jin' ka laan lɔ biε ki laa' wɔ. Nεn bo nε ni te uyensɔngciεn wà ta ben ti li taa iñɔbon yà kí tɔke u'gber nnɔ ni ki poknh. <sup>9</sup> Nnɔ nε ni laa' nà bo ni teke' \*Yesu ki jin'. Nεn si: ni'ηmienm.

<sup>10</sup> \*Uwien ya nɔbonsɔknb là tùre' ki fiin' miηmienm bugben ya gber, nε ki sɔkn' nε Uwien bonde' wɔ n de nε bupaabu bùa nnɔ ya gber. <sup>11</sup> Bi là fiin' bε n bende Kristo ya Fuoñaanm te bi'ni ki tɔke' bε nà ke nnɔ li tien uyo wà nin nɔ li tien ma bo nε. Mɔ là juɔ' ki tɔke' bε Kristo lá li ji ijend yà nin ni ya puoli bó u li lε ukpieke wà nnɔ ya gber nε. <sup>12</sup> Uwien là kpiire' ki tɔke' biñɔbonsɔknb nnɔ ki ye tigber nnɔ ηa yé ben nin bi'yul yaar, tù yé bi sɔkndeh tù ninbi bà nnɔ yaar nε. Fenfennɔ bà tɔkeh tigbemɔnmɔnt nnɔ nε tɔke' nε tigber nnɔ kí nε \*Mifuoñaanm ya tuɔm bo. Uwien nε cère' \*Mifuoñaanm nnɔ nεn' paaki bó ki jiire' ní. U'tondb mɔnɔn ya nun mɔn bε n bende tigber nnɔ ya tingi nε.

### *Li ηmɔbe mεn mitetemɔnmɔnm*

<sup>13</sup> Nεn bo, bonde mεn kí li gu, kí li co ni'ba, kí li ηmɔbe lidendεnl kí tɔ gben kí ye ni li lε bupaabu lidaali là \*Yesu Kristo li nεn u'ba upaan bo nnɔ. <sup>14</sup> Ni yé binib bà boh Uwien ma nnɔ, ji n dàan mεn na laan là ben Wien ηɔ ki teh tibont tà ni'yεnm yíe ma bo nnɔ. <sup>15</sup> Ama

ni la li ηmabe jəknt ni'tetem ke ni kimε Uwien wà yin' ne nnə ηa ηmabe jəknt, <sup>16</sup> kimε nĩ kele' \*Uwien ya gbənkū ni ki ye: «Li yé mən biñaanb, kimε u yé uñaan ne.»

<sup>17</sup> Ni'kaare ni, ni yih Uwien wà ηa gèndeh, ki bùh unil ke u'tùon kpε ma bo ni'Baa ma nnə, li ηmabe mən mitetem mà wəngēh ki teh ni boh Uwien uyo wà ni laan te kitink kiε bo nə. <sup>18</sup> Nĩ li ben kí ye Uwien ηa taa' tibont tà ηa li tuu ki te tən ilike ya kur bii miñòkm ne ki de' ne ki wiε', ki ñen' ne ni là guəre' ni'yaajeb ya fuobm mà, ma ηmabe mĩ kunh nà bó nnə ni. <sup>19</sup> Ama u taa' Kristo ya sèm mà mən ki cən' nibonn ke tən kipebuk kà ya niba saan ηa gbè, ka ηmabe jəknt ne ki de' ne ki wiε'. <sup>20</sup> Uwien là gènde' wə ki laa' wà laan ñen' uηendun, ne ki cère' ninbi bo, u taa' u'ba ki wuən' idenfərke yie nə. <sup>21</sup> Wən bo ne ni teke' Uwien wà məkre' wə bitenkpiib ni, ki kpieke' wə nnə ki jin'. Nən bo ne ni teke' Uwien ki jin', ki ηmabe u'bo lidəndənl.

<sup>22</sup> Ni pε tigbεmànt bo ma nnə ne cère' na ηmabe jəknt. Nən bo, ní li yíe táb imənmən tən ninjieb yíe táb ma bo. Tùore mən kí li yíe táb nin ni'fəl ke. <sup>23</sup> Uwien ya gber ne cère' ni maa' ki lere'. Tigber nnə ηa te tən nibonn nà li saa, tù tuu ki te ne ki dienh limiel. <sup>24</sup> Nĩ kele' \*Uwien ya gbənkū ni ki ye:

«Nisaal ke nisaal te tən timuər ne,  
ne nà ke yé u'bo ukpieke nnə  
te tən miməpuum.

Timuər kuoreh ne tu'puum sokreh.

<sup>25</sup> Ama Yonbdaan ya gber tun tuu ki te uyo ke ne. Tigber nnə tun si: bi təke' ne tigbεmənəmənt tà nnə.»

## 2

<sup>1</sup> Nən bo, dāan mən mibiεrm ke ya bol nin milerkjim ke ya bol, ki la ηmabe ñuən ilele, ki la ηmabe nunfəke, ki la lienh ki saah táb. <sup>2</sup> Li febnh mən Uwien ya gber bo tən kicənfəndk febnh ma libiil bo. Uwien ya gber te tən mibiim mà mən ne, kí li cère ní kpére kí le limiel Uwien saan, <sup>3</sup> kimε ni laa' Yonbdaan ηmabe tinimənt ma bo.

### *Kristo te tən litenl ne ki co Uwien ya duku*

<sup>4</sup> Nεkn mən Yonbdaan saan. U te tən litenl là fuobe ne. Binib wiε' lè, ne Uwien gènde' lè, li yé u'bo nibonmənn. <sup>5</sup> Ni'mə te tən iten yà fuobe ne. Nən bo, cère mən Uwien ní taa ne kí mε \*Mifuoñaanm ya duku. Nĩ li yé licəkl là Uwien gènde' lè ki tien' bitətuərkaab, kí li teh ituəre ki dienh wə tən \*Mifuoñaanm ye ma bo, ne \*Yesu Kristo bo, u li tuo ituəre nnə.

<sup>6</sup> Kimε nĩ kele' \*Uwien ya gbənkū ni ki ye:

«Liike mən, n gènde' litenl là yé n'bo nibonmənn,  
ki tien' litenl là co kuduku,  
ki ble' Siyən ya du ni,  
wà ke du li'bo la, fe ηa ní ji wə.»

<sup>7</sup> Ninbi bà teke' ki jin' nnə,  
litenl nnə yé ni'bo nibonmənn ne.

Ama bà ηa teke' ki jin' nnə bo ne nĩ kele' ki ye:

«Litenl là bidumεb wiε' lè nnə,  
lən lá tien' litenkpiekl là co kuduku,

<sup>8</sup> ki yé litenl là binib li lεkeh li'bo,  
ki yé litenl là li gbəbreh binib mə.»

Bi li lεkeh li'bo, kimε ba tuo' Uwien ya gber,  
ne Uwien sien' bε nnə.

<sup>9</sup> Ama ninbi yé libol là Uwien gènde' lè ne,

ki yé wən ubercien ya tətəurkaab,  
ki yé linibol là te ki de' wən baba,

ki yé u'nib.

U gènde' nε, ní li kpaandeh u sɔn' itùoncien yà nnɔ nε.  
 Wɔn nε ñen' nε licinñunl ni,  
 ki kuɔn' nε u'wenwenku kùà ñmɔbe kuñuɔrku nnɔ ni.  
<sup>10</sup> Uyo uba na là yé Uwien ya nib,  
 ama fɛnfennɔ ni ji yé u'yaab nε,  
 na là yé u muɔ' binib bà micεcεkm nnɔ,  
 ama fɛnfennɔ ni ji yé u muɔ' binib bà micεcεkm nε.

*Li ñmɔbe mɛn mitetem mà wɔngeh ki teh ni yé Uwien ya nib*

<sup>11</sup> N'jɔtiebε, ni yé bicɛnb nε kitink kiε bo ki gèbreh. Nɛn bo nε n sureh nε ní li coh ni'ba unisaal ya yɛnm pɛ tibont tà bo, tù piendeh wɔ u la tien' Uwien yíe nà nnɔ bo. <sup>12</sup> Ní li ñmɔbe mitetemɔnmɔnm bà ña pɛ Wien bo ya nun bó, ñɔ ní yé bi lienh ki saah nε isɛn iba ni ki teh ni teh nà bre mɔnɔn la, bε rí lε ni'tùonmɔnmɔn kí pèke Uwien u li baa lidaali là.

<sup>13</sup> Yonbdaan bo, ní li blinh ni'yul udu ya ciɛnb kε ciɛnb ya nun bó. Bɛn si: ubercien, wɔn nε ñmɔbe ticiɛnt u'du ya nib kε bo, <sup>14</sup> nin u kàan' binib bà idu ni bε rí li likeh yí, kí li diɛh bà teh ibiɛre ya tub, kí li pèkeh bà teh nà mɔn nnɔ.

<sup>15</sup> Uwien yíe nà si: ní li teh nà mɔn, ñɔ nɛn bo, bà yé ijɔr, ka bɛn niba nnɔ la fre kí yàare ñɔbu. <sup>16</sup> Li yé mɛn binib bà si bi'ba. Ni la dule nɛn bo kí li teh nà bre. Ama ní li fuobe ní kpe Uwien ya tonsɔnb rí li fuobe ma bo. <sup>17</sup> Li diɛnh mɛn unil kε lisel, kí li yíe ni'tɔb bà teke' Kristo ki jin', kí li boh Uwien, kí li diɛnh ubercien lisel.

*Tɛkn mɛn Yesu Kristo ya taal ni*

<sup>18</sup> Bitonsɔnbε, ní li blinh ni'yul ni'cɛnbaambε ya nun bó, kí tùɔre kí li fɛnge bε. Na yé ní li teh nnɔ cɛnbaambε bà yé binimɔnb, ki dinge baba nε, ní li teh nnɔ bà mɔ ya gber faa. <sup>19</sup> Kimε unil ña bii' niba ñɔ bi jèndeh wɔ, u jin' kuminku Uwien bo, ki tuo' ijend nnɔ la, ní yé nibonn nà mɔn nε. <sup>20</sup> Ni tien' nà bre ñɔ bi jèndeh nε, ni tuo' ijend nnɔ la, ni ñmɔbe ku lε pɛnpɛku-u? Ama ni tien' nà mɔn ñɔ bi jèndeh nε ni mɛnde' ki tuo' ijend nnɔ la, nɛn nε yé nà mɔn Uwien ya nun bó, <sup>21</sup> kimε Uwien yin' nε ní sɔn nà nínɔ. Kristo mɔ jènde' ni'bo nnɔ nε. U tien' nnɔ ñɔ ni'mɔ rí tɛkn u'taal ni nε. <sup>22</sup> Wɔn ña tien' biɛre, tonnenku mɔ ña ñen' u'ñɔbu ni fiebu. <sup>23</sup> Bi suke' wɔ, wa jii'n', ki jènde' wɔ, wa taa' jɛr, ama u taa' u'ba ki ñukn' wà buh tibuur tu'donbó ya nuɔ ni nε. <sup>24</sup> Wɔn bugbɛn nε taa' u'tiɛma gbɛnɛnt ki teke' ti'biɛre udɔpɔnpɔn bo, ñɔ ibiɛre ji la ñmɔbe ti'bo tuɔm, ñɔ tí lε mifuobm mà cuube. U ya jend ya gbɛn nε cère' ni laa' laanfɛ.

<sup>25</sup> Imɔn, ni là te tɛn ipe yà cuon' ki yebre' nε, ama fɛnfennɔ ni liebe' ní wà kpaah nε, ki gu nε nnɔ saan.

### 3

*Bijɛb nin bi'puob li fuobe ma bo bi'dencɛn ni*

<sup>1</sup> Bipiibε, ni'mɔ rí li blinh ni'yul ni'ciɛb ya nun bó, ñɔ bi'ni biba ña teke' Uwien ya gber ki jin' mɔnɔn la, kí ñε bi'puob ya tetem bo, bε rí teke tù kí ji, kí lε ba tɔke' bε gber, <sup>2</sup> kimε bi li lε ni'tetem wien ma bo, ki ñmɔbe mibom. <sup>3</sup> Ni la tuuke gbɛnɛnt ya mɔnbe bo, ki findeh tiyur ki gbiekeh, ki fèndeh ni'ba nin miñɔkm ya jɛfɛnbont, ki guoh tikpɛlɛɛr tà ñmɔbe kuñuɔrku. <sup>4</sup> Ama cère mɛn ni'mɔnbe rí li te ni'fɛl bo, ní li ñmɔbe liyɛnguol, kí li te suoo. Nɛn nε yé umɔnbe wà ña rí winde, ki mɔn Uwien ya nun bó cɛɛn. <sup>5</sup> Nnɔ nε uyo bo ya piib bà là yé Uwien ya nib, ki du u'bo nnɔ, là ñmɔbe u ya mɔnbe nε, kimε bi là blinh bi'yul bi'ciɛb ya nun bó nε <sup>6</sup> tɛn Sara. Sara là boh \*Abraham nε, ki yih wɔ u'cɛnbaa. Ni teh nà mɔn ka cèreh niba coh nε jɛwaanbu la, ni yé wɔn Sara ya bumu nε.

<sup>7</sup> Piiciɛbε, ni'mɔ rí li fuobe nin ni'puob nin miyɛnfuom, kí li bɛn ki ye ba ñmɔbe tuɔm. Li selndeh bε mɛn, kimε ninbi nin bɛn kε li taan' kí lε Uwien ya paabu nε. Bun si: limiɛl là ña ñmɔbe gbɛnm. Ni teh nnɔ la, niba ña rí pien ni'kaare.

*Li teh mɛn nà mɔn*



<sup>8</sup> N li len nà kí fòre si: ní'ké rí li ηmòbe iyenmaalbaabe, kí li muòh tób micεcεkm, kí li yíe tób ten ninjiéb yíe tób ma bo, kí li ηmòbe tinimònt tób bo, kí li jiindeh ní'ba tingi. <sup>9</sup> Ní la tien biεrm kí tu wà tien' nε mibiεrm lifènl, kí la suke kí jiin wà suke' nε. Ní li teh nà si: ní li miεh Uwien ya mòmnm ki dienh udaan, kimε Uwien yin' nε ní li teh nεn nε, ηò ninbi nin ní'yul rí lε Uwien ya mòmnm.

<sup>10</sup> Kimε ní kele' \*Uwien ya gbònkú ni ki ye:

«Wà yíe wò rí li fuobe kí li te liwiél ni idaan ké la,  
wò rí li coh u'lènl,  
kí la cère tonnenku rí li ñéh u'ñòbu ni,

<sup>11</sup> kí dàan nà bre,

kí li teh nà mòm,

kí li nuunh uñòkpaan nin inunmóm.

<sup>12</sup> Kimε Yonbdaan ya nun cε bigbεmòndεnb bo,

nε u gbè itub ki cengeh bi'kaare bó.

Ama bà teh nà bre nnò wòm,

u bulnh bεn ibuòm nε.»

<sup>13</sup> Ní'nun móm ní li teh nà mòm la, ηmε li tien nε nà bre? <sup>14</sup> Ní tí baa' bε rí jènde nε, ni teh nà mòm ma nnò bo mòmòm la, li te mèn uyensange ní. La fenge mèn nib, kí la cère ní'yεnm rí saa. <sup>15</sup> Ama li dienh mèn Kristo lisel ní'fèl ní, kimε wòm nε yé Yonbdaan. Li bondeh mèn ní'ba uyo ké unil niire' nε ní'dendεnl ya tingi la, ní fre kí jiin udaan. <sup>16</sup> Ama ní li jiindeh nin liyenguol nin mibom. Li ηmòbe mèn iyenmaalmòmòm, ηò bà lienh kí saah nε isen iba ní, kí ñε ní yé Kristo yaab, kí ηmòbe mitetemòmòmòm mà nnò bo nnò rí ji ifε.

<sup>17</sup> Ní yé Uwien ya yíem bo nε ní jinh ijend, kimε ní teh nà mòm nε la, ní mòm kí cεn' nin ní li teh nà bre kí jinh ijend.

### *Kristo faake' nin mikum*

<sup>18</sup> Kristo nin u'yul kpo' bolm miba kpein nε binib ya biere bo. Wòm wà ηa tien' nà bre nnò tuo' kí teke' bà teh nà bre ya kuum kí kpo' ηò wò rí taa nε kí baa Uwien saan. Bi ku' u'nisaalgbenent ama \*Mifuoñaanm cère' u mεkre' kí fuobe.

<sup>19</sup> Mí cère' u jon' kí tí tóke' bitenkpiib bà lùo kí te lipekl ní nnò mòmòm tigbεmòmòm.

<sup>20</sup> Bεn si: binib bà là yíe' Uwien ya ñòbu bó uyo bo nnò, uyo wà Uwien là duòm' u'yεnm kí cère' ní wuòke' nnò nε. U là duòm' u'yεnm uyo wà Nowe là te kí teh buñεrcienbu nnò nε. Binikàankaab nε là kòm' buñεr bu nnò kí ηmεre' kí ñε miñunm bo. Bi'ké là te biniin nε.

<sup>21</sup> Miñunm nnò yé uñunsii wà ηmiendeh nε fεnfennò wuò nò ya nennεnku nε. Na yé ñunsii wà ñendeh tigbεnεnt ya jòknt, ní yé unil rí taa u'ba kí de Uwien nin iyenmaalmòmòm nε. U ya ñunsii nε ηmiendeh kí ñε Yesu Kristo ya mεkrm bitenkpiib ní bo. <sup>22</sup> U don' kutaaku bo kí tí kèle' Uwien ya nojie bó kí ηmòbe mituòm Uwien ya tondb nin nà ké ηmòbe tí'ciεnt nin mituòm ké ya bol nnò bo.

## 4

### *Ijendyà li tu Kristo yaab*

<sup>1</sup> Tò, Kristo là tuo' kí jin' ijend u'gbεn ní. Nεn bo, ní'mò rí li ηmòbe lifèl kí tuo' kí ji ijend ten wòm, kimε wà tuo' kí jin' ijend u'gbεn ní la, wòm nin ibiεre gbiire' nε, <sup>2</sup> ηò uyo wà sien' wò rí li fuobe uñendun wuu ní nnò, wò rí li teh Uwien yíe nà, kí dàan unisaal fε nà. <sup>3</sup> Uyo uba, ní là teh bà ηa pε Wien bo yíe nà, nε ní tí wuòke'. Ní là teh lisònsòndl nε, kí teh unisaal fε tibont tà, kí ñuh kí yibeh, kí jinh unifεnjín, kí taakeh kí kaah, kí jinh kí ñuh kí yibeh, kí pε ibule bo. Ibule bo ya paanm yé ijuòke ya bonn nε Uwien ya nun bó. <sup>4</sup> Fεnfennò, bi laa' na jí tuuke bí'sònsòndkεndkaal nnò bo ma nnò, nε ní jin' bε, bí jí sukreh nε. <sup>5</sup> Ama bí lí tóke wà bonde' wò rí bu binifuob nin bitenkpiib ké tibuur nnò, bí sòm' nà ké. <sup>6</sup> Nεn bo nε bí tóke' bitenkpiib mòmòm tigbεmòmòm. Bí là kpo' binib ké kpúokeh ma bo nε. Bí tóke' bε tigbεmòmòmòm nnò ηò Mifuoñaanm bo bε rí li fuobe ten Uwien nε.

### *Kristo yaab li fuobe ma nin bi'təb*

<sup>7</sup>Tibont ke ya gbenm nek'n ní ɲə! Nɛn bo, li ɲmabe mɛn miyɛnfuom, kí li coh ni'ba ɲə kí li freh ki kàareh. <sup>8</sup>Ni li kpiɛ kí li teh nà si: li yíe mɛn təb nin ni'fɛl ke, kime miyíem cɛreh binib fɛreh təb ibiɛre yà yebe nɛ.

<sup>9</sup>Li teknh mɛn təb kucɛnku ki la ɲulnh. <sup>10</sup>Uwien de' unil ke bupaabu jɛjɛ nɛ. Wà ke rí li yé utonsɔnmɔnmɔn wà taah u laa' bupaabu bùa nnɔ ki toreh bitəb. <sup>11</sup>Wà ke ye wɔ rí len la, wɔ rí len Uwien ya gbɛr. Wà toreh binib la, wɔ rí li toreh nin Uwien de' wɔ mituəm mà nnɔ. Nɛn nɛ li cɛre \*Yesu Kristo bo bɛ rí pɛke Uwien isɛn ke ni. Wɔn nɛ si ukpiɛke nin mituəm uyo ke. Ami.

### *Bà jɛndeh Kristo bo nnɔ, Uwien ya mɔnm te bi'bo*

<sup>12</sup>N'jɔtieɛ, la cɛre mɛn ni te ijɛndciɛn yà ni ì siɛnh tɛn umu nnɔ rí cuo nɛ yɔkm. I tu' nɛ ɲə nɛ rí wuɔn kí ye ni ɲmabe mitekjim mɔnmɔnm bii na ɲmabe nɛ? Nɛn bo, ni la li maaleh ki teh ní yé nibonlurkaann nɛ. <sup>13</sup>Ama li poknh mɛn, kime ninbi nin Kristo nɛ taan' ki jɛndeh, ɲə lidaali là u li ñɛn u'kpiɛke upaan bo nnɔ ní li te uyɛnsɔngciɛn ni ki poknh. <sup>14</sup>Bi sukreh nɛ, kime ni yé Kristo yaab la, Uwien ya mɔnm te ni'bo, kime \*Uwien ya Fuoñaanm mà ɲmabe ukpiɛke nnɔ te ni'bo. <sup>15</sup>Ni'ni uba là cɛre bɛ rí li jɛndeh wɔ kí ye u ku' unil, bii u sun', bii u tien' niba ní bre, bii u kɔn' uba ya gbɛr ni. <sup>16</sup>Ama u yé Kristo yɔ ma nnɔ nɛ bi jɛndeh wɔ la, u la cɛre' fɛ rí cuo wɔ, wɔ rí li kpiɛkreh Uwien bi yih wɔ Kristo yɔ ma nnɔ bo. <sup>17</sup>Tibuur ya yo baa' ɲə, nɛ Uwien li kpiɛ kí bu u'yaab nɛ. Tɔ, ní yé u cin' nin tinbi bà yé u'yaab la, bà yíe' ka teke' u'gbɛmɔnmɔnt nnɔ yaam li t̃ fɔre mila bo?

<sup>18</sup>Ni yé:

«Ugbɛmɔndaan ya ɲmɛrm li faake la,  
ní ji li te mila wà ɲa kpe Wien ya sɛn, ki yé ubiɛrdaan bo?»

<sup>19</sup>Nɛn bo, bi jɛndeh bà Uwien ya yíem bo nnɔ, bɛ rí li tuu ki teh nà mɔn, kí taa bi'ba kí ɲukn wɔn wà ñɛn' tibont ke, kí yé umɛmɔndaan nnɔ ya nuɔ ni.

## 5

### *Kristo yaab ya ciɛnb li teh ma bo*

<sup>1</sup>Fɛnfɛnnɔ, n sureh bà yé Kristo yaab ya ciɛnb ni'ni nnɔ nɛ. Min mɔnɔn yé Kristo yaab ya ciɛn nɛ tɛn bɛn, ki yé umɔnkunl Kristo jin' ijɛnd yà ke nnɔ bo, ki li lɛ Kristo li ñɛn u'kpiɛke wà upaan bo nnɔ. N sureh bɛn nɛ ki teh: <sup>2</sup>«Li kpaah mɛn Uwien ɲukn' nɛ binib bà nnɔ, kí li likeh bɛ, ki la cɛre nɛn li te tɛn ní yé liwɔbl nɛ ni'bo, ama nɛ rí li yé ni'yɛnm ni, tɛn Uwien yíe ma bo. Ni la sɔnh ki nuunh like, ama cɛre mɛn ni'yɛnm rí li pɛ lituonl nnɔ bo. <sup>3</sup>Uwien nɛ taa' bɛ ki ɲukn' ni'nuɔ ni. Ni la ɲuuke bɛ tɛn ni yé bi'yɔnbɛnb nɛ, ama ní cɛre ni'tetem rí li wɔngɛh bɛ, bi li teh ma bo.» <sup>4</sup>Nnɔ nɛ Kristo wà yé bà kpaah u'nib ya ciɛn nnɔ li ñɛn u'ba upaan bo uyo wà nnɔ, ni li lɛ lisuul là ɲmabe kuñuarku kùa ɲa rí gben nnɔ.

### *Kristo yaab ke li teh ma bo*

<sup>5</sup>Ninbi bifɛnbɛ ni'mɔ rí li blinh ni'yul biciɛnb ya nun bó.

Kristo yɔ ke Kristo yɔ rí li jiindeh u'ba tingi bitəb ya nun bó, kime ní kele' \*Uwien ya gbɔnku ni ki ye:

«Uwien nɛn bà ɲmabe tigbengt,  
ama u teh bà jiindeh bi'ba tingi tinimɔnt.»

<sup>6</sup>Nɛn bo, li jiindeh mɛn ni'ba tingi Uwien, mituəm ke ya daan, ya nun bó ɲə wɔ rí kpiɛke nɛ u sien' uyo wà wɔ rí kpiɛke nɛ nnɔ. <sup>7</sup>Li taah mɛn nà ke cieke nɛ ki ɲukndeh wɔ, kime wɔn nɛ likeh nɛ.

<sup>8</sup>Li coh mɛn ni'ba, ki la gɔh, kime ni'nɛnnɛnd usɛnpol te tɛn uyɛnbɔl nɛ, ki gbokeh ki lindeh ni'ke saan ki nuunh unil wɔ rí cuo. <sup>9</sup>La cɛbe wɔ mɛn ni'ba, tùɔre mɛn kí li du Uwien bo, kí li bɛn kí ye ni'yaab Kristo yaab bà ke mɔ te uɲɛndun wuu ni nnɔ mɔ jɛndeh tɛn ninbi

ne. <sup>10</sup> Ni li jènde, ama na ní wuàke kí gbien. Ni yé Kristo yaab ma nnò ne Uwien, tinimònt ke ya daan, yin' ne ní le u'kpíeke wà ña ñmàbe gbenm. Wòn nin u'yul ne li mänge ne kí tí gben, kí de ne mituòm, kí cère ni'tekjim ní faake, kí cère niba la fre kí jènge ne u'sen ni. <sup>11</sup> Uwien ne si mituòm uyo wà ña ñmàbe gbenm. Ami.

*Micèbm*

<sup>12</sup> Tì'ninjε Silfen\* wà n du u'bo nnò ne tore' nni n kele' iñàbonkàanke yiε ní sure ne, kí tòke ne kí ye Uwien ya paabu yé imòn ne. Tùòre men kí li ñuuke bù.

<sup>13</sup> Nì'tàb bà Uwien gènde' bε, bi te Babilonn ni nnò fuondeh ne. N'buk Mark mò fuondeh ne. <sup>14</sup> Nì fuonde tób mòmòmnm ten ninjiεb nin ninsiεb fuondeh tób ma bo.

Uwien ní de ninbi Kristo yaab ke uyenduàn.

---

\* 5:12 Liike Itùon 15:22, 40.

## Kugbɔnlieku kua Pier kele' kù nnɔ Nà wɔngeh kugbɔnku kuu te ma bo

Kugbɔnku kuu te ki de' Kristo yaab ke ne, ne ki yé micèbm ya gber. Pier wà kele' kù nnɔ ye u'kuum ya yo baa'-a! (1:13) U kele' kù nnɔ Kristo yaab ní tiere u'wɔknm bó ne. U tɔke' be ki ye be ní li ñmɔbe bi là ñmɔbe mitetem mà kí ñe bi'tekjim bo nnɔ, kí li pe bi wɔkn' be ná nnɔ bo (liyul 1). Kugbɔnku kuu ya gber mɔh nin bitonnɛnñɔbonsaknb ya tonnɛnku nin bi'tetefɛnfɛnm ne (iyul 2), ki tɔkeh Yonbdaan Yesu li baa ní lidaali là ya gber (iyul 2).

Tɔ, Kristo yaab ya nikpiɛkb kpo' ñɔ Yesu ña biɛ ki baa' ní, ne ní beke' binib bà yebe, ba ji ben ní ñen' bà. Ama Kristo yaab gu wɔ ma, nen ne wɔngeh Uwien ya minku, kimɛ u yíe nisaal ke nisaal ní lèbre u'tetem ne.

Pier saakreh Kristo yaab ya gbɛnɛnt be ní li ñmɔbe kuminku mitekjim ni, kí li gu lidaali là Yesu Kristo li baa ní. U tɔkeh be ki teh bi la gɔh, kimɛ nil ña ben lidaali là u li baa ní.

Pier wà kele' kugbɔnlieku kuu nnɔ ye wɔ ní kele' kù uyo wà nnɔ ki laa' bi bende' Pɔl ya gbɔnt tuba bó ñɔ (3:15). Nil la nuunh wɔ ní cii bi kele' tigber tà ya tingi u'tiema tuɔm bo (1:20), Mifuoñaanm ya torm ne yé nibonn ná cieke.

### *Ifuonde*

<sup>1</sup> Min Simɔn Pier, n yé \*Yesu Kristo ya tonsɔnl ne, ki yé u'tond mɔ. N kieh kugbɔnku kuu ní de ninbi bà teke' \*Yesu Kristo wà yé ti'Wien nin ti'Ñmienl ki jin' mɔnmɔnm ten tinbi nnɔ ne. Wɔn \*Yesu Kristo ne cèrè' ni teke' wɔ ki jin', kimɛ u yé wà cuube ne. <sup>2</sup> Uwien ní juoke ne kí gbien, kí cèrè ní li ñmɔbe uyenduɔncien kí ñe ni ben wɔ, ki liebe' ki ben Yonbdaan \*Yesu ma nnɔ bo.

### *Kristo yɔ li ñmɔbe mitetem mà*

<sup>3</sup> U'tuɔm bo ne u de' te ná ke li tore te tí li fuobe, kí li pe u'sen bo mɔnmɔnm, ki cèrè' ti bende' wà yin' te kí ñe u'tiema kpiɛke nin u'tiema nimɔnt bo nnɔ. <sup>4</sup> Tu ya bont bo ne u de' te u là pùon' ki ye u li de te tibont tà, tù yé tibonciɛnt ki mɔn ki gbien' nnɔ. Tu ya bont ne li cèrè tibonbiert tà te uɛndun wuu ni binib ya nun fɔke tu'bo nnɔ ji la coh ne mɛnku. Nnɔ ne ni li ñmɔbe Uwien ya tetem.

<sup>5</sup> Nen bo, tùre mɛn kí ñikn kí li ñmɔbe mitetemɔnmɔnm kí pukn ni'tekjim bó, kí li ñmɔbe mibenm kí pukn ni'tetemɔnmɔnm bó, <sup>6</sup> kí li co ni'ba kí pukn ni'benm bó, kí li ñmɔbe kuminku kí pukn ni coh ni'ba ma nnɔ bo, kí li pe Uwien ya sen bo mɔnmɔnm, kí pukn kuminku bó. <sup>7</sup> Ni pe Uwien ya sen bo mɔnmɔnm la, ní li yíe tɔb ten ninjieb yíe tɔb ma bo. Ni yíe tɔb ten ninjieb yíe tɔb ma bo la, ní li yíe binib ke mɔ. <sup>8</sup> Kimɛ ni ñmɔbe mi ya tetem ki pe mi'bo ki joh inun bó la, mí li cèreh ní li sɔnh itùon, ne itùon nnɔ ña ní juore fɛnm. Mí li cèrè ní tùre kí bende ti'Yonbdaan \*Yesu Kristo mɔ. <sup>9</sup> Ama wà ña ñmɔbe mitetem nnɔ la, u lenh dɔmudɔmu ne, ki te ten ujuɔn. U sunde' ñɔ ki ye Uwien sɔkre' ki ñen' u là teh ibiere yà nnɔ ñɔ.

<sup>10</sup> N'yaabɛ, Uwien ne yin' ne ki gènde' ne. Nen bo, cèrè mɛn ni'nun ní li mɔn ní li teh ná wɔngeh ki teh wɔn ne yin' ne ki gènde' ne. Ni teh nnɔ la, na ní tùre kí kɔ biil ni fiebu. <sup>11</sup> Nnɔ ne Uwien li teke ne tinɔjer tule, kí cèrè ní kɔ ti'Yonbdaan \*Yesu Kristo ti'Ñmienl ya bel là ña ñmɔbe gbenm nnɔ ni.

### *Li pe mɛn Yesu ya tondb ya wɔknm bo*

<sup>12</sup> Nen bo ne n li tuu ki tiereh ne tibont bugben bó nin ni ben tù ma ke, ki pe bi tɔke' ne tigbemɔnt tà nnɔ bo mɔnmɔnm nnɔ. <sup>13</sup> N laan biɛ ki fuobe ma n maale' ki ye ní mɔn ní li tien ne tibont bugben bó ñɔ ni la gɔh tu'bo ne. <sup>14</sup> Kimɛ n ben ki ye uyo wà sien' n li fuobe

ɲa ji yebe tɛn ti'Yonbdaan \*Yesu Kristo nin u'yul là tɔke' nni ma bo. <sup>15</sup> Ama n li ɲikn kí cère n tí taa' n'yaam ki bure' mɔnɔn la, ní li tuu ki tien tibont bugben bó nɛ.

<sup>16</sup> Tɔ, na yé ti taa' unisaal ya yɛnfuom ya gbɛyienkaar nɛ ki tɔke' nɛ ti'Yonbdaan \*Yesu Kristo ya baam nin u'tuɔm ya gbɛr, ama ti'nunbu nɛ laa' u'yɛbn. <sup>17</sup> Imɔn, u laa' lisel nin ukpíeke Baa Uwien saan, uyo wà wɔn Uwien wà ɲmɔbe ukpíeke u yebe ka tí ɲmɔbe u kpɛ nin bà nnɔ là len' ki ye: «Wà sɔ yé n'Bijɛ, n yíe wɔ cɛɛn nɛ n'yɛnm sɔnge u'bo ki gbien'.» <sup>18</sup> Nɛ tinbi mɔnɔn là cii' uníeke nnɔ bó paaki bó uyo wà tinbi nin wɔn là te Uwien ya juál bo nnɔ.

<sup>19</sup> Nnɔ nɛ ti tùrɛ' ki du ki ye \*Uwien ya ɲɔbonsɔknb là tɔke' tigbɛr tà nnɔ tù te. Ní mɔn ní tùrɛ kí pele itub nɛ kí cenge tù. Tù te tɛn lifrl nɛ wendeh nà saan biike ki gu nè rí faa ɲɔ litɛɲɛɲmaasel\* rí wende ní'fɛl ni. <sup>20</sup> Kpíe mɛn kí bɛnde kí ye \*Uwien ya ɲɔbonsɔknb ya gbɛr tà kɛle' \*Uwien ya gbɔnku ni nnɔ, uba ɲa rí fre kí sɔkn tù nin u'tiɛma yɛnfuom, <sup>21</sup> kímɛ nil ɲa kpele ki taa' u'tiɛma yíem ki sɔkn' Uwien ya ɲɔbon, ama \*Mifuoñaanm nɛ là cère' binib sɔkn' Uwien ya ɲɔbon.

## 2

### *Bà wɔknh kutonnɛnku ya gbɛr*

<sup>1</sup> Uyo bo binib là te Uwien ya nib ni ki yih bi'ba \*Uwien ya ɲɔbonsɔknb, ki sɔknɛh kutonnɛnku tɛn binib te ni'mɔ ni ma ki yih bi'ba biwɔnwɔknb, ki wɔknh kutonnɛnku nɔ. Bi li taa ucekn kí taa miwɔknm mà yé kutonnɛnku kí kuɔn ni'ni kí tuln binib, haali kí tí niɛ mɔnɔn kí ye ba bɛn bi'Cɛnbaa wà dɛ' bɛ ki wiɛ'. Bi li tien nnɔ nɛ ki nuunh bi'tiɛma tudɛrɛ nɛ Uwien rí gben bi'gbɛr na rí taande. <sup>2</sup> Binib li paan bi'sɔnsɔndl bo ki yebe. Bɛn bo nɛ binib li len tigbɛmɔnt ya sɛn bo fɛnfɛnm. <sup>3</sup> Bi li yé binib bà ɲa gbuokeh like nɛ, kí taa tiɲɔɲmaagbɛr kí lɛrɛ kí ji nɛ. Ama bi bonde' haali uyoyo bɛ rí bu bɛ tibuur tà nnɔ ɲa ɲmɔbe pɛrm; bi'tudɛrɛ mɔ ɲa ɲmɔbe juorm. <sup>4</sup> Kímɛ Uwien ɲa dàan' u'tondb bà bii' nnɔ ya tub ya dɛrm. Ama u taa' bɛ ki wiɛ' kubùoku kùà ɲɔ ka ɲmɔbe biɛn, ki biike ni nɛ, ki cère' bi lùo tikurdɔkr ki te len, ki gu tibuur ya daali. <sup>5</sup> Wa dàan' binib bà là te uɲɛndun wuu ni haali uyoyo bo ya tub ya dɛrm. Ama u là cère' miwuɔm kun' nin bà ɲa boh wɔ ma nnɔ, u là ɲmíɛn' Nowe nɛ nin binib bilole ki pukn'. Wɔn Nowe nɛ là tɔkeh binib tigbɛmɔnt. <sup>6</sup> Uwien là dɛrɛ' Sodɔm nin Gomɔr yaab ya tub ki cère' idu bugben teke' umu ki wɪn' ki ɲmaare' ɲɔ wenli bo nè rí li yé kudíeku bà ɲa li boh wɔ nnɔ bo nɛ. <sup>7</sup> U là ɲmíɛn' Lɔt, ugbɛmɔndaan wà ya yɛnm là saa' idu nnɔ ya nib ya tetem bo ki gbien' nnɔ nɛ. Bi là pɛ lisɔnsɔndl bo nɛ ki teh bi'yɛnm yíe nà. <sup>8</sup> Lɔt nin bɛn nɛ là kɔ, nɛ idaan kɛ u lɛnh, ki ciih bi teh nà kɛ, nɛ ní wi wɔ bi'tuonfɛnfɛnm nnɔ bo cɛɛn, kímɛ u yé ugbɛmɔndaan nɛ. <sup>9</sup> Nɛn nɛ wuɔn' ki ye Uwien bɛn u li tien ma kí ɲɛn binib bà pɛ u'bo mibiikm ni, kí guure tibuur ya daali kí dɛrɛ bà ɲa cuube ya tub. <sup>10</sup> U li tùrɛ kí dɛrɛ bà pɛ tigbɛnɛnt yíe tibonbiert tà bo, ki fɛ tijɔknt ya bont ya tienm, ki yindeh Uwien ya yonbdɛnt nnɔ ya tub nɛ.

Biwɔnwɔknb bà wɔknh kutonnɛnku nnɔ, ba fɛnge bonn, ki ɲmɔbe tigbengt, ki mɛngreh lifɛl ki sukreh nà kɛ ɲmɔbe ukpíeke paaki bó. <sup>11</sup> Uwien ya tondb bà ɲmɔbe mituɔm nin ufaa ki cɛn' bɛ nnɔ mɔnɔn ɲa sukreh ki biindeh nà kɛ ɲmɔbe ukpíeke paaki bó nnɔ Yonbdaan ya nun bó. <sup>12</sup> Ama binib nnɔ yé ijɔr nɛ, ki te tɛn ipíe, ki te ki de' bɛ rí li coh yí ki kuuleh. Bi sukreh bà bɛn nà nɛ, ki li kpo tɛn tiwɛnt, <sup>13</sup> ki li lɛ utudɛrɛ, wun nɛ yé bi'tuonbiɛrɛ nnɔ ya paaku. Bi'yɛnm sɔnge bɛ rí li sɔnh isɔnsɔndtuon kuwensiiku nɛ. Ninbi nin bɛn taan' ki jinh la, bi'yɛnm sɔnge bɛ rí li lɛrɛh nɛ nɛ. Bi yé tijɔknt nɛ, ki ɲmɔbe ifɛ. <sup>14</sup> Bi'yɛnmaale kɛ pɛ bipiib bo nɛ. Bi teh ibiɛrɛ nɛ ka jiiɛrɛh, ki lɛrɛh ki coh bà ya tekjim ɲa faa. Ba gbuokeh bont nɛ bi'yɛnmaale kɛ pɛ tu'bo, ki yé binib bà te miɲuɔm ni. <sup>15</sup> Bi wiɛ' usɛnmɔnmɔn nɛ ki tùrɛ' ki paan' Bosɔr ya bijɛ Balam ya sɛn bo. Wɔn Balam nɛ là yíe ilike

\* 1:19 Migbiirm miɛ ni bi ye litɛɲɛɲmaasel la, bi niirɛh Kristo nɛ.

ki gbien' ki tuo' bi pèn' wə u tien' nà bre. <sup>16</sup> Ama Uwien cère' unjuun len' minilm ki biin' Balam ki pien' wən Balam \*Uwien ya ñəbonsəknl ya jərtuon.

<sup>17</sup> Biwənwəknb bà wəknh kutonnənkun nən te tən inunbunkuon nɛ, ki te tən titɛwəlgbənt tà kutafaaku tuke tù. Uwien bonde' bɛ mifɛnm nà saan biike cɪnm ŋə. <sup>18</sup> Bi lienh tigbengt ya lenm nɛ ma ŋməbe tingi, ki sənɪ isənsəndtuon yà bi'mɛnkun pɛ i'bo nən, ki lɛreh ki coh binib bà wiɛ' bà ture' ya sɛn na laan wuəke' nən. <sup>19</sup> Ki təkɛh bɛ ki teh bi pɛ bi'bo la, bi li lɛ liwiɛl nɛ bɛn bugbɛn ji yé tibont tà teh bɛ fɛnm nən ya yonbe, kimɛ unil teh nà nɪ tɪ mɛn' wə ki gbien' wa ji li fre kí wiɛ nè la, u yé ni'yonb nɛ. <sup>20</sup> Binib bà bɛnde' \*Yesu Kristo wà yé Yonbdaan ki yé Unmienl nən ñɛn' bi'ba unɛndun wuu ya jəknt ya bont ni ŋə. Bi liɛbe' ki kən' tu'ni, ki cère' tù mɛn' bɛ ki tɪ gbien' ba ji li fre kí wiɛ tù la, bi li tien fɛnm kí cɛn bi là te mikpiɛkm ma bo. <sup>21</sup> Kimɛ ba bi bɛnde' tigbɛmənt ya sɛn la, nɪ bi tu nin bɛ nɪ bɛnde wù ŋə kí wiɛ Uwien ya gbɛr tà bi là wəknl bɛ tù nən. <sup>22</sup> Nà li tu bɛ nən li wuən kí ye mikpɛnjɛnm miɛ yé imən nɛ. Mɛn si: «Usɛngbɛnl liɛbe' ki jin' u'siint», nɛ «Bi sɪi' fanga ki gben', u liɛbe' ki tɪ binbinde' liwəbl ni.»

### 3

#### *Yonbdaan li li baa nɛ*

<sup>1</sup> N'jətiebɛ, n kiɛh kugbənlieku sə nɪ de nɛ. Tu'kɛ tule ni nɪ tiɛreh nɛ ni'kɛ ŋə nɪ tore nɛ nɪ li ŋməbe iyənmaalmənmən nɛ. <sup>2</sup> Li tien mɛn \*Uwien ya ñəbonsəknb là juə' ki təkɛ' nɛ tigbɛr tà nən, kí li tien Yonbdaan, Unmienl là sən' u'tondb ni'saan bi təkɛ' nɛ u'gbɛr tà nən mə. <sup>3</sup> Ni li kpiɛ kí bɛnde nà si: idɛnfərke ya yo binib li te nɛ, kí li yé binib bà lɛh ki séreh binitəb, kí li fuobe bi'yɛnm yíe ma bo, <sup>4</sup> ki lienh ki teh: «\*Yesu pùon' ki ye u li baa ní-a! U nɪn ji juore' la? Kimɛ ti'baambɛ kpo' haali uyoyo ŋə ama ni'kɛ juore' ki te tən unɛndun ya cincinyo nɛ.» <sup>5</sup> Bi lienh nən ma nən bi sunde' ŋə kí ye Uwien là len' nɛ kutaaku nin kitink ñɛn' haali uyoyo. U taan' miñunm bəol liba ki cère' kitink ñɛn' upaan bo. <sup>6</sup> U là liɛbe' ki cère' miñunm yebre' ki kun' nin unɛndun ya nib nin nà kɛ là fuobe uyo bo. <sup>7</sup> Ama Uwien len' ki ye kutaaku kuu nin kitink kiɛ nə li te nɛ ki gu lidaali là u li bu binib tibuur, kí gben bà ŋa boh wə nən ya gbɛr. Nɛn daali nɛ umu li wi kutaaku nin kitink kɛ.

<sup>8</sup> Ama n'jətiebɛ, na bi li sunde nibonn niba bó nɛ. Nɛn si: uwien uba te tən ibin liturl nɛ Yonbdaan bo, nɛ ibin liturl mə te tən uwien uba. <sup>9</sup> Yonbdaan ŋa nɪ taande u pùon' ki ye u li tien nà nən bo tən binib biba maaleh ma bo. U ŋməbe kuminku ni'bo, kimɛ wa yíe uba nɪ kpo kí juore fɛnm, ama u yíe unil kɛ nɪ lèbre u'tetem nɛ. <sup>10</sup> Yonbdaan li baa ní lidaali là li ci binib tən unasu nɛ. Nɛn daali nɛ kutaaku li gben kí tien kuwaaku kí gbien, nɛ tibont tà kɛ te ku'bo nən nɪ wi. Kitink nin tibont tà kɛ te ki'bo nən mə li wi. <sup>11</sup> Tibont nən kɛ li wi ma nən, nɪ mən, ní li yé bɛ ya nitunbu? Nɪ kpɛ ní li fuobe Uwien yíe ma bo nɛ, kí li boh wə, <sup>12</sup> ki gu lidaali là Uwien li bu binib tibuur nən nɪ baa tonm. Nɛn daali nɛ umu li wi kutaaku nɛ limuuwəl nɪ donde tibont tà kɛ te ku'bo. <sup>13</sup> Ama Uwien là pùon' ki ye u li tien kutɛfɛnkun nin kitinfɛnk, kí cère tigbɛmənt nɪ li te tu'bo. Ti gu nɛn nɛ.

<sup>14</sup> Nɛn bo, n'jətiebɛ, ni gu ni'daali ma nə, li ñikndeh mɛn ŋə u lá baa' la, wə nɪ lɛ ni te uyɛnduən ni, ka ŋməbe jəknt, ka gbè niba saan. <sup>15</sup> Nɪ li bɛn kí ye ti'Yonbdaan mɪnde' ki wuəke' ma nən, nɪ yé ni ya ŋmɛrm nɛ. U ya sɛn bo nɛ ti'ninje Pəl wà ti yíe wə nən kɛle' nɛ kugbənku kí ñɛ Uwien de' wə miyɛnfuom mə nən bo. <sup>16</sup> U'gbənt kɛ ni, u ye wə nɪ len tuu ya gbɛr bo la, u lienh nən nɛ. Nibɛmbɛ saan ya ciim faa nɛ, nɛ binib bà ŋa bɛn niba, ka tukn' wəknl miba bo coh tu'tingi ki lèbreh tən bi lèbreh \*Uwien ya gbənku ni ya gbɛtər ya tingi ma bo, ki tulndeh bi'ba. <sup>17</sup> Nɛn bo, n'jətiebɛ, n juə' ki təkɛ' nɛ sə. Li bɛn mɛn, ki la cère bà ŋa boh Uwien, ki ture' nən nɪ lɛre nɛ ní paan bi'bo, kí lúo ni se usensien wà ki faa nən. <sup>18</sup> Ama ture mɛn kí li bɛndeh ti'Yonbdaan nin ti'Nmiɛnl \*Yesu Kristo ki joh inun bó, kí cère u'juokm nɪ li yɛbreh ni'saan. Wən si ukpiɛke fɛnfɛnnə nin uyo wà ŋa ŋməbe gbenm. [Ami].

## Tigbont tà San kele' tù nnò Nà wongeh tigbont tuu te ma bo

San nε kele' tigbont tuta tuu nò. Wa kele' u'yel tu'ni niba saan.

Kukpieku kuu ni ni'ba saan ηa wongeh u kele' kù ki de' wà. U lii kele' ki de' Kristo yaab biba nε, bi paan' binib biba bo bi'wòknm ηa kpe sɛn bo. Nɛn bo nε San kele' kugbònkù kuu ki tòke' bà li kàanh kù ki ye bε ñ liike bi'yul bo nin mi ya wòknm.

Kugbònlieku ni, San yih u'ba «ucien nε.» U kele' kù ki de' upii uba nin u'bumu nε. Upii uba nin u'bumu nnò yé Kristo ya taanl liba nin li'nib nε.

U saakreh bà li kàan kù nnò ya gbɛnɛnt bε ñ li yíe tɔb, kí li pε Yesu ya wòknm bo mɔnmɔnm nε.

Wɔn unibaab nε kele' kugbòntaaku ki de' uje uba, ki pèke' wò, kimε u pε tigbɛmònt ya sɛn bo, ki toreh Kristo yaab. U liɛbe' ki lienh ujetò mɔ bó. U yíe' «ucien» ya ñòbu bó, ka teknh cɛnb mɔ (migbiirm 9-10). U tí liɛbe' ki lienh ujetò uba mɔ ya gber, u teke' Yesu ki jin' (migbiirm 11-12). U saakreh ukpiék nnò ya gbɛnɛnt wò ñ li pε u ya jε ya tetem bo nε.

### *Mifuobm ya gber*

<sup>1</sup> Ti tòkeh nε ti cii' nà, ti'nunbu laa' nè, ti ñuɔre' nè, ti'nuò mε' nè nnò ya gber nε. Tigber bugbɛn là te haali tibont kε ya cincinyo nε, ki yé limiel ya gber. <sup>2</sup> Mifuobm nnò ya daan taa' u'ba ki wuɔn' tε, ti laa' wò nε ki kundeh imòn, ki tòkeh nε \*limiel là ηa ηmòbe gbenm ya gber. Wà yé limiel ya daan nnò là te nin Baa Uwien nε, ki taa' u'ba ki wuɔn' tε. <sup>3</sup> Ti cii' nà, ki laa' nè nnò, ti tòkeh ni'mò ni ya gber nε, ηò tinbi nin ninbi ñ li te uñòkpaan ni. Tí ñòkpaan nnò yé uñòkpaan wà tinbi nin ti'Baje \*Yesu Kristo ηmòbe wù nnò nε. <sup>4</sup> Ti yíe tí li ηmòbe uyensonge kí tí gbɛn nε. Nɛn bo nε ti kele' tigber tuu nò ki de' nε.

### *Nε mɛn licinñunl ni ki kò kuwenwenku ni*

<sup>5</sup> Ti cii' tigber tà \*Yesu saan nnò, ti tòkeh nε tun sò: Uwien yé kuwenwenku nε, cinñunl ηa te u'ni. <sup>6</sup> Ti lienh ki teh tinbi nin Uwien ηmòbe uñòkpaan, ki liɛbe' ki te licinñunl ni la, ti yé bitonnɛndɛnb nε, ta ηmòbe gbɛmònt. <sup>7</sup> Ama ti te kuwenwenku ni tɛn Uwien te kuwenwenku ni ma la, ti ηmòbe uñòkpaan nin tɔb nε. Nε u'Baje \*Yesu ya sɛm sòkreh ti'biere kε.

<sup>8</sup> Ti len' ki ye ta ηmòbe biere la, ti tulndeh ti'ba nε, gbɛmònt ηa te ti'fèl ni. <sup>9</sup> Ti kpiire' ti'biere ki tòke' Uwien la, u li fère tε, kí sòkre ti'fèl kí ñɛn nà kε bre, kimε u cuube nε ki yé ugbɛmòndaan. <sup>10</sup> Ti len' ki ye ta teh biere la, ti yin' Uwien utonnɛndaan nε, nε u'gber ηa te ti'fèl ni.

## 2

### *Kristo nε yé ucɛndɛnduol*

<sup>1</sup> N'bumu, ma yíe ní li teh biere. Nɛn bo nε n kele' tigber tuu ki de' nε. Ama unil tien' ibiere mɔnɔn la, ti ηmòbe \*ucɛndɛnduol uba ti'Baa Uwien saan. Wɔn si: \*Yesu Kristo ugbɛmòndaan. <sup>2</sup> U taa' u'ba ki tien' lituɔrl ki de' Uwien ηò Uwien ñ fère tε ti'biere nε. Na yé ti'yi baba, u li fère unɛndun ya nib kε mɔ yi nε.

<sup>3</sup> Ti tuo' Uwien ye nà la, nɛn nε wongeh tε ki teh ti mɔnbe ki bɛn Uwien. <sup>4</sup> Wà kε ye u bɛn Uwien, ka tuo' u ye nà la, u yé utonnɛndaan nε, nε gbɛmònt ηa te u'fèl ni. <sup>5</sup> Ama wà kε boh Uwien ya gber la, wɔn nε cinbe ki yíe Uwien ki tí gbɛn'. Nnò nε ti mɔnbe ki bɛn ki ye tinbi nin Uwien tε. <sup>6</sup> Wà kε ye wɔn nin Uwien tε la, wò ñ li fuobe tɛn \*Yesu Kristo là fuobe ma bo.

*Li yie men tɔb*  
(San 13:34-35)

<sup>7</sup> N'jɔtiebɛ, na yé wɔɔfɛnl nɛ n kieh ki dienh nɛ, ama nɛ yé liwɔɔbkpaal nɛ. Ni là cin' ki paan' \*Yesu Kristo ya sɛn bo ma nnɔ, nɛ ki cii' lè. Liwɔɔbkpaal bugbɛn yé tigbɛr tà ni là cii' tù nnɔ nɛ. <sup>8</sup> Nin nɛn kɛ ɲɔ, n kele' liwɔɔbl là ki de' nɛ nnɔ yé lifɛnl nɛ. Ninbi nin \*Yesu Kristo ya tetem nɛ wɔngɛh ki teh liwɔɔbl nnɔ mɔn. Kimɛ licinɲunl benh ki gbendeh nɛ, nɛ kuwenwenmɔnku cin' ki wendeh.

<sup>9</sup> Wà kɛ ye u te kuwenwenku ni, ki nɛn u'tɔ la, u biɛ ki te licinɲunl ni nɛ. <sup>10</sup> Wà kɛ yie u'tɔ la, u te kuwenwenku ni nɛ. Bonn ɲa te u'fɛl bo kí fre kí cère wɔ rɛ tien nà bre. <sup>11</sup> Ama wà kɛ nɛn u'tɔ la, u te licinɲunl ni nɛ, ki cuonh ka bɛn u joh nà bó. Kimɛ licinɲunl nnɔ juɔn' wɔ ɲɔ.

*Ni'nun la li mɔn uɲɛndun nin u'bont bo*

<sup>12</sup> N'bumu, n kieh tigbɛr tuu rɛ de nɛ, kimɛ Uwien fère' nɛ ni'biere \*Yesu Kristo ya yel bo ɲɔ.

<sup>13</sup> N'baambɛ, n kieh tigbɛr tuu rɛ de nɛ, kimɛ ni bɛn wà te haali tibont kɛ ya cincinyo.

Bifɛnbɛ, n kieh tigbɛr tuu rɛ de nɛ, kimɛ ni faake' nin usɛnpol ubiɛrɔ ɲɔ.

<sup>14</sup> N'bumu, n kele' tigbɛr tuu ki de' nɛ, kimɛ ni bɛn Baa Uwien.

N'baambɛ, n kele' tigbɛr tuu ki de' nɛ, kimɛ ni bɛn wà te haali tibont kɛ ya cincinyo.

Bifɛnbɛ, n kele' tigbɛr tuu ki de' nɛ, kimɛ ni ɲmɔbe mituɔm,

Uwien ya gbɛr te ni'fɛl ni,

nɛ ni faake' nin usɛnpol ubiɛrɔ.

<sup>15</sup> La yie men uɲɛndun wuu, ki niireh nin tibont tà te u'ni.

Wà kɛ yie uɲɛndun wuu la,

wa ɲmɔbe Baa Uwien ya yiem.

<sup>16</sup> Kimɛ iyɛnmaalbiere yà te unisaal ya fɛl bo nnɔ nin u ɲmɔbe ununfɔke wà u lɛnh tibont tà bo nnɔ

nin u ɲmɔbe tigbɛngt tà u'faal bo nnɔ

ɲa ñɛn' Baa Uwien saan,

tu'kɛ ñɛn' uɲɛndun wuu ni nɛ,

ki yé uɲɛndun yaar.

<sup>17</sup> \*Uɲɛndun wuu nin tibont tà binib ya nun fɔke tu'bo nnɔ kɛ li gben, ama wà kɛ teh Uwien yie nà la, udaan li tuu ki te nɛ.

*Nà li tore nɛ ni bɛnde Kristo ya nɛnnɛnd*

<sup>18</sup> N'bumu, ni sɛn' waamu nɛ ugbɛngbenyo rɛ baa. Ni là cii' bi ye Kristo ya nɛnnɛnd li baa ní. Fɛnfɛnnɔ wuɔ Kristo ya nɛnnɛndb baa' ki yebe. Nɛn bo nɛ ti bɛnde' ki ye nɛ sɛn' waamu nɛ ugbɛngbenyo rɛ baa. <sup>19</sup> Bi là te ti'cɛkl ni, nɛ ki siere' ti'saan. Ba li là yé ti'yaab. Bi bi là yé ti'yaab la, bi bi biɛ ki te ti'ni nɛ. Bi siere' ti'saan ma nnɔ, nɛn nɛ wuɔn' tɛ nɛ wien ki ye bi'kɛ ɲa li mɔnbe ki yé ti'yaab.

<sup>20</sup> Ninbi bɛn wɔn, Kristo de' nɛ \*Mifuoñaanm ɲɔ. Nɛn bo nɛ ni'kɛ bɛn nà yé tigbɛmɔnt.

<sup>21</sup> Na yé na bɛn gbɛmɔnt nɛ cère' n kele' tigbɛr tuu ki de' nɛ. Ni bɛn tigbɛmɔnt ma nnɔ nɛ cère' n kele' tù ki de' nɛ. Ni bɛn ki ye tonnenku ɲa te gbɛmɔnt ni.

<sup>22</sup> ɲmɛ yé utonnɛndaan-i? Na yé wà niɛh ki teh \*Yesu ɲa yé Uwien ya Nigɛndkɛ Kristo-oo? U ya daan nɛ yé \*Kristo ya nɛnnɛnd, ki niɛh ki teh wa bɛn Baa Uwien nin u'Bijɛ. <sup>23</sup> Wà kɛ niɛ' ki ye wa bɛn Uwien ya Bijɛ la, u niɛ' ki ye wa bɛn Baa Uwien mɔ nɛ. Wà kɛ ye u bɛn Uwien ya Bijɛ la, wɔn nin Baa Uwien kpɛ buñɔbu nɛ.



<sup>24</sup> Ninbi wən, cère mən ni là cii' tigber tà haali micincinm nnə́ rí li te ni'fèl ni. Tigber tà ni là cii' tù micincinm nnə́ te ni'fèl ni la, ni te nin Baa Uwien nin u'Bije ne. <sup>25</sup> U pùon' ki ye u li de te nibonn nà nnə́, nen si: \*limiel là ña ñməbe gbenm ne.

<sup>26</sup> N kele' tigber tuu ki de' ne rí təke ne binib bà nuunh be rí tuln ne nnə́ bó ne. <sup>27</sup> Ninbi ben wən, Kristo de' ne \*u'Fuoñaanm ne mǐ tuu ki te ni'bo, ne na ji nuunh nil rí wəkn ne u'gber. \*U'Fuoñaanm nnə́ ne wəknh ne ni'ke. Mǐ wəknh ne nà nnə́ yé tiggemənt ne, ma nendeh. Li te mən nin Kristo, \*u'Fuoñaanm wəkn' ne ma bo.

<sup>28</sup> N'bumu, li te mən nin Kristo fenfennə́ ñə́ lidaali là u li baa ní, kí ñen u'ba upaan bo binib ke rí le wə nnə́ tí li ñməbe midum ñə́ fe la cuo te u'nun bó.

### *Uwien ya bumu ña ji li teh biere*

<sup>29</sup> Ni ben ki ye Kristo yé ugbeməndaan ma nnə́, bende mən kí ye unil wà ke teh nà cuube la, u yé Uwien ya buk ne.

## 3

<sup>1</sup> Liike mən Baa Uwien yíe te nǐ tí kpe ma. U yíe te ki gbien' haali ki tí yin' te u'bumu. Ti mənbe ki yé u'bumu ne. \*Uñendun ya nib ña ben te, kime ba ben Uwien yé udaan wà. <sup>2</sup> N'jətiebe, fenfennə́ wuə́ ti yé Uwien ya bumu ne. Ama ta laan ben ti lá li te ma bo. Ti nín ben ki ye Kristo lá li ñen u'ba upaan bo uyo wà nnə́, ti li naan wən ne, kime ti li le wə́, u te ten u li te ma bo ne. <sup>3</sup> Wà ke ñməbe Kristo bo li ya dendenl la, wa ji ñməbe jəkn̄t ten Kristo ña ñməbe jəkn̄t ma.

<sup>4</sup> Wà ke teh ibiere la, u wié' yiko ne, kime yiko ya wiem yé ibiere ne. <sup>5</sup> Ni ben ki ye Kristo baa' uñendun wuu ni wə́ rí gben ibiere ne. Ne biere iba mənən ña te u'ni. <sup>6</sup> Wà ke te nin wə́ la, wa ji teh biere. Wà ke teh ibiere la, wa laa' wə́, ka ben wə́ mə́.

<sup>7</sup> N'bumu, la cère mən uba rí tuln ne. Wà ke teh nà cuube la, u yé ugbeməndaan ten Kristo yé ugbeməndaan ma ne. <sup>8</sup> Wà ke teh ibiere yé usenpol yə́ ne, kime usenpol yé ubierdaan ne haali tibont ke ya cincinyo. Nen bo ne Uwien ya Bije baa' uñendun wuu ni wə́ rí gben usenpol ya tòn.

<sup>9</sup> Wà ke yé Uwien ya buk ña ji li teh biere, kime Uwien ya tetem te u'ni. U yé Uwien ya buk ma nnə́, wa rí fre kí tien biere. <sup>10</sup> Wà ke teh nà ña cuube, ka yíe u'tə́ la, wa yé Wien ya buk. Nen ne cèreh bi bende' bà yé Uwien ya bumu nin bà yé usenpol yaamu.

### *Li yíe mən təb*

<sup>11</sup> Ni là cii' tigber tà haali micincinm nnə́ tun si: «Tí li yíe təb ne.» <sup>12</sup> La cère mən tí li te ten Kayen. U là yé usenpol ubierə́ yə́ ne, ki ku' u'ninje. Be bo ne u ku' wə́? U là ku' wə́, kime u ya tòn là bre ne, ne u'ninje ye cuube.

<sup>13</sup> N'yaabe, \*uñendun ya nib nen ne la, la cère mən nè rí cuo ne yəkm. <sup>14</sup> Tinbi yíe tí təb Kristo yaab ma nnə́ ne cère' ti bende' ki ye ti ñen' mikuum ni ki kən' mifuobm ni. Wà ke ña yíe u'tə́ la, u bie ki te mikuum ni ne. <sup>15</sup> Wà ke nen u'tə́ la, u yé unikul ne. Ne ni ben ki ye limiel là ña ñməbe gbenm ña te nikul ni. <sup>16</sup> Nà sə́ cère' ti bende' miyíem ya tingi: Kristo teke' tinbi ya kuum ne ki kpo'. Nǐ mən tí mə́ rí teke tí təb ya kuum ne kí kpo. <sup>17</sup> Unil ñməbe lifaal uñendun wuu ni, ki laa' nǐ pəre' u'tə́, ne wa tuo' wə́ rí ñukre kí tore wə́ la, u ñməbe Uwien ya yíem mila bo? <sup>18</sup> N'bumu, la cère mən tí li yíe təb buñəbu ni, cère mən tí li sən̄h itùon yə́ wəngəh ki teh ti mənbe ki yíe təb.

<sup>19-20</sup> Nen ne li cère tí bende' kí ye ti pə́ tiggemənt bo. Nǐ yé tí yənnmaale mənən ne biindeh te la, ti yənm də́ Uwien saan ne, kime Uwien cən' tí yənnmaale, ki ben tibont ke. <sup>21</sup> N'jətiebe, tí yənnmaale ña biindeh te la, ti ñməbe midum Uwien saan. <sup>22</sup> Ne ti mié' wə́ nà ke la, u dienh te nè ne, kime ti boh u'wəbl ne ki sən̄greh u'yənm. <sup>23</sup> U de' te liwəbl là nnə́ si: tí teke u'Bije \*Yesu Kristo kí ji, kí li yíe təb, ten wən \*Yesu Kristo təke' te ma bo. <sup>24</sup> Wà ke boh Uwien ya wəbl la, u te nin Uwien, ne Uwien mə́ te nin wə́. U de' te Mifuoñaanm ma nnə́ ne cère' tí ben ki ye u te nin te.

## 4

### *Ni li tien ma ki bende Mifuoñaanm te bà bo*

<sup>1</sup> N'jotieɛ, la li teknh mɛn binib bà kɛ lienh ki teh bi ηmɔbe \*Mifuoñaanm nnɔ ki jinh, ama ní sekn kí bende kí ye \*Mifuoñaanm nɛ cère' bi lienh kí yaan kí teke bɛ kí ji. Kimɛ bitonnenñɔbonsɔknɔ ji gbe nɛ unɛndun ni. <sup>2</sup> Nà sɔ li cère ní bende binib bà ηmɔbe \*Uwien ya Fuoñaanm: wà kɛ lienh ki teh \*Yesu Kristo mɔnbe ki baa' unɛndun wuu ni nin tinisaalgbɛnɛnt la, wɔn nɛ yé Uwien yɔ. <sup>3</sup> Wà kɛ lienh ki teh Kristo ηa baa' nin nisaalgbɛnɛnt la, wa yé Wien yɔ, u yé Kristo ya nɛnnɛnd yɔ nɛ. Ni cii' bi ye Kristo ya nɛnnɛnd li baa ní. Fɛnfennɔ wuɔ u baa' unɛndun ni ηɔ.

<sup>4</sup> Ninbi n'bumu, ni yé Uwien yaab nɛ, nɛ ki faake' nin \*bitonnenñɔbonsɔknɔ nnɔ, kimɛ \*Uwien ya Fuoñaanm mà te ni'ni nnɔ faa ki cɛn' Kristo ya nɛnnɛnd wà te unɛndun ni nnɔ. <sup>5</sup> Bɛn yé unɛndun yaab nɛ. Nɛn bo nɛ bi lienh unɛndun ya lenm, nɛ unɛndun ya nib cengeh bi'ból. <sup>6</sup> Tinbi bɛn wɔn, ti yé Uwien yaab nɛ. Wà kɛ bɛn Uwien nɛ cengeh ti'ból. Wà kɛ ηa yé Wien yɔ ηa cengeh ti'ból. Nɛn nɛ cère' ti bende' \*Mifuoñaanm, mɛn mà yé tigbɛmɔnt nnɔ te binib bà ni, ki cère' ti bende' usɛnpol utonnɛndaan mɔ te binib bà ni.

### *Miyiem ñɛh Uwien saan nɛ*

<sup>7</sup> N'jotieɛ, cère mɛn tí li yíe tɔb, kimɛ miyiem ñɛn' Uwien saan nɛ. Wà kɛ ηmɔbe miyiem la, u yé Uwien ya buk nɛ, ki bɛn Uwien. <sup>8</sup> Wà ηa ηmɔbe yíem la, wa bɛn Wien, kimɛ Uwien yé miyiem ya daan nɛ. <sup>9</sup> Uwien wuɔn' tɛ u'yíem ma bo sɔ: u sɔn' ní u'Bijɛbaab unɛndun wuu ni ηɔ wɔn bo tí li fuobe nɛ. <sup>10</sup> Miyiem nnɔ si nà sɔ: na yé tinbi nɛ yíe Uwien, Uwien nɛ yíe tɛ, ki sɔn' ní u'Bijɛ unɛndun ni, wɔ n' lá taa u'ba kí tien lituɔrl kí de Uwien ηɔ wɔ n' fère tɛ ti'biere.

<sup>11</sup> N'jotieɛ, Uwien yíe tɛ nnɔ ma nnɔ, ní kpɛ ti'mɔ n' li yíe tɔb nɛ. <sup>12</sup> Uba ηa kpele ki laa' Wien. Ti yíe tɔb la, Uwien tɛ nin tɛ nɛ, nɛ u'yíem te ti'ni ki tí gben'.

<sup>13</sup> Nà cère' ti bɛn ki ye ti tɛ nin Uwien nɛ Uwien mɔ tɛ nin tɛ nnɔ si: u de' tɛ \*u'Fuoñaanm. <sup>14</sup> Tinbi laa' Uwien ya Bijɛ, nɛ ki kundeh imɔn ki teh u'Baa nɛ sɔn' wɔ ní unɛndun wuu ni, wɔ n' lá li yé unɛndun ya nib ya Nmienl. <sup>15</sup> Wà kɛ lienh ki teh \*Yesu yé Uwien ya Bijɛ la, Uwien tɛ nin udaan nɛ, nɛ u'mɔ tɛ nin Uwien. <sup>16</sup> Tinbi bɛn Uwien yíe tɛ ma bo, nɛ ki teke' ki jin'.

Uwien yé miyiem ya daan nɛ. Wà kɛ ηmɔbe miyiem la, u tɛ nin Uwien nɛ, nɛ Uwien mɔ tɛ nin wɔ. <sup>17</sup> Nà cère' miyiem te ti'ni ki tí gben' ηɔ tí li ηmɔbe midum Uwien li bu binib tibuur lidaali là nnɔ si: Kristo te ma bo nnɔ, ti'mɔ te nnɔ nɛ unɛndun wuu ni. <sup>18</sup> Jɛwaanbu ηa te yíem ni. Miyiem mà mɔn ki tí gben' gbendeh bujɛwaanbu nɛ. Utudɛre bo nɛ binib fɛnge. Unil wà fɛnge ηa laan ηmɔbe yíem mà mɔn ki tí gben'.

<sup>19</sup> Tinbi yíe Uwien, kimɛ wɔn nɛ kpɛ' ki yíe' tɛ. <sup>20</sup> Unil lienh ki teh u yíe Uwien, ka yíe u'tɔ la, u yé utonnɛndaan nɛ. Kimɛ nil ηa yíe u'tɔ wà u lenh wɔ la, wa n' fre kí ye u yíe Uwien wà wa lenh wɔ. <sup>21</sup> \*Yesu Kristo de' tɛ liwɔbl là sɔ: unil yíe Uwien la, wɔ n' li yíe u'tɔ mɔ.

## 5

### *Teke mɛn Uwien ya bijɛ kí ji, kí faake nin unɛndun*

<sup>1</sup> Wà kɛ teke' ki jin' ki ye \*Yesu yé Uwien ya Nigɛndkɛ Kristo la, udaan yé Uwien ya buk nɛ. Wà kɛ yíe kibuk ya baa la, u yíe u'buk mɔ nɛ. <sup>2</sup> Ti yíe Uwien ki boh u'wɔb la, nɛn nɛ wɔngɛh ki teh ti yíe u'bumu. <sup>3</sup> Kimɛ Uwien ya yíem si: tí li boh u'wɔb nɛ. Nɛ u'wɔb nnɔ ηa faa. <sup>4</sup> Wà kɛ yé Uwien ya buk nɛ faakreh nin unɛndun. Ti'tekjim nɛ cèreh ti faakreh nin unɛndun. <sup>5</sup> Nmɛ yé unil wà faakreh nin unɛndun-i? Wɔn si: wà teke' ki jin' ki ye \*Yesu yé Uwien ya Bijɛ.

### *Yesu Kristo ya mɔnkunb*

<sup>6</sup> Wɔn \*Yesu Kristo ne baa' ní nin miñunm nin misèm\*. Na yé u baa' nin miñunm baba ne, u baa' nin miñunm nin misèm ne. \*Mifuoñaanm kundeh imòn, kime mí yé imòn ne. <sup>7</sup> Bi te bimònkunb bita ne. <sup>8</sup> Ben si: Mifuoñaanm nin miñunm nin misèm. Ben bita nnɔ ke kpe buñɔbu ne. <sup>9</sup> Ti teknh binib ya mɔnkun la, ti li ben kí ye Uwien ya mɔnkun cen' binib yu. Uwien ya mɔnkun nnɔ si: u kun' imòn ki ye \*Yesu mɔnbe ki yé u'Bije ne. <sup>10</sup> Wà teke' Uwien ya Bije ki jin' la, u tuo' Uwien kun' imòn yà nnɔ ne. Ama wà ña teke' Uwien ki jin' la, u yih wɔ utonnendaan ne, kime wa teke' Uwien kun' u'Bije bo imòn yà nnɔ ne ki jin'. <sup>11</sup> Uwien ya mɔnkun nnɔ si: u de' te limiel là ña ñmɔbe gbenm, ne u'Bije ne yé limiel nnɔ ya daan. <sup>12</sup> Wà te nin Uwien ya Bije ne ñmɔbe limiel nnɔ. Wà ña te nin Uwien ya Bije ña ñmɔbe lè.

### *Tigbɛfɔrkaar*

<sup>13</sup> N kele' tigber tuu ke ki de' ne ña ní bende kí ye ninbi bà teke' Uwien ya Bije ki jin' nnɔ, ni ñmɔbe limiel là ña ñmɔbe gbenm ne. <sup>14</sup> Ti ñmɔbe midum mà Uwien saan si: ti mie' wɔ nà ke u'yiem bo la, u cengeh ti'bó ne. <sup>15</sup> Ti ben u cengeh ti'bó ma nnɔ, ti mie' wɔ nà ke la, ti du ki ye ti laa' nè ña.

<sup>16</sup> Unil laa' u'tɔ teh ibiere yà ña kuuleh la, wɔ ní kàare kí de wɔ ña Uwien ní tɔre u'fuobm, ní yé ibiere nnɔ ña mɔnbe ki kuuleh ne la. Kime ibiere iba te ki kuuleh, ma niireh be ní kàare kí de binib bà teh i ya biere. <sup>17</sup> Itùon yà ke ña cuube yé ibiere ne. Ama nà yé ibiere ke ne kuuleh.

<sup>18</sup> Ti ben ki ye wà ke yé Uwien ya buk ña ji teh biere, kime Uwien ya Bije gu wɔ, ne usenpol ubierɔ ña ní fre kí tien wɔ niba. <sup>19</sup> Ti ben ki ye tinbi yé Uwien ya bumu ne, ki ben mɔ ki ye unɛndun ya nib ke te usenpol ubierɔ ya wɔbl ni ne. <sup>20</sup> Ti ben ki ye Uwien ya Bije baa' ki wuon' te ti li tien ma kí bende Uwenmòn ne. Ti te nin Uwenmòn ne, kí ñe u'Bije \*Yesu Kristo bo. Wɔn ne yé Uwenmòn, ki yé limiel là ña ñmɔbe gbenm ya daan.

<sup>21</sup> N'bumu, liike men ni'yul bo nin ibule ya gber.

---

\* 5:6 Yesu Kristo ne baa' ní nin miñunm nin misèm ya tingi si: Bi sii' wɔ Uwien ya ñunm nin u'kuum ne.

## Kugbɔnlieku kua San kele' kù nnɔ

### *Ifuonde*

<sup>1</sup> Min uciɛn, n fuondeh sin ti'naa wà Uwien gènde' ηε nin a'bumu\*. N yíe nε imònmòn nε. Na yé min baba nε yíe nε, binib bà ke ben tigbɛmònt nnɔ mɔ yíe nε nε, <sup>2</sup> kí ñε tigbɛmònt tà te ti'fɛl ni, ki li tuu ki te ti'ni nnɔ bo.

<sup>3</sup> Baa Uwien nin u'Bije \*Yesu Kristo ní juoke tε, kí muɔ tε micεcεkm, kí de tε uyenduɔn ηɔ tí li pε tigbɛmònt bo, kí li fuobe miyíem ni.

### *Li ηmɔbe mɛn tigbɛmònt, kí li yíe tɔb*

<sup>4</sup> N laa' a'bumu muba pε tigbɛmònt bo tɛn Baa Uwien de' tε liwɔbl ma bo nnɔ, nε n'yɛnm sɔnge' ki gbien'. <sup>5</sup> Sin ti'naa, fɛnfɛnnɔ n gbáanh ηε nε, cère mɛn tí li yíe tɔb. Na yé wɔbfɛnl nε ní kele' ki de' ηε, ní yé ti là cii' là haali ucincinyo nnɔ nε. <sup>6</sup> Miyíem ya tingi si: tí li fuobe Uwien ya wɔbl ye ma bo nε. Li ya wɔbl nε ni là cii' lè haali ucincinyo nnɔ: «Li fuobe mɛn li ye ma bo».

<sup>7</sup> Binib bà tulndeh bi'tɔb yɛbre' uηɛndun wuu ni, ki lienh ki teh \*Yesu Kristo ηa baa' nin nisaalgbɛnɛnt. Unil teh nnɔ la, u yé wà tulndeh binib nε, ki yé \*Kristo ya nɛnnɛnd.

<sup>8</sup> Liike mɛn ni'yul bo ηɔ ti'tuonl la juore fɛnm. La juore' fɛnm la, ni li lε lisuul kí tĩ gben.

<sup>9</sup> Wà ke taah tibontɔr ki pukndeh Kristo ya wɔknm bó, ka fuobe mĩ ye ma bo la, wa tε nin Uwien. Wà fuobe Kristo ya wɔknm ye ma bo la, u tε nin Baa Uwien nin u'Bije nε.

<sup>10</sup> Wà baa' ní ni'saan ka tuke mi ya wɔknm la, la teke wɔ mɛn, ki la fuonde wɔ mɔnɔn.

<sup>11</sup> Kimε wà fuonde' wɔ la, udaan nin wɔn kpaan' iyε ki sɔn' u sɔnh itùonbiere yà nnɔ nínnɔ.

### *Micèbm*

<sup>12</sup> N ηmɔbe tigbɛr tù yɛbe ní tɔke nε ama ma yíe ní kele' tù gbɔnku ni. N daan ní baa ni'saan, kí lε nε, tí tɔke tigbɛr ηɔ kí li ηmɔbe uyɛnsɔnge kí tĩ gben nε.

<sup>13</sup> Ti'naa, a'ninse wà Uwien gènde' wɔ nnɔ ya bumu mɔ fuondeh ηε.

---

\* **1:1** Ti'naa nin u'bumu li fre kí ye Kristo ya taanl liba nin li'nib.

## Kugbɔntaaku kùà San kele' kù nnɔ

### *Ifuonde*

<sup>1</sup> N'jɔ Gayus, min uciɛn fuondeh ηε. N yíe ηε imɔnmɔn nε. <sup>2</sup> N'jɔ, n kàareh ki teh nè ní li mɔn a'bo isɛn ke ni nε; á li ηmɔbe ugbɛnɛnsɔnge mɔnmɔnm, tɛn a'fuobm mɔn Uwien saan ma bo.

<sup>3</sup> Ti'tɔb Kristo yaab biba baa', ki lá tɔke' nni a pɛ tigbɛmɔnt bo ma bo nin a fuobe tigbɛmɔnt ni ma bo, nε n'yɛnm sɔnge' ki gbien'. <sup>4</sup> Nà li cère n'yɛnm ní sɔnge kí tí kende si: ní cii n'bumu pɛ tigbɛmɔnt ya sɛn bo nε.

### *Bi pèkeh Gayus*

<sup>5</sup> N'jɔ, a pɛ Kristo ya sɛn bo mɔnmɔnm ki teh u'nib nà mɔn nin bi yé bicɛnb ma ke nnɔ. <sup>6</sup> Bi'mɔ len' Kristo ya taanl yaab saan a yíe binib ma bo. N gbáanh ηε nε, li toreh bε bi'sɛncɛnl ni Uwien yíe ma bo. <sup>7</sup> Kimε bi cuonh ki sɔnh Kristo ya tuonl nε ka teknh niba bà ηa pɛ Wien bo saan. <sup>8</sup> Nɛn bo, ní kpɛ tinbi nε ní li toreh bi ya nib, ηɔ tinbi nin bɛn ní taan kí li tɔkeh binib tigbɛmɔnt.

### *Diotref nin Demetriyus ya gber*

<sup>9</sup> N là kele' tigber tuba ki de' Kristo ya taanl yaab. Ama Diotref wà yíe wɔ ní li yé ní'ke ya sɛnlier nnɔ ηa tɔnge ti'gber. <sup>10</sup> Nɛn bo nε n baa' ní la, n li tɔke u teh nà ke nnɔ. Nɛn si: u lienh ti'bo tigbɛbiert tà ke nnɔ. U tien' nɛn ke ki ye nà sɔnge' u'yɛnm. Ti'tɔb Kristo yaab baa' la, wa teknh bε, nε bà mɔ yíe bε ní teke bε la, u piendeh bε, ki ηuɔh bε Kristo ya taanl ni.

<sup>11</sup> N'jɔ Gayus, la tɔkre bà teh nà bre; ama bà teh nà mɔn, kimε wà ke teh nà mɔn yé Uwien yɔ nε. Wà mɔ ke teh nà bre ηa bɛn Wien.

<sup>12</sup> Demetriyus wɔn, binib ke pèkeh wɔ nε. U pɛ tigbɛmɔnt tà bo nnɔ mɔ wɔngeh ki teh u yé unil nε. Ti'mɔ pèkeh wɔ nε, nε a bɛn ki ye ti pèkeh wɔ ma nnɔ ní yé imɔn nε.

### *Micɛbm*

<sup>13</sup> N ηmɔbe tigber tù yɛbe ní tɔke ηε ama ma yíe ní kele tù gbɔnku ni. <sup>14</sup> N daan ki ye ní pukn' waamu la, n li lε ηε, tí tɔke tigber.

<sup>15</sup> Uwien ní de ηε uyenduɔn.

A'jɔtieb fuondeh ηε. A'mɔ ní fuonde ti'yaab ke jεjε kí de tε.

## Kugbɔnku kùà Sud kɛle' kù nnɔ Nà wɔngɛh kugbɔnku kuu te ma bo

Kugbɔnku kuu te ki de' Kristo yaab kɛ nɛ. Ku'maam nɛke Pɛr kɛle' kulieku kùà nnɔ nɛ. Kugbɔnku kuu ya gbɛr mɔh nin bitonnɛnɔbonsɔknɔ ya tonnɛnku nin bi'tetɛfɛnfɛnm nɛ (migbiirm 6-13; 2 Pi iyul 2).

Wà kɛle' kugbɔnku kuu nnɔ taah Kujɔtiɛkpaaku ya gbɔnku ya gbɛr nɛ, ki ñɛndɛh miwɔknm len ki wɔknh u'yo ya nib. U liɛbe' ki taah Sufmbɛ ya gbɔnt tuba mɔ ya gbɛr ki kiɛh u'gbɔnku ni. Ama tigbɔnt nnɔ tun ŋa te Uwien ya gbɔnku ni (migbiirm 9, 14, 15).

U taah inɔbon yà cɔkreh nɛ ki tɔkeh Uwien li dɛrɛ bà yɛ' u'yɛm ya gbɛr ya tub ma bo (migbiirm 3-13). Ama u liɛbe' ki tɔke' mɔ ki ye nɛ kɛ bɛ n muɔ bɛ micɛɛɛkm nɛ kɛ tore bɛ ŋɔ bɛ n ñɛ Uwien li dɛrɛ binib ya tub ma nnɔ ni (migbiirm 22-23). Sud kɛle' u'gbɔnku ni ubɛnpiebe ya gbɛr la, u yɛ wɔ n piɛn nà brɛ nin kinunbɔnk nɛ. U ya bɛnpiebe ŋa bɛrɛh ama u ŋmiɛndɛh nɛ.

### *Ifuonde*

<sup>1</sup> Min Sud, n yé \*Yesu Kristo ya tonsɔnl nɛ, ki yé Saak ya ninjɛ. Min nɛ kiɛh kugbɔnku kuu n de ninbi bà Baa Uwien yin' nɛ, ki yɛ nɛ, ki cɛrɛ' \*Yesu Kristo gu nɛ nnɔ. <sup>2</sup> Uwien n li tuu ki muɔh nɛ micɛɛɛkm, kɛ de nɛ uyɛnduɔn kɛ gbien, kɛ li yɛ nɛ cɛɛn.

### *Uwien li dɛrɛ bà wɔknh nà ŋa kɛ sɛn ya tub*

<sup>3</sup> N'jɔtiɛbɛ, n'fɛnm là ton n kɛle kugbɔnku kɛ tɔke nɛ miŋmiɛnm mà yé ti'kɛ yaam nnɔ ya gbɛr nɛ. Ama fɛnfɛnnɔ n laa' nɛ yé n'bo liwɔbl nɛ n kɛle kɛ de nɛ kɛ cɛrɛ ni'fɛl n li co ŋɔ nɛ mɔ Uwien tɔke' u'yaab mitekjim ya gbɛr tà bolm miba kɛpin nnɔ bo. <sup>4</sup> Kimɛ binib biba lɔnbɛ' ki kɔn' ni'ni, ki yé bibiɛrdɛnb, ki sikreh ti'Wien ya juokm ya gbɛr ya tingi ŋɔ bɛ n fre kɛ li teh bi'sɔnsɔndl nɛ. Bi wiɛ' \*Yesu Kristo wà yé ti'Wɔnwɔknbaab, ki yé ti'Yonbdaan nnɔ ya gbɛr. Nɛ kɛle' \*Uwien ya gbɔnku ni haali uyo ŋɔ ki ye Uwien li dɛrɛ bi'tub.

<sup>5</sup> Ni bɛn n li tɔke nɛ nà kɛ nnɔ mɔnmɔnm. Nin ni bɛn ma kɛ nnɔ n yɛ n tiɛrɛ nɛ kɛ ye Yonbdaan là ŋmiɛn' Israyɛl yaab Esipt ni nɛ. Ni ya puoli bó nɛ u gbɛn' bi'ni bà ŋa teke' wɔ ki jin' nnɔ ya gbɛr.

<sup>6</sup> Tiɛrɛ mɛn Uwien ya tondb bà là dàan' Uwien sien' bɛ nà saan, ki siɛrɛ' ki dàan' bi'kɔnkuɔn nnɔ ya gbɛr. Uwien lɔlɛ' bɛ nɛ, bɛ n li tuu ki lùo, kɛ li te kubùoku kùà ñɔ ka ŋmɔbɛ biɛn, ki biikɛ ni, ki gu tibuur ya wɛngbiin ya daali. <sup>7</sup> Liɛbe kɛ tiɛrɛ mɛn Sodɔm nin Gomɔr ya du nin idutɔ yà kɛpiɛkɛ yɛ nnɔ ya nib là tien' lisɔnsɔndl tɛn bitondb nnɔ ma nnɔ ya gbɛr. Bi tien' lisɔnsɔndl nɛ tɛ kɛndɛ' haali ki ji tɛ nuunh bɛ n li duɔndɛh nin tibont tà nin nisaal ŋa tɛ\*. Uwien là dɛrɛ' bi'tub, ki kuɔn' bɛ umu wà ŋa n kpiin ni. Nɛn nɛ wɔngɛh nà là li tu bibiɛrdɛnb.

<sup>8</sup> Bibiɛrdɛnb nnɔ mɔ teh tɛn bɛn nɛ. Bi pɛ bi'dɛknt bo nɛ ki sɔnh itùon yà kuɔndɛh bi'tiɛma gbɛnɛnt tijɔknt, ki yindɛh Uwien ya yonbdɛnt, ki sukreh nà kɛ ŋmɔbɛ ukɛpiɛkɛ paaki bó. <sup>9</sup> Uwien ya tondb ya ciɛn Misɛl mɔnɔn nin \*usɛnpol là kɔnh uyo wà Moyis ya gbɛnɛnt bo nnɔ wà là tuo' ki suke' ki biin' wɔ ama u là tɔke' wɔ ki ye: «Yonbdaan n dɛrɛ a'tub» baba nɛ. <sup>10</sup> Ama bibiɛrdɛnb nnɔ bɛn wɔn, bi sukreh ba bɛn nà nɛ, ki te tɛn ipiɛ, ki maaleh ki teh bi bɛn nà nnɔ mɔnɔn tulndɛh bɛ ki joh nɛ. <sup>11</sup> Nɛ bre bi'bo, kimɛ bi kpiɛn' Kayɛn là kpiɛn' usɛn wà nnɔ nɛ. Bi taa' bi'ba ki de' ilikɛ ya nuunm nɛ ki tùrɛ' tɛn Balam, ki yɛ' Uwien ya ñɔbu bó tɛn Kore là yɛ' ma bo, nɛ ki kpo'. <sup>12</sup> Ninbi Kristo yaab taan' nɛ ji tijier la, bi saake ni'ni tɛn tijɔknt nɛ ki saah ni'jiejin, ki jinh fuɔlfuɔl, fɛ ŋa ŋmɔbɛ bɛ, ki

\* **1:7** Tibont tà nin nisaal ŋa tɛ ya tingi te bolm mile bo nɛ: Uwien ya tondb bii tiwɛnt.

maaleh ben baba bó. Bi te ten utaa wà yin' ki bände' ki juore' nin kutafaaku ka nii' ne; ki te ten isiin yà ña lùonh haali i'lònlùonyo mənən, ki kpikre' ki lu', ki kpo' keke ne. <sup>13</sup> Bi sòn h ife ya tòn nē ki joh ten miñunciem ya ñungbegbel teh kujujuku miñunm ya gbe ma bo, ki te ten inmaabii yà cuonh ka ñmabe i joh nà bó. Uwien bonde' mifenm ki ble' be licinñunl ni be n li te len uyo wà ña ñmabe gbenm.

<sup>14</sup> Enək, wà là yé ti'yaaje nlole bo kí cin Adam ya bùol nnə, là səkñ' Uwien li tien bibierdenb nnə ma bo ki ye: «Li cengeh mən, Yonbdaan nin u'tondb turbenm li baa <sup>15</sup> kí lá bu binib ke tibuur; tibuur n cuo bibierdenb ke, bi sən' itùonbiere yà ke nnə nin bi len' u'bo imebil yà ke nnə bo.»

<sup>16</sup> Bi yé binib bà ñulnh uyo ke ne, ne bonn ke bonn ña dèkreh ben. Bi pe bi'yenm yie nà bo ne, ki lienh nin tìgbengt, ki təkhe binib tiñəñmaager, ki nuunh be n jonde bi'bo.

### *Igbiere*

<sup>17</sup> N'jotiebe, ninbi ben wən, tiere mən ti'Yonbdaan \*Yesu Kristo ya tondb là juə' ki təkhe' nē tigber tà nnə. <sup>18</sup> Bi là təkhe' nē ki ye: ufəforyo binib lá li lè nē, kí li pe bi'yenm yie nà bo, ka n li boh Wien. <sup>19</sup> Ben nē boreh binib, ki pe unisaal yie nà bo, ka ñmabe \*Fuoñaanm.

<sup>20</sup> N'jotiebe, ninbi ben wən, ni teke' Uwien ya gbeñaant tà nnə, ñi mən tun bo kí li joh inun bó, kí li kàareh wə \*Mifuoñaanm ya tuəm bo, <sup>21</sup> kí li tuu ki te Uwien ya yiem ni, ki gu ti'Yonbdaan \*Yesu Kristo n de nē limiel là ña ñmabe gbenm u'nimənt bo.

<sup>22</sup> Binib bà maaleh milele nnə, muə mən be micεεεkm. <sup>23</sup> Bitəb mə te ní ñen be umu ni be n ñmere. Ní muə bitəb mə micεεεkm ama kí li dèkreh ni'ba, ki la miεkeh bi'wengolkaar mənən, kime bi'tùon nnə kuən' tu'mə tijəknt ñə.

### *Li pèkeh mən Uwien*

<sup>24</sup> Uwien nē yé wà li fre kí li gu nē ni la lu' sen ke sen ni, ki li cère ní sere wən wà ñmabe ukpieke ya nun bó, kí li tuu ki ñmabe uyensange, ki la ñmabe biil. <sup>25</sup> Wən wà yé Uwenbaabe, ki yé ti'Ñmienl kí ñe ti'Yonbdaan \*Yesu Kristo bo nnə si ukpieke nin uyebn nin mituəm nin ufaa tibont ke bo uyo wà gèbre' nin fenfennə wuə nin uyo ke. Ami.

## Mikpiirm

### Nà wɔngɛh kugbɔnku kuu te ma bo

Bi kele' kugbɔnku kuu nɔ uyo wà bi là jèndeh Kristo yaab ki gbiekeh nɛ. Erom ya bɛrb là yíe bɛ ní li pukeh bɛ tɛn bi yé iwien nɛ. Kristo yaab biba là tuo' ki jènde' bi'tekjim bo, ama bitɔb ɲa là laa' fɛl ki jènde' bi'tekjim bo.

Tinɛnnɛnt nin tijinjint nɛ yɛbe kugbɔnku ku'ni. Tà yɛbe ɲɛn' ní Kujɔtiɛkpaaku ya gbɔnku ni nɛ. Inɔnbɛ nin misiɛm mɔ te ku'ni, ama nà kɛ ɲmɔbe ní ye nè ní ye bà nɛ. Nà teh nà bre kɛ taan' ki te miɲunciɛnm ni nɛ, nɛ utunwiɛn nɛ yé nà kɛ bre ya nɛnnɛnku.

Kugbɔnku kuu gbiire' ibɔkcɛnciɛn ile nɛ nin kugbɔnku bugbɛn ya tondm ya gber.

Libɔkkpiɛkl ni (1:1–3:22) bi lienh Kristo ya táan ilole yà te Asi ya tinɛnm ni nɔ ya gber nɛ.

Libɔkliɛl ni (iyul 4–20) wà kele' kù nɔ laa' tibont nɔ kɛ tidɛknt yaam nɛ. U wuɔn' ki ye Yesu Kristo nɛ yé Uwien ya Pebuk ki yé limiɛl ya daan ki ɲmɔbe mituɔm tibont kɛ bo.

Iyul 21–22 tɔkeh Uwien yíe wɔ ní ɲɛn tibonfɛnt tà nɔ ya gber nɛ.

<sup>1</sup> Tigber tà te kugbɔnku kuu ni nɔ yé tigbɛbɔlkaar tà Uwien tɔke' \*Yesu Kristo wɔ ní kpiire tù kí tɔke u'tonsɔnb tibont tà li tien na ní taande\* nɛ. Nɛ \*Yesu sɔn' Uwien ya tond wɔ ní tí tɔke u'tonsɔnl San tigber nɔ. <sup>2</sup> San laa' tibont tà kɛ nɔ u kun' imɔn ki ye \*Yesu Kristo nɛ wuɔn' wɔ tù, nɛ tù yé Uwien ya gber nɛ. <sup>3</sup> Tigber tà te kugbɔnku kuu ni nɔ ɲɛn' Uwien saan nɛ. Unil wà káanh tù binib ya nun bó nin bà cengeh tù ki boh tù nɔ, Uwien ya mɔnm te bi'bo, kimɛ uyo wà ni'kɛ li tien nɔ nɛkn' ní ɲɔ.

#### *San fuondɛh Kristo ya táan ilole yà te Asi ya tinɛnm ni*

<sup>4</sup> Min San nɛ kele' kugbɔnku kuu ki de' \*Kristo ya táan ilole yà te Asi ya tinɛnm ni nɔ. Uwien wà là te, ki biɛ ki te, ki we ní nɔ nin u'Fuoɲaanm† mà te u'berbiɛk saan nɔ ní juoke nɛ, kí de nɛ uyɛnduɔn. <sup>5</sup> \*Yesu Kristo wà yé umɔnkunmɔn, ki kpiɛ' ki mɛkre' bitɛnkpiib ni, ki yé uɲɛndun wuu ya bɛrb ya ciɛn nɔ mɔ ní juoke nɛ, kí de nɛ uyɛnduɔn. U yíe tɛ, nɛ ki taa' u'ba ki tien' lituɔrl,

ki ɲɛn' tɛ ti'biere ni,

<sup>6</sup> ki tien' tɛ biberb Uwien ya bɛl ni, ki cɛrɛ' ti yé u'Baa Uwien ya tɔtuɔrkaab. Wɔn si ukpiɛke nin mituɔm uyo kɛ. Ami.

<sup>7</sup> Liike mɛn, u te titɛwɔlgbɔnt ni ki we ní.

Unil kɛ ya nun li lɛ wɔ,

bà là cɔke' wɔ likpaanl nɔ mɔnɔn li lɛ wɔ,

wɔn bo nɛ inibol yà kɛ te utingbɛn bo nɔ

li muɔh ki kpiɛndɛh.

Ní yé imɔn nɛ. Ami.

<sup>8</sup> Yonbdaan Uwien ye:

«Min nɛ yé micincinm nin migbenm.»

Wɔn nɛ yé wà là te, ki biɛ ki te, ki we ní,

ki yé mituɔm kɛ ya daan.

#### *San laa' Yesu tidɛknt yaam*

<sup>9</sup> Min San n yé ni'ninjɛ nɛ. Min nin ninbi taan' ki jin' ijɛnd, ki ɲmɔbe kuminku \*Yesu bo, ki taan' ki yé biberb Uwien ya bɛl ni. Uwien ya gber nin n kundɛh imɔn \*Yesu bo ma nɔ, nɛ bi là taa' nni ki jon' lidekl là bi yih lɛ Patmos nɔ bo. <sup>10</sup> Yonbdaan ya daali, \*Mifuoɲaanm taa' nni, nɛ n cii' uniɛke uba bó u giere' ufaa bo n'puoli bó tɛn linatunl <sup>11</sup> ki

\* **1:1** Na ní taande ya ciim te bolm mile bo nɛ: Nà li tien itáan yíe bo bii nà ɲa ɲmɔbe pɛrm. † **1:4** Bi lɛbre' iɲɔbon yà ki ye u'Fuoɲaanm nɔ; † kele' Grɛkmbɛ ya lenm ni ki ye: Tibont tulole tà te Uwien ya berbiɛk saan nɔ nɛ.



ye: «Kele a laa' nà kugbɔnku ni, kí taa kù kí sɔn kí tĩ de \*Kristo ya táan ilole yà te Asi ya tinfɛnm ya du ilole ni nnɔ. Idu nnɔ si: Efɛs nin Siminn nin Pegam nin Tiyatiir nin Sadɛs nin Filadɛlfi nin Lawodise.»

<sup>12</sup> N jɛbe' n̄ liike udaan wà lienh nni. N jɛbe' ma nnɔ nɛ ki laa' miñðkm ya fr ilole, <sup>13</sup> ki laa' niba ifr nnɔ ya siik ni n̄ naan unisaal, ki guo liliɛfɔfɔkrl, ki buobe miñðkm ya ningbɛnl u'siik ni. <sup>14</sup> U'yur pien kpronkpron tɛn tikunkunt, nɛ u'nun muɔreh tɛn umupien. <sup>15</sup> U'táan windeh tɛn kukurku kù faa bi pule' kù umu ni kù mónde', nɛ u'niɛke mɔ tuoreh tɛn miñuncienm nɛ fuh. <sup>16</sup> U ɲuuke iɲmaabii ilole u'nɔjie bó, nɛ kijusiek kà fenbe ki ɲmɛ ikele kɛ ile nɔreh ki n̄eh u'n̄ɔbu ni. U'nun bó muɔreh tɛn liwenyul ya wien nɛ. <sup>17</sup> N laa' wɔ uyo wà nnɔ, nɛ ki lu' u'nintuɔli ki naan utenkpii. Nɛ u taa' u'nɔjie ki mɛ' nni, ki tɔke' nni ki ye: «La sɛn jɛwaanbu. Min nɛ yé ukpiɛk nin ufɔrke, <sup>18</sup> ki yé wà fuobe. N là kpo' nɛ, ama fɛnfɛnnɔ n fuobe nɛ uyo kɛ, ki ɲmɔbe mituɔm mikuum nin kutenkpiiiku kɛ bo. <sup>19</sup> Nɛn bo, kele a laa' nà, nɛn si: nà teh fɛnfɛnnɔ wuɔ nɔ nin nà lá li tien. <sup>20</sup> A laa' iɲmaabii ilole yà n'nɔjie bó nnɔ nin miñðkm ya fr ilole yà nnɔ yé tibont tà ya tingi buɔ nɛ. Tu'tingi si: iɲmaabii ilole nnɔ yé Uwien ya tondb bà gu Kristo ya táan ilole nnɔ nɛ‡. Ifr ilole nnɔ mɔ yé Kristo ya táan ilole nnɔ nɛ.»

## 2

### *Kele kugbɔnku ki de Kristo ya taanl là te Efɛs ya du ni nnɔ*

<sup>1</sup> «Kele kugbɔnku kí de Kristo ya taanl là te Efɛs ya du ni nnɔ ya cien kí ye wà ɲuuke iɲmaabii ilole u'nɔjie bó, ki cuonh miñðkm ya fr ilole ya siik ni nnɔ, nɛ len' ki ye: <sup>2</sup> «N bɛn a sɔnh itùon yà, ki bɛn a ñikndeh ma bo, ki ɲmɔbe kuminku, ki bɛn ki ye ɲa toh bibiɛrɛnb ya n̄ɔbu bó. N bɛn ki ye a sekn' binib bà yih bi'ba n'tondb ɲɔ ka yé bɛ nnɔ, ki bɛnde' ki ye bi yé bitonnɛndɛnb nɛ. <sup>3</sup> A ɲmɔbe kuminku, ki jin' ijɛnd n'bo, a'fɛl ɲa wɔre', <sup>4</sup> ama n li kɔn nin ɲɛ nibonn niba bo nɛ, kime ɲa ji yé nni tɛn a là cin' ki yé nni ma bo. <sup>5</sup> Tiɛre a là cin' ki ɲmɔbe miyíem mà ki yaan ki lu' nnɔ bó. Lèbre a'tetem kí liebe kí li sɔnh a là cin' ki sɔnh itùon yà nnɔ, nnɔ ɲa n̄í la, n li baa a'saan kí lá yuure a'frl li'sensienbùol. <sup>6</sup> Ama a ɲmɔbe kupɛnpɛku nibonn niba bo nɛ, kime a nɛn Nikola ya cɛkl ya nib\* ya tùon tɛn n'mɔ nɛn yé ma bo nɛ.

<sup>7</sup> «Wà ɲmɔbe litubl la, wɔ n̄ cii \*Mifuoñaanm tɔkeh Kristo ya táan ki teh bà. Wà kɛ mɔn' ki faake' la, n li cèbe wɔ, wɔ n̄ mɔ busubu bùa te Uwien den ki dienh limiel nnɔ ya bi.» »

### *Kele kugbɔnku ki de Kristo ya taanl là te Siminn ya du ni nnɔ*

<sup>8</sup> «Kele kugbɔnku kí de Kristo ya taanl là te Siminn ya du ni nnɔ ya cien kí ye wà yé ukpiɛk nin ufɔrke, ki là kpo' ki mɛkre' bitenkpiib ni nnɔ nɛ len' ki ye: <sup>9</sup> «N bɛn bi jèndeh nɛ ijɛnd yà nin ni'jiint, ama ni n̄n yé bifaaɛnb nɛ. N bɛn binib bà yih bi'ba \*Sufmbɛ ka n̄n ji kpe bɛn \*Sufmbɛ ya sɛn nnɔ sukreh nɛ isuk yà. Bi yé \*Satan ya taanl yaab nɛ. <sup>10</sup> La fɛnge mɛn ni li ji ijɛnd yà. Ni bɛn-ii! Usɛnpol li biike nɛ kí cère bɛ n̄ pɛkn ni'ni biba. Bi li jènde nɛ kí tĩ baa iwien piik. Bi li ku nɛ mɔnɔn la, li pɛ mɛn n'bo. N li su nɛ limiel là ɲa ɲmɔbe gbenm.

<sup>11</sup> «Wà ɲmɔbe litubl la, wɔ n̄ cii \*Mifuoñaanm tɔkeh Kristo ya táan ki teh bà. Wà kɛ mɔn' ki faake' la, wa n̄ kpo kí lere‡.» »

### *Kele kugbɔnku ki de Kristo ya taanl là te Pegam ya du ni nnɔ*

<sup>12</sup> «Kele kugbɔnku kí de Kristo ya taanl là te Pegam ya du ni nnɔ ya cien kí ye wà ɲmɔbe kijusiek kí fenbe ki ɲmɛ ikele kɛ ile nnɔ nɛ len' ki ye: <sup>13</sup> «N bɛn a kɔ nà saan nnɔ, \*Satan ya bɛrbiek mɔ te nɛn saan nɛ. Bi là ku' n'mònkunmòn Antipas ni'du ni nɛ. \*Satan kɔ wun

‡ **1:20** Bi li fre kí lèbre Uwien ya tondb bà gu Kristo ya táan ilole nnɔ kí ye Kristo ya táan ilole nnɔ ya cienb mɔ. \* **2:6** Kugbɔnku kuu baba nɛ lienh Nikola ya cɛkl ya nib bó. Licɛkl nnɔ là wɔknh miwɔknm mà ɲa kpe sɛn nɛ. Nil ɲa cinbe ki bɛn miwɔknm nnɔ ya tingi. † **2:11** Kí kpo kí lere ya tingi si: kí li tuu ki te umu wà ɲa n̄ kpiin ni kí lèbreh nɛ. Liike 21:8.

ni nɛ. Haali u ya yo mənən ɲa wiɛ' a'tekjim, a juore' ki pɛ n'bo nɛ. <sup>14</sup> Ama n li kən nin ɲɛ nibonwawaann niba bo nɛ, kimɛ ni'ni biba pɛ Balam ya wəknm bo nɛ. Wən nɛ là gbiere' Balak u li tien ma kí tuln Israyel \*yaab bɛ ɲ ɲmən titətuərnənt, kí tien lisənsəndl. <sup>15</sup> Nikola ya cɛkl ya nib mə wəknh mi ya wəknbaabm nɛ, nɛ ni'ni bi'ba pɛ mi'bo. <sup>16</sup> Nɛn bo, lèbre a'tetem, nnə ɲa ɲí la, n li baa a'saan nà ɲ taande, kí taa kijusiek kà te n'ñəbu ni nnə kí tə nin binib nnə butəbu.

<sup>17</sup> <Wà ɲməbe litubl la, wə ɲ cii \*Mifuoñaanm təkɛh Kristo ya táan ki teh bà.

<Wà kɛ mən' ki faake' la, n li de wə tijier tà buə bi yih tù \*mann‡ nnə, kí de wə litɛnpenpienl liba bi kɛle' li'bo liyefənl. Wà teke' litɛnl nnə baba ɲa ɲí la, uba ɲa bɛn liyel nnə.> »

### *Kɛle kugbənku kí de Kristo ya taanl là te Tiyatiir ya du ni nnə*

<sup>18</sup> «Kɛle kugbənku kí de Kristo ya taanl là te Tiyatiir ya du ni nnə ya ciɛn kí ye Uwien ya Bijɛ wà ya nun muəreh tɛn umupien, u'taan windeh tɛn kukurku kù faa bi pule' kù umu ni kù mɔnde' nnə, nɛ len' ki ye: <sup>19</sup> <N bɛn a sənɲ itùon yà nin a ɲməbe miyíem mà, ki bɛn a ɲməbe mitekjim mà, ki bɛn a toreh binib ma bo nin a ɲməbe kuminku kù. Fɛnfennə a sənɲ itùon yà yɛbe ki cɛn' mikpiɛkm yɛ. <sup>20</sup> Ama n li kən nin ɲɛ nibonn niba bo nɛ, kimɛ a cère' SesabelŒ, upii wà yih u'ba \*Uwien ya ɲəbonsəknl nnə tulndeh n'tonsənb ki wəknh bɛ bɛ ɲ li teh lisənsəndl, ki li ɲmənɲ titətuərnənt. <sup>21</sup> N de' wə libənl wə ɲ lèbre u'tetem, ama wa yíe wə ɲ lèbre u'tetem kí wiɛ u'sənsəndl nnə. <sup>22</sup> Nɛn bo, wən nin binib bà pɛ u'bo ki teh lisənsəndl nnə ɲa lèbre' bi'tetem ki dàan' itùon nnə la, n li cère bɛ ɲ ji ijend kí gbien, <sup>23</sup> kí cère bà pɛ u'bo nnə ɲ kpo ɲə Kristo ya táan kɛ ɲ bɛnde kí ye min nɛ bɛn nà te unisaal ya fɛl ni. N li jiiin ni'ni wà kɛ u'tùon kpɛ ma bo nɛ.

<sup>24</sup> <Ninbi bà te Tiyatiir ya du ni, ka pɛ Sesabel ya wəknm bo, ka bɛn bi nɛndeh ki yih nà «\*Satan ya bonbəlkaar nnə», n təkɛh ninbi nɛ ki teh ma ɲ wəbn nɛ kí de nɛ tuktəl kí pukn. <sup>25</sup> Ama li ɲuuke mɛn ni ɲməbe nà nnə mənɲmɲm kí tɪ baa lidaali là n li baa ní. <sup>26</sup> Wà mən' ki faake', ki pɛ n'tùon bo ki tɪ fəre' la, n li de wə ticiɛnt inibol kɛ bo, <sup>27</sup> wə ɲ li ɲuuke bɛ nin ufaa, ki la ɲməbe nunsənge bi'bo, kí niin bɛ bɛ ɲ tɪ we tɛn isən. <sup>28</sup> N'Baa de' nni mituəm ma nnə n'mə li cère wà mən' ki faake' ɲ li windeh tɛn litɛnɲɛɲmaasel nɛ\*.

<sup>29</sup> <Wà ɲməbe litubl la, wə ɲ cii \*Mifuoñaanm təkɛh Kristo ya táan ki teh bà.> »

## 3

### *Kɛle kugbənku kí de Kristo ya taanl là te Sades ya du ni nnə*

<sup>1</sup> «Kɛle kugbənku kí de Kristo ya taanl là te Sades ya du ni nnə ya ciɛn kí ye wà likeh Uwien ya Fuoñaanm\*, ki ɲuuke inɲmaabii ilole nnə nɛ len' ki ye: <N bɛn a sənɲ itùon yà. Binib lienɲ ki teh a fuobe nɛ ama a kpo' ɲə. <sup>2</sup> La gəh, gore ɲə bà ya tekjim bɛnh mɛ ɲ gben nnə la tonde, kimɛ n laa' a'tùon ɲa mən ki gben' n'Wien ya nun bó. <sup>3</sup> Nɛn bo, tiere bi là wəkn' ɲɛ miwəknm mà nnə bó nin a là cii' mɛ ma bo. Li ɲuuke mɛ, kí lèbre a'tetem ki la gəh. A gəh la, n li baa a'saan tɛn unasu nɛ, ɲa ɲ bɛnde uyo wà n li baa ní. <sup>4</sup> Ama a'nib biba te Sades ya du ni, ka kuən' bi'ba jəknt. Bɛn nɛ li təkɛ nin nni kí li guo tikpɛlcɛpenpien, kimɛ bi kpɛ nnə nɛ. <sup>5</sup> Nnə nɛ wà mən' ki faake' li gole tikpɛlcɛpenpien. Ma ɲ ɲmire u'yel limiɛl ya gbənku ni fiebu. N li len n'Baa Uwien nin u'tondb ya nun bó kí ye u yé n'yə nɛ.

<sup>6</sup> <Wà ɲməbe litubl la, wə ɲ cii \*Mifuoñaanm təkɛh Kristo ya táan ki teh bà.> »

### *Kɛle kugbənku kí de Kristo ya taanl là te Filadɛlfi ya du ni nnə*

<sup>7</sup> «Kɛle kugbənku kí de Kristo ya taanl là te Filadɛlfi ya du ni nnə ya ciɛn kí ye wà yé uñaan,

‡ **2:17** Mann yé tijier tà Uwien là de' tù Israyel yaab kupenpelku ni nnə nɛ. Mann wà buə li fre kí li yé tijier tà Uwien dienɲ tù binib kí ɲɛ Yesu Kristo bo. Liike San 6:49-51. § **2:20** Niɛ saan bi ye Sesabel ma nnə, bi niireh unil wà yíe Uwien ya ɲəbu bó nɛ. \*

**2:28** Bi ye litɛnɲɛɲmaasel la, bi niireh Yesu Kristo nɛ. Liike 2 Pier 1:19. \* **3:1** Liike 1:4.

ki yé ugbemàndaan,  
 ki ñmabe \*Dafid ya dupien,  
 ki pñire' bunañabu la,  
 uba ña ní fre kí piin bù,  
 u tí piin' mɔ la,  
 uba ña ní fre kí pñire nnɔ,  
 ne len' ki ye:

<sup>8</sup> «N ben a sɔnh itùon yà, ki ben ki ye a'tuom ña yebe. Nin nen ke a ñuuke n'gber, ka ye ña ben nni. Nen bo ne n pñire' ñe bunañabu ki yaan', uba ña ní fre kí piin bù. <sup>9</sup> Liike-a! N li cèbe ñe \*Satan ya taanl yaab. Bi nendeh ki teh bi yé \*Sufmbɛ ne ka yé. N li wɔbn be be ní baa kí lá gbaan a'nintuɔli, kí bende kí ye n yíe ñe. <sup>10</sup> A juore' ki ñmabe kuminku kùà n là ye á li ñmabe kù nnɔ ma nnɔ, n'mɔ li lèkn a'bo ijend yà li baa utingben ya nib ke bo kí biike be nnɔ ya yo. <sup>11</sup> N li baa ní na ní taande. Li ñuuke a ñmabe nà nnɔ kenken ñɔ uba la lá teke a'suul. <sup>12</sup> Wà ke mɔn' ki faake' la, n li cère wɔ ní li yé unikpɛkpiɛk n'Wien ya duku ni. Wa ji li ñe len fiebu. N li cère wɔ ní li yé n'Wien yɔ, kí le n'kpíeke, kí li ñmabe n'yefɛnl, kí li yé n'Wien ya du Yerusalemfaan wà li ñe u'saan paaki bó kí jiire ní nnɔ ya nil.

<sup>13</sup> «Wà ñmabe litubl la, wɔ ní cii \*Mifuoñaanm tɔkeh Kristo ya táan ki teh bà.» »

#### *Kɛle kugbɔnku ki de Kristo ya taanl là te Lawodise ya du ni nnɔ*

<sup>14</sup> «Kɛle kugbɔnku kí de Kristo ya taanl là te Lawodise ya du ni nnɔ ya cien kí ye bi yih wà «Ami», u yé umànkunmɔn, ki yé ugbemàndaan, ki yé Uwien cère' wà ñen' tibont ke nnɔ, ne len' ki ye: <sup>15</sup> «N ben a sɔnh itùon yà, ki ben ki ye ña sange, ka ton mɔ; a bi li fre kí li sange bii kí li ton. <sup>16</sup> Ama ña ton, ka sange mɔ, a te mɛlmɛl ne. Nen bo ne n li sii ñe. <sup>17</sup> A lienh ki teh a yé ufàadaan ne, ki laa' lifaal li yebe, bonn ña pɔre' ñe, ka ben ki ye a yé ucɛɛkdaan, ki yé unɛndaan, ki yé ujuɔn, ki se licɛnkpenlonlonl. <sup>18</sup> Nen bo ne n gbierɛh ñe á de n'saan miñɔkm mà bi donde' mɛ umu ni mi windeh ñɔ kí li yé ufàadaan, kí de n'saan tikpɛlcɛpient kí gole ñɔ bi la le a'fɛ. Kí de n'saan minunkpɔm kí tien a'nun kí likre. <sup>19</sup> N yíe bà ke nnɔ, n gbierɛh be ne ki dieh bi'tub. Nen bo, cère' a'nun ní li mɔn á lèbre a'tetem. <sup>20</sup> Liike mɛn, n se bunañabu ni ne ki bàandeh. Wà ke cii' n'bó ki pñire' la, n li kɔ u'den min nin wɔ ní taan kí ji. <sup>21</sup> Wà ke mɔn' ki faake' la, n li de wɔ usɛn, wɔn ní kɛle kibɛrbiek bo n'yaak saan, ten n'mɔ mɔn' ki faake' ma, ki kɛle' kibɛrbiek bo n'Baa Uwien yaak saan nnɔ.

<sup>22</sup> «Wà ñmabe litubl la, wɔ ní cii \*Mifuoñaanm tɔkeh Kristo ya táan ki teh bà.» »

## 4

#### *San laa' Uwien ya bɛrbiek tideknt yaam*

<sup>1</sup> Ni ya puoli bó ne n laa' tideknt yaam bunañabu buba ye paaki bó, ne n bi cii' udaan wà ya nieke bó mikpiɛkm nnɔ giere' ufaa bo ten linatunl ki ye: «Dùo ní ní wuɔn ñe nà we ní nè ní tien.» <sup>2</sup> I ya tàan bo ne \*Mifuoñaanm taa' nni, ne n laa' kibɛrbiek kiba se paaki bó, uba ke ki'bo. <sup>3</sup> Wà ke ki'bo nnɔ windeh ten iten yà bi yih yè jaspi nin saduwann i'daaku faa\* nnɔ ne. Kugɔnguɔku kuba guɔn' ki linde' kibɛrbiek nnɔ ki windeh ten litenl là bi yih lè emolod † nnɔ. <sup>4</sup> Mubɛrbieumu pile nin munan mɔ se ki guɔn' kè. Bicienb pile nin binan mɔ ke mubɛrbieumu nnɔ bo, ki guo tiwɛnpenpient, ki kpíe miñɔkm ya yukpiɛkpíe. <sup>5</sup> Kibɛrbiek nnɔ ya bùol muɔreh piɛbpiɛb ten utemɛknde. Kuwaaku mɔ ñeh ki'saan ten utaa ne tengɛh. Timucincint tulole te ki'nun bó tùoo. Timucincint nnɔ yé Uwien ya Fuoñaanm‡ ne. <sup>6</sup> Kibɛrbiek nnɔ ya nun bó ní naan miñuncienm ne, ki wien tein ki likeh ki càareh ten lidingl.

\* 4:3 Jaspi nin saduwann yé iten ya yel ne Jaspi yé litenl là windeh ne, ne saduwann yé litenl là mɔn. † 4:3 Emolod yé litenl là bɔn ten tifer ne. ‡ 4:5 Liike 1:4.

Tiwɛnfuobt tunan nɛ guɔn' kibɛrbiɛk nnɔ siik ni. Tu'nun bɔ nin tu'puoli kɛ yɛ inunbii nɛ ñɛin. <sup>7</sup> Kiwɛnkpiɛk naan ucind nɛ, kiliek naan unajɛ, kitaak ya nun bɔ naan unil ya nun bɔ, nnan naan ukaab nɛ laanh. <sup>8</sup> Tiwɛnfuobt tunan nnɔ kɛ ηmɔbe ifiɛbe iloluob nɛ, ki ηmɔbe inun ifiɛbe nnɔ bo ñɛin, paaki nin tingi kɛ. Nɔnku nin wien ni tɔ tuu ki gɛh iyuon nɛ ki teh:

«Uñaan, uñaan, uñaan,  
Yonbdaan Uwien mituɔm kɛ ya daan nɛ yɛ uñaan.

Wɔn nɛ là te, ki biɛ ki te, ki we ní mɔ.»

<sup>9</sup> Uyo kɛ tiwɛnt nnɔ gɛh iyuon nɛ ki kpiɛkreh wà kɛ kibɛrbiɛk bo nnɔ, ki ñɛngɛh wɔ, ki faareh wɔn wà fuobe uyo kɛ nnɔ. Tɔ gɛh uyo wà la, <sup>10</sup> biciɛnb pile nin binan nnɔ gbaandeh wà kɛ kibɛrbiɛk bo nnɔ ya nun bɔ ki pukeh wɔ, ki kpiɛkreh wɔn wà fuobe uyo kɛ nnɔ, ki kpɛreh bi'yukpɛkpiɛ ki blinh kibɛrbiɛk nnɔ ya nun bɔ ki teh:

<sup>11</sup> «Yonbdaan Uwien,  
sin nɛ kpɛ bɛ ní kpiɛke ηɛ, kí ñɛngɛ ηɛ, a ηmɔbe mituɔm,  
kime sin nɛ ñɛn' tibont kɛ,  
a yíe tɔ ní li te nɛ,  
ki ñɛn' tɔ.»

## 5

### *Bi konkonde' kugbɔnku kɔ̀a nin Uwien ya Pebuk nnɔ ya gɛr*

<sup>1</sup> N tí laa' wà kɛ kibɛrbiɛk bo nnɔ ηuuke kugbɔnku u'nɔjie ni, kù konkonde'. Bi kele' kugbɔnku nnɔ ya kele kɛ ile bo nɛ, nɛ ki taa' isiwɛl ki tɛntɛbn' ki tí dukn' bolm milole. <sup>2</sup> Nɛ n laa' Uwien ya tonɔtɔdaan uba, u kpaandeh ufaa bo ki teh: «ηmɛ kpɛ wɔ ní tɛbre isiwɛl nnɔ kí pɛ̀re kugbɔnku kuu nɔ?» <sup>3</sup> Ama nil ηa te taaku bo bii tink bo bii dɛntingi, kí fre kí pɛ̀re kugbɔnku nɔ kí liike ku'ni. <sup>4</sup> Nɛ n muɔ' cɛɛn, kime nil ηa te ki kpɛ wɔ ní pɛ̀re kugbɔnku nnɔ kí liike ku'ni. <sup>5</sup> Nɛn saan nɛ biciɛnb nnɔ ya uba tɔke' nni ki ye: «La muɔh. Liike, wà yɛ Suda ya bol ya cind, ki yɛ \*Dafid ya yaabil nnɔ mɔn' ki faake'. Wɔn nɛ li tɛbre isiwɛl ilole nnɔ, kí pɛ̀re kugbɔnku nnɔ.»

<sup>6</sup> Nɛ n laa' Kipebuk kiba se ki nɛke kibɛrbiɛk nnɔ, tiwɛnfuobt tunan nnɔ nin biciɛnb nnɔ ya siik ni. Kipebuk nnɔ ηmɔbe igbiɛn yà wɔngɛh ki teh bi ku' kɛ nɛ. Kí ηmɔbe iyin ilole nin inun ilole nɛ. I yɛ \*Uwien ya Fuoñaanm mà u sɔn' mɛ utingbɛn bo ni'kɛ saan nnɔ nɛ. <sup>7</sup> Kí jon' wà kɛ kibɛrbiɛk bo nnɔ saan, ki teke' kugbɔnku nnɔ u'nɔjie ni. <sup>8</sup> Kí teke' kugbɔnku nnɔ uyo wà nnɔ, nɛ tiwɛnfuobt tunan nin biciɛnb pile nin binan nnɔ gbaan' kí nintuɔli. Wà kɛ ηuuke kubɛku nin miñɔkm ya sɛn nɛ, í gbe lɛfina. Isɛn nnɔ yɛ Uwien ya nib ya kaare nɛ. <sup>9</sup> Bi gɛh iyuonfaan ki teh:

«Sin nɛ kpɛ á teke kugbɔnku kuu nɔ,  
kí tɛbre isiwɛl nnɔ,  
kime bi ku' ηɛ, nɛ a'sɛm bo a dɛ'  
inibol yà kɛ te utingbɛn bo ki lienh ilenbol kɛ nnɔ  
ki dɛ' Uwien.

<sup>10</sup> A tien' bɛ bibɛrb Uwien ya bɛl ni,  
ki cɛ̀re' bi yɛ ti'Wien ya tɔtuɔrkaab,  
ki li likeh binib bà kɛ te utingbɛn bo nɔ.»

<sup>11</sup> N biɛ ki likeh ma nnɔ, nɛ ki cii' Uwien ya tonɔb ya ñɔfaam bɔ. Bi te itur itur ka ηmɔbe káanm, ki se ki guɔn' kibɛrbiɛk nnɔ nin tiwɛnfuobt nnɔ nin biciɛnb nnɔ, <sup>12</sup> ki gɛh iyuon ufaa bo ki teh:

«Kipebuk kà bi ku' kɛ nnɔ nɛ kpɛ kɛ ní li ηmɔbe mituɔm nin lifaal  
nin miyɛnfuom nin ufaa.  
Kɛn nɛ kpɛ bɛ ní ñɛngɛ kɛ,  
kí kpiɛke kɛ,  
kí pɛ̀ke kɛ.»

<sup>13</sup> Nε n tí cii' Uwien ñen' tibont tà kε tù te kutaaku bo nin tà te kitink bo nin tà te dεntingi nin tà te miñunciεnm ni nnε kε gεh iyuon ki teh:

«Wà kε kibεrbiεk bo nin Kipebuk nnε,  
bεn nε si kupεnpεku nin miñεgm nin ukpiεke  
nin ufaa uyo kε.»

<sup>14</sup> Nε tiwεnfuobt tunan nnε tuonh ki teh: «Ami.» Nε biciεnb nnε mε gbaandeh ki pukeh wà kε kibεrbiεk bo nin Kipebuk nnε.

## 6

### *Uwien ya Pebuk nnε tεbre' kugbεnku nnε ya siwεl iluob*

<sup>1</sup> N biε ki likeh tidεknt yaam, uyo wà Uwien ya Pebuk nnε tεbre' isiwεl ilole nnε ya kpiεkl nnε, nε n cii' tiwεnfuobt tunan nnε ya kiba wuure' utεtiεn yaam ki ye: «Dεn!» <sup>2</sup> Nε n liike' ki laa' utεnpien uba. Wà jεke wε nnε ηuuke butεnbu. Bi de' wε wà mεn' ki faake' ya yukpεkpiε. Wεn nε mεn' ki faake' nε u bure' wε rí tí rí tí mε kí faake.

<sup>3</sup> Kipebuk nnε tεbre' lisiwεliεl uyo wà nnε, nε n cii' kiwεnfuobk nle len' ki ye: «Dεn!»

<sup>4</sup> Nεn saan nε utεnmón tohin ñen'. Bi de' wà jεke wε nnε usεn wε rí cère butεbu rí tien utingbεn bo ηε binib rí li kuuleh tεb, ki de' wε kijusieciεnciεnk kiba.

<sup>5</sup> Kipebuk nnε tεbre' lisiwεl nta uyo wà nnε, nε n cii' kiwεnfuobk nta len' ki ye: «Dεn!» Nε n liike' ki laa' utεnbεn. Wà jεke wε nnε ηuuke kilo u'nuε ni. <sup>6</sup> Nε n cii' niba len' tεn unil tiwεnfuobt tunan nnε ya siik ni ki ye: «Tijier ηa rí li sεbe, nε bi li taa liwentunηmεnl ya paaku nε kí dε imuu kilo uba, kí taa liwentunηmεnl ya paaku kí dε iji kilo uta. Ama a la mε mikpεm nin midaam.»

<sup>7</sup> Kipebuk nnε tεbre' lisiwεl nnan uyo wà nnε, nε n cii' kiwεnfuobk nnan len' ki ye: «Dεn!» <sup>8</sup> Nε n liike' ki laa' utεnnagbok, bi yih wà jεke wε nnε mikuum. Kutεnkpiiku cuonh ki pε u'bo. Bi de' bε ufaa kitink ya gbiirm minan bo bε rí li kuuleh binib nin kijusiek, kí cère mikδnm nin iwienbiεre yà puonh nin kumuεku ni ya wεnbr mε rí li kuuleh binib.

<sup>9</sup> Kipebuk nnε tεbre' lisiwεl nηun uyo wà nnε, nε n laa' binib bà là tuo' Uwien ya gbεr, ki kun' tu'bo imεn ηε bi ku' bε nnε ya naanmu liponpuol ya tingi. <sup>10</sup> Nε binib nnε wuureh ufaa bo ki teh: «Cεnbaa, sin wà yé uñaan, ki yé ugbεmεndaan nnε, nǐ li wuεke kí tí kpaan mila bo kí yaan á bu utingbεn bo ya nib bà ku' tε nnε tibuur, kí teke ti'bo kí dεre bi'tub-i?»

<sup>11</sup> Nε bi de' bi'ke tiliεrpenpiεnt, ki tεke' bε ki ye bεn biε kí li fuoreh ηε nε rí pukn waamu, kimε bi li ku kí tonde bi'ninjieβ bi'tonsεnlieb bà bi bi li ku bε tεn bεn nnε nε kí yaan.

<sup>12</sup> Kipebuk nnε tεbre' lisiwεl nluob, nε kitink jεnge' ki gbien', uwien bεnde' dikdiki, uηmaal mόνde' u'kεkε tεn misεm. <sup>13</sup> Injmaabii cienh paaki bó ki lá luh kitink bo tεn kutafaabiiku nε yδkreh ikεnkεnkaab. <sup>14</sup> Kutaaku gbendeh ki joh tεn bi kondεh kugbεnku nε, ijuεn nin idek kε lélεbre' isensien. <sup>15</sup> Nε utingbεn bo ya bεrb nin biciεnb nin sojambe ya cienb nin bifáadεnb nin bifεfaab nin iyonbe nin bà ηa yé yonbe kε bεle' tijεlulnt nin ijεtεn ni, <sup>16</sup> ki tεkeh ijuεn nin itεn ki teh:

«Lu mεn ti'bo ki bεle' tε,  
ηε wà kε kibεrbiεk bo nnε la likeh tε,  
Kipebuk nnε mε ya benpiebe la tu tε.

<sup>17</sup> Kimε bi'benpiebcien ya daali baa' ní ηε!  
Nηε li fre kí sere bi'nun bó?»

## 7

### *Uwien cère' bi dieke' u gènde' binib bà nnε*

<sup>1</sup> Ni ya puoli bó nε n tí laa' tidεknt yaam Uwien ya tondb binan se kitink ya keke kε inan, ki cō ikεle inan nnε ya tafaam ηε tafaam la ji rí jo tink nin ñunciεnm nin subu bo.

<sup>2</sup> N liebe' ki laa' utondtε ñen' liwenpurl bó ní, ki ηuuke Uwien limiεl ya daan taah nà ki diekeh u'nib nnε. U yin' Uwien ya tondb binan bà Uwien de' bε ufaa bε rí tien kitink nin

miñunciem nà bre nnə ufaa bo <sup>3</sup> ki tək'e' be ki ye: «Cuo men ni'ba, laan la tien men tink nin ñunciem nin subu nà bre. Cère men tí tien ti'Wien ya dǽku u'nib ya yutun bo kí yaan.» <sup>4</sup> Ne n cii' bi tien' Uwien ya dǽku binib bà bo nnə ya ñəbu. Bi te binib itur kobk nin pinan nin inan ne, ki ñen' Israyel yaab ya baamul ke ni ní. <sup>5</sup> Bi dieke' bà nnə ben si:

Suda ya baamul ni binib itur piik nin ile,  
Lubenn ya baamul ni binib itur piik nin ile,  
Gaad ya baamul ni binib itur piik nin ile,  
<sup>6</sup> Aser ya baamul ni binib itur piik nin ile,  
Neftali ya baamul ni binib itur piik nin ile,  
Manase ya baamul ni binib itur piik nin ile,  
<sup>7</sup> Simeyon ya baamul ni binib itur piik nin ile,  
Lefi ya baamul ni binib itur piik nin ile,  
Isaka ya baamul ni binib itur piik nin ile,  
<sup>8</sup> Sabulon ya baamul ni binib itur piik nin ile,  
Yosef ya baamul ni binib itur piik nin ile,  
Bensamen ya baamul ni binib itur piik nin ile.

### *Inibol ke ya nib taan' Uwien nin Kipebuk ya nun bó*

<sup>9</sup> Ni ya puoli bó ne n tí liike' ki laa' kuniwulku kuba; nil ɲa ní fre kí kàan kí cuo bi'ñəbu. Bi ñen' inibol ya ke te uɲendun wuu ni, ki lienh ilenbol ke nnə ni ne, ki se kiberbiek nin Kipebuk nnə ya nun bó, ki guo tiliɛrpenpient, ki ɲuuke mubiɛbisiimu ya fer, <sup>10</sup> ki wuureh ufaa bo ki teh: «Ti'Wien wà ke kiberbiek bo nin Kipebuk ne ɲmiɛndeh te.» <sup>11</sup> Ne Uwien ya tondb ke se ki guon' kiberbiek nin biciɛnb nin tiwɛnfuobt tunan nnə, ne ki gbaan' ki dondeh Uwien, <sup>12</sup> ki teh: «Iməɲ, ti'Wien ɲməbe mituəm nin miyɛnfuom nin ufaa. Nen bo tí li pèkeh wə, kí li kpiɛkreh wə, kí li faareh wə, kí li ñengeh wə uyo ke. Ami.»

<sup>13</sup> Ne biciɛnb nnə ya uba niire' nni ki ye: «Binib bà guo tiliɛrpenpient nə, bi yé ɲmembɛ? Bi ñen' la?» <sup>14</sup> Ne n jiin' wə ki ye: «N'Yonbdaan, sin ne ben.» Ne u ye: «Bi yé binib bà bi jènde' be ki gbien' ne. Bi sək're' bi'liert Kipebuk nnə ya sɛm ni ne tù pende'.

<sup>15</sup> Nen bo ne bi se  
Uwien ya berbiek ya nun bó,  
ki sənɲ itùon ki dienh wə u'duku ni ñonku nin wien ni.  
Ne wà ke kiberbiek bo nnə li lèkn bi'bo.

<sup>16</sup> Kònm ɲa ji li cuo be,  
ñuñun ɲa ji li cuo be,  
kuwienku ya wəl mənən ɲa ji li se be.

<sup>17</sup> Kimɛ Kipebuk kà te kiberbiek saan nnə  
ne li liike be kí taa be  
kí jo liñunbunl là ya ñunm dienh limiel saan.  
Ne Uwien li ɲmire bi'nunsiir ke.»

## 8

### *Uwien ya Pebuk tɛbre' kugbɔnku nnə ya siwɛl nlole*

<sup>1</sup> Uwien ya Pebuk nnə tɛbre' lisiwɛl nlole uyo wà nnə, ne paaki ya bont ke ɲmile' cim ní wuəke' ki tí kpaan' ten miire pita. <sup>2</sup> Ne n laa' Uwien ya tondb bilole bà te u'nun bó ki sənɲ u'tùon nnə, bi de' be inatun ilole.

<sup>3</sup> Ne utondtə mə baa' kí lá sere liponpuol saan ki ɲuuke bi sienh liɲubl miñəkm ya sèn ya ni nnə ya liba. Bi de' wə liɲubl lí yebe wə ní se, kí taan nen nin Uwien ya nib ya kaare kí de Uwien miñəkm ya ponpuol là te u'berbiek ya nun bó nnə bo. <sup>4</sup> Liɲubl nnə ya muñii nin Uwien ya nib ya kaare ñeh utond nnə ya nuə ni, ki fih paaki bó Uwien ya nun bó. <sup>5</sup> Ne Uwien ya tond nnə taa' liɲubsɛnl nnə, ki pɛre' umu liponpuol nnə bo, ki gbien' lè, kí taa' kí wie' kitink bo. Ne utaa məkndeh, kí tengeh, kuwaaku te cɛen, ne kitink mə jènge'.

*Inatunkpiek inan ya piebm*

<sup>6</sup>Uwien ya tondb bilole bà ñuuke inatun ilole nnò bonde' bέ rí piebe.

<sup>7</sup>Ukpiek piebe' u'natunl, nέ bi taa' itέtέn ki taan' nin umu nin misέm ki wiέ' kitink bo. Nέ kitink ya gbiirm mita ya miba wɪ́n', isiin mɔ́ ya gbiirm mita ya miba wɪ́n', nέ timɔ́sɔ́ngt kέ mɔ́ wɪ́n'.

<sup>8</sup>Ulie mɔ́ piebe' u'natunl, nέ bi taa' nibonn niba ki wiέ' miñunciέnm ni nɪ́ yέbe tέn lijuɔ́l ki teknh umu. Miñunm nnò ya gbiirm mita ya miba kpende' misέm. <sup>9</sup>Nέ tibont tà fuobe mi'ni nnò ya gbiirm mita ya miba kpo'. Iñerde ya gbiirm mita ya miba mɔ́ wewe'.

<sup>10</sup>Nta mɔ́ piebe' u'natunl, nέ liñmaabicenciέnl liba teknh umu ki te tέn kumucincinku ki ñέn' paaki bó ní ki lá lu' ikpen nin iñunbun ni. <sup>11</sup>Bi yih liñmaabil nnò «Tilɔ́br» nέ. Lí lu' miñunm mà ni nnò ya gbiirm mita ya miba kpende' tilɔ́br. Nέ binib bà yέbe ñun' ki kpo', kimέ mɪ́ ji yé tilɔ́br nέ.

<sup>12</sup>Nnan mɔ́ piebe' u'natunl, nέ uwien nin uñmaal ya gbiirm mita ya miba saa' nέ ni' bó biike'. Inmaabii ya gbiirm mita ya miba mɔ́ saa' nέ ni'mɔ́ bó biike'. Nnò nέ uwien ni ya gbiirm mita ya miba ña ji wien, kuñonku mɔ́ ya gbiirm mita ya miba mɔ́ ña ji wien.

<sup>13</sup>Nέ n laa' ubέnwien uba laanh mitέwɔ́lkpɔ́m, ki cii' u wuureh ufaa bo ki teh: «Nɪ́ li bre binib bo, nɪ́ li bre binib bo, uyo wá Uwien ya tondb bita bà sɪ́en' nnò li piebe bi'natun nnò, nɪ́ li bre binib bo.»

*Linatunl nñun ya piebm***9**

<sup>1</sup>Uwien ya tond nñun mɔ́ piebe' u'natunl, nέ n laa' liñmaabil liba cere' kutaaku bo ní ki lá lu' kitink bo. Nέ bi de' lè kubùoku kùà ñò ka ñmɔ́be biέn\* nnò ya nañɔ́bu ya pien.

<sup>2</sup>Lí piire' kubùoku nnò ya nañɔ́bu, nέ imuñii iba ñέn', ki naan tέn bi puuh timaar nέ, ki biike' uwien, nέ ni'kέ saan biike' cɪ́nm. <sup>3</sup>Nέ inacutuɔ́n ñέn' imuñii nnò ni ki gbe utingben bo. Bi de' yɪ́ mituɔ́m yɪ́ rí li jundeh nɪ́ wi tέn inέn. <sup>4</sup>Nέ ki pien' yɪ́, í la mέ muɔ́r, ki la mέ sisɔ́nkt, ki la mέ subu buba nin butɔ́bu, ama yɪ́ rí li jundeh binib bà ña ñmɔ́be Uwien ya ðiέku bi'yutun bo nnò baba. <sup>5</sup>Ba de' yɪ́ sέn yɪ́ rí li kuuleh binib nnò ama yɪ́ rí li jèndeh bέ kí tí baa inmaale inñun. Ijέnd nnò wi tέn unέn ya luol nέ. <sup>6</sup>I ya ðέn, binib li nuunh mikuum, ka rí lέ mέ. Bi li nuunh bέ rí kpo ama mikuum li tiinh bέ nέ.

<sup>7</sup>A laa' inacu nnò la, a li ye itaan yà bi bonde' yɪ́ bέ rí taa kí jo lituɔ́l nέ. I'yul bo te tέn bi kpele' yɪ́ miñòkm ya yukpekpie nέ, i'nun bó mɔ́ te tέn unisaal ya nun bó. <sup>8</sup>Tiyur te i'yul bo ki naan tipiiyur, nέ i'ñin mɔ́ naan ucind yέ. <sup>9</sup>Nibonn niba lieke i'fèl bo ki naan tikur. I'fiέbe ñmɔ́be kuwaaku tέn itaan nέ tuke titέnlolt ki tiinh ki joh lituɔ́l. <sup>10</sup>I'juun mɔ́ naan inέn ya juun nέ, ki tí fɔ́re' nin mupienmu. Liluol là í li taah ki jèndeh binib kí tí baa inmaale inñun nnò te yέn ni nέ. <sup>11</sup>Kubùoku kùà ñò ka ñmɔ́be biέn nnò ya tond nέ yé i'ber. \*Sufmbέ ya lenm ni, bi yih utond nnò Abadɔ́n nέ, ki yih wɔ́ Apoliyɔ́n† Grέkmbέ ya lenm ni.

<sup>12</sup>Ijέndkpiek gèbre' sɔ́. Iyuɔ́n mɔ́ we ní.

*Linatunl nluob ya piebm*

<sup>13</sup>Uwien ya tond nluob mɔ́ piebe' u'natunl, nέ n cii' unieke uba bó, u ñέn' miñòkm ya ponpuol‡ là te Uwien ya nun bó nnò ya kele inan bó ní, <sup>14</sup>ki tɔ́keh Uwien ya tond nluob wá ñuuke linatunl nnò ki teh: «Lore bitondb binan bà lùo Efrat ya kpenciέnl ya gbέ nnò kí wiέ.» <sup>15</sup>Nέ u lore' bitondb binan nnò ki wiέ'. Bi là bonde' ki ye bi li lore bέ li ya binl nin u ya ñmaal nin u ya wien nin u ya yo nέ, bέ rí ku binib ya gbiirm mita ya miba. <sup>16</sup>N cii' sojambe bà jeke itaan nnò ya ñɔ́bu, bi là te itur itur ya turbenm nέ.

<sup>17</sup>N laa' itaan nnò nin bà jeke yɪ́ nnò te ma bo.

\* 9:1 Liike Luk 8:31. † 9:11 Apoliyɔ́n ya tingi si: «Uduber nέ.» ‡ 9:13 Liponpuol nnò ya kele ke ya gbέ naan iyin nέ.

Tikur tuba lieke bi'fɛl bo.  
 Tu'siem miba mɔn tɛn umu,  
 mitɔm bɔn wiee,  
 mitɔm mɔ naan mitɛnɲɔkjiem.

Itaan nnɔ ya yul naan ucind ya yul nɛ.  
 Umu nin imuɲii nin mitɛnɲɔkjiem ɲɛh i'ɲuɔn ni.

<sup>18</sup> Umu nin imuɲii nin mitɛnɲɔkjiem nnɔ yɛ ijɛndciɛn nɛ ki ɲɛh itaan nnɔ ya ɲuɔn ni. Tibont tuta nnɔ ku' binib ya gbiirm mita ya miba, <sup>19</sup> kimɛ itaan nnɔ ya tuɔm te i'ɲuɔn nin i'juun ni nɛ. I'juun nnɔ naan iwɛ nɛ ki ɲmɔbe iyul. I taah yɛn nɛ ki jɛndɛh binib.

<sup>20</sup> Binib bɑ ɲa kpo' ijɛnd nnɔ ni nnɔ ɲa lɛbre' bi'tetem. Bi biɛ ki gbaandɛh ki pukeh isɛnpol nin ibule yɑ bɛn nin bi'yul tien' yɪ nnɔ nɛ. Bi taa' miɲɔkm nin ilike ya kurku nin kukurku kua bi yih kù blɔnsi nnɔ nin itɛn nin idɔ nɛ ki tien' yɪ. Ibule nnɔ ɲa lɛnh, ka ciuh, ka cuonh mɔ. <sup>21</sup> Binib nnɔ ɲa biɛ ki dɑan' bi'nikul nin bi'ɲɔkjiɪl nin bi'sɔnsɔndl nin bi'nasubu.

## 10

### *Uwien ya tond nin kigbɔnwawaak kiba ya gbɛr*

<sup>1</sup> N tɪ laa' Uwien ya tondtɔdaan uba, u ɲɛn' kutaaku bɔ ki jiinh nɪ kutɛwɔlgbɔnku piibe u'bo; gbɛngbɛnjɛpolkɛ guɔn' u'yul tɛn uyukpɛkpiɛ. U'nun bɔ muɔreh tɛn uwien, nɛ u'taan mɔ naan umu nɛ teknh cɔlcɔl. <sup>2</sup> U ɲuuke kigbɔnwawaak kiba u'nuɔ ni kɪ pibre'. U'nɔjietaal te miɲunciɛnm bo, nɛ u'nɔgɛntaal mɔ te liwɛl bo. <sup>3</sup> U wuure' ufaa bo tɛn ucind. U wuure' uyo wɑ nnɔ, nɛ utaa tien' bolm milole bo. <sup>4</sup> N ye ɲ kɛle itɛtɛn nnɔ ye bɑ kugbɔnku ni, nɛ ki ciɪ' uniɛke uba bɔ u len' paaki bɔ ki ye: «Bɔle itɛtɛn nnɔ ye bɑ, la kɛle tɔ.»

<sup>5</sup> Uwien ya tond wɑ n bi laa' u se miɲunciɛnm nin liwɛl bo nnɔ yuon' u'nɔjie paaki bɔ <sup>6</sup> ki pole' wɑ tuu ki te uyo kɛ, ki ɲɛn' kutaaku nin tibont tɑ kɛ te ku'bo, ki ɲɛn' kitink nin tibont tɑ kɛ te ki'bo, ki tien' miɲunciɛnm nin tibont tɑ kɛ te mi'ni nnɔ, ki ye: «Na ji li taande.»

<sup>7</sup> Ama uyo wɑ Uwien ya tond nlole li cin kɪ piebe u'natunl nnɔ, u ya yo nɛ Uwien ya gbɛbɔlkaar tɑ u lɑ tɔke' tɔ u'tonsɔnb biɲɔbonsɔknb nnɔ li tien.

<sup>8</sup> N bi ciɪ' uniɛke wɑ bɔ paaki bɔ nnɔ tɪ ye: «Li joh kɪ tɪ teke kigbɔnk kɑ Uwien ya tond wɑ se miɲunciɛnm nin liwɛl bo ɲuuke kɛ, kɪ pibre' nɔ.»

<sup>9</sup> Nɛ n bure' Uwien ya tond nnɔ saan ki tɪ tɔke' wɔ ki ye wɔ ɲ de nni kigbɔnk nnɔ. Nɛ u tɔke' nni ki ye: «Teke kɛ kɪ ɲmɔn. Kɪ li ɲmɛ a'ɲɔbu ni tɛn tisiir nɛ, nɛ ki li to a'benku ni.»

<sup>10</sup> Nɛ n teke' kɛ utond nnɔ ya nuɔ ni ki ɲmɔn'. N ɲmɔnh kɛ uyo wɑ nnɔ kɪ ɲmɛ n'ɲɔbu ni tɛn tisiir nɛ. Ama n tɪ nɛle' kɛ ma nnɔ n'benku ni kɛ ji to nɛ kɛrkɛri. <sup>11</sup> Nɛn saan nɛ bi tɔke' nni ki ye: «A li biɛ kɪ tɔke inibol yɑ kɛ te uɲɛndun wuu ni, ki lienh ilɛnbol kɛ nin bibɛrb nɑ lɑ li tu bɛ ya gbɛr.»

## 11

### *Bimɔnkunb bile ya gbɛr*

<sup>1</sup> Nɛn saan nɛ bi de' nni iɲmɛle ya lɛnbɛnl liba li naan ukpɛndɔ, ki tɔke' nni ki ye: «Fii kɪ kpaan Uwien ya duku nin liponpuol, kɪ kɑan binib bɑ gbaandɛh ki pukeh Uwien len nnɔ. <sup>2</sup> Ama ɑ dɑan ki la kpaan kuduku nnɔ ya luo, kimɛ Uwien taa' wù ki de' bɑ ɲa yɛ u'yaab nɛ. Bi li faake nin Uwien ya du kɪ wɔbn u'nib kɪ tɪ baa iɲmaale pinan nin ile. <sup>3</sup> Nɛ Uwien li cɛre u'mɔnkunb bile ɲ li sɔkndɛh u'gbɛr kɪ tɪ baa iwien liturl nin kobilɛ nin piluob, kɪ li guo tikpɛlcɛr\* tuba tɔ naan tibɔtɔr.»

\* **11:3** Bi lɑ kɛ mikuum bii bi te uyɛnsaa ni bii bi bɛndɛ' ki ye bi bii' Uwien nɛ la, bi guoh ni ya kpɛlcɛtunb. Liike Matie 11:21.



<sup>4</sup> Bimànkunb bile nnò yé Olifi ya siin ile nin ifr ile nε ki se uηendun ya Yonbdaan ya nun bó. <sup>5</sup> Bi'nennendb nuunh bε rí jènde bε la, umu uba nε li ñε bi'ñuon ni kí ku bε. Wà kε nuunh wò rí jènde bε la, udaan li kpo nnò nε. <sup>6</sup> Bi ηmàbe mituòm bε rí cuo utaa uyo wà bi te ki sòkndeh Uwien ya gber, ki ηmàbe mituòm bε rí cère miñunm rí kpende misèm, ki ηmàbe mituòm bε rí cère ijend kε ya bol rí lu utingben bo uyo wà kε bi yíe.

<sup>7</sup> Bi tí kun' imàn Uwien ya gber bo ki gben' la, kiwenbiik kà li ñε ní kubùoku kùà ñò ka ηmàbe bien ni nnò li jèke bε butòbu kí faake nin bε, kí ku bε. <sup>8</sup> Nε bi'gbenent rí juore kí li dò upaan bo uducien wà ni bi là kpe' bi'Yonbdaan udòpònpòn bo nnò ni. Bi yih udu nnò ki nengreh Sodòm nin Esipt nε. <sup>9</sup> Nε inibol yà kε te uηendun wuu ni ki lienh ilenbol kε nnò li baa kí lá liike bi'gbenent nnò kí tí baa iwien ita nin kujenku, ka rí tuo bε rí sube bε. <sup>10</sup> Bi'kuum li sange utingben ya nib ya yem, bε rí li poknh, kí li punh tób tibont, kime Uwien ya ñòbonsòknb bile nnò là jènde' bε ki gbien'. <sup>11</sup> Ama iwien ita nin kujenku nnò gèbre', nε Uwien cère' kufuorku kòn' bi'ni, bi fii' ki sere', nε bujewaancienbu cuo' binib bà bi likeh bε nnò. <sup>12</sup> Nε biñòbonsòknb bile nnò cii' unieke uba bó u len' paaki bó ufaa bo ki ye: «Dùò ní mèn.» Nε bi don' paaki kutewòlgònkú ni bi'nennendb ya nun bó. <sup>13</sup> U ya yo nε kitink jènge' cεen, nε uducien nnò ya dur ya gbiirm piik ya miba lu'. Kitink ya jèngm nnò ku' binib itur ilole. Bà s'ien' ka kpo' nnò ya fèl s'en' kí tí kende', nε bi kpieke' Uwien wà te paaki bó.

<sup>14</sup> Ijend nle bo gèbre' sò. Nta mò ya baam ηa rí taande.

### *Linatunl nlole ya piebm*

<sup>15</sup> Uwien ya tond nlole mò piebe' u'natunl, nε bidεnb biba len' paaki bó ufaa bo ki ye: «Yonbdaan Uwien nin u'Nigendkε Kristo nε ji si uηendun wuu ya bεl. Libel nnò li tuu ki te uyo kε nε.»

<sup>16</sup> Nε bicienb pile nin binan bà kε bi'berbiemu bo Uwien ya nun bó nnò gbaan' ki pukeh Uwien <sup>17</sup> ki teh:

«Yonbdaan Uwien, mituòm kε ya daan.  
Sin wà là te, ki biε ki te nnò, ti faareh ηε,  
kime a taa' a'tocienm nε ki jin' a'bεl.

<sup>18</sup> Binib bà ηa yé a'yaab ya benku ni là ben' a'bo,  
nε fεnfennò a'mò ya mutuol ji fii' bi'bo.  
Uyo wà sò a li bu bitenkpiib tibuur,  
kí su a'tonsònb biñòbonsòknb,  
kí su a'nib bà kε boh ηε,  
biwaab nin bicienb kε†,  
kí gben bà bereh uηendun nnò ya gber.»

<sup>19</sup> Uwien ya duku kùà te paaki bó nnò piire', kujòtieku ya lεkl se ku'ni. Nεn saan nε utaa mèkndeh ki tengeh ki ηmàbe kuwaaku cεen, kitink jènge', nε utaa nii' iteten lu' ki yebe cεen.

## 12

### *Upiitenpunb nin utunwien ya gber*

<sup>1</sup> Ni ya puoli bó nε micincilncienm miba tien' kutaaku bo. N laa' upii uba nε uwien piibe u'bo ten lilièrl, uηmaal te u'tàan ya tingi, iηmaabii piik nin ile te u'yul bo ten uyukpekpie.

<sup>2</sup> Upii nnò là punbe' nε, u'mamaayo baa', u benh wò rí maa, nε ki wòlnh nin imerwien.

<sup>3</sup> Micincilntòm tí tien' kutaaku bo. N laa' utunwien\* uba, u món tohin ki ηmàbe iyul ilole nin iyin piik, ki kpie uberyukpekpie yul kε yul bo. <sup>4</sup> Utunwien nnò taah u'juul ki preh iηmaabii ya gbiirm mita ya miba, ki wienh kitink bo. U baa' kí lá sere' upii nnò ya nun bó ηò kibuk nnò tí ñen' uyo wà la, wò rí pòk kí guare kí nele nε.

† 11:18 Biwaab nin bicienb li fre kí li yé ibaan nin binikpekpiekb mò.

\* 12:3 Utunwien yé ibiere ya daan ya nennēnku nε.

<sup>5</sup> Upii nnə maa' kibujɛbuk. Kɛn nɛ lá li ɲuuke inibol kɛ nin ufaa ki la ɲmɔbe nunsɔnge bi'bo. Uwien yuure' kibuk nnə ki don' u'ba saan, u'berbiɛk ya b̀ul. <sup>6</sup> Nɛn saan nɛ upii nnə sɛn' ki jon' kupenpelku ni, Uwien là bonde' wɔ mifɛnm nɛn bó nɛ. Bi tí li likeh wɔ nɛn bó nɛ kí tí baa iwien liturl nin kobiile nin piluob.

<sup>7</sup> Butɔbu buba tien' kutaaku bo. Uwien ya tondciɛnb ya uba bi yih wà Misɛl; wɔn nin u'tondb tɔn' nin utunwiɛn nnə nin u'mɔ ya tondb butɔbu, <sup>8</sup> ki faake' nin bɛ, nɛ utunwiɛn nin u'tondb ɲa ji ɲmɔbe sɛn bɛ rí li te paaki bó. <sup>9</sup> Nɛ bi ɲɔre' kutunwiɛnku nnə. Kù yé uyo bo ya wɛ nnə nɛ. Bi yih kun nɛ usɛnpol, ki liɛbe' ki yih kù \*Satan. Kun nɛ tulndeh uɲɛndun ya nib kɛ. Bi ture' kun nin ku'tondb kɛ nɛ ki wiɛ' kitink bo.

<sup>10</sup> Nɛ n cii' unieke uba bó u len' ufaa bo kutaaku bo ki ye:

«Uyo wà sɔ yé uɲmɛɲmɛryo,

ki yé uyo wà ti'Wien wuɔn' u'tuɔm,

ki wuɔn' ki ye u yé ubɛr,

ki wuɔn' ki ye u'Nigɛndkɛ Kristo ɲmɔbe ticiɛnt,

kimɛ bi ɲɔre' wà biindeh ti'yaab Uwien ya nun bó ɲɔnku nin wien ni nnə ɲɔ.

<sup>11</sup> Ti'yaab nnə faake' nin wɔ ɲɔ. Kipebuk ya sɛm nin tigbɛr tà bi kundeh imɔn tu'bo nnə, nɛ cɛre' bi faake' nin wɔ.

Ba tɔnge' bi'miɛl haali ki tí kpo'.

<sup>12</sup> Kutaaku nin tibont tà kɛ te ku'bo rí li poknh,

kimɛ bi ɲɔre' usɛnpol nnə ɲɔ.

Ama ní bre kitink nin miɲunciɛnm bo,

kimɛ usɛnpol jiire' ní'bó

nin u'benpiebe,

ki bɛn ki ye ní sɛn' wɔ iwenkáankɛ nɛ.»

<sup>13</sup> Utunwiɛn nnə laa' bi ture' wɔ ki wiɛ' kitink bo ma nnə nɛ u sɛn' ki paan' upii wà maa' kibujɛbuk nnə bo. <sup>14</sup> Nɛ Uwien de' upii nnə ifiɛbe ile ì yɛbe tɛn umiɛkaab yi ɲɔ wɔ rí laan kí jo kupenpelku bó, Uwien là bonde' wɔ mifɛnm ná saan nnə ɲɔ utunwiɛn nnə la nɛnde wɔ. Bi tí li likeh wɔ nɛn saan nɛ kí tí baa ibin ita nin kujɛnku. <sup>15</sup> Nɛn saan nɛ utunwiɛn nnə siin' miɲunm mǐ yɛbe tɛn likpenl upii nnə ya puoli bó ɲɔ mɛ rí puube kí tí tuke wɔ kí bure. <sup>16</sup> Nɛ kitink tore' upii nnə, ki yàare' nɛ utunwiɛn nnə siin' miɲunm mà nnə kɔn'. <sup>17</sup> Utunwiɛn nnə ya benku ni ben' upii nnə bo ki tí kɛnde', nɛ u bure' ki tí tɔn' nin upii nnə ya yaabii yà sɛn' nnə butɔbu. Bi yé binib bà boh Uwien ya wɔb, ki pɛ \*Yesu ya gbɛr bo mɔnmɔnm nɛ. <sup>18</sup> Nɛ utunwiɛn nnə jon' ki tí sere' miɲunciɛnm ya gbɛ litɛngbil bo†.

## 13

### *Kiwɛnk kà ɲɛn' miɲunciɛnm ni nin utunwiɛn nnə ya gbɛr*

<sup>1</sup> N tí laa' kiwɛnk kiba, kí ɲɛn' miɲunciɛnm ni, ki ɲmɔbe iyul ilole nin iyin piik, ki kpiɛ uberyukpɛkpiɛ yinl kɛ yinl bo. Nɛ bi kɛle' yul kɛ yul bo liyel, lí sukreh Uwien. <sup>2</sup> Kiwɛnk nnə naan unamuun nɛ, kí'taan yɛbe ki ɲmɔbe titɛbiɲiint tù fenbe cɛɛn, kí'ɲɔkpon naan ucind yu. Utunwiɛn nnə taa' u'faa nin u'berbiɛk nin u'tɔciɛnm ki de' kɛ.

<sup>3</sup> Kiwɛnk nnə ya yul nnə ya liba ɲmɔbe kugbiɛku tɛn la rí ɲmɛre nɛ.

Ama kugbiɛku nnə bukre'.

Ní cuo' utingbɛn ya nib kɛ miyɔkm nɛ bi ji ɲuɔrɛh kɛ.

<sup>4</sup> Bi gbaan' ki pukeh utunwiɛn nnə, kimɛ wɔn nɛ de' kiwɛnk nnə mituɔm. Bi là gbaan' ki pukeh kiwɛnk nnə mɔ ki teh: «ɲmɛ te tɛn kiwɛnk kɛ nɔ? Nɛmɛ li fre kí tɔ nin kɛ butɔbu?»

<sup>5</sup> Bi là de' kiwɛnk nnə usɛn kɛ rí li lienh tigbengt ya lenm, kí li sukreh Uwien, ki de' kɛ mituɔm kɛ rí li teh tibont haali iɲmaale pinan nin ile. <sup>6</sup> Nɛ kí cin' ki sukreh Uwien ki saah u'yel, ki yih u te ná saan fɛnm, ki sukreh bà te u'saan paaki bó nnə. <sup>7</sup> Bi de' kɛ usɛn kɛ

† 12:18 Bi kpiɛ' ki kɛle' tigbɔnt tà nnə ya tuba ní kɛle' ki ye: «N jon' ki tí sere' miɲunciɛnm ya gbɛ litɛngbil bo nɛ.»

ń tǎ nin Uwien ya nib butǎbu kí faake nin bε. Nε ki de' kè mituǎm kè ń li ńuuke inibol yǎ kε te uńɛndun wuu ni ki lienh ilenbol kε nnǎ. <sup>8</sup> Utingben bo ya nib bǎ kε ba kele' bi'yel limiel ya gbǎnku ni haali uńɛndun ya cincinm nnǎ li gbaan kí puke kiwεnk nnǎ. Bi lǎ ku' Uwien ya Pebuk kǎ nnǎ nε si limiel ya gbǎnku nnǎ.

<sup>9</sup> «Wǎ ńmǎbe litubl la, wǎ ń cii.

<sup>10</sup> Uwien ye bi li cuo wǎ tiyonbt la,  
bi li mǎnbe kí cuo wǎ tiyonbt nε.  
U ye bi li ku wǎ nin kijusiek la,  
bi li mǎnbe kí ku wǎ nin kijusiek nε.  
Nεn bo, Uwien ya nib ń li ńmǎbe kuminku,  
kí li pε Uwien bo mǎnmǎnm.»

### *Kiwεnk kǎ puǎ' kitink ni ya gber*

<sup>11</sup> Nε n tí laa' kiwεntǎk kiba puǎ' kitink ni, ki ńmǎbe iyin ile ń naan kipebuk yè, nε ki ji lienh tɛn utunwien nnǎ. <sup>12</sup> Kí lǎ ńmǎbe kiwεnk kǎ ńɛn' mińuncienm ni nnǎ ya tuǎm kε, nε ki taah mè ki sǎnh ki dienh kè. Kiwεnk kǎ puǎ' kitink ni nnǎ wǎbndeh utingben bo ya nib bε ń li gbaandeh ki pukeh kǎ lǎ ńɛn' mińuncienm ni, ki ńmǎbe kugbǐeku, kù bukɛ' nnǎ. <sup>13</sup> Kiwεnk kǎ puǎ' kitink ni nnǎ teh micincilm cɛɛn, haali ki tí cèreh umu ńɛh paaki ki jiinh ní tingi, binib kε ya nun bó. <sup>14</sup> Bi de' kè mituǎm kí teh micincilm ki dienh kiwεnk kǎ ńɛn' mińuncienm ni nnǎ, ki tulndeh utingben ya nib kε, ki tǎkeh bε ki teh bε ń mε kiwεnk kǎ bi bunge' kè nin kijusiek ńǎ kí faake' nnǎ ya nɛnnɛnku. <sup>15</sup> Bi de' kiwεnk kǎ puǎ' kitink ni nnǎ mituǎm kè ń kuǎn kufuorku kǎ ńɛn' mińuncienm ni nnǎ ya nɛnnɛnku ni ńǎ kù ń li lienh, ki cèreh bi kuuleh binib bǎ kε ńǎ gbaandeh ki pukeh kù nnǎ. <sup>16</sup> Kí wǎbn' binib kε, biwaab nin biciɛnb nin bifǎadɛnb nin bijiinb nin iyonbe nin bǎ ńǎ yé yonbe bi tien' kudǐeku bi'ńǎjie bo bii bi'yutun bo. <sup>17</sup> Kudǐeku nnǎ yé kiwεnk kǎ ńɛn' mińuncienm ni nnǎ ya yel bii kí'yel ya nǎnbl nε. Unil wǎ ńǎ ńmǎbe kudǐeku nnǎ la, ba ń cère wǎ ń de bonn, ka ń cère wǎ ń kuǎre mǎ.

<sup>18</sup> Fɛnfɛnnǎ miyɛnfuom nε li cère binib ń bɛnde tibont tuu ya tingi. Unil wǎ ńmǎbe miyɛnfuom nε li bɛnde kiwεnk nnǎ ya nǎnbl ya tingi. Linǎnbl nnǎ yé unil ya yel ya nǎnbl nε. Lǎ te kobiiluob nin piluob nin miluob\* nε.

## 14

### *Kipebuk nin kí teke' binib bǎ ki wiε'*

<sup>1</sup> N tí liike' ki laa' Kipebuk nnǎ se Siyǎn ya juǎl bo. Binib itur kobk nin pinan nin inan bǎ ya yutun bo ńmǎbe kɛn nin kí'Baa ya yel nnǎ te kí'saan. <sup>2</sup> Nε n cii' kuwaaku kuba bó paaki bó ní tuoreh tɛn mińuncienm nε fuh bii utaa nε tɛngɛh ufaa bo. N ciih kuwaaku kùǎ bó nnǎ ńmε mǎ tɛn bibiɛńib nε ńih tibèr. <sup>3</sup> Binib nnǎ te Uwien ya bɛrbiek nin tiwɛnfuobt tunan nin biciɛnb nnǎ ya nun bó nε ki gɛh iyuonfaan. Binib itur kobk nin pinan nin inan bǎ Uwien de' bε kitink bo ki wiε' nnǎ baba ńǎ ńí la, uba ńǎ ńí fre kí bɛnge iyuon nnǎ. <sup>4</sup> Ba kuǎn' bi'ba jǎknt, bi te tɛn ujeɛfaan wǎ ńǎ bɛn jɛ nε, kimε ba paan' niba bo, bi pε Kipebuk nnǎ baba bo nε, ki joh kí joh nǎ kε saan. Uwien de' bɛn nε binib ni ki wiε', bε ń li yé wǎn nin Kipebuk ya nikpiɛkb. <sup>5</sup> Ba bɛn tonnenku, nε ka ńmǎbe biil mǎ.

### *Uwien ya tondb bita tǎke' Uwien ya buur bó*

<sup>6</sup> N tí laa' Uwien ya tond uba, u laanh mitɛwǎlkpǎm, ki tuke tigbɛmǎnmǎnt tǎ ńǎ ńmǎbe gbenm, wǎ ń lǎ tǎke utingben ya nib kε: inibol yǎ kε te uńɛndun wuu ni ki lienh ilenbol kε nnǎ. <sup>7</sup> Utond nnǎ len' ufaa bo ki ye: «Li boh mɛn Uwien, kí li kpiɛkɛh wǎ, kimε u li bu binib tibuur uyo wǎ nnǎ baa'-a! Li gbaandeh mɛn ki pukeh Uwien, wǎn nε ńɛn' kutaaku nin kitink nin mińuncienm nin ińunbun kε ya bol.»

\* **13:18** Biba maaleh ki teh linǎnbl kobiiluob nin piluob nin miluob yé Erom ya bɛrcien ya yel nε. Bitǎb maaleh ki teh linǎnbl nnǎ wǎngɛh unisaal ya bonn nε.

<sup>8</sup> Utondlie mɔ paan' ukpiɛk nnɔ bo, ki lienh ki teh: «U lu' ηɔ, u lu' ηɔ, uduciɛn Babilonn lu' ηɔ. Wun nɛ taa' u'sɔnsɔndl ki puon' inibol kɛ, ki cɛrɛ' i kɔn' Uwien ya tudɛrɛ ni.»

<sup>9</sup> Utond nta mɔ paan' bikpiɛkb bile nnɔ bo, ki lienh ufaa bo ki teh: «Binib bɔ kɛ gbaandeh ki pukeh kiwɛnk nnɔ nin ki'nɛnnɛnku, ki ηmɔbe ki'diɛku bi'yutun bo bii bi'nuɔ bo la,  
<sup>10</sup> Uwien ya benku ni li be bi'bo kɪ gbien, wɔ rɪ dɛrɛ bi'tub ka rɪ muɔ bɛ cɛcɛkm, kɪ cɛrɛ bɛ rɪ li te u'tondb nin Kipebuk ya nun bɔ ki jɛndeh ki lɛbrɛh mitɛnɔkjiɛm mɔ teknh umu ni. <sup>11</sup> Umu wɔ bi te u'ni ki jɛndeh ki lɛbrɛh nnɔ ya muɔii li tuu ki dukeh nɛ uyo kɛ. Binib bɔ ηmɔbe kiwɛnk nnɔ ya yel ya diɛku, ki gbaandeh ki pukeh kɛn nin ki'nɛnnɛnku nnɔ li jɛndeh nɛ nɔnku nin wien ni ka rɪ li ηmɔbe fuorl.»

<sup>12</sup> Nɛn bo, nɪ yɛ uyo wɔ Uwien ya nib bɔ boh u'wɔb, ki teke' \*Yesu ki jin' nnɔ rɪ li ηmɔbe kuminku nɛ.

<sup>13</sup> Nɛ n cii' unieke uba bɔ u len' paaki bɔ ki ye: «Kɛle kɪ ye: Binib bɔ ji kpookeh fɛnfɛnnɔ Yonbdaan bo nnɔ, Uwien ya mɔnm te bi'bo.» Nɛ \*Mifuoɔnaanm ye: «Imɔn, bɛ rɪ li fuoreh kɪ nɛn bi'jiinku, kime Uwien ηa rɪ sunde bi'bɔ bi sɔn' itɔn ya nnɔ bo.»

### *Uwien li bu uɛndun ya nib tibuur*

<sup>14</sup> Nɛ n tɪ liike' ki laa' kutɛwɔlgbɔnpenpienku kuba, niba kɛ ku'bo ki naan unisaal, ki kpiɛ miɔɔkm ya yukpekpiɛ, ki ηuuke puokηmaηmaa uba. <sup>15</sup> Nɛ Uwien ya tond uba nɛn' nɪ Uwien ya duku ni, ki yin' wɔ kɛ kutɛwɔlgbɔnku bo nnɔ ufaa bo ki ye: «Taa a'puoko nnɔ kɪ cin kɪ li ceh tijier, tijier ya ceceyo baa' ηɔ, kime utingbɛn bo ya jier ben'-a.» <sup>16</sup> Nɛn saan nɛ wɔ kɛ kutɛwɔlgbɔnku bo nnɔ taa' u'puoko ki cen' utingbɛn ya jier kɛ.

<sup>17</sup> N tɪ laa' utondtɔ paaki bɔ, u nɛn' nɪ Uwien ya duku ni, ki mɔ ηuuke puokηmaηmaa.

<sup>18</sup> Nɛ utondtɔ mɔ nɛn' liponpuol saan. Wɔn nɛ ηmɔbe mituɔm umu bo. U yin' utond wɔ ηuuke puokηmaηmaa nnɔ ufaa bo ki ye: «Taa a'puokηmaηmaa nnɔ kɪ cecere utingbɛn bo ya sibii yɔ bi taah yɛ ki ηɛh fɛn nnɔ, kime i ben'-a.» <sup>19-20</sup> Nɛ utond nnɔ taa' u'puoko ki cecere' utingbɛn bo ya sibii nnɔ, ki taa' ki kuore' kubɔciɛnku kɔa bi ηmengeh isibii ku'ni nnɔ ni. Bi ηmien' isibii nnɔ dugbaal nɛ. Bi ηmien' yɛ ma nnɔ misɛm nɛ nɛn' kubɔoku nnɔ ni ki puube' ki tɪ baa' kɔnsini kobiita. Utaan se mi'ni la, mi li baa u'lenbu. Nɛn nɛ wuɔn' ki ye Uwien ya benku ni ben' binib bo cɛɛn.

## 15

### *Ijɛndfɔrke ya gber*

<sup>1</sup> Nɛ n tɪ laa' micincilntɔm kutaaku bo. Nɪ yɛ nibonciɛnn nɛ ki ηmɔbe kuɔaanku cɛɛn. N laa' Uwien ya tondb bilole, bɛn nɛ li cɛrɛ ijɛnd rɪ tu uɛndun ya nib kɪ tɪ dukn bolm milole. Ijɛndfɔrke nɪnɔ, kime yɛn bo nɛ Uwien li tɔrɛ kɪ wuɔn u'benpiebe.

<sup>2</sup> Nɛ n laa' nibonn niba nɪ naan miɔnunciɛnm umu te ni'bo, nɪ wien tein ki likeh ki cɔareh tɛn lidingl, ki laa' binib bɔ mɔn' ki faake' nin kiwɛnk nnɔ nin ki'nɛnnɛnku nin ki'yel ya nɔnbl nnɔ se nibonn nnɔ saan, ki ηuuke Uwien de' bɛ tibɛr tɔ nnɔ. <sup>3</sup> Kɪ gɛh Uwien ya tonsɔnl Moyis nin Kipebuk nnɔ ya yuon ki teh:

«Yonbdaan Uwien mituɔm kɛ ya daan,  
a'tɔn yɛ itɔnciɛn nɛ ki ηmɔbe kuɔaanku.

A teh nɔ nnɔ nɪ cuube nɛ ki yɛ imɔn.

Sin nɛ yɛ inibol kɛ ya bɛr.

<sup>4</sup> Yonbdaan, ηmɛ li mɛnge lifɛl ki la boh ηɛ? Nɛmɛ te kɪ ye wa rɪ li pɛkeh ηɛ?

Sin baba nɛ yɛ uɔaan.

Inibol kɛ li baa kɪ lɔ gbaan a'nun bɔ kɪ puke ηɛ,

kime binib kɛ laa' a teh nɔ nnɔ nɪ cuube nɛ.»

<sup>5</sup> Ni ya puoli bɔ nɛ n laa' Uwien ya duku kɔa te paaki bɔ nnɔ piire', kun si: kujɔtieku ya lɛkl te lininbonl lɔ ni nnɔ. <sup>6</sup> Nɛ Uwien ya tondb bilole bɔ li cɛrɛ uɛndun ya nib rɪ jɛnde kɪ tɪ dukn bolm milole nnɔ nɛn' nɪ kuduku nnɔ ni, ki guo tikpɛlcɛpenpien tɔ windeh, ki buobe miɔɔkm ya nɪngbɛn bi'siik ni. <sup>7</sup> Nɛ tiwɛnfuobt tunan nnɔ ya kiba taa' miɔɔkm ya

sèn ilole ki de' Uwien ya tondb bilole nnɔ. Uwien wà tuu ki te uyo ke nnɔ ya mutuol nɛ gbe isèn nnɔ. <sup>8</sup> Nɛ Uwien ya kpiɛke nin u'tuəm cère' imuñii fii' ki gbe kuduku nnɔ. Uba ŋa ní fre kí kɔ ku'ni kí tí baa ijend yà Uwien ya tondb bilole li cère unɛndun ní jènde yè kí tí dukn bolm milole nnɔ ya gbenm.

## 16

### *Uwien ya benpiebe te isèn yà ni ya gber*

<sup>1</sup> N cii' unieke uba bó u len' Uwien ya duku ni ufaa bo, ki tɔke' Uwien ya tondb bilole nnɔ ki ye: «Li joh mɛn kí tí taa Uwien ya benpiebe wà te isèn ilole ni nnɔ kí wule kitink bo.»

<sup>2</sup> Ukpiɛk bure' ki tí taa' nà te u'senl ni nnɔ ki wule' kitink bo. Nɛ inel yà bre ki wi ki gbien' yèyèke' binib bà ŋmɔbe kiwɛnk nnɔ ya dīɛku ki gbaandeh ki pukeh kí'nenneku nnɔ.

<sup>3</sup> Ulie mɔ taa' nà te u'yaal ni ki tí wule' miñunciɛnm ni. Nɛ mi kpɛnde' kusebubulku ki naan libonkpil ya sɛm. Nɛ tibont tà ke te mi'ni nnɔ kpo'.

<sup>4</sup> Nta mɔ taa' nà te u'mɔ yaal ni ki tí wule' ikpen nin iñunbun ni. Nɛ i'ñunm kpɛnde' misɛm.

<sup>5</sup> Nɛ n cii' Uwien ya tond wà ŋmɔbe mituəm miñunm bo nnɔ len' ki ye:

«Uwien, a cuube nɛ,  
sin nɛ là te, ki biɛ ki te, ki yé uñaan.

A tien' nà nɔ nɛ wuɔn' ki ye a'buur cuube.

<sup>6</sup> Kimɛ bi ku' a'nib nin a'ñɔbonsɔknɔ nɛ a'mɔ de' bɛ misɛm bɛ ní ñu. Bi kpe nɛn nɛ.» <sup>7</sup> Nɛ n cii' unieke uba bó liponpuol saan u teh: «Yonbdaan Uwien mituəm ke ya daan, a'buur yé imɔn nɛ, ki cuube.»

<sup>8</sup> Nnan mɔ taa' nà te u'mɔ yaal ni ki wule' uwien wà puɔreh nɔ bo, nɛ u laa' mituəm wù ní li siɛnh binib tɛn umu. <sup>9</sup> Kuwɔlku funfunde' binib, nɛ bi suke' Uwien wà ŋmɔbe ufaa ki cère' bi jèndeh nnɔ, ka tuo' bɛ ní lèbre bi'tetem ŋɔ kí kpiɛke wɔ.

<sup>10</sup> Nñun mɔ taa' nà te u'mɔ ya senl ni ki tí wule' kiwɛnk nnɔ ya bɛrbiek bo. Kí'bel ya tinɛnm ke biike', nɛ binib jèndeh ki gbiekeh ki ŋmɔnh bi'lɛn. <sup>11</sup> Ijend nnɔ nin inel nnɔ bo nɛ bi suke' Uwien wà te paaki bó; ka tuo' ki wie' bi'tuonbiɛɛ nnɔ.

<sup>12</sup> Nluob mɔ taa' nà te u'mɔ ya senl ni, ki tí wule' likpenciɛnl Efrat ni, nɛ lí fuɔre', ki cère' bibɛrb bà ñɛn' liwenpurl bó ní nnɔ laa' ñɛñɛbùol. <sup>13</sup> Nɛ n laa' isɛnpol ita; uba ñɛn' \*utunwien nnɔ ya ñɔbu ni, utɔ ñɛn' kiwɛnk nnɔ yaabu ni, utɔ mɔ ñɛn' utonnɛñɔbonsɔknl yaabu ni. Isɛnpol nnɔ naan itɛtiɛ nɛ. <sup>14</sup> \*Satan nɛ sɔn' yè, í teh micincilnm, ki joh utingben ke bo ya bɛrb saan, yè ní taan bɛ ŋɔ bɛ ní tɔ butɔbu Uwien mituəm ke ya daan ya wengbiin ya daali.

<sup>15</sup> Yonbdaan ye: «Li cengeh mɛn, n li baa tɛn unasu nɛ. Wà ŋa gɔh, ki bonde' u'wɛngolkaar mɔ la, Uwien ya mɔnm te u'bo, kimɛ wa ní cuon cɛnkpenlonlonl bɛ ní lɛ u'fɛ.»

<sup>16</sup> Isɛnpol nnɔ taan' bibɛrb nnɔ libùol liba nɛ bi yih ní'saan \*Sufmbɛ ya lenm ni ki teh Amagedɔnn.

<sup>17</sup> Nlɔle mɔ taa' nà te u'mɔ ya senl ni, ki tí wule' kitink bó ní, nɛ unieke uba len' ufaa bo Uwien ya duku ni u'bɛrbiek saan ki ye: «Nì gben' nínɔ.» <sup>18</sup> Utaa mɛknɛh, ki tɛngɛh, kuwaaku te cɛɛn, nɛ kitink jɛnge' na ŋmɔbe fuul. Haali Uwien tí ñɛn' binib kitink bo ma, ka laan jɛnge' mi ya jɛngm. <sup>19</sup> Kí jɛnge' ma nnɔ nɛ uduciɛn Babilonn yɛkre' bolm mita. Idu ke ya dur mɔ lulu'. Uwien nɛ tiɛre' uduciɛn Babilonn ya nib bó. U'benku ni ben' bi'bo ki gbien' nɛ u dɛre' bi'tub cɛɛn, ka muɔ' bɛ cɛɛkm. <sup>20</sup> Idek nin ijuɔn ke fefe'le'. <sup>21</sup> Utaa nii' nɛ itɛtɛn lulu' binib bo ki kpiɛke cɛɛn, nɛ bi suke' Uwien itɛtɛn nnɔ bo, kimɛ ijend nnɔ là bre bi'bo cɛɛn nɛ.

## 17

### *Uwien li bu ujenkpendgaar tibuur*

<sup>1</sup> Nε Uwien ya tondb bilole bà ηuuke isèn ilole nnə ya uba baa' ki lá təke' nni ki ye: «Den rí wuən ηε Uwien lá li bu ujenkpendgaar nnə tibuur kí dεre u'tub ma bo. Ujenkpendgaar nnə yé udu nε ki te ikpengol ya gbε. <sup>2</sup> Utingbεn bo ya bεrb tien' lisənsəndl nin wən nε, nε binib guəre' lè utingbεn kε bo ki kən' Uwien ya tudεre ni.»

<sup>3</sup> \*Mifuoñaanm cère' n laa' nà tidεknt yaam nnə ni, nε utond nnə taa' nni ki jon' kupenpelku ni, n tí laa' upii uba jεke kiwεnmónmónk kiba, kí ηməbe iyul ilole nin iyin piik, kí gbεnεnt kε gbe iyel yà sukreh Uwien. <sup>4</sup> Upii nnə guo tiwεnmənmənt tuba tù món, kí taa' miñòkm nin iten yà ηməbe kudaaku nin ilaan yà ηməbe kudaaku kí fēnde' u'ba. U ηuuke miñòkm ya sεnl, lí gbe u'sənsəndtùon. Yen si: u'juəke nin u'joknt ya bont nnə. <sup>5</sup> Bi kεle' liyel là binib ηa bεn li'tingi u'yutunl bo. Liyel nnə ya tingi si: «Uducien Babilonn: lijenkpendl nin ijuəke yà te kitink bo ya naa.» <sup>6</sup> Nε n laa' upii nnə ñun' Uwien ya nib ya sèm nin binib bà bi ku' bε \*Yesu bo nnə ya sèm ki yibe' ten u ñun' midaam nε.

N laa' wə ma nnə nε nĩ cuo' nni miyòkm cεen. <sup>7</sup> Nε Uwien ya tond nnə təke' nni ki ye: «Bε tien' nĩ cuo' ηε miyòkm-i? N li kpiire' upii nnə nin u jεke kiwεnk kà, kí ηməbe iyul ilole nin iyin piik nnə ya gbεr, kí təke ηε. <sup>8</sup> A laa' kiwεnk kà nə, kí là te nε ka ji te. Kí li ñε ní kubùoku kùà ñə ka ηməbe bien nnə ni nε, kí bure bε rí tí ku kè. Binib bà Uwien ηa kεle' bi'yel limiel ya gbənkú ni haali uηendun ya cincinm nnə laa' kè la, nĩ li ji bε, kimε kí là te nε, ka ji te ama kí li liebe ní.

<sup>9</sup> «Fεnfennə miyεnfuom nin mibεnm nε li cère binib rí bende nibonn niε ya tingi. Kiwεnk nnə ya yul ilole nnə yé ijuən ilole yà upii nnə te i'bo nnə nε. I yé bibεrb bilole mə nε. <sup>10</sup> Bibεrb bilole nnə ni, biηun ya bel gèbre' ηə, nluob nε kε fεnfennə wuə, nlole ηa laan kèle'. U lá kèle' la, wa rí wuəke. <sup>11</sup> Kiwεnk kà là te, ka ji te nnə yé bεrniin nε, kí ñεn' bibεrb bilole nnə ni, nε ki joh bε rí tí ku kè. <sup>12</sup> A laa' iyin piik yà nnə, yé binib piik bà lá li ji libel nε. Bi lá jin' libel la, bεn nin kiwεnk nnə li taan libel nnə nε, ama la rí wuəke. <sup>13</sup> Bibεrb nnə kε kpaan' buñəbu nε, bε rí taa bi'tuəm nin bi'faa kε kí sən kí de kiwεnk nnə. <sup>14</sup> Bi li tə nin Kipebuk butəbu, nε kè rí faake nin bε, kimε kí yé yonbdεnb kε ya Yonbdaan nε, kí yé bibεrb kε ya bεrcien. Wən nin binib bà Uwien yin' bε ki gènde' bε bi yé u'yaab ki pε u'bo mənəmənmm nnə nε li faake.»

<sup>15</sup> Nε utond nnə tí təke' nni ki ye: «A laa' miñunm mà ujenkpend nnə te mi'saan nnə yé inibol yà kε te uηendun wuu ni ki lienh ilenbol kε nnə nε. <sup>16</sup> A laa' iyin piik yà, i yé bibεrb nnə, nin kiwεnk nnə li sikre ujenkpend nnə bo, kí fie u'went kε, kí cère wə rí li te limufunl, kí ηmənηmən wə, kí taa umu kí sε nà bó sien', <sup>17</sup> kimε Uwien nε de' bibεrb piik nnə iyenmaale bε rí tien u yíe nà. U yíe nà si: bibεrb piik nnə rí kpaan buñəbu kí taa bi'bel kí cèbe kiwεnk nnə kí tí baa uyo wà u là len' nà nnə rí tien.

<sup>18</sup> «A laa' upii wà nnə yé uducien wà likeh utingbεn bo ya bεrb kε nε.»

## 18

### *Babilonn ya berm*

<sup>1</sup> Ni ya puoli bó nε n tí laa' tidεknt yaam Uwien ya tond uba ñεn' paaki bó ki jinh ní, kí ηməbe mituəm ki gbien', nε u'wenwenku wende' utingbεn kε bo,

<sup>2</sup> nε u lienh ufaa bo ki teh:

«U lu' ηə, u lu' ηə, uducien Babilonn lu' ηə.

U ji kpende' isεnpol kε ya bol ya kənkuən nε.

Inuən nin tiwεnt tà yé tijənknt ya bont kí ηməbe isensen kε ji kə wun ni nε.

<sup>3</sup> Kimε udu nnə nε taa' u'sənsəndl kí puon' inibol kε, kí cère' i kən' Uwien ya tudεre ni.

Utingbεn bo ya bεrb tien' lisənsəndl nin wù,

nε ikpenkpend laa' lifaal li yεbe u'wiel bo.»

<sup>4</sup> Nε n tí cii' unieke uba bó paaki bó u lienh kí teh:

«N' nibε, ñε mεn Babilonn ni,

kí la li te u'nib ya tùonbiεε ya gbεr ni,

ηο ki la ji ijend ya bi li ji ye nnə,

<sup>5</sup> kimε udu nnə ya nib sən' itùonbiere ya nnə yebre' ki gbien' ki tĩ kpiε kutaaku nε, Uwien ηa sunde' bi'tùonbiere nnə bó,

<sup>6</sup> Tien bε mən bi tien' nε ma bo nnə, bi tien' nε ibiere ya nnə, jiin bε mən nnə bolm mile bo, bi là cère' ni jin' ijend ma bo nnə, jiin bε mən nnə bolm mile bo.

<sup>7</sup> Ben bà là yie tigbengt, ki yie bε ní li te liwiel ni, ní tĩ kende' nnə, cère mən bε ní ji ijend mə kí li kaa mikuum kí tĩ baa nnə, kimε udu nnə ya nib maaleh bi'fèl ni, ki teh bi'du gbere' nε, ka te tən kpopii, ka li li kèle kuum mə fiebu.

<sup>8</sup> Nεn bo, ijend li taan kí lu udu nnə ya nib bo uwien uba nε. Yen si: mikuum nin ikumuə nin mikònm.

Umu li wi udu nnə,

kimε Yonbdaan Uwien wà bun' tibuur nnə ηməbe mituəm ki gbien'.»

<sup>9</sup> Utingben bo ya berb bà kε tien' lisənsəndl nin udu nnə, ben nin wun jin' liwiel nnə, li muə kí kpiende u'bo, kimε u teknh umu, imuñii dukeh. <sup>10</sup> Bi li juore kí li se fənfəkm nε, kimε bi fenge bi la tĩ jende udu nnə ni nε. Bi li lienh ki teh:

«Nì brike' a'bo ηο, ní brike' a'bo ηο

uducien Babilonn, sin wà là ηməbe ufaa nnə, ní brike' a'bo ηο,

Uwien pək ki bun' a'buur ki gben' na taande'.»

<sup>11</sup> Utingben bo ya kpenkpend mə li muəh ki kpiendeh udu nnə bo, kimε uba ηa ji daanh bi'wənt. <sup>12</sup> Tun si: miñəkm nin ilike ya kur nin iten ya ηməbe kudaaku nin ilaan nin tikpəlcəpenpien nin ikpəlmónmón nin tikpəlcεr tà dinge suəə ki windeh nin ikpəldε kε ya bol ya ya daaku faa nin isiin ya ya də ya daaku faa nin bi taah iluobñin ki teh tibont tà nin bi kpeh tibont tà kε ya bol nin kukurku kua bi yih kù blənsi nin tikutər nin iten ya ya daaku faa bi yih ye maarb <sup>13</sup> nin ləfina kε ya bol nin tisir tà nu ki ηmε kε ya bol nin midaam kε nin mikpəm nin miyom nin iji nin inε nin ipe nin itaan nin titenlolt nin iyonbe nin binib bà bi coh bε butəbu ni. <sup>14</sup> Bi li len ki ye:

«Sin Babilonn, a là fε tibont tà nnə gben' ηο.

A'nacenkpebont tà mən ki ηməbe kuñuərku nnə gben' ηο,

nìl ηa ji li lε tù fiebu.»

<sup>15</sup> Binib bà tien' ukpenkpende udu nnə ni, ki laa' lifaal nnə,

li juore kí li se fənfəkm nε ki muəh ki kpiendeh,

kimε bi fenge bi la tĩ jende ni'bó nε. <sup>16</sup> Bi li lienh ki teh:

«Nì brike' a'bo ηο, ní brike' a'bo ηο uducien Babilonn, ní brike' a'bo ηο,

sin wà là te tən upii wà guo tikpəlcəpenpien

nin ikpəlmónmón nin ya kε ya bol ya daaku faa

ki fende' a'ba nin bi taah miñəkm nin iten ya ya daaku faa

ki teh tijefēnbont tà nnə nin ilaan nnə.

<sup>17</sup> Li ya faal kε nε pək ki gben' na taande' nə-əə?»

Biñerkurb nin bi'ciēnb nin bikpentuənb nin bà kε sənə miñunciēnm bo ki jinh se fənfəkm nε, <sup>18</sup> ki likeh udu wà teknh nnə ya muñii, ki wuureh ki teh: «U lε udu ba te ki baa' uducien wuu nə?» <sup>19</sup> Nε ki yiih titent ki pukeh bi'yul bo, ki muəh ki kpiendeh ki wuureh ki teh:

«Nì brike' a'bo ηο, ní brike' a'bo ηο,

uducien Babilonn ní brike' a'bo ηο,

biñerdēnb kε ñi' a ya faal bo nε ki faake'.

Nεn kε nε pək ki lá gben' na taande' nə-əə?»

<sup>20</sup> Tibont tà kε te kutaaku bo ní li poknh,

Uwien ya nib nin \*Yesu ya tondb nin  
 \*Uwien ya ñəbonsəknbə ni'mə ń li poknh,  
 uduciən nnə ya berm bo,  
 kimε Uwien bun' udu nnə ya nib tibuur  
 bi tien' nε mibiεrm mà nnə bo ki kun' nε imən.  
 21 Nε Uwien ya tondtədaan uba yuure' litenl liba li yebe tən linèciēnl ki wiε' miñunciēnm  
 ni, nε ki ye:  
 «Bi li bere uduciēn Babilonn ufaa bó ma sə.  
 Nil ɲa ji li lε wù fiebu.  
 22 Ba ji li cii biεñib nin yonyuonb  
 nin wopieb nin natunpieb bó udu nnə ni.  
 Utosənl uba mənən nin utə ɲa ji li te u'ni.  
 Ba ji li cii naal bó u'ni.  
 23 Frl ɲa ji li wende u'ni,  
 ba ji li cii uje nin upii bà kuən' təb,  
 na laan wuəke' ya yuon bó u'ni,  
 udu nnə ya kpenkpend nε là cən' binib kε utingbən bo.  
 U'nib là taa' inəke nε ki lere' inibol kε.»  
 24 Liεbe' ki ní, \*Uwien ya ñəbonsəknb nin u'nib bà kε bi ku' bε utingbən bo nnə u ya du  
 nε si bi'kuum.

## 19

### *Bà mən' ki faake' ya yuon nin Uwien ya Pebuk ya piikuən*

1 Ni ya puoli bó nε n cii' unieke uba bó paaki bó tən kuniwulku ya nieke, u teh:  
 «Aleluya,  
 ti'Wien nε ɲmiendeh binib.  
 Wən nε si ukpieke nin mituəm,  
 2 kimε u'buur yé imən nε, ki cuube.  
 U bun' ujenkpendgaar wà taa' u'sənsəndl  
 ki puon' binib kε utingbən bo nnə tibuur,  
 ki tu' u là ku' u'tosənb bà nnə ya fēnl».  
 3 Nε kuniwulku nnə tí ye:  
 «Aleluya,  
 Babilonn ya muñii li tuu ki dukeh nε uyo kε.»  
 4 Nε biciēnb pile nin binan nnə nin tiwənfuobt tunan nnə gbaan' ki pukeh Uwien wà kε  
 kibεrbiek bo nnə, ki teh:  
 «Ami! Aleluya!»  
 5 Nən saan nε unieke uba len' kibεrbiek nnə saan ki ye: «Ninbi, biwaab nin biciēnb bà  
 yé ti'Wien ya tonsənb ki boh wə nnə ni'ke ń li pèkeh wə mən. 6 Nε n tí cii' unieke uba bó  
 tən kuniwulku ya nieke, a li ye miñunciēnm nε fuh bii utaa nε tengeh. Unieke nnə teh:  
 «Aleluya,  
 Yonbdaan Uwien mituəm kε ya daan caan' u'bel ɲə.  
 7 Cère mən tí li poknh, kí li ɲməbe uyənsənge kí gbien,  
 kí li kpiεkreh wə,  
 kimε Kipebuk nnə ya piikuənyo baa' ɲə.  
 Nε ki'po bonde' u'ba ɲə.»  
 8 Uwien de' wə usen wə ń gole tikpəlçer tà mən ki pñen ki windeh.  
 Tikpəlçer nnə wuən' ki ye Uwien bu' u'nib bigbεməndənb nε.  
 9 Nε uba təke' nni ki ye: «Kεle kí ye: «Uwien ya mən m te u yin' binib bà bε ń ji Kipebuk  
 ya piikuənjier nnə bo,» nε ki tí ye: «Tigber tuu cinbe ki ñen' Uwien saan nε.» 10 Nən  
 saan nε n gbaan' udaan nnə ya nun bó ń puke wə, nε u təke' nni ki ye n la tien nnə, kimε



u'mə yé min nin n'təb bà yé \*Yesu ya m̀nkunb nnə ya tonsəntə nɛ. A li puke Uwien baba nɛ. \*Yesu kpiire' tigbɛm̀nt tà nnə yé Uwien là cère' \*u'Fuoñaanm tore' u'ñəbonsəknb bi səknb' tigbɛr tà nnə nɛ.

### *Unil wà jɛke utɛnpɛn ya gbɛr*

<sup>11</sup> Nɛ n tí liike' ki laa' kutaaku yɛ, utɛnpɛn uba puə' ní, wà jɛke wə nnə bi yih wə umɛm̀ndaan nin unim̀n nɛ. U buh binib tibuur, ki təh butəbu ni'donbó nɛ. <sup>12</sup> U'nun muəreh ten umupɛn nɛ. U kpiɛ iberyukpɛkpiɛ ligol. Liyel liba te u'bo, wən baba ŋa ní la, uba ŋa bɛn li'tingi. <sup>13</sup> U guo kuliɛrku kuba nɛ ku'kɛkɛ yé misɛm, bi yih wə Uwien ya ñəbonl. <sup>14</sup> Nɛ Uwien ya sojambɛ pɛ u'puoli, ki jɛke itɛnpɛn, ki guo tiliert tù pɛn ki windeh. <sup>15</sup> Nɛ kijusiek kà ŋmɛ penpen nərəh ki ñɛh utɛnjekl nnə ya ñəbu ni. U li taa kɛn nɛ kí ku inibol. U li ŋuuke bɛ nin ufaa ki la ŋməbe nunsənge bi'bo, kí niin bɛ ten bi taanh ki mərəh isibii ki ñɛndeh i'ñunm ma bo, kimɛ Uwien mituəm kɛ ya daan ya mutuol fii' bi'bo ki gbien'-a! <sup>16</sup> Liyel liba te u'liɛrku nin u'pɛnl bo. Lɛn si: «Bibɛrb kɛ ya bɛrciɛn nin yonbdɛnb kɛ ya Yonbdaan.»

<sup>17</sup> Nɛ n laa' utond uba se uwien bo, ki wuureh ufaa bo ki yih inuən yà kɛ ya bol jinh tunənt yí ní baa kí ji Uwien bonde' ujinciɛn wà nnə. <sup>18</sup> Yí ní baa kí ji bibɛrb nin sojaciɛnb nin bifɛfaab nin itaan nin bà jɛke yí nin binib kɛ, bà yé iyonbe nin bà ŋa yé yonbe nin biwaab nin biciɛnb kɛ ya nənt.

<sup>19</sup> Nɛ n tí laa' kiwɛnk nnə nin utingbɛn bo ya bɛrb nin bi'sojambɛ taan', bɛ ní tə utɛnjekl nnə nin u'sojambɛ butəbu. <sup>20</sup> Nɛ bi cuo' kiwɛnk nnə nin utonnɛnñəbonsəknl nnə mə. Wən nɛ là tien' micincilm ki de' kiwɛnk, ki lɛrɛ' binib bà kiwɛnk nnə ya dɛku te bi'bo bi gbaandeh ki pukeh ki'nɛnnɛnku nnə. Bi taa' bi'kɛ bile bi fuobe nɛ ki tí wiɛ' kumubùoku kuba ni mitɛnñəkjiɛm te len ki teknh. <sup>21</sup> Bà sɛn' nnə wən, utɛnjekl nnə taa' kijusiek kà nərəh ki ñɛh u'ñəbu ni nnə nɛ ki ku' bɛ, nɛ inuən kɛ baa' ki jin' bɛ ki tí gbo'.

## 20

### *Ibin liturl ya gbɛr*

<sup>1</sup> Nɛ n tí laa' Uwien ya tond uba ñɛn' kutaaku bó ki jiinh ní ki ŋuuke kubùoku kùà ñə ka ŋməbe biɛn nnə ya pɛn nin tikudəkɛnciɛnt u'nuə ni, <sup>2</sup> ki baa' ki cuo' utunwiɛn nnə. U yé uyo bo ya wɛ nnə nɛ. Bi yih wən nɛ usɛnpol, ki liɛbɛ' ki yih wə \*Satan. U taa' tikudəkr nnə ki lòlɛ' wə, wə ní li lùo kí tí baa ibin liturl, <sup>3</sup> ki taa' wə ki wiɛ' kubùoku kùà ñə ka ŋməbe biɛn nnə ni, ki bii'n', ki piin' ipɛn, ki pələ' ŋə utunwiɛn nnə ji la lɛrɛ nib kí tí baa ibin liturl nnə ya gbenm. Ibin nnə gɛbre' la, bi li wiɛ wə nɛ, wə ní tien iwenkàankɛ.

<sup>4</sup> Nɛ n laa' mubɛrbiɛmu muba, bà bàareh ki kaah mu'bo nnə, Uwien de' bɛ usɛn bɛ ní bu binib tibuur, ki laa' binib bà là kun' im̀n \*Yesu bo, ki kpaande' Uwien ya gbɛr ŋə bi ku' bɛ nnə ya naanmu. Bi mɛkre' nɛ ki jin' libɛl nin Kristo ibin liturl. Bɛn ŋa gbaan' ki puke' kiwɛnk nnə bii ki'nɛnnɛnku, ka ŋməbe ki'dɛku bi'yutun bo bii bi'nuə bo. <sup>5</sup> Uwien mɛkre' bɛn nɛ mikpiɛkm. Bitɛnkpiitəb bà sɛn' nnə ibin liturl nnə ŋa gɛbre' la, ba ní mɛkre. <sup>6</sup> Binib bà kpiɛ' ki mɛkre' bitɛnkpiib ni nnə Uwien ya mənɛm te bi'bo, kimɛ Uwien nɛ bore' bɛ ki tien' u'yaab. Ba ní kpo kí lɛrɛ. Bi li yé Uwien nin \*Kristo ya tətuarkaab nɛ, ki li yé bibɛrb nin \*Kristo ibin liturl.

### *Satan ya lum*

<sup>7</sup> Ibin liturl nnə gɛbre' la, Uwien li cère bɛ ní ñɛn \*Satan lipɛkl ni kí wiɛ, <sup>8</sup> wə ní jo kí tí lɛrɛ inibol yà kɛ te utingbɛn kɛ bo, kí tí taan yè, yè ní tə butəbu. Inibol nnə ya yel si Gəg nin Magəg\* nɛ. Bi yɛbe ten likpɛntɛngbil nɛ. <sup>9</sup> Bi gbe utingbɛn bo ni'kɛ saan, ki jebe' udu wà Uwien yíe wù, u'nib te u'ni nnə, nɛ umu ñɛn' paaki bó ní ki lá wɛn' bi'kɛ. <sup>10</sup> Nɛ Uwien cère' bi cuo' usɛnpol wà lɛrɛ' bɛ nnə, ki wiɛ' kumubùoku kùà mitɛnñəkjiɛm te len ki teknh nnə

\* **20:8** Uwien ya ñəbonsəknl Esekɛl là yih Uwien ya nɛnnɛndb nɛ Gəg nin Magəg.

ni, kiwenk nnɔ nin utonnenɔbonsaknl te nà saan nnɔ. Bi li tuu ki te nen saan ne uyo ke ki jèndeh ki lebreh ñanku nin wien ni.

### *Lidaali là Uwien li bu binib ke tibuur*

<sup>11</sup> N laa' kiberbecencienk kiba ki pïen, ki laa' wà ke ki'bo nnɔ. Kitink nin kutaaku gben' u'nun bó kpekpeɛl ka sien' bonn. <sup>12</sup> Ne n laa' bitenkpiib, bicienb nin biwaab ke se kiberbiek nnɔ ya nun bó. Ne bi pibre' tigbont, ki liebe' ki pibre' kutaku limiel ya gbɔnku nínɔ. Bi bun' bitenkpiib tibuur, wà ke là sɔn' ma bo. Bi bun' be ten nĩ kele' ma bo tigbont nnɔ ni ne. <sup>13</sup> Miñunm là jin' binib bà ke nnɔ, mĩ ñen' be ní. Mikuum là jin' bà bi te kutenkpiiku ni nnɔ mɔ ñen' ní, ne Uwien bun' be tibuur wà ke là sɔn' ma bo. <sup>14</sup> Nen saan ne bi taa' mikuum nin kutenkpiiku ki wiε' kumubuoku ni. Kumubuoku nnɔ ne yé mikuliem. <sup>15</sup> Ne bi taa' binib bà ke ya yel ña kele' limiel ya gbɔnku ni nnɔ mɔ ki wiε' kumubuoku nnɔ ni.

## 21

### *Kutefenku nin kitinfenk ya gber*

<sup>1</sup> N laa' kutefenku nin kitinfenk, kime kutekpaaku nin kitinkpaak nnɔ ña ji te. Miñunciem mɔ ña ji te. <sup>2</sup> N laa' Uwien ya du Yerusalemfaan ñen' u'saan paaki bó ní ki mɔn ten ujɛfaan wà bi dùun' wɔ ki tuke ki joh u'ce bó. <sup>3</sup> Ne n cii' unieke uba bó, u len' ufaa bo kiberbiek nnɔ saan ki ye: «Liike men, Uwien ya kɔnkuɔn ji te binib ni ne. U li kɔh nin be, ne be ní li yé u'yaab, ne wɔn bugben ní li yé bi'Wien. <sup>4</sup> U li ñmire bi'nunsiir ke, kuum nin kumuɔ nin jend nin kpiende ña ji li te, kime tibonkpaar nnɔ ke gben'-a.»

<sup>5</sup> Nen saan ne wà ke kiberbiek bo nnɔ len' ki ye: «Fenfennɔ n teh tibont ke tifent ne.» Ne ki tí len' ki ye: «Kele tigber tuu, kime tù te ne, ki kpe be ní li du tu'bo.» <sup>6</sup> Ne ki tɔke' nni ki ye: «Ni'ke tien' ki gben'-a! Min ne yé micincinm nin migbenm. Uñuñun ñmɔbe wà ke la, n li de wɔ liñunbunl là ya ñunm dienh limiel wa ní pè niba. <sup>7</sup> Wà ke mɔn' ki faake' ne li si tu ya bont ke. N li yé u'Wien ne u'mɔ li yé n'buk. <sup>8</sup> Bà sen' bujɛwaanbu nin bà ña fɔre' Kristo ya sen ni nin bà teh ijuoke ya bont nin binikub nin isɔnsɔnd nin biñɔkdenb nin bà pɛ ibule bo. Bi'ke ya tɔn nin bi'lenm ña kpe gbemɔnt ya sen. Bi'bùol si kumubuoku kùà ni mitenñakjiem te len ki teknh nnɔ ne. Nen ne yé mikuliem.»

### *Yerusalemfaan ya gber*

<sup>9</sup> Uwien ya tondb bilole bà ñuuke ijendfɔrke isèn ilole ni nnɔ ya uba baa' ki lá tɔke' nni ki ye: «Den, ní wuɔn ñe ujɛfaan wà Kipebuk li kuɔn wɔ nnɔ.» <sup>10</sup> \*Mifuoñaanm cère' n laa' nà tidɛknt yaam nnɔ ni ne utond nnɔ taa' nni ki don' lijɔfɔkrl liba bo, ki wuɔn' nni Uwien ya du Yerusalem u ñen' u'saan paaki bó ki jinh ní. <sup>11</sup> Uwien ya wenwenku wendeh wù ki cère' u windeh ten litenl là ya daaku faa, ki windeh ten litenl là bɔn ten lidingl ki likeh ki càareh. <sup>12</sup> Liguoncenciendl liba ne là guɔn' udu nnɔ, ki ñmɔbe inañuɔn piik nin ile. Uwien ya tondb piik nin bile se inañuɔn nnɔ ke saan. Israyel yaab ya baamul piik nin ile ya yel kele' inañuɔn piik nin ile nnɔ ke bo. <sup>13</sup> Inañuɔn ita te lenpuoli bó, ita te nintuɔli bó, ita te ugen bó, ita mɔ te ujie bó. <sup>14</sup> Liguoncenciendl nnɔ se iten piik nin ile bo ne. Kipebuk ya tondb piik nin bile ya yel kele' iten nnɔ ke bo.

<sup>15</sup> Uwien ya tond wà lienh nni nnɔ ñuuke miñɔkm ya kpendɔ wɔ ní kpaan udu nnɔ nin u'ñañuɔn nin u'guoncenciendl nnɔ. <sup>16</sup> Udu nnɔ là te ten kangbɔnga ne, u'kele ke inan ya pïen kpe. Ne u taa' ukpendɔ nnɔ ki kpaan' udu nnɔ, ki laa' ikele inan nnɔ, wà ke ya fɔkn te mikpáanm itur piik nin ile ne. U'paaki ya fɔkn mɔ kpe nnɔ ne. <sup>17</sup> U kpaan' \*liguonl nnɔ ki laa' nĩ te kobk nin pinan nin minan ne. U kpaan' binib kpàandeh tibont ma bo ne. <sup>18</sup> Bi là taa' iten yà bi yih yé jaspì nnɔ ne ki men' liguonl nnɔ. Udu nnɔ ke là yé miñɔkm mà wien, ki windeh ki likeh ki càareh ten lidingl ne. <sup>19</sup> Bi là taa' iten yà ya daaku faa ke ya bol ne ki mɔnge' liguonl nnɔ ya tenpuul.

\* 21:17 Mikpáanm nnɔ ya fɔkn kpe kí cin kunɔkpendunku kí tí fɔre inɔbii ne.

Likpiekl yé litenl là bi yih lè jaspi nnə nɛ,  
 liliel yé litenl là bi yih lè safir nnə nɛ,  
 litaal yé litenl là bi yih lè agati nnə nɛ,  
 nnan yé litenl là bi yih lè emolod nnə nɛ,  
<sup>20</sup> nɲun yé litenl là bi yih lè sadoniks nnə nɛ,  
 nluob yé litenl là bi yih lè kaneliyann nnə nɛ,  
 nlole yé litenl là bi yih lè krisolate nnə nɛ,  
 nniin yé litenl là bi yih lè belil nnə nɛ,  
 nwɛ yé litenl là bi yih lè topasi nnə nɛ,  
 piik yé litenl là bi yih lè kalsedoni nnə nɛ,  
 piiknba yé litenl là bi yih lè yasente nnə nɛ,  
 piiknle yé litenl là bi yih lè ametisi nnə nɛ.

<sup>21</sup> Bi là taa' litenl là ya daaku faa bi yih lè pɛrl nnə piik nin ile nɛ ki tien' udu nnə ya nañuən piik nin ile nnə. Nañəbu kɛ nañəbu là jin' litenl liba nɛ. Ki taa' miñəkm mà windeh ki likeh ki càareh tɛn lidingl nnə ki cɛ' mifɛnm mà də udu nnə ya benku ni nnə.

<sup>22</sup> Ma laa' udu nnə ni bi pèkeh Uwien kuduku kua ni, kimɛ Yonbdaan Uwien mituəm kɛ ya daan nin Kipebuk nnə te udu nnə ni, nɛ binib pèkeh bɛ. <sup>23</sup> Udu nnə ya nib ɲa nuunh wien nin ɲmaal rí li wendeh u'ni, kimɛ Uwien ya wenwenku nɛ wendeh wù, nɛ Kipebuk nnə yé u'fɛl. <sup>24</sup> Inibol kɛ li cuon u'wenwenku ni, nɛ utingben bo ya bɛrb li tuke bi'bont tà dienh bɛ ukpieke kí baa u'ni. <sup>25</sup> Udu nnə ya nañuən li tuu ki yɛ uyo kɛ nɛ, nɛ na ji li biire u'ni. <sup>26</sup> Bi li taa tibont tà dienh inibol kɛ ukpieke nin lifaal kí baa u'ni. <sup>27</sup> Nibonn nà kɛ yé tijəkt ya bonn ɲa rí kə u'ni. Binib bà teh ijuəke ya bont nin bà ya tòn nin bi'lenm ɲa kpe gbɛmənt ya sɛn nnə mə ɲa rí kə u'ni. Binib bà ya yel kele' limiel ya gbənkɛ ni nnə baba nɛ li kə u'ni. Kugbənkɛ nnə yé Uwien ya Pebuk nnə yaaku nɛ.

## 22

<sup>1</sup> Uwien ya tond nnə wuən' nni miñunm mà dienh limiel ya kpen u windeh tɛn lidingl ki likeh ki càareh. Mí ñɛh Uwien nin Kipebuk nnə ya bɛrbiek saan nɛ. <sup>2</sup> Limiel ya subu se mifɛnm mà də udu nnə ya benku ni nnə ya siik ni nɛ, ki te ukpen nnə ya kele kɛ ile, ki lònɛh bolm piik nin mile libinl ni. Bù lònɛh ɲmaal kɛ ɲmaal nɛ. Bu'fɛr yé kuɲaaku nɛ ki buuh inibol kɛ. <sup>3</sup> Uwien wiɛ' nà kɛ miñuəm ɲa ji li te udu nnə ni. Uwien nin Kipebuk ya bɛrbiek li te udu nnə ni nɛ, nɛ Uwien ya tonsənb rí li pukeh wə. <sup>4</sup> Bi li lɛ u'nun bó, nɛ bi li kele u'yel bi'yutun bo. <sup>5</sup> Na ji li biire u'ni, nɛ binib nnə ɲa ji li nuunh fɛl, ka ji li nuunh wien rí wende bɛ, kimɛ Yonbdaan Uwien nɛ li wendeh bɛ. Bi li yé bibɛrb nɛ uyo kɛ.

### *Yesu ya baam ya gber*

<sup>6</sup> Uwien ya tond nnə təkɛ' nni ki ye: «Tigbɛr tuu te nɛ, ki kɛ bɛ rí li du tu'bo. Yonbdaan Uwien wà là cɛrɛ' u'ñəbonsəknɛ səkɛn' u'gber nnə, nɛ sən' ní u'tond wə rí lá wuən u'tonsənb tibont tà li tien' na rí taande.»

<sup>7</sup> \*Yesu len' ki ye: «Li cengeh mɛn, n we ní na rí taande.» Wà kɛ tùrɛ' ki ɲuuke Uwien ya gber tà te kugbənkɛ kuu ni nə ki təkɛh nà laan teh nin nà lá li tien nnə ya gber la, Uwien ya mənɛm te u'bo.

<sup>8</sup> Min San nɛ cii' tibont tuu bó ki laa' tū mə. N cii' tu'bó, ki laa' tū ma nnə, nɛ n gbaan' utond wà wuən' nni tū nnə ya nun bó rí puke wə. <sup>9</sup> Nɛ u təkɛ' nni ki ye n la tien nnə, kimɛ u'mə yé min nin n'təb bà yé \*Uwien ya ñəbonsəknɛ nin bà tùrɛ' ki ɲuuke kugbənkɛ kuu ya gber ya tonsəntə nɛ. A li puke Uwien baba nɛ. <sup>10</sup> Nɛ ki tí təkɛ' nni ki ye: «La bəle Uwien ya gber tà te kugbənkɛ kuu ni nə, kimɛ tū li tien uyo wà nnə nɛkn' ní ɲə. <sup>11</sup> Wà bre la, wə rí li teh nà bre ki joh. Wà yíe tijəkt ya tòn la, wə rí li kuəndeh u'ba tijəkt ki joh. Wà yé unimən la, wə rí li teh tinimənt ki joh. Wà yé Uwien yə la, wə rí juore kí li yé Uwien yə.»

<sup>12</sup> \*Yesu tí ye: «Li cengeh mɛn, n we ní na rí taande, kí li tuke lisuul rí lá su unil kɛ u'tuonl kɛ ma bo. <sup>13</sup> Min nɛ yé micincinm nin migbenm, ukpiek nin ufərkɛ.» <sup>14</sup> Binib bà səkreh

bi'liert nnə Uwien ya mənəm te bi'bo. Bən nɛ ɲməbe usen bɛ ɲ mə limiɛl ya subu ya bii, kí ɲɛ bunañɔbu kí kə udu nnə ni\*. <sup>15</sup> Ama bà teh ijuoke ya bont nin biñəkdenb nin isənsənd nin binikub nin bà pɛ ibule bo nnə, bi'kɛ fɛ itùon nin tigbɛr tà ɲa kpe gbəmònt ya sɛn nɛ, nɛ ki pɛ tu'bo. Bən li juore saali nɛ.

<sup>16</sup> «Min \*Yesu nɛ sən' ní n'tond wə ɲ lá təkɛ nɛ tigbɛr tuu n'táan ni. N yé Dafid ya yaabil nɛ, ki wien tɛn litɛnɲɛɲmaasel.»

<sup>17</sup> \*Mifuoñaanm nin Uwien ya Pebuk ya jɛkpen ye: «Dɛn.»

Wà kɛ cii' la, u'mə ɲ ye: «Dɛn.»

Uñuñun ɲməbe wà kɛ la, wə ɲ dɛn,  
wà yíe miñunm mà dienh limiɛl la,  
wə ɲ dɛn kí ñu, ki la pè niba.

### *Tigbɛfərkaar*

<sup>18</sup> N gbierɛh wà kɛ ciih tigbɛr tà te kugbənku kuu ni, ki təkɛh nà laan teh nin nà lá li tien nnə ya gbɛr nnə nɛ. Wà kɛ taa' tigbɛtɔr ki pukn' tigbɛr nnə bó la, Uwien li cère ijɛnd yà bi len' i'bó kugbənku kuu ni nnə ɲ lu u'bo. <sup>19</sup> Wà kɛ kùore' kugbənku kuu ya gbɛr la, Uwien ɲa ɲ cère wə, wə ɲ mə bi len' limiɛl ya subu búa bó kugbənku kuu ni nnə ya bii, ka ɲ cère wə ɲ kə u'du wà bi len' u'bó kugbənku kuu ni nə ni mə.

<sup>20</sup> Wà təkɛ' tigbɛr tuu kɛ nnə ye: «Imən nɛ n we ní na ɲ taande.»

Imən, Yonbdaan Yesu, dɛn.

<sup>21</sup> Yonbdaan \*Yesu ɲ juoke binib kɛ.

---

\* **22:14** Bi kpiɛ' ki kɛlɛ' tigbənt tà nnə ya tuba ni ní kɛlɛ' ki ye: «Binib bà boh tí'gbɛr tà te kugbənku kuu ni nnə Uwien ya mənəm te bi'bo nɛ.»